



# Mussau-Emira Bible

Mussau-Emira Bible

## Contents

Buku eteva ta Rutu	1
Buku eteva ta Jona	7
Masi kiukiu Matiu ghe pitiela	10
Masi kiukiu Mak ghe pitiela	70
Masi kiukiu Luk ghe pitiela	109
Masi kiukiu Jon ghe pitiela	171
Gheegeleiaaira Apostolo Atoa	215
Aitiutiu etikirighi uru ngai Pol ghe pitiela ta aKorint atoa	271
Uru ngai etikirighi Pol ghe pitiela ta aGalaisia ngatoo	296
Uru ngai etikirighi Pol ghe pitiela ta aPises atoa	304
Uru ngai etikirighi Pol ghe pitiela ta aPilipae atoa	312
Uru ngai etikirighi Pol ghe pitiela ta aKolosaee atoa	317
Aitiutiu etikirighi uru ngai Pol ghe pitiela ta aTesalonika ngatoo	322
Aiaaghaluene atikirighi uru ngai Pol ghe pitiela ta aTesalonika ngatoo	327
Aitiutiu etikirighi uru ngai Pol ghe pitiela ta Timoti	330
Aiaaghaluene atikirighi uru ngai Pol ghe pitiela ta Timoti	336
Uru ngai etikirighi Pol ghe pitiela ta Taetas	341
Uru ngai etikirighi Pol ghe pitiela ta Pilimon	344
Uru ngai etikirighi Jeimis ghe pitiela	346
Aitiutiu etikirighi uru ngai Pita ghe pitiela	352
Aiaaghaluene atikirighi uru ngai Pita ghe pitiela	359
Aitiutiu etikirighi uru ngai Jon ghe pitiela	364
Aiaaghaluene atikirighi uru ngai Jon ghe pitiela	370
Aiaakotonna atikirighi uru ngai Jon ghe pitiela	371
Uru ngai etikirighi Jiud ghe pitiela	372



## **Mussau-Emira Bible**

### **Portions of the Holy Bible in the Mussau-Emira Language of Papua New Guinea**

Sampela hap Buk Baibel long tokples Mussau-Emira long Niugini

Language: Mussau-Emira

Provided by: Wycliffe Bible Translators

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

### **Copyright and Permission to Copy**

Copyright © 2006, 2008, 2013, 2016 Wycliffe Bible Translators, Inc.

Copyright © 2006, 2008, 2013, 2016 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

ced3094d-a309-5077-ac61-632ccb011652

ISBN: 978-1-5313-0207-8

*Buku eteva ta*

**Rutu**

**Inangari emuemua**

Buku eteva ta Rutu eaauliaa kiukiu eteae ta kateva vause rau evulula, ararina ateae ta Rutu, aMoabi ia. Alumuna ateva ta Naomi aIsraeli ia. Nau eteva Naomi ghe kiriaa lao sio eIsraeli, Rutu ghe usiela. Rutu ghe apasungaala kinatama niaielousi eteva ta Naomi, ghe kasu vulila kapuna atoa me ghe saela eIsraeli, me ghe aimuli teela kapuira God ateva aIsraeli etoa. Ararina ateae Rutu ghe namuula eIsraeli, ta poli tuvuna ta King Deivit me Iesu.

Nau Naomi ghe oghi siola tanganuena eBetlehem, Rutu ghe usiela. Isaa eBetlehem lalu ghe tarala taita ateva ararina ateae ta Boasi. Mangalina ia taitanna ateva Naomi, me tale inangari nipaopao Moses ghe pitila eaauliaa va mangalim ateva eroroo tani poli aoghi kosam, poli laghe uusila taita atoa. Boasi ghe ghelei ekapala isaa o voto me ghe laila ta Rutu, natuirarua amua ateva ghe mene ghaala kosane ateva Elimelek, taitanna ateva Naomi.

Tani kila amuemua

Rutu ghe karangailila ta Naomi 1

Rutu ghe tarala Boasi 2

Naomi ghe loela inangari etingiu ta Rutu 3

Rutu me Boasi lalu ghe laila 4

**Naomi me Rutu**

**1** Nau ta namu ngatoa laghe aitoia aIsraeli etoa, paka maloo ateva ghe lutula. Taita ateva aBetlehem ia ta pai nge Juda ghe lao sio tani toka tau tale kateae masaliki eMoabi, ia me vauseenna ateva me natuna taita alua. <sup>2</sup>Taumattu ngateva o ararina ateae ta Elimelek, vauseenna ateva ta Naomi, me natuna

taita alua arariirarua ta Maloni me Kilion. Ila ararimangali nge Eprata ila, me tanganueira eBetlehem ta pai nge Juda. Laghe siola eMoabi tani toka.

<sup>3</sup>Vara me Elimelek ghe matela, ghe mate vulula vauseenna ateva ta Naomi, me natuna taita alua. <sup>4</sup>Natuna taita alua lalu ghe laila. Lalu ghe ghaala vause nge Moabi elua, arariirarua ta Opa me Rutu. Laghe tokala ghe roola koti kasangauluae (10) ninamanama. <sup>5</sup>Vara me Maloni me Kilion lalu ghe mene matela, me Naomi nonga ghe tokala, poli taitanna ateva me natuna alua lotolu ghe mate akapala.

<sup>6</sup>Naomi ghe nongola va Iaue ang ghe tau lao sio masi nau ta kapuna atoa me inana ang ghe mene oroi ila. Liuna avalua o ia me alumuna vause alua laghe aimonomosiaala tani kasu vuli eMoabi. <sup>7</sup>Ang ghe kasukasu vuli nongina ghe tokatoka, ia me alumuna vause alua. Ngilotolu ghe kasukasu tani oghi lao eJuda, etapaa salana me <sup>8</sup>Naomi ghe uela etairarua va, “Amalu oghila, me amalu lao tanganueimalua. Amalu laa toka tee kinaimalua alua. Iaue aue eghelei voto masina etaimalua, nongina amalu ghe aitaria ngamasinaailliieghila, me lo tee alua ngilalu ghe matela. <sup>9</sup>Iaue aue eaisausieiniemalua tani mene lai ppae. Me aue amalu toka masina tee!”

Naomi ghe ngusulaluelu, me lalu ghe sauaa saela, me ngilalu ghe ngangngala. <sup>10</sup>Me lalu ghe uela etana va, “Angalu usio, me itolu lao ta kapum atoa.”

<sup>11</sup>Me Naomi ghe uela va, “Masina, amalu oghila, alumughu elua! Vaalua me amalu anna tani usieghi? Karika arooroo tani mene ssu righi natughu taita va amalu ghaa me etaitaniimalua. <sup>12</sup>Amalu oghila, alumughu elua, me amalu lao tanganueimalua. Ngaghele vause namuula. Karika arooroo tani mene ghaa teva taita. Arova aghele ghaa teva taita, ghaine nonga eleivoo, me

ghele mene alutu toa natughu taita, <sup>13</sup> aue karika amalu ghele anna tani mene lai, me amalu ghele toila ta la ghele tani namuu? Karika aghannaa va eisaa avalua o, alumughu elua. Amalua mene masina, me aghi karika masina, ta poli laue ang ghele gheleila voto sesa ang ghele lutula tale maamaulueaghi.”

<sup>14</sup> Me lalu ghe mene sauua saela tani mene ngala. Vara me Opa ghe ngusula alumuna vause ateva tani akorovaia, me ghe kaili emasinala etana. Rutu nonga karika ghe anna tani oghi vulu Naomi.

<sup>15</sup> Me Naomi ghe uela va, “Tarala, iloam ange oghila tani laa tara kapuna atoa me kapuna goto atoa. Laa usia, me amalu oghi.”

<sup>16</sup> Rutu ghe liula me ghe uela va, “Karika aghaloanna va uue va aoghi vulluo. Poli aue eaa ulao, aghi tee aue alao. Me eaa ulaa toka, aghi tee aue atoka. Kapum atoa aue kapughu ila, kapum Goto ateva, aue kapughu tee ia. <sup>17</sup> Eaa ulaa mate, aghi tee aue amate, me la kaia teieghi. Nimate nonga ateva aue epolaitalua. Arova nganim kamekame, laue aue eliu aipolighi sesaaili.” <sup>18</sup> Nau Naomi ghe tarala va Rutu ghe arrekana tani usi, ghe vira ruula tani auliaa etana va eoghi.

<sup>19</sup> Lalu ghe kasula kasula me lalu ghe laa rekata sio eBetlehem. Nau lalu ghe lao sio eBetlehem, ila akapa taumattu ngatoa laghe soghieinielaluela. Me vause atoa laghe aikolomieinila va, “Tani koronna, va ia okae Naomi?”

<sup>20</sup> Me Naomi\* ghe uela etaira va, “Am rau mene kolo Naomi etaghi, am koloaghi va Mara†, poli Vau ngepona ateva sarasarakanaaaili ia ghe gheleila voto kaakaalanaaaili‡ etaghi. <sup>21</sup> Oro peighi

me aghe kasula. Iaue ang ghele ghaa oghieghi mae sio me ngaghele nim peisaanela. Vaalua me am kolokolo Naomi etaghi? Iaue ghe taueghi siola me ia sarasarakanaaaili ia ghe gheleila voto sesa ta ngetaghi.”

<sup>22</sup> Isaa o kiukiuna Naomi nau ghe oghi lao sio tanguenua, lalua me Rutu atala nge Moabi ia. Lalu ghe kasu vulula eMoabi, me lalu ghe laa rekata sio eBetlehem nau laghe tiuaala tani sai bali raisi.

### Rutu ghe soula Boasi

**2** Kateva taumattu, tue peipeiena ia me namuu ia, ghe tokatoka eBetlehem, ararina atea ta Boasi. Mangalina ia Elimelek, taitanna ateva Naomi.

<sup>2</sup> Kateva nau Rutu atala nge Moabi ia ghe uela ta Naomi va, “Aghanna tani laa usi lo atoa la saisai bali raisi tapaa ngutana, me aghaa rigghi ta lo ateva taumattu aue eanna va aghaimuli tee kapuna atoa me aghaa llo ekaokao alokoi.”

Naomi ghe uela va, “Ue, alumughu, laa usi.” <sup>3</sup> Rutu ghe lao sio tani aimuli tee lo atoa laghe saisai bali raisi, me ghe reirei llo laghe aakao. Karika ghe kilakila va paa ngutana atea o umane ia Boasi, mangalina ia Elimelek.

<sup>4</sup> Vara me Boasi ghe rekatala, ghe kasula eBetlehem. Me ghe uela ta tau ngai sai bali raisi etoa va, “Iaue aue etoka teiem.”

Laghe liula me laghe uela va, “Iaue aue earangiseio.”

<sup>5</sup> Boasi ghe uela ta lo ateva ghe aitoia tau ngai uungu etoa va, “See ia aliki vause ateva okae?”

<sup>6</sup> Me kapuira tau ngai toitoi eteva tau ngai uungu etoa ghe liula me ghe uela

\* **1:20 Naomi** Malloeana Naomi va *masina*.

† **1:20 Mara** Malloeana Mara va *kaakaalana*.

‡ **1:20 kaakaalanaaaili** Naomi ghe aulia ngavalua o ta poli ghe nnaala va, “Iaue ang ghe gheleila maamauluaaghi ang ghe aanasaailila, nau ghe tau vella taitannighi eteva me natughu elua lotolu ghe matela me karika rigghi tuvughu.”

va, “Alike vause nge Moabi ia. Lalu ghe kasula eMoabi me Naomi. <sup>7</sup>Emae sio tani nongonongoaa va eaimuli tee lo atoa la saisai bali raisi me erei righi. Etiuaala arau elue talaua tani uungu, me ia okae ange vira mene lao sio tani ain-oana toka tale ale paapali erighi.”

<sup>8</sup>Vara me Boasi ghe uela ta Rutu va, “Natughu, unongo, urau mene laa rei bali raisi ta mene righi ppae paa ngutana, ureirei nonga oia. Utoka tee lo atoa vause la uungu oia. <sup>9</sup>Utara amasina paa ngutana la saisai bali raisi, me uaimuli teeila. Ngaghauliaala ta aliki taita atoa va la rau mene ghelei righi voto ta ngetam. Me arova uanna tani ropi, ulaa ropi tale aikaai manu eteva o aliki taita atoa la akuela.”

<sup>10</sup>Vara me Rutu ghe suuiaala me ghe turruula tapaa kosa, me ghe uela ta Boasi va, “Aghi ativuu ieghi. Vaalua me angu kaakaarasi tani ghelei masi voto etaghi?”

<sup>11</sup>Me Boasi ghe liula me ghe uela etana va, “Ngaghe nongo akapala voto ughe gheleila ta alumum vause ateva nau taitainim ateva ghe matela, me vaalua ughe kasu vulila kinam, tamam me tanganuem, me ughe mae sio tani toka tee llo taumattu karika ukilakila.

<sup>12</sup>Iaue aue eliu masi uunguaam, me isaa akapa aipolim kapuira Goto ateva als-raeli etoa aue etau aatu, poli ughe tuutuliela tani aitarainio.”

<sup>13</sup>Rutu ghe uela ta Boasi va, “Masinaaili voto angu gheleila ta ngetaghi, vaughu eteva. Arongona ta karika masina aghi nongina kapum vause atoa tau ngai uungu ila, me angu gheleila voto masina etaghi. Nau uaippooa ngamasina teeieghila, egheleieghila aghateatea ngamasinala me nannaaghi tee emasinala.”

<sup>14</sup>Nau ninamanama, Boasi ghe mene uela ta Rutu va, “Mae ghaa righi verete, me uasuu tale uaeni, me unama tee.”

Rutu ghe toka tee siola tau ngai uungu etoa, me ghe namanama teeilala. Boasi ghe tau lao sio bali raisi etana laghe tuu saela tale kuraa. Rutu ghe namala me ghe ssoiela, me kasina ghe oghi etokala. <sup>15</sup>Nau ghe mene lao sio tani mene reirei, Boasi ghe uela ta kapuna aliki taita atoa va, “Am tau velu Rutu me erei ekalakalangina tale isaa o llo ngam iri eitaua ngatinginala. Am rau mene sama anamuu teeia va epalata. <sup>16</sup>Me am ghaa righi bali raisi tale llo ngam iri eitaua ngatinginala, me am velu elokoi, me aue erei. Am rau mene tiu velua.”

<sup>17</sup>Rutu ghe reireila tale bali raisi elomosi ta sinaka ateva ghe suula. Me ghe paruparuuaala llo ghe reila. Ghe ghaala vorovoro bali raisi ghe roola kateva efa<sup>f</sup>.

<sup>18</sup>Rutu ghe ghaala isaa o bali, me ghe lao sio elo ale, me ghe apasungaala ta alumuna. Ghe sau teela tapiri nginana ghe nama vulula elo sinaka.

<sup>19</sup>Alumuna ghe kolomiela va, “Eaa ureireila me ughuungula tale nau eteva oia? Iaue earangise lo ateva taumattu etaraiola me eaikoloainiola.”

Rutu ghe uela va, “Auungula tale paa ngutana ateaee umana ia taumattu ngateva la ghasease Boasi etana.”

<sup>20</sup>Naomi ghe uela ta alumuna va, “Iaue aue earangiseia! Me Iaue karika ekakkaluaa kanna inangari nialokoi ta lo atoa la tokatoka me lo atoa angila ghe matela.” Naomi ghe uela va, “Ia ona taumattu ngateva uunguaane va, ia esausitalua me tani ghaa oghitalua, ta kalakalanginaaili ia etaitalua.”

<sup>21</sup>Me Rutu atala nge Moabi ia ghe uela va, “Boasi euela etaghi va auungu tee kapuna atoa elomosi ta la ruu tani sai bali raisi ta ngumana.”

---

<sup>f</sup>2:17 efa Efa kateva keru erooroo tani kaai 22 lita.

<sup>22</sup>Naomi ghe uela ta alumuna va, “Alumughu, aue emasinaaili ta ughu-ungu tee kapuna tau ngai uungu etoa vause ila. Urau mene lao ta uma katoa, la rau tam laa ghaitara ngamasinaio.”

<sup>23</sup>Mausina avalua o me Rutu ghe kara ngaparasila ta kapuna tau ngai uungu etoa Boasi vause ila, elomosi ta laghe tani ruula tani sai bali raisi me ulti. Rutu ghe tokatoka tee alumuna vause ateva.

### **Rutu me Boasi tale liu ngai kuluki bali raisi**

**3** Kateva nau Naomi ghe uela ta alumuna va, “Alumughu, aghanna tani pae teva taita, me ulai etana, me aue eaitarainio me utoka amasina. <sup>2</sup>Ia o taita ateva Boasi etana, kapuna vause tau ngai uungu etoa ughe uungu teeilala, kalakalangina ia etaitalua. Ghaine eleivo elaa kuluki bali raisi, liu ta la kuukuluki bali raisi. <sup>3</sup>Ulaa suusu, ukolikoli me uatoka righi unem aiaao masi ngusungusuaane, me usio kona ghaine euungu. Urau mene laa otuotu etana. Utani toi ta enamanama me eropi mua. <sup>4</sup>Nau eteva ange anna tani asekanua, utara tootonga nongina eaa elaa ghaso. Me umange koukouna atiulu, me uaso sio kalakalaa ta komo kkena. Auena eauliaa va sa ateva umene gheleia.”

<sup>5</sup>Rutu ghe liula me ghe uela va, “Masina, aue ausila ngakapa inangarim.” <sup>6</sup>Me Rutu ghe siola nongina la kuukuluki bali, me ghe ghelei ekapala voto alumuna vause ateva ghe auliaa tau lao sio.

<sup>7</sup>Nau Boasi ghe ruula tani ropi me nananama, ghe masimasila. Vara me ang ghe anna tani asekanua. Ghe lao sio tani aso nongina laghe kaokao aitauaa bali raisi. Rutu ghe kasu emorooia ssola, me ghe mangela koukouna atiulu Boasi, me ghe aso siola ta komo kkena. <sup>8</sup>Elo matua voo me Boasi ghe soghila. Vara ghe kiria

me ghe soghiaala vause ateva ghe asoaso ta komo kkena.

<sup>9</sup>Me Boasi ghe uela va, “Io see?”

Me vause ateva ghe liula me ghe uela va, “Aghi Rutu, kapum vause tau ngai uungu ieghi. Pulela me uakoueghi me emannem ieghi, poli io mangalim ta Elimelek. Liuna avalua o me uunguaam tani sausieghe me aitarainaghi.”

<sup>10</sup>Me Boasi ghe uela etana va, “Iaue aue earangiseio, natughu, poli angu apasungaala masi voto ghaine, ange lau ekapanaailila masi voto ughe gheleila ta Naomi. Me karika ughusiusi kkai aliki taita atoa, tue peipeiena ila me lo atoa karika peiira. <sup>11</sup>Ghaine, natughu, urau mene matautu. Aue aghelei ekapa voto ukolomila. Ila akapa taumattu ngatota tale masaliki eteae oia la kilakila va io eeleiaam me tokatokaam masinaaili. <sup>12</sup>Koronna va aghi mangalina aghi taitanim ateva, me uunguaaghi tani ghaa oghio. Me mene kateva taumattu ararimangalimami eitauaa, ia tee uunguaane tani sausio me ghaa oghio, poli ia kalakalanginaaili ia etam. <sup>13</sup>Asola oia, me aue epai alaa pae ia o taumattu ngateva, me anongo va vaalua nannaane. Arova ealoanna tani aitarainio, masina. Arova karika, aghi aue aghaitarainio. Koronnaaili laue ang ghe kilala. Masina, asola oia me aue elue talaua ukasu.”

<sup>14</sup>Rutu ghe aso siola ta komo kkena Boasi. Ghe tam pai emasina elue talaua me ghe totula. Me Boasi ghe uela va, “Karika toa la mene kila va vause ateva emae sio oia nongina la kuukuluki bali raisi.”

<sup>15</sup>Boasi ghe uela va, “Ghaa mae sio tuku kaliom atiulu uvaovaoa, me upuleia me uposoa.” Boasi ghe kala tau lao sio bali raisi erooroo ghaonomo (6) keru. Boasi ghe sau etoka saela ta Rutu. Ghe ruula me ghe lao sio elo masaliki.

<sup>16</sup>Nau Rutu ghe laa rekataa sio ta alumuna, alumuna ghe taraiela me ghe uela

va, “Ane vaalua? Masina?” Rutu ghe aulia ngakapaailila voto Boasi ghe gheleila. <sup>17</sup>Me Rutu ghe uela va, “Boasi ekala tau mae sio bali raisi. Euela va, ‘Karika erooroo va unim lao ta usau righi bali raisi me ughunusi lao.’”

<sup>18</sup>Me Naomi ghe uela va, “Alumughu, unim matua atoka me utoitoi, poli karika ngitalu kilakila va sa ateva ninannaa ghaine elutu. Utara Boasi karika aue eainoana amasina lomose ta inangari evira masina.”

### Boasi ghe laila ta Rutu

**4** Boasi ghe saela tale liu ngai veluvelu eitaua ngateva kona laghe kupikupi sso, me ghe toka siola. Karika masau, me ghe tarala mangaliirarua ateva me Elimelek, ia o ghe aulieinia ang ghe reerekata me ghe uela va, “Ei! Mangali, mae toka sio mua!” Ghe lao sio me ghe toka siola.

<sup>2</sup>Me Boasi ghe kolola kasangaulu (10) namuu laghe aitoia masaliki eteae okae me ghe uela va, “Am mae toka sio.” Me laghe toka siola. <sup>3</sup>Me ghe uela ta mangalina va, “Naomi ang ghele oghi mae sio, ghe kasula eMoabi. Me ealoanna va teva taumattu kapuna Elimelek, ia o mangaliitalue ia, epoli tuku kosane ateva. <sup>4</sup>Liuna avalua o, me auela va aghauliaa kiem. Arova ualoanna tani polia, upolia ta mataira namu ngatoa me taumattu ngatoa. Me arova utam aloanna tani polia, uauliaa etaghi me akila. Karika mene teva, ta italua nonga. Io tani kalakalanginaaaili io, me auena aghi.”

Me ghe uela va, “Aue apolia.”

<sup>5</sup>Boasi ghe uela va, “Arova upoli tuku kosa ateva ta Naomi, ughaa tee Rutu me evausenim ia. Me isaa o kosa elao ta natuna atoa lo ateva taumattu ang ghe matela.”

<sup>6</sup>Me ia o taumattu ngateva ghe uela va, “Karika amene polia, ta karika

aghaloanna va peighi elao ta mene ka-toa aliki karika va natughu ila. Io upolia me ughaa isaa o voto.”

<sup>7</sup>Emua arau ta Israeli etoa, arova angila aloanna tani aipolia voto, tani auliaa, me aikolikoliaa righi voto, laghe ghelei evalua toko va taumattu ghe lullu velu unna aikasukasu, me ghe tautau lao ta mene kateva. Isaa o voto laghe elei elIsraeli.

<sup>8</sup>Liuna avalua o me mangalina ateva Boasi ghe uela va, “Io upoli tuku kosa ateva,” me ghe llu tau lao sio kateva tana unna aikasukasu ta kkena.

<sup>9</sup>Me Boasi ghe uela ta namu ngatoa me ila akapa taumattu ngatoa va, “Am akapa ngam tarala va voto kanna Elimelek, Maloni me Kilion, isaa o ghe tokatoka ta nimana Naomi, ghaine ngapolipoli ekapa. <sup>10</sup>Aghi ngaghaaghaa Rutu ia o vauseni nge Moabi eteva, Maloni ghe mate vuluela me evausenighi ia. Kosane Maloni aue etoka ta kapuna atoa. Liu ta la tokatoka, kapuna atoa karika la mene aikkaluaa ararina atea. Ghaine am akapaaili ngam tarala me ngam nongo akapaailila voto.”

<sup>11</sup>Me ila akapa taumattu ngatoa me lo atoa la ghaitoieinila laghe uela va, “Ue, ngami tarala me ngami nongola. Iaue aue eghelei emasina ta ia o vause ateva ang ghe mae sio ta ngetam. Aue ealutu oroi aliki, nongina tuvuita vause alua alIsraeli etoa ta Resolo me Lia. Me io aue unamuu ta ararimangali eteva eEprata, me aue la kila akapaio eBetlehem. <sup>12</sup>Iaue aue etau aatu oroi aliki etaimalua. Aue la oroiaaaili nongina natuna atoa Peresi, natuirarua taita ateva Juda me Tama.”

<sup>13</sup>Vara me Boasi ghe ghaala Rutu, me ghe vausenna iela me ghe aso teeiela, me Iaue ghe arangiseilaluela, me Rutu ghe kaaila, me ghe ghaala aliki eteva taita ia. <sup>14</sup>Me vause atoa laghe uela ta Naomi va, “Ukkaua Iaue poli ange tau aatu sio



natum taita ateva ia o tuvum ia. Ia aue eaitarainio, me ararina ateae aue enamu ta alsraeli etoa. <sup>15</sup> Alumum ealoannaailio me io tee ualoannaailia. Arova natum taita ghaitu, karika aue ughele ailousieinila nongina uailousiaa alumum vause ateva. Liuna avalua o me ia o natum taita ateva ang ghele lutula, aue esausi tokatokaam, me aue eaitarainio nau uvause namuu.”

<sup>16</sup> Naomi ghe saula aliki eteva. Ghe tokatoka teeia, me ghe aitarainia. <sup>17</sup> Mene katoa vause laghe tokatoka aitauaa laghe uela va, “Naomi ang

ghele saula aliki eteva taita ia,” me laghe asela ararina ate ta Obet. Tamane ia Jesi, me Jesi tamane ia King Deivit.

<sup>18</sup> Vituu etoa ta Peresi:

Peresi ghe alutula Eseroni.

<sup>19</sup> Eseroni ghe alutula Ram,

me Ram ghe alutula Aminadab.

<sup>20</sup> Aminadab ghe alutula Nasoni,

me Nasoni ghe alutula Salmoni.

<sup>21</sup> Salmoni ghe alutula Boasi,

me Boasi ghe alutula Obet.

<sup>22</sup> Me Obet ghe alutula Jesi,

me Jesi ghe alutula Deivit.

*Buku eteva ta*

**Jona**

**Inangari emuemua**

Buku eteva ta Jona, ie ppae ta mene katoa tana buku propete, poli eaauliaa kiukiuna Jona, karika eaauliaa niuungu tani apasunga. Tee karika Jona nongina mene katoa propete, poli ghe nongo vulula God. God ghe suula Jona tani laa ppooaa eNinive, kinatama masaliki eteae eAsiria, tau ngai ssateeira ila aIsraeli etoa. Jona karika ghe nongo usilaala tani laa ppooaa etaira, poli ghe kilakila va God aue enim kkaluaa kaluira ssavoto, me karika aue etturu kinatama masaliki eteae eNinive.

God ghe apasungaala etaita ta buku eteva oia va ie nonga eaitoia kosa akapa ateva, karika aIsraeli nonga atoa. Ghe suula kinatama kuukuu eteva ghe lao sio tale anua ateva nau Jona ghe iloula, ghe suula kko ateva tani asaangi Jona, me ghe aloannala va tau ngai ssateeira aIsraeli etoa la nna ngaioghioghiaa tale kaluira ssavoto.

Tani kila amuemua

Jona ghe ilou eisuliaala ta Iaue 1

Jona ghe looloo saela ta Iaue 2

Jona ghe lao sio eNinive, me taumattu ngatoa laghe aiesoala tale inangarina God 3

Jona ghe sessaiela poli Iaue ghe nna ngaioghioghiaala 4

**Jona ghe ilou eisuliaala ta God**

**1** Inangarina Iaue ghe mae sio ta Jona natuna ia Amittai. Ghe uela va, <sup>2</sup>“Kasula me ulao eNinive, kinatama masaliki taatara atea. Ulaa ppooa ngaotu eeieaaira karika masina, poli ataata va ang ghe namungaili ila.”

<sup>3</sup>Jona ghe anna tani ilou eisulia tee Iaue. Karika ghe lao sio eNinive, ta ghe

lao ppae sio tale kateae ppae masaliki eTarsis. Ghe siola eJopa me ghe paela anua ateva ghe aloanna tani lao eTarsis. Ghe polila salana me ghe saesaela etana tani lao eTarsis, tani ilou eisulia tee Iaue.

<sup>4</sup>Me Iaue ghe suula kinatama kuukuu ttasi eteva ghe lutu teeilala elamana, ttasi vaoo ateva namungaili ia. Anua ateva ghaisa ngarighi ghe tapolapolaka.

<sup>5</sup>Me tau ngai uungu etoa tale anua ateva laghe tiuaala tani matautu, me laghe kolokoloa nganamu kapuira kurturu etoa. Me laghe tiuaala tani sau veluvelu sio ghinna atoa elamana tani ghelei oakana anua ateva.

Me Jona ghe siola arau euu tale paa nganua ateva. Ghe laa sio aso me ghe asekanuela me ghe llusula. <sup>6</sup>Kapteni eteva ghe siola etana me ghe uela etana va, “Vaalua me uaseasekanua? Totula me ukolokoloa kuturum eteva. Koti ia aue ealousiusi teeita me aue esausita, me karika aue ita mate.” <sup>7</sup>Me tau ngai uungu etoa tale anua ateva laghe uela va, “Ita piti arariita me ita kape nonga katengaata. Lo atea arari ita kape akasina, ia aue ita kila va, ia o taumattu ngateva mausina me ngita sessa.” Laghe ghelei evaluela o, me ararina atea Jona ghe otuela.

<sup>8</sup>Vara me laghe uela etana va, “Uauliaa kiemami mausi saa me voto sesa ange saetala? Saa uunguam? Me aliaa io, me eaa tanganuam? Me see ila kapum atoa?”

<sup>9</sup>Me ghe uela etaira va, “Aghi albruioghi. Akakkaua Iaue, God epona liu ghe gheleila paamanu eteva me kosa ateva.”

<sup>10</sup>Jona ghe uela ta tau ngai uungu etoa tale anua ateva va, “Aghi ilou eisuliaala ta Iaue.” Laghe nongola me laghe matautu saasakiaala. Me laghe uela ta Jona va, “Vaalua me ughe gheleila voto oia sesaaili?”

<sup>11</sup> Laghe uela etana va, “Ami saa etam me aue lueiemami?” Poli ttasi eteva ange sessaaili.

<sup>12</sup> Me ghe uela etaira va, “Am saueghila me am sau velueghi sio elamana me aue luei, ta mausighi me kinatama ttasi eteva euviuuiem.”

<sup>13</sup> Me karika, ta tau ngai uungu etoa tale anua ateva laghe oseose paraparasi tani sso elae, me karika laghe rooroo, poli ttasi eteva ang ghe naanamungaili.

<sup>14</sup> Vara me laghe kolokolo saela ta Iaue. Laghe ue va, “O Iaue, urau mene tau veluemami va ami mate, ta poli ngami ghaaghaa velu maamaulueane ia oia taumattu ngateva. Me urau mene tau velu righe voto sesa eailutua tale maamaulueaimami, poli ngami uviuvi emate taumattu ngateva karika righe eeleiaane sesa, poli io Iaue, ughelei voto tale aloalooanaam.” <sup>15</sup> Laghe saula Jona me laghe sau velue siola elamana, me ghe lueila. <sup>16</sup> Tau ngai uungu etoa tale anua ateva laghe matautangailila Iaue. La ghe gheleila aiaavusuvusueana, me laghe auliaala inangariira nialokoi ta Iaue.

<sup>17</sup> Iaue ghe suula kinatama kko ateva ghe olomila Jona. Ghe laa sso toka kolutu lla me voo ta kova kko ateva.

### Jona ghe looloo sae

**2** Elome tale kova kko ateva me Jona ang ghe looloo sae ta Iaue.

<sup>2</sup> Ghe ue va,

“Voto sesa eghe lutu teeieghila, liuna avalua o me aghe kolo taula Iaue, me ghe liula.

Aghe tokatoka tale voto ateva sesa ia, llo taumattu matena la tokatoka etana, me aghe kolokolo saela etam, me ughe nongoaghila.

<sup>3</sup> Ughe sau velueghi sio mae arau euueili tale paamanu eteva.

Manu eteva ghe akoueghila me ugheleila kinatama koto atoa la ghasuula epona etaghi.

<sup>4</sup> Aghe annaa va, angu ghe tiu velueghila tale taataram

me karika,

ta aue aghi amene tara alem ale manga ateva.

<sup>5</sup> Koto atoa la ghasuula epona etaghi, me egheleieghila gharighi tau ghele arropieghi

me malionge ateva ghe akoueghila.

Me rarrasa ngelamana atoa la ghakou taliaala urughu eteva.

<sup>6</sup> Aghe siola arau tale liue motouru etoa tale paamanu eteva.

Sesa voto ia nongina va atokatoka laalaa liu tale ale mata voofoo.

Iaue, io kapughu Goto io,

ughe ghaa oghieghila me aghe kasu vulila sesa voto ateva.

<sup>7</sup> Nau maamaulueaghi ange kapakapa, aghe annaala Iaue,

me aghe looloo saela etam tale alem ale manga ateva.

<sup>8</sup> Llo taumattu ghe kakkaua kamena atoa kuturu,

laghe kasu vulila aielousiaam ateva.

<sup>9</sup> Aghanna tani kaueinio tale nikkinari me tale niaiaavusuvusueana,

tani tau sae ararim atea.

Isaa akapa voto aghe gheleila inangari nialokoi etana, aue aghelei.

Iaue nonga erooroo tani asaangita.”

<sup>10</sup> Me Iaue ghe auliaala ta kko ateva, me kko ateva ghe laa sso lue atoka Jona elae.

### Jona ghe lao sio eNinive

**3** Inangarina Iaue ghe mene mae sio ta Jona ghaluene va, <sup>2</sup> “Kasula, me ulao eNinive, kinatama masaliki taatara atea. Ulaa ppoa ngaotu inangari atuu.”

<sup>3</sup> Jona ghe aimuli teela inangarina Iaue me ghe lao sio eNinive, kinatama masaliki taatara ia. Urooroo tani kasu talia etana kolutu nau. <sup>4</sup> Jona ghe kasula me ghe laa rekata sio. Aitiutiu eteva

nau ghe rekatala eNinive, ghe tiuaala tani ppoaaa ta taumattu ngatoa. Ghe ue va, “Ghaatingaulu (40) nau aue eruui, me Ninive aue God euvi tuuturungia.”<sup>5</sup> Taumattu nge Ninive atoa laghe aiesoala ta God. Laghe samaa seela va, “Ita rau mene namanama, me ita rau mene ropi.” Me laghe asaela ghinna nialousiusi, namuu me aliki etoa.

<sup>6</sup> Inangarina ghe laa rekata sio ta kingi nge Ninive ateva. Kingi eteva ghe tingina vulu saela aitokatokane ateva, me ghe llu vella unna aiaasae ateva, uneira ia namu ngatoa, me ghe asaela ghinna nialousiusi, me ghe toka siola tale au kura. <sup>7</sup> Me ghe uela va, “Am laa aulia ngakapa see eNinive va,

“Aghi me kapughu namu ngatoa ami uela va, karika teva taumattu me ghaata kkena emene ropi, me enamanama. <sup>8</sup> Am akapaaili taumattu me ghaata kkena atoa am asae ghinna nialousiusi. Am kolokolo anamuu sae ta God. Me am oghi vulu sesa gheeleiaaimim me am ruu tani kiiuaa mene kateva. <sup>9</sup> Arova ita ghelei evalua o, koti God aue eaikolikoliaa nannaane tani sessaia me karika ita mene mate.”

<sup>10</sup> Laghe oghi vulula eeleiaaira sesa, me God ghe tarala voto laghe gheleila, me ghe aikolikoliaa nannaane, me karika ghe gheleila voto ghe uela va eghelei.

### **Jona ghe sessaia tale kanna niaielousi God**

**4** Jona ghe sessai saasakieiniela me ghe tam masimasila. <sup>2</sup> Ghe looloo saela ta Iaue, ghe ue va, “O Iaue, karika aghe kasu vuli tanganueghi me aghe kilala va karika aue utturu eNinive. Liuna avalua o, me aghe ilou eisuliaala tani lao eTarsis. Aghe kilakila va io masinaaili io, me karika urooroo tani tturuu, me karika essai parasio. Unem niaielousi

namungaili me gharovaeata ta uaikolikoliaa nannaam. <sup>3</sup> O Iaue, ughaa velu maamaulueaghi, poli arova amate aue emasina. Arova atam mate, karika aue emasina.”

<sup>4</sup> Iaue ghe liula me ghe uela va, “Jona! Vaalua, masina ta essesaio?”

<sup>5</sup> Jona ghe kupi vulu ghoala kinatama masaliki taatara atea, me ghe lao sio ta pai sinaka esae. Ghe gheleila natu paa-pali erighi tani toka me tani tara sa ateva ghe mene lutu tale kinatama masaliki taatara atea eNinive. <sup>6</sup> Vau ngepona Iaue ghe apinosala ngaapa atea, tani apallungia. Me ghe sausia, poli karika ghe annaa me ateaata righi masina. Jona ghe masimasiangailiia ia o ngaapa atea. <sup>7</sup> Vara elue talua ta mene kateva nau, God ghe suula gharighi natu voto erarra tani laa nama amate ia o ngaapa atea, me emmate. <sup>8</sup> Nau ta sinaka ateva ghe saela, God ghe suula kuukuu eteva aanasa ia ghe mae sio ta pai nge sinaka esae, me sinaka ateva ghe sinakila uruna ateva Jona, me matane ghe leeleela, me ang ghe anna tani katuu. Me Jona ang ghe aannaa va, “Arova amate aue emasina. Arova atam mate, karika aue emasina.”

<sup>9</sup> Vara me God ghe uela ta Jona va, “Vaalua, masina ta essesaio tale ngaapa atea?”

Me Jona ghe liula me ghe uela va, “Ue! Ange sessaieilliieghila, me aghanna va arova aghele mate.” <sup>10</sup> Iaue ghe uela va, “Uaalousiusi tee ngaapa atea io karika ughe uungu aanasala etana, me karika ughe apinosaiela, ta ghe nim pinosala eleivoo, me mene kateva voo ghe mmatela. <sup>11</sup> Aghi tee aghalousiusieili tee eNinive, ta oroieili taumattu ngatoa, tani ioila elaulau kateva ai ghaluengaulu airari (120,000). Me karika la rooroo tani kila va eaa sesa me eaa masina, me oroinaaili tee ghaata kkena atoa.”

*Masi kiukiu*

## **Matiu**

*ghe pituela*

### **Tuvuna atoa Iesu Karisto**

*(Luk 3:23-38)*

**1** Lo ateva oia buku eauliaa tuvuna atoa Iesu Karisto<sup>§</sup>. Iesu tuvuna ia Deivit. Me Deivit tuvuna ia Abraham.

<sup>2</sup> Abraham tamane ia Aisiki, me Aisiki tamane ia Jekop, me Jekop tamane ia Jiuda me tuena atoa me nengane atoa,

<sup>3</sup> me Jiuda tamairarue ia Peres me Sera, kinairarua ta Tamar, me Peres tamane ia Hesron, me Hesron tamane ia Ram,

<sup>4</sup> me Ram tamane ia Aminadab, me Aminadab tamane ia Nason, me Nason tamane ia Salmon,

<sup>5</sup> me Salmon tamane ia Boas, kinna ta Reiab,

me Boas tamane ia Obet, kinna ta Rutu, me Obet tamane ia Jesi,

<sup>6</sup> me Jesi tamane ia King Deivit, me Deivit tamane ia Solomon,

kinna Solomon manna akasina ia Uraea,

<sup>7</sup> me Solomon tamane ia Rehoboam, me Rehoboam tamane ia Abia,

me Abia tamane ia Eisa,

<sup>8</sup> me Eisa tamane ia Jehosapat, me Jehosapat tamane ia Jehoram,

me Jehoram tamane ia Usaea,

<sup>9</sup> me Usaea tamane ia Jotam, me Jotam tamane ia Eihasa,

me Eihasa tamane ia Hesikaea,

<sup>10</sup> me Hesikaea tamane ia Manase, me Manase tamane ia Eimon,

me Eimon tamane ia Josaea,

<sup>11</sup> me Josaea tamane ia Jehoiasin<sup>\*\*</sup> me nengane atoa. Isaa o nau laghe soalotila aIsraeli etoa me laghe siola eBabilon.

<sup>12</sup> Ghe mene tiuaala nau eteva laghe siola eBabilon:

Jehoiasin tamane ia Sealtiel, me Sealtiel tamane ia Serubabel,

<sup>13</sup> me Serubabel tamane ia Abiut,

me Abiut tamane ia Eliakim,

me Eliakim tamane ia Eisor,

<sup>14</sup> me Eisor tamane ia Sadok,

me Sadok tamane ia Akim,

me Akim tamane ia Eliut,

<sup>15</sup> me Eliut tamane ia Eleasar,

me Eleasar tamane ia Matan,

me Matan tamane ia Jekop,

<sup>16</sup> me Jekop tamane ia Josep, manna ia Meri, ta ngetana Meri Iesu ghe lutula, la aseasea va Mesaea<sup>††</sup> ia.

<sup>17</sup> Liuna avalua o me tuvuna atoa Abraham ghe tiuaala me ghe mae sio ta Deivit eroroo kasangaulu ghaata (14) vituu. Me ghe tiuaala ta Deivit me ghe ghaala nau eteva laghe siola eBabilon eroroo kasangaulu ghaata (14) vituu. Me ghe mene tiuaala tale nau laghe siola eBabilon me ghe ghaala nau ta Mesaea eroroo mene kasangaulu ghaata (14) vituu.

### **Lutulutuaane Iesu Karisto**

*(Luk 2:1-7)*

<sup>18</sup> Kiukiuna Iesu Karisto nau eteva ghe lutula, ia avalua toko. Kinna ta Meri, laghe uela va aue eghaa Josep me emanna ia, me karika lalu ghe aso aitauaa me laghe tarala va tale sarasarakaniaane Spirit Manga ateva me Meri ghe kkaaila aliki eteva. <sup>19</sup> Manna ta Josep ghulughuluena ia, ghe nongola va Meri ange sunukula, me ghe aloanna

§1:1 *iKaristo* Utara Malloeana inanagari

\*\*1:11 Tale inangari nge Grik, *Jekonia*, mene kateae ararina Jehoiasin

††1:16 *Mesaea* Utara Malloeana inanagari

tani tiu velua. Me ghe mene annaa va erau ghelei Meri va epalata ta mataira taumattu ngatoa, ta ghe nim annaa tani rati einaoa.

<sup>20</sup> Nau eteva Josep ghe annangailo, arovaeaata ta kapuna ensolo ateva Vau eteva ghe mae sio etana tale niasoasopoi eteae. Me ghe auliaala etana va, “Josep io tuvuna io Deiviti, urau mene matautu tani ghaa Meri va evausenim ia. Unongo, ia o aliki eteva ekakkaia ta kovana, Spirit Manga ateva ghe taue lao sio etana.” <sup>21</sup> Aliko eteva aue emolenainia aue taita, me ukolo ararina atea ta Iesu, poli ia aue esaangi kapuna taumattu ngatoa,<sup>‡‡</sup> eghaa oghila tale kaluira ssavoto.”

<sup>22</sup> Isaa akapa lo Vau eteva ghe auliaala ta propete ateva emua arau ang ghele kaurekatila, ghe uela va, <sup>23</sup> “Am nongola, kateva vause karika ghe aso teeva taita aue esunuku me emolena aliki eteva taita ia, me aue la kolo ararina atea ta Immanuel”<sup>¶¶</sup> — malloeana va “God etokatoka teeita.”

<sup>24</sup> Nau eteva Josep ghe angula, ghe gheleila lo voto kapuna ensolo ateva Vau eteva ghe auliaala etana, me ghe ghaala vause ateva. <sup>25</sup> Me karika ghe aso teeiela lomosina ta ghe molenala aliki eteva, taita ia. Me ghe kolola ararina atea ta Iesu.

### **Tau ngalomasaanga atoa laghe mae sio tani tara Iesu**

**2** Meri ghe molenaala Iesu eBetlehem nge Jiudia nau ta King Herot. Iesu ang ghe lutula me emulina tau ngalomasaanga atoa, tale pai nge sinaka esae laghe mae sio eJerusalem <sup>2</sup> me laghe kokkolomie see va, “Eaa ia aliki eteva ghe lutula, kapuira Kingi aJiu etoa? Ami

ghe tarala kattona ateva tale pai nge sinaka esae ativilau, me ami mae sio tani kkaueinia.”

<sup>3</sup> Nau eteva King Herot ghe nongola isaa o inangari ghe annangailo, me tee ila akapa taumattu nge Jerusalem atoa, ila tee laghe anna ngatingina. <sup>4</sup> Vara me ghe kolola namu ngatoa tana pristi, me tau ngalomasaanga atoa tale inangari ni-paopao ta alsraeli etoa, laghe mae sio tani velu eitauaa, me ghe kolomilala va eaa Mesaea ngateva aue elaa lutu. <sup>5</sup> Me laghe liula etana va, “Aue elutu eBetlehem nge Jiudia. Poli propete ateva ghe pitila inangari isaa avalua toko,

<sup>6</sup> “Me io Betlehem tale kosa nge Jiuda, karika tani ghaunaaili ararim atea tale isaa akapaaili masaliki nge Jiuda, ta poli ta ngetam aue taumattu ngateva namuu ia aue etingina.

Me ia aue eaitoiaa kapughu alsraeli etoa.”<sup>§§</sup>

<sup>7</sup> Herot ghe nongola isaa o inangari me ghe suu eisuliaala inangari ta tau ngalomasaanga nge sinaka esae atoa va la mae taraia. Nau eteva laghe mae sio, ghe kolomi emasinaailala va, “Elovisa am ghe tani tarala katto ateva ghe kau-rekatila?” <sup>8</sup> Vara me ghe sungilala va, “Am lao sio eBetlehem, me am laa pae aotu va eaa ang ghele lutula ia o aliki eteva. Nau eteva am tani taraia am mene mae auliaa etaghi, me aghi tee alaa kkaueinia.”

<sup>9-10</sup> Nau laghe ruula tani nongo inangarina Kingi, laghe kasula. Laghe laolao me laghe mene tarala katto ateva, laghe taraiela esinaka esae. Nau eteva laghe mene tarala katto ateva laghe masimasieilila. Ia o katto ateva ghe mue-mueinila elaelao me ghe tokala epona

<sup>‡‡</sup>1:21 Tale inangari nge Ibru, Iesu malloeana va “Iaue esaangi”. Iaue ararina atea God tale Pokane ateva Inangari niaippooa ngaitauaa. Utara Eksodas 3:14-22.

<sup>¶¶</sup>1:23 Aisaea 7:14

<sup>§§</sup>2:6 Maeka 2:5

kona aliki eteva ghe asoaso. <sup>11</sup> Tau ngalomasanga atoa laghe kupi ssola tale ale ateva, me laghe tarala aliki eteva me kinna ta Meri. Laghe turru siola me laghe kkaueiniela, me laghe otila uneira aikaai, me laghe kapela golo, frankinsens\*, me murr† tani taula etana. <sup>12</sup> God ghe auliaala kieira tale niasoasopoi va la rau mene lao nongina Herot etokatoka, me laghe lao ppae sio tale katikirighi salana me laghe lao sio tanganueira.

### Josep, Meri me aliki eteva laghe siola eljip

<sup>13</sup> Laghe kasula, me kapuna ensolo ateva Vau eteva ghe rekataala ta Josep, tale niasoasopoi eteae. Ensolo ateva ghe uela etana va, “Totula, me ughaa aliki eteva me kinna, me amatolu kasu parasi sio eljip. Am sio toka eljip, aue aghauliaa etam va elovisa am mene kiri sae. Poli Herot epaepae aliki eteva tani uvi ematea.”

<sup>14</sup> Josep ghe totula me ghe ghaala aliki eteva me kinna, me eleivoo arau laghe siola eljip. <sup>15</sup> Josep ghe tokala eljip me ghe ghaala nau eteva Herot ghe matela. Isaa o voto ghe lutula tani akaurekati llo Vau eteva ghe auliaala ta propete ateva emua arau. Ghe uela va, “Natughu taita ateva ghe tokatoka eljip, me aghe mene kolo veluela eljip.”‡

### King Herot ghe auliaala va la uvi emate aliki taita atoa

<sup>16</sup> Nau eteva Herot ghe kilala va tau ngalomasanga atoa laghe kameala me karika laghe mene kiriaa lao sio, ghe sessai emateala, me ghe uela va la uvi emate isaa akapaaili natu ngaliki taita

eBetlehem me llo masaliki etokatoka akalakala, aliki aneira ninamanama etit-tiuaa ta ghaluae me esiosio aloi, poli tau ngalomasanga atoa laghe uela va laghe tarala katto ateva ghe kaurekatila ghaluae ninamanama ang ghe lange sio. <sup>17</sup> Llo voto propete Jerimaea ghe auliaala ang ghele tani kauerekatila, ghe uela va,

<sup>18</sup> “Laghe nongola lingi ngalo ateva eRama.

Laghe ngangngala me laghe alea mate, Resol ghe ngangngala natuna atoa. Karika ghe aloanna righi airuui ngalo,<sup>¶</sup> poli ila akapa natuna atoa ngila ghe matela.”§

### Josep me Meri lalu ghe kiri saela eNasareti

<sup>19</sup> Nau Herot ghe matela, ensolo ateva ghe rekatala ta Josep tale niasoasopoi eteae eljip <sup>20</sup> me ghe auliaala etana va, “Ughaa aliki eteva me kinna me amatolu mene sae eIsrael. Ta lo atoa laghe aaloanna tani uvi emate aliki eteva angila ghe mate akapala.”

<sup>21</sup> Josep ghe totula me ghe ghaala aliki eteva me kinna me laghe saela eIsrael. <sup>22</sup> Vara me Josep ghe nongola va ouna ateva King ta Arkelaus ghe ghaala liuna ateva tamana ta Herot eJudia me ghe matautula tani lao. Vara me God ghe auliaala kiena tale niasoasopoi eteae va erau mene toka eJudia, me ghe saela eGalili. <sup>23</sup> Ghe lao sio tani toka tale masaliki eteae laghe aseasea va eNasareti. Isaa o llo propete atoa laghe auliaala ang ghele tani kaurekatila va, “La aseasea va aNasareti ia.”

\*2:11 *frankinsens* frankinsens masi voto aighelei aiaavusuvusena

†2:11 *murr* voto la raararia tale taumattu matena

‡2:15 Hosea 11:1

¶2:18 *airuui ngalo* Utara Malloeana Inangari

§2:18 Jerimaea 31:15

### Jon tau ngai aasuu ia

(Mak 1:1-8; Luk 3:1-9,  
15-17; Jon 1:19-28)

**3** Tale isaa o nau Jon tau ngai aasuu ia ghe mae sio me ghe tokatoka tale voto karika righi taumattu etana eJiudia. Ghe poppooaa tale taumattu ngatoa. <sup>2</sup>Ghe ue va, “Am nna ngaioghioghiaa poli ararimangali eteva epona liu ange aakalakala.” <sup>3</sup>Ia o taumattu ngateva ta Jon, God ghe aulieiniela ta propet Aisaea va,

“Tale voto ateva karika righi taumattu etokatoka etana, lingi ngalo taumattu ngateva ekolokolo, eue va, ‘Am aimonomosiaa salane atikirighi Vau eteva, am ghelei eghulughuluenala akapa salane.’”<sup>\*\*</sup>

<sup>4</sup>Unna aisoe Jon laghe gheleila tale uu kamolo, me ghe aiiria paisi eteae viliki vulumakao ia. Ghe namanama toto me iruena nge tapaa tuvui. <sup>5</sup>Tale isaa o nau taumattu nge Jerusalem me isaa akapa eJiudia me taumattu ghe tokatoka kalakala tale ateo atea eJodan laghe mae sio ta Jon. <sup>6</sup>Laghe aulia ngaotu kaluira ssavoto me ghe aasuulala tale ateo atea eJodan.

<sup>7</sup>Jon ghe taatara va oroieili Paresi me Sadiusi etoa laghe mae sio va easuula. Vara me ghe auliaala va, “Am nongina natuira iem katu ngatoa! See euela etaimim va am ilou vuli sessaiaane Vau eteva ange anna tani lutu etaimim?” <sup>8</sup>Am kunea righi ueimim tani apasunga va ngam ghe vella kaluimim ssavoto. <sup>9</sup>Am rau mene ue va, ‘Ami tuvuna amami Abraham.’ Poli aghaauliaa etaimim va God erooroo tani ghelei isaa o atu etuvuna Abraham. <sup>10</sup>Kulum ateva

aimonomosiaana ia tani tue akatuu ai, me isaa o ai karika ekuukunea masi uene aue la tue me la sau velu sae tale kuraa atea.

<sup>11</sup>“Aghi aghaasuuem tale manu tani apasunga va ngam ghe nna ngaioghioghiaala. Me taumattu ngateva auena emae, ia sarasarakaniaane elaulau sarasarakaniaaagi, karika masi taumattu ngieghi tani sau unna aikasukasu. Ia aue easuuem tale Spirit Manga ateva me tale kuraa atea. <sup>12</sup>Ia emae arova taumattu ngateva eposoposo unna poko ateva aisaraki vongovongo tale uiti, me eaaimonomosiaa tani pola uiti me kou uiti. Me eatoka aitauaa uiti tale ale ngai atoka uiti eteva, me aue evelu sae kou uiti tale kuraa atea karika erooroo tani pala.”

### Jon ghe asuula Iesu

(Mak 1:9-11; Luk 3:21-22)

<sup>13</sup>Tale isaa o nau Iesu ghe kasula eGalili me ghe mae sio eJodan va Jon easuua. <sup>14</sup>Jon ghe gheghelei rungainia tani ue va, “Emaamasina arova io uasueghi, vaalua me umae sio etaghi?”

<sup>15</sup>Iesu ghe liula etana va, “Masina. Ghaine ughelei nongina aghauliaa. Tale isaa o salana, ita ghelei isaa akapaaili voto God ealoanna va ita ghelei.” Liuna avalua o me Jon ghe aimulisi teela inangarina Iesu. <sup>16</sup>Nau Jon ghe asuula Iesu, Iesu ghe laa sae tingina epona, me epona liu ghe otiela me ghe tarala Spiriti eteva kanna ia God ghe sio mae nongina ghila ateva valusu ia, me ghe toka saoaala etana. <sup>17</sup>Me epona liu kateva lingi ngalo ghe ue va, “Ia o natughu eteva aghalousieinia, me masimasiaaghi ta ngetana namungaili.”

\*\*3:3 Aisaea 40:3



### Satana ghe tootoongaala Iesu

(Mak 1:12-13; Luk 4:1-13)

**4** Tale isaa o nau Spiriti eteva ghe ssoaala Iesu tale voto ateva karika rigi taumattu etana va namu ngat-eva ta raroai etoa etootoongainia. <sup>2</sup>Iesu ghe naela ghe roola ghaatingaulu (40) llaa me ghaatingaulu voo, me airuuruu tale isaa o nau, ghe maloola. <sup>3</sup>Vara me saikame ghe mae sio tani rekataa etana, me ghe uela etana va, “Arova koronna va Natuna io God, uauliaa tale atu etiulu o me ekoli me everete.”

<sup>4</sup>Iesu ghe liula me ghe uela va, “Uru ngai Manga ateva eue va, ‘Karika tau-mattu ngatoa va la maamaulue nonga tale inana, karika, ta la aimulisi tee isaa akapaaili inangarina God aue la mau-<sup>††</sup>.”

<sup>5</sup>Ghe aulia ngavaluela o, me namu ngateva ta raroai etoa ghe mene laoinie sio tale masaliki taatara atea manga ia.<sup>‡‡</sup> Me ghe saeainiela tale pungani ale manga ateva, <sup>6</sup>me ghe uela etana va, “Arova koronna va Natuna io God, ulove velu sio, poli Uru ngai Manga ateva eauliaa va, “Aue esuu kapuna ensolo atoa aue la sau evukalaio me karika aue utaghua kekem tale atu.”<sup>¶¶</sup>

<sup>7</sup>Iesu ghe uela etana va, “Uru ngai Manga ateva emene ue va, ‘Urau mene tootoonga Vau eteva kapum Goto ia.”<sup>§§</sup>

<sup>8</sup>Namu ngateva ta raroai etoa ghe mene ghaaie saela tale motouru eteva iaaili epona, me ghe apasunga anua

namu ngakapa atoa tale kosa ateva oia, me masi voto atoa etaira. <sup>9</sup>Me ghe uela ta Iesu va, “Aue atoa aatu isaa akapaili voto angu tarala, arova ussuuiaa me ukkaueinieghi.”

<sup>10</sup>Iesu ghe uela etana va, “Vellaio Satana, ta poli Uru ngai Manga ateva eauliaa va, ‘Ukkaua Vau eteva kapum Goto ia, me uaimulisi teeia nonga.”<sup>\*\*\*</sup>

<sup>11</sup>Me namu ngateva ta raroai etoa ghe kasu vuliela me ensolo atoa laghe mae sio tani sausia.

### Iesu ghe tiuaala tani uungu

(Mak 1:14-15; Luk 4:14-15)

<sup>12</sup>Nau eteva Iesu ghe nongola va Jonie tale ale mata voovoo, ghe oghi lao sio eGalili. <sup>13</sup>Ghe kasu vuliela eNasareti me ghe lao sio tani toka eKapenium tale ato talia ngateae tale kosaira ararimangali elua ta Sebulon me Naptali. <sup>14</sup>Iesu ghe gheleila isaa o voto tani akauerekati llo voto propete Aisaea ghe auliaala,

<sup>15</sup>“Taumattu tale kosa nge Sebulon me Naptali,

kosa etokatoka tale salana atikirighi elaa ghoa elamana, me kosa tale pai kativilau tale ateo atea eJodan, Galili kosaira taumattu ngeleka atoa.

<sup>16</sup>Isaa o taumattu etokatoka tale saurrom ateva

ngila ghe tarala paka mallanga ateva, lo atoa la tokatoka tale saurrom masau ta Vau ngepona ateva<sup>†</sup>

mallanga ateva ang ghe llaala etaira.”<sup>‡</sup>

<sup>17</sup>Tale isaa o nau Iesu ghe tiuaala tani ppooaa, ghe ue va, “Am nna

<sup>††</sup>4:4 Diuteronomi 8:3

<sup>‡‡</sup>4:5 *masaliki taatara atea manga ia* Malloeana va Jerusalem.

<sup>¶¶</sup>4:6 Sams 91:11-12

<sup>§§</sup>4:7 Diuteronomi 6:16

<sup>\*</sup>4:10 Diuteronomi 6:13

<sup>†</sup>4:16 Tale inangari nge Grik, *voto ateva tootoo nimate*

<sup>‡</sup>4:16 Aisaea 9:1-2

ngaioghioghiaa, poli ararimangalina ateva epona liu ange aakalakala.”

### Iesu ghe kolola disaepolo ghaata

(Mak 1:16-20; Luk 5:1-11)

<sup>18</sup> Iesu ghe kasukasu elaolao tale sama ateo talia ngateae eGalili, me ghe tarala tue me nenga alua, Saemon la kolokolao va Pita etana me nengane ta Andru. Lalu ghe lukuluku ta tau ngelamana ilalua. <sup>19</sup> Me ghe uela ta ngetairaru va, “Amalu mae usieghi me aue agheleiemalua me amalu tau ngai luku taumattu iemalua.” <sup>20</sup> Me arovaeaata ta lalu ghe velu elokoila uvena me lalu ghe usiela.

<sup>21</sup> Iesu ghe mene kasu tee lao sio me ghe mene tarala mene ghalua tue me nenga, Jon me Jeimis, natuna ilalua Sebedi, laghe tokatoka tee tamairaru ta Sebedi, laghe anuunumi uneira uvena epona tale paanaka ateva, me Iesu ghe kololaluela. <sup>22</sup> Karika lalu ghe aitoila ta lalu ghe kkure vulula paanaka ateva me tamairaru me lalu ghe usiela.

### Iesu ghe poppooaa me ghe gheeghelei emasina taumattu ngatoa

(Luk 6:17-19)

<sup>23</sup> Iesu ghe kasukasu ekapa see eGalili, me ghe aapasunga tale aleira ale nivelu eitauaa me ghe poppooaa masi kiukiuna ararimangali eteva, me ghe gheeghelei emasina isaa akapa asease sessa atoa. <sup>24</sup> Kiukiuna Iesu ghe lao akapa seela tale provinsi eteva eSiria, me taumattu ngatoa laghe maemaeaa asease tau sessa atoa, lo atoa ghe anoanongi ila, me lo atoa raroai etoa laghe kupilala, me lo atoa la oo, me lo atoa karakanna ila, me Iesu ghe ghelei emasinailala. <sup>25</sup> Oroil ila taumattu nge Galili etoa me taumattu tale Kasangauluae Masaliki Taatara,<sup>¶</sup> me

aJerusalem atoa, me aJudia ngatoa me lo atoa tale pai kativilau tale ateo atea eJodan, laghe usiusie see.

### Iesu ghe aippoaa tale motouru

**5** Nau eteva Iesu ghe tarala taumattu ngatoa laghe oroieili ila, ghe saela tale motouru eteva, me ghe toka siola, me kapuna disaepolo<sup>§</sup> atoa laghe mae sio etana. <sup>2</sup> Me ghe tiuaala tani apasunga etaira va,

### Niarangise

(Luk 6:20-23)

<sup>3</sup> “Aue emasinaaili ta lo atoa la kilakila va masi uunguaane ateva God karika ia etaira me la aloannaaili tani ghaaia, ta ararimangalina ateva epona liu aue anueira ia.

<sup>4</sup> Aue emasinaaili ta lo atoa la ghalousiusi, ta God aue eghelei emasina ta ngetaira me aue la gheateaa masina.

<sup>5</sup> Aue emasinaaili ta lo atoa la siosioaa nannaaira, poli kosa akapa ateva aue kaluira ia.

<sup>6</sup> Aue emasinaaili ta lo atoa la ghaloannaaili ghulughuluena, nonginaaili lo ateva emaamaloo ealoannaaili tani namanama, me ekaakanggata tani ropi, ta God aue eghelei erooroaa aloannaaira.

<sup>7</sup> Aue emasinaaili ta lo atoa la apasunga masi gheeleiaaira ta mene katoa, ta God aue eapasunga masi gheeleiaane etaira.

<sup>8</sup> Aue emasinaaili ta lo atoa urunguitanira raarangisana, ta aue la tara God.

<sup>9</sup> Aue emasinaaili ta lo atoa la ghalokoi luei,

<sup>¶</sup>4:25 *Kasangauluae Masaliki Taatara* Utara Malloeana Inangari

<sup>§</sup>5:1 *disaepolo* Utara Malloeana Inangari

ta God aue easela va natuna ila God.

<sup>10</sup>Aue emasinaaaili ta lo atoa la ghaaghaa mmarikana mausi masi gheegheleiaaira,

ta ararimangalina ateva epona liu aue anueira ia.

<sup>11</sup>Aue emasinaaaili etaimim arova taumattu ngatoa la pilosiem, me la ghelei saasakia teeiem, me la ghaikamea teeiem, poli ararighi eteae.

<sup>12</sup>Voto sesa laghe tani gheeghelei tee propete atoa emua arau, isaa oia la mene gheeghelei teeiem. Am masimasi etingina, ta aipoliimim namungaili isaa epona liu.

### Uela me mallanga ateva

(Mak 9:50; Luk 14:34-35)

<sup>13</sup>“Am uela am tale kosa ateva oia, me arova namina ateva uela ateva ekapa, o vaalua aue ita mene gheleia me emene uelana? Ta ia o ange kapala maamasikaniaane. Taumattu ngatoa aue la nim sau velua me la sakieinia tale kosa ateva.

<sup>14</sup>“Am mallanga am tale kosa ateva. Arova masaliki etokatoka epona tale motouru, karika erooroo tani aisulia. <sup>15</sup>Me tee taumattu ngatoa karika la gharokoti kuraaia lam atea va la ghatoka pakea tale keru, karika. Ta la ghatoka sae tale aitiitinginane, ta etautau lao mallanga tale taumattu ngatoa tale ale ateva. <sup>16</sup>Ia avalua o me, am apasunga mallangimim tale taumattu ngatoa, me aue la tara masi gheeleiaaimim, me aue la tau sae ararina atea Tamaimim epona liu.

### Inangarina nipaopao God

<sup>17</sup>“Am rau mene annaa va aghe mae sio tani ghaa velu inangari nipaopao me inangariira propete atoa, karika. Aghe tam mae sio tani ghaa velu, ta aghe mae sio tani ghelei eroorooa. <sup>18</sup>Aghaa-

lia ngakoronna etaimim va elomarase me kosa ateva oia aue ekapa, me aue karika teva mata nginangari tale inangari nipaopao aue ekapa, karika, lomosina ta nau niuungu ekapa God ghe aloanna va inangari nipaopao eghelei ekapa. <sup>19</sup>Arova see ia taumattu ngat-eva etam aimulisi tee tuku kateva tale inangari nipaopao me epasunga ta mene katoa tana taumattu tani tam aimulisi tee, karika aue enamuu tale ararimangali eteva epona liu, me lo ateva eaimulisi tee, ia ararina atea aue enamuu tale ararimangali eteva epona liu. <sup>20</sup>Aghaauliaa etaimim, arova gheegheleiaaimim ghulughuluena etam laulau masi gheegheleiaaira Paresi etoa me tau ngai apasunga tale inangari nipaopao atoa karika aue am sso tale ararimangali eteva epona liu.

### Salana tani ghelei eghulughuluena inangari

<sup>21</sup>“Ngam ghe nongo vella va laghe auliaala ta lo atoa emua arau va, ‘Am rau mene aiuvi emate.’\* Me arova lo ateva eaiuvi emate aue elaa ghaisakei.’ <sup>22</sup>Me aghi aghaauliaa etaimim va, lo ateva esessa ia ta nengane ateva, aue eaisakei, me see eue ta nengane va, ‘Alo kapakapa ateva,’ aue elaa ghaisakei ta kansolo atoa, me lo ateva eue ta nengane va, ‘Tau veevee ateva!’ aue kuraa atea eataia eGehenna.††

<sup>23</sup>“Liuna avalua o me arova angu mae-maeaa kalum aighelei masi aiaavusuvusuea, me uannaa lao mua kapum ateva ghe annaa va ughe ghelei saasakiaala etana, <sup>24</sup>uatoka sio mua kalum aighelei masi aiaavusuvusuea me ulaa taraia me amalu mene sama aitaaua, me auena umae ghelei masi aiaavusuvusuea sae ta God.

\*\*5:21 Eksodas 20:13; Diuteronomi 5:17

††5:22 *Gehenna* Utara *Malloean* Inangari

<sup>25</sup>“Arova aissanim ateva ange laolao tani aulieinio ta tau ngai ghelei niaisakei eteva, ulaa tara parasia, me uauliaa etana va ualoanna va amalu kkaluaa llo voto amalu ghe gheleila karika masina, ta erau laa aulieinio ta tau ngai ghelei niaisakei eteva va elaa tauo ta polisi eteva, va elaa ghatokaio sso tale ale mata voovoo. <sup>26</sup>Aghaauliaa ngakoronna etam va karika aue ukupi ghoa tale ale mata voovoo lomosina ta utau ekapa lao viliki veu la aasela va utau lao.

### Nilai sari

<sup>27</sup>“Ngam ghe nongo vella va laghe auliaala va, ‘Karika ulai sari.’<sup>‡‡</sup> <sup>28</sup>Me aghi aghaauliaa etaimim va, arova see ange tara ssaiila vause ateva me ange anna saasakiaala etana, ia ange ghelei saasakiaala etana tale urunguitanina ateva. <sup>29</sup>Arova matam muenna ativilau eghaaghaaio lao tale ssavoto, uvaliki velua me usau velua. Emaamasina arova kateva nonga ia tuku voto tale vilikim evulla ia, me karika va isaa akapa vilikim aue elao eGehenna, <sup>30</sup>me arova nimam muenna atelange ange gheleila va angu lao sio tale ssavoto, usai kotoia me usau velua. Emaamasina arova kateva nonga ia tuku voto tale vilikim evulla ia, me karika va isaa akapa vilikim aue elao eGehenna.

### Niairatii tale taita me vause

(*Mat 19:9; Mak 10:11-12; Luk 16:18*)

<sup>31</sup>“Ngam ghe nongo vella va, ‘Arova taita ateva ange ratila vausenna ateva, eghelei tikirighi unna uru ngai tani apa-sunga va ange ratirati vause ateva me etau lao ta vause ateva.’<sup>¶¶</sup> <sup>32</sup>Me aghi aghaauliaa etaimim va arova taita ateva enim rati vause ateva tale kasina ppae

asease voto me karika tale nikune taita, ia o taita ateva eghelei vause ateva aue eaikune taita, me lo ateva taita emene lai ta vause ateva o angu lai sarila.

### Inangari nialokoi

<sup>33</sup>“Ngam ghe nongo vella va laghe auliaala ta lo atoa emua arau va, ‘Am rau mene kamekame arova angu auliaa saela inangari nialokoi, me arova angu auliaa saela inangari nialokoi ta Vau palepale ateva, utani aimulisi tee llo ughe auliaala.’ <sup>34</sup>Me aghi aghaauliaa etaimim, am rau mene auliaa sae inangari nialokoi, karika epona liu tee, poli aitokatokane ateva o God, <sup>35</sup>me tale kosa ateva oia, God eatingina soaakkena etana, me am rau mene auliaa sae inangari nialokoi tee eJerusalem, ta ia o, kinatama masalikina atea o namu ngateva Kingi. <sup>36</sup>Urau mene auliaa sae inangari nialokoi tale urum ateva, ta karika urooro tani ghelei katikirighi uu ngurum va eusousoana me evoovongiena. <sup>37</sup>Ta arova koronna, am ue va ‘ue’, me arova kamena, am ue va, ‘karika.’ Llo am nim mene auliaa, kannu sesa taumattu ngateva.

### Am rau mene ailiuaa voto sesa

(*Luk 6:29-30*)

<sup>38</sup>“Ngam ghe nongo vella va laghe auliaala va, ‘Arova ughelei saasakia matana taumattu ngateva, eroo tani ghelei saasakiaa tee matam, me arova utumari koto ngalungaluna, eroo tani tumari koto tee ngalungalum.’<sup>§§</sup> <sup>39</sup>Me aghi aghaauliaa etaimim va am rau mene liu voto sesa ngila ghelei teeiemla, arova teva ngila posalala bbam muenna ativilau, umene kirio me la mene posala mene kativilau. <sup>40</sup>Arova taumattu ngat-

<sup>‡‡</sup>5:27 Eksodas 20:14; Diuteronomi 5:18

<sup>¶¶</sup>5:31 Diuteronomi 24:1

<sup>§§</sup>5:38 Eksodas 21:24; Levitikas 24:20; Diuteronomi 19:21

eva ange laoinio sio tale niaisakei me eue tale niaisakei va upolia tale unem sioto ateva, masina utau tee lao saket ateva. <sup>41</sup>Me arova la ue etam va usunuki ghinna me ukasuaa tale kateva kilomita, masina usunuki lao tale ghalua kilomita. <sup>42</sup>Utau lao voto tale lo ateva elooloo, me urau mene aroo tale taumattu elooloo ta auena emene liu.

### Uailousia tau ngai ssateem atoa

(Luk 6:27-28, 32-36)

<sup>43</sup>“Ngam ghe nongo vella va laghe auliaala va, ‘Uaielousia taumattu ngat-eva kalakalangina ia etam\* me ussa tee aissateem ateva.’ <sup>44</sup>Me aghi aghaauliaa etaimim va am ailousia aissaniimim atoa, me am looloo sae va God aue esausi lo atoa la ghelei saasakieinam. <sup>45</sup>Arova am gheeghelei evalua o, aue enatuna am Tamaimim ateva etokatoka epona liu, ta ia egheeghelei sinaka esae-sae tale taumattu sesa me tale masina, me egheeghelei vaoo ateva ekaakatuu tale ghulughuluena atoa me tale tam ghulughuluena atoa. <sup>46</sup>Arova am ailousia lo atoa la ailousieinam, saa aipolipoli aue am ghaa? Lo atoa la ghaaghaa viliki veu la ghelei evalua o. <sup>47</sup>Me arova am ue va, ‘Elue talaa,’ nonga ta kapuimim atoa, am nim ghelei nongina katoa la ghelei. Tau ngeleka atoa ila tee la ghelei evalua o! <sup>48</sup>Am ghulughuluenaaili nongina Tamaimim ateva epona liu ghulughuluenaaili ia.

### Vaalua tani aiparrui

**6** “Am tani anna ngamasina nau eteva am anna tani apasunga masi uun-guaaimim ta mataira taumattu ngatoa va la tara. Arova am gheeghelei evalua

o, karika aue am ghaa aipolipoli tale Tamaimim ateva etokatoka epona liu.

<sup>2</sup>“Liuna avalua o me nau eteva angu tautau lao voto ta lo atoa karika rigi peiira, urau mene ghelei nongina usimaghalua atoa, la saasama me la gheeghelei tale ale nivelu eitauaa me tale salana, va la taraila me la asaesa arariira. Aghaaulia ngakoronna etaimim, ila o taumattu ngatoa angila ghe ghaala arau aipoliira. <sup>3</sup>Me io, nau eteva uparru lo ateva karika rigi peina, ugheelei eisulia.† <sup>4</sup>Unem niaiparrui unim ghelei eisulia ta Tamam ateva etaatara voto ugheelei eisulia, me ia aue etau aatu aipolipoli etam.”

### Nilooloo sae

(Luk 11:2-4)

<sup>5</sup>“Me nau am aloanna tani looloo sae, am rau mene ghelei nongina usimaghalua atoa. La ghaloannaaili tani looloo sae tale ale nivelu eitaua ngatoa me tale aighoughou tale salana va taumattu ngatoa la taraila. Aghaaulia ngakoronna etaimim, ila o taumattu ngatoa angila ghe ghaala arau aipoliira. <sup>6</sup>Me io, nau eteva ualoanna tani looloo sae, ukupi sso tale rum atiulu, me ukavati atamana me io nonga ulooloo sae ta Tamam, me Tamam etaatara llo ugheeghelei eisulia aue etau aatu aipolim. <sup>7</sup>Me nau eteva am looloo sae, am rau mene auliaa oroieili inangari karika malloeana nongina tau ngeleka atoa. La anna va arova la auliaa oroieili inangari aue kapuira goto atoa la nongola. <sup>8</sup>Am rau mene usi gheegheleiaaira, poli Tamaimim ateva ekilakila akasina llo voto am aloanna me am nim aimuli tani kolomia. <sup>9</sup>Liuna avalua o me am looloo sae avalue toko:

\*5:43 Levitikas 19:18

†6:3 Tale inangari nge Grik, urau mene ghelei va nimam uaise atelange ekila va saa ateva nimam muenna atelange egheeleia.

‘Tamaimami epona liu  
 usausiemami tani oneoneaa ararim  
 ateae va manga ia,  
<sup>10</sup> Ami aloanna va ararimangalim ateva  
 emae,  
 me tale kosa ateva oia ami ghelei  
 aloannaam  
 nongina epona liu.  
<sup>11</sup> Utau roorooa mae aneimami inana  
 tale lo ateva oia nau.  
<sup>12</sup> Ukkaluaa eleiaamami sesa,  
 nongina ami kakkaluaa eleiaaira sesa  
 etaimami.  
<sup>13</sup> Urau mene tau veluemami va ami lao  
 tale nitootoonga,  
 me uakekkeliemami tale sesa taumattu  
 ngateva.’<sup>‡</sup>  
<sup>14</sup> Poli arova am kkaluaa kaluira ssavoto  
 lo atoa la ghelei teeiem, aue Tamaimim  
 epona liu aue ekkaluaa kaluimim tana  
 ssavoto. <sup>15</sup> Me arova am tam kkaluaa  
 kaluira ssavoto taumattu ngatoa, aue  
 Tamaimim ateva karika aue ekkaluaa  
 kaluimim tana ssavoto.”

### Ninae

<sup>16</sup> “Nau angam naela, am rau mene  
 ghelei taataraimim va esesaaili nong-  
 ina usimaghalua atoa la gheghelei.  
 Karika la ghelei eraarangisanaila tani  
 apasunga ta taumattu ngatoa va angila  
 naela. Aghaaulia ngakoronna etaimim,  
 ila o taumattu ngatoa angila ghe ghaala  
 arau aipoliira. <sup>17</sup> Me io, nau angu naela  
 usile urum ateva me upora matam <sup>18</sup> me  
 karika aue taumattu ngatoa la tara kilaio  
 va uanaeae, ta Tamam ateva etaatara  
 voto ita tam taatara eaisulia, ie nonga  
 aue ekila, me etau aatu aipolim.”

### Uungua nighaa aitauaa ghinna

(Luk 12:33-34)

<sup>19</sup> “Am rau mene ghaa aitaua peiimim  
 tale kosa ateva oia. Aue ane ateva enama  
 ghinna me tee aue erroso me tau niainao  
 atoa tee aue la rruti ale me la ainao.  
<sup>20</sup> Ta am atoka aitauaa peiimim epona  
 liu, aue karika ane ateva enama me tee  
 karika aue erroso, me ta tau niainao atoa  
 karika aue la rruti ale me la ainao. <sup>21</sup> Ta  
 poli voto ateva peim etokatoka etana,  
 aue urunguitanim tee etoka etana.

### Matam — mallanga ia tale vilikim

(Luk 11:34-36)

<sup>22</sup> “Matam alua emaamallangi vilikim.  
 Arova matam va masina, vilikim aka-  
 paaili aue epasu tale mallanga ateva.  
<sup>23</sup> Me arova matam va sesa, aue vilikim  
 akapaaili aue saurrom. Liuna avalua o  
 me arova elome etam va saurromiena ia,  
 aue ekinatama saurrom.

### Karika urooroo tani uungu tale ghalua vau

(Luk 16:13)

<sup>24</sup> “Karika teva taumattu erooroo tani  
 uungu ta ghalua vau, ta aue tani ssa tee  
 kateva me aue emasia kateva, me aue  
 enongo usilaa kateva me eliu vilina ta  
 mene kateva. Karika urooroo tani uungu  
 ta God me viliki veu.

### Urau mene ghelei nannaam va esio euu

(Luk 12:22-34)

<sup>25</sup> “Liuna avalua o aghaauliaa etaimim  
 va, am rau mene annangaili maamaulu-  
 aaimim va saa ateva aue am namaia,  
 me am ropia, me am rau mene annan-  
 gaili vilikiimim va saa ateva am asaeaa.  
 Karika am kilakila va maulue ateva na-

<sup>‡</sup>6:13 Kasina uru ngai laghe pitila, laghe mene pitila, ta poli ararimangali, sarasarakana me nitau sae isaa etam nau ekapa atoa, koronna.

muu ia ta matane God, me inana isaa euu, me vilikiimim isaa epona, me aiso e isaa euu? <sup>26</sup> Am tara ghila atoa la lolo. Karika la pasapasa utana me karika la mukemuke atoka, ta Tamaimim ateva epona liu eangiinginila. Karika am kilakila va Tamaimim ateva, nannaane etaimim elaulau aitarane tale ghila atoa? <sup>27</sup> Me arova utoka annaa nonga saa ateva aue elutu tale maamauluuam, isaa o voto aue etau aatu mauue me umene toka tau lao?

<sup>28</sup> “Vaalu a me am annangaili aiso e? Am tara palaoa ngatoa la piipinosa, karika la uungu me karika la gheeghelei kalioira. <sup>29</sup> Aghaauliaa etaimim va molumuluaane Solomon masinaaili, me karika ta palaoa ngatoa, la laulau molumuluaane Solomon. <sup>30</sup> God eaamolulumolu evalua o rarrasa atoa, la piipinosa ghaine, me nimana la taula sae tale kura atae. Am rooroo tani aikaaia va aue eaamolulumolu evalueim tee o, ghauna uneimim niaikaaia. <sup>31</sup> Liuna avalua o me am rau mene annangaili va, ‘Saa ateva aue ami namaia?’ me ‘Saa ateva aue ami ropia?’ <sup>32</sup> Tau ngeleka atoa la ilou paepae isaa o voto, Tamaimim ateva epona liu ekilakila isaa o voto am tuutukuna etana. <sup>33</sup> Mata ngemua ateva voto am gheleia, am pae mua ararimangalina ateva epona liu me gheegheleiaane ghulughuluena tale maamauluaimim, me ia aue etau aatu isaa o voto etaimim. <sup>34</sup> Liuna avalua o me am rau mene annangaili va saa ateva aue elutu nimana, ta nimana me maamataniaane auena emae. Me maamataniaa kateva kateva nau eroroo nonga ta ia o nau eteva.

### Niaisakei

(Luk 6:37-38, 41-42)

**7** “Am rau mene auliaa va katoa nonga taumattu la gheelei ssavoto, me God

erau auliaa teeiem va am tee am gheelei ssavoto. <sup>2</sup> Poli God aue eghelei niaisakei etaimim nongina am gheelei niaisakei ta katoa, me saa ase voto am gheelei ta mene kateva, God aue eghelei tee etaimim.

<sup>3</sup> “Vaalu a me utaata nonga tuku vongovongo arighi ta matana kapum ateva me karika uannaa tuku palanga ateva ta matam? <sup>4</sup> Vaalu a me uue ta kapum ateva va, ‘Mae sio me aghaa velu tuku vongovongo arighi ta matam,’ me nau etoa tuku palanga ateva etokatoka ta matam? <sup>5</sup> Usimaghalua io! Ta ughaa velu ekasina mua tuku palanga ateva ta matam, me aue utaata amasina nau eteva ualoanna tani ghaa velu tuku vongovongo arighi ta matana kapum ateva.

<sup>6</sup> “Am rau mene ghaa voto manga va am mene tau lao ta paua atoa, ta aue la kirila me la ametiem me la namaiem. Me tee am rau mene velu sio uneimim pel ta mosu etoa, ta aue la asa saasakia.

### Ukolomi, upae me umirimiri

(Luk 11:9-13)

<sup>7</sup> “Am kolomi me aue etau aatu; me am pae me aue am tara; me am mirimiri me atamana atae aue eoti. <sup>8</sup> Lo atoa la kookolomi, la ghaaghaa, me lo atoa la paepae, la taatara, me atamana eotioti ta lo atoa la mirimiri.

<sup>9</sup> “See etaimim tamatama atoa, arova teva natum elooloo teva tuku verete, aue utau lao teva atu? <sup>10</sup> Me arova elooloo teva kko, aue utau lao teva katu? <sup>11</sup> Me gheegheleiaaimim sesa, me am kilakila tani tau lao masi voto ta natuimim atoa, am annaa va ghaisa ooroiaa voto Tamaimim ateva etokatoka epona liu etautau lao ta lo atoa la kookolomia? <sup>12</sup> Tale isaa akapaaili voto, am ghelei lao ta katoa, llo am aloanna va la ghelei mae etaimim. Isaa o llo isaa tale inangari ni-paopao me tale propete.

### Ghauna arighi atamana

(Luk 13:24)

<sup>13</sup>“Am kupi sso tale ghauna arighi atamana. Atamana atea namuu ia me salana atikirighi namuu ia elaolao tale voto sesa, me oroi taumattu la kupikupi sso etana. <sup>14</sup>Me atamani ghaa mauue atea ghauna ia me salane atikirighi masakasukaleaili ia tani usilainia, me karika oroi ila lo atoa la usilainia.”

### Ai eteae me uene

(Luk 6:43-44)

<sup>15</sup>“Am paniem nonga tale propete kamekame atoa. Gheeieiaira eleka masina nongina sipsipi etoa, me nannaaira elome la nanna sesa tani ghelei saasakieinam nongina ueli paua atoa. <sup>16</sup>Tale ueira aue am kilaila. Karika teva taumattu elaa paapariki ue ngai tale uasa karasa me ue uasa tale ai rorroana. <sup>17</sup>Tale ie nonga o salana atikirighi, masi ngai eteae ekuukuneeaa masi uene, me sesa ngai eteae ekuukuneeaa sesa uene. <sup>18</sup>Masi ngai eteae karika erooroo tani kuneaa sesa ue ngai, me sesa ngai eteae karika erooroo tani kuneaa masi ue ngai, <sup>19</sup>ta isaa akapaaili ai karika ekuukuneeaa masi uene la tuetuea katuu me la veluvelu sae tale kuraa. <sup>20</sup>Am roo tani tara kila va see ila propete kamekame atoa tale gheeieiaira, nongina am kilakila ai eteae tale uenenna.

### Karika akilakiaiem

(Luk 13:25-27)

<sup>21</sup>“Karika isaa akapa taumattu la aseaseaghi va, ‘Vau eteva,’ aue la kupi sso tale ararimangalina ateva epona liu, karika. Ta lo atoa nonga la aimulisi tee gheeieiaane Tamaghi etokatoka epona liu aue la kupi sso tale ararimangalina ateva epona liu. <sup>22</sup>Oroi ila lo atoa aue la mae etaghi tale airuuruu eteva nau,

aue la ue etaghi va, ‘Vau eteva, Vau eteva, me karika va ami ghe auliaa inangarina God tale ararim atea, me ami ghe tiutiu velu raroai etoa tale ararim atea, me ami ghe ghelei oroieili voto atoa sarasarakana ila laghe lutulutu tale ararim atea?’ <sup>23</sup>Me aue aliu etaira va, ‘Karika akilakiaiem. Am kasu emasalikaala, tau nighelei ssavoto am!’”

### Ghalua ase nighelei ale

(Luk 6:47-49)

<sup>24</sup>“See ila lo atoa la nongonongo inangarighi me la usilaa, ila nongina taumattu ngateva alomasaanga ia, ghe atulula alena ateva epona tale atu. <sup>25</sup>Nau eteva vaoo ateva ghe sio mae, me ateo ghe akalala, me kuukuu eteva ghe lutula, laghe tonge poila ale ateva, karika ghe katuula, poli ie tale atu korokorongana. <sup>26</sup>Me see ila lo atoa la nongonongo inangarighi me karika la usilaa, ila nongina alo kapakapa ateva tana taumattu ghe atulula alena ateva elosamarra. <sup>27</sup>Nau eteva vaoo ateva ghe sio mae, me ateo ghe akalala, me kuukuu eteva ghe mae sio, laghe gheleila ale ateva ghe katuula, namungaili kaakatungaane.”

<sup>28</sup>Nau eteva Iesu ghe ruula tani auliaa isaa o voto, taumattu ngatoa laghe soghiaala llo ghe apasunga, <sup>29</sup>poli karika ghe aippoaa nongina tau ngai apasunga ngatoa tale inangari nipaopao, ta nongina taumattu ngateva matuutulienna ia.

### Iesu ghe ghelei emasinala tasussuku eteva

(Mak 1:40-45; Luk 5:12-16)

**8** Nau Iesu ghe kureaala tale motouru eteva, taumattu ngatoa oroieili ila laghe usiela. <sup>2</sup>Me taumattu ngateva, tasussukuna ia, ghe mae sio ta Iesu, me ghe suuiaala ta liue kkena Iesu me ghe uela va, “Vau eteva, arova ualoanna,



urooroo tani ghelei eraarangisanaieghi ta mata God.”

<sup>3</sup>Iesu ghe ssuaala nimane me ghe tuliela, me ghe uela etana va, “Aghaloanna; angu raarangisana.” Me gharavaea nonga ta ghe raarangisanala.

<sup>4</sup>Me Iesu ghe uela etana va, “Urau mene auliaa voto elutula etam. Ulaio me ulaa ghasungainio ta pristi eteva, me ughelai aiaavususueua tani apasunga va vilikim ange raarangisanala, nongina Moses ghe auliaala. Me taumattu ngatoo aue la kila va angu raarangisanala.”

**Iesu ghe ghelei emasinala kapuna  
tau ngai nongonongo anna  
ateva kateva namuu nge Rom**

<sup>5</sup>Nau eteva Iesu ghe ssola tale masaliki eteae eKapenium, kateva namuu ta tau ngai uvi etoa ghe aaitoia kateva ai (100) tau ngai uvi ghe mae sio tani kolomia. <sup>6</sup>Ghe ue va, “Vau eteva, kapughu tau ngai nongonongo anna ateva ange karakanna alokoila elo ale, karika erooroo tani kasukasu, me vilikina atoa la mammarikana atingina.”

<sup>7</sup>Iesu ghe uela etana va, “Aghi aue alaa ghelei emasinaia.”

<sup>8</sup>Namu ngateva ghe liula etana va, “Vau eteva, karika masina ieghi va umae tanganueghi. Unim aippooaa me kapughu tau ngai nongonongo anna ateva emasina. <sup>9</sup>Aghi tee auungu ta namu ngatoo, me aghaaitoiaa katoa tani tau ngai uvi. Nau eteva aue ta kateva va, ‘Lao sio,’ elaolao, me aue ta kateva va, ‘Mae sio,’ emaemae. Me aghauliaa ta kapughu tau ngai nongonongo anna ateva va, ‘Gheleila voto toko,’ egheeghelei.”

<sup>10</sup>Nau eteva Iesu ghe nongola isaa o voto, ghe soghiaala me ghe uela ta lo atoa laghe ususia va, “Aghaaulia ngako-

ronna etaimim va karika aghe tara poi teva taumattu elIsrael kanna niaikaiaa namuu nongina lo ateva oia taumattu.

<sup>11</sup>Aghaauliaa etaimim va oroi ila lo atoa aue la mae akapa see tale kosa ateva oia, tani toka tee Abraham, Aisiki me Jekop tani namanama, tale ararimangalina ateva epona liu. <sup>12</sup>Me lo atoa alraeli ila la ghe annaa va aue la kupi sso tale ararimangali eteva, me karika, aue la vella ghoa tale kinatama saurrom ateva, me aue la ghoa toka nganggala me la ain-geresia ngalungaluiru.”

<sup>13</sup>Me Iesu ghe uela ta namu ngateva oia va, “Lao sio elo ale, voto aue elutu nongina angu aikaiaaala.” Me gharavaea ta tau ngai nongonongo anna ateva ghe masinala.

**Iesu ghe ghelei emasinala  
oroi taumattu**

*(Mak 1:29-34; Luk 4:38-41)*

<sup>14</sup>Nau eteva Iesu ghe rekatala tanganue Pita, ghe tarala alumuna vause ateva Pita ghe asoaso tale komo, me vilikina ghe aanasa me matana ghe valavalanga. <sup>15</sup>Iesu ghe posola nimane, me mata valavalanga ateva ghe kapala, me ghe totu saela me ghe kaisila anna inana.

<sup>16</sup>Nau sinaka ateva ang ghe suusuu me oroieli ila lo atoa raroai etoa ghe tokatoka etaira, laghe maeainila sio etana va eghelei emasinaila, ghe nim aippooaa me raroai etoa laghe kupikupi ghoa, me ghe gheeghelei emasina tee tau sessa akapa atoa. <sup>17</sup>Isaa o voto ghe akauerekatila llo voto propete Aisaea ghe auliaala,

“Ia ghe ghaala kaluita saghuighuina, me ghe saula kaluita sessa.”<sup>f</sup>

**Nitootoonga aue emae etam  
nau eteva uaimulisi tee Iesu**

*(Luk 9:57-62)*

<sup>18</sup> Nau eteva Iesu ghe tarala taumattu ngatoa angila ghe oroieili, ghe uela ta kapuna atoa va, “Ita kasu, ita lao ta pai kativilau.” <sup>19</sup> Angila ghe aloanna tani kasu, me tau ngalomasaanga ateva tale inangari nipaopao ghe mae sio, me ghe uela etana va, “Tisa, aghaloanna tani usio nongina ea ulao.”

<sup>20</sup> Vara me Iesu ghe uela etana va, “Paua atoa aleira tale pake valienga, me ghila atoa aleira manee, me Natuna ateva Taumattu ngateva karika teva alena tani aso.”

<sup>21</sup> Mene kateva tana kapuna disae-polo, ia ghe uela etana va, “Vau eteva, tau velueghila me alaa kkaia mua tamaghi.”

<sup>22</sup> Iesu ghe uela etana va, “Usieghila me ratila lo atoa matena ila la kkaia matena atoa.”

**Ttasi kuukuu eteva ghe kapala**

*(Mak 4:35-41; Luk 8:22-25)*

<sup>23</sup> Iesu ghe aikaaila tale paanaka ngateva me kapuna disae-polo atoa laghe usiela, me laghe tiu ghoala. <sup>24</sup> Elome tale ateo talia ngateae, paka kuukuu ttasi eteva ghe lutula. Paka koto atoa laghe aasuu kaakaai tale paanaka ngateva, me Iesu ghe aseasekanue alokoila. <sup>25</sup> Disae-polo atoa laghe anguniela, me laghe ue etana va, “Vau eteva, sausiemamila! Angita vuuvuluu!”

<sup>26</sup> Iesu ghe liula inangariira, me ghe uela etaira va, “Vaalua me am maamatautu, ghaunaaili aikaiaaimim?” Ghe tingina saela me ghe paola kuukuu ttasi eteva tale ateo talia ngateae, me kinatama luei eteva ghe asola.

<sup>27</sup> Taumattu ngatoa laghe soghiaala me laghe ue va, “Saa taumattu ia tau-

mattu ngateva oia, ta ttasi eteva me paa-manu eteva la nongonongo usilainia?”

**Iesu ghe ghelei emasinala  
tau raroai elua**

*(Mak 5:1-20; Luk 8:26-39)*

<sup>28</sup> Nau eteva Iesu ghe laa rekata sio tale pai kativilau, tale kosaira aGadara ngatoa, me ghe sousoula taumattu ngalua lalua ghe kasula tale liu niaikka-iaa, raroai etoa laghe tokatoka etairarua. Taumattu ngatoa karika laghe laolao akalakala etairarua poli lalu ghe aiuvi. <sup>29</sup> Lalu ghe aaore me lalu ghe uue va, “Saa ateva ualoannaia etaimami, Natuna ateva God? Vaalua me umae sio tani ghelei saasakieinangalu me karika ghe ghaa nau?”

<sup>30</sup> Karika kalakala nongina laghe tiitingina, tinaua mosu etoa laghe susesue. <sup>31</sup> Raroai etoa laghe kolomi esarasarakanala Iesu va, “Arova utiu veluemami, usuu tauemami lao ta mosu etoa.”

<sup>32</sup> Me ghe uela etaira va, “Am lao sio.” Laghe kupi vulu ghoala taumattu ngalua me laghe laa sae kupi sso mosu etoa. Me tinaua atingiu ghe ttiroula, me laghe ilou velu siola tale vallae me laghe aoso velu siola tapaa manu me ghe arropi ematelala. <sup>33</sup> Lo atoa laghe aitaraa mosu laghe iloula. Laghe lao sio tale masaliki eteae, me laghe kiukiuaa ngakapala kiukiuirarua. <sup>34</sup> Nau eteva laghe nongola kiukiu, ila akapa laghe mae sio tani sou Iesu me laghe aulia ngasarasarakanala ta Iesu va karika emene toka tale masaliki-ira atea.

**Iesu ghe ghelei emasinala  
tangorengorena ateva**

*(Mak 5:1-20; Luk 8:26-39)*

**9** Iesu ghe aikaai ghoala tale paanaka ateva, me laghe lao sio tale pai kativilau, me laghe rekatala tale masaliki-ina atea. <sup>2</sup> Katoa taumattu laghe maeaa

sio taumattu ngateva tangorengorena ia, me ghe asoaso tale komo atiulu. Nau eteva Iesu ghe tarala uneira niaikaiaia, me ghe uela etana va “Urau mene annaa, natughu, kalum ssavoto ange kapala.”

<sup>3</sup>Katoa tana tau ngai aapasunga tale inangari nipaopao laghe tingina nannaa me laghe aippoaa elome etaira va, “Terai ona ange ghaala liuna ateva God.”

<sup>4</sup>Iesu ghe kilala nannaaira me ghe uela va, “Vaalua me ninannaa saasakia etokatoka tale urunguitaniimim?” <sup>5</sup>Ea ateva voto malumina tani auliaa, tani ue va, ‘Kalum ssavoto ange kapala,’ o tani ue va, ‘Tingina saela me ukasu?’ <sup>6</sup>Me aghaloanna va am tara kila, va Natuna ateva Taumattu ngateva matuutulienna teeia tani kkalua ssavoto tale kosa ateva.” Me ghe uela ta tangorengorena ateva taumattu va, “Tingina saela, me usau komom, me ulao tanguem.” <sup>7</sup>Me ia o taumattu ngateva ghe tingina saela me ghe lao sio tanguena. <sup>8</sup>Nau eteva taumattu ngatoa laghe tarala isaa o voto, laghe soghila me laghe tau saela God, poli ghe tau lao sio matuutulienna tale taumattu ngatoa.

### Iesu ghe kolola Matiu

(Mak 2:13-17; Luk 5:27-32)

<sup>9</sup>Nau Iesu ghe kasukasu elaolao me ghe tarala taumattu ngateva ararina atea ta Matiu, ghe tokatoka tale natu ngale arighi aighaa viliki veu ia me Iesu ghe uela etana va, “Mae usieghi,” me Matiu ghe tingina saela me ghe usiela.

<sup>10</sup>Nau eteva Iesu ghe namanama tanguue Matiu, oroieili tau ngai ghaa viliki veu etoa me tau ssavoto atoa laghe mae sio tani namanama teia, me kapuna disaepolo atoa. <sup>11</sup>Nau eteva Paresi etoa laghe tarala isaa o voto, laghe kookolomi

kapuna disaepolo atoa Iesu va, “Vaalua me kapuimim tisa ngateva enamanama tee tau ngai ghaa viliki veu etoa me tau ssavoto atoa?”

<sup>12</sup>Nau Iesu ghe nongola, ghe uela va, “Karika va lo atoa masina ila la ghaloanna dokta ta lo atoa nonga isikinna ila. <sup>13</sup>Me am lao me am laa pae aotu vaalua malloeana Uru ngai Manga ateva eauliaala va, ‘Aghi aghaloanna alousiusiaane me karika va tani ghelei niaiaavusuvusuea,’<sup>8</sup> poli karika aghe mae sio tani kolo ghulughuluena atoa ta aghe mae sio tani kolo tau ssavoto atoa.”

### Laghe kookolomi Iesu tale ninae atea

(Mak 2:18-27; Luk 5:33-39)

<sup>14</sup>Vara me kapuna disaepolo atoa Jon laghe mae sio me laghe kolomila Iesu va, “Vaalua me ami me Paresi etoa ami nae-nae, me kapum disaepolo atoa karika?”

<sup>15</sup>Iesu ghe liula me ghe uela va, “Kapuna atoa taumattu ngateva ange anna tani lai karika la aalousiusi nau eteva etokatoka teeila. Nau eteva aue emae me la ghaa velu taita ateva, ia o nau eteva aue evira nae.

<sup>16</sup>“Karika teva eghaaghaa tuku ouna ateva kalio va evabbai pokane ateva aiseo, ta tuku ouna ateva kalio aue emene ghelei mara ateva tale pokane ateva aiseo emara anamuu. <sup>17</sup>Karika teva taumattu etottoli ouna uae ni tale pokane ateva aikaai uae ni. Arova eghelei evalua o, aue ouna uae ni eghelei polaki aikaai uae ni eteva pokane ia, me uae ni eteva aue ekaoa me aikaai uae ni eteva aue esesa. Ta la tottoli ouna uae ni tale ouna ateva aikaai uae ni ta ilalua akapa aue lalu masina.”

**Vause arighi matena ia me  
vause ateva isikinna ia**

*(Mak 5:21-43; Luk 8:40-56)*

<sup>18</sup> Nau eteva Iesu ghe toka aippoaa me kateva namuu ghe mae sio me ghe suuiaala emua etana, me ghe uela va, “Natughu vause arighi ghaviri nonga oia ematela. Mae sio me ulaa saooa nimam etana me emene sakesake.” <sup>19</sup> Iesu ghe tingina saela me ghe usiela tee me kapuna disaepolo atoa.

<sup>20-21</sup> Vara me vause ateva rae ateva ghe iloueniela tale kasangaulu ghaluae (12) ninamanama, ghe nannaa va, “Arova aghele nim poso unna aisoe ngeleka ateva koti aue aghele masina.” Me ghe lao sio emuli ta Iesu me ghe posola euu tale sama unna aisoe ngeleka ateva.

<sup>22</sup> Iesu ghe kiriela me ghe taraiela me ghe uela etana va, “Urau mene matautu, natughu. Tale unem niaikaaia etaghi angu masinala.” Tale ia o nau eteva vause ateva o ghe masinala.

<sup>23</sup> Nau eteva Iesu ghe kupi ssola tale alena ateva namu ngateva, ghe tarala lo atoa laghe vuuvuu aivuvuu etoa me taumattu ngatoa laghe aalousiusi etingina. <sup>24</sup> Me ghe uela etaira va, “Am kupi ghoala. Vause arighi karika matena ia ta enim aseasekanua,” me laghe tivaala tani kangainia. <sup>25</sup> Nau eteva taumattu ngatoa laghe kupi ghoala eleka, Iesu ghe kupi ssola me ghe kune siola nimane vause arighi, me ghe totula. <sup>26</sup> Kiukiuna vause arighi oia ghe kasu ekapa seela tale masaliki tale ia o distriki eteva.

**Iesu ghe ghelei emasinala mata  
salusalu elua me paavoo ateva**

<sup>27</sup> Nau eteva Iesu ghe mene kasukasu elaolao, mata salusalu elua lalu ghe usiela, me lalu ghe kolokolo. Lalu ghe ue va, “Io Natuna io Deivit, ualousiusi teieliengalua.”

<sup>28</sup> Nau eteva ghe kupi ssola tale ale ateva, mata salusalu elua lalu ghe usiela. Me Iesu ghe kolomilaluela va, “Amalu aikaaia va arooroo tani ghelei emasinaimalua?”

Lalu ghe liula me lalu ghe uela va, “Ue, vau eteva.”

<sup>29</sup> Vara me ghe posola matairarua, me ghe uela va, “Tale uneimalua niaikaaia, aue amalu taatara.” <sup>30</sup> Me matairarua ghe mene taatarala. Iesu ghe aulia ngakorokoronganalala etairarua va, “Karika amalu mene laa kiukiuaa see isaa o voto.” <sup>31</sup> Nau eteva lalu ghe kupi ghoala, lalu ghe kiukiueinie seela tale masaliki etoa.

<sup>32</sup> Nau eteva angilalu ghe kasukasu, laghe mene maeaa sio taumattu ngateva raroai eteva ghe kupiela me karika ghe rooroo tani sama. <sup>33</sup> Me nau eteva raroai eteva ghe kupi vulue ghoala, taumattu ngateva paavoo ia ghe samala. Taumattu ngatoa laghe tarala isaa o voto me laghe soghiaala, me laghe ue va, “Karika righi voto avalua o ghe lutu eIsrael.”

<sup>34</sup> Paresi etoa laghe ue va, “Enim tiutiu velu raroai etoa tale sarasarakaniaane kapuira namu ngateva raroai etoa.”

**Tau ngai uungu etoa malaki ila**

<sup>35</sup> Iesu ghe kasu ekapa seela tale masaliki taatara atoa me tale lutu ghauna masaliki. Ghe aapasunga tale aleira ale nivelu eitauaa me ghe poppooa ngaotu masi kiukiu tale ararimangalina ateva epona liu me ghe gheeghelei emasina isaa akapa asease sessa atoa. <sup>36</sup> Nau ghe tarala taumattu ngatoa, ghe alousiusi teeilala poli nannaaira maateaili me karika teva taumattu tani sausila me ila nongina sipsipi etoa karika teva aitoirira. <sup>37</sup> Me ghe uela ta kapuna disaepolo atoa va, “Utana ateva ang ghele matuela, me tau ngai uungu etoa karika oroi ila. <sup>38</sup> Liuna avalua o, am kolomi sae Vau tale tau ngai mukemuke atoa va emene

sungi toa tau ngai mukemuke tani lao tale utana atingiu matuenna ia.”

**Iesu ghe suula kasangaulu ghalua disaepolo tani laa uungu**

(Mak 3:13-19; Luk 6:12-16)

**10** Iesu ghe kolo aitauaala kapuna disaepolo kasangaulu ghalua (12), me ghe tau lao sio matuutuliena tani tiu velu raroai etoa me tani ghelei emasina isaa akapa asease sessa atoa.

<sup>2</sup> Arariira toko kasangaulu ghalua (12) apostolo: Aitiutiu eteva ta Saemon (la kolokoloa va Pita) me nengane ta Andru, me Jeimis natuna ia Sebedi, me nengane ta Jon. <sup>3</sup> Me Pilip me Batolomiu, Tomas me Matiu tau ngai ghaa viliki veu ia, me Jeimis natuna ia Alpeas, me Tadius, <sup>4</sup> me Saemon laghe aseala va Selot ia, \*\* me Jitudas Iskariot (ia auena ghe tau lao Iesu ta nimaira tau ngai ssateena atoa).

**Iesu ghe auliaala inangari tani aimuli tee**

(Mak 6:7-13; Luk 9:1-6)

<sup>5</sup> Iesu ghe suula isaa oia kasangaulu ghalua, me ghe tau lao sio inangari niloeloe etaira va, “Nau eteva am kasu, am rau mene lao ta tau ngeleka ngatua, me am rau mene sso tale masaliki-ira aSameria ngatua. <sup>6</sup> Ta am lao ta alsraeli etoa, ila nongina sipsipi etoa laghe rauela. <sup>7</sup> Nau am lao am ppoaa ngavalua toko va, ‘Ararimangali eteva epona liu ange aakalakala.’ <sup>8</sup> Am ghelei emasina tau sessa atoa, me am totu matena atoa, me am ghelei eraangisana tasussuku etoa, me am tiu velu raroai etoa. Isaa o sarasarakana, aghe nim tau aatu sio, am nim mene taula, me karika aipolipoli. <sup>9</sup> Nau eteva am kasu, am rau mene annaa tani ghaa rigi viliki veu, golo me silva me kapa. <sup>10</sup> Am rau mene ghaa aikakkaai tale lo ateva o nikasu, me am rau mene

ghaa ghalua aiso me aikasukasu, me aikkatulu. Poli emaamasina va tau ngai uungu eteva eghaaghaa anna inana ta lo atoa euungu etaira.

<sup>11</sup> “Arova ngam rekataala tale kateae masaliki, am tani pae aotu mua va see ila masi taumattu ngatua, me am vira laa toka teeila, lomosina ta am kasu vuli lo atea o masaliki. <sup>12</sup> Nau eteva ngila aloannala va am toka teeila, am ue va, ‘Luei etaimim.’ <sup>13</sup> Arova am kupi sso tale aleira masi taumattu ngatua, am aloki luei etaira, me arova karika, am mene ghaa ogi niarangise me luei etaira. <sup>14</sup> Arova toa la tam ghaaiem me la tam aloanna tani nongo usilaa inangariimim, am rariaa velu au kosa ateva ta kkeimim nau am kasu vuli ia o ale ateva o masaliki eteae. <sup>15</sup> Aghaaulia ngakoronna etaimim va, aue nau niaisakei eteva, God aue eapasunga maomaona nimmarikana tale masaliki eteae eSodom me eGomorra, me sesaaili tale lo atea oia masaliki. <sup>16</sup> Am nongo! Asungisungiem nongina sipsipi etoa elome tale ueli paua atoa, me am anguu taatara nongina katu ngateva, me am nongina tee ghila ateva valusu ia karika eghelei rigi sesa.

**Sesa nau aue emae**

(Mak 13:9-13; Luk 21:12-17)

<sup>17</sup> “Am tani taatara amasina poli taumattu ngatua aue la kuneiem me la laoainam tale aleira ale nivelu eitaua me la uetaiem. <sup>18</sup> Poli mausighi me aue la laoainam ta gavana ngatua me kingi etoa, me ia o aue emasi nauimim tani aulia ngaotueghi etaira me ta tau ngeleka ngatua. <sup>19</sup> Nau eteva la kuneiem, am rau mene annaa va saa ateva aue am aulieinia me vaalua aue am aippooaa. Ta God aue etau aatu inangari aue am auliaa. <sup>20</sup> Ta karika va am aue am aippooaa ta aue Spirit Manga ateva kapuna

\*\*10:4 Selot Utara Malloeaana inangari

ia Tamam aue etau aatu inangari aue am auliaa.

<sup>21</sup>“Taumattu ngatoa aue la tau velu tueira me nengaira atoa ta lo atoa aue la uvi ematela, me tamaira atoa aue la ghelei tee ta natuira atoa. Aliko etoa tee aue la sesa tee tamaira me kinaira atoa, me aue la uvi ematela. <sup>22</sup>Taumattu ngakapa atoa aue la ssa teeiem poli ararighi eteae. Me see etingina akorokorongana tale unna niaikaiaia tale airuuruu, maamaluane aue esaanga. <sup>23</sup>Arova la ghelei teeiem tale kateae masaliki, am kasu vulia me am mene lao ppae tale kateae masaliki. Aghaulia ngakoronna va karika aue am ruu masaliki ekapa eIsrael me Natuna ateva Taumattu ngateva emae.

<sup>24</sup>“Tau ngai ghaa alomasaanga ateva karika namuu ia ta kapuna tau ngai aapasunga ngateva, me tee tau ngai nongonongo anna ateva karika namuu ia ta vauna ateva. <sup>25</sup>Tau ngai ghaa alomasaanga ateva erooro va enongina tau ngai aapasunga ateva, me tau ngai nongonongo anna ateva erooro va enongina vauna ateva. Arova la aseaghi va aghi Belsibul, namuu ta raroai etoa, aue la tau tee sesa arari etaimim.

### **Tani matauta nonga God**

*(Luk 12:2-7)*

<sup>26</sup>“Ia avalua o me am rau mene matautainila. Karika righi voto am aaituttuia va etam otu, isaa akapa voto pei niaisulia, aue la kila. <sup>27</sup>Saa ateva aghaulieinia eleivoo, am aulieinia ellaa me saa ateva aghaulia ngaghaunaie sso ta talingaimim, am sae tingina tale pungani ngale atoa me am auliaa. <sup>28</sup>Am rau mene matauta lo atoa la anna tani uvi emateam, ta aue la nim turungi vilikimim me karika aue la uvi emate maamauluaaimim. Ta am matauta nonga lo

ateva erooro tani turungi ekapa vilikimim me maamauluaaimim eGehenna. <sup>29</sup>Ghalua ppai natu ghila la polipoli tale maketi tale kativilau nonga viliki veu me karika teva arova ghele mate va karika aloannaane God. <sup>30</sup>Tee me isaa akapaaili uu nguruimim, God ekilakila va ghaisa akapa. <sup>31</sup>Ia avalua o me urau mene matautu ta maamauluaam namungaili ta matane God, elaulau ghila atoa.

<sup>32</sup>“See eaulia ngaotu tale taumattu ngatoa tale kosa ateva oia va kapughu ia, aghi tee aue aghaulia ngaotu ta Tamaghi epona liu va ia kapughu ia. <sup>33</sup>Arova lo ateva uauliaa ta katoa va karika ukilakilaieghi, aue aghauliaa tee ta Tamaghi epona liu va karika akilakilaio.

### **Karika aghe maeaa sio luei**

*(Luk 12:51-53; 14:26-27)*

<sup>34</sup>“Am rau mene anna va aghe maeaa sio luei tale kosa ateva oia, karika aghe maeaa sio luei ta aghe maeaa sio baenata ateva. <sup>35-36</sup>Aisaniira atoa karika aue la laa kasu emasau ta aue la tani kasu etoka elome tale paa ngaleira aitauaa. Aghe mae sio tani ghelei va

“taita ateva essa tee tamana atoa, me vause ateva essa tee kinna atoa me vause ateva essa tee alumuna vause ateva.”††

<sup>37</sup>“Lo ateva taumattu eaielousia nonga tamane me kinna me natuna taita atoa me natuna vause atoa, me karika eaielousieghi, karika emasina va kapughu disaepolo ia. <sup>38</sup>Me lo ateva karika eaalona tani sunuki unna aikotoo ateva me eaimuli teieghi, karika emasina va kapughu disaepolo ia. <sup>39</sup>Arova teva easaangi maamauluaana, aue eraua, me arova eraua ta mausighi aue eghaa maulue ateva.

††10:35-36 Maeka 7:6

## Aipolipoli

(Mak 9:41)

<sup>40</sup>“See eghaaghaaiem eghaaghaaieghi, me see eghaaghaaieghi, eghaaghaa lo ateva ghe sungieghila. <sup>41</sup>See eaikoloaa propete ateva poli propete ia aue eghaa aipolipoli nongina propete ateva eghaaghaa. Me see eaikoloa tau ghulughuluena ateva poli tau ghulughuluena ateva kapuna ia God, aue eghaa aipolipolina tau ghulughuluena ateva. <sup>42</sup>Me arova see earopiropi teva tale isaa oia disaepolo atoa taumattu ngatoa la taatara loela esio euu ta poli kapughu disaepolo ia, aghaaulia ngakoronna va aue eghaa aipolipoli.”

### Jon tau ngai aasuu ia ghe suula disaepolo atoa tani laa tara Iesu

(Luk 7:18-35)

**11** Nau Iesu ghe ruula tani apasunga taula voto ta kapuna kasangaulu ghalua (12) disaepolo, ghe kasu vulila ia o voto ateva me ghe mene lao sio tani ppoaaa me apasunga tale masaliki taatara atoa eGalili.

<sup>2</sup>Nau eteva Jon ghe tokatoka tale ale mata voovoo me ghe nongola voto Mesaea ngateva ghe gheelei, me ghe suula kapuna disaepolo atoa <sup>3</sup>tani laa kolomi Iesu va, “Io ia o taumattu ngateva God ghe uela va aue emae, o aue ami toi mene teva?”

<sup>4</sup>Iesu ghe liula me ghe uela va, “Am oghi lao sio me am laa ghaulaa ta Jon voto am tarala me am nongola. <sup>5</sup>Mata salusaluna atoa mataira eotila me vereverenna atoa la kasukasula, me lo atoa vilikiira lepanna la raarangisanala, me talinga volongo atoa la mene nongonongola, me matena atoa la totula, me llo

taumattu karika peina la nongonongo masi kiukiu. <sup>6</sup>Me aue emasinaaili ta taumattu ngateva, unna niaiesoa karika ekaakatuu vulueghi.”

<sup>7</sup>Nau kapuna disaepolo atoa Jon laghe kasula, me Iesu ang ghe auliaa Jon ta taumattu ngatoa. Ghe ue etaira va, “Saa ateva am ghe lao sio tani taraia tale voto ateva karika righi taumattu etana? Pitpiti eteva ghe kuukuueinia? <sup>8</sup>Arova karika, tani saa ateva am ghe lao sio tani taraia? Teva taumattu ghe molu-molu tale masi ghinna? Karika, ta lo atoa la asae masi ghinna la tokatoka tanganue king. <sup>9</sup>Tani saa ateva am ghe kasu tani laa taraia? Propete ateva? Ue, aghaauliaa etaimim va am ghe tarala propete ateva me emene laulau mene katoa propete. <sup>10</sup>Ia o taumattu ngateva, Uru ngai Manga ateva ghe aulieinia nau ghe uela va,

““Tarala, aue asuu aikasuaa inangarighi eteva emuemueinio, me ia aue eaimonomonosiaa ngamue-mue alokoi salam.”<sup>‡‡</sup>

<sup>11</sup>Aghaaulia ngakoronna etaimim va elome ta lo atoa laghe lutula tale kosa ateva oia, karika teva erooroo ta Jon ia o tau ngai aasuu ia. Me lo ateva karika teae ararina, me iaaili euu tale ararimangalina ateva epona liu, elaulau Jon. <sup>12</sup>Ghe tiuaala ta nauna Jon tau ngai aasuu ia me ang ghe mae sio ta nauita ghaine, sesa taumattu ngatoa la korokorongana tani ghaa ararimangali eteva epona liu tale nim aloaloannaaira. <sup>13</sup>Propete akapa atoa me inangari ni-paopao laghe aulia ngaotu inangarina God ghe mae ghaa sio nau ta Jon. <sup>14</sup>Me arova am aiesoa inangariira, Jon Elaija ta ngetana ia o laghe aulia ngamuemua alokoiela va aue emae. <sup>15</sup>See talingane manee aue enongo isaa oia inangari.

‡‡11:10 Malakai 3:1

<sup>16</sup>“Saa ateva voto arooroo tani auliaa me eaimatoonga taumattu tale lo ateva oia vituu? Ila nonginaaali aliki etoa la tokatoka tale liu nianamisi, katoa la ue lao ta mene lutu katoa va,

<sup>17</sup>“Ami ghe vuuvuu kkinari nisighaa ngateae etaimim, me karika am ghe lokuloku; ami ghe uei kkinari tani kkinariaa matena atoa, me karika am ghe aalousiusi.’

<sup>18</sup>Nau Jon ghe mae sio me karika ghe namanama me ghe tam ropiropi, laghe ue teeia va, ‘Raroai eteva ghe tokatoka etana.’ <sup>19</sup>Me Natuna ateva Taumattu ngateva ghe mae sio me ghe namanama me ghe ropiropi, laghe ue teeia va, ‘Tau ninamanama ia, me tau niropi sesa manu ia, kapuira ia aighaa viliki veu etoa me tau ssavoto atoa.’ Me masi ninannaa kanna God eaapasunga va koronna ia tale maamauluaaira lo atoa la aimuli teeia.”

### **Alousiusi ta llo taumattu karika enna ngaiooghioghiaa**

*(Luk 10:13-15)*

<sup>20</sup>Iesu ghe sama anamuu teela llo masaliki taatara ghe gheleila oroianaaili mirikol poli taumattuuna karika ghe nna ngaiooghioghiaa. <sup>21</sup>“Aue esesaaili ta ngetam, Korasin, me aue esesaaili ta ngetam, Betsaida! Marova mirikolo oia laghe gheleila eTaer me eSaedon, taumattu ngatoa aue laghe molu tale ghinna nialousiusi me auu kura, tani apasunga va ngila ghe oghi vulula sesa gheegheleiaaira. <sup>22</sup>Aue emao maona nimmarikana ta eTaer me eSaedon tale nau niiasakei eteva, me am karika. <sup>23</sup>Me io, Kapenium? Uannaa va aue usae epona liu? Karika, io aue usioaili euu. Arova isaa o mirikol laghe gheleila etam va laghe gheleila eSodom, isaa oia nau Sodom ia ghele tokatoka. <sup>24</sup>Aghaauliaa etam va nau eteva God

aue ghelei niiasakei, voto Sodom eghaa aue emala masina me io aue sesaaili.”

### **Niainoana ta Iesu**

*(Luk 10:21-22)*

<sup>25</sup>Ia o nau eteva Iesu ghe uela va, “Atautauo sae Tamaghi, Vau ngepona liu io me kosa ateva, poli ughe aisuluaala isaa o voto tale lo atoa nannaaira masina me lo atoa alomasaangaaili ila me ughe aulia ngaotula ta lutu ngaliki etoa. <sup>26</sup>Ue Tamaghi, ugheelei isaa o voto tani aimuli tee masi aaloannaam.

<sup>27</sup>“Isaa akapa voto Tamaghi ghe atokala ta nimaghi, me karika teva ekilakila Natuna ta Tamana nonga. Me karika teva ekilakila Tamaghi ta Natuna nonga, me lo atoa Natuna ghe apasungala Tamane etaira tale aloaloanaane.

<sup>28</sup>“Am mae etaghi, lo atoa am maa mangoo poli am sausau llo maate, me aue atuu aatu niainoana etaimim. <sup>29</sup>Am aimulisieghi me am ghaa alomasaanga etaghi me am uungu etaghi nongina vulumakao ateva euungu ta vauna ateva, poli aghi saghuighuina eleiaaghi me asiosiuua nannaaghi me maamaulueaimim aue eghaa niainoana. <sup>30</sup>Poli eleiaaghi karika masukasukale me llo aue atuu aatu karika maate.”

### **Vau tale nau manga ateva**

*(Mak 2:23-28; Luk 6:1-5)*

**12** Nau eteva o Iesu ghe kasu longotila tale utani uiti etingiu, tale nau manga ateva, kapuna disaepolo atoa laghe maamaloo, liuna avalua o me laghe ghaala kasina tani uiti me laghe tiuaala tani gholu. <sup>2</sup>Nau Paresi etoa laghe tarailala laghe uela etana va, “Tarala! Kapum disaepolo atoa la gheelei voto karika masina tani ghelei tale nau manga ateva.”

<sup>3</sup>Iesu ghe liula me ghe uela etaira va, “Koti karika am ghe ritila llo Deivit me kapuna atoa laghe gheleila nau laghe



maamaloo? <sup>4</sup>Vaalua ghe ssola, ia me kapuna atoa, tale alena ateva God me laghe ghaala verete laghe amangala, pristi etoa nonga la rooroo tani nama, me laghe namala. <sup>5</sup>Me karika am ghe ritala tale inangari nipaopao eue va karika sesa arongona ta pristi etoa la uungu tale ale manga ateva ta nau manga ateva tani ghelei aiaavususvusuena? <sup>6</sup>Aghaauliaa etaimim va lo ateva oia matuutuliene ia tale ale manga ateva. <sup>7</sup>Karika am ghe kilala malloeana isaa o inangari va, ‘Aghi aghaloanna alousiusiaane me karika va tani ghelei niaiaavususvusuena.’<sup>¶</sup> Liuna avalua o me am ghe nim uela va sesa ila lo atoa karika righi sesa etaira. <sup>8</sup>Poli Natuna ateva Tau-mattu ngateva Vau ia tale nau manga ateva.”

**Iesu ghe ghelei emasinala  
taumattu ngateva katelange  
nimane matena ia ta nau manga**

*(Mak 3:1-6; Luk 6:6-11)*

<sup>9</sup>Iesu ghe kasula me ghe mene lao sio tale ia o masaliki eteae me ghe kupi ssola tale aleira ale nivelu eitaua ngateva. <sup>10</sup>Taumattu ngateva, katelange nimane matena ia, ghe tokatoka me laghe kolomila Iesu va, “Uneita inangari nipaopao eue va masina tani ghelei emasina ta nau manga ateva?” Poli laghe paepae salana tani laoa Iesu tale niaisakei.

<sup>11</sup>Me Iesu ghe uela etaira va, “Arova teva etaimim teva kiena sipsipi ghele katuu velu sio tale teva liu ta nau manga ateva, karika aue ughele laa ghaaie sio? <sup>12</sup>God aloaloanaane tale taumattu elaulau sipsipi eteva! Liuna avalua o

me masina tani ghelei masi voto ta nau manga ateva.”

<sup>13</sup>Me ghe uela ta ia o taumattu ngateva va, “Korosila nimam atelange.” Me ghe korosiela me nimane atelange ghe masinala nongina mene katelange.

<sup>14</sup>Paresi etoa laghe kasula tani laa loe salana vaalua tani uvi emate Iesu.

**Kapuna tau ngai nongonongo  
anna ateva God**

<sup>15</sup>Iesu ghe kilala saa ateva Paresi etoa laghe aloanna tani gheleia. Liuna avalua o me ghe kasu vulila ia o masaliki eteae. Oroienaaili taumattu ghe usiela me ghe ghelei emasinailala tale aneira isiki. <sup>16</sup>Iesu ghe aulia ngakorokoronganana ta ngetaira va la rau mene laa ghaotu va ia see. <sup>17</sup>Voto o ghe gheleila inangarina propete ateva Aisaea ghe kaurekatila, ghe ue va,

<sup>18</sup>“Ia oia kapughu tau ngai nongonongo anna ateva, aghi aghe suitoongainiela,

me aghaielousiangailia, me nannaaghi emaamasinaaili ta polina;

me aue aghatoka kalughu Spiriti eteva etana.

Me aue eaulia ngaotu voto ghulughuluna tale patunganue akapa atoa.

<sup>19</sup>Karika aue eaissakeanna me esama anamungaili ta tummatavanga.

<sup>20</sup>Aue eghelei voto masina tale taumattu saghuighuiena,

me karika aue eghelei saasakia ta lo atoa karika sarasarakana ila.

Aue eghelei isaa o voto lomosina ta llo masina eapala llo sesa.

<sup>21</sup>Patunganua akapa atoa aue la ghatoka tuutuliira tale ararina atea.”<sup>§§</sup>

<sup>¶</sup>12:7 Hosea 6:6

<sup>§§</sup>12:21 Aisaea 42:1-4

### Laghe ue va Iesu ghe uungu tee Belsibul

(Mak 3:20-30; Luk 11:14-23; 12:10)

<sup>22</sup> Laghe maeaa sio taumattu ngateva raroai eteva ghe tokatoka etana me tee mata salusalu ia me paavoo ia. Iesu ghe ghelei emasinaiela me ghe samala me ghe taatarala. <sup>23</sup> Me taumattu ngatua laghe soghiaala voto ghe gheleila me laghe ue va, “Koti taumattu ngateva oia natuna ia Deivit?”

<sup>24</sup> Nau Paresi etoa laghe nongola laghe uela va, “Tale sarasarakaniaane Belsibul, kapuira namu ngateva raroai etoa, me eghelei isaa o voto tani tiu velu raroai tale taumattu.”

<sup>25</sup> Iesu ghe kilala nannaaira me ghe uela etaira va, “Arova masaliki eteae eaipola, karika aue etoka amasina, me lo atea masaliki taatara o ale eaaipola karika erooro tani tingina akorokoron-gana. <sup>26</sup> Arova Satana emene tiutiu velu Satana, aue eaipola, o vaalua ararimangalina ateva aue etingina? <sup>27</sup> Me arova atiutiu velu raroai tale ararina atea Belsibul, kapuim atoa tani taumattu laghe tiutiu velu raroai tale ararina atea see? Ila aue la ghele auliaa va inangari am auliaa kamena. <sup>28</sup> Me arova atiutiu velu raroai tale Spiriti eteva kanna ia God, eaapasunga va ararimangalina ateva God ang ghe mae sio ta ngetaimim.

<sup>29</sup> “Vaalua aue ughaa peina sarasarakana ateva taumattu tanganuena? Arova ughele iiria mua, aue ughele roo tani ghaa peina.

<sup>30</sup> “Lo ateva karika kapughu ia, tau ngai ssateeghi ia, me lo ateva karika esaasausieghi tani atoka aitauaa, ia etani aatoka apolapola. <sup>31</sup> Liuna avalua o me aghaauliaa etaimim va God aue ekkaluaa isaa akapa ssavoto me inangari taumattu eauliaa saasakia, me lo ateva eauliaa saasakia tale Spiriti eteva,

God karika aue ekkaluaa. <sup>32</sup> Lo ateva eauliaa saasakia tee Natuna ateva Taumattu ngateva, God aue ekkaluaa kanna ssavoto, me lo ateva taumattu eauliaa saasakia tee Spirit Manga ateva, God karika aue ekkaluaa, tale nau oia me nau ngemuli.

### Sesa ngai eteae ekuukunea uene sesa

(Luk 6:43-45)

<sup>33</sup> “Arova uase ai eteae va masina ia, utani ase tee va uenena masina ia. Me arova uase ai eteae va sesa ia, utani ase tee va uenena va sesa ia. Poli ai eteae la kilakila maamasinaane me sesaane tale uenena. <sup>34</sup> Am nongina natuira iem katu ngatua, vaalua aue am auliaa masi voto nau eteva sesa taumattu ngam? Taumattu ngateva epoppooaa voto eka-sukasu tale urunguitanina ateva. <sup>35</sup> Masi taumattu ngateva etautau mae masi voto ekaakaai elome etana, me sesa taumattu ngateva etautau mae sesa voto ekaakaai elome etana. <sup>36</sup> Aghaauliaa etaimim va tale nau niaisakei eteva, taumattu ngatua aue la auliaa ta God tale asease inangari laghe nim poppooaa. <sup>37</sup> Poli tale inangarim God aue ekoloo va masi taumattu io o sesa taumattu io.”

### Paresi etoa laghe kokkolomi Iesu va eghelei righi mirikol

(Mak 8:11-12; Luk 11:29-32)

<sup>38</sup> Me Paresi etoa me tau ngai apa-sunga tale inangari nipaopao atoa laghe uela ta Iesu va, “Tisa, ami anna tani tara righi naimatoonga ughelei.”

<sup>39</sup> Iesu ghe liula me ghe uela etaira va, “Sesa taumattu ngam me karika am usilaa aloanaane God, am anna tani tara naimatoonga. Saa ghe lutu teela propete ateva Jona, ie nonga o naimatootoongana ateva aue elutu. <sup>40</sup> Nongina Jona ghe asola elome tale kova kko ateva ko-

tolu llaa me kotolu voo,\* Natuna tee ateva Taumattu ngateva aue easo tale urunguitani kosa ateva kotolu llaa me kotolu voo. <sup>41</sup>Aue taumattu nge Ninive atoa la tingina tale niaisakei eitauaa teeiem, me la ue va sesa am, poli aNinive atoa laghe nna ngaioghioghiaala, nau Jona ghe poppooaa etaira, me ia oia, lo ateva namuu ia ta Jona ange toka teeiemla. <sup>42</sup>Tale nau niaisakei, aue Kuin nge Saot ateva etingina tee lo ateva oia vituu, me aue eue va sesa am, poli Kuin ateva ghe kasu emasauelila tani mae nongo alomasaanganiaane Solomon, me lo ateva taumattu namuu ia ta Solomon ange toka teeiemla.

**Nau sesa spiriti eteva emene kiikiriaa mae**

*(Luk 11:24-26)*

<sup>43</sup>“Nau eteva sesa spiriti eteva ekupikupi ghoa tale taumattu ngateva, ekasukasu tale voto mallangona tani pae niainoana me nau etam tara <sup>44</sup>eue va, ‘Amene kiri lao tale ale ateva aghe kasu vuliela.’ Nau elaa reerekata etara va ale ateva karika toa etana me kaakala ngaraarangisana ia me elome masina tani toka etana. <sup>45</sup>Me aue emene kasu, tani laa kolo ghaitu (7) sesa spiriti eeleiaaira mene sesaaili. Me aue la kupi sso, me la sso toka tale ale ateva. Gheeleiaane aue esesaaili, aue elau isaa akasina. Lo ateva oia vituu aue ghelei evalua o.”

**Kinna me nengane atoa Iesu**

<sup>46</sup>Nau Iesu ghe samasama tee taumattu ngatoa, kinna me nengane atoa laghe tiitingina eleka, laghe aloanna tani sama teeia. <sup>47</sup>Kateva taumattu ghe auli-aala etana va, “Kinam me nengam taita atoa eleka, la ghanna tani sama teeio.”

<sup>48</sup>Iesu ghe liula me ghe uela etana va, “See ia kinaghi me see ila nengaghi etoa?” <sup>49</sup>Ghe suisui lao kapuna disae-polo atoa me ghe ue va, “Kinaghi me nengaghi etoa o. <sup>50</sup>Lo ateva egheelei aloaloannaane Tamaghi epona liu, nengaghi me kapughu vause ia me kinaghi ia.”

**Kiukiu niaimatoonga tale tau ngai pasa katu ue ngai eteva**

*(Mak 4:1-20; Luk 8:4-15)*

**13** Ia nonga o nau eteva me Iesu me ghe lao sio tani toka tale sama ateo talia ngateae. <sup>2</sup>Oroianaaili taumattu ghe mae sio ta ngetana, mausina avalua o me ghe saesaela tale paanaka ngateva me ghe tokala etana me taumattu ngatoa laghe tiitingina elo samarra. <sup>3</sup>Ghe auliala oroianaaili voto tale kiukiu niaimatoonga. Ghe uela va, “Am nongola! Tau ngai pasa katu ue ngai eteva ghe kasula tani pasa aina katu ue ngai. <sup>4</sup>Nau eteva ghe kaokaoaala katu ue ngai, kasina ghe katuula tapaa salana me ghila atoa laghe mae sio tani nama. <sup>5</sup>Kasina ghe katuula tale voto ateva atu ia, karika oroi kosa me arovaeaata nonga ghe pinosala, poli karika lluse ia. <sup>6</sup>Me nau sinaka ateva ghe saela ghe sinaki ematelala. Laghe matela poli oane karika ghe sio liula ta eue atu ia. <sup>7</sup>Kasina katu ue ngai ghe katuula elome tale uasa karasa. Laghe pinosala me uasa karasa ateva ghe kavili ematelala. <sup>8</sup>Me kasina katu ue ngai ghe katuula tale masi kosa me laghe kuneaala ueira, kasina ghe kuneaala kateva ai (100), kasina ghe kuneaala ghaonomongaulu (60), me kasina kotolungaulu (30). <sup>9</sup>See talingane manee aue enongo isaa oia inangari.”

<sup>10</sup>Disaepolo atoa laghe mae sio ta Iesu me laghe kolomiela va, “Vaalua me

\*12:40 Jona 1:17

uauliaa kiukiu aimatoonga ta taumattu ngatoa?”

<sup>11</sup> Iesu ghe liula me ghe uela etaira va, “Alomasaanga tale voto eaaisulia tale ararimangalina ateva epona liu, God ghe tau aatu etaimim, me ila karika. <sup>12</sup> See rigi voto etana, aue God emene taula me aue eghaa oroi voto, me lo ateva karika rigi voto etana aue eghaa velu rigi lutu voto etana. <sup>13</sup> Liuna avalua o me aghauliaa voto etaira tale kiukiu niaimatoonga:

“Arongona ta la taatara me karika aue la tara kila, me arongona ta la nongonongo me karika aue la nongo me aloira emasaanga.

<sup>14</sup> Ta ngetaira me llo Aisaea ghe aulia ngamuemua alokoila aue kaurekati. Ghe uela va,

“Aue am nongo me karika aue am kila; aue am tara me karika aue am alomasaanga tee.

<sup>15</sup> Urunguitaniira aue ekorokorongana, me talingaira aue evolovolongina tani nongo, me laghe aakoula mataira va karika la taatara.

Ta la rau tara nonga ta mataira, me la nongo ta talingaira, va la kila ta urunguitaniira,

me la kiri mae va aghelei emasinaila.”†

<sup>16</sup> Me am, niarangise etaimim, poli mataimim etaatara me talingaimim enongonongo. <sup>17</sup> Aghaaulia ngakoronna etaimim va oroi ila propete atoa me taumattu ghulughuluena laghe aloannaaili tani tara voto am taatara ghaine, me karika laghe tarala, me tani nongo voto am nongonongo ghaine, me karika laghe nongola.

<sup>18</sup> “Am nongo malloeanina kiukiu niaimatoongana atea ta tau ngai pasa katu ue ngai eteva: <sup>19</sup> Arova lo ateva

enongonongo inangarina ararimangali eteva epona liu me alona etam maa-masaangania, sesa taumattu ngateva eghaaghaa velu voto tau ngai pasa katu ue ngai eteva epasapasa tale urunguitanina ateva. Nongina katu ue ngai ghe katuula tapaa salana. <sup>20</sup> Me llo katu ue ngai ghe katuula tale voto ateva atu ia, nongina taumattu ngateva enongonongo inangari me arovaeaata ta eghaaghaa me emasimasi etingina. <sup>21</sup> Me poli karika rigi oane karika etitingina liu nau eteva sesa nau me niayuvi mausi inangarina God, poli inangarina ateva God elutulutu teeia arovaeaata ta ekaakatuu. <sup>22</sup> Me llo katu ue ngai ghe katuula elome tale uasa karasa nongina taumattu ngateva enongonongo inangari me enannangaili tale voto kamena tale kosa ateva oia me ealoannaaili va isaa oia voto aue egheleia va tue peipeiena, me ekakkaluaa inangari tale ararimangali eteva. Liuna avalua o me karika rigi uene. <sup>23</sup> Me llo katu ue ngai ghe katuula tale masi kosa nongina taumattu ngateva enongonongo inangari me alona emaamasaanga ekuukunea uene, kasina kateva ai (100), kasina ghaonomongaulu (60), me kasina kotelungaulu (30) oroiaane elaulau llo laghe pasa akasinala.”

### **Kiukiu niaimatoonga eauliaa ssa tuvui eteva**

<sup>24</sup> Iesu ghe mene auliaala kateae kiukiu niaimatoonga. Ghe uela va, “Ararimangali eteva epona liu nongina taumattu ngateva ghe pasala katu ue ngai masina tale utana atingiu. <sup>25</sup> Me vara taumattu ngakapa atoa laghe lao sio tani asekanua, me tau ngai ssateena ateva ghe mae sio tani pasa ssa tuvui eteva elome tale katu uit, me ghe kasula. <sup>26</sup> Nau eteva katu uit ghe pinosala me

†13:15 Aisaea 6:9-10

ghe kuneaala uena, ssa tuvui tee ateva ghe pinosa teeilala.

<sup>27</sup>“Me kapuna tau ngai nongonongo anna atoa laghe lao sio me laghe uela ta tau ngumane va, ‘Vau eteva, ami annaa va ughe vella nonga katu uit tale umam utana atingiu, me vaalua ssa tuvui eteva ghe pinosala?’

<sup>28</sup>“Ghe liula me ghe uela va, ‘Tau ngai ssateeghi eteva ghe kaokaoaala.’

“Me tau ngai nongonongo anna atoa laghe kolomiela va, ‘Uanna va ami laa muke velu?’

<sup>29</sup>“Ghe uela va, ‘Karika. Am rau mukumuke velu ssa tuvui etoa, va am muke velu tee uit. <sup>30</sup>Am tau vellalueta me lalu namuu eitauaa me elaa ghaa nau nisai uit. Ia o nau eteva aue aghauliaa ta lo atoa la sai uit tani ghaa akasina ssa tuvui etoa me la iri eitaeinila me pei nitungiaa me la ghaa aitauaa uit me aue la laa ghatoka tale aleghi ale nginana ateva.”

**Kiukiu niaimatoonga atea tale katu ue ngai erighi (mastet)**

*(Mak 4:30-32; Luk 13:18-19)*

<sup>31</sup>Ghe mene auliaala kateae kiukiu ni-aimatoonga. Ghe uela va, “Ararimangali eteva epona liu nongina katu ue ngai erighi la kolokoloa va mastet, taumattu ngateva ghe ghaaiela, me ghe lao sio tani pasaa tapaa ngutana. <sup>32</sup>Arongona ta ghaunaaili ia tale isaa akapaaili katu ue ngai me nau epiipinosa, enaanamuu vulu ekapa isaa akapa ai laghe pasala eutana. Me ia eai ghila, ghila atoa la looloo la mae tokatoka tale laangina.”

**Kiukiu niaimatoonga tale isti eteva**

*(Luk 13:20-21)*

<sup>33</sup>Me ghe mene auliaala kateae kiukiu niaimatoonga. Ghe uela va, “Ararimangali eteva epona liu nonginaaili isti eteva

vause ateva ghe ghaaiela me ghe ghelei eitauaa teela palaoa oroieili lomosi ta palaoa ngateva ghe rrangala.”

<sup>34</sup>Iesu ghe auliaa isaa akapa o voto ta taumattu ngatoa tale kiukiu niaimatoonga. Karika ghe aulia ngamasalika teva voto ta ghe auliaa nonga tale kiukiu niaimatoonga. <sup>35</sup>Mausina avalua o me llo propete ateva ghe auliaala ghe kaurekatila. Ghe uela va,

“Aghi aghauliaa kiukiu niaimatoonga etaimim.

Me aue akiukiuaa voto aisuliana ghe tiuaala emua arau nau God ghe gheleila kosa ateva oia.”<sup>‡</sup>

**Malloeana kiukiu niaimatoonga tale ssa tuvui eteva**

<sup>36</sup>Nau ghe kasu vulila taumattu ngatoa, ghe ssola tale ale ateva. Me kapuna disaepolo atoa laghe lao sio etana me laghe uela etana va, “Uaulia ngamasina etaimami malloeana kiukiu ni-aimatoonga ngateae ta ssa tuvui eteva me utana atingiu.”

<sup>37</sup>Ghe liula me ghe uela etaira va, “Natuna ateva Taumattu ngateva ia o lo ateva ghe kaokaoaala masi ue ngai.

<sup>38</sup>Me paa ngutana atingiu eaimatoonga kosa ateva, me masi ue ngai eaimatoonga lo atoa natuna ila ararimangali eteva. Me ssa tuvui eteva eaimatoonga natuna atoa sesa taumattu ngateva. <sup>39</sup>Me Satana tau ngai ssateena ateva God ghe pasala ssa tuvui eteva. Me nau nisai uit eaimatoonga airuuruu tale kosa ateva me tau ngai sai uit eaimatoonga ensolo atoa.

<sup>40</sup>“Nongina laghe muke vella ssa tuvui eteva me laghe tungie saela tale kuraa, airuuruu tale kosa ateva aue ia avalua o. <sup>41</sup>Natuna ateva Taumattu ngateva aue suu kapuna ensolo atoa me aue la muke velu tale ararimangalina at-

<sup>‡</sup>13:35 Sams 78:2

eva voto akapa sesa etiitiuaa ssavoto me lo atoa la elei voto sesa. <sup>42</sup>Aue la sau vella sai tale paka kura atea ataatiaaili ia me aue niaingalaai me niaingeresa ngalungalu elutu. <sup>43</sup>Me ghulughuluena atoa taumattu aue la llaa nongina sinaka tale ararimangalina ateva Tamaira ateva. See talingane manee aue nongo isaa oia inangari.”

### **Kiukiu niaimatoonga tale masi voto laghe kaila**

<sup>44</sup>“Ararimangali eteva epona liu nonginaaili aikaai viliki veu eteva laghe kaieiniela tale paa ngutana atea. Nau eteva taumattu ngateva ghe taraiela ghe mene aisulieiniela me tale masimasiaane ghe aitauna ngakapala peina me laghe polila, me ghe polila ia o paa ngutana atea.

<sup>45</sup>“Me ararimangali tee ateva epona liu nonginaaili tau bisnisi eteva ghe paepae pel tani poli. <sup>46</sup>Nau eteva ghe tarala lo ateva pel masinaaili ia ghe lao sio, ghe aitauna ngakapala peina me laghe polila, me ghe polila ia o pel ateva.

### **Kiukiu niaimatoonga tale uena atea**

<sup>47</sup>“Ararimangali tee ateva epona liu nonginaaili uena atea laghe velue siola tale ateo talia ngateae me ghe ghaala asease kko atoa. <sup>48</sup>Nau eteva ghe pasula, tau luku etoa laghe ae assola elae me laghe toka siola me laghe ghaala masi kko, laghe kaaila tale keru, me laghe sau vella llo sesa. <sup>49</sup>Airuruu tale kosa ateva aue ia avalue ia o, aue ensolo atoa la mae pola sesa atoa ta ghulughuluena atoa taumattu, <sup>50</sup>aue la sau vella sai tale paka kura atea ataatiaaili ia me aue niaingalaai me niaingeresa ngalungalu elutu.”

<sup>51</sup>Iesu ghe kolomilala va, “Aloimim ange masaangala isaa o voto?”

Me laghe uela va, “Ue.”

<sup>52</sup>Me ghe uela etaira va, “Liuna avalue o me isaa akapa tisa tale inangari nipaopao laghe disaepolola tale ararimangali eteva epona liu nonginaaili taumattu ngateva eghaaghaa ouna me pokane masi voto tale rum atiulu la ghatoka masi voto etana tale alena ateva.”

### **Propete ateva la tam oneoneainia**

*(Mak 6:1-6; Luk 4:16-30)*

<sup>53</sup>Nau eteva Iesu ghe ruula tani auliaa isaa o kiukiu niaimatoonga me ghe kasu vulila ia o voto ateva. <sup>54</sup>Ghe lao sio tale masalikina tunga atea me ghe tiuaala tani apasunga ta taumattu ngatoka tale aleira ale nivelu eitauaa. Me laghe soghiaala voto ghe auliaa me ghe gheelei, me laghe kokkolomi va, “Ia oia taumattu ngateva eaa ghe ghaala alo-masaanga me sarasarakaana tani ghelei mirikolo? <sup>55</sup>Ita kilakila va natuna ia tau ngai atulu ale ateva ia oia taumattu ngateva, me ararina atea kinna ta Meri me nengana atoa ta Jeimis, Josep me Saemon me Jiuda. <sup>56</sup>Me kapuna vause akapa atoa la tokatoka teeita. Me arova eaa ghe ghaala isaa o voto?” <sup>57</sup>Me ang ghe sessaila etana.

Me Iesu ghe uela etaira va, “Propete ateva la oneoneainia tale kasina ppae masaliki, me tale masalikina tunga atea me tangauena, karika.”

<sup>58</sup>Karika ghe gheleila righi oroi mirikolo tale masaliki etea poli karika laghe aikaia etana.

### **Herot ghe annaa va Jon tau ngai aasuu ia ta Iesu**

*(Mak 6:14-29; Luk 9:7-9)*

**14** Isaa o nau, gavana ngateva Herot ghe nongonongo kiukiuna Iesu. <sup>2</sup>Me ghe uela ta kapuna tau ngai uungu etoa va, “Ia oka taumattu ngateva Jon tau ngai aasuu ia etana ghe mene to-tula tale nimate! Liuna avalue o me sarasarakaanaaili ia tani ghelei mirikolo.”

<sup>3</sup>Poli emua arau, Herot ghe suula inangari me laghe poso atokala Jon me ghe iriela me ghe atokaie ssola tale ale mata voovoo poli Herodias, vausea ia tuena ta Pilip. <sup>4</sup>Poli Jon ghe ue ta Herot va, “Karika masina ta ughe lai sariela.” <sup>5</sup>Herot ghe anna tani uvi ematea me poli ghe maamatauta taumattu ngatoa ta ila laghe ue va Jon propete ia, liuna avalua o me karika ghe roola tani uvi ematea.

<sup>6</sup>Nau ninamanama atea eaimatoonga nau eteva Herot ghe lutula etana, natuna vause ateva Herodias ghe ssiuaala ta mataira Herot me kapuna atoa, me Herot ghe masimasiangailiela, <sup>7</sup>me ghe auliaala inangari nialokoi me ghe aulia ngakoronailila etana va aue taula saa voto aue kolomi. <sup>8</sup>Me kinna ghe auliaa tau lao sio ninanna ngateva me ghe uela va, “Ghaine arau aghaloanna uruna ateva Jon tau ngai aasuu eteva tale tivilau terei.” <sup>9</sup>King ghe alousiusila, me poli ghe gheleila inangari nialokoi eteva ta mataira namu ngatoa, ghe auliaala me laghe tau lao sio llo ghe kolomila. <sup>10</sup>Me ghe suula soldia ngatoa me laghe sai pulela alona atiulu Jon tale ale mata voovoo. <sup>11</sup>Ghe sau mae sio uruna ateva Jon tale terei etivilau me ghe taue lao sio ta aliki vause ateva. Ghe ghaaiela me ghe laoaie sio ta kinna. <sup>12</sup>Kapuna disaepolo atoa Jon laghe mae sio tani ghaa vaulanna ateva Jon me laghe lao sio tani kaieinia. Me laghe lao sio tani auliaa ta Iesu.

### **Iesu ghe anginila ghalima airari (5,000) taumattu**

*(Mak 6:30-44; Luk 9:10-17; Jon 6:1-14)*

<sup>13</sup>Iesu ghe nongola isaa o voto ghe lutula me ia nonga me disaepolo atoa laghe aikaaila tale paanaka ateva tani lao tale vaara. Nau eteva taumattu ngatoa laghe nongola, laghe kasu vulila masalikiira me laghe kasuaala tani laa ghaimuli teeia. <sup>14</sup>Nau Iesu ghe ssola

elae, ghe tarala oroieili taumattu ngatoa. Ghe alousiusi teelala me ghe ghelei emasinailala tale aneira isiki.

<sup>15</sup>Auena sinaka ateva ghe suu me disaepolo atoa laghe lao sio etana me laghe uela va, “Voto ateva oia vurunganna ia, me ang ghe aaitarraui. Sungi vella taumattu ngatoa me la lao tale masaliki taumattu etana me la laa poli righi aneira inana.”

<sup>16</sup>Iesu ghe liula me ghe uela va, “La rooro tani toka. Am taula righi inana, me la nama.”

<sup>17</sup>Disaepolo atoa laghe uela va, “Ami posoposo ghalima nonga verete me ghalua kko.”

<sup>18</sup>Iesu ghe uela va, “Am maeaa sio etaghi.” <sup>19</sup>Me ghe auliaala ta taumattu ngatoa va la toka sio tale rarrasa me ghe ghaala verete ghalima me kko alua, me ghe taatara saela epona liu me ghe kaili emasina saela, me ghe piri polapolakila, me ghe tau lao sio ta disaepolo atoa me ila laghe lao sio tani aikoiita ta taumattu ngatoa. <sup>20</sup>Laghe namanamala me ghe ssoilala, me disaepolo atoa laghe kaai esokosokoiaala kasangaulu ghaluae (12) laka tale tapiri nginana ghe oghila. <sup>21</sup>Lo atoa laghe namanamala ghe roola ghalima airari (5,000) taita, karika iraira tee vause me aliki etoa.

### **Iesu ghe kasula epona tale paamanu eteva**

*(Mak 6:45-52; Jon 6:15-21)*

<sup>22</sup>Arovaeaata Iesu ghe auliaala va kapuna disaepolo atoa laghe aikaaila tale paanaka ateva, me laghe muemue lao ta pai kativilau me ia ghe sungi velu mua taumattu ngatoa. <sup>23</sup>Vara ghe sungi velulala, me ie nonga ghe saela tale motouru tani looloo sae. Ie nonga, me ghe aitarrauila. <sup>24</sup>Paanaka ateva ang ghe mala masau ghoala me koto atoa angila ghe uviuvia poli laghe sousou kuukuu eteva.

<sup>25</sup> Elo ppai me Iesu ghe laa ghoa rekata etaira ghe kasukasu epona tale paamanu eteva. <sup>26</sup> Nau eteva disaepolo atoa laghe taraiela ta ghe kasukasu epona tale paamanu ghe moi saasakieinilala me laghe ue va, “Raroai ia!” Me laghe aipiia poli laghe maamatautu.

<sup>27</sup> Me arovaeaata ta Iesu ghe sama teelala, me ghe uela va, “Am rau mene annaa, ta aghi oia. Am rau mene matautu.”

<sup>28</sup> Me Pita ghe uela ta Iesu va, “Vau eteva! Arova koronna va io Iesu, uauliaa mae etaghi me akasu mae etam epona tale paamanu.”

<sup>29</sup> Iesu ghe uela va, “Mae sio.”

Me Pita ghe kure vulula paanaka ateva me ghe kasukasu elaolao ta Iesu epona tale paamanu. <sup>30</sup> Me vara ghe tarala koto ateva me ang ghe maamatautu me ang ghe lullusu sio me ang ghe kolokolo, ghe ue va, “Vau eteva, asaangieghila!”

<sup>31</sup> Arovaeaata Iesu ghe ssuaala ni mane me ghe kunela Pita me ghe uela va, “Ghaunaaili unem niaikaai. Vaalua me eghaaghalua nannaam?”

<sup>32</sup> Me nau eteva lalu ghe saesaela tale paanaka ateva me kuukuu eteva ghe kapala. <sup>33</sup> Me lo atoa tale paanaka ateva laghe kkaueiniela, me laghe ue va, “Koronnaaili va Natuna io God.”

### Iesu ghe ghelei emasinala tau sessa atoa eGenesaret

(Mak 6:53-56)

<sup>34</sup> Laghe ose longotila me laghe kautula tale distriki eteva eGenesaret.

<sup>35</sup> Nau eteva taumattu ngatoa tale ia o masaliki eteae laghe tara kilala Iesu, laghe suula inangari ta mene katoa masaliki me taumattu ghe maeaa sio kapuira tau sessa etana. <sup>36</sup> Me laghe

tani kokkolomi ekorokorongana ia va etau velu tau sessa atoa me la nim poso sama ghinnanina. Lo atoa laghe posoposo sama ghinnanina Iesu laghe maamasina.

### Voto raarangisana me voto karika raarangisana

(Mak 7:1-23)

**15** Katoa Paresi me tau ngai apa-sunga tale inangari nipaopao, laghe kasula eJerusalem me laghe mae sio ta Iesu tani kolomi, <sup>2</sup> “Mausi saa me kapum disaepolo atoa karika la ghaimuli tee voto tuvuita atoa laghe apasungaala etaita va ita gheeleei? Karika la porapora nimaira nau la namanama.”

<sup>3</sup> Iesu ghe liula me ghe uela va, “Me vaalua me karika am aimuli usi tee inangari nipaopao kanna God me am aimuli usi tee voto tuvuimim atoa laghe apa-sungaala va am gheeleei? <sup>4</sup> Poli God ghe uela va, ‘Am oneoneaa tamaimim me kinaimim,’<sup>†</sup> me, ‘Lo ateva ekaakasikiena tamana o kinna aue la uvi ematea.’<sup>§</sup> <sup>5</sup> Me am auliaa va arova kateva righi peina erooroo tani sausi tamana o kinna, me eauliaa va, ‘Isaa oio peighi nim kanna Vau palepale,’ <sup>6</sup> am apasunga va ia o taumattu ngateva karika erooroo tani oneoneaa tamana o kinna. Tale isaa o ase salana am ghelei inangarina God enim peisaane, ta am aimuli usi tee auliaaira tuvuimim atoa. <sup>7</sup> Am usimaghalua am! Propet Aisaea ghe aulia ngakoron-nala nau ghe aulia ngamuemua alokoila eleiaaimim:

<sup>8</sup> “Isaa oia taumattu la nim oneoneainaghi ta paaira me urunguitaniira masaueli etaghi.

<sup>9</sup> Karika righi malloeana uneira nikkaua

<sup>†</sup>15:4 Eksodas 20:12; Diuteronomi 5:16

<sup>§</sup>15:4 Eksodas 21:17



poli la ghasungu llo nim kaluira tau-  
mattu ngatoa nonginaaili va kanna  
God.”\*\*

<sup>10</sup> Iesu ghe kolola taumattu ngatoa  
me ghe auliaala etaira va, “Am nongo  
me aloimim emasaanga! <sup>11</sup> Saa llo voto  
ekupikupi sso elome tale paa tau-  
mattu ngateva, karika egheleia va tam  
raarangisana ia, me saa llo voto epop-  
pooaa ekupikupi ghoa tale paane ateva  
egheeleie tam raarangisana.”

<sup>12</sup> Vara me disaepolo atoa laghe mae  
sio tani auliaa ta Iesu va, “Ukilakila  
va Paresi etoa esessaila tale inangari  
uauliaala?”

<sup>13</sup> Iesu ghe liula me ghe uela va, “Isaa  
akapaaili voto eutana Tamaghi epona  
liu karika ghe pasala, aue emuke aka-  
paaili. <sup>14</sup> Am rau mene annaa isaa o ase  
taumattu! Ila nongina mata salusalu, la  
ghaloanna tani apasunga salana ta ka-  
toa, me arova mata salusalu eteva ekat-  
ulaa mata salusalu, ilalu ekapa lalu kupi  
tale liu.”

<sup>15</sup> Vara me Pita ghe uela va, “Erooroo  
va uauliaa malloeanina isaa o inangari?”

<sup>16</sup> Iesu ghe liula me ghe uela va,  
“Vaalua? Am tee aloimim karika ghe  
masaanga? <sup>17</sup> Karika am kilakila? Saa  
llo voto ekupikupi sso tale paa tau-  
mattu, ekupikupi sso tale kova tau-  
mattu me emene kupi ghoa. <sup>18</sup> Me saa  
llo voto ekupikupi ghoa tale paa tau-  
mattu, emaemae tale urunguita, isaa o  
voto egheeghelei taumattu ngateva etam  
raarangisana. <sup>19</sup> Tale isaa akapa voto  
urunguita ateva ealutu sesa ninanna,  
tani aiuvi emate, tani lai katoa maneeira,  
tani lai rorrou see, niainao, inangari  
kamena me niauliaa saasakia. <sup>20</sup> Isaa  
o voto egheeghelei taumattu ngateva

etam raarangisana, me tani namanama  
me karika upora nimam, isaa o llo  
karika eghelei taumattu ngateva etam  
raarangisana.”

### Vauseni nge Keinan

#### ateva unna niaikaai

(Mak 7:24-30)

<sup>21</sup> Iesu ghe kasu vulila lo atea o  
masaliki me ghe lao sio tale llo masa-  
liki kalakalangina eTaer me eSaedon.  
<sup>22</sup> Vauseni nge Keinan ateva, ghe toka-  
toka tale ia o pai etivilau, ghe mae  
sio ta Iesu, me ghe sama anamuula  
va, “Vau eteva, Natuna io Deivit,  
uaielousieinaghi! Natughu vause at-  
eva raroai eteva etokatoka etana me  
egheelei saasakieinia.”

<sup>23</sup> Iesu karika poi ghe nim  
aisaueiniela. Kapuna disaepolo atoa  
laghe lao sio me laghe auliaa etana va,  
“Sungi aoghiela! Eusiusita me egheelei  
kinatama mangalia ateva!”

<sup>24</sup> Iesu ghe liula me ghe uela va, “God  
ghe sungieghila nonga tani mae sausi lo  
atoa aIsraeli ang ghe raulala.”

<sup>25</sup> Vara me vause ateva ghe mae sio  
ghe suuiaala ta liue kkena Iesu, me ghe  
uela va, “Sausieghila, Vau eteva!”

<sup>26</sup> Iesu ghe liula me ghe uela va,  
“Karika masina tani tau lao aneira inana  
aliki etoa ta paua atoa.”††

<sup>27</sup> Vause ateva ghe liula me ghe uela  
va, “Koronnaaili, Vau eteva. Me paua tee  
atoa la namanama aneira vorovoro ngi-  
nana vauira atoa ekaakatuu tale uneira  
tevo.”

<sup>28</sup> Iesu ghe liula me ghe uela etana  
va, “Vause ateva, niaikaai etam na-  
mungaili! Saa llo voto ualoanna va elutu

\*\* 15:9 Aisaea 29:13

†† 15:26 *paua atoa* AJiu etoa laghe anna va ila muennaaili ila ta lo atoa karika va  
aJiu ila, me laghe kololala va ueili paua ila. Iesu ghe aimulisi tee auliaaira. Nau ghe  
auliaa, karika va ghe sessaia. Ghe nim anna tani tootoonga aikaaiiane vause ateva,  
karika va tani ghelei saasakia nannaane.

etam, aue elutu.” Ia arau o nau eteva, natuna vause ateva ghe masinala.

### **Iesu ghe ghelei emasinala oroieili tau sessa atoa**

<sup>29</sup> Iesu ghe kasu vuli voto ateva o, me ghe lao sio kalakalangina tale ateo talia ngateae eGalili. Ghe saela tale motouru eteva me ghe toka siola. <sup>30</sup> Oroieili ila taumattu ngatoa laghe mae sio etana, laghe maeaa sio lo atoa kasukasuaire sesa, mata salusalu, riu makeakeana, paavoo me oroieili ila tau sessa atoa, laghe atokailala tale liue kkena Iesu, me ghe ghelei emasinailala. <sup>31</sup> Taumattu ngatoa laghe annangailala nau laghe tarala paavoo atoa laghe samala, lo atoa riura makeakeana laghe korosila, lo atoa kasukasuaire sesa laghe masinala, me mata salusalu ghe otila mataira. Me laghe tau saela kapuira Goto ateva aIsraeli etoa.

### **Iesu ghe anginila ghaata airari (4,000) taita**

*(Mak 8:1-10)*

<sup>32</sup> Iesu ghe kolola kapuna disaepolo atoa, me ghe uela va, “Aghalousiusi tee taumattu ngatoa, ta laghe toka aitauaa teeieghila kotolu nau, me ghaine karika righi inana va la nama. Karika aghaloanna tani suu vella me maloona ila, la rau taataruu elaolao va la katuu etapaa salana.”

<sup>33</sup> Disaepolo atoa laghe kolomiela va, “Eaa ita laa pae oroieili inana tale voto ateva oio vurunganna ia, me ita anginila taumattu ngatoa oio oroienaila ila?”

<sup>34</sup> Iesu ghe kolomila va, “Ghaisa akapa verete am unusi?”

Me laghe liula me laghe uela va, “Ghaitu (7) verete me lutu kko ghauna.”

<sup>35</sup> Me Iesu ghe auliaala tale taumattu ngatoa va la toka sio tale kosa. <sup>36</sup> Vara me ghe ghaala ghaitu verete me kko, me ghe kaili emasina saela, ghe pirila,

me ghe taula ta kapuna disaepolo atoa, me disaepolo atoa laghe tau lao sio tale taumattu ngatoa. <sup>37</sup> Ila akapa laghe namanamala me laghe tuvula. Vara me disaepolo atoa laghe kaai aitauaala tapiri nginana ghe oghila, ghe roola ghaituae laka. <sup>38</sup> Ila akapa taita atoa laghe namanamala, laghe roola ghaata airari (4,000), karika laghe ioila vause atoa me aliki etoa. <sup>39</sup> Vara me Iesu ghe suu vella taumattu ngatoa, me ghe aikaaiala tale paanaka ateva, me ghe lao sio tale masaliki etoa kalakalangina ila distriki eteva eMagadan.

### **Laghe tani anna tani tara teva niaimatoongana**

*(Mak 8:11-13; Luk 12:24-56)*

**16** Paresi etoa me Sadiusi etoa laghe lao sio ta Iesu, me laghe kolomiela va eapasunga teva niaimatoongana ngepona liu. Laghe aulia llo tani nim tootoongainia.

<sup>2</sup> Ghe liula me ghe uela va, “Nau ange elo alai am ue va, ‘Aue masi nau poli karaane ateva eraeraeana,’ <sup>3</sup> me elue talua am ue va, ‘Ghaine ettasi poli karaane ateva ange raeraeanala me ange aavoo.’ Am taatara kila kookoo ngat-eva me karika am taatara kila niaimatoonga tale nau. <sup>4</sup> Sesa taumattu ngam me karika am usilaa aloanaane God, am anna tani tara niaimatoonga. Saa ghe lutu teela Jona, ie nonga o niaimatoongana ateva aue elutu.” Vara me Iesu ghe kasu vulilala me ghe lao ppaee sio.

### **Uneira isti Paresi me Sadiusi etoa**

*(Mak 8:14-21)*

<sup>5</sup> Nau laghe lao sio ta pai kativilau tale ateo talia ngateae me disaepolo atoa laghe tarala va laghe aikkaluaala verete. <sup>6</sup> Iesu ghe uela etaira va, “Am aikinikinita tani tara amasina tale uneira isti Paresi me Sadiusi etoa.”

<sup>7</sup>Laghe aikolomieinila tani ue va, “Koti eaauliaa llo oia poli karika ita ghaala righi verete.”

<sup>8</sup>Iesu ghe kilala saa ateva laghe aisakeieinia me ghe uela etaira va, “Uneimim niaikaaii ghaunaaili, vaalua me am aisakeanna va poli karika righi verete? <sup>9</sup>Vaalua, aloimim karika ghe masaanga? Karika am annaa ghalima verete ghe roola ta ghalima airari (5,000) me ghaisae keru am ghe kaaila? <sup>10</sup>Me karika am annaa ghaitu verete ghe roola ta ghaata airari (4,000) taumattu me ghe roola ghaisae laka am ghe kaaila? <sup>11</sup>Vaalua, me karika am kilakila va karika va aghaauliaa verete? Am aikinikinita tani tara amasina tale uneira isti Paresi me Sadiusi etoa.” <sup>12</sup>Vara me laghe vira mene kilala va ghe aauliaa llo Paresi me Sadiusi etoa laghe apasunga, me karika va la taatara amasina tale isti la ghelei tale verete.

### **Pita ghe auliaala va Iesu see ia**

*(Mak 8:27-30; Luk 9:18-21)*

<sup>13</sup>Nau Iesu ghe lao sio tale voto ateva kalakalangina ia eSiisaria Pilipae, ghe kolomila kapuna disaepolo atoa va, “Taumattu ngatoa la ue va see ta Natuna ateva Taumattu ngateva?”

<sup>14</sup>Laghe liula me laghe uela va, “Katoa la ue va Jon tau ngai aasuu ia, me katoa la ue va Elaija, me katoa la ue va Jerimaea o mene katoa tani propete.”

<sup>15</sup>Me ghe kolomilala va, “Me am vaalua? Am ue va aghi see?”

<sup>16</sup>Saemon Pita ghe liula me ghe uela va, “Io Mesaea io, Natuna io God ateva tokatoka liu ia.”

<sup>17</sup>Iesu ghe liula me ghe uela va, “Niarangise etam Saemon natuna io Jona, poli karika teva taumattu eaulliaa tau aatu llo ona ta Tamaghi etokatoka epona liu. <sup>18</sup>Me aghaauliaa etam va io

Pita, me tale ia o atu eteva<sup>‡‡</sup> aue aghatulu aleghi ale manga ateva etana, me atamana atea tale voto ateva aleira ia matena atoa karika erooroo tani apalaia. <sup>19</sup>Aue atau aatu kii eteva tale ararimangali eteva epona liu; saa llo aue uiri tale kosa ateva, aue la ghelei tee epona liu, me llo upulaka tale kosa ateva aue la pulaka tee epona liu.” <sup>20</sup>Me ghe paola kapuna disaepolo atoa va la rau mene laa ghaulliaa see va ia Mesaea ia.

### **Iesu ghe auliaala va aue emate**

*(Mak 8:31–9:1; Luk 9:22-27)*

<sup>21</sup>Isaa nau o Iesu ghe tiuaala tani aulia ngamasalika ta kapuna disaepolo atoa va aue etani sae eJerusalem me aue eghaa oroieili mmarikana, ta namu ngatoa, me namu ngatoa ta pristi etoa me tau ngai aapasunga ngatoa tale inangari nipaopao, me aue la uvi ematea, me aue kotonna ateva nau, emene totu.

<sup>22</sup>Pita ghe koloala me lalu ghe laa tingina ppae sio, me ghe tiuaala tani kisoia, ghe ue va, “Karika, Vau eteva! Isaa o voto karika erooroo tani lutu ta ngetam.”

<sup>23</sup>Iesu ghe kiriela me ghe uela ta Pita va, “Kasu vulieghila, Satana! Ughelei rungarunga salaghi. Nannaam karika eannaa voto kanna God ta voto kaluira taumattu ngatoa.”

<sup>24</sup>Vara me Iesu ghe uela ta kapuna disaepolo atoa va, “Lo ateva eanna tani usieghi, etani sioaa nannaane me esunuki unna aikotoo ateva, me eaimuli teeieghi. <sup>25</sup>Poli see eanna tani asaangi maamauluaane aue eraua, me lo ateva eraua ta poli mausighi aue emene ghaa. <sup>26</sup>Saa righi masi voto aue elutu arova taumattu ngateva ghele ghaa voto aka-paaili tale kosa ateva me ghele rau maamauluaane? O saa ateva aue ghele tauela tani aikolikolieinia tani mene ghaa maa-

<sup>‡‡</sup>16:18 Tale inangari nge Grik, Pita la ue va “Petros”, malloeanina ta “atu”.

mauluuane? <sup>27</sup> Poli Natuna ateva Taumattu ngateva aue emae tee mallangina ateva Tamane me kapuna ensolo atoa me aue etaula aipoliira kateva kateva taumattu tale voto laghe gheleila. <sup>28</sup> Aghaaulia ngakoronna etaimim va katoa oia am tiitingina, karika aue am mate me aue am tara Natuna ateva Taumattu ngateva emae tee ararimangalina ateva.”

### **Vilikina Iesu ghe mene isaa ppaela**

*(Mak 9:2-13; Luk 9:28-36)*

**17** Ghaonomo (6) nau ghe lange sio me Iesu ghe kolola Pita, Jeimis me Jon nengana Jeimis, me ila nonga laghe saela tale motouru eteva saesae-naaaili. <sup>2</sup> Tale ia o voto ateva taataraane Iesu ghe aikolikoliaala emua ta mataira. Matana ghe lallaa arova sinaka ateva, me ghinnanina ghe usola arova mal-langa ateva. <sup>3</sup> Vara me Moses me Elaija lalu ghe kaurekatila me lalu ghe tiuaala tani sama tee Iesu.

<sup>4</sup> Me Pita ghe uela ta Iesu va, “Vau eteva, masinaaaili ta ita sae mae oia. Arova uanna, aue aghelei kotolu ale paapali, kateva alem ia, me kateva alena ia Moses, me kateva Elaija.”

<sup>5</sup> Pita ghe aippooaa nonga me kookoo ngateva mallanginaaaili ghe akoulala me lingi ngalo ateva elome tale kookoo ngateva ghe uela va, “Ia o natughu eteva aghalousieinia, me masimasiaaghi ta ngetana namungaili. Am nongoa.”

<sup>6</sup> Nau eteva disaepolo atoa laghe nongola, laghe aso siola tapaa kosa, mataira ghe tau siola euu. Me laghe matautu etinginala. <sup>7</sup> Iesu ghe lao sio me ghe posolala me ghe uela etaira va, “Am totula. Am rau mene matautu.” <sup>8</sup> Nau eteva laghe atangaro saela, karika laghe tarala righi taumattu ta laghe tarala nonga Iesu.

<sup>9</sup> Nau laghe mae siosio tale motouru, me Iesu ghe ttoieinilala va la rau mene

auliaa ta mene teva saa llo laghe tarala lomosina ta Natuna ateva Taumattu ngateva etotu tale nimate.

<sup>10</sup> Me disaepolo atoa laghe kolomiela va, “Vaaluva me tau ngai apasunga tale inangari nipaopao la ue va Elaija aue etani muemue mae?”

<sup>11</sup> Iesu ghe liula me ghe uela va, “Elaija aue emae akasina tani ghelei emasina akapa voto. <sup>12</sup> Me aghaauliaa etaimim va Elaija ghe mae sio me karika laghe tara kilaiela, me laghe ghelei teeiela isaa akapa voto laghe anna tani ghelei etana. Tale ie nonga o salana atikirighi Natuna ateva Taumattu ngateva aue eghaa nimmarikana ta nimaira.”

<sup>13</sup> Me nannaaira disaepolo atoa ghe vira mene masalikela tani kila va ghe auliaa Jon tau ngai aasuu ia etaira.

### **Taita arighi raroai eteva ghe tokatoka etana ghe masinala**

*(Mak 9:14-29; Luk 9:37-43a)*

<sup>14</sup> Nau laghe rekatala nongina taumattu ngatoa, taita ateva ghe lao sio tani tara Iesu me ghe suuiaala emua ta Iesu.

<sup>15</sup> Me ghe uela va, “Vau eteva, ualou-siusi tee natughu taita arighi, poli eoo me gheeleia esessaaili me oroiaata ta ekaakatuu velu sae tale kuraa me tale manu tee. <sup>16</sup> Amaeainie sio ta kapum disaepolo atoa me karika la roola tani ghelei emasinaia.”

<sup>17</sup> Me Iesu ghe liula me ghe uela va, “Am lo ateva oia vituu, karika righi uneimim niaiesoa, nannaaimim me eleiaaimim karika ghulughuluena. Ghaisaata aue atoka aitaaua teiem? Me aue ghaisaata aue atoiem va am aiesoa? Am ghaa mae sio aliki eteva etaghi.”

<sup>18</sup> Iesu ghe paola raroai eteva, me ghe kasu vulila aliki eteva me ia arau o nau eteva, aliki eteva ghe masinala.

<sup>19</sup> Me disaepolo atoa laghe lao sio tani tara Iesu nau ie nonga me laghe

kolomiela va, “Vaalua me ami karika ami roola tani tiu velu raroai eteva?”

<sup>20-21</sup> Iesu ghe liula me ghe uela va, “Poli uneim niaikaaia ghaunaaili. Aghaaulia ngakoronna etaimim va, arova uneimim niaikaaia naanamungaane nongina katu ue ngai erighi ghaunaaili ia (mastet), am rooroo tani ue ta motouru eteva o va, ‘Kasula ona me umene lao teke,’ aue ghele kasu. Aue am rooroo tani ghelei voto akapa.”<sup>¶¶</sup>

**Aiaaghaluene Iesu ghe uela va aue emene totu**

(Mak 9:30-32; Luk 9:43b-45)

<sup>22</sup> Nau eteva laghe mae aitauea sio eGalili me Iesu ghe uela etaira va, “Natuna ateva Taumattu ngateva aue la tauela ta nimaira taumattu ngatoa. <sup>23</sup> Aue la uvi ematea me vara aiaakotonna ateva nau me aue emene totu.” Nau disaepolo atoa laghe nongola laghe alousiusila.

**Iesu ghe taula takis moni pei tale ale manga ateva**

<sup>24</sup> Vara me Iesu me kapuna disaepolo atoa laghe laa rekata sio eKapenium, me lo atoa taumattu laghe ghaaghaa takis moni pei tale ale manga ateva laghe uela ta Pita va, “Koti kapuimim tisa ngateva karika eveluvelu takis tale ale manga ateva?”

<sup>25</sup> Me Pita ghe uela va, “Ue, eveluvelu.”

Me Pita ghe kupi ssola tale ale ateva, me Iesu ghe sama akasinala tani ue ta Pita va, “Saemon, uannaa va kingi etoa tale kosa ateva oia la ghaaghaa takis tale ase voto atoa ta see atoa, ta kapuira atoa o ta mene katoa ppae?”

<sup>26</sup> Me Pita ghe uela va, “La ghaaghaa takis ta mene katoa ppae.”

Me Iesu ghe uela etana va, “Mausina avalua o me kapuira atoa la tam tau- taula takis. <sup>27</sup> Ta rau eleila va esassaila etaita, siola tale ateo talia ngateae me uvelu ghoa unem airrekati eteae. Me nau urrekati aitiutiue eteva kko, uoti paane ateva, me aue ughaa viliki veu etivi- lau ughaaia me ulaa tauela etaira aipoli kaluitalua takis.”

**See aue enamuu?**

(Mak 9:33-37; Luk 9:46-48)

**18** Isaa o nau disaepolo atoa laghe lao sio ta Iesu me laghe kolomiela va, “See atoa namuu ila tale arariman- gali etava epona liu?”

<sup>2</sup> Iesu ghe kolola aliki erighi me ghe atinginaia elome etaira. <sup>3</sup> Me ghe uela va, “Aghaaulia ngakoronna etaimim va am aikolikoliaa me am nongina lutu ngali- liki etoa, arova karika, karika aue am kupi sso tale ararimangali eteva epona liu. <sup>4</sup> Liuna avalua o me lo ateva esioaa nannaane nongina aliki eteva o, namuu ia tale ararimangali eteva epona liu.

<sup>5</sup> “Me see emasimasi tani ghaa lutu ngaliki etoa poli ararighi eteae eghaaghaa teeieghi. <sup>6</sup> Arova aliki erighi eaiesoa etaghi, me teva taumattu egheelei unna niaikaaia ekatuu, ghele masinaaili ta arova laghele iri teva paka ngatu ta ngalona, me laghele allusia elo malionge.

<sup>7</sup> “Aue esesaaili ta taumattu tale kosa ateva mausi voto atoa la ghelei me katoa tani taumattu uneira niakaaia ekaakatuu. Isaa o voto aue elutu me aue esesaaili ta lo ateva taumattu egheelei voto o elutulutu. <sup>8</sup> Arova nimam o kekem egheleio me ukaakatuu tani ghelei voto sesa, usai koto me usau

<sup>¶¶</sup>17:20-21 Kasina uru ngai laghe pitila, laghe piti teela, <sup>21</sup> Isaa o ase voto karika erooroo tani lutu arova karika ita tam nae me ita tam pure.

velu. Aue masina arova ughaa mauue me katelange kekem me nimam karika, me arova nimam me kekem masina me aue la sau veluo sae tale kuraa atea tokatoka liu ia. <sup>9</sup>Me arova teva matam egheeleio me ukaakatuu tani ghelei voto sesa, uvaliki velua me usau velu, masina tani ghaa mauue ta kateva nonga matam, me arova matam akapa alua me la sau veluo sae tale kuraa atea eGehenna.<sup>§§</sup>

**Kiukiu niaimatoonga atea  
tale sipsipi eteva ghe rauela**

(Luk 15:3-7)

<sup>10-11</sup>“Karika am mene tara aliki etoa va peisaane ila. Aghaauliaa etaimim va kapuira ensolo atoa la laa rekata ta matane Tamaghi epona liu.\*

<sup>12</sup>“Vaalua am annaa? Arova teva taumattu kiena sipsipi eroroo kateva ai (100) me kateva ghele tiu ppae, am annaa va karika aue ghele kasu vuli ghasiongaulu ghasio (99) tale voto saesaena me ghele kasu tani laa pae lo ateva ghe tiu ppaela? <sup>13</sup>Arova ghele taraia, aghaaulia ngakoronna etaimim va masiasiaane tale ia o sipsipi eteva namungaili me tale lo ghasiongaulu ghasio (99) karika laghe tiu ppaela. <sup>14</sup>Tale ia nonga o salane Tamaim ateva† epona liu karika eanna va teva ta lutu ngaliki etoa eraua.

**Vaalua tani sausi tuem o nengam  
ateva eghelei voto sesa ta nengam**

(Luk 17:3)

<sup>15</sup>“Arova teva tuem o nengam eghelei teieo righi voto sesa, ulaa taraia me uauliaa voto sesa egheleila etam elome

etaimalua nonga. Arova enongo usilainio, angu sausiela tani ghaa oghia. <sup>16</sup>Arova etam nongo usilainio, ughaa kateva o ghalua tani mene laa taraia me la rooroo tani auliaa va voto o koronna. <sup>17</sup>Arova etam nongo usilainila, am auliaa tale ale manga, me arova etam nongo usilaa tee ale manga, am tau velua, me enim toka nongina tau ngeleka ateva o tau ngai ghaa viliki veu.

<sup>18</sup>“Aghaaulia ngakoronna etaimim va voto llo aue am iri tale kosa ateva, aue la ghelei tee epona liu, me llo am pulaka tale kosa ateva aue la pulaka tee epona liu.

<sup>19</sup>“Amene auliaa etaimim va arova lo alua taumattu tale kosa ateva lalu mae aitaaua tale kateva nonga ninanaa me lalu kolomieghi tale righi voto aue Tamaghi epona liu aue ghele taula. <sup>20</sup>Poli arova ghalua o kotolu la maemae aitaaua tale ararighi etea, aghi atokatoka aitaaua teeila.”

**Kiukiu niaimatoonga atea tale  
sesa tau ngai uungu eteva**

<sup>21</sup>Me Pita ghe mae sio ta Iesu me ghe kolomiela va, “Vau eteva, aue ghaisaata akaluaa voto sesa ateva tueghi o nengaghi ghele ghelei etaghi, aue esae ta ghaituata (7)?”

<sup>22</sup>Iesu ghe liula me ghe uela va, “Aghaauliaa etam va karika va ghaituata nonga, ta ghaitungauluata me mene ghaitu (77).<sup>‡</sup>

<sup>23</sup>“Liuna avalua o me ararimangali eteva epona liu nonginaaili kateva king ghe aloanna tani ghelei eghulughulena unna dinao ateva kapuna tau ngai nongonongo anna atoa. <sup>24</sup>Nau ghe tiuaala,

§§18:9 *Gehenna* Utara Malloeana Inangari.

\*18:10-11 Kasina uru ngai laghe pitila, laghe pitila <sup>11</sup> Poli Natuna ateva Taumattu ngateva ghe sio mae tani asaangi taumattu ghe rauela. Utara Luk 19:10.

†18:14 Kasina uru ngai laghe pitila, laghe pitila Tamaghi eteva

‡18:22 ghaitungauluata me mene ghaitu (77) o ghaitungauluata ghaitu (70 × 7)

laghe maeaa sio ia o taumattu ngat-eva unna kinatama dinao ateva.<sup>†</sup> <sup>25</sup> Poli karika ghe rooroo tani liu, vauna ateva ghe uela va la laa taua me la polia, ia me vausenna ateva me natuna atoa me peina akapa atoa, tani liu unna dinao ateva.

<sup>26</sup> “Ia o tau ngai nongonongo anna ateva ghe suuiaala patu kkena emua etana me ghe annala va vauna ateva ealousiusi teeia me aue eliu ekapa voto. <sup>27</sup> Vauna ateva ghe alousiusi teeiela me ghe uela va vulla tani liu unna dinao, me ghe tau veluela me ghe kasula.

<sup>28</sup> “Nau ghe kasula, ghe lao sio me ghe tarala kateva kapuna lalu ghe uungu eitauaa ghe dinaola etana ta kateva ai (100) silva koen. Ghe poso atokaiela me ang ghe aloanna tani kii pule alona atiulu. Me ghe ue etana va, ‘Utani liu kalum dinao ateva.’

<sup>29</sup> “Kapuna ateva lalu ghe uungu eitauaa ghe suuiaala patu kkena emua etana me ghe anna va ghe alousiusi teeia me aue ghe liu unna dinao ateva.

<sup>30</sup> “Me kapuna ateva ghe ratila, ghe tani atoka ssola taumattu ngateva tale ale mata voovoo lomosina ta ghe tani liu kanna dinao ateva. <sup>31</sup> Nau mene katoa tani tau ngai nongonongo anna laghe tara isaa o voto ghe lutula, nannaaira karika ghe masinala. Liuna avalua o me laghe aulia ngakapala voto ghe lutula ta vauira ateva.

<sup>32</sup> “Me vauna ateva ghe mene koloala ia o tau ngai nongonongo anna ateva me ghe uela etana va, ‘Io sesa taumattu io. Aghe ghaa velu ekapala kalum dinao poli ughe ue va aghalousiusi teieo. <sup>33</sup> Vaalua me karika ughe mene alousiusi teela mene lo ateva kapum amalu ghe

uungu eitauaa nongina aghe gheleila etam?’ <sup>34</sup> Vauna ateva ghe sessaiela me ghe auliaala me lo atoa la ghaaitoia ale mata voovoo ateva va laghe ghelei teeia voto mmarikana lomosina ta etani liu ekapa kanna dinao.

<sup>35</sup> “Tamaghi epona liu egheelei evalua o etaimim, arova am tam kkaluaa kateva tueimim me nengaimim tale urunguitaniimim.”

### Tani airati

(Mak 10:1-12)

**19** Nau eteva Iesu ghe ruula tani auliaa isaa o voto, ghe kasu vulila eGalili me ghe lao sio tale distriki eteva eJudia ta pai kativilau eJordan. <sup>2</sup> Oroianaaili taumattu ghe usiusia me ghe ghelei emasinailala tale ia o voto ateva.

<sup>3</sup> Katoa Paresi laghe mae sio etana tani tootoongainia tale kateva nikokkolomi. Laghe uela etana va, “Uneita inangari nipaopao eue va masina arova taita ateva erooroo tani rati vausenna ateva tale aloaloannaane?”

<sup>4</sup> Ghe liula me ghe uela va, “Karika am ghe ritila va tale aitiutiu tale voto akapaaili lo ateva ghe gheleila voto ‘ghe gheleila taita me vause’<sup>§</sup>? <sup>5</sup> Me God ghe uela va, ‘Liuna avalua o me taita ateva ekasukasu vuli tamana me kinna me etoka aitauaa tee vausenna ateva me nau eteva ange lalu laila ngeilalu kateva nonga ilaluela.’<sup>\*\*</sup> <sup>6</sup> Karika va emene ghaaghalue ilalua, ta ekaakateva nonga ilalua. Liuna avalua o me llo God eaatoka aitauaa, karika teva taumattu emene pola.”

<sup>7</sup> Me laghe kolomiela va, “Me vaalua me Moses ghe pitila va taita ateva

<sup>†</sup>18:24 Tale inangari nge Grik, *kasangaulu airari (10,000) talent*. Kateva talent erooroo 6,000 silva koen (denarius), me kateva silva koen aipolina kateva nau.

<sup>§</sup>19:4 Aitiutiu 1:27

<sup>\*\*</sup>19:5 Aitiutiu 2:24

eroroo tani taula uru ngai niairati ta vausenna ateva, me esungi velua?”<sup>††</sup>

<sup>8</sup> Iesu ghe liula me ghe uela va, “Moses ghe uela va am rooroo tani rati vausenimim poli urunguitanimit korokoronganaaili, me aitiutiuaa tale voto akapaaili karika isaa avalua o. <sup>9</sup> Aghaauliaa kieimim va lo ateva erati vausenna ateva nau karika ghe lai sari kateva me emene ghaa mene teva vause ange lai sarila.”

<sup>10</sup> Disaepolo atoa laghe uela etana va, “Arova ia avalua o, aue emasina arova taita ateva erau mene lai.”

<sup>11</sup> Iesu ghe liula me ghe uela va, “Karika va taumattu ngakapa aue eghaa isaa oia inangari, ta llo nonga atoa God ghe akorokoronganaailala tani ghaa isaa oia inangari. <sup>12</sup> Poli katoa, nau laghe lutula laghe lutu saaskiaala me karika la rooroo tani lai. Me katoa taumattu laghe kaatilala, me katoa la tam anna tani lai poli la ghanna tani ghelei unguane ararimangali eteva epona liu. Lo ateva eroroo tani ghaa isaa oia inangari aue ghaa.”

### **Iesu ghe arangisela lutu ngaliki etoa**

*(Mak 10:13-16; Luk 18:15-17)*

<sup>13</sup> Me laghe maeaa sio lutu ngaliki etoa ta Iesu va esaoaa nimane etaira me epure etaira. Disaepolo atoa laghe paola lo atoa laghe maeainila sio.

<sup>14</sup> Me Iesu ghe uela va, “Am tau velu lutu ngaliki etoa, me la mae etaghi. Am rau mene ghelei rungainila poli ararimangali eteva epona liu kaluira ia lo atoa nongina ila o lutu ngaliki etoa.”

<sup>15</sup> Ghe saoaala nimane etaira me ghe kasu vulila lo atea o masaliki.

### **Aliki taita ateva tue peipeiena ia**

*(Mak 10:17-31; Luk 18:18-30)*

<sup>16</sup> Vara me kateva taita ghe mae sio ta Iesu me ghe kolomila Iesu va, “Tisa, saa arighi masi voto aue aghelei me aghaa maulue ateva tokatoka liu ia?”

<sup>17</sup> Iesu ghe liula me ghe uela va, “Vaalua me ukokkolomi voto masina etaghi? Nim kateva nonga masina ia. Arova uanna tani ghaa maulue, unongo usilaa inangari nipaopao.”

<sup>18</sup> Me taita ateva ghe kolomila Iesu va, “Saa ateva inangari nipaopao?”

Iesu ghe liula me ghe uela va, “Urau mene aiuvi emate, urau mene lai sari, urau mene ainao, urau mene kamekame tale niaisakei, <sup>19</sup> uoneoneaa tamam me kinam,<sup>‡‡</sup> me uaielousia taumattu ngateva kalakalangina ia etam nongina uaielousieinio.”<sup>¶¶</sup>

<sup>20</sup> Me aliki taita ateva ghe uela va, “Isaa akapa voto ona ngaghe gheleila. Mene saa ateva voto karika aghe ghelei?”

<sup>21</sup> Iesu ghe liula etana me ghe uela va, “Arova uanna tani ghulughuluenaaili, ulao me ulaa tau peim me la poli me ughaa viliki veu me utau lao ta lo atoa karika righi peiira, me aue utau peipeiena epona liu. Me umae usieghe.”

<sup>22</sup> Nau eteva aliki taita ateva ghe nongo avaluela o, ghe alousiusila me ghe kasula, poli oroianaaili peina.

<sup>23</sup> Me Iesu ghe uela ta kapuna disaepolo atoa va, “Aghaaulia ngakoronna etaimim va aanasaaili ta tue peipeiena atoa tani kupi sso tale ararimangali eteva epona liu. <sup>24</sup> Me aghaauliaa etaimim va masukasukale ta teva kamolo tani kupi sso tale teae mata raum. Me teva tue peipeiena tani kupi

<sup>††</sup>19:7 Diuteronomi 24:1

<sup>‡‡</sup>19:19 Eksodas 20:12-16; Diuteronomi 5:16-20

<sup>¶¶</sup>19:19 Levitikas 19:18



sso tale ararimangalina ateva God aue emasukasukaleaili.”

<sup>25</sup> Disaepolo atoa laghe soghiaa saasakiaa teeila isaa o inangari me laghe kolomila va, “Me see nonga eroroo tani saanga?”

<sup>26</sup> Iesu ghe taatara lao sio etaira me ghe uela va, “Ta taumattu ngatoa, karika la rooroo tani ghelei isaa o voto, me ta God, eroroo tani ghelei isaa akapa voto.”

<sup>27</sup> Pita ghe liula me ghe uela va, “Ami ghe kasu vuli ekapala voto tani mae usio! Saa nonga ateva aue ami ghaaia?”

<sup>28</sup> Iesu ghe uela etaira va, “Aghaaulia ngakoronna etaimim va, nau voto emene aikolikoliaa nau Natuna ateva Taumattu ngateva etoka tale aitokatokane ateva king, lo atoa am aimuli teeinghi aue am toka tale kasangaulu ghalua (12) aitokatokane uneira namu ngatoa. Me aue am ghelei niaisakei tale kasangaulu ghalua ararimangali nge Israel. <sup>29</sup> Me lo atoa laghe kasu vulila tanganueira, o tueira me nengaira atoa o tamaira me kinaira me natuira atoa o umaira paa ngutana ta poli ararighi eteae, aue la ghaa aililiu tale isaa o voto elau kateva ai (100), me aue la ghaa tee maue ateva tokatoka liu ia. <sup>30</sup> Me oroi ila taumattu ngatoa matuutuliena ila aue la sioaili euu, me see ila lo atoa arariira euu aue la matuutuliena.”

### Kiukiu niaimatoonga atee tale tau ngai uungu

**20** Iesu ghe mene kiukiu tee lao sio va, “Aghaaulia ngavalua o poli ararimangali eteva epona liu nongina kateva tau kosa. Elue talua poopooa, ghe lao sio tani kolo tau ngai uungu etoa va la uungu tale umana utani uaeni. <sup>2</sup> Ila oia tau ngai uungu etoa laghe masi-

masila tani ghaa kateva kateva silva koen<sup>§§</sup> tale lo ateva o nau, me namu ngateva ghe sungilala tani laa uungu tale umana utani uaeni etingiu.

<sup>3</sup> “Elue talua ta 9 kilok, namu ngateva ghe lao sio, me ghe tarala taumattu ngatoa laghe aitokaa see nongina laghe veluvelu eitauaa. <sup>4</sup> Me eghe uela etaira va, ‘Am tee am rooroo tani laa uungu tale utani uaeni etingiu, me aue apoliem tale sa ateva ghulughuluena ia.’ <sup>5</sup> Me laghe kasula.

“Elo sinaka ta 12 kilok, me mene elo alai ta 3 kilok, namu ngateva ghe mene lao sio tani mene gheleila llo eghe ghelei. <sup>6</sup> Elo alai ta 5 kilok, ghe lao sio me ghe tarala kasina taumattu ghe aaitoka see, me ghe kolomilala va, ‘Vaalua me ia oia nau eteva am nim tokala etana?’

<sup>7</sup> “Me laghe uela va, ‘Karika teva taumattu etau mae sio righi niuungu etaimami.’

“Ghe uela etaira va, ‘Am tee am laa uungu tale utani uaeni etingiu.’\*

<sup>8</sup> “Elo alai ta 6 kilok me tau kosa ateva ghe auliaala ta kapuna tau ngai toitoi eteva va, ‘Kolola tau ngai uungu etoa me utau lao aipoliira. Utau lao aipoliira kateva kateva, utiuua ta lo atoa laghe airuruu tani mae uungu, me elaa ruu ta lo atoa laghe aitiutiula tani mae uungu.’

<sup>9</sup> “Lo atoa taumattu laghe tiuaala ta 5 kilok elo alai laghe mae sio me laghe ghaala kateva kateva silva koen. <sup>10</sup> Me nau eteva lo atoa laghe tiu akasinala laghe mae sio, laghe nnaala va laghe ghaa oroi viliki veu, me karika, ila tee laghe ghaala kateva kateva silva koen. <sup>11</sup> Laghe tarala viliki veu laghe ghaala me ghe sessailala ta tau kosa ateva, me laghe tiuaala tani olueinia, laghe ue va, <sup>12</sup> “Ta lo atoa la airuruu tani uungu, la

§§20:2 *silva koen* Silva koen (denarius) aipolina kateva nau.

\*20:7 Kasina uru ngai laghe pitila, laghe pitila *etingiu*, me aue *apoli emasinaiem*.

uungula nonga kateva aoa, me upolilala nongina upoliemamila. Ami gheleila kinatama niuungu eteva, ta ami tiuaala arau elue talaua poopooa me sinaka ateva ange sinaki emateamamila.’

<sup>13</sup>“Tau kosa ateva ghe nongola inangariira me eghe liu evaluela toko ta kateva kapuna tau ngai uungu, ‘Kapughu, karika agheleila teva voto sesa etam. Karika ughe asokoi teeiaghila va aue ughaa kateva silva koen?’ <sup>14</sup>Ghaala aipolim me ukasu. Aghi aghe auliaala va la poli evaluieim o lo atoa laghe airuuru-ula tani uungu, tale aloannaaghi. <sup>15</sup>Koti karika eroroo va aghaimuli tee aloannaaghi tani aikoi ta uneghi viliki veu, va? Arova aghanna tani ghelei masi niuungu tale taumattu ateva oia, vaalua me sessa io?”

<sup>16</sup>Iesu ghe uela ta kapuna disaepolo atoa va, “Isaa avalua o me oroi ila taumattu ngatoa matuutuliena ila aue la sioaili euu, me see ila lo atoa arariira euu aue la matuutuliena.”

**Aiaakotonna Iesu ghe uela va aue emate me emene totu**

*(Mak 10:32-34; Luk 18:31-34)*

<sup>17</sup>Iesu ghe kasula me ghe laa saesae eJerusalem. Me nau eteva laghe laa saesae, Iesu ghe kolo apalluula nonga kapuna kasangaulu ghalua (12) disaepolo, me ghe auliaala etaira va, <sup>18</sup>“Am nongo, ita laa saesae eJerusalem, me aue la tau lao Natuna ateva Taumattu ngateva ta nimaira namu ngatoa tale pristi etoa me tau ngai aapasunga tale inangari nipaopao atoa, me aue la ghelei niaisakei etana, me la tingina aitauea tani uvi ematea. <sup>19</sup>Aue la taue lao ta taumattu ngeleka atoa, me aue la kusiaa teeia, la uetaia, me la avukalaia tale aikotoo. Emuli tale kotolu nau, aue totu.”

**Jeimis me Jon lalu ghe anna tani namuu**

*(Mak 10:35-45)*

<sup>20</sup>Emulina, kinairarua ateva natuna alua Sebedi me natuna alua laghe mae sio ta Iesu. Me ghe suuiaala me ghe uela va ealoanna kateva voto ta Iesu.

<sup>21</sup>Me Iesu ghe uela va, “Saa ateva ualoannaia?”

Me vause ateva oia ghe uela va, “Aghaloanna va uue va ilalua oia natughu elua, lalu toka kalakalangina tale ararimangalim eteva, kateva tale pai muenna ativilau, me kateva tale pai uaise ativilau.”

<sup>22</sup>Iesu ghe nongola isaa oia inangari me ghe liula tani ue va, “Karika amalu kilakila amasina llo amalu kokkolomi. Amalu rooroo tani ropi tale ia oia kapa ateva nimmarihana etana aue aropi etana?”

Me lalu ghe uela va, “Ue, angalu rooroo.”

<sup>23</sup>Iesu ghe uela etairarua va, “Koronna, aue amalu ropi tale uneghi kapa ateva, me tani toka tale pai muenna o uaise ativilau, aghi karika uunguaaghi tani tau aatu. Isaa oia voto uneira isaa o taumattu Tamaghi ange aimonomosia tau lao sio.”

<sup>24</sup>Nau eteva kasangaulu (10) disaepolo laghe nongola isaa oia inangari tue me nenga alua lalu ghe kolomila Iesu, eghe sessailala. <sup>25</sup>Iesu ghe kolo aitaueinilala me ghe uela etaira va, “Am kilakila, isaa o tau ngai toitoi tale tau ngeleka atoa, la ghelei taumattu enim uungu aanasa etaira. Me lo atoa matuutuliena ila, la ghelei saasakia ta taumattu ngatoa. <sup>26</sup>Isaa o ase gheleiaaira erau mene toka elome etaimim, karika. Lo ateva taumattu ealoanna tani namuu elome etaimim, esio euu me ghelei nongina tau ngai nongonongo anna atoa.

<sup>27</sup>Me lo ateva taumattu ealoanna tani

muemueinam, etani kapuimim tau ngai uungu. <sup>28</sup>Nongina Natuna ateva Tau-mattu ngateva ghe tam sio mae va la uungu etana, me karika, ta ghe sio mae tani uungu etaira me tani taula maa-mauluaane tani ghaa oghi oroi taita me vause.”

### Iesu ghe ghelei emasinala mata salusalu elua

(Mak 10:46-52; Luk 18:35-43)

<sup>29</sup>Iesu me kapuna disaepolo atoa laghe kasu vulila masaliki taatara atea eJeriko, me oroieli taumattu ghe mene usiela. <sup>30</sup>Me ghalua taumattu lalu ghe tokatoka tale sama salana atikirighi mata salusalu ilalua. Me nau eteva lalu ghe nongola va Iesu ekasukasu emae-mae, me namuu ta lalu ghe kolokoloa va, “Vau eteva, io Natuna io Deivit, ualously teeingalua!”

<sup>31</sup>Nau eteva taumattu ngatoa laghe nongolaluela lalu ghe kolokolo, taumattu ngatoa laghe paopao rungainilalua va, “Amalu rau mene sama.” Me ilalu ghe kolokolo anamuu va, “Vau eteva, Natuna ateva Deivit, ualously teeingalua!”

<sup>32</sup>Iesu ghe tinginala, ghe kololaluela me ghe uela va, “Saa llo amalu aloanna va aghelei etaimalua?”

<sup>33</sup>Lalu ghe uela etana va, “Vau eteva, angalu aloanna va uoti matangalua.”

<sup>34</sup>Iesu ghe alousisusi teeilaluela, ghe posola matairarua, me arovaeaata matairarua ghe taatarala, me lalu ghe usiela.

### Iesu ghe kupi ssola eJerusalem arova kingi eteva

(Mak 11:1-11; Luk  
19:28-38; Jon 12:12-19)

**21** Nau eteva ngila ghe aakalakalaa eJerusalem me ngila ghe rekatala

tale masaliki eteva eBetpeis tale mo-touru eteva eOliv, me Iesu ghe su-ula ghalua tani kapuna disaepolo. <sup>2</sup>Ghe uela etairarua va, “Amalu muemuela me amalu lao tale masaliki eteae ngeita taraie lao sio me arovaeea ta aue amalu tara donki eteva me natuna ateva la iiri etinginaulaluela. Amalu pulakailalua, me amalu maeainalua etaghi. <sup>3</sup>Arova teva ekolomiemalua, amalu ue etana va, “Vau eteva eanna tani ghelei uunguaane etairarua me aue arovaeea nonga ta etau velulalua.”

<sup>4</sup>Isaa o voto ghe lutula tani ghelei inangarina propete ateva ghe kau-rekatila, <sup>5</sup>ghe uela va:

“Auliaala ta masaliki taatara atea eSaeon,

‘Am tara kapuimim kingi eteva emae-mae etaimim,

esiosioaaili euu me eilou tale donki, lo ateva donki aliki taita ia.”<sup>†</sup>

<sup>6</sup>Disaepolo alua lalu ghe kasula tani ghelei voto Iesu ghe auliaala etairarua.

<sup>7</sup>Lalu ghe maeaa sio donki eteva kinna ia me natuna ateva, me lalu ghe

alokoi saela uneirarua aiaasae ngeleka etairarua, me Iesu ghe laa sae toka etairarua.

<sup>8</sup>Oroianaaili taumattu laghe lullu velu uneira aiaasae ngeleka me

laghe pulepule alokoi tapaa salana, me katoa laghe saisai laa ngai me laghe

aalokoi sio tapaa salana. <sup>9</sup>Lo atoa taumattu laghe muemueainia me lo atoa

laghe aimuli etana laghe ovaova tani ue va,

“Nimasimasi ta Natuna ateva Deivit!”

<sup>†</sup>21:5 Aisaea 62:11; Sekaraea 9:9

“Niarangise aue etoka ta lo ateva emae-mae tale ararina atea Vau eteva!”<sup>‡</sup>

“Tau sae ararina atea God iaaili epona!”

<sup>10</sup> Nau eteva Iesu ghe kupi ssola eJerusalem, taumattu ngakapa eJerusalem ghe soghieiniela, me laghe aikolomieinila va, “See okae?”

<sup>11</sup> Me lo atoa laghe kasukasu teeia laghe ue va, “Iesu oke, propete ia me aNasareti ia eGalili.”

### Iesu tale ale manga

(Mak 11:15-19; Luk 19:45-48; Jon 2:13-22)

<sup>12</sup> Iesu ghe kupi ssola nongina ale ngeleka atiulu tale ale manga ateva me ghe sungi vella lo atoa laghe aaitauaa me laghe poppoli. Ghe sau etakila uneira tevo atoa lo atoa laghe aikolikoliaa viliki veu me uneira aitokatoka lo atoa laghe aaitauaa ghila valusu va la poli. <sup>13</sup> Ghe uela etaira va, “Laghe pitila tale Uru ngai Manga ateva va, ‘Aleghe ale manga ateva la ghaseasea va ale ailooloo sae ia.’” <sup>14</sup> Me am ngam eleia arova ‘aleira ale niaisuliaa ia tau niainao atoa.’<sup>§</sup>”

<sup>14</sup> Mata salusalu etoa me tangorengorena atoa laghe mae sio tani taraia tale ale ngeleka atiulu tale ale manga ateva, me ghe ghelei emasinalala. <sup>15</sup> Namuu ta pristi etoa me tau ngai apasunga atoa tale inangari nipaopao laghe tarala masi voto ghe ghelei me vaalua aliki etoa laghe aore tale ale ngeleka atiulu tale ale manga ateva tani ue va, “Nimasimasi tale Natuna ateva Deivit,” me ghe sessai etinginailala.

<sup>16</sup> Me laghe kolomila Iesu va, “Unongonongo llo aliki etoa la ghauliaa?”

Iesu ghe liula me ghe uela va, “Ue. Me koti karika am ghe ritila inangari laghe piti elokoila laghe uela va,

“‘Ughe aimonomonaisaala lutu ngaliki etoa

va aue la tau sae ararim atea.’”<sup>\*\*</sup>”

<sup>17</sup> Ghe kasu vulilala me ghe kupi ghoala tale masaliki taatara atea me ia o vo ngateva ghe tokala tale masaliki eteva eBetani.

### Iesu ghe kasikienaala ai etea (fig)

(Mak 11:12-14, 20-24)

<sup>18</sup> Elue talua poopooa ghe mene laa sosso tale masaliki taatara atea me ang ghe maamaloo. <sup>19</sup> Me ghe tarala fig atea ghe tiitingina tale sama salana atikirighi me ghe lao akalakalangina sio etana me karika righi uenena, nim uruena ia, me ghe uela ta fig atea va, “Karika aue umene kunea righi uem.” Me arovaeeaa ta fig atea ghe mmatela.

<sup>20</sup> Nau eteva disaepolo atoa laghe tarala isaa o voto laghe soghiaala me laghe kokkolomi va, “Vaalua me arovaeeaa nonga ta emmatela?”

<sup>21</sup> Iesu ghe liula me ghe uela etaira va, “Aghaaulia ngakoronna etaimim va, arova am aikaia me karika nannaaimim eghaaghalua, karika aue am ghele ghelei nonga voto nongina llo elutula tale fig atea, ta am rooroo tani ue ta ia o motouru eteva va ekasu me eghoa katuu elamana me aue ghele ghelei. <sup>22</sup> Arova am aiesoa, aue am ghaa saa ase voto aue am kokkolomi tale nilooloo sae.”

<sup>‡</sup>21:9 Sams 118:26

<sup>¶</sup>21:13 Aisaea 56:7

<sup>§</sup>21:13 Jerimaea 7:11

<sup>\*\*</sup>21:16 Sams 8:2

**Nikokkolomi tale  
matuutulienaane Iesu**

*(Mak 11:27-33; Luk 20:1-8)*

<sup>23</sup> Iesu ghe kupi ssola tale ale ngeleka atiulu tale ale manga ateva, me nau ghe tiuaala tani apasunga, namu ngatoa ta pristi etoa me lo atoa laghe naanamuu ta taumattu ngatoa laghe mae sio etana, me laghe kolomiela va, “See ghe tau aatu sio matuutuliena etam, me see ghe sungiola tani mae ghelei isaa oia voto?”

<sup>24</sup> Iesu ghe liula me ghe uela etaira va, “Akolomiem mua tale kateva nikokkolomi, me arova am liu ia o nikokkolomi eteva, aue aghauliaa va see ghe tau mae sio matuutuliena etaghi. <sup>25</sup> Ia Jon ghe asuu taumattu, see ghe tau lao sio matuutuliena etana, taumattu ngatoa, o God?”

Me laghe tiuaala tani aisakeia elome etaira. Laghe ue va, “Arova ita ue va, ‘God,’ aue eue teeita va, ‘Me vaalua me karika am ghe aiesoa etana?’ <sup>26</sup> Me arova ita ue va, ‘Ta nim taumattu,’ ita maamatauta taumattu ngatoa poli ila akapa la ue va Jon propete ia.”

<sup>27</sup> Liuna avalua o laghe liula me laghe uela ta Iesu va, “Karika ami kilakila.”

Me Iesu ghe uela etaira va, “Aghi tee, karika aue aghauliaa etaimim va see ghe tau mae sio matuutuliena etaghi.

**Kiukiu niaimatootoongana  
ateae ta tue me nenga alua**

<sup>28</sup> “Vaalua am annaa tale kiukiu eteae toko? Kateva taumattu natuna taita alua ghe lao sio ta mua ateva, me ghe uela va, ‘Natughu, laa uungu tale utani uaeni.’

<sup>29</sup> “Me mua ateva ghe uela etana va, ‘Karika aue alao,’ vara me ghe nnaa aioghioghiaala me ghe lao sio.

<sup>30</sup> “Me tamairarua ghe mene auliaala isaa o inangari ta mene aiaaghaluena ateva aliki. Ia o lo ateva aliki ghe liula

me ghe uela va, ‘Ue, namu ngateva, aue alao,’ me karika ghe lao sio.

<sup>31</sup> “See ta ngetairarua ghe gheleila llo tamairarua ghe aloanna?”

Laghe liula me laghe uela va, “Aitiutiu eteva.”

Me Iesu ghe uela etaira va, “Aghaaulia ngakoronna etaimim va aighaa viliki veu etoa, me vause ngetapaa salana atoa ngeila muemueinam sso tale ararimangalina ateva God. <sup>32</sup> Poli Jon ghe mae sio etaimim tani apasunga salana ghulughuluena, me karika am ghe aiesoa llo ghe auliaala, nim aighaa viliki veu nonga atoa me vause ngetapaa salana atoa laghe aiesoa. Me am ghe taatara poi voto me karika am ghe nanna ngaioghioghiaa me am ghe aiesoa etana.

**Kiukiu niaimatoonga tale  
sesa tau ngeutana atoa laghe  
aitaraa utani uaeni etingiu**

*(Mak 12:1-12; Luk 20:9-19)*

<sup>33</sup> “Am mene nongo kateae kiukiu ni-aimatoonga. Kateva taumattu ghe pasala utani uaeni etingiu tale kosane ateva, me ghe iri taliaala valavala atea me ghe kaila aimonnaa uaeni eteva, me ghe atulula aitiketike ateva, me ghe taue lao sio ta katoa tau ngeutana tani aitarainia, me ghe kasu emasaula. <sup>34</sup> Nau utana atingiu ghe massola, ghe suula kapuna tau ngai nongonongo anna atoa tani laa ghaa rigi uenenna utani uaeni etingiu.

<sup>35</sup> “Lo atoa laghe aitarara utana atingiu laghe kune atokailala: laghe paru emaatela kateva, me laghe uvi ematela kateva, me aiaakotonna ateva laghe osaiela. <sup>36</sup> Me ghe mene suu tau lao sio mene katoa tani kapuna tau ngai nongonongo anna etaira, oroiaira elaulau lo atoa laghe lao akasina sio. Tau ngai toi utana atingiu laghe ghelei teelala voto nongina lo atoa laghe muemueainilala. <sup>37</sup> Airuuruu ghe suula natuna ateva

tani lao etaira, poli ghe ue va, 'Aue la oneoneaa natughu eteva.'

<sup>38</sup>“Me nau tau ngai toi utana atingiu laghe tarala natuna ateva, laghe samala elome etaira va, 'Lo ateva aue ghaa utana atingiu okae. Ita laa uvi ematea me ita ghaa voto aue peina.’”<sup>39</sup> Mausina avalua o me laghe ghaaiele me laghe sau velue ghoala eleka tale utani uaei etingiu me laghe uvi emateala.

<sup>40</sup>“Liuna avalua o me nau lo ateva umana ia utani uaei aue erekata, saa ateva aue egheleia ta lo atoa laghe aitarainia?”

<sup>41</sup>Laghe liula me laghe uela va, “Aue eghelei voto sesaaili tale ila o sesa taumattu ngatoa, me aue emene taula utani uaei etingiu ta mene katoa ppae lo atoa aue la taula uaei etana nau la pariki.”

<sup>42</sup>Iesu ghe uela etaira va, “Koti am ghe ritila tale Uru ngai Manga ateva, eue va, “Atu eteva tau ngai atulu ale atoa laghe ratiela ghe aitiutiula tale atu ekapa atoa tani suei ale ateva.

Vau eteva ghe gheleila isaa o voto, me taatarane masinaaili ta mataita.”††

<sup>43</sup>“Liuna avalua o me aghaauliaa etaimim va ararimangali eteva epona liu aue God eghaa velua etaimim me emene tauela ta lo atoa taumattu aue la nongo usilainia. <sup>44</sup>Lo ateva aue ekatuu saooa tale ia o atu eteva aue etakotokoto, me arova atu eteva ekatuu saooa etana aue etaputuputu.”

<sup>45</sup>Nau eteva namu ngatoa ta pristi etoa me Paresi etoa laghe nongola ta Iesu ghe auliaala ia o kiukiu niaimatoongana atea, laghe kilala va ghe auliaa teeila. <sup>46</sup>Laghe paepae tikirighi salana tani llotia, me laghe maamatauta taumattu ngatoa poli ila laghe ue va Iesu propete ia.

## Kiukiu niaimatoongana atea tale ninamanama tee tale nilai etea

(Luk 14:15-24)

**22** Iesu ghe mene poppooa etaira tale kiukiu niaimatoonga, ghe ue va, <sup>2</sup>“Ararimangali eteva epona liu nonginaaili kingi eteva ghe aimonomosiaala ninamanama atea tale nilai etea ta natuna. <sup>3</sup>Ghe suula kapuna tau ngai nongonongo anna atoa tani laa ghaulaa ta kolokolona atoa tale ia o ninamanama atea va la mae, me karika laghe annala tani mae.

<sup>4</sup>“Me ghe mene suula katoa tani kapuna tau ngai nongonongo anna. Ghe uela etaira va, ‘Am laa ue ta kolokolona atoa va: Ngaghaimonomosiaala inana. Kieghi vulumakao atoa taita ila me morona atoa natu vulumakao ngeila uvila me pasila me isaa akapa voto ange aimonomosiaala. Laa mae tale ninamanama atea tale nisighaa ngateae.’

<sup>5</sup>“Me karika laghe anna tani nongo me laghe aitiuaala. Kateva ghe lao sio ta ngumane, me kateva ghe lao sio tani ghelei voto aue ghaa viliki veu etana. <sup>6</sup>Me mene katoa laghe poso atokala kapuna tau ngai nongonongo anna atoa king me laghe ghelei teelala voto karika masina, me laghe uvi ematelala. <sup>7</sup>King ghe sessaiele, me ghe suula kapuna tau ngai uvi etoa laghe lao sio tani tturu tau ngai uvi emate atoa, me laghe suluila masaliki taataraira atea.

<sup>8</sup>“Me ghe uela ta kapuna tau ngai nongonongo anna atoa va, ‘Ninamanama atea tale nisighaa ngateae ange aimonomosiaala, me lo atoa aghe uela va la mae karika masina ila tani mae. <sup>9</sup>Am lao sio tapaa salana me am kolo saa ateva taumattu am rooroo tani tara.’ <sup>10</sup>Liuna avalua o me tau ngai non-

gonongo anna atoa laghe lao sio tapaa salana me laghe kolola saa taumattu laghe roola tani tara, sesa me masina, me ale ngai namanama atiulu ghe pasula tale taumattu.

<sup>11</sup>“Me vara kingi eteva ghe kupi ssola tani tara taumattu ghe mae sio me ghe tarala kateva taumattu, karika ghe asae koloso nilai eteae. <sup>12</sup>Me ghe kolomiela va, ‘Kapughu, vaalua ukupi sso mae nau karika uasae teva koloso nilai?’ Me taumattu ngateva karika ghe samala.

<sup>13</sup>“Me king ghe auliaala ta tau ngai uungu etoa va, ‘Am irila kkena me nimanane, me am sau velue ghoa eleka tale avoona me eghoa toka ngangngala me aingeresia ngalungaluna.’

<sup>14</sup>“Poli oroi la kolokolo me malaki lo la suisuitoonga.”

### **Tani tau lao takis ta Siisa**

*(Mak 12:13-17; Luk 20:20-26)*

<sup>15</sup>Vara me Paresi etoa laghe kasula tani laa ghaimonomosiaa salana vaalua tani ghaa Iesu tale inangarina. <sup>16</sup>Laghe suula kapuira disaepolo atoa, me kapuna tee atoa Herot tani lao etana. Laghe uela etana va, “Tisa, io nau ekapa atoa uaauliaa nonga voto koronna me voto uaapasunga tale salane God, koronna ia, karika unannangaili sa llo taumattu ngatoa la annaa, me karika utaata taumattu tale naanamungaane me uunguaane. <sup>17</sup>Auliaala etaimami io vaalua nannaam. Vaalua? Masina tani tau lao takis ta Siisa?”

<sup>18</sup>Iesu ghe kilakila voto laghe ailoeaala karika masina, me ghe uela etaira va, “Am usimaghalua am, vaalua me am aloanna tani tootoongainaghi? <sup>19</sup>Am apasungaala viliki veu etivilau etaghi am tautau ta Siisa.” Me laghe maeaa sio viliki veu etivilau ta ngetana. <sup>20</sup>Me ghe kolomilala va, “See tootoona ateva me ararina atae o?”

<sup>21</sup>Laghe liula me laghe uela va, “Siisa.”

Me ghe uela etaira va, “Am taula llo voto kanna Siisa ta Siisa, me voto kanna God ta God.”

<sup>22</sup>Laghe soghiaala isaa o inangari laghe nongola, liuna avalua o me laghe kasu vuliela.

### **Nikokkolomi tale nilai nau nime ne totu tale nimate**

*(Mak 12:18-27; Luk 20:27-40)*

<sup>23</sup>Tale ie nonga o nau eteva, Sa-diusi etoa, karika la ghaiesoa tale nitotu tale nimate, laghe mae sio tee uneira nikokkolomi eteva. <sup>24</sup>Laghe uela va, “Tisa, Moses ghe pitila etaimami va, arova taita ateva lailai ia emate me karika rigi natuna, nengane aue eghaa vause ateva erau evuluela, tani alutu natuna tuena. <sup>25</sup>Ghaitu (7) tue me nenga laghe tokatoka teeiemami. Aitiutiu eteva ghe laila, me ghe matela. Me, poli karika rigi natuna, nengane ghe mene ghaala vausenna ateva. <sup>26</sup>Ase voto ateva o ghe mene lutula ta aiaaghaluene ateva taita me kotonna ateva, me ghe laa sio ruu tale aiaaghaituna ateva. <sup>27</sup>Airuuruu me vause ateva ghe matela. <sup>28</sup>Nau nitotu tale nimate, see aue evausenna ia ta ila o tue me nenga ghaitu, poli ila akapa laghe laila etana?”

<sup>29</sup>Iesu ghe liula me ghe uela etaira va, “Nannaaimim karika ghulughuluena, poli karika am kilakila Uru ngai Manga ateva me sarasarakaniaane God. <sup>30</sup>Nau nitotu tale nimate, taumattu karika aue elai; aue la nongina ensolo atoa epona liu. <sup>31</sup>Me tale tototuaaira lo atoa matena ila, karika am ghe ritila voto llo God ghe auliaala etaimim? <sup>32</sup>‘Aghi kapuira Goto ieghi Abraham,

Aisiki me Jekop.<sup>‡‡</sup> Karika va kapuira Goto ia matena atoa ta kapuira Goto ia lo atoa mauhue ila.”

<sup>33</sup> Nau taumattu ngatoa laghe nongola laghe soghiaala llo ghe aapasunga.

**Mata ngemua ateva  
inangari nipaopao**

(Mak 12:28-34; Luk 10:25-28)

<sup>34</sup> Paresi etoa laghe velu eitauaala nau laghe nongola va inangarina Iesu ghe ghelei epaavoola Sadiusi etoa. <sup>35</sup> Kat-eva etaira, muennaaili ia tale inangari nipaopao, ghe toongiela tale ie toko nikokkolomi eteva. <sup>36</sup> Ghe uela va, “Tisa, saa ateva inangari tale isaa o inangari nipaopao namuu?”

<sup>37</sup> Iesu ghe liula me ghe uela va, “Uaielousia Vaum ateva kapum Goto ia tale urunguitanim me tale maamaulu-aam me tale nannaam.”<sup>¶¶</sup> <sup>38</sup> Aitiutiu eteva o, me namuu ia tale isaa akapa inangari nipaopao. <sup>39</sup> Me aiaaghaluene ateva, nongina aitiutiu eteva, ‘Uaielousia taumattu ngateva kalakalangina ia etam, nongina uaielousieinio.’<sup>§§</sup> <sup>40</sup> Isaa akapa inangari nipaopao me lo inangari propete atoa laghe auliaala, etani laolao aitaaua tee ilalua o inangari nipaopao alua.”

**See tuvuna ia Mesaea?**

(Mak 12:35-37; Luk 20:41-44)

<sup>41</sup> Tale ie nonga o nau eteva Paresi etoa laghe velu eitauaala me Iesu ghe kolomilala va, <sup>42</sup> “Vaalua am annaa ta Mesaea ngateva? See tuvuna ia?”

Laghe liula me laghe uela va, “Tuvuna ia Deivit.”

<sup>43</sup> Me ghe uela etaira va, “Mene vaalua me Deivit, Spiriti eteva ghe tokala etana,

me ghe aippooaala? Ghe koloala va Vau ia me ghe uela va,

<sup>44</sup> “Vau ngepona ateva ghe uela ta kapughu vau eteva va,

“Toka siola tale pai muenna ativilau lomose ta aghatoka sio lo atoa la sessa teeio euu,

me uatingina saooa kkem etaira.”<sup>\*</sup>

<sup>45</sup> Arova Deivit ghe kolokoloa va ‘Kapuna vau eteva,’ vaalua me ghe mene nim tuvuna ia?” <sup>46</sup> Karika teva ghe liula tani mene auliaa righi inangari. Ghe tiuaala o karika teva ghe mene anna tani kolomia tale mene righi nikokkolomi.

**Aue esesaaili ta tau ngai  
apasunga atoa tale inangari  
nipaopao me Paresi etoa**

(Mak 12:38-40; Luk 11:37-52; 20:45-47)

**23** Vara me Iesu ghe uela ta taumattu ngatoa me kapuna disaepolo atoa va, <sup>2</sup> “Tau ngai apasunga tale inangari nipaopao me Paresi etoa la tokatoka tale unna aitokatoka ateva Moses. <sup>3</sup> Liuna avalua o me am nongo usilaa me am ghelei ekapa voto la auliaa etaimim, me am rau mene aimuli tee gheeieiaaira, poli voto la ghauliaa karika la ghelei. <sup>4</sup> Inangariira aanasaaili tale taumattu ngatoa tani aimuli tee, nongina la atoka sae voto maamaatana karika kaakaai me iriiri emasina ta pappaira taumattu ngatoa, me karika la aloanna tani sausi tani sau.

<sup>5</sup> “Isaa akapaaili voto la ghelei va taumattu ngatoa la taraila. La ghelei enamu uneira lutu ngaikaai me laghe pitipiti inangarina ateva God la kaakaai sio etana, me kalio atiulu laghe akou uruira etana, euu tale aighoughou ghaata laghe avukala voto ghaata la kolokoloa va tassel

‡‡22:32 Eksodas 3:6

¶¶22:37 Diuteronomi 6:5

§§22:39 Levitikas 19:18

\*22:44 Sams 110:1



tani apasunga va ila tau ngai kkaua ila. <sup>6</sup>La ghaloannaaili va taumattu ngatoa la oneoneainila, me la ghaloannaaili tani toka tale uneira aitokatoka namu ngatoa elome tale ale nivelu eitauaa me nongina namu ngatoa la namanama. <sup>7</sup>La aloanna va taumattu ngatoa la soula tale masi inangari nongina oroi taumattu etokatoke me la asela va Rabae.

<sup>8</sup>“Me la rau mene aseam va Rabae, poli kateva nonga vauimim ateva<sup>†</sup> me am tue me nenga am. <sup>9</sup>Me am rau mene ase teva taumattu tale kosa ateva oia va tamaimi ia, poli kateva nonga Tamaim ateva ia epona liu. <sup>10</sup>Me la rau mene aseam va tau ngai apasunga iem, poli kateva nonga tau ngai apasunga ngateva, ia Mesaea ia. <sup>11</sup>Me lo ateva namuu ia elome etaimim, ia kapuimim tau ngai nongonongo anna ia. <sup>12</sup>Lo ateva taumattu ealoanna tani saeaa ararina ateae, ararina ateae aue esio euu, me lo ateva taumattu esioaa nannaane euu, aue ararina ateae esae epona.

<sup>13-14</sup>“Aue esesaaili etaimim, tau ngai apasunga ngatoa tale inangari nipaopao me Paresi etoa, am usimaghalua am! Karika am roo tani tau velu katoa taumattu tani sso tale ararimangali eteva epona liu me am, karika am kupikupi sso.<sup>‡</sup>

<sup>15</sup>“Aue esesaaili etaimim, tau ngai apasunga ngatoa tale inangari nipaopao me Paresi etoa, am usimaghalua am! Am kasukasu ekapa see elae me elamana tani ghelei kateva taumattu eJiu, me nau angam ghailala, am gheeleila va la tau ngai uungu ta raroai eteva, me sesa uun-guaaira elaulau uunguaaimim.

<sup>16</sup>“Aue esesaaili etaimim, tau ngai katula ngatoa mata salusalu iem! Am ue va, ‘Arova teva eaauliaa sae inangari nialokoi tale ararina ateae ale manga ateva, karika righi malloeana, me arova teva eaauliaa sae inangari nialokoi tale golo tale ale manga ateva, etani ghelei nongina eaauliaa.’ <sup>17</sup>Am mata salusalu iem me alokapakapa am! Saa ateva namuu ia: golo, o ale manga ateva, eamanga golo? <sup>18</sup>Me am ue tee va, ‘Arova teva eaauliaa sae inangari nialokoi tale liu niaiaavusuvusuena, karika righi malloeana, me marova teva eaauliaa sae inangari nialokoi tale isaa o voto epona tale liu niaiaavusuvusuena, etani ghelei nongina eaauliaa.’ <sup>19</sup>Am mata salusaluna am! Saa ateva namuu ia: voto epona la maemaeaa tani ghelei aiaavusuvusuena, o liu niaiaavusuvusuena ateva eamanga voto o? <sup>20</sup>Liuna avalua o me lo ateva eaauliaa sae inangari nialokoi tale liu niaiaavusuvusuena ateva, eaauliaa ngakoronna tale liu niaiaavusuvusuena me voto akapa etokatoka etana. <sup>21</sup>Me lo ateva eaauliaa sae inangari nialokoi tale ale manga ateva, eaauliaa ngakoronna ta ale manga ateva me ta God, poli God etokatoka tale ale manga ateva. <sup>22</sup>Me lo ateva eue va, ‘Koronnaaili epona liu,’ eaauliaa ngakoronna tale unna aitokatoka ateva God me lo ateva etokatoka etana.

<sup>23</sup>“Aue esesaaili etaimim, tau ngai apasunga ngatoa tale inangari nipaopao me Paresi etoa, am usimaghalua am! Am tani ghelei emasinaaili aiaasokolo tale uneimim lutu voto ghaunaaili am ghaaghaa eutana, me karika am uusilaa maamasinaane inangari nipaopao nongina voto ghulughuluena me niaielousi

<sup>†</sup>23:8 Kasina uru ngai laghe pitila, laghe mene pitila, ia Mesaea ia

<sup>‡</sup>23:13-14 Kasina uru ngai laghe pitila, laghe pitila, <sup>14</sup>Aue esesaaili etaimim, tau ngai apasunga ngatoa tale inangari nipaopao me Paresi etoa, am usimaghalua am! Am ghaaghaa aitautauaa peiira va use raue vulu etoa, me am kamekame tani ghelei aluseaili nilooloo sae. Nau eteva am lao tale niaisakei, aue am ghaa namungaili nimmarikana. Utara Mak 12:40; Luk 20:47.

me uunguaa niaikaia. Isaa o voto am roo tani ghelei me karika am mene kkaluaa isaa o voto ghaunaaili. <sup>24</sup>Alousiusi etaimim, tau ngai katula ngatoa mata salusalu iem! Me am nongina tau-mattu ngateva ghe anna tani ghaa velu looloo arighi tale ropina manu, me ghe tam taatara kamolo ateva tale ropina tana manu me ghe ropi teeiela.

<sup>25</sup>“Aue esesaaili etaimim, tau ngai apasunga ngatoa tale inangari nipaopao me Paresi etoa, usimaghalaria am! Am ghelei eraarangisana eleka tale kapa ateva me pelete ativilau, me elome pasuia tale nikuruetu me nitam nanna ngamasina. <sup>26</sup>Paresi etoa am mata salusalu iem! Am ghelei eraarangisana akasina elome tale kapa ateva me pelete ativilau me auena eleka emene raarangisana tee.

<sup>27</sup>“Aue esesaaili etaimim, tau ngai apasunga ngatoa tale inangari nipaopao me Paresi etoa, am usimaghalaria am! Am nonginaaili liu niaikaia ngateva la poropora araarangisanailiila eleka me taataraane masinaaili ia, me elome, pasueili ia tale riu taumattu matena me voto atoa karika raarangisana ila. <sup>28</sup>Tale ia o salana atikirighi, eleka etaimim am aapasunga ta taumattu ngatoa va ghulughuluena am, me karika poi, elome etaimim pasueili ia tale usimaghalaria me sesa voto.

<sup>29</sup>“Aue esesaaili etaimim, tau ngai apasunga ngatoa tale inangari nipaopao me Paresi etoa, am usimaghalaria am! Am, am atuutulu liu niaikaia uneira propete atoa me am aamololumolu atu niaimatoonga uneira ghulughuluena atoa, <sup>30</sup>me am ue va, ‘Marova ita ghe tokatoka emua arau nau ta tuvuita atoa, karika aue ita ghe usi tani uvi emate propete atoa.’ <sup>31</sup>Am aulia ngakoronna va tuvuum

atoa laghe uvi ematela propete atoa, me am tee uusilaa uunguaaira tuvuum atoa. <sup>32</sup>Gheleila am me am laa ruu emasina saa ateva tuvuum atoa laghe tiuaala!

<sup>33</sup>“Otuena am me natuira am otuena atoa! Vaalua aue am kasu vuli sesaiaane God tale nau niaisakei eteae? <sup>34</sup>Liuna avalua o me aue asuu propete atoa, me tau ngalomasaanga, me tau ngai apasunga ngatoa. Katoa etaira aue am uvi ematela me am avukalaila sae tale aikotoo, me katoa aue am uetaila tale aleimim ale nivelu eitauaa, me katoa aue am laa paela see tale masaliki taatara atoa. <sup>35</sup>Liuna avalua o me am ghaa sesa ngaipolipoli tale taumattu ghulughuluena tale kosa ateva am ghe uvi ematela. Etiitiuaa ta ghulughuluena ateva taumattu Eibol me eruuruu ta Sekaraea natuna ia Barakaea, ia o am ghe uvi emateala elome tale ale manga ateva me tale liu niaiaavusuvusuea ateva. <sup>36</sup>Aghaulia ngakoronna va sesa ngaipolipolina isaa oia voto aue elutu tale lo ateva oia vituu.

<sup>37</sup>“Jerusalem, Jerusalem! Ughe uvi ematela propete atoa, ughe osala tau ngai kasuaa inangarina atoa God tale atu! Ghaisaa ta aghaloanna tani atoka aitaueinam kapughu taumattu ngatoa, nongina kina paolo ateva eaakou natuna atoa tale kaekaena, me karika am aaloanna! <sup>38</sup>Liuna avalua o, me am nongola! God aue ekasu vuli alena ale manga ateva, me masalikiimim taatara ateaue eturungia. <sup>39</sup>Poli aghaauliaa etaimim va karika aue am mene taraieghi, lomosi ta nau eteva aue emae, me aue am ue va, ‘Niarangise ta lo ateva emaeae tale ararina ateaue Vau eteva.’”

**Aimatootoongana tale  
airuuruu tale nau**

(Mak 13:1-31; Luk 21:7-33)

**24** Iesu ghe kupi ghoala tale ale manga ateva me ang ghe kasukasua me kapuna disaepolo atoa laghe mae sio etana. Laghe anna tani apasunga ale atoa tale ale manga ateva. <sup>2</sup>Iesu ghe kolomilala va, “Am taatara isaa oia ale? Koronnaaili aghaauliaa etaimim va karika teva atu ae toka saoa ta mene kateva. Aue taumattu ngatoa la puli reerekata isaa akapaaili oia voto.” <sup>3</sup>Nau Iesu ghe toka siola tale motouru eteva eOliv me kapuna disaepolo atoa laghe mae sio tani kolomi einaoa me laghe uela etana va, “Auli-aala etamami, lovisaa isaa oia voto elutu me saa righi aimatoonga aue elutu tani apasunga maemaeam me airuuruu tale kosa ateva?”

<sup>4</sup>Iesu ghe liula me ghe uela va, “Am paniem teva taumattu erau kameam. <sup>5</sup>Poli oroi taumattu aue la mae tale ararighi eteae me la ue va, ‘Aghi Mesaea ieghi,’ me aue la kame oroi taumattu. <sup>6</sup>Aue am nongo niaiuvu me kiukiuna me am rau mene matauta isaa o voto, poli isaa o voto aue elutu me airuuruu tale kosa ateva auena emae. <sup>7</sup>Patungana atoa aue la ghaiuvieinila me ararimangali etoa aue la ghaiuvieinila tee. Maloo atoa aue la lutu me rukeruke atoa tale kosa akapa ateva. <sup>8</sup>Isaa o voto aue enim aitiuti tale nimmarikana, nongina mmarrikana eghaaghaa kinna ateva aliki eteva nau elutulutu.

<sup>9</sup>“Me aue la kuneiem me la tauem lao tani ghaa nimmarikana me aue la uvi emateam. Ila akapa anua atoa aue la ssa teeiem poli ararighi eteae. <sup>10</sup>Tale ia o nau eteva, oroieili taumattu ngatoa aue la oghi vulu uneira niaikaia

me aue la aissa elome etaira me aue la aitaueinila lao ta tau ngai ssateira atoa. <sup>11</sup>Me oroieili propete kamekame atoa aue la kaurekati me aue la kame oroieili taumattu. <sup>12</sup>Poli ssavoto ateva aue enamungaili me niaielousi eteva tale oroi taumattu aue ekapa. <sup>13</sup>Me see etingina akorokorongana tale unna niaikaia tale airuuruu, maamaluaane aue esaanga. <sup>14</sup>Me ia oia masi inangari eteva tale ararimangali eteva epona liu, aue la ppoa ngakapaie see tale kosa ateva va taumattu ngakapa atoa aue la nongo, vara me airuuruu tale kosa ateva evira mae.”

<sup>15</sup>Iesu ghe mene auliaa tee lao sio va, “Kasina nau aue am tara voto sesaaili elutu elome tale ale manga ateva me eghelei taumattu ngatoa la kasu vuli me ale manga ateva aue enim toka, nongina propet Deniol ghe auliaala<sup>§</sup> (lo ateva taumattu aue eriti aue alomasaanga). <sup>16</sup>Vara me lo atoa elome eJudia am ilou sae tale motouru. <sup>17</sup>Lo ateva taumattu etokatoka eleka tale ale ateva, erau mene kupi sso va eghaa righi ghinnanina tanguena. <sup>18</sup>Karika mene teva taumattu eutana emene oghi lao tanguena tani ghaa unna aisoe ngeleka. <sup>19</sup>Alousiusi ta lo atoa la suusunuku me lo atoa la sussu tale isaa o nau! <sup>20</sup>Am looloo sae va am rau mene ilou vuli niaiuvu eteae tale nau kkaaili o tale nau manga ateva. <sup>21</sup>Tale isaa o nau sesa voto atoa aue la ghaa nimmarikana namungaili, aue elau nongina emua arau tale aitiuti tale kosa ateva me nau ghaine, me auena karika aue mene righi voto avalua o elutu. <sup>22</sup>Me marova God karika ghe atukunala isaa o nau, karika teva aue ghele saanga. Me poli enannangaili isaa o taumattu ghe suitoongaala, sesa nau aue etukuna. <sup>23</sup>Tale isaa o nau, arova teva eue etaimim va, “Tarala!

<sup>§</sup>24:15 Deniol 9:27; 11:31; 12:11

Mesaea ngateva toko,' o, 'Ie teke,' am rou mene aikaaia inangariira. <sup>24</sup> Ta poli katoa taumattu aue la mae me aue la kame va, 'Aghi Mesaea ngateva' mene katoa aue la kame va, 'Aghi propete ieghi,' aue la mae la ghelei aimatootoongana me voto tani apasunga sarasarakaniaaira tani kame taumattu Vau palepale ghe suitoongaala, kotiva isaa o voto aue eroo. <sup>25</sup> Am nongola, llo oia ngaghe aulia ngamuemue alokoila etaimim.

<sup>26</sup> "Liuna avalua o me arova la ue etaimim va, 'Ie teke tale voto ateva karika righi taumattu etana,' karika am mene lao. Me marova la ue va, 'Ie toko elome tale ale atiulu,' am rau mene aiesoa. <sup>27</sup> Poli nongina ravaravaia ateva eramerame aloi lao ta sinaka esae me sinaka esuu, aue enongina maemaeane Natuna ateva Taumattu ngateva. <sup>28</sup> Kona eaa taumattu matena easoaso, taotaokko atoa la veluvelu eitauaa.

<sup>29</sup> "Nongina Uru ngai Manga ateva eue va, 'Nau isaa o sesa nau elange, arovaeangaili ta

"sinaka ateva aue esaurrom me ulana ateva karika aue emallanga me katto atoa aue la katuu me voto atoa korokorongana ila elomarase aue la ghaisiisia."\*\*\*

<sup>30</sup> "Tale ia o nau eteva aimatootoongane Natuna ateva Taumattu ngateva ekauerekati elomarase. Patunganua akapa atoa tale kosa ateva aue la aloususi, nau la tara Natuna ateva Taumattu ngateva aue emae tale urukookoo elomarase tee sarasarakaniaane me kinatama mallangina ateva. <sup>31</sup> Me taue ateva aue eaangari enamungaili me aue esuu kapuna ensolo atoa tani laa kolo aitauaa taumattu ngatoa ghe suuilala va kapuna ila tale isaa akapanaaaili patunganua tale kosa ateva.

<sup>32</sup> "Am rooroo tani ghaa alomasaanga tale kiukiu niaimatoonga tale fig atea. Nau eteva am tara ai eteae ange tulu-tulu, am kila va masi nau tale sinaka ateva ange kalakalaala. <sup>33</sup> Liuna avalua o, nau am tara isaa o voto, aue am kila va ange kalakalalinginala, tapaa ngatamana. <sup>34</sup> Aghaaulia ngakoronna ta lo ateva oia vituu va karika poi aue ekapa me isaa o voto aue elutu. <sup>35</sup> Elomarase me kosa ateva oia aue ekapa me inangarighi karika poi aue ekapa.

### Karika teva ekilakila nau isaa o voto aue elutu

(Mak 13:32-37; Luk 17:26-30, 34-36)

<sup>36</sup> "Me ia o nau eteva me aoa ngateva karika teva taumattu ekilakilaia, tee me ensolo atoa epona liu me Natuna,†† ta Tamaghi nonga. <sup>37</sup> Nongina ta nau Noa, aue emene nongina maemaeane Natuna ateva Taumattu ngateva. <sup>38</sup> Tale isaa o nau auena manu ghagga ateva ghe mae, taumattu ngatoa laghe namanama me laghe ropiropi me taita me vause laghe lailai me ghe ghaala nau eteva Noa ghe kupi ssola tale anua ateva. <sup>39</sup> Me karika laghe kilakila saa ateva aue ghe lutu lomosi ta manu ghagga ateva ghe mae sio me ghe gga vel-lala. Isaa o voto aue enonginaaaili maemaeane Natuna ateva Taumattu ngateva. <sup>40</sup> Taita alua aue lalu uungu eutana: kateva aue la ghaaia me kateva aue la rati etokaia. <sup>41</sup> Ghalua vause aue lalu ghelei putuputu palaoa: kateva aue la ghaaia, me kateva la rati etokaia.

<sup>42</sup> "Liuna avalua o me am anguu taatara ta poli karika am kilakila nauna ateva Vauimim ateva aue emae. <sup>43</sup> Am kila llo toko va, marova taumattu ngateva ekila va tau niainao ateva aue emae ainao tale alena ateva, aue etoka

\*\*24:29 Aisaea 13:10; 34:4

††24:36 Kasina uru ngai laghe pitila, karika laghe pitila *me Natuna*

anguenguu me karika aue etau velu alena ateva va tau niainao ateva errutia me ekupi sso. <sup>44</sup>Liuna avalua o me am tee, am aimonomosiaa poli Natuna ateva Taumattu ngateva aue emae tale ia o nau eteva karika am nannaa va aue emae etana.

<sup>45</sup>“Lo ateva tau ngai uungu eaigheleia ngamasina uunguaane me alomasaanga ia tani aitaraa voto, vauna ateva erooro tani atokaia tanguenua tani aitaraa kapuna tau ngai uungu etoa me tani taula aneira inana tale nau nighaa inana. <sup>46</sup>Niarangise aue etoka tale lo ateva tau ngai nongonongo anna, vauna ateva etara va egheelei isaa o niuungu, nau eteva ekiriaa mae. <sup>47</sup>Aghaaulia ngakoronna etaimim va aue eatokaia va eaitaraa ngakapaaili peina. <sup>48</sup>Me arova tau ngai nongonongo anna ateva uunguaane sesa, aue eue ta urunguitanina ateva va, ‘Vaughu eteva karika aue emae parasi,’ <sup>49</sup>me etiuuuala tani namanama me tani ropi sesa manu tee katoa me etiuuuala tani uvi kapuna tau ngai uungu etoa laghe uungu eitauaa teeia. <sup>50</sup>Ia o tau ngai nongonongo anna ateva kapuna vau eteva aue emae tale ia o nau eteva ennaa va karika aue emae etana. <sup>51</sup>Nau eteva emae, aue esai putuputua me eatoka teieie lao ta usiemaghalua atoa. Aue la ngala me la aingeresa ngalungaluira.

### **Kiukiu niaimatoongana atea ta kasangaulu aliki vause**

**25** “Tale nau eteva o ararimangali eteva epona liu aue nongina kasangaulu aliki vause. Laghe ghaala kuraira lam me laghe lao sio tani sou taita ateva esighaa. <sup>2</sup>Ghalima etaira alokapakapa me ghalima alomasaanga. <sup>3</sup>Alokapakapa atoa laghe saula kuraira lam me laghe tam ghaa teela mene righi oeli. <sup>4</sup>Alomasaanga nonga atoa laghe ghaala uneira oeli laghe kaola tale un-

eira aikaai oeli me laghe sau teela kuraira lam. <sup>5</sup>Taita ateva esighaa ghe tam rekataa parasila me laghe mangoo. Liuna avalua o me laghe asekanuela me laghe llusula.

<sup>6</sup>“Elo matua voo me laghe aaore me laghe ue va, ‘Lo ateva esighaa ange reerekata! Am kupi ghoa mae me am ghoa sou!’

<sup>7</sup>“Me aliki vause atoa laghe totula me laghe kanukanuaala kuraira lam. <sup>8</sup>Alokapakapa atoa laghe uela ta alomasaanga atoa va, ‘Am tau mae sio righi uneimim oeli etaimami ta kuraimami lam ange palapala.’

<sup>9</sup>“Laghe liula me laghe uela va, ‘Karika ami rooro poli erau tam roo etaita. Am lao sio ta lo atoa ita polipoli etaira me am laa poli righi uneimim.’

<sup>10</sup>“Nau laghe kasukasu elaolao tapaa salana, me taita ateva elai ghe rekataala. Llo ghalima aliki vause laghe aimanomanosiaala, laghe kupi eitauaa teieie ssola tale ninamanama atea tale nilai eteae, me laghe kavatila atamana atea.

<sup>11</sup>“Vara me ghalima aliki vause laghe mene rekataala me ngila ghe kolokolo laghe ue va, ‘Namu ngateva, namu ngateva, otila atamana atea me ami kupi sso.’

<sup>12</sup>“Ghe liula me ghe uela va, ‘Aghaaulia ngakoronna etaimim va karika akilakilaiem.’”

<sup>13</sup>Me Iesu ghe uela va, “Liuna avalua o me am tani anguu taatara poli karika am kilakila nau eteva me aoa ngateva.

### **Kiukiu niaimatoongana atea ta tau ngai nongonongo anna atoa laghe ghaala viliki veu**

*(Luk 19:11-27)*

<sup>14</sup>“Ararimangali eteva epona liu aue mene nongina taita ateva ghe anna tani kasu me auena emene kiri mae, me ghe kolola kapuna tau ngai non-

gonongo anna atoa me ghe taula peina etaira. <sup>15</sup> Kateva ghe taula ghalima airari (5,000) gol koen me kateva ghalua airari (2,000) me mene kateva ghe taula kateva airari (1,000). Ghe tau roorooaa lao sio tale uungua kateva kateva eroroo tani ghelei me ghe kasula. <sup>16</sup> Lo ateva tau ngai nongonongo anna ghe ghaala ghalima airari arovaeea ta ghe kasula tani ungu tale unna tani viliki veu me ghe mene ghaala ghalima airari. <sup>17</sup> Me lo tee ateva tau ngai nongonongo anna ghe ghaala ghalua airari, ghe mene ghaala ghalua airari. <sup>18</sup> Me lo ateva tau ngai nongonongo anna ghe ghaala kateva airari ghe lao sio me ghe laa kai sio liu eteva tapaa kosa me ghe aisuliaala unna viliki veu vauna ateva.

<sup>19</sup> “Oroi nau ghe lange sio me vauira ateva tau ngai nongonongo anna atoa ghe rekatala me ghe anna tani tara llo laghe gheleila tale viliki veu ghe tau lao sio etaira. <sup>20</sup> Lo ateva tau ngai nongonongo anna ghe ghaala ghalima airari ghe lao tee sio mene ghalima ghe uunguaala me ghe uela va, ‘Vau eteva! Ughe tau mae sio ghalima airari me tarala, aghe uunguaala mene ghalima airari.’

<sup>21</sup> “Vauna ateva ghe liula me ghe uela va, ‘Amasimasi etam, poli uaigheleia ngamasina uunguaam. Poli ughe ghelei emasinala llo niuungu pisike, aue agha-tokaio me uaitaraa oroi voto. Mae sio me umasimasi eitauea teeieghi.’

<sup>22</sup> “Lo tee ateva tau ngai nongonongo anna ghe ghaala ghalua airari, ie tee ghe lao sio me ghe uela va, ‘Vau eteva! Ughe tau mae sio ghalua airari me tarala, aghe ghaala mene ghalua.’

<sup>23</sup> “Vauna ateva ghe liula me ghe uela va, ‘Amasimasi etam, poli uaigheleia ngamasina uunguaam. Poli ughe ghelei emasinala llo niuungu pisike aue agha-

tokaio me uaitaraa oroi voto. Mae sio me umaee masimasi eitauea teeieghi.’

<sup>24</sup> “Vara me lo ateva tau ngai nongonongo anna ghe ghaala kateva airari ghe lao sio me ghe uela va, ‘Vau eteva, akilakila va io tau nisessaieili io, umukemuke voto utam pasapasa me ughaaghaa uiti karika ughe uungu aanasa etana. <sup>25</sup> Liuna avalua o me aghe matautula me aghe lao sio tani kai me aghe aisuliaala unem viliki veu tapaa kosa. Tarala peim isaa toko.’

<sup>26</sup> “Vauna ateva ghe liula me ghe uela va, ‘Io sesa tau ngai nongonongo anna io me mangoona io! Ukilakila poi va amukemuke voto atam pasapasa me aghaaghaa uiti karika aghe uungu aanasa etana. <sup>27</sup> Ughe roola tani laa ghalokoi uneghi viliki veu tale ale aialokoi viliki veu me nau eteva aghe rekata aue aghe mene ghaa me tee righe la ghele mene saooa sae.

<sup>28</sup> “Liuna avalua o me am ghaala kateva airari etana me am tau lao ta lo ateva unna kasangaulu airari (10,000). <sup>29</sup> Poli see righe voto etana, aue God emene taula me aue eghaa oroi voto, me lo ateva karika righe voto etana aue eghaa velu righe lutu voto etana. <sup>30</sup> Am sau velu ghoala mangoona ateva tau ngai nongonongo anna eleka. Aue la vella ghoa tale kinatama saurrom ateva, me aue la ghoa toka ngangngala me la aingeresia ngalungalura.’

### Sipsipi etoa me meemee atoa

<sup>31</sup> “Nau Natuna ateva Taumattu ngat-eva emae tale mallangina ateva tee me kapuna ensolo atoa,<sup>‡</sup> aue etoka tale aitokatokane ateva king eaapasunga matuutulieneane. <sup>32</sup> Taumattu ngakapa atoa tale patunganua akapa atoa tale kosa ateva oia aue la mae velu eitauea etana me aue epolaila nongina aitoi

<sup>‡</sup>25:31 *ensolo atoa* Katoa uru ngai laghe pitila, laghe pitila *ensolo manga atoa*

sipsipi eteva epolapola sipsipi etoa me meemee atoa. <sup>33</sup>Aue eatingina sipsipi etoa ta pai muenna ativilau me meemee atoa ta pai uaise ativilau.

<sup>34</sup>“Me king aue eue ta lo atoa tale pai muenna ativilau va, ‘Am mae sio, Tamaghi ghe arangiseiamla. Ta arari-mangali eteva ange kaakaluimi ia, tale nau eteva ghe tiuaala emua arau nau God ghe gheleila kosa ateva oia. <sup>35</sup>Poli nau aghe maamaloo am ghe tautau mae inana etaghi, me nau aghe anna tani ropi am ghe aaropropieghi, nau ouna aghi tale masalikiimim am ghe ghaaieghi lao sio tanganueimim. <sup>36</sup>Nau karika ghinnanighi am ghe tautau mae ghinna etaghi. Nau aghe iisiki am ghe aitarainaghi, aghe tokatoka tale ale mata voovoo am ghe mae taataraiaghi.’

<sup>37</sup>“Me ghulughuluena atoa taumattu aue la kolomia va, ‘Vau ngepona, lo-visaa ami ghe taraiola ta ughe maamaloo me ami ghe anginiola me ughe anna tani ropi me ami ghe tau aatu me ughe ropila? <sup>38</sup>Lovisaa ouna io tale masaliki-imami me ami ghe ghaaio lao sio tangauemami, o karika ghinnanighi me ami ghe tau aatu ghinna? <sup>39</sup>Me lovisaa ami ghe taraiola ughe iisiki me ughe tokatoka tale ale mata voovoo me ami ghe atu taatarai?’

<sup>40</sup>“Me king aue eliu me eue etaira va, ‘Aghaaulia ngakoronna etaimim va, saa voto am ghe ghelei tee kateva nengaghi aliki mela ia, am ghe ghelei etaghi.’

<sup>41</sup>“Me aue eue ta lo atoa tale pai uaise ativilau va, ‘Am kasu emasalikaala etaghi, nikasikiena etaimim, me ngam laolao tale kura atea tokatoka liu ia God ghe aimanomanosieiniela ta Satana me kapuna ensolo atoa. <sup>42</sup>Poli aghe maamaloo karika am ghe tautau mae inana etaghi, me nau aghe anna tani ropi karika am ghe aropropieghi. <sup>43</sup>Ouna ieghi tale masalikiimim, karika am ghe aaikoloainaghi. Karika ghin-

nanighi, karika am ghe tautau mae righi ghinnanighi. Aghe iisiki me aghe tokatoka tale ale mata voovoo karika am ghe aitarainaghi.’

<sup>44</sup>“Aue la kolomi va, ‘Vau ngepona, lo-visaa ami ghe taraiola ughe maamaloo me ughe anna tani ropi me ouna io tale masalikiimami? Me lovisaa karika ghinnanighi me ughe iisiki me ughe tokatoka tale ale mata voovoo me karika ami ghe sausiola?’

<sup>45</sup>“Aue eliu etaira va, ‘Aghaaulia ngakoronna etaimim va, nau karika am ghe ghelei ta kateva nengaghi aliki mela ia, isaa o voto, am ghe tam ghelei etaghi.’

<sup>46</sup>“Me aue la lao tale sesa nimmarikana tokatoka liu ia me ghulughuluena atoa aue la lao tale mauue ateva tokatoka liu ia.”

### Laghe ailoea Iesu tani uvi ematea

(Mak 14:1-2; Luk 22:1-2; Jon 11:45-53)

**26** Nau eteva Iesu ghe ruula tani apasunga isaa akapa o voto, me ghe uela ta kapuna disaepolo atoa va, <sup>2</sup>“Am kilakila va kasi ghalua nau me Pasova ngateva etiuuaa, me Natuna ateva Taumattu ngateva aue la taue lao me esae vukala tale aikotoo.”

<sup>3</sup>Me namu ngatoa tale pristi etoa me namu ngatoa la muemua taumattu ngatoa laghe velu eitauaala tale alena ateva Kaeapas, namuu ia ta pristi ekapa atoa, <sup>4</sup>tani ailoea vaalua la kune aisuliaa Iesu me la uvi ematea. <sup>5</sup>Me laghe mae sio nonga ta kateva ninannaa va la rau mene ghelei isaa o voto nau Pasova poli teae niaiuvu erau lutu.

### Vause ateva ghe kaola oeli ta Iesu eBetani

(Mak 14:3-9; Jon 12:1-8)

<sup>6</sup>Nau Iesu ghe tokala eBetani tanganue Saemon taita ateva emua arau lepaana ia, <sup>7</sup>laghe namanama me vause

ateva ghe kupi sso mae tee masi aikakkaai eteva laghe gheleiela tale atu eteva alabasta ia, ghe kaakaai llo masi ngusungusuaane me aipolina namungaili me ghe kaola ta uruna ateva Iesu.

<sup>8</sup>Disaepolo atoa ghe sessailala nau laghe tarala llo ghe lutula me laghe ue va, “Eghelei elaelaeaala voto ita rooro tani ghaa viliki veu etana. <sup>9</sup>Ghe roola va ghe tauela me aue laghe polia tale viliki veu oroi me isaa o viliki veu, laghe roo tani laa tau lao ta lo atoa karika tue peipeiena ila.”

<sup>10</sup>Iesu ghe kilala nannaaira, me ghe liula me ghe uela va, “Vaalu me essaiem etana nau egheleila masi voto etaghi? <sup>11</sup>Aue lo atoa karika tue peipeiena ila la toka teeiem nau ekapa atoa, me aghi karika oroi nau aue atoka teeiem. <sup>12</sup>Ekaola voto masi ngusungusuaane etaghi tani aimanomanosieinaghi tale nau niaikaia. <sup>13</sup>Aghaaulia ngakoronna va eaa aue la ppoaa isaa o masi kiukiu tale kosa ateva, aue la ghauliaa tee masi gheeleiaane vause ateva oia, tani nnaainia.”

### **Jiudas ghe uela va aue etau lao Iesu**

*(Mak 14:10-11; Luk 22:3-6)*

<sup>14</sup>Me kateva ta kasangaulu ghalua (12) disaepolo, la kolokoloa va Jiudas Iskariot, ghe lao sio ta namu ngatoo ta pristi etoa, <sup>15</sup>me ghe kolomilala va, “Aue am ghele polieghi ta ghaisaa arova aghele tau aatu Iesu etaimim?” Me laghe tau lao sio kotolungaulu (30) viliki veu. <sup>16</sup>Ghe tiuaala tale ia o nau eteva, Jiudas ghe tiuaala tani tara teva masi nau aue etauela etaira.

### **Iesu ghe namanama teela disaepolo atoa**

*(Mak 14:12-21; Luk 22:7-14, 21-23; Jon 13:21-30)*

<sup>17</sup>Tale aitiutiu eteva nau tale nivelu eitauaa tale verete karika righi isti etana, disaepolo atoa laghe lao sio ta Iesu me laghe kolomiela va, “Uanna va eaa aloi ami laa ghaimonomonosiaa nina-manama atea ta Pasova?”

<sup>18</sup>Ghe uela etaira va, “Nau eteva am kupi sso tale masaliki taatara atea, aue am tara taumattu ngateva. Am ue etana va, “Tisa euela va: Nauna ange rekatala me eanna tani nama Pasova ngateva tee kapuna disaepolo atoa tangauem.” <sup>19</sup>Liuna avalua o me disaepolo atoa laghe gheleila voto nongina Iesu ghe auliaala, me laghe aipanipani-aala inana tale Pasova ngateva.

<sup>20</sup>Vara elo alai me Iesu ghe toka tee siola kasangaulu ghalua (12) kapuna disaepolo tale tevo ateva. <sup>21</sup>Laghe namanama me Iesu ghe uela etaira va, “Aghaaulia ngakoronna etaimim va kateva etaimim aue etaueghi lao ta tau ngai ssateeghi etoa.”

<sup>22</sup>Nau disaepolo atoa laghe nongola, laghe alousiusieilila me kateva kateva ghe kookolomia va, “Vau eteva, koti aghi, no?”

<sup>23</sup>Ghe liula me ghe uela va, “Kateva etaimim ange asuula verete teieghi tale pelete ativilau aue etaueghi lao ta tau ngai ssateeghi etoa. <sup>24</sup>Poli Natuna ateva Taumattu ngateva aue elao nongina vaalu laghe piti elokola va emate. Me alousiusi tale taumattu ngateva etautau lao Natuna ateva Taumattu ngateva ta tau ngai ssateena atoa. Aue ghele masina etana arova ghe tam lutula.”

<sup>25</sup>Jiudas, lo ateva taumattu aue ghe tau lao Iesu, ie tee ghe kolomila ghe uela va, “Koti aghi, no, va Rabae?”



Me Iesu ghe uela etana va, “Inangari isaa ona angu auliaala.”

**Iesu ghe tau lao sio verete me uaeni ta kapuna disaepolo atoa**

*(Mak 14:22-26; Luk 22:15-20; 1 Kor 11:23-25)*

<sup>26</sup> Laghe namanama me Iesu ghe ghaala verete ateva, me ghe kokkolomi saela ta God tani arangiseia, me ghe piriela me ghe taue lao sio ta disaepolo atoa, me ghe uela etaira va, “Am ghaala me am nama. Isaa oia verete malataughu.”

<sup>27</sup> Me ghe mene ghaala kapa uaeni eteva me ghe mene kaili emasina saela ta God me ghe tau lao sio etaira me ghe uela va, “Am akapa am ropi etana, <sup>28</sup> poli uaeni eteva oia raeghi ia tani ghelei ouna inangari niaippooa ngaitauaa. Raeghi eteva aue akala ta oroi taumattu ngatoa, tani kkaluaa sesa gheeieiaaira. <sup>29</sup> Aghaauliaa etaimim va karika aue amene ropi righi uaeni lomosi ta aue amene ropi ouna uaeni teeiem tale ararimangalina ateva Tamaghi.”

<sup>30</sup> Me laghe ueila kinari eteae me laghe kupi ghoala tale masaliki taatara atea me laghe saela tale motouru eteva eOliv.

**Iesu ghe aulia ngamuemua alokoila llo Pita aue eghelei**

*(Mak 14:27-31; Luk 22:31-34; Jon 13:36-38)*

<sup>31</sup> Iesu ghe uela etaira va, “Ghaine eleivoo am akapaaili aue am ilou vulieghi, poli Uru ngai Manga ateva eue va,

“Aue auvi emate tau ngai toi sipsipi eteva

me aue sipsipi etoa la ilou reerekataa.”<sup>¶¶</sup>

<sup>32</sup> Me nau atotu tale nimate aue amuemue lao eGalili me aue am laa taraieghi okae.”

<sup>33</sup> Pita ghe aulia ngaotula va, “Arova ila akapa la ilou vulio, aghi karika poi arooroo tani ilou vulio.”

<sup>34</sup> Iesu ghe liula me ghe uela va, “Pita, llo koronna isaa avalua toko va, ia o vo ngateva auena paolo ateva taita eanngari, aue uue akasina kotoluata va karika ukilakilaieghi.”

<sup>35</sup> Me Pita ghe aasarasarakana tani ue va, “Karika poi arooroo tani ue va karika akilakilaio! Arova umate aghi tee aue amate teeo.” Ila akapa disaepolo atoa laghe aulia ngavalua o ta Iesu.

**Iesu ghe looloo sae eGetsemeni**

*(Mak 14:32-42; Luk 22:39-46)*

<sup>36</sup> Me Iesu ghe ghaala kapuna disaepolo atoa me laghe lao sio tale voto ateva la kolokoloa va eGetsemeni, me ghe uela etaira va, “Am toka oia me aghi aue amene kasu tee lao tani laa looloo sae.” <sup>37</sup> Ghe kolola Pita me natuna alua Sebedi me ghe tiuaala tani alousiusieili, me ang ghe ateatea saasakia. <sup>38</sup> Me ghe uela etairotolu va, “Maamauluaaghi ange sessaili tee nialousiusi eteva, me egheleieghi arova amate. Am toka oia me am anguu taatara teieghi.”

<sup>39</sup> Ghe kasu tee lao sio me ghe turru siola tapaa kosa matane ghe tau siola me ghe tiuaala tani looloo sae. Ghe ue va, “Tamaghi, arova erooroo uakekkelieghi tale isaa oia kapa nimmarikana ateva ange aanna tani ghaaieghi. Me karika umene ghelei tale aloalonnaaghi ta ughelei tale aloannaam.”

<sup>40</sup> Ghe kiriaa lao sio ta disaepolo atoa me ghe tarailala ta laghe aseasekanua me ghe uela ta Pita va, “Karika erooroo va am nim anguu taatara teieghi ta kateva nonga aoa? <sup>41</sup> Am anguu taatara me am looloo sae ta God va karika am mene katuu tale nitootonga. Nan-

<sup>¶¶</sup>26:31 Sekaraea 13:7

naimim eanna tani ghelei voto, me vilikiimim mangoona.”

<sup>42</sup>Ghe kasu vulilala me ghe mene lao sio tani looloo sae, ghe ue va, “Tamaghi, arova ia oia kapa nimmarikana ateva etam kkelieghi me aropia, aue aghelei aloaloannaam.”

<sup>43</sup>Vara ghe mene kiriaa mae sio etairotolu me ghe mene saopilotolla ta latolu ghe asesekanua, poli matairotolu ghe maamaateaili. <sup>44</sup>Me ghe mene lao sio tani looloo sae aiaakotonna. Ghe auliaa inangari ang ghe auliaala mua.

<sup>45</sup>Ghe mene kiriaa mae sio ta disae-polo atoa me ghe uela etaira va, “Am asesekanua me am maamatua ngatoka ieti, va? Am tarala! Nau ange rekatala va Natuna ateva Taumattu ngateva ngila tautauela ta nimaira sesa taumattu ngatoo. <sup>46</sup>Amotolu totula me ita kasu! Lo ateva etautaeueghi lao ta tau ngai ssateieghi etoa ange reerekata.”

### Laghe kunela Iesu

(Mak 14:43-50; Luk 22:47-53; Jon 18:3-12)

<sup>47</sup>Nau ghe auliaala llo me Jiudas, kat-eva ta kasangaulu ghalua (12) disae-polo, ghe rekata teela taumattu ngatoo oroianaaili ila me laghe posoposo baenata me tuku ngai. Namu ngatoo ta pristi etoa me namu ngatoo laghe sungilala. <sup>48</sup>Lo ateva ghe taue lao sio etaira ghe auliaa tau lao sio niaimatoongana ateva aue egheleia. Ghe uela va, “Lo ateva taumattu angusua, ia o lo ateva am kuneaia.” <sup>49</sup>Liuna avalua o me Jiudas ghe lao sio ta Iesu me ghe uela va, “Rabae!” me ghe ngusuela.

<sup>50</sup>Me Iesu ghe uela etana va, “Kapughu, gheleila voto umae sio tani ghelei.”

Laghe kunela Iesu me laghe poso atinginaiaela. <sup>51</sup>Kateva taumattu ghe titingina tee Iesu ghe ghaala baenata ateva me ghe sai patela talingane ativi-

lau kateva kapuna tau ngai nongonongo anna namu ngateva ta pristi etoa.

<sup>52</sup>Me Iesu ghe uela etana va, “Kaaila baenata ateva, poli lo atoa la aauvi tale baenata, aue la uvila tale baenata ateva. <sup>53</sup>Karika ukilakila va arooroo tani kolomi sae Tamaghi tani tau sio oroianaaili ensolo atoa me arovaeaa nonga ta aue ghele sungila? <sup>54</sup>Me arova aghele ghelei, vaalua aue voto Uru ngai Manga ateva ghe auliaala aue ghele lutu ekoronna?”

<sup>55</sup>Me Iesu ghe uela ta taumattu ngatoo va, “Am annaa vara aghi tau ngai uvi me sari ghinna ieghi va am sau mae sio baenata me tuku ngai tani kuneieghi? Vaalua me karika am ghe kuneieghi nau aghe aapasunga nau ekapa atoa tale ale manga ateva? <sup>56</sup>Isaa o voto ghe lutu-lutu tani rooaa inangariira propete atoa laghe piti elokoila tale Uru ngai Manga ateva.” Tale ia o nau eteva, disae-polo akapa atoa laghe kasu vuliela me laghe iloula.

### Iesu ghe tinginala emua ta kansolo atoa

(Mak 14:53-65; Luk 22:54-55, 63-71; Jon 18:13-14, 19-24)

<sup>57</sup>Me taumattu ngatoo laghe kunela Iesu me laghe laoainie sio tanganue Kaeapas namuu ia ta pristi etoa, nongina tau ngai apasunga ngatoo tale inangari nipaopao me kona namu ngatoo laghe velu eitauaala. <sup>58</sup>Vara me Pita ghe aaimuli me karika ghe kalakalaa. Ghe kupi ssola tale valavala atea ghe taatalia alena ateva namu ngateva tale pristi etoa me ghe toka tee siola tau ngai toitoi etoa. Ghe toitoi tani tara va saa ateva aue ghe lutu ta Iesu.

<sup>59</sup>Namu ngatoo ta pristi etoa, me kansolo akapa atoa, laghe paepae righi taumattu aue laghe aikamea righi voto tee Iesu me laghe uvi ematea. <sup>60</sup>Oroi taumattu laghe ghaala tani auliaa tee Iesu

tale inangari kamena, me kansolo atoa karika laghe pae poila righi voto laghe aauliaa tee Iesu me laghe roo tani uvi ematea.

Vara me laghe paela ghalua taumattu. <sup>61</sup>Lalu ghe uela va, “Taumattu ngateva oia ghe uela va, ‘Arooroo tani rruti alena ale manga ateva God me aue aghatulua ta kotolu nonga nau.’”

<sup>62</sup>Namu ngateva ta pristi etoa ghe tingina saela me ghe uela ta Iesu va, “Karika aue uliu inangariira? Vaalua tale inangari la ghaauliaa teeio?” <sup>63</sup>Me Iesu ghe nim maamatua atingina.

Me namu ngateva ta pristi etoa ghe uela etana va, “Tale ararina ateaee God tokatoka liu ia, aghanna va uauliaa etaimami va koronna va io Mesaea, Natuna io God?”

<sup>64</sup>Iesu ghe liula me ghe uela va, “Ue, nongina angu auliaala. Aue am tara Natuna ateva Taumattu ngateva ta etoka sio tale pai muenna ativilau lo ateva sarasarakana ia, me esio tale karaane epona liu.”

<sup>65</sup>Vara me namu ngateva ta pristi etoa ghe rasila ghinnanina tani apasunga va ghe tam aloannala tani nongo, me ghe uela va, “Ange ghaala liuna ateva God! Karika ita mene aloanna mene righi taumattu tani auliaa mene righi inangariira poli ngam nongola voto eauliaa. <sup>66</sup>Vaalua am annaa?”

Laghe liula me laghe uela va, “Ange gheleila voto sesa erooroo va emate.”

<sup>67</sup>Me laghe tiuaala tani kanusui matane Iesu me laghe tuutumaria me katoa laghe pooposalai. <sup>68</sup>Me laghe ue etana va, “Poli Mesaea io, uauliaa inangari ghe mae sae ta God va see ange posalaiola.”

### **Pita ghe uela va etam kilakila Iesu**

(Mak 14:66-72; Luk 22:56-62; Jon 18:15-18, 25-27)

<sup>69</sup>Pita ghe tokatoka eleka, elome tale valavala ateaee ghe taatalia alena ateva namu ngateva ta pristi etoa, me kapuna vause tau ngai nongonongo anna ateva ghe lao sio etana me ghe uela va, “Io tee ughe kasukasu tee Iesu aGalili ia.”

<sup>70</sup>Me ta mataira akapa, Pita ghe liula me ghe uela va, “Karika akilakila isaa ona inangari uauliaa.”

<sup>71</sup>Me ghe kupi ghoala tale atamana ateaee tale valavala ateaee me mene kateva vause tau ngai nongonongo anna ia ghe taraiela me ghe uela ta taumattu ngatoa va, “Ia oia taumattu ngateva ghe kasukasu tee Iesu aNasareti ia.”

<sup>72</sup>Me Pita ghe mene uela va, “Karika!” Me ghe uela va, “Koronnaaili ta epona liu va karika akilakila ia ona taumattu ngateva.”

<sup>73</sup>Vara karika masau me lo atoa laghe tiitingina akalakalangina teeia laghe uela etana va, “Koronnaaili va io kateva etaira, poli samasamaam arova aGalili eteva.”

<sup>74</sup>Me Pita ghe uela va, “Koronnaaili ta God va karika akilakila ia ona taumattu ngateva!”

Vara me paolo ateva taita ia ghe aangarila. <sup>75</sup>Arovaea ta Pita ghe annaala inangarina Iesu ghe uela va, “Auena paolo ateva taita ia eangari, aue uue akasina kotoluaata va karika ukilaki-laieghi.” Pita ghe kupi ghoala me ang ghe ngala alousiusieilila.

### **Laghe laoa sio Iesu ta Paelat**

(Mak 15:1; Luk 23:1-2; Jon 18:28-32)

**27** Elue talaua poopooa namu ngakapa atoa ta pristi etoa me namu ngatoa laghe mae sio nonga tale kateva ninannaa va la uvi emate Iesu.

<sup>2</sup>Laghe iriela me laghe kasueiniela tani laoaania ta Paelat gavanaa ia.

### Giudas ghe nauela

(Apostolo 1:18-19)

<sup>3</sup>Nau Giudas, ia o taumattu ngateva ghe tau lao sio Iesu ta tau ngai ssateena atoa, ghe tarala va aue la uvi emate Iesu, ghe maateailiila ta nannaane me ghe mene laoa sio viliki veu erooro ko-tolungaulu (30) silva koen namu ngatoa ta pristi etoa me namu ngatoa laghe tau lao sio etana. <sup>4</sup>Ghe uela va, “Ngagheleila voto karika masina tani tau lao taumattu ngateva karika righi kanna ssavoto va la uvi ematea.”

Laghe liula me laghe uela va, “Ami saa etana? Uunguaam ona.”

<sup>5</sup>Giudas ghe sau velu elokoi siola viliki veu tale ale manga ateva me ghe kasula tani laa naua.

<sup>6</sup>Namu ngatoa ta pristi etoa laghe ghaa siola viliki veu me laghe uela va, “Uneita loo eue va karika masina tani alokoi sso tale ale viliki veu, poli viliki veu rae llo oia.” <sup>7</sup>Liuna avalua o me laghe mae sio tale kateva ninannaa va, tale isaa o viliki veu aue la poli tuku kosa ateva kaluira ia lo atoa laghe gheelei sospena tale kosa me aue liu niaika-iaira ia ativuu etoa. <sup>8</sup>Liuna avalua o me tale isaa oia nau la aseasea va kosa tale rae ia. <sup>9</sup>Me llo voto propete Jerimaea ghe auliaala ange kaurekatila, ghe uela va, “Laghe ghaala kotolungaulu silva koen, aipolipoli eteva taumattu nge Israeli etoa laghe aseala etana va la polia, <sup>10</sup>me tale isaa o viliki veu laghe polila tuku kosa ateva laghe gheelei sospena kosa etana, nongina Vau ngepona ateva ghe auliaala etaghi.”<sup>§§</sup>

### Iesu ghe tinginala emua ta Paelat

(Mak 15:2-15; Luk 23:3-5, 13-25; Jon 18:33-19:16)

<sup>11</sup>Vara me Iesu ghe tinginala emua ta Paelat gavana ia me ghe kolomiela va, “Io kingi io ta aJiu etoa?”

Iesu ghe liula me ghe uela va, “Ue, nongina uauliaa.”

<sup>12</sup>Nau eteva namu ngatoa ta pristi etoa me namu ngatoa laghe auliaa lao ta Paelat teeia inangari, karika poi Iesu ghe liula. <sup>13</sup>Me Paelat ghe kolomiela va, “Karika unongonongo inangari la ghaauliaa teeio?” <sup>14</sup>Me karika poi Iesu ghe liula teva tuku inangari laghe auliaa teeia. Me gavana ghe soghiaala isaa o voto ghe tarala etana.

<sup>15</sup>Kateva voto gavana ghe gheeleia nonga nau tale nivelu eitaua ngateae ta Pasova, ghe tautau velu lo ateva taumattu tale ale mata voovoo taumattu ngatoa laghe anna va etau velua.

<sup>16</sup>Isaa o nau kateva taumattu, taumattu ngakapa atoa laghe kilakilaia va sesa taumattu ia, ghe tokatoka tale ale mata voovoo, ararina ateae ta Barabas.\*

<sup>17</sup>Nau taumattu ngatoa laghe mae sio tani velu eitauaa, Paelat ghe kolomilala va, “Am alona va atau velu see me emene atu etaimim: Barabas o Iesu la kolokoloa va Mesaea etana?” <sup>18</sup>Poli Paelat ghe kilakila va laghe tam nannaa tee Iesu righi masina, liuna avalua o me laghe maeainie sio etana.

<sup>19</sup>Paelat ghe tokatoka tale uneira aitokatoka ateva tau ngaighelei niaisakei etoa, me vausenna ateva ghe suula inangari va, “Urau mene ghelei righi voto tale taumattu ngateva ona karika righi gheeleiaane sesa. Poli ia me ngaghaala oroieili mmarikana tale

§§27:10 Sekaraea 11:12-13; Jerimaea 19:1-13; 32:6-9

\*27:16 Kasina uru ngai laghe pitila, laghe pitila va Iesu Barabas

maamauluaaghi nau aghasoasopoila eleivoo.”

<sup>20</sup> Namu ngatoa ta pristi etoa me namu ngatoa laghe pappasali taumattu ngatoa va etau velu Barabas me euvi emate Iesu.

<sup>21</sup> Gavana ghe kolomilala va, “See etairarua am anna va atau velua me emene atu etaimim?”

Laghe liula me laghe uela va, “Barabas.”

<sup>22</sup> Me Paelat ghe kolomilala va, “O saa ateva aghelaia ta Iesu la aseasea va Mesaea ia?”

Ila akapa laghe liula me laghe uela va, “Uavukalaie sae tale aikotoo.”

<sup>23</sup> Me Paelat ghe kolomilala va, “Poli saa ateva voto sesa ghe gheleila?”

Vara me laghe tiuaala tani sama anamungaili va, “Uavukalaie sae tale aikotoo.”

<sup>24</sup> Nau Paelat ghe tarala va karika ang ghe rooroo tani ghelei righi llo, me niaikkalui eteae ang ghe tiitiuaa, ghe ghaala manu me ghe porala nimane emua ta taumattu ngatoa me ghe uela va, “Karika righi inangarighi tale raena ateva taumattu ngateva oia. Saa ateva elutu etana uunguaimim.”

<sup>25</sup> Taumattu ngatoa laghe liula me laghe ue va, “Utau velu rangane ateva etoka etaimami me natuimami etoa.”

<sup>26</sup> Me ghe tau vella Barabas ghe mene lao sio etaira me Iesu laghe uetaiela mua me ghe taue lao sio va la laa ghavukalaie sae tale aikotoo.

### **Soldia ngatoa laghe aanamisa Iesu**

*(Mak 15:16-20; Jon 19:2-3)*

<sup>27</sup> Me kapuna soldia ngatoa gavana laghe ghaala Iesu me laghe ssoainiela tale ale gavmani eteva la kolokoloa va Praetorium ateva, me laghe kolo akapala soldia ngatoa me laghe to-muela. <sup>28</sup> Laghe ghaa vella ghinnanina me laghe asae taula aisoe ateva raer-aeana ia, <sup>29</sup> me laghe ghaala uasa ror-

roana me laghe navitaala kou nguru eteva me laghe atokaie saela ta uruna. Me laghe atinginala ai eteae ta nimane muenna atelange, me laghe suusuuiiaa emua etana me laghe piipilosia tani ue etana va, “Ei, kapuira kingi eteva aJiu etoa!” <sup>30</sup> Laghe kaakanusua me laghe ghaala ai eteae ta nimane me laghe paruparu uruna ateva. <sup>31</sup> Nau laghe ruula tani anamisainia, laghe ghaa vella aisoe ateva etana me laghe mene asae taula ghinnanina me laghe kasueiniela tani laa avukalaie sae tale aikotoo.

### **Laghe avukala saela Iesu tale aikotoo**

*(Mak 15:21-32; Luk 23:26-43; Jon 19:17-27)*

<sup>32</sup> Nau laghe laa ghoea eleka, laghe soula taumattu ngateva atala nge Saerini ia, ararina atea ta Saemon, me laghe aeala me laghe sungiela va esau aikotoo ateva. <sup>33</sup> Laghe rekatala tale voto ateva ararina atea ta Golgota, mal-loeana va Voto ateva arova Riu uru taumattu ngateva. <sup>34</sup> Tale ia o voto ateva laghe tau lao sio uaeni ta Iesu va eropi. Laghe kao aitauaa teela voto kaakaalina, me nau Iesu ghe tootoongaala, ghe tam annala tani ropi. <sup>35</sup> Nau laghe avukalaie saela tale aikotoo me laghe tiuaala tani anamisi tani aikoitaghinnanina. <sup>36</sup> Me laghe toka siola tale ia o voto ateva tani toi etokaia va ghe tani mate. <sup>37</sup> Epona nongina uruna ateva laghe pitila me laghe avukalala inangari laghe laoinie sio tale niaisakei etana eue va, “Ia oia Iesu, kapuira kingi ia aJiu etoa.” <sup>38</sup> Taita alua lalu ghe aiuvi me lalu ghe ghaaghaa peiira taumattu ngatoa, lalua tee laghe avukala teeilalue saela, kateva ta pai muenna ativilau me kateva ta pai uaise ativilau. <sup>39</sup> Me taumattu ngatoa laghe kasukas tapaa salana, laghe aauliaa teeia inangari karika masina. Laghe ringaringa uruira, <sup>40</sup> me laghe ue va, “Io urooroo tani rruti ale manga at-

eva me umene atulua ta kotolu nonga nau, asaangiola me ukure sio tale aikotoo ateva, arova Natuna io God.”

<sup>41</sup> Namu ngatoa ta pristi etoa me tau ngai aapasunga tale inangari nipaopao me namu ngatoa, ila tee laghe aauliaa teeia inangari. <sup>42</sup> Laghe ue va, “Eghe aasaangila katoa, me karika erooroo tani asaangia! Ia kapuira kingi ia alsraeli etoa! Am tau veluela me ekure sio tale aikotoo ateva me aue ami aiesoa etana. <sup>43</sup> Ghe aatoka tuutulina ta God. Tau veluela me ghaine God esaangia arova eannaia, poli ghe ue va, ‘Aghi Natuna aghi God.’” <sup>44</sup> Tale ie nonga o salana atikirighi tau niainao tee alua laghe avukala teeilalue saela tale aikotoo, lalu ghe aauliaa teeia inangari.

### **Matemateaane Iesu**

(Mak 15:33-34; Luk  
23:44-49; Jon 19:28-30)

<sup>45</sup> Ghe tiuaala ta pai ngelo sinaka<sup>†</sup> me saurrom ateva ghe akoula kosa ateva, ghe roola kotolu aoa. <sup>46</sup> Gharighi ghe 3 kiloko<sup>‡</sup> me Iesu ghe aore namungailiila me ghe uela va, “*Eli, Eli, lama sabaktani?*” malloeana va, “Kapughu Goto ateva, kapughu Goto ateva, vaalua me angu tau velueghila?”<sup>¶</sup>

<sup>47</sup> Nau katoa ta lo atoa laghe tiitingina akalakalangina laghe nongola, laghe uela va, “Ekolokolo Elaija.”

<sup>48</sup> Arovaea ta kateva ghe iloula tani laa ghaa tuku kalio ateva me ghe asu- uela tale uaeni kaakaalina me ghe apas- apasaiela tale ai eteae me ghe tau saela va Iesu ghe mmua. <sup>49</sup> Mene katoa laghe ue va, “Tau veluela me ie nonga evukala, me ita tara arova Elaija aue emae asaangia.”

<sup>50</sup> Me nau eteva Iesu ghe mene aore namungailiila me ghe tau vella maamauluaane.

<sup>51</sup> Tale ia o nau eteva, kalio atiulu ghe vuuvukala tale ale manga ateva ghe tar- riila me ghe ghaluevilaula, ghe laa sae tiuaa epona me ghe laa sio ruu euu. Me kosa ateva ghe aisiisiaala me atu etoa laghe taputuputula. <sup>52</sup> Liengani niaikaia ngatoa ghe otilala me oroi ila taumattu ngatoa manga ila laghe matela laghe totula me laghe mene mauluella, <sup>53</sup> me laghe totu vulula liengani niaikaia me vara Iesu ghe totula tale nimate me laghe aotuotula ta oroieili ila taumattu ngatoa tale masaliki taatara ateae manga ia.

<sup>54</sup> Nau lo ateva tau ngai uvi eaitoiaa kateva ai (100) tau ngai uvi me lo atoa laghe toitoi evukala Iesu, laghe tarala rukeruke ateva me isaa akapa voto ghe lutula, laghe matautu etinginala me laghe uela va, “Koronna taumattu ngat- eva oia Natuna ia God.”

<sup>55</sup> Oroil ila vause atoa laghe tiitingina amasau me laghe taatara. Angila ghe tiuaala tani usi Iesu eGalili me tani sausia. <sup>56</sup> Elome ta ila o vause atoa, Meri aMakdala ia me Meri kinairarue ia Jeimis me Josep<sup>§</sup> me kinairarua ateva natuna alua Sebedi.

### **Kaakaiaane Iesu**

(Mak 15:42-47; Luk  
23:50-56; Jon 19:38-42)

<sup>57</sup> Ghe elo alaila me taumattu ngateva, tue peipeiena ia ararina ateae ta Josep me tanguenua tale masaliki taatara ateae eArimatia, ghe rekatala, ie tee ka- puna disaepolo ia Iesu. <sup>58</sup> Ghe lao sio ta Paelat me ghe kolomila Iesu etana. Me Paelat ghe uela va la tau lao Iesu

<sup>†</sup>27:45 *pai ngelo sinaka* Tale inangari nge Grik, *ghaonovina* (6) ateva aoa

<sup>‡</sup>27:46 *3 kiloko* Tale inangari nge Grik, *ta aiaaghasiona* (9) ateva aoa

<sup>¶</sup>27:46 Sams 22:1

<sup>§</sup>27:56 Tale inangari nge Grik, *Joses*

etana. <sup>59</sup> Josep ghe ghaala Iesu me ghe sumuela tale masi kalio raarangisana. <sup>60</sup> Me ghe alokoiela tale unna liengani niaikaia ngateae, ghe kaie ssola elome tale vallae. Ghe atakirila kinatama atu eteva tani tingina airungaa liengani niaikaia ngateae, me ghe kasula. <sup>61</sup> Meri aMakdala ia me mene kateva Meri lalu ghe tokatoka tale kativilau pai nongina lienga ateva.

### Lo atoa laghe aitoiaa liengani niaikaia ngateae

<sup>62</sup> Vara mene kateva nau, nau manga ia, me namu ngatoa ta pristi etoa me Paresi etoa laghe lao sio ta Paelat. <sup>63</sup> Me laghe uela etana va, “Namu ngateva, ami nannaa ia o tau nikamekame ateva nau mauue ia ghe ue va, ‘Vara kotolu nau elange me aue amene totu.’ <sup>64</sup> Liuna avalua o me uaulia ngasararakana me la tani ghelei ekorokorongana lienga niaikaia ngateae lomosi ta kotolu nau elange, poli kapuna disaepolo atoa la rau laa ghainaoa me la laa ue ta taumattu ngatoa va ange totula tale nimate. Lo ateva o nikamekame aue sesaaili tale lo akasina ateva nikamekame.”

<sup>65</sup> Paelat ghe liula me ghe uela va, “Am ghaala tau ngaitoitoi etoa me am laa ghelei ekorokorongana liengani niaikaia ngateae nongina vaalua am kilakila.” <sup>66</sup> Liuna avalua o me laghe lao sio me laghe ghelei ekorokorongana liengani niaikaia ngateae me laghe atokala aimatootoongana ateva tale atu eteva tani apasunga va karika laghe ghaa velua, me laghe atinginala tau ngaitoitoi etoa tani aitoieinia.

### Iesu ghe mene totula

(Mak 16:1-8; Luk 24:1-12; Jon 20:1-10)

**28** Nau eteva nau manga ateva ghe ruula, me elue talaua poopooa tale aitiutiu eteva tana nau, Meri aMakdala ia me mene kateva Meri lalu ghe

mae sio tani taatara tale liengani niaikaia ngateae.

<sup>2</sup> Paka rukeruke ateva ghe lutula nongina lalu ghe tiitingina ta kapuna ensolo ateva God ghe sio mae epona liu me ghe atakiri vella atu eteva ghe gheeleei runga liengani niaikaia ngateae me ghe tokala epona tale atu eteva. <sup>3</sup> Mallanga ateva ta vilikina tani nonginaaaili ravaravaia ateva me unna aisoosousoanaaili nongina karaane ateva. <sup>4</sup> Lo atoa laghe aitoiaa liu niaikaia ngateva laghe matautu saasakiaala, laghe reterete me laghe katu ngalokoi siola tapaa kosa tani nonginaaaili matena atoa taumattu laghe asoaso.

<sup>5</sup> Vara me ensolo ateva ghe uela ta vause atoa va, “Am rau mene matautu. Akilakila va am aloanna tani tara Iesu, ia o ghe matela tale aikotoo. <sup>6</sup> Karika ia oia. Ange totula nongina ghe auliaa. Am lange sso tara nongina laghe alokoiela. <sup>7</sup> Gharovaeata ta am kasu me am laa auliaa ta kapuna disaepolo atoa va ange totula tale nimate, me aue am taraia eGalili, ta ange muemue lao sio okae.”

<sup>8</sup> Vause atoa laghe matautula me laghe pasula tale nimasimasi. Gharovaea ta laghe kasu vulila liengani niaikaia ngateae me laghe masimasi etinginala tani laa ghauliaa kieira disaepolo atoa. <sup>9</sup> Nau eteva laghe laolao, Iesu ghe sousoulala me ghe uela etaira va, “Elue talaua.” Me laghe mae akalakalaa sio tale liue kkena Iesu me laghe posoposo kkena me laghe kkaueiniela. <sup>10</sup> Me Iesu ghe uela etaira va, “Am rau mene matautu. Am laa ghauliaa ta nengaghi etoa va la lao eGalili me aue la laa taraieghi okae.”

### Inangariira lo atoa laghe toitoi liengani niaikaia ngateae

<sup>11</sup> Nau eteva vause atoa laghe kasukasu elaolao tau ngai uvi etoa laghe

aaitoiaa liengani niaikaia ngateae laghe ssola tale masaliki taatara atae me laghe aulia ngakapaailiila voto ghe lutula ta namu ngatoa ta pristi etoa. <sup>12</sup>Nau eteva namu ngatoa ta pristi etoa laghe nongola, laghe kolo aitauala namu ngatoa me laghe aippooa ngaitauaala tani ghelei righi salana va la poli tau ngai uvi etoa tale namuu viliki veu, me la nim usilaa nongina vaalua aue la aulia. <sup>13</sup>Laghe uela ta tau ngai uvi etoa va, “Am ue va, ‘Kapuna disaepolo atoa Iesu la mae sio tani ainao Iesu eleivoo nau eteva ami ghe aseasekanua.’ <sup>14</sup>Me arova gavana ngateva enongo va am ue va am ghe asekanuela me laghe ainaola Iesu, am rau mene anna. Aue ami aippooaa teeia me karika aue am ghaa righi maamaatana etana.” <sup>15</sup>Tau ngai uvi etoa laghe ghaala viliki veu me laghe gheleila voto laghe uela va la ghaulaa, me ia o kiukiu eteae ghe kasu ekapa seela ta aJiu etoa tale ia o nau eteva.

**Kinatama niuungu eteva Iesu ghe taue lao sio ta disaepolo atoa**

*(Mak 16:14-18; Luk 24:36-49;  
Jon 20:19-23; Apostolo 1:6-8)*

<sup>16</sup>Vara me kasangaulu me kateva (11) disaepolo laghe lao sio eGalili me laghe

saela tale motouru eteva nongina ghe auliaala etaira va aue la laa taraia etana. <sup>17</sup>Nau eteva laghe taraiela laghe kkaueiniela, me katoa etaira laghe tam aikaaiaala va laghe tarala Iesu. <sup>18</sup>Vara me Iesu ghe mae sio etaira, me ghe uela etaira va, “Ngaghele ghaala nimatuu-tuliena akapa epona liu me tale kosa ateva oia. <sup>19</sup>Liuna avalua o me am kasu me am mene ghaa righi disaepolo tale anua akapa atoa me am asuula tale ararina atae Tamaghi me ta Natuna me tale Spirit Manga. <sup>20</sup>Me am apasunga etaira tani nongo usilaa isaa akapaaili voto aghe auliaala etaimim me aue atoka teeiem tale nau ekapa atoa elaa ghaa airuuruu tale kosa ateva.”



*Masi kiukiu*

**Mak**

*ghe pitila*

**Inangari emuemua**

Masi kiukiuna Iesu Mak ghe pitila ekiukiuaa uunguaane Iesu, matemateane me tottotaane tale nimate. Mak tukuna ia ta mene kotolu buku masi kiukiu etana (Matiu, Luk me Jon), me ghe pitila oroi voto Iesu ghe ghelei tale llo voto ghe aapasunga. Matiu, Luk me Jon laghe pitila mene kasina voto oroi Iesu ghe aapasungaala. Mak eauliaa oroi niungu sarasarakana Iesu ghe gheleila tani ghelei emasina tau sessa atoa, me sungi velu raroai, me tani kkaluaa ssavoto. Mak eaauliaa va sarasarakaniaane Iesu namuu ta Satana me ia erooro tani asaangi taumattu.

Masi kiukiu ta Mak, Jon Mak ghe pitila. Ia karika va kateva ta kasangaulu ghalua (12) kapuna disaepolo Iesu. Ia ghe uungu tee Pol me Banabas. Tau ngalomasanga atoa emua arau laghe uela va ghe kilala oroi voto ta Pita eRom.

Tani kila amuemua

Inangarina Jon tau ngai aasuu ia 1:1-8  
Niasuu me nitootoongana Iesu 1:9-13  
Iesu eGalili 1:14-9:50

Iesu ghe lao sio eGalili me ghe saela eJerusalem 10:1-52

Unna nitootoonga me nimate Iesu tale airuuruu eteva uiki 11:1-15:47

Iesu ghe totula tale nimate 16:1-8

Iesu ghe otuotula ta kapuna disaepolo atoa 16:9-20

**Jon tau ngai aasuu ia ghe poppooaa**

(*Mat 3:1-12; Luk 3:1-9,  
15-17; Jon 1:19-28*)

**1** Aitiutiu tale masi kiukiuna Iesu Karisto, natuna ia God. <sup>2</sup>Isaa oia masi kiukiu nongina propet Aisaea ghe pitila:

“Nongola, aue asuu aikasuaa inangarighi,  
ia aue emuemueinio.

Ia aue eaimonomosiaa salam atikirighi.”\*\*

<sup>3</sup>“Tale voto ateva karika righi taumattu ghe tokatoka etana, kateva lingi ngalo taumattu ekolokolo, eue va, ‘Am aimonomosiaaala salane atikirighi Vau palepale. Am ghelei eghulughuluena akapa salane.”††

<sup>4</sup>Jon, ia o taumattu ngateva uunguaane tani asuu taumattu, eghe lao sio tale voto ateva karika righi taumattu etana, me ghe poppooaa ta taumattu ngatoa va la nna ngaioghioghiaa, me la ghaa niasuu, me God aue ekkaluaa kaluira ssavoto. <sup>5</sup>Ila akapa eJudia, me taumattu ngakapa atoa eJerusalem, laghe mae sio tani nongo Jon. Laghe aulia ngaotu kaluira ssavoto, me Jon ghe asuulala tale ateo atea eJodan. <sup>6</sup>Jon ghe aasae ghinnanina laghe gheleila tale uu kamolo, me ghe aiiria paisi eteae viliki vulumakao ia. Ghe namanama toto me iruena nge tapaa tuvui. <sup>7</sup>Eghe aulia ngaotu va, “Kateva taumattu aue emae emuli ta ngetaghi, ia sarasarakaniaane elaulau sarasarakaniaaghi. Karika masi taumattu ngieghi va asuuiaa patukkeghi, me apulaka oasa enaghinaghi unna aikasukasu. <sup>8</sup>Aghi aghaasuuem tale manu, me ia aue easuuem tale Spirit Manga ateva.”

\*\*1:2 Malakai 3:1

††1:3 Aisaea 40:3

### Jon ghe asuula Iesu

(Mat 3:13-17; Luk 3:21-22)

<sup>9</sup>Tale isaa o nau Iesu ghe kasula eNasareti eGalili, me ghe lao sio, me Jon ghe asuuela eJodan. <sup>10</sup>Nau eteva Iesu ghe lau sae mae tale paamanu eteva, eghe tarala epona liu ghe otiela, me Spiriti eteva nongina ghila ateva valusu ia ghe sio mae ta ngetana. <sup>11</sup>Epona liu kat-eva lingi ngalo ghe uela va, “Io natughu io, aghailousiangailio, me masimasi-agghi ta ngetam namungaili.”

### Satana ghe tootoongaala Iesu

(Mat 4:1-11; Luk 4:1-13)

<sup>12</sup>Katengaata ta Spiriti eteva ghe su-ula Iesu ghe ssola tale voto ateva karika rigi taumattu ta ngetana. <sup>13</sup>Iesu ghe tokala ghaatingaulu (40) nau, me Satana ghe mae sio tani tootoongainia. Eghe tokatoka tee ghaata kkena nge tapaa tu-vui etoa, me ensolo atoa laghe sio mae tani sausia.

### Iesu ghe tiuaala tani ppooaa masi kiukiu

(Mat 4:12-17; Luk 4:14-15)

<sup>14</sup>Nau eteva laghe atoka ssola Jon tale ale mata voovoo, Iesu ghe mae sio eGalili, me ghe tiuaala tani ppooaa masi kiukiuna God. <sup>15</sup>Eghe ue va, “Nau eteva God ghe aulieiniela ange rekatala, me ararimangalina ateva God ange kalakalanginala. Am nna ngaioghioghiaa, me am aikaai masi kiukiu.”

### Iesu ghe kolola disaepolo ghaata

(Mat 4:18-22; Luk 5:1-11)

<sup>16</sup>Iesu ghe kasukasu elaolao tale sama ateo talia ngateae eGalili, me ghe tarala Saemon me nengana ta Andru. Lalu ghe lukuluku, poli tau nge-lamana ilalua. <sup>17</sup>Iesu ghe uela ta ngetairarua va, “Amalu mae usieghi, me aue

agheleiemalua me amalu tau ngai luku taumattu iemalua.” <sup>18</sup>Arovaeata ta lalu ghe velu elokoila uneirarua uvena me lalu ghe usiela.

<sup>19</sup>Iesu ghe mene kasu tau lao sio, me ghe tarala mene ghalua, Jeimis me nengana ta Jon, natuna ilalua Sebedi. Lalu ghe tokatoka tale olimoirarua paanaka ateva, me lalu ghe aaimonomosiaa uneirarua uvena. <sup>20</sup>Nau Iesu ghe tarailaluela me ghe kololaluela, me lalu ghe tingina vulu saela tamairarua tale paanaka ateva tee tau ngai uungu etoa, me lalu ghe usiela.

### Iesu ghe ghelei emasinala taita ateva raroai eteva etana

(Luk 4:31-37)

<sup>21</sup>Laghe lao sio tale masaliki eteae eKapenium. Ta nau manga ateva, Iesu ghe ssola tale ale nivelu eitaua ngat-eva, me ghe aapasunga inangarina God ta taumattu ngatoa. <sup>22</sup>Nau eteva laghe nongola inangarina, laghe soghiaala, poli karika ghe aippooaa nongina tau ngai aapasunga ngatoa tale inangari ni-paopao, ta nongina taumattu ngateva matuutuliena ia.

<sup>23</sup>Elome tale ale nivelu eitaua ngat-eva, kateva taumattu raroai eteva ghe tokatoka etana. Ghe sama anamungailila me ghe uela va, <sup>24</sup>“Iesu aNasareti io, umae sio tani ghelei sa ateva etaimami? Vara ughelei saasakieinamami? Akilaki-laiio, io manga io kapuna io God.” <sup>25</sup>Iesu ghe uela ta raroai eteva va, “Umatua atoka, me ukupi vulue ghoa.” <sup>26</sup>Me raroai eteva ghe soghesogheainiela, me ghe aore anamungailila, me ghe kupi vulu ghoa mae taumattu ngateva. <sup>27</sup>Taumattu ngatoa laghe soghiaala voto ateva o ghe lutula, me laghe tiuaala tani aip-pooaa elome ta ngetaira. Laghe uue va, “Sa ateva ange lutula? Taumattu ngat-eva oia ange auliaala ouna kiukiu, me nongina taumattu ngateva matuutuliena

aippooaane. Nau eaiippooaa tee, raroai etoa la nongonongoa.”<sup>28</sup> Arovaeaataaaili ta kiukiuna voto Iesu ghe gheleila ghe kasu ekapa seela eGalili.

**Iesu ghe ghelei emasinala  
oroi taumattu**

*(Mat 8:14-17; Luk 4:38-41)*

<sup>29</sup> Arovaeaata ta Iesu me taumattu ngatoa laghe kupi ghoa mae tale ale nivelu eitaua ngateva, me laghe lao sio tanganue Saemon me Andru, tee Jeimis me Jon.<sup>30</sup> Alumuna vause ateva Saemon ghe iisiki, ghe asoaso tale komo poli vilikina ghe aanasa. Vara me laghe auliaala ta Iesu va alumuna Saemon ghe iisiki.<sup>31</sup> Iesu ghe lao sio me ghe kunela nimane atelange, me ghe totu etokaiela. Aanasa ateva ghe kapala, me ia o vause ateva ghe kaisila aneira inana.

<sup>32</sup> Ang ghe aaitarrauii poli sinaka ateva ang ghe suula, me taumattu ngatoa laghe maeaa sio ta Iesu lo akapa atoa tau sessa ila me tee taumattu raroai ghe tokatoka ta ngetaira.<sup>33</sup> Taumattu ngakapa atoa tale masaliki eteae laghe velu eitauaala tale paa ngatamana atea tale ale ateva.<sup>34</sup> Iesu ghe ghelei emasinala oroi tau sessa atoa, me ghe tiu vella oroi raroai etoa. Raroai etoa laghe kilakilaia, liuna avalua o me ghe pao rungainilala va karika la mene aippooaa.

**Iesu ghe poppooaa**

*(Luk 4:42-44)*

<sup>35</sup> Elue talaua poopooa Iesu ghe ghue totula, me ghe kasu vulila masaliki eteae, me ghe ssola tale kateva voto karika righi taumattu etana, me ghe tiuaala tani looloo sae.<sup>36</sup> Saemon me kapuna atoa laghe aimulila tani laa paea.<sup>37</sup> Nau laghe taraiela me laghe uela va, “Taumattu ngakapaaili etoa la paepaeo!”

<sup>38</sup> Iesu ghe liula me ghe uela va, “Ita lao tale mene kasina masaliki kalakalangina. Aghaloanna tani laa ppooaa tee etaira, poli mausina avalua o me aghe mae sio.”<sup>39</sup> Eghe kasu ekapa seela tale masaliki eGalili me ghe poppooaa tale aleira nivelu eitauaa, me ghe tiutuu velu raroai etoa ta taumattu ngatoa.

**Iesu ghe ghelei emasinala  
tau tasussukuna ateva**

*(Mat 8:1-4; Luk 5:12-16)*

<sup>40</sup> Kateva taita tau tasussukuna ia ghe mae sio ta Iesu, me namungaili ta ghe kolomila Iesu. Taita ateva oia ghe suuiaala ta liue kkena Iesu, me ghe uela va, “Marova ualoanna, uroo tani ghelei eraarangsanaieghi ta mata God.”

<sup>41</sup> Iesu ghe alousiusi teeiela, me ghe saooa saela nimane atelange etana me ghe uela va, “Aghaloanna. Angu raaranganala!”<sup>42</sup> Katengaata ta tasusuku eteva ghe kapala, me taita ateva ghe masinala.

<sup>43</sup> Iesu ghe sungiela va ekasu parasi, me eghe aulia ngasarasarakana va,<sup>44</sup> “Urau mene auliaa voto elutula etam. Ulaa me ulaa ghasungainio ta pristi eteva, me ughelei aiaavusuvusuena tani apasunga va vilikim ange raaranganala, nongina Moses ghe auliaala. Me taumattu ngatoa aue la kila va angu raaranganala.”<sup>45</sup> Me nau taita ateva ghe kupi ghoala eghe auliaala ta taumattu ngatoa sa ateva ghe lutula etana. Ghe kiukiuaa ngakapa seela tale masaliki ghe lao sio etana. Liuna avalua o me Iesu karika ghe mene laolao tale tummatavanga, ta ghe nim tokatoka tale voto atoa karika righi taumattu etaira, me taumattu ngatoa tale isaa akapa masaliki laghe mae taatarai.

### Iesu ghe ghelei emasinala tangorengorena ateva

(Mat 9:1-8; Luk 5:17-26)

**2** Kasina nau ghe lao sio, nau Iesu ghe mene lao sio tale masalikina atea eKapenium, taumattu ngatoa laghe nongola va etokatoka elome tale ale ateva. <sup>2</sup>Taumattu ngatoa laghe pasula tale ale ateva, eghe ghoala arau etapaa ngatamana, me Iesu ghe poppooa inangarina God. <sup>3</sup>Katoa taumattu laghe maeaa sio kateva taita, tangorengorena ia, ta Iesu. Ghaata etaira laghe saue mae sio. <sup>4</sup>Pasueili ale ateva, me karika laghe rooroo tani laoa ngakalakalaa tau sessa ateva ta Iesu. Liuna avalua o me laghe saula tau sessa ateva, me laghe saeainiela tale pungani ngale ateva, Iesu ghe tokatoka elome etana. Laghe ghaa vella kasina aiaakou tale pungani ngale ateva, me laghe tau siola tau sessa ateva tale komona atea elome tale ale ateva. <sup>5</sup>Iesu ghe tarala uneira niaikaia va namuu, me ghe uela ta tau sessa ateva va, “Natughu, kalum ssavoto ange kapala.”

<sup>6</sup>Katoa tani tau ngai aapasunga tale inangari nipaopao laghe tokatoka elome tale ale ateva laghe nongola, me laghe aannaa va, <sup>7</sup>“Vaalua me eaippooa ngavalua o? Ange ghaala liuna ateva God! Karika teva erooroo tani kkaluaa ssavoto, ta God nonga!”

<sup>8</sup>Arovaeaata ta Iesu ghe kilala tale urunguitanina ateva, me ghe uela etaira va, “Vaalua me am nanna ngavalua o elome etaimim? <sup>9</sup>Eaa ateva voto malumina tani auliaa ta tangorengorena? Tani ue va, ‘Kalum ssavoto ange kapala’ o tani ue va, ‘Tingina saela, me usau komom me ukasu?’ <sup>10</sup>Me aghaloanna va am tara kila, va Natuna ateva Taumattu ngateva matuutuliena teeia tani kkaluaa ssavoto tale kosa ateva...” Vara me Iesu ghe taatara lao sio tale tau-

matu ngateva tangorengorena ia, me ghe uela va, <sup>11</sup>“Aghaauliaa ta ngetam va tingina saela, me usau komom, me ulao tanganuem.” <sup>12</sup>Taumattu ngateva ghe tingina saela, me ghe saula komona, me ghe kasula. Ila akapa taumattu ngatoa laghe tarala sa ateva ghe lutula, laghe soghiaala, me laghe tau saela ararina atea God, me laghe uela va, “Emua arau karika ami ghe taatara rigi voto avalua oia, karikaaili!”

### Iesu ghe kolola Livae

(Mat 9:9-13; Luk 5:27-32)

<sup>13</sup>Iesu ghe kupi ghoala tale ale ateva, me ghe kasukasu elaolao elosamarra tale kinatama ateo talia ngateae. Oroieili taumattu ngatoa laghe mene mae sio tani nongoa nau ghe aapasunga voto. <sup>14</sup>Eghe kasukasu elaolao me ghe tarala Livae, natuna Alpeas, ghe tokatoka tale natu ngale arighi aighaa takis ia, me Iesu ghe uela etana va, “Mae usieghi.” Ghe tingina saela, me ghe usila Iesu.

<sup>15</sup>Nau Iesu ghe namanama tanganue Livae, oroi ila taumattu ngatoa aighaa takis ila, me tau ssavoto atoa, laghe lao sio tani namanama tee Iesu me kapuna disaepolo atoa, poli oroi ila lo atoa laghe ususia. <sup>16</sup>Katoa tana taumattu tau ngai aapasunga ila tale inangari nipaopao, me taumattu tale Paresi ila, laghe tarala Iesu ghe namanama tee tau ngai ghelei ssavoto atoa me tau ngai ghaa takis atoa. Laghe uela ta kapuna disaepolo atoa va, “Vaalua me enamanama tee tau ngai ghaa takis me tau ssavoto atoa?”

<sup>17</sup>Iesu ghe nongola inangariira me ghe uela ta tau ngai aapasunga ngatoa va, “Lo atoa masina ila karika la ghaloanna niaisausi. Tau sessa nonga atoa la laa taatara dokta. Karika aghe sio mae tani kolo ghulughuluena atoa taumattu. Aghe sio mae tani kolo tau ssavoto atoa.”

### Inangarina Iesu me gheeieaaira aJiu etoa karika elaolao aitaaua

(Mat 9:14-17; Luk 5:33-39)

<sup>18</sup> Kateva nau kapuna disaepolo atoa Jon me Paresi etoa laghe naenae. Katoa tana taumattu laghe mae sio ta Iesu, me laghe kolomila va, “Vaaluva me kapuna disaepolo atoa Jon me kapuira disaepolo tee atoa Paresi etoa la naenae, me kapum atoa disaepolo karika?”

<sup>19</sup> Iesu ghe uela va, “Vaaluva kapuna atoa taumattu ngateva ange anna tani lai la ghele nae? Karika la rooroo, nau taita ateva ange aloanna tani lai me etokatoke tee kapuna atoa, karika va la naenae. <sup>20</sup> Nau eteva aue emae me la ghaa velu taita ateva, ia o nau eteva aue la nae.

<sup>21</sup> “Karika teva eghaaghaa tuku ouna ateva kalio, me evabbai teva tuku pokane aiso. Marova eghelei me nau eporaia, tuku ouna ateva aue ghauna, me eghelei mara ateva me mara ateva emene namuu. <sup>22</sup> Me karika teva taumattu etottoli kaai ouna uaeni tale pokane ateva aikaai. Marova eghelei evalua o, aue ouna uaeni eghelei polaki aikaai manu eteva, me aue ilalua akapa uaeni eteva me aikaaina ateva aue lulu peisaane. Karika, la kaokao ouna uaeni tale ouna aikaai.”

### Vau tale nau manga ateva

(Mat 12:1-8; Luk 6:1-5)

<sup>23</sup> Kateva nau manga, Iesu ghe kasu valaala tale utana atingiu, utani uiti ia. Kapuna disaepolo atoa laghe kasukasu eitaaua teeia, me laghe ghaala kasina tani uiti me laghe namala. <sup>24</sup> Paresi etoa laghe uela ta Iesu va, “Tarala, vaaluva me la ghelei voto o, inangari nipaopao eue va karika masina tani ghelei tale nau manga ateva?”

<sup>25</sup> Iesu ghe liula inangariira me ghe uela va, “Vaaluva, karika am ghe ritila

kiukiuna atea Deivit ghe gheleila, nau ia me kapuna atoa laghe maloola? <sup>26</sup> Nau ta Abiata, namuu ia tale pristi etoa, Deivit ghe kupi ssola tale alena ateva God, me ghe namala verete laghe amangala, pristi etoa nonga la rooroo tani nama, me ghe taula kasina ta kapuna atoa.”

<sup>27</sup> Iesu ghe mene auliaa tee lao sio va, “God ghe gheleila nau manga ateva mausi taumattu ngatoa, karika God ghe gheleila taumattu ngatoa mausi nau manga ateva. <sup>28</sup> Liuna avalua o me Natuna ateva Taumattu ngateva ia tee Vau ia tale nau manga ateva.”

### Iesu ghe ghelei emasinala taumattu ngateva tale nau manga ateva

(Mat 12:9-14; Luk 6:6-11)

**3** Iesu ghe mene kupi ssola tale kateva ale nivelu eitaaua, me kateva taita ghe tokatoka, katelange nimane matena ia. <sup>2</sup> Katoa tau ngai ssateena Iesu mataira ghe laolao nonga ta Iesu va, Iesu aue eghelei emasinaia tale nau manga ateva, o karika. Laghe anna va marova eghelei emasinaia, aue la laoa Iesu tale niaisakei. <sup>3</sup> Iesu ghe uela ta taita ateva nimane atelange matena ia va, “Tingina saela, me umae toko.”

<sup>4</sup> Me Iesu ghe kolomilala va, “Vaaluva, tale inangari nipaopao, ita rooroo tani ghelei masi niuungu ta nau manga ateva, o tani ghelei sesa niuungu? Ita rooroo tani sausi mene kateva taumattu me erooroo tani toka amasina, o ita uvi ematea?” Tau ngai ssateena atoa Iesu karika laghe liu poila inangarina Iesu.

<sup>5</sup> Iesu ghe aitaria seela ta taumattu ngatoa me ghe sessaieia. Eghe tarala va karika righi niaielousi tale urunguitanira, liuna avalua o me karika ghe masinala ta ngetana. Eghe uela ta taita ateva va, “Korosila nimam atelange.” Taita ateva ghe korosila nimane atelange, me ghe masinala. <sup>6</sup> Nau Paresi etoa laghe

tarala voto o ghe lutula, laghe kupi ghoala, me laghe lao sio tani tara kapuna atoa Herot. Laghe ailoeaala salana vaalua la rooroo tani uvi emate Iesu.

### Oroieili taumattu ngatoa laghe aimuli teela Iesu

<sup>7</sup> Iesu me kapuna disaepolo atoa laghe kasu vulila voto ateva o, me laghe lao sio tale ateo talia ngateae eGalili. Tana taumattu ngatoa laghe aimuli teeiela. Taumattu tale distriki eteva eGalili, eJiudia, <sup>8</sup> eJerusalem, distriki eteva eIdumea, me pai kativilau tale ateo atea eJodan, me tale anue masau eTaer me Saedon, laghe nongola voto Iesu ghe gheleila, me oroieili taumattu laghe mene mae sio ta Iesu. <sup>9</sup> Iesu ghe uela ta kapuna disaepolo atoa va, “Am aimonomosiaala teva paanaka, poli oroieili taumattu ngatoa aue la mae, me aue la ghaisiriki tani mae taraieghi.” <sup>10</sup> Poli ang ghe ghelei emasinala oroieili tau sessa atoa, liuna avalua o me oroi tau sessa atoa laghe aloanna tani mae akalakalaa me tani poso Iesu. <sup>11</sup> Nau ekapa atoa lo atoa raroai etoa laghe tokatoka ta ngetaira laghe taatara Iesu, laghe tuuturru ta liue kkena me laghe samasama atingina me laghe ue va, “Io natuna io God.” <sup>12</sup> Iesu ghe aulia ngakorokorongana ta ngetaira va la rau mene laa ghaotu va ia see.

### Iesu ghe kolola kasangaulu ghalua apostolo

(Mat 10:1-4; Luk 6:12-16)

<sup>13</sup> Iesu ghe saela tale motouru. Eghe kolola lo atoa ghe aloannaailila, me laghe mae sio ta ngetana. <sup>14</sup> Eghe sui etoongala kasangaulu ghalua (12) taumattu va ila la toka aitauaa teeia, me ghe aselala va apostolo ila. Aue esungila tani ppoa ngakapa see inangarina ateva God, <sup>15</sup> me aue etau lao

sarasarakana tani suu velu raroai etoa. <sup>16</sup> Eghe kolola kasangaulu ghalua: Saemon ta kateva, Iesu ghe aseala va Pita etana; <sup>17</sup> eghe kolo teela Jeimis me Jon, natuna ilalua Sebedi (eghe asela araririrua aluae ta Boanerges, malloeana va “taumattu nongina palapalanga ateva eaangari”); <sup>18</sup> eghe kolo teela Andru, Pilip, Batolomiu, Matiu, Tomas, Jeimis natuna ia Alpeas, Tadius, Saemon laghe aseala va Selot ia<sup>‡</sup>, <sup>19</sup> me Jiudas Iskarlot, ia akena ghe tau lao Iesu ta nimaira tau ngai sateena atoa.

### Iesu me Belsibul

(Mat 12:22-32; Luk 11:14-23; 12:10)

<sup>20</sup> Iesu eghe lao sio tale ale ateva eghe tokatoka etana, me poli tana taumattu ngatoa laghe mene mae sio tani velu eitauaa, Iesu me kapuna disaepolo atoa karika righi nauira tani namanama. <sup>21</sup> Kapuna atoa Iesu laghe nongola voto eghe poppooaa me ghe ghelei, me laghe mae sio tani kune velua, ta laghe ue va, “Ang ghe veeveenala.”

<sup>22</sup> Katoa tau ngai aapasunga tale inangari nipaopao laghe kasula eJerusalem me laghe ue va, “Belsibul ange kupiela. Etiutiu velu raroai etoa tale sarasarakaniaane Belsibul, ia namuu ia tale raroai etoa.”

<sup>23</sup> Iesu ghe kolo aitaueinilala me ghe auliaala kateae kiukiu niaimatoonga. Eghe uela va, “Vaalua, Satana erooroo tani sungi velu Satana? <sup>24</sup> Marova taumattu tale kateva patunganua la tam tingina aitauaa, me niaiui etea elutu, karika aue la korokorongana. <sup>25</sup> Marova taumattu tale ale ateva la tam tingina aitauaa me niaiui elutu, karika aue la korokorongana. <sup>26</sup> Me marova Satana essa tee kapuna atoa aue ghalua ila, me eghalua atoka ila, karika aue la korokorongana. Aue la ruu ekilanga. <sup>27</sup> Karika

<sup>‡</sup>3:18 Selot Uara Malloeana inangari

teva taumattu erooroo tani kupi sso tanguanue taumattu ngateva sarasarakana ia me eghaa peina. Marova ealoanna, eiri etoka tau ngalena ateva, me evira ghaa peina.<sup>28</sup> Aghaaulia ngakoronna etaimim va God aue ekkaluua isaa akapa ssvoto me sesa ngingangari taumattu epoppooaa saasakia tee God.<sup>29</sup> Me marova taumattu eauliaa saasakia tale Spirit Manga ateva, God karika aue ekkaluua isaa oia me auena. Ia oia lo ateva ssvoto aue etoka ta ngetana nau ekapa atoa.”<sup>30</sup> Iesu ghe auliaala poli laghe ue va, “Raroai eteva etokatoka etana.”

### **Kinna Iesu me kapuna atoa**

*(Mat 12:46-50; Luk 8:19-21)*

<sup>31</sup> Kinna Iesu me kapuna taita atoa laghe rekatala, me laghe nim suula inangari va eghoa taraila.<sup>32</sup> Oroieili taumattu ngatoa laghe tokatoka talieinia, me laghe uela ta ngetana va, “Kinam me kapum taita atoa me vause atoa eleka la paepaeo.”

<sup>33</sup> Iesu ghe liula me ghe uela va, “See ia kinaghi me see ila kapughu taita atoa?”<sup>34</sup> Eghe aitara seela tale taumattu ghe taatalia ngatokaia, me ghe uela va, “Taumattu oia kinaghi me kapughu ila!”<sup>35</sup> See eaimuli tee nannaane Tamaghi, ia kapughu taita ia me kapughu vause ia me kinaghi ia.”

### **Kiukiu niaimatoonga tale tau ngai pasa katu ue ngai eteva**

*(Mat 13:1-9; Luk 8:4-8)*

**4** Kateva nau Iesu ghe mene tiuaala tani apasunga tale sama ateo talia ngateae, me tana taumattu ngatoa laghe mae sio tani mene velu eitauaa. Poli oroieili taumattu, Iesu ghe saesaela tale paanaka ateva, me ghe vukala ghoala elamana, me ghe toka siola, me taumattu ngatoa laghe tinginala

elosamarra.<sup>2</sup> Iesu ghe aapasunga oroieili voto tale kiukiu niaimatoonga. Ghe ue ta ngetaira va,<sup>3</sup> “Am nongola! Tau ngai pasa katu ue ngai eteva ghe lao sio tani pasa aina katu ue ngai.<sup>4</sup> Nau eteva ghe kaokaoaala katu ue ngai, kasina ghe katuula tapaa salana, me ghila atoa laghe namala.<sup>5</sup> Kasina tana katu ue ngai ghe katuula tale voto ateva atu ia, karika oroi kosa, gharovaeata ta ghe pinosala, poli karika lluse ia.<sup>6</sup> Nau eteva sinaka ateva ghe saela, eghe sinaki ematela, poli oane karika ghe sio liula ta euu atu ia.<sup>7</sup> Kasina ghe katuula tale voto ateva uasa karasa atoa ta ngetana. Nau laghe pinosala, uasa karasa atoa laghe kavililala, karika laghe kunela.<sup>8</sup> Kasina katu ue ngai ghe katuula tale masi kosa. Nau laghe pinosala laghe kuneaala uene, kasina ghe kuneaala kotalungaulu (30), kasina ghaonomongaulu (60), me kasina kateva ai (100).”<sup>9</sup> Vara me ghe uela va, “See talingane manee aue enongo isaa oia inangari!”

### **Mausina kiukiu niaimatoonga**

*(Mat 13:10-17; Luk 8:9-10)*

<sup>10</sup> Nau eteva Iesu nonga, me kasan-gaulu ghalua kapuna disaepolo, me mene katoa tana taumattu laghe tokatoka, me laghe kolomila Iesu tale mal-loeana kiukiu niaimatoonga.<sup>11</sup> Iesu ghe liula me ghe uela va, “God ang ghe apasungaala etaimim voto eaaisulia tale ararimangalina ateva God, me tale taumattu ngeleka, isaa akapa voto aghauliaa tale kiukiu niaimatoonga.<sup>12</sup> Liuna avalua o me inangari tale Uru ngai Manga ateva aue elutu ekoronna, poli, ““aue la tara me karika aue la tara kila, aue la nongo me karika aloira aue emasaanga,

la rau aikolikolia, me God ekkaluaa kaluira ssavoto.”<sup>¶¶</sup>

**Iesu ghe auliaala malloeana  
kiukiu niaimatoongana atea**

(Mat 13:18-23; Luk 8:11-15)

<sup>13</sup>Vara me Iesu ghe uela va, “Karika aloimim ange masaangala kiukiu niaimatoongana atea? Vaalua aue aloimim emasaanga mene kasina kiukiu niaimatoonga? <sup>14</sup>Tau ngai pasa katu ue ngai eteva ghe pasala inangari eteva. <sup>15</sup>Kasina taumattu nongina katu ue ngai ghe katuula tale salana atikirighi. Nau la nongonongo inangarina ateva God, katengaata ta Satana emae ghaaghaa velu isaa o inangari. <sup>16</sup>Me katoa tana taumattu nongina katu ue ngai ghe katuula tale voto ateva atu ia. La nongonongo me la ghaaghaa me la masimasi. <sup>17</sup>Me nongina ai erighi ghauna oane karika esiosio liu, la masimasi nau eteva la nongonongo ta aitiutiu, va nau eteva la ghaaghaa maamatana mausi inangarina ateva God, la kaakatuu. <sup>18</sup>Lo tana katu ue ngai ghe katuula elome tale uasa karasa eaimatoonga taumattu enongonongo inangarina God, <sup>19</sup>me nannaane namungaili tale voto tale kosa ateva, nongina aloannaane tani ghaa viliki veu me mene kasina voto. Isaa o voto tale kosa ateva ekaakavili ekatuu inangarina ateva God me karika epiipinosa va emene kunea righi uene. <sup>20</sup>Me llo katu ue ngai ghe katuula tale masi kosa, eaimatoonga taumattu enongonongo inangarina ateva God me eaiesoa ta ngetana, me ekuukunea masi uene, kasina kotalungaulu, kasina ghaonomongaulu me kasina kateva ai.”

**Taumattu ngatoa karika la  
paapakeaa lam atea**

(Luk 8:16-18)

<sup>21</sup>Vara me Iesu ghe kolomilala va, “Vaalua! Nau eteva am ghaaghaa lam atea, am atoka pakeainia tale aikaai eteva me tale aisalo, o am avukalaie sae tale aivuuvukalane ateva? <sup>22</sup>Voto ghaine eaaisulia auena eotu tale tummatavanga, me isaa akapa voto taumattu eghelei aisulia, auena eotu. <sup>23</sup>Arova righi talingaimim, am nongo!”

<sup>24</sup>Iesu ghe mene auliaa tee lao sio va, “Inangari angam nongola, am nnaa parasi. Arova am ghelei emasina tale taumattu, Vau palepale aue emene liu ta ngetaimim, me aue emene saoa sae mene righi. <sup>25</sup>See righi voto etana, aue God emene taula, me lo ateva karika righi voto etana aue eghaa velu righi lutu voto etana.”

**Kiukiu niaimatoonga tale katu kone**

<sup>26</sup>Iesu ghe mene auliaa tee lao sio va, “Ararimangalina ateva God nongina taumattu ngateva ghe lao sio tani velu katu kone tale utana atingiu, <sup>27</sup>vara eleivoo taumattu ngateva ghe aseasekanua, me ellaa ghe laa ghelei mene kasina uunguaane, me katu kone ghe pinosala, me ghe namuula, me taumattu ngateva karika ghe kilala vaalua ghe pinosala me ghe namuula. <sup>28</sup>Kosa ateva nonga ghe apinosala — me emulina laghe kunela. Aitiutiu vullena ateva, vara me aikouna ateva, emulina ghe kuneaala uene. <sup>29</sup>Nau eteva utana atingiu ghe matuenna, taumattu ngateva ghe lao sio tani ngaro kone.”



**Kiukiu niaimatoonga tale  
katu ue ngai erighi (mastet)**

(*Mat 13:31-32; Luk 13:18-19*)

<sup>30</sup> Iesu ghe mene auliaala va, “Aue ita kolomi va, ‘Ararimangalina ateva God vaalue ia? Vaalua aue ita aimatoon-gainia?’ <sup>31</sup> Ia nongina katu ue ngai erighi la kolokoloa va mastet. Nau eteva la pasapasaia tapaa kosa, ghaunaaili ia. <sup>32</sup> Nau la pasapasaia epiipinosa me enaana-mungaili, karika nongina mene kasina katu ue ngai tale utana ateva. Laangina atoa namungaili ila, ghila atoa la rooro tani laa toka pallu.”

**Iesu ghe aulia ngaotula inangarina  
tale kiukiu niaimatoonga**

(*Mat 13:34-35*)

<sup>33</sup> Nau eteva Iesu ghe aulia ngaotu inangarina tale taumattu ngatoa, ghe auliaa tale kiukiu niaimatoonga ghe rooro tale nongonongoaira taumattu ngatoa. <sup>34</sup> Karika ghe aulia ngamasalika teva voto ta ghe auliaa nonga tale kiukiu niaimatoonga. Nau eteva ia nonga me kapuna disaepolo atoa, me ghe auliaala malloeana isaa o kiukiu niaimatoonga.

**Iesu ghe aippoaaala me paka  
ttasi eteva ghe kapala**

(*Mat 8:23-27; Luk 8:22-25*)

<sup>35</sup> Elo alai tale ia o nau eteva, Iesu ghe uela ta kapuna disaepolo atoa va, “Ita lao tale pai kativilau tale ateo talia ngateae.” <sup>36</sup> Laghe kasu vulila taumattu ngatoa, me laghe saesaela tale paanaka ateva Iesu ang ghe saesae atokala etana, me laghe tiu ghoala. Mene kasina tana paanaka tee laghe tiu ghoa aitaua teeilala. <sup>37</sup> Vara me paka ttasi eteva ghe tiuaala, me kotoo atoa laghe tiuaala tani sae tale paanaka ateva, me manu

eteva ang ghe pasupasu tale paanaka ateva. <sup>38</sup> Iesu ghe aseasekanua emuli tale paanaka ateva, ghe panukanala tale pilo ateva. Vara me laghe anguniela me laghe uela va, “Tisa, ghaisa ngaarighi ita vulu, me koti karika unannaa maamauluaaita va ita rau mate?”

<sup>39</sup> Iesu ghe anguula, me ghe paola ttasi eteva, me ghe uela ta kotoo atoa va, “Am matua avukalala!” me tasi eteva ghe ru-ula, me luei eteva ghe asola. <sup>40</sup> Vara me ghe kolomila kapuna disaepolo atoa va, “Vaalua me am maamatautu? Karika am ghe aikaia?”

<sup>41</sup> Laghe matautu saasakiaala, me laghe toka aikolomieinila va, “Saa taumattu ia taumattu ngateva oia, ta kotoo atoa me kuukuu eteva ngila nongo usilainiela?”

**Iesu ghe ghelei emasinala taumattu  
ngateva raroai etoa etana**

(*Mat 8:28-34; Luk 8:26-39*)

**5** Iesu me kapuna disaepolo atoa laghe laa rekata sio tale pai kativilau tale ateo talia ngateae, tanganueira aGerasa<sup>§§</sup> ngatoa. <sup>2</sup> Nau eteva ghe kkurela tale paanaka ateva, arovaeaata ta kateva taumattu raroai eteva ghe tokatoka etana ghe mae sio tani sou Iesu. Taita ateva oia ghe kupi ghoa mae tale voto ateva liu niaikkaiaa ia. <sup>3</sup> Eghe tokatoka tale isaa o voto, me karika teva taumattu ghe rooro tani iri etokaia, me karika laghe rooro tani iri etokaia tee tale sene. <sup>4</sup> Oroiaata laghe ghelei rungaa poi nimana me kekena tale sene, me ghe ghelei epatepate poli sarasarakanaaili ia. Karika teva taumattu ghe rooro tani poso atokaia. <sup>5</sup> Nau ekapaaili tale voo me llaa eghe tokatoka tale voto ateva liu niaikkaiaa ia me tale motouru. Eghe ovaova

§§5:1 *aGerasa* Kasina uru ngai laghe pitila, laghe ue va, *aGadara*, me kasina laghe ue va, *aGergesa*

atingina, me eghe saisai rirri vilikina tale atu matakeregana.

<sup>6</sup>Nau eghe tara amasau lao sio Iesu, eghe iloula tani laa sousou Iesu, me ghe suuiaala ta liue kkena Iesu. <sup>7</sup>Me namuu ta ghe samala me ghe uela va, "Iesu io natuna io God iaaili epona, sa ateva ualoanna tani gheleia etaghi? Aghaaulia ngakoronna tale ararina atea God va, karika umene ghelei saasakieinieghi." <sup>8</sup>Poli Iesu ang ghe aainasia tani ue etana va, "Raroai eteva, kupi vulu ghoa mae taumattu ngateva."

<sup>9</sup>Vara me Iesu ghe kolomiela va, "See ararim atea?"

Me ghe uela va, "Ararighi etea ta Li-ijen\*, poli karika va aghi nonga, ta oroi iemami." <sup>10</sup>Ghaisaata arau ghe kolomi esarasakanala Iesu va erau mene tiu vella va la kasu vuli ia o voto ateva.

<sup>11</sup>Karika masau tale tuku saesaena ateva tinaua mosu etingiu ghe tingina namanama. <sup>12</sup>Raroai etoa laghe kolomi esarasakanala Iesu va, "Usungi veluemami sae tale mosu etoa, me ami sae kupi etaira." <sup>13</sup>Iesu ghe tau vella raroai etoa laghe kupi vulu ghoa mae taita ateva, me laghe laa sae kupi sso tale mosu etoa. Katengaata ta tinaua atingiu ghe ttiroula, me laghe laa ghoa aoso velu sio tale vallae. Laghe katuu velu siola tale ateo talia ngateae, me laghe matela. Tin-ua atingiu eghe arropi ematelala ghe roola ghalua airari (2,000).

<sup>14</sup>Lo atoa laghe aitaraa mosu etoa laghe iloula. Laghe lao sio elo ale me tapaa ngutana, me laghe kiukiuuuala voto ghe lutula ta mene katoa taumattu, me taumattu ngatoa laghe mae sio tani tara voto ghe lutula. <sup>15</sup>Laghe rekatala ta Iesu me laghe tarala taumattu ngateva emua arau oroiaaili raroai etoa laghe tokatoka etana. Me ia oia, eghe aitiitii, me nannaane masina me eghe toka-

toka. Laghe taraiela, me laghe matau-tula. <sup>16</sup>Taumattu ngatoa laghe tarala voto Iesu ghe gheleila, me laghe kiukiuuuala taita ateva raroai etoa etana me Iesu ghe ghelei emasinaiela me voto ghe lutula tale tinaua mosu etingiu. <sup>17</sup>Nau eteva laghe nongola kiukiu, ila akapa laghe aulia ngasarasakanala ta Iesu va karika emene toka tale masalikiira atea, ta elao ppae tale kasina masaliki.

<sup>18</sup>Nau Iesu ang ghe saesae tale paanaka ateva, taita ateva Iesu ghe tiu vella raroai etoa etana ghe kolomi esarasakanala Iesu va, "Aghaloanna tani usio." <sup>19</sup>Iesu karika ghe annala. Ghe uela etana va, "Lao sio tanguem me ta kapum atoa. Ulaa ghaulaa voto Vau eteva ghe gheleila tani sausio, me maamasinaane etam." <sup>20</sup>Taita ateva ghe lao sio tanguena, me ghe tiuaala tani auliaa inangari me voto Iesu ghe gheleila etana tale Kasangaulae Masaliki Taatara. Taumattu ngakapa atoa laghe nongola, me laghe soghiaala isaa o voto.

### **Iesu ghe ghelei emasinala aliki vause arighi me vause namu ngateva**

*(Mat 9:18-26; Luk 8:40-56)*

<sup>21</sup>Nau Iesu ghe mene lao sio tale pai kativilau tale ateo talia ngateae, oroi taumattu ngatoa laghe mene aimuli teeiela, nau ghe tokatoka elosamarra. <sup>22</sup>Kateva namuu tale ale nivelu eitaua ngateva, ararina atea ta Jaeras, ghe mae sio me ghe suuiaala ta liue kkena Iesu, <sup>23</sup>me ghe kolomi esarasakanala Iesu va, "Natughu vause arighi gharighi tau emate. Aghaloannaaili va umae saooa nimam etana, me aue emasina me emene toka." <sup>24</sup>Iesu ghe usiela, me lalu ghe lao sio.

Oroieili taumattu ngatoa laghe usiui Iesu, me laghe tomtomua. <sup>25</sup>Kateva

\*5:9 *Liijen* Utara *Malloeana* inangari

vause ie tee elome tale taumattu o, rae ateva eghe iiloueinia ghe roola kasangaulu ghaluae (12) ninamanama. <sup>26</sup>Nau etoa ghe laa taatara dokta ngatoa. Laghe tootoonga tani sausia, me karika, ta laghe nim tautau lao oroi mmarikana. Unna viliki veu ghe nim kapakapa tani pae niaisausi, me karika ghe maamasina, me ang ghe nim sessaaili. <sup>27</sup>Nau eghe nongola kiukiuna Iesu, eghe mae sio tani paea, me ie tee eghe tiitingina elome tale taumattu ngatoa pasueili ıla me laghe tomtom Iesu. Eghe lao akalakalangina sio emuli ta Iesu, me ghe posola unna aiaasae ngeleka ateva Iesu, <sup>28</sup>me eghe annaala va, “Marova anim poso unna aiaasae ngeleka ateva, aue amasina.” <sup>29</sup>Katengaata ta rae ateva ghe iiloueinia ghe ruula, me ghe ateateaala va ghe masinala.

<sup>30</sup>Katengaata ta Iesu ghe ateateaala va kasina tani sarasarakaniaane tani ghelei emasina taumattu ghe kasula etana. Liuna avalua o me ghe kiriela me ghe uela va, “See eposola uneghi aiaasae ngeleka ateva?”

<sup>31</sup>Kapuna disaepolo atoa laghe uela va, “Karika utaatara tana taumattu ngatoa la tomtomuo? Vaalua me ukookolomi va see eposola unem aiaasae ngeleka ateva?”

<sup>32</sup>Iesu ghe kiriela me ghe aitaria see va see ghe posoala. <sup>33</sup>Me vause ateva ghe kilala voto ghe lutula etana, me ang ghe maamatautu, me ang ghe reterete. Eghe mae sio me ghe suuiaala ta liue kkena Iesu, me ghe aulia ngakapala voto ghe lutula etana. <sup>34</sup>Iesu ghe uela etana va, “Natughu, tale unem niaikaaiia etaghi angu masinala. Kasula, me urau mene anna poli anem isiki eteva ange kapala.”

<sup>35</sup>Iesu ghe aippooaa nonga me taumattu ngatoa, kapuna ıla namu ngat-eva tale ale nivelu eitaua ngateva, laghe rekatala. Laghe auliaala ta Jaeras va,

“Natum ange matela. Vaalua me uanna tani ghelei Tisa va eainongieinia tani lao tanganuem?”

<sup>36</sup>Iesu karika ghe nongo usilaala. Eghe uela ta namu ngateva va, “Urau mene matautu. Uaikaaiia nonga.”

<sup>37</sup>Pita, Jeimis me Jon, nengana Jeimis, ilotolu nonga lotolu ghe lao aitauaa teeie sio tanganue Jaeras, me eghe uela ta mene katoa taumattu va la rau mene usia. <sup>38</sup>Laghe laa rekata sio tanganue namu ngateva, me Iesu ghe nongola niaingalaaii eteae, me ghe tarala taumattu ngatoa laghe ngangngala anamungaili. <sup>39</sup>Eghe kupi ssola me ghe uela etaira va, “Vaalua me am ghelei niaingalaaii eteae, me am ngangngala atingina? Alike eteva oia karika va ematela. Enim asesekanua.” <sup>40</sup>Laghe rrila me laghe kangaala Iesu.

Eghe rrila me ghe sungi velu ekapaila ghoala eleka, me ghe kolola nonga kinna me tamane vause arighi me kapuna disaepolo kotolu, me laghe kupi ssola tale rum atiulu aliki eteva eghe asoaso etana. <sup>41</sup>Eghe kune siola nimane aliki eteva me ghe uela va, “*Talita kum!*” (malloeanina va, “Alike vause arighi, aghauliaa etam va totula!”) <sup>42</sup>Katengaata ta aliki vause arighi ghe totu saela, me ghe kasukasula. Nau laghe tarala voto o ghe lutula, laghe soghiaala. Alike vause arighi oia anna ninamanama kasangaulu ghaluae (12). <sup>43</sup>Iesu ghe aulia ngasarasakanala etaira va karika la mene laa auliaa see voto oia ange lutula. Eghe uela va la tau lao righi inana, me aliki vause arighi enama.

### **ANasareti etoa laghe liula viliira ta Iesu**

(Mat 13:53-58; Luk 4:16-30)

**6** Iesu ghe kasu vulila masaliki eteae o, me ghe lao sio tale masalikina tunga ateae. Kapuna disaepolo atoa laghe aimuli teeieala. <sup>2</sup>Vara nau manga ateva,

me ghe tiuaala tani apasunga voto tale taumattu ngatoa tale ale nivelu eitaua ngateva. Oroieili taumattu laghe nongola inangari, me laghe mene ounala tani nongo, me laghe uela va, “Ia oia taumattu ngateva, eaa ghe ghaala inangari oia? Vaalua ghe ghaala ase alo-masaanga ateva oia? Me vaalua me egheelei tee mirikolo sarasarakanaaili? <sup>3</sup>Nim tau ngai atulu ale ia, nenge? Natuna ia Meri tue me nenga ila me Jeimis, Josep,<sup>†</sup> Jiuda me Saemon. Kapuna vause atoa la tokatoka teeita.” Laghe aaulia ngavalua o poli ghe sessaila etana.

<sup>4</sup>Iesu ghe uela etaira va, “Propete ateva ararina atea tale isaa akapa masaliki. Me tale masalikina tuunga atea, me elome tale mangalina atoa, me tale alena tuunga ateva, karika teae ararina.”

<sup>5</sup>Karika ghe rooro tani ghelei righi mirikolo okae. Eghe nim saoaala nimane tale taumattu karika oroi, me ghe ghelei emasinailala. <sup>6</sup>Eghe soghiaala uneira ni-aiakaia ta ngetana karika namuu.

### **Iesu ghe tau lao sio niuungu ta kasangaulu ghalua disaepolo**

*(Mat 10:1, 5-15; Luk 9:1-6)*

Me ghe lao ppae sio tale kasina masaliki tani apasunga. <sup>7</sup>Me ghe kolo aitauaala kasangaulu ghalua (12) disaepolo, me ghe sungilala ghalua ghalua. Ghe tau lao sio matuutuliena tani tiu velu raroai ta taumattu ngatoa.

<sup>8</sup>Me ghe uela etaira va, “Am ghaa aikkatuluimim me am rau mene ghaa mene righi voto. Am rau mene ghaa righi inana, aikakkaai me righi viliki veu tale aikaai viliki veu. <sup>9</sup>Am asae aikasukasu, me karika am mene ghaa ghalua aisoe. <sup>10</sup>Arova am rekata tale kateae masaliki, me am toka tale lo ateva ale, am toka o, lomosina ta am kasu vuli lo atea

o masaliki. <sup>11</sup>Me arova kateae masaliki etam ghaaiem, me karika la ghaloanna tani nongo inangariimim, am kasu. Me nau eteva ngam aloanna tani kasu, am rariaa velu au kosa ta kekeimim, me aue la kila va voto la gheelei karika masina.”

<sup>12</sup>Disaepolo atoa laghe kasula tani ppooaa tale taumattu ngatoa va la nna ngaioghioghiaa. <sup>13</sup>Laghe tiutiu velu raroai, me laghe raarariaa oeli tale tau sessa atoa, me laghe gheelei emasinaila.

### **Herot ghe nongola kiukiuna Iesu**

*(Mat 14:1-12; Luk 9:7-9)*

<sup>14</sup>King Herot ghe nongola kiukiu tale isaa o niuungu poli taumattu ngakapa atoa laghe kiukiuaa see Iesu, me katoa laghe uela va, “Jon tau ngai aasuu eteva ange totula tale nimate, liuna avalua o me sarasarakana ia tani ghelei mirikolo.”

<sup>15</sup>Me katoa taumattu laghe ue va, “Ia Elaija.”

Mene katoa laghe ue va, “Ia propete ia, nongina mene katoa propete emua arau.”

<sup>16</sup>Nau Herot ghe nongola ghe uela va, “Jon, ia o aghe sai pulela alona atiulu, ange mene sakesakela!”

### **Matemateane Jon tau ngai aasuu eteva**

<sup>17</sup>Ia Herot ghe suula inangari me laghe poso atokala Jon. Laghe iriela me laghe atokaiela tale ale mata voovoo mausi Herodias, vausenna ateva tuena ta Pilip, ghe mene lai sariela. <sup>18</sup>Poli Jon ghe uela ta Herot va, “Inangari nipaopao ateva eue va karika masina ta ughe mene lai sarila vausenna ateva tuem.” <sup>19</sup>Herodias ghe sessaieiliela ta Jon, me ghe aloannaailila tani uvi ematea, me karika ghe rooro. <sup>20</sup>Herot ghe kaakaarasi tani aitaraa Jon, poli

<sup>†</sup>6:3 Josep Tale inangari nge Grik, *Joses*

ghe maamatautangailiia ta ghe kilakila va Jon ghulughuluena ia me manga ia. Nau ghe nongonongo ta ghe aipooaa, ghe nannangaili me nannaane ghe maamate,<sup>‡</sup> me ghe aloannaaili tani nongo.

<sup>21</sup> Masi nau eteva ghe rekatala ta Herodias nau Herot ghe gheleila kinatama ninamanama atea eaimatoonga nau eteva ghe lutula. Ghe gheleila ninamanama atea ta namu ngatoa la uungu ta gavman, namuu ta soldia ngatoa, me namu nge Galili etoa. <sup>22</sup> Laghe toka namanama, me natuna aliki vause ateva Herodias ghe kupi ssola tani ssiua. Herot me lo atoa laghe namanama laghe masimasiangailila nissiiua ngateae.

Herot ghe uela ta aliki vause ateva o va, “Sa ateva voto arova ukolomia etaghi, aue atau aatu.” <sup>23</sup> Herot ghe auli-aala inangari nialokoi va, “Sa ateva voto arova ukolomi aue atau aatu. Arova uue va atau aatu kativilau tale peighi, aue atau aatu.”

<sup>24</sup> Aliko vause ateva ghe kupi ghoala, me ghe lao sio tani kolomi kinna va, “Sa ateva voto asso kolomi king etana?”

Kinna ghe uela va, “Uso ue va, ‘Aghaloanna uruna ateva Jon tau ngai aasuu eteva.’”

<sup>25</sup> Arovaeata ta aliki vause ateva ghe kiri ssola ta king me ghe uela va, “Ghaine arau aghaloanna uruna ateva Jon tau ngai aasuu eteva tale tivilau terei.”

<sup>26</sup> King ghe nongola me ghe alousiueilila. Me poli ange gheleila inangari nialokoi, me karika ghe aloanna tani palata ta mata namu ngatoa, karika ghe roola tani nongo vulu inangarina natuna Herodias. <sup>27</sup> King karika ghe aitoila. Ghe suula soldia ngateva tani laa ghaa uruna ateva Jon. Soldia ngateva ghe lao sio tale ale mata voovoo me ghe sai pulela alona atiulu Jon. <sup>28</sup> Ghe sau mae sio uruna at-

eva Jon tale terei etivilau me ghe taue lao sio ta aliki vause ateva. Me aliki vause ateva ghe laoinie sio ta kinna. <sup>29</sup> Kapuna disaepolo atoa Jon laghe nongola isaa o voto Herot ghe gheleila ta Jon. Laghe lao sio tani ghaa vaulanna ateva Jon, me laghe lao sio tani kaieinia.

### Iesu ghe anginila 5,000 taumattu

(*Mat 14:13-21; Luk 9:10-17; Jon 6:1-14*)

<sup>30</sup> Apostolo atoa laghe oghi mae sio, me laghe toka teela Iesu. Laghe kiuk-iuaala voto laghe gheleila me inangari laghe auliaala ta taumattu ngatoa.

<sup>31</sup> Iesu me kapuna apostolo atoa karika righi nauira tani namanama, poli oroieili taumattu ngatoa laghe mae taatara Iesu me laghe mene kasukas. Liuna avalua o me Iesu ghe uela etaira va, “Ita lao ta pai kativilau karika righi taumattu etana, me am laa ghainoana.”

<sup>32</sup> Ila nonga laghe kasula tale olimoira paanaka ateva tani lao tale vaara. <sup>33</sup> Taumattu ngatoa laghe tarailala ta laghe tiu ghoala, me laghe kilailala. Me oroi taumattu tale kateae kateae masaliki laghe kilala voto ateva laghe laolao etana, me laghe kasu emuemuela tani lao. <sup>34</sup> Nau Iesu ghe ssola elae, ghe tarala oroieili taumattu ngatoa. Ghe alousiusi teeilala, poli ila nongina sipsipi etoa karika teva aitoiira, me ghe tiuaala tani apasunga oroi voto etaira.

<sup>35</sup> Nau sinaka ateva ang ghe suusuu, kapuna disaepolo atoa laghe lao sio ta ngetana, me laghe uela va, “Ange voovoo, me voto ateva oia nim vaara ia.

<sup>36</sup> Sungi vellala me la lao tale righi masaliki kalakalangina, me la laa poli righi inana me la nama.”

<sup>37</sup> Iesu ghe liula me ghe uela va, “Am taula righi inana, me la nama.”

<sup>‡</sup>6:20 *ghe nannangaili me nannaane ghe maamate* Kasina uru ngai laghe pitila, laghe ue va, *ghe ghelele oroi voto*

Laghe uela va, “Ualoanna va ami laa poliaa velu ghalua ai silva koen<sup>f</sup> tani poli inana tani anginila?”

<sup>38</sup> Iesu ghe uela etaira va, “Ghaisa verete? Am laa tara.”

Nau laghe lao sio, laghe tarala verete ghalima me tee kko alua.

<sup>39</sup> Iesu ghe uela ta taumattu ngakapa atoa va, “Am laa toka sio tale rarrasa, me am toka tale uela.” <sup>40</sup> Laghe tokala katoa kateva ai (100), me katoa ghalimangaulu (50). <sup>41</sup> Emulina Iesu ghe ghaala verete ghalima me kko alua, me ghe taatara saela epona liu me ghe kaili emasina saela, me ghe piri polapolakila, me ghe tiuaala tani taula ta kapuna disaepolo atoa va la taula. Me ghe koita teela kko alua. <sup>42</sup> Ila akapa ghe ssoilala nau laghe namanamala.

<sup>43</sup> Emulina kapuna disaepolo atoa laghe kaai esokosokoiaala tapiri verete me tapiri kko. Laghe kaaila laka erooro kasangaulu ghaluae (12). <sup>44</sup> Taita atoa laghe namala verete ghe roola ghalima airiri (5,000).

### **Iesu ghe kasula epona tale paamanu**

(*Mat 14:22-33; Jon 6:15-21*)

<sup>45</sup> Arovaeaata ta Iesu ghe auliaala va kapuna disaepolo atoa laghe aikaaila tale paanaka ateva, me la muemue lao eBetsaida ta pai kativilau, me ia etoka me esungi velu mua taumattu ngatoa. <sup>46</sup> Vara ghe suu vella taumattu ngatoa, me ghe saela tale motouru tani looloo sae.

<sup>47</sup> Nau ang ghe voola, paanaka ateva ang ghe rekatala elome tale ateo talia ngateae, me Iesu nonga elae. <sup>48</sup> Ghe taatara va disaepolo atoa laghe oseose poi, me kuukuu eteva ghe aaghila. Auena ghe pai, me Iesu ang ghe soosokotila. Ghe kasukasu epona tale paamanu eteva, me ang ghe anna tani

laua. <sup>49</sup> Nau disaepolo atoa laghe tarala Iesu ghe kasukasu epona tale paamanu eteva, laghe anna va raroaina ia teva taumattu, me ange ila ghe aipiia, <sup>50</sup> poli ila akapa laghe taraiela me laghe matautueiila.

Arovaeaata ta Iesu ghe sama teeilala, me ghe uela va, “Am rau mene anna, ta aghi oia. Am rau mene matautu.” <sup>51</sup> Me ghe aikaai teeilala, me kuukuu eteva ghe kapala, me disaepolo atoa laghe soghiala saasakiaala ia o voto ateva ghe lutula. <sup>52</sup> Ta poli nannaaira karika marekate tani anna me tani kila amasina malloeana verete.

### **Iesu ghe ghelei emasinala oroi tau sessa eGenesaret**

(*Mat 14:34-36*)

<sup>53</sup> Iesu me kapuna disaepolo laghe ose longotila me laghe kautuula tale distriki eteva eGenesaret, me laghe rekati evukalala olimoira paanaka ateva. <sup>54</sup> Nau eteva laghe kkurela tale olimoira paanaka ateva, taumattu ngatoa laghe tara kilala Iesu, <sup>55</sup> me laghe ilou ekapa seela eGenesaret tani laa ghauliaa ta mene katoa va Iesu ange rekataala. Me tau sessa atoa, laghe sausau teeila me komoira tani laoainila kona laghe nongonongo nongina eaa Iesu ghe tokatoka. <sup>56</sup> Nau Iesu ghe laolao tale masaliki pisike me namuu masaliki me tale voto karika oroi masaliki etana, tau sessa atoa laghe aalokoila tale maketi, me laghe kookolomi esarasarakana Iesu, va erooro va la poso sama ghinnanina, me lo atoa laghe posoposoa laghe maamasina.

### **Voto tuvuiru atoa laghe apasungaala**

(*Mat 15:1-20*)

**7** Paresi etoa me katoa tana tau ngai aapasunga tale inangari nipaopao,

<sup>f</sup>6:37 *silva koen* Silva koen ativilau (denarius) erooro aipolina kateva nau.

laghe kasula eJerusalem, laghe lao sio me laghe tomia Iesu. <sup>2</sup>Laghe tarala va katoa tana disaepolo kapuna ila Iesu, karika laghe porala nimaira, me laghe tam uusilaa salana tani ghelei me la raarangisana. <sup>3</sup>(Poli Paresi etoa me ila akapa aJiu etoa laghe aimulisi tee voto tuvuiro atoa laghe apasungala, laghe tam rooro tani namanama arova la tam pora amasina nimaira. <sup>4</sup>Inana laghe polipoli tale maketi, karika la rooro tani nama, ta laghe vira porapora me laghe namanama. Laghe aimuli tee mene kasina ase salana nongina vaalua tani pora airopi manu, me aiaku manu, me aituu inana.<sup>§</sup>)

<sup>5</sup>Paresi etoa me tau ngai aapasunga tale inangari nipaopao laghe kolomila Iesu va, “Vaalua me kapum disaepolo atoa la tam aimuli usi tee voto tuvuita atoa laghe apasungaala etaita va ita ghelei, me la nim namanama me karika la porapora nimaira?”

<sup>6</sup>Iesu ghe liula etaira me ghe uela va, “Koronnaaili voto Aisaea ghe auliaa nau ghe aulia ngamuemua alokoila eleiaaimim. Am nim auliaa voto me karika am aimuli tee. Ghe piti elokoila inangari ghe uela va,

‘Isaa oia taumattu la nim oneoneainaghi ta paaira

me urunguitaniira masaeili etaghi.

<sup>7</sup>Karika righi malloeana, uneira nikkaua poli la ghasungala llo nim kaluira taumattu ngatoa nonginaaili va kanna God.”<sup>\*\*</sup>

<sup>8</sup>Iesu ghe uela etaira va, “Am tam aimuli tee inangari nipaopao kanna God, ta am nongonongo uusilaa voto taumattu ngatoa laghe nim apasungala.

<sup>9</sup>“Muennaaili iem tani rati inangari nipaopao kanna God, me am annaa va am aimuli usi tee voto am, am gheeghelei.

<sup>10</sup>Moses ghe uela va, ‘Am oneoneaa kinaimim me tamaimim,’ me ‘Lo ateva ekaakasikiena tamana o kinna aue la uvi ematea.’<sup>††</sup> <sup>11</sup>Me am, am ue va taumattu ngateva erooroo tani aulia ngavalua toko ta kinna me tamana va, ‘Ghinanighi ekapaaili ngatau lao sio ta God, me karika ngaroola tani sausiemalua, ta isaa akapaaili ghinnanighi ange kalughu ghinnani nitau saela ta God.’ <sup>12</sup>Arova ange aulia ngavalua o, am gheeghelei rungainia va erau mene sausi tamana me kinna. <sup>13</sup>Tale isaa o salana, am gheelei inangarina God enim peisaane, ta am aimulisi tee auliaaira tuvuumim atoa. Oroieili mene kasina asease voto am gheelei.”

#### **Sa ateva etani ghelei taumattu ngateva me karika eraarangisana**

<sup>14</sup>Iesu ghe mene kolo aitauaala taumattu ngatoa me ghe uela etaira va, “Am nongoaghi, me aloimim emasaanga. <sup>15-16</sup>Karika va voto ekasukasu eleka me esosso tale taumattu ngateva va egheeleia etam raarangisana. Saa llo ekupikupi ghoa, isaa o voto egheelei taumattu ngateva etam raarangisana.”<sup>‡‡</sup>

<sup>17</sup>Nau ghe kasu vulila taumattu ngatoa me ghe lao sio elo ale, me kapuna disaepolo atoa laghe lao sio tani kolomia tale isaa o inangari niaimatoonga. <sup>18</sup>Iesu ghe uela etaira va, “Am tee karika am kilakila sa ateva aghaaulieinia? Karika righi voto ekasukasu eleka me esosso tale taumattu ngateva egheeleia va etam raarangisana. <sup>19</sup>Poli voto o, karika es-

<sup>§</sup>7:4 Kasina uru ngai laghe pitila, laghe mene ue va, *me tevoo*

<sup>\*\*</sup>7:7 Aisaea 29:13

<sup>††</sup>7:10 Eksodas 20:12; Diuteronomi 5:16

<sup>‡‡</sup>7:15-16 Kasina uru ngai laghe pitila, laghe uela va, <sup>16</sup> *Arova righi talingaimim, am nongo!*

osso tale urunguitanina ateva ta esio-sio ta kovane, me elaa kupikupi velu ghoa nau eteva esisi.” (Tale isaa o inangari, Iesu ghe uela va isaa akapa inana raarangisana.)

<sup>20</sup> Me ghe mene uela va, “Saa llo voto ekupikupi ghoa tale taumattu ngateva, isaa o voto egheeleia etam raarangisana. <sup>21</sup> Elome tale urunguitani taumattu, voto sesa ekasukasu etana. Tani nnaa saasakia, me ailai erorrou, me tani ainao, me tani aiuvi emate, <sup>22</sup> tani lai sari kateva manna ateva, me tani ssaii, me mene kasina tani voto sesa. Me tani kamekame, me ninanna ngakorokorongana tani ghelei ssavoto marova ghaata kkena atoa, me tani kiiuaa kateva, me tani tara saasakiaa kateva, me tani tau sae ninannaa, me tani ghelei voto arova alo kapakapa ateva. <sup>23</sup> Isaa o voto ekasukasu elome tale taumattu ngateva, liuna avalua o me egheeleia etam raarangisana.”

**Vauseni nge Poenisia  
ngateva unna niaikaai**

(Mat 15:21-28)

<sup>24</sup> Iesu ghe kasu vulila masaliki eteae me ghe lao sio tale kateae masaliki kalakalangina ia eTaer,<sup>24</sup> me ghe ssola elome tale kateva ale, me karika eghe aloanna va teva eghe kilai, me karika ghe roola tani aisulia. <sup>25</sup> Arovaeaata ta vause ateva, natuna ateva raroai eteva ghe tokatoka etana, ghe nongola va Iesu ange rekatala, me eghe ailuilui lao sio me ghe suuiaala ta liue kkena Iesu. <sup>26</sup> Vause ateva karika aJiu ia, me ghe lutula ePoenisia elome tale patunganua ateva eSiria, ghe kookolomi esarasarakana

Iesu tani tiu velu raroai eteva ta natuna aliki vause ateva.

<sup>27</sup> Iesu ghe uela etana va, “Ami tau ekasina lao inana ta aliki etoa, karika masina tani tau lao aneira inana aliki etoa ta paua atoa.”<sup>28</sup>

<sup>28</sup> Vause ateva ghe liula, me ghe uela va, “Koronna, vau eteva. Me paua atoa tee la namanama aneira vorovoro nginana aliki etoa tale pake tevo.”

<sup>29</sup> Me Iesu ghe uela etana va, “Ta poli angu aulia ngavuelu o, lao sio tanguem me ulaa tara natum, ta raroai eteva ange kasu vuliela.”

<sup>30</sup> Vause ateva ghe lao sio tanguena, me ghe tara alokoila natuna tale komona atiulu, me raroai eteva ang ghe kasu vuliela.

**Iesu ghe otila talingana  
taumattu ngateva me  
samasamaane ghe masinala**

<sup>31</sup> Iesu ghe kasu vulila masaliki taatara atea eTaer me ghe saela eSaedon, me ghe kasu tee lao sio tale Kasangauluae Masaliki Taatara. Emulina ghe lao sio tale ateo talia ngateae eGalili. <sup>32</sup> Taumattu ngatoa laghe maeaa sio tau sessa ateva ta Iesu, talingana volovolongina me tee paavoo ia, me laghe kolomila Iesu tani saoa nimana atelange tale taumattu ngateva.

<sup>33</sup> Iesu ghe kolola taumattu ngateva elome ta taumattu ngatoa, me lalu ghe kasu vulilala, me Iesu ghe sikilala vuvu nimana alua ta talingane aluelange. Iesu ghe mene kanusuila vuvu nimana alua me ghe posola ramuramuti paana ateva.

<sup>34</sup> Iesu ghe taatara saela epona liu, me ghe ainoanna anamuula, me ghe uela ta taumattu ngateva va, “Eppata!” (mal-

---

<sup>24</sup>7:24 Kasina uru ngai laghe pitila, laghe mene uela va, me eSaedon

<sup>28</sup>7:27 **paua atoa** AJiu etoa laghe anna va ila muennaaili ila ta lo atoa karika va aJiu ila, me laghe kololala va ueili paua ila. Iesu ghe aimulisi tee auliaaira. Nau ghe auliaa, karika va ghe sessaia. Ghe nim anna tani tootoonga aikaiaane vause ateva, karika va tani ghelei saasakia nannaane.



loeana va “Talingana eoti!”). <sup>35</sup> Katen-gaata talingana taumattu ngateva ghe otila, me ghe sama amasinala.

<sup>36</sup> Iesu ghe paopao poila va, “Am rau mene kkaila see,” me karika, ila ghe kakkaila see. <sup>37</sup> Taumattu ngatoa laghe soghia ngatinginala mirikolo ateva, me laghe uela va, “Ia oia taumattu ngateva ghe gheleila oroi ila voto atoa amasi-naailila. Ia nonga ghe ghelei emasinala taumattu talingana volovolongina me tee paaira atoa paavoo ila.”

### Iesu ghe anginila 4,000 taumattu

(Mat 15:32-39)

**8** Isaa o nau oroianaaili taumattu ghe velu eitauaala, me karika righi inana tani nama. Me Iesu ghe kolola kapuna disaepolo atoa me ghe uela etaira va, <sup>2</sup> “Aloghu eusiusi taumattu oia, poli ngeila ghe toka teeieghila kotolu nau, me karika righi aneira inana tani nama. <sup>3</sup> Arova maloona ila me asungila va la lao tanganueira, aue la taatarruu elaolao ta poli katoa laghe kasu emasaueilila.”

<sup>4</sup> Me kapuna disaepolo atoa laghe liula me laghe uela va, “Voto ateva oia karika righi taumattu etana. Eaa aue ita laa ghaa verete me ita angini isaa oia taumattu?”

<sup>5</sup> Iesu ghe kolomilala va, “Ghaisa verete am unusi?”

Me laghe uela va, “Ghaitu (7).”

<sup>6</sup> Me ghe uela ta taumattu ngatoa va la toka sio tapaa kosa. Me ghe ghaala verete ghaitu me ghe kaili emasina saela, me ghe pirila, me ghe tau lao sio ta kapuna disaepolo atoa va la laa ghaikoita, me laghe lao sio tani aikoita. <sup>7</sup> Me aneira lutu pisi tee paapakala karika oroi, ghe arangisela me ghe uela ta kapuna disaepolo atoa va la laa ghaikoita. <sup>8</sup> Taumattu ngatoa laghe namanamala me ghe ssoilala, me laghe kaaila ghaituae laka tale llo tapiri nginana laghe nama vulula. <sup>9</sup> Ghe roola ghaata airari (4,000)

taumattu. Me ghe sungi vellala, <sup>10</sup> me katengaata ta ia me kapuna disaepolo atoa laghe aikaaila tale paanaka ateva, me laghe lao sio tale distriki eteva eDalmanuta.

### Parsi etoa laghe aloannala tani tara teva niaimatootoonga

(Mat 16:1-4)

<sup>11</sup> Parsi etoa laghe lao sio ta Iesu, me laghe kolomiela va eapasunga teva niaimatootoongana ngepona liu. Laghe aauliaa llo tani nim tootongainia. <sup>12</sup> Iesu ghe ateateaala maamatana me ghe uela va, “Vaalu me taumattu ghaine atoa am aloanna tani tara ni-aimatootoongana? Aghaauliaa etaimim va karika aue am tara poi teva.” <sup>13</sup> Ghe kasu vulilala me ghe mene ghoala tale olimoira paanaka ateva, tani lao ta pai kativilau tale ateo talia ngateae.

### Uneira isti Parsi etoa me Herot

(Mat 16:5-12)

<sup>14</sup> Disaepolo atoa laghe aikkaluuala me karika laghe saula verete. Kat-eva nonga ia lo ateva ghe kaakaaila tale paanaka ateva. <sup>15</sup> Iesu ghe aulia ngasarasakanala etaira va, “Am aikinikinita! Me am taatara amasina tale uneira isti Parsi etoa me Herot.”

<sup>16</sup> Laghe tiuaala tani aippooa elome etaira va, “Koti eaauliaa llo oia ta karika ita ghaala righi verete.”

<sup>17</sup> Iesu ghe kilala sa ateva laghe aulieinia, me ghe kolomilala va, “Vaalu me am auliaa va karika righi verete? Karika am ghe kila? Nannaaimim karika ghe oti? <sup>18</sup> Mataimim karika etaatara? Talingaimim karika enongonongo? Karika am nannaa? <sup>19</sup> Nau eteva aghe piri polapolakila ghalima (5) verete tale ghalima airari (5,000) taumattu, ghaisae laka tapiri verete am ghe kaaila?”

“Kasangaulu ghalua (12),” laghe liula.

<sup>20</sup> Me ghe mene uela va, “Me nau eteva aghe piri polakila ghaitu (7) verete tale ghaata airari (4,000) taumattu, ghaisae laka am ghe kaaila tapiri verete etana?” “Ghaitu,” laghe liula.

<sup>21</sup> Me ghe kolomilala va, “Karika am ghe kila poi?”

### **Iesu ghe ghelei emasinala mata salusalu eteva eBetsaida**

<sup>22</sup> Iesu me kapuna disaepolo atoa laghe laa rekata sio eBetsaida. Taumattu ngatoa laghe maeaa sio mata salusalu eteva ta Iesu va ghe posoa me ghe masina. <sup>23</sup> Iesu ghe kunela nimana atelange, me lalu ghe kasu tee tau lao sio. Iesu ghe kanusuila matana alua me ghe saoaala nimane etana, me ghe kolomiela va, “Utaatara teva voto o karika?”

<sup>24</sup> Taumattu ngateva ghe taatarala me ghe uela va, “Ataatara taumattu ngatoa arova ai etoa la kasukasu.”

<sup>25</sup> Iesu ghe mene posola matana taumattu ngateva me ghe taatarala, me ghe masinala me ghe tara amasinala voto atoa. <sup>26</sup> Iesu ghe sungi velue lao sio tangauena, me ghe uela etana va, “Urau mene lao tapaa masaliki.”

### **Pita ghe auliaala va Iesu see ia**

*(Mat 16:13-20; Luk 9:18-21)*

<sup>27</sup> Iesu me kapuna disaepolo atoa laghe saela tale kasina masaliki taatara kalakalangina eSiisaria Pilipae. Tapaa salana me Iesu ghe kolomila kapuna disaepolo atoa va, “Taumattu ngatoa la ue va aghi see?”

<sup>28</sup> Me laghe liula etana me laghe uela va, “Katoa taumattu la ue va io Jon tau ngai aasuu eteva; kasina eue va io Elaija; me mene katoa la ue va io kateva propete.”

<sup>29</sup> Iesu ghe mene kolomilala va, “Me am vaalua? Am uue va aghi see?”

Pita ghe liula etana va, “Io Mesaea io.”

<sup>30</sup> Iesu ghe paolala va karika la mene laa kkaaila va ia see.

### **Iesu ghe auliaala mammarikanaane me matemateane**

*(Mat 16:21-28; Luk 9:22-27)*

<sup>31</sup> Me Iesu ghe tiuaala tani tau lao alo-masaanga ta kapuna disaepolo atoa, ghe ue va, “Natuna ateva Taumattu ngateva auee tani ghaa oroieili mmarikana. Namu ngatoa, me namu ngatoa ta pristi etoa, me tau ngai aapasunga atoa tale inangari nipaopao, aue la ratia. Aue la uvi ematea, me kotolu nau elange me aue etotu tale nimate.” <sup>32</sup> Ghe ghelei emasalikangailila etaira, me Pita ghe koloala me lalu ghe laa tingina ppae sio me ghe tiuaala tani kisoia.

<sup>33</sup> Me Iesu ghe kiriela me ghe taatara lao sio ta kapuna disaepolo atoa, me ghe tiuaala tani kiso Pita. Ghe uela va, “Kasu vulieghila, Satana! Nannaam karika eanna voto kannu God, ta voto kaluira taumattu ngatoa.”

<sup>34</sup> Me Iesu ghe kolola oroi taumattu me kapuna disaepolo atoa tani mae etana. Ghe auliaala etaira va, “Marova teva ealoanna tani mae teeieghi, etani sioaa nannaane, me esunuki unna aikotoo ateva, me eaimuli etaghi. <sup>35</sup> Me lo ateva ealoanna tani asaangi maamauluaane aue eraua, me lo ateva earau maamauluaane ta poli mausighi, me tee tale masi inangari, aue esaanga. <sup>36</sup> Marova taumattu ngateva eghaa voto akapaaili tale kosa ateva me maamauluaane ekapa, vaalua isaa o voto aue esausia? Koti karika. <sup>37</sup> Sa ateva taumattu ngateva aue etaue lao tani ghaa oghi maamauluaane? <sup>38</sup> Vituu eteva oia la kakkaua kateva ppae god, me la gheeghelei ssavoto, me lo ateva taumattu tale lo ateva oia vituu epalatainaghi me inangarighi, aue Natuna ateva Taumattu ngateva aue epalatainia nau aue esio tee mallangina

ateva Tamane me kapuna ensolo atoa manga ila.

**9** “Aghaulia ngakoronna etaimim va katoa etaimim oia am tiitingina, karika aue am mate me aue am tara ararimangalina ateva God emae tee sarasarakaniaane.”

### Taatarane Iesu ghe aikolikoliaala

(Mat 17:1-13; Luk 9:28-36)

<sup>2</sup>Ghaonomo (6) nau ghe lange sio me Iesu ghe kolola Pita, Jeimis me Jon, me ilaata nonga laata ghe saela tale motouru eteva saesaenaaili ia. Taataraane Iesu ghe aikolikoliaala ta matairotolu, <sup>3</sup>me kaliona ghe mallangala me ghe usousoanaailila, karika poi teva taumattu tale kosa ateva erooroo tani pora kalio va ghe uso avalua o. <sup>4</sup>Me lotolu ghe tarala Elaija me Moses lalu ghe kauerekatila me lalu ghe tiuaala tani sama tee Iesu.

<sup>5</sup>Pita ghe uela ta Iesu va, “Tisa, masinaaili ta ita tokatoka oia. Angatolu ghelei kotolu ale paapali — kateva alem ia, me kateva alena ia Moses, me kateva Elaija.” <sup>6</sup>(Pita me kapuna alua lotolu ghe matautu saasakiaala, me ghe tam kilala va sa arighi voto tani auliaa.)

<sup>7</sup>Me karaane ateva ghe mae sio, me tootoona ateva ghe akoulala, me lingi ngalo ateva elome tale karaane ateva ghe uela va, “Natughu eteva oia, aghaailousiangailiia. Am nongoa.”

<sup>8</sup>Arovaeaata ta vara lotolu ghe mene taatara, me lotolu ghe luula mene ghalua. Lotolu ghe aaitara, me lotolu ghe tara nongala Iesu.

<sup>9</sup>Nau laghe mae siosio tale motouru, Iesu ghe ttoieinilotolla va la rau mene auliaa ta toa saa llo laghe tarala lomosi ta Natuna ateva Taumattu ngateva etotu tale nimate. <sup>10</sup>Laghe nongo usilaala voto ghe ppoaala ta ngetaira, me vara ila nonga me ngila ghe aikolomieinila va vaalua me euela va etotu tale nimate.

<sup>11</sup>Me disaepolo atoa laghe kolomila Iesu va, “Vaalua me tau ngai aapasunga tale inangari nipaopao atoa la ue va Elaija aue etani muemue mae?”

<sup>12</sup>Iesu ghe liula me ghe uela va, “Elaija aue emae amuemue tani ghelei emasina akapa voto. Me vaalua me Uru ngai Manga ateva eue tee va Natuna ateva Taumattu ngateva aue eghaa oroi voto sesa me aue la ratia? <sup>13</sup>Aghaauliia etaimim va Elaija ang ghe mae sio, me taumattu ngatoa ngeila ghe ghelei ekapala saa llo voto laghe anna tani ghelei etana, nongina vaalua Uru ngai Manga ateva ghe auliaala.”

### Iesu ghe ghelei emasinala taita arighi

(Mat 17:14-20; Luk 9:37-43)

<sup>14</sup>Nau laata ghe sio mae tani mene tara katoa disaepolo, laghe tarala oroieili taumattu laghe tomtomla, me tau ngai aapasunga tale inangari nipaopao atoa laghe aissakeana teela tale inangari. <sup>15</sup>Nau taumattu ngatoa laghe tarala Iesu, ila akapa laghe soghieiniela, me laghe iloula tani laa soua.

<sup>16</sup>Iesu ghe kolomilala va “Sa ateva am aissakeana teeia?”

<sup>17</sup>Kateva elome tale uta taumattu ngatoa ghe liula me ghe uela va, “Tisa, amaeaa sio natughu eteva etam, poli raroai eteva etokatoka ta ngetana egheeieia karika esamasama. <sup>18</sup>Nau epoopotainia me usouso paane eghoa me eaingeresa ngalungaluna me ekakkarakeana. Akolomila kapum disaepolo atoa va la suu velu raroai eteva etana, me karika la roola.”

<sup>19</sup>Iesu ghe liula me ghe uela ta taumattu ngatoa va, “Am lo atoa oia taumattu, karika righi uneimim niaikaai, ghaisaa ta aue atoka teeiem? Me aue ghaisa ta aue atoiem va am aiesoa? Am maeaa sio aliki eteva etaghi.”

<sup>20</sup> Laghe maeaa sio aliki eteva ta Iesu, me nau raroai eteva ghe tarala Iesu ghe eleila me aliki eteva ghe tiuaala tani oo, me ghe ghelei ekatungiela, me ghe tiuaala tani vilieinia tapaa kosa, me usouso paane ghe ghoa ta paane.

<sup>21</sup> Iesu ghe kolomila tamane aliki eteva va, “Lovisaa isaa oia voto ghe tiuaala etana?”

Tamane ghe liula me ghe uela va, “Nau aliki aarau. <sup>22</sup> Oroiaata raroai eteva eanna tani uvi ematea. Egheeleia ekaakatuu saoa tale kura, me tale manu va earropia. Ualousiusi teeiengalua, me usausiengalua arova urooroo.”

<sup>23</sup> Iesu ghe liula me ghe uela va, “Vaalua me uue va, ‘Arova urooroo?’ Poli lo ateva eaikaia, erooroo tani ghelei ekapa voto.”

<sup>24</sup> Arovaeaata ta tamane aliki eteva ghe sama anamuula me ghe uela va, “Aghaaikaia; me uasararakana uneghi niaikaia.”

<sup>25</sup> Nau Iesu ghe tarala va taumattu ngatoa ngeila ghe maemae akalakalanginaaili etana, me ghe paola raroai eteva; ghe uela va, “Raroai volovolongina me paavoo ateva, aghaauliaa etam va kupi vulu ghoa mae aliki eteva, me auena urau mene laa kupie sso.”

<sup>26</sup> Raroai eteva ghe piila me ghe gheleila aliki eteva ang ghe oo, me ghe kupi vulue ghoala. Aliko eteva taatarane nonginaaili va ghe matela, oroi taumattu laghe taraiela laghe annaa va ang ghe matela. <sup>27</sup> Iesu ghe kunela nimane atelange me ghe sausiela tani tingina, me ghe tinginala.

<sup>28</sup> Nau Iesu me kapuna disaepolo atoa laghe lao sio elo ale me ila nonga laghe tokatoka, me ngeila ghe kokkolomi Iesu va, “Vaalua me ami karika ami roola tani tiu velu raroai eteva?”

<sup>29</sup> Iesu ghe liula me ghe uela va, “Nikokkolomi sae\* nonga ateva erooroo tani tiu velu ia o ase lo ateva raroai. Karika mene tikirighi salana.”

### **Aiaaghaluene Iesu ghe uela va aue emene totu**

(Mat 17:22-23; Luk 9:43-45)

<sup>30</sup> Laghe kasu vulila masaliki eteae o, me laghe lao tee sio eGalili, me karika ghe mene anna va teva taumattu ghe kilaia, <sup>31</sup> poli ghe poppooaa tani apa-sunga ta kapuna disaepolo atoa, me ghe ue etaira va, “Natuna ateva Taumattu ngateva ngeila tautauela ta nimaira taumattu ngatoa, me aue la uvi ematea, me vara kotolu nau elange me aue emene totu.” <sup>32</sup> Karika aloira ghe masaangaala llo ghe auliaala, me laghe maamatautu tani kolomia.

### **Tani see namuu ia?**

(Mat 18:1-5; Luk 9:46-48)

<sup>33</sup> Iesu me kapuna disaepolo atoa laghe lao sio eKapenium. Laghe kupi ssola tale ale ateva me Iesu ang ghe kookolomila va, “Sa ateva am aisakeanaa teeia tapaa salana?” <sup>34</sup> Karika laghe aisauaala, poli nau laghe maemae tapaa salana, laghe aissakeana va tani see etaira namuu ia.

<sup>35</sup> Iesu ghe toka siola me ghe kolo aitauaala kapuna disaepolo atoa me ghe uela va, “See eanna va emuemue, etani gheleia eairuuruu, me etau ngai uungu ta mene katoa.”

<sup>36</sup> Me ghe ghaala aliki erighi me ghe atinginaiela elome etaira, me ghe vaghui etinginaiela, me ghe uela etaira va, <sup>37</sup> “See eannainaghi me eaikoloa aliki etoa, eaikoloainaghi, me lo ateva taumattu eaikoloainaghi, karika va eaikoloainaghi nonga, ta eaikoloa tee Tamaghi ghe sungieghila tani sio.”

---

\*9:29 Kasina uru ngai laghe pitila, laghe uela va, *Nikokkolomi sae me ninae*

### See karika aissaniita ia, kapuita ia

(Luk 9:49-50)

<sup>38</sup> Jon ghe uela va, “Tisa! Ami tarala taumattu ngateva etiutiu velu raroai eteva tale ararim atea, me ami paoala va eruu poli karika va ita me ia.”

<sup>39</sup> Iesu ghe uela etaira va, “Am rau mene paoa, poli lo ateva taumattu eghelei mirikol tale ararighi etea karika aue ailului tani auliaa teieghi righi voto sesa, <sup>40</sup> poli see karika aissaniita ia, kapuita ia. <sup>41</sup> Aghaaulia ngakoronna etaimim va lo ateva taumattu etau aatu righi manu tale ararighi etea va uropi, poli io kapuna io Karisto, aue eghaa aipolina.

### Nitootonga tani ghelei ssavoto

(Mat 18:6-9; Luk 17:1-2)

<sup>42</sup> “Arova aliki erighi eaiesoa etaghi, me teva taumattu eghelei unna ni-aikaaia ekatuu, ghele masinaaili ta arova la ghele iri teva paka ngatu ta ngalona, me la ghele ghoa sau velue sio elo malionge. <sup>43-44</sup> Arova nimam atelange egheleio me ukaakatuu tani ghelei voto sesa, usai kotooia, poli aue emasina ta ngetam arova nimam atelange takotoona me usso tale mauue ateva. Me aue esesaaili arova nimam atelange etokata me angu laolao tale Gehenna tale kura atea karika epalapala. <sup>†</sup> <sup>45-46</sup> Arova kekem atelange egheleio me ukaakatuu tani ghelei voto sesa, usai kotooia, poli aue emasina ta ngetam arova kekem atelange takotoona me ughaa mauue ateva, me esesaaili arova kekem atelange masina me angu laolao tale Gehenna tale kura atea karika epalapala. <sup>‡</sup> <sup>47</sup> Me

arova teva matam egheleio me ughelei voto sesa, uvaliki velua. Emaamasina arova ukupi sso tale ararimangalina ateva God tee kateva nonga matam, me esesaaili arova matam akapa alua lalu tokatoka me la sau veluo sae tale kura atea eGehenna, <sup>48</sup> tale ia o voto ateva, “toliti etoa karika la matemate me kura atea karika epalapala.”<sup>¶</sup>

<sup>49</sup> Taumattu ngakapa kura atea aue gheleila la raarangisana.

<sup>50</sup> “Uela ateva masina ia, me arova namina ateva ekapa, vaalua emene ghelei me aue emene euelana? Karika erooroo. Am, am toka arova masi uela ateva tani toka masina, me luei easo elome etaimim me mene katoa taumattu.”

### Tani airati

(Mat 19:1-12)

**10** Iesu ghe kasu vulila masaliki etea, me ghe lao sio tale kativilau tale atea atea eJodan, me tale distriki eteva eJudia. Oroi taita me vause laghe mae sio tani velu eitauaa ta Iesu. Me Iesu ghe aapasunga inangarina God ta ngetaira, nongina ghe ghelei nau etoa. <sup>2</sup> Katoa Paresi laghe mae sio tani tootonga Iesu tale nikokkolomi eteva va, “Uneita inangari nipaopao eue va masina arova taita ateva erati vausenna ateva, o karika?”

<sup>3</sup> Iesu ghe liula me ghe uela va, “Saa inangari nipaopao Moses ghe tau aatu sio etaimim?”

<sup>4</sup> Me laghe uela va, “Moses ghe pitila va taita ateva erooroo tani piti uru ngai niairati, me etae lao ta vausenna ateva, me esungi velua.”<sup>§</sup>

<sup>†</sup>9:43-44 Kasina uru ngai laghe pitila, laghe uela va, <sup>44</sup> tale ia o voto ateva, ‘toliti etoa karika la matemate, me kura atea karika epalapala.’

<sup>‡</sup>9:45-46 Kasina uru ngai laghe pitila, laghe uela va, <sup>46</sup> tale ia o voto ateva, ‘toliti etoa karika la matemate, me kura atea karika epalapala.’

<sup>¶</sup>9:48 Aisaea 66:24

<sup>§</sup>10:4 Diuteronomi 24:1-3

<sup>5</sup>Iesu ghe uela etaira va, “Moses ghe pitila llo inangari nipaopao etaimim poli urunguitaniimim korokoronganaaaili. <sup>6</sup>Emua arau nau ta God ghe gheleila kosa ateva, ‘God ghe gheleila taita me vause.’<sup>\*\*</sup> <sup>7</sup>Liuna avalua o me taita ateva ekasukasu vuli tamana me kinna me etoka aitauaa tee vausenna ateva, <sup>8</sup>me ngeilalu kateva nonga ilaluela.”<sup>††</sup> God ghe uela va karika va ghalue ilalua ta kateva nonga ilalua. <sup>9</sup>Liuna avalua o me voto God eaatoka aitauaa, karika mene teva taumattu emene pola.”

<sup>10</sup>Nau eteva Iesu me disaepolo atoa laghe kiri lao sio elo ale, me disaepolo atoa ngila ghe mene kookolomi Iesu tale isaa o inangari. <sup>11</sup>Me Iesu ghe uela etaira va, “Arova taita ateva ngeratila vausenna ateva me emene lai ppae ta kateva vause, elilai rorrou, ta enim ghaaghaa mene kateva vause, me vausenna tuunga ateva ie etokatoka. <sup>12</sup>Vause tee ateva arova ia erati taitanna ateva me elaa lai ta kateva ppae taita ia, ia tee elilai rorrou, ta enim ghaaghaa taita ateva me taitanna tuunga ateva ie etokatoka.”

### **Iesu ghe arangisela lutu ngaliki etoa**

*(Mat 10:13-15; Luk 18:15-17)*

<sup>13</sup>Katoa vause me taita laghe maeaa sio lutu ngaliki etoa ta Iesu va esaoaa nimane etaira, me disaepolo atoa laghe paolala. <sup>14</sup>Me nau eteva Iesu ghe tarailala, karika ghe masimasiaala kapuna disaepolo atoa me ghe uela va, “Am maeainila sio etaghi. Am rau mene tiu velu natu aliki etoa tani mae etaghi, ta ararimangalina ateva God tanganeira ia ase taumattu ngatoa nongina natu aliki etoa. <sup>15</sup>Aghaaulia ngakoronna etaimim va arova see karika eghaa

ararimangalina ateva God nongina aliki etoa, karikaaili va aue elao tale ararimangalina ateva God.” <sup>16</sup>Me Iesu ghe sausau aliki etoa me ghe saasaoaa nimane etaira me ghe aarangiseila.

### **Tue peipeiena ateva**

*(Mat 19:16-30; Luk 18:18-30)*

<sup>17</sup>Nau Iesu ghe mene kasukasu elao-lao tapaa salana, taumattu ngateva ghe iloula emuli etana me ghe suuiaala ta liue kkena Iesu, me ghe uela va, “Masi tisa ngateva, vaalua aghelei me aghaa mauue ateva etokatoka liu?”

<sup>18</sup>Iesu ghe liula me ghe uela etana va, “Vaalua me ukolokoloaghi va masina ieghi? Karika teva masina ia ta God nonga. <sup>19</sup>Ukilakila inangari nipaopao, va urau mene aiuvi emate, urau mene lai sari, urau mene ainao, urau mene kamekame tale niaisakei, urau mene aikamea tani ghaa voto, me uoneoneaa tamam me kinam.”<sup>‡‡</sup>

<sup>20</sup>Me ghe liula me ghe uela va, “Tisa, isaa ona inangari nipaopao ngaghe usilaala nau aliki taita aghi.”

<sup>21</sup>Iesu ghe tara usiusiela me ghe aielousieiniela, me ghe uela etana va, “Kasina ateva voto karika ughe ghelelela. Lao sio me ulaa tau lao ghinnanim me la poli, me ulaa tau lao viliki veu ta lo atoa karika righi ghinnaniira, me aue utau peipeiena epona liu, me umae aimuli etaghi.”

<sup>22</sup>Me taumattu ngateva oia nannaane ghe katungailila tale isaa o inangari, me ghe alousiusila me ghe kasula, poli tue peipeiena ia.

<sup>23</sup>Me Iesu ghe aitarala me ghe uela ta kapuna disaepolo atoa va, “Tue peipeiena atoa aue aanasaaili etaira tani sso tale ararimangalina ateva God.”

<sup>\*\*</sup>10:6 Aitiutiu 1:27

<sup>††</sup>10:8 Aitiutiu 2:24

<sup>‡‡</sup>10:19 Eksodas 20:12-16; Diuteronomi 5:16-20

<sup>24</sup> Me disaepolo atoa laghe soghiaala tani nongo inangarina Iesu. Iesu ghe mene ppoaa tee tau lao sio va, “Aliko etoa, tani sso tale ararimangalina ateva God, aanasa ia. <sup>25</sup> Masukasukale ta teva kamolo tani kupi sso tale teae mata raum. Me teva tue peipeiena tani kupi sso tale ararimangalina ateva God aue emasukasukaleaili.”

<sup>26</sup> Mausina valua o me disaepolo atoa laghe soghiaa saasakiaa teeila inangarina Iesu me ngila ghe aikolomieinila va, “Arova isaa avalua o, see nonga erooro tani saanga?”

<sup>27</sup> Iesu ghe pasiaala matane etaira me ghe uela va, “Ta taumattu ngatoa, karika la rooro, me ta God la rooro, poli God erooro tani ghelei ekapa voto.”

<sup>28</sup> Me Pita ghe tiuaala tani auliaa ta Iesu va, “Utara, ami ghe kasu vuli ekanannaailila voto, me ami ghe aimuli teeila.”

<sup>29</sup> Me Iesu ghe uela va, “Aghaaulia ngakoronna etaimim va see ia taumattu ngateva eamuemueieghi me euunguaa masi nginangari me ghe kasu vulila tanganuena, tuena atoa, nengana atoa, kinna me tamane me natuna atoa me umane utana, <sup>30</sup> aue eghaa sae ta kat-eva ai (100). God aue etau lao oroi voto etana. Nau ta etokatoka tale kosa ateva oia, voto aue eghaa aue eroieili, me aue elau voto llo peina ghe kasu vulila, aue eghaa oroi ale me tuena me nengana me kinna me natuna me umana utana. Katoa taumattu aue la ghelei voto sesa etana, me emulina aue eghaa mauue ateva etokatoka liu. <sup>31</sup> Me oroi ila taumattu ngatoa matuutuliena ila aue la sioaili euu, me see ila lo atoa arariira euu aue la matuutuliena.”

### **Iesu ghe auliaala va aue emate me emene totu**

*(Mat 20:17-19; Luk 18:31-34)*

<sup>32</sup> Iesu me kapuna disaepolo atoa laghe mene kasukasu elaula eJerusalem. Iesu ghe muemueainila me kapuna disaepolo atoa laghe ana ngatingina oroi ninannaa ta Iesu. Taumattu ngatoa laghe aimuli usi tee Iesu me kapuna disaepolo atoa laghe maamatautu. Iesu ghe mene kolola kasangaulu ghalua (12) kapuna disaepolo, me ghe mene aulia ngaotula voto aue elutu ta maamauluaane. <sup>33</sup> Ghe uela va, “Am nongo! Nau eteva ngita laa sosso eJerusalem aue la tau lao Natuna ateva Taumattu ngateva ta nimaira namu ngatoa tale pristi etoa me tau ngai aapasunga tale inangari nipaopao atoa, me aue la ghelei niaisakei etana, me la tingina aitauea tale niaisakei eteae va la uvi ematea. La ruu o, me la taue lao ta nimaira mene katoa ppae karika va aJiu ila. <sup>34</sup> Me ila o katoa ppae taumattu aue la ghauliaa inangari niattara etana, la kanusueinia, me la uetaia, me la uvi ematea. Emate me easo nau kotolu, me aue emene totu.”

### **Jeimis me Jon lalu ghe aloanna tani namuu**

*(Mat 20:20-28)*

<sup>35</sup> Jeimis me Jon, natuna ilalua Sebedi, lalu ghe mae sio ta Iesu me lalu ghe kolomiela va, “Tisa, angalu aloanna tani kolomio tale kateva voto, me angalu aloanna va ugheleia voto ateva oia etaingalua.”

<sup>36</sup> Me Iesu ghe kolomilaluela va, “Sa ateva amalu aloannaia va agheleia etaingalua?”

<sup>37</sup> Me lalu ghe uela etana va, “Nau eteva ukingi, kateva etaingalua etoka tale pai muenna ativilau, me kateva tale pai uaise ativilau.”

<sup>38</sup>Vara me Iesu ghe uela etairarua va, “Karika amalu tani kilakila amasina llo voto amalu kokkolomieghi etana. Koti karika amalu rooroo tani ropi tale kapa ateva nimmarikana anga ghainasia tani ropia? Me tani suu tale lo ateva nisuu anga ghainasia tani suu etana?”

<sup>39</sup>Me lalū ghe uela ta Iesu va, “Angalu rooroo.”

Me Iesu ghe uela va, “Koronna. Kapa ateva anga ghainasia tani ropia, aue amalu ropi tee etana, me nisuu eteva anga ghainasia tani suu etana aue amalu suu etana. <sup>40</sup>Me see ia lo ateva aue etoka tale pai muenna ativilau me tale pai uaise ativilau, karika uunguaaghi tani tau aatu; karika. Llo o aitokatoka God ang ghe aimonomosiaala va un-eira ila taumattu ngatoa God aue sui toongainila.”

<sup>41</sup>Nau eteva disaepolo kasangaulu (10) laghe nongola inangari Jeimis me Jon, eghe sessailala etairarua. <sup>42</sup>Me Iesu ghe kolo aitaueinilala me ghe uela etaira va, “Am kilakila va lo atoa ararira atea va namuu ila ta tau ngeleka atoa, ila la ghelei taumattu enim uungu aanasa etaira. Me lo atoa matuutuliena ila, la ghelei saasakia etaira. <sup>43</sup>Isaa o ase gheleiaaira erau mene toka elome etaimim, karika. Lo ateva taumattu ealoanna tani namuu elome etaimim, esio euu me eghelei nongina tau ngai nongonongo anna atoa. <sup>44</sup>Me see ia lo ateva ealoanna tani muemue etaimim, ia aue ekapuimim tau ngai uungu ia. <sup>45</sup>Mausina avalua o, me Natuna ateva Taumattu ngateva karika eghe sio mae va taumattu ngatoa la uungu etana, karika. Ghe sio mae tani uungu etaira, me tani tau lao maamauluane, tani ghaa oghi oroi taita me vause.”

### Iesu ghe ghelei emasinala mata salusalu eteva

(Mat 20:29-34; Luk 18:35-43)

<sup>46</sup>Iesu me kapuna disaepolo atoa laghe rekatala eJeriko, laghe aso taula, me ngila ghe anna tani mene kasu eJeriko. Ia me kapuna disaepolo atoa me taumattu ngatoa oroeili ila laghe usuisia. Me Batimease, natuna ia Timease, ghe tokatoka tale sama salana atikirighi. Mata salusalu ia me uunguaane tani loo viliki veu tale taumattu ngatoa. <sup>47</sup>Me eghe nongola va Iesu aNasareti ia ange rekatala, me ghe taila tani ovaova atingina va, “Iesu, natuna ia Deivit, ualousiusi teeieghi!”

<sup>48</sup>Oroi ila taumattu ngatoa laghe kisokisoia me laghe ue etana va, “Urau mene sama.” Me eghe mene ovaova anamungaili va, “Natuna ateva Deivit, ualousiusi teeieghi!”

<sup>49</sup>Me Iesu ghe tinginala, me ghe uela va, “Am kolo taue mae.”

Me laghe uela etana va, “Umasimasi, tingina saela, ange kolokoloo tani lao etana.” <sup>50</sup>Vara me ghe uei vella unna aiaasae ateva, me ghe tingina parasi saela me ghe lao sio ta Iesu.

<sup>51</sup>Me Iesu ghe kolomiela va, “Sa ateva ualoannaia va agheleia etam?”

Me mata salusalu eteva ghe uela va, “Vau eteva! Aghaloanna tani taatara.”

<sup>52</sup>Me Iesu ghe uela etana va, “Kasula, ta unem niaikaia ngeghelei emasinaiola.” Me arovaeaata ta matane alua ghe otila o, me ghe usila Iesu tapaa salana.

### Iesu ghe ssola eJerusalem

(Mat 21:1-11; Luk 19:28-40; Jon 12:12-19)

**11** Nau eteva laghe mae akalakangina sio eJerusalem, me eBetpeis me eBetani, masaliki eluae tale motouru eteva eOliv, Iesu ghe suula



kapuna disaepolo alua, <sup>2</sup>me ghe uela va, “Amalu lao tale masaliki eteae ita taataraiia lao. Nau amalu rekata etana, amalu tara atingina natu donki eteva naunau etingina ia karika teva taumattu ghe sae toka me ghe ilou etana. Amalu pulakaia me amalu maeainia. <sup>3</sup>Arova teva taumattu eue etaimalua va, ‘Vaalua me amalu ghaaghaaia?’ amalu ue va, ‘Vau eteva ealoannaailia me auena emene oghieinie mae.’”

<sup>4</sup>Me lalua ghe lao sio lalua ghe laa tara atingina sio natu donki eteva tapaa ngatamana tale ale ateva, tapaa salana, me lalua ghe pulakaiela. <sup>5</sup>Katoa laghe titingina laghe uela etairarua va, “Vaalua me amalu puupulaka donki eteva?” <sup>6</sup>Me lalua ghe auliaala saa llo Iesu ghe auliaala etairarua, me laghe tau vellalueta me lalua ghe kasula. <sup>7</sup>Lalua ghe laoainie sio ta Iesu. Lalua ghe alokoi saela uneirarua aiaasae ngeleka etana me Iesu ghe laa sae toka etana. <sup>8</sup>Me oroieili ila lo atoa laghe tiuaala tani lullu velu uneira aiaasae ngeleka epona tale salana atikirighi. Mene katoa laghe laa saisai uru ootou, me laghe veluvelu epona tale salana atikirighi. <sup>9</sup>Lo atoa laghe kasukasu emua me lo atoa laghe ususia laghe ovaova tani ue va, “Tau sae ararina atea God!

God aue earangise lo ateva emaemae elome tale ararina atea Vau ngepona ateva!”<sup>¶¶</sup>

<sup>10</sup>“Niarangise tale ararimangalina ateva tuvuita ateva ta Deivit aue emae!”

“Tau sae ararina atea God iaaili epona!”

<sup>11</sup>Iesu ghe ssola eJerusalem, me ghe kupi ssola tale ale manga ateva, me ghe aaitara see tale voto atoa. Me ia o ang ghe elo alaila me Iesu ghe kiri lao

sio eBetani tee me kapuna kasangaulu ghalua (12) disaepolo.

### **Iesu ghe kasikienaala fig eteae**

(*Mat 21:18-19*)

<sup>12</sup>Elue talaua, laghe kasu vuli eBetani, me Iesu ang ghe maamaloo. <sup>13</sup>Eghe taatara amasau lao sio me ghe tarala fig atea uruenaaili ia. Me ghe lao sio tani taraiia va arova righi uene. Me nau eteva ghe laa rekataa sio, ghe tarala va uruna nonga, poli karika ghe ghaa nauna tani kune. <sup>14</sup>Vara me Iesu ghe uela tale ai eteae va, “Karika teva aue emene nama righi uem!” Me kapuna disaepolo atoa laghe nongoala.

### **Iesu ghe kupi ssola tale ale manga ateva**

(*Mat 21:12-17; Luk 19:45-48; Jon 2:13-22*)

<sup>15</sup>Nau eteva laghe rekatala eJerusalem, Iesu ghe ssola tale ale manga ateva, me ghe tiuaala tani sungi veluvelu lo atoa laghe aaitauaa me laghe poppoli. Eghe sau etakila tevoo atoa uneira ila lo atoa laghe aikolikoliaa viliki veu, me aitokatoka uneira lo atoa laghe aitaraa valusu, <sup>16</sup>me karika poi ghe aalona va toa la sau longoti righi peiira eleka nongina ale manga ateva.

<sup>17</sup>Vara me eghe tiuaala tani apasunga tale taumattu ngatoa. “Karika am ghe kilala llo laghe pitila tale Uru ngai Manga ateva, ghe uela va,

“‘Alegghi ale manga ateva aue la ghasea va

ale ailooloo sae ia tale taumattu ngakapa atoa tale anua akapa atoa’<sup>§§</sup>?

Me am, ngam gheeieila ‘nongina va aleira ale niaisuliaa ia tau niainao atoa!’”<sup>\*</sup>

<sup>¶¶</sup>11:9 Sams 118:25-26

<sup>§§</sup>11:17 Aisaea 56:7

<sup>\*</sup>11:17 Jeremaia 7:11

<sup>18</sup> Namu ngatoa ta pristi etoa me tau ngai aapasunga tale inangari nipaopao atoa laghe nongola voto oia, me ngila ghe paepae righi salana tani uvi emate Iesu, me laghe maamatautainia, ta poli taumattu ngakapa atoa laghe oouna tee inangarina.

<sup>19</sup> Elo alai tale ia o nau eteva, Iesu me kapuna disaepolo atoa laghe kasu vulila<sup>†</sup> masaliki taatara atea.

### **Taumattu eaiesoa ngakoronna me ekokkolomi sae aue eghaa voto**

(Mat 21:20-22)

<sup>20</sup> Elue talaua poopooa, Iesu me kapuna disaepolo atoa laghe kasukasu elaolao, me laghe tarala fig atea ta ang ghe mmatela. Uruna me oane isaa akapaaili ang ghe mmatela. <sup>21</sup> Pita ghe mene nnaa lao sio sa ateva Iesu ghe ppoainiela tale ai etea. Ghe uela va, “Tisa, tarala, fig atea ughele kasikienainiela ang ghele mmatela!”

<sup>22</sup> Iesu ghe liula etaira me ghe uela va, “Am aiesoa ta God. <sup>23</sup> Aghaaulia ngakoronna etaimim va, see arova eue tale motouru eteva o va, ‘Ukasu me ughoa katu elamana,’ isaa o voto aue elutu etana, arova eaiesoa tale urunguitanina ateva me karika eghaaghalua nanaane, voto o aue elutu. <sup>24</sup> Liuna avalua o me aghaauliaa etaimim va, sa ateva am kolomia tale uneimim nilooloo sae, me am aiesoa va angam ghaala, aue am ghaa me aue kaluimim. <sup>25-26</sup> Me nau am tingina me am looloo sae, am kkaluaa sesa katoa la ghelei etaimim, me Tamaimim ateva epona liu aue ekkaluaa tee eleiainim sesa.”<sup>‡</sup>

### **Nikokkolomi tale matuutulienaane Iesu**

(Mat 21:23-27; Luk 20:1-8)

<sup>27</sup> Laghe kiriaa mae sio eJerusalem, me vara Iesu ghe kasukasu elome tale ale ngeleka etiulu tale ale manga ateva, me namuu ta pristi etoa me tau ngai aapasunga ngatoa tale inangari nipaopao me namu ngatoa laghe mae sio ta ngetana. <sup>28</sup> Me laghe uela etana va, “See ghe tau aatu sio matuutuliena etam, me see ghe sungiola tani mae ghelei isaa oia voto?”

<sup>29</sup> Me Iesu ghe uela etaira va, “Akolomiem mua tale kateva nikokkolomi, me arova am liu emasinaia, aue aghauliaa etaimim va see ghe tau mae sio matuutuliena etaghi. <sup>30</sup> Am liu etaghi va see ghe tau lao sio matuutuliena ta Jon easuu taumattu: Vau ngepona ateva o nim taumattu?”

<sup>31</sup> Me ngeila ghe tingina aisakeia va sa ateva la ghaulieinia etana, “Arova ita ue va, ‘Vau ngepona ateva,’ aue eue va, ‘Me vaalua me karika am ghe aikaaia ta Jon?’

<sup>32</sup> Me arova ita ue va, ‘Nim taumattu’...” (Laghe maamatauta taumattu ngatoa, poli taumattu ngakapa atoa laghe anna va Jon propete ia.)

<sup>33</sup> Liuna avalua o laghe liula me laghe uela ta Iesu va, “Karika ami kilakila.”

Me Iesu ghe uela etaira va, “Aghi tee, karika aue aghauliaa etaimim va see ghe tau mae sio matuutuliena etaghi.”

### **Kiukiu niaimatoonga tale sesa taumattu ngatoa laghe aitariaa utani uaeni etingiu**

(Mat 21:33-46; Luk 20:9-19)

**12** Iesu ghe tiauata tani aippoaa tee taumattu ngatoa tale kiukiu

<sup>†</sup>11:19 *Iesu me kapuna disaepolo atoa laghe kasu vulila* Kasina uru ngai laghe pitila, laghe uela va, *Iesu ghe kasu vulila*

<sup>‡</sup>11:25-26 Kasina uru ngai laghe pitila, laghe uela va, <sup>26</sup> *Marova am tam kkaluaa, Tamaimim ateva epona liu karika aue ekkaluaa tee eleiainim sesa.* Utara Matiu 6:15.

niaimatoongana atoa va, “Kateva tau-mattu ghe pasala utani uaeni etingiu, me ghe iri taliaala valavala atea, me ghe kaila aimonnaa uaeni eteva, me ghe atulula aitiketike ateva. Vara me ghe taue lao sio ta katoa tau ngeutana tani aitarainia, me ghe kasu emasaula. <sup>2</sup>Nau eteva utana atingiu ghe matuela, ghe suula kateva kapuna tau ngai uungu tani laa tara lo atoa laghe aitarara utana atingiu me eghaa rigi ue uaeni. <sup>3</sup>Lo atoa laghe aitarara utana atingiu laghe llotiela, me laghe uvi saasakieiniela, me laghe sungi veluela, me karika ghe ghaala rigi ue uaeni. <sup>4</sup>Vara me ghe mene suula mene kateva kapuna tau ngai uungu tani mene lao etaira. Laghe mene lloti etokaiela, me laghe paru rriila uruna ateva, me laghe apalataiela. <sup>5</sup>Ghe mene suula mene kateva, lo ateva o tau ngai uungu laghe uvi emateala. Oroieili ila lo atoa ghe mene sungilala kateva kateva ghe laolao; katoa laghe nim uvilala, me katoa laghe uvi ematelala.

<sup>6</sup>“Kateva nonga ia taumattu ghe tokala, natuna ia ghe tani aielousieinia, ghe airuuruula tani sungia ta ghe ue va, ‘Aue la oneoneaa natughu eteva.’

<sup>7</sup>“Nau eteva lo atoa laghe aitarara utana atingiu laghe taraiela, laghe ue elome etaira va, ‘Taumattu ngateva okae aue eghaa akapa llo oia. Ita uvi ematea, me ita ghaa utana atingiu me ekaluita ia.’ <sup>8</sup>Laghe llotiela, me laghe uvi emateala, me laghe sau velue ghoala eleka tale utana atingiu.

<sup>9</sup>“Sa ateva taumattu ngateva, umana ia utana atingiu, aue egheleia? Aue emae euvi ematela me emene tau lao utana atingiu ta katoa ppae. <sup>10</sup>Koti karika am ghe ritila tale Uru ngai Manga ateva? Eue va,

“Atu eteva tau ngai atulu ale atoa laghe ratiela  
ghe aitiutiula tale atu ekapa atoa tani  
suei ale ateva;

<sup>11</sup>Vau palepale ghe gheleila isaa o voto me taataraane masinaaili ta mataita.”<sup>f</sup>

<sup>12</sup>Namu ngatoa laghe nongola me laghe kilala va Iesu ghe auliaa teiila tale kiukiu niaimatoonga. Laghe aloanna tani llotia, me laghe nim maamatauta taumattu ngatoa, me laghe tau veluela, me laghe kasula.

### **Tani tau lao takis ta Siisa**

(*Mat 22:15-22; Luk 20:20-26*)

<sup>13</sup>Laghe suula katoa tana Paresi me katoa tana kapuna Herot tani laa ghareaa Iesu va ghe ppooaa rigi inangarina, me laghe ghaaia me laghe laa ghatinginaia tale niaisakei. <sup>14</sup>Nau laghe mae sio, laghe uela va, “Tisa, io nau ekapa atoa uauliaa nonga voto koronna. Karika unannangaili sa llo taumattu ngatoa la annaa, me karika utaata taumattu tale naanamungaane me uunguaane, me uaapasunga ngakoronna salane God. Vaalua? Masina tani taula takis ta Siisa? Ita taula, o karika ita mene taula?”

<sup>15</sup>Me ia ghe kilakila kamekameaaira, me ghe uela etaira va, “Vaalua me am tootoongainaghi? Ghaa mae tivilau viliki veu me atara.” <sup>16</sup>Laghe tau lao sio viliki veu etivilau etana me ghe uela etaira va, “See tootoona ateva me ararina atea o?”

Me laghe uela va, “Siisa.”

<sup>17</sup>Me Iesu ghe liula me ghe uela etaira va, “Am taula voto kanna Siisa ta Siisa, me voto kanna God ta God.”

Me laghe soghiaala tani nongo llo ghe auliaala.

**Maulue ateva tale kosa  
ateva auena emae**

(Mat 22:23-33; Luk 20:27-40)

<sup>18</sup> Sadiusi etoa, karika la ghaiesoa tale nitotu tale nimate, katoa etaira laghe mae sio ta Iesu me laghe uela etana va, <sup>19</sup> “Tisa! Moses ghe piti elokoila va arova taita ateva lailai ia emate me karika rigi natuna, nengane ateva aue eghaa vausenna ateva ang ghe rau evuluela, me aue natuirarua aitiutiu eteva aliki, la nnainia va natuna ia tuena.<sup>§</sup> <sup>20</sup> Tue me nenga ghaitu. Aitiutiu eteva ghe laila, me karika rigi natuna me ghe matela. <sup>21</sup> Ghaluene ateva ghe ghaala vausenna ateva tuena, ghe rau evuluela. Me ie tee ghe mene matela nau karika rigi natuna. Ase voto ateva o ghe mene lutula ta aiaakotonna ateva aliki. <sup>22</sup> Tue me nenga ghaitu laghe ghaala vause ateva, me karika rigi natuira me laghe matela, me vause ateva ghe mate aruula. <sup>23</sup> Nau nitotu tale nimate, see aue evausenna ia vause ateva o, poli ila akapa laghe laila etana?”

<sup>24</sup> Iesu ghe liula me ghe uela va, “Nannaaimim karika ghulughuluena, poli karika am kilakila Uru ngai Manga ateva me sarasarakaniaane God. <sup>25</sup> Nau God aue etotu taumattu matena, taita atoa me vause atoa karika aue la lai; aue la nongina ensolo atoa epona liu. <sup>26</sup> Me tale nitotu ta taumattu matena, karika am ghe ritila tale unna buku eteva Moses, tale kiukiu natu ai erighi, God ghe uela va, ‘Aghi kapuna Goto ieghi Abraham, Aisiki me Jekop.’<sup>\*\*</sup> <sup>27</sup> God karika va kapuira Goto ia lo atoa taumattu matena ila, ta kapuira Goto ia lo atoa maulue

ila. Am Sadiusi etoa, inangarimim nim kamena.”

**Mata ngemua ateva  
inangari nipaopao**

(Mat 22:34-40; Luk 10:25-28)

<sup>28</sup> Tau ngai aapasunga ngateva tale inangari nipaopao ghe usila tani nongo nau eteva Sadiusi etoa laghe sama teela Iesu. Ghe nongola va Iesu ghe liu emasinailia inangariira Sadiusi etoa. Li-una avalua o me ghe kolomila Iesu tale nikokkolomi eteva va, “Sa ateva inangari nipaopao mata ngemua ia me namuu ia tale isaa akapa inangari nipaopao?”

<sup>29</sup> Iesu ghe liula me ghe uela va, “Mata ngemua ateva voto va, ‘Israeli etoa, am nongo, Vau palepale ateva kapuimim ia, ia nonga vau tuungi ia. <sup>30</sup> Uaielousia Vaum ateva kapum Goto ia tale urunguitanim ateva, me tale maamauluaam, me tale nannaam, me tale sarasarakaniaam akapa.’<sup>††</sup> <sup>31</sup> Me aiaaghaluena ateva inangari nipaopao eue va, ‘Uaielousia taumattu ngateva kalakalangina ia etam, nongina uaielousieinio.’<sup>‡‡</sup> Inangari nipaopao alua o, namuu ilalua tale isaa akapa inangari nipaopao.”

<sup>32</sup> Me tau ngai aapasunga ateva tale inangari nipaopao ghe uela va, “Masi-naaili, tisa. Koronna llo inangari nguau-liaala va Vau eteva epona liu ia nonga Vau palepale ia, karika mene teva nongina ia. <sup>33</sup> Me ita aielousia Vau ngepona liu eteva tale urunguitaniita, me tale nannaaita, me tale sarasarakaniaaita, me ita aielousia taumattu ngatua kalakalangina ila etaita, nongina ita aielousieinita. Poli masina tani aimuli

§12:19 Aitiutiu 38:8; Diuteronomi 25:5

\*\*12:26 Eksodas 3:6

††12:30 Diuteronomi 6:4-5

‡‡12:31 Levitikas 19:18

tee inangari nipaopao alua o, me tani ghelei asease aiaavususuena.”

<sup>34</sup>Iesu ghe nongo kilala alomasaan-ganiaane taumattu ngateva o, me ghe uela etana va, “Io karika masau io tale ararimangalina ateva God.” Ghe ruu evaluela o me ila akapa laghe matautula tani kolomi Iesu tale mene righi nikokkolomi.

### See tuvuna ia Mesaea?

(Mat 22:41-46; Luk 20:41-44)

<sup>35</sup>Iesu ghe tokatoka elome tale ale manga ateva me ghe aapasungaa voto ta taumattu ngatoa. Ghe ue va, “Vaalua me tau ngai aapasunga atoa tale inangari nipaopao la uue va Mesaea tuvuna ia Deivit? <sup>36</sup>Me Spirit Manga ateva ghe tokala ta Deivit, me Deivit ghe uela va, ‘Vau eteva ghe uela ta kapughu vau eteva va,

“Toka siola tale pai muenna ativilau lomose ta aghatoka sio lo atoa la sessa teeio euu, me uatingina saooa kkem etaira.”<sup>¶</sup>

<sup>37</sup>Deivit ghe uela va Mesaea vauna ia. Vaalua me ghele mene tuvuna ia?”

Oroianaaili taumattu laghe nongonon-goia me laghe maamasiangaili llo ghe aauliaa.

### Tau ngai aapasunga atoa tale inangari nipaopao

(Mat 23:1-36; Luk 20:45-47)

<sup>38</sup>Nau Iesu ghe mene aapasunga, ghe uela va, “Am taatara amasina tale gheegheleiaaira, tau ngai aapasunga atoa tale inangari nipaopao. La ghaloanna nonga tani asae masi ghinna nongina namu ngatoa, me tani ghaa nio-neoneaa tale tummatavanga. <sup>39</sup>Me ila la ghaloanna tani toka tale masi aitokatoke uneira namu ngatoa tale ale nivelu

eitaue ngatoa, me tale ninamanama atoa. <sup>40</sup>Tisa ngatoa la kamekame vause atoa rau evulu ila me la ghainao peiira, me la ghaitatarainila tani ghelei aluse pure atoa. Nau niaisakei, aue la ghaa nimmarikana namungaili.”

### Kanna opring vause rau evulu eteva

(Luk 21:1-4)

<sup>41</sup>Iesu ghe ssola tale ale manga ateva me ghe toka siola ta pai kativilau tale voto ateva la kaakaai viliki veu, me ghe taatara taumattu ngatoa laghe kaakaai kaluira viliki veu. Oro tau peipeiena atoa laghe kaakaai oroieili kaluira viliki veu. <sup>42</sup>Vara me vause rau evulu eteva, karika tau peipeiena ia, ghe kaaila tapiri velu eluevilau.

<sup>43</sup>Iesu ghe kolola kapuna disaepolo atoa me ghe uela etaira va, “Aghaulia ngakoronna etaimim va ia o vause ateva ghe kaaila oroi viliki veu tale aikaai viliki veu eteva, me katoa laghe kaaila malaki. <sup>44</sup>Ta ila akapaaili, laghe kaaila kasina nonga uneira viliki veu, me oroi isaa elo ale, me ia o vause ateva ghe tau ekapa lao sio unna viliki veu tale aikaai viliki veu eteva, karika righi viliki veu tani mene poli righi peina.”

### Aue la tturuu ale manga ateva

(Mat 24:1-2; Luk 21:5-6)

**13** Nau Iesu ghe kupi ghoala tale ale manga ateva, kateva tana kapuna disaepolo ghe uela etana va, “Tisa, tarala masi atu etoa namungaili ila, me masi ale atoa.”

<sup>2</sup>Iesu ghe liula me ghe uela va, “Utaatara kinatama ale okae? Karika teva atu aue etoka saooa ta mene kateva. Aue taumattu ngatoa la puli reerekata isaa akapaaili oia voto.”

<sup>¶</sup>12:36 Sams 110:1

**Iesu ghe aulia ngaotula  
sesa nau aue emae**

(Mat 24:3-14; Luk 21:7-19)

<sup>3</sup>Nau eteva Iesu ghe nim tokatoka poi sio tale motouru eteva eOliv tale pai kativilau tale ale manga ateva, me Pita, Jeimis, Jon me Andru laghe mae sio tani kolomi einaoa, <sup>4</sup>laghe uela va, “Auliaala etaimami, isaa o voto lovisaa elutu? Me sa aimatootongana aue elutu, me auena voto o emae?”

<sup>5</sup>Iesu ghe uela etaira va, “Am paniem, teva taumattu erau kameam. <sup>6</sup>Oroi ila lo atoa aue la mae tale ararighi eteae, me aue la ue va, ‘Aghi oia Mesaea ngateva,’ me aue la kame oroieili ila taumattu ngatoa. <sup>7</sup>Me nau am nongo niaviuvi me kiukiuna, am rau mene matautu. Isaa o voto aue elutu, me airuuruu tale kosa ateva karika ghe mae. <sup>8</sup>Patunganua atoa aue la ghaiuvieinila; me ararimangali etoa aue la ghaiuvieinila tee. Aue rukeruke atoa la ruke kasina voto tale kosa ateva me maloo atoa aue la lutu tee. Isaa o voto aue enim aitiutiu tale nimmarikana, nongina mmarikana eghaaghaa kinna ateva aliki eteva nau elutulutu.

<sup>9</sup>“Am oia am anguu taatara, ta isaa toko voto aue elutu. Am aue la kuneiem me la laoiniem tale liu niaisakei. Aue la mae la uviem tale ale nivelu eitauaa, me aue la ghatingingaiem emua ta gavana ngatoa me kingi etoa poli ararighi eteae, me tani auliaa masi inangari. <sup>10</sup>Me mata ngemua ateva voto, masi inangari oia etani lao akapa see tale patunganua akapa atoa. <sup>11</sup>Nau eteva la kuneiem me la laoiniem tale liu niaisakei, karika am mene matautu, me am annaa va sa ateva aue am aulieinia; ia o nau eteva, am ppoaaa voto God aue etau aatu tale nannaaimim. Poli inangari am ppoaaa

karika va inangariimim; ta inangarina Spirit Manga ateva.

<sup>12</sup>“Taumattu ngatoa aue la tau velu tueira me nengaira atoa ta lo atoa aue la uvi ematela, me tamaira atoa aue la ghelei tee ta natuira atoa. Aliko etoa tee aue la ssa tee tamaira me kinaira atoa, me aue la uvi ematela. <sup>13</sup>Taumattu ngakapa atoa aue la ssa teeiem poli ararighi eteae. Me see etingina akorokorongana tale unna niaikaia tale airuuruu, maamaluane aue esaanga.

**Voto sesaaili aue emae**

(Mat 24:15-28; Luk 21:20-24)

<sup>14</sup>“Nau am tara voto sesaaili elutu tale voto karika liuna tani lutu me eghelei taumattu ngatoa la kasu vuli me ale manga ateva aue enim toka<sup>§§</sup>, (lo ateva taumattu aue etara kila aue ealomasanga) lo atoa elome eJudia am ilou sae tale motouru. <sup>15</sup>Me karika teva etokatoka eleka tale alena ateva emene kupi sso elo ale me esso ghaa righi voto. <sup>16</sup>Karika teva eutana emene kiri lao tanganuena me elaa ghaa teva unna aiaasae ngeleka. <sup>17</sup>Alousiusi ta lo atoa la susunuku me lo atoa la sussu tale isaa o nau! <sup>18</sup>Am looloo sae va voto o erau mene lutu tale nau kkaili, <sup>19</sup>poli voto sesa tale nau oia, aue esesaaili me tale isaa too nau ang ghe lao sio. Tale kosa ateva oia, karika aue emene righi ase nau evalua o, nongina aitiutiu nau God ghe gheleila kosa ateva me nau ghaine, me auena karika aue emene righi voto avalua o elutu. <sup>20</sup>Arova Vau palepale ateva karika ghe atukunala isaa o sesa nau, taumattu ngakapa atoa aue la ghele raua, poli enannangaili isaa o taumattu ghe suitoongaala, liuna avalua o me ghe atukunala nau. <sup>21</sup>Aue lo ateva o nau arova toa la ue etaimim va, ‘Tarala, Mesaea ngateva toko!’ me mene, ‘Tarala,

§§13:14 Daniel 9:27; 11:31; 12:11

ie too!' karika am mene aikaaia inangari-ira. <sup>22</sup>Ta poli katoa taumattu aue la mae me aue la kame va, 'Aghi Mesaea ngat-eva,' me mene katoa aue la kame va, 'Aghi propete ieghi' aue la mae la ghelei aimatootoongana me voto tani apasunga sarasarakaniaaira tani kame taumattu Vau palepale ghe suitoongaala, kotiva isaa o voto aue eroo. <sup>23</sup>Liuna avalua o me aghaauliaa va am taatara amasina, voto akapa oia ngaghe aulia ngamuemue alokoila etaimim.

**Maemaeaeane Natuna  
ateva Taumattu ngateva**

(Mat 24:29-31; Luk 21:25-28)

<sup>24</sup>"Tale isaa o nau me sesa nau auena, "sinaka ateva aue esaurrom, me ulana ateva karika aue emallanga, <sup>25</sup>me katto atoa elomarase aue la katuu, me voto atoa korokorongana ila elomarase aue la ghaisiisia.\*

<sup>26</sup>"Me aue la tara Natuna ateva Tau-mattu ngateva aue emae tale urukookoo. Emae tee korokoronganiaane me kinatama mallangina. <sup>27</sup>Me aue esungi ensolo atoa la lao tale ghaata aighoughou tale kosa ateva tani kolo aitauaa lo atoa ghe suitoongainilala, tale kosa akapa ateva.

**Am ghaa ninannaa tale fig atee**

(Mat 24:32-35; Luk 21:29-33)

<sup>28</sup>"Am rooroo tani ghaa alomasaanga tale kiukiu niaimatoonga tale fig atee. Nau eteva am tara ai eteae ange tulutulu, am kila va masi nau tale sinaka ateva ange kalakalaala. <sup>29</sup>Liuna avalua o, nau eteva am tara isaa o voto, aue am kila va ange kalakalanginginala, tapaa ngatamana. <sup>30</sup>Aghaaulia ngakoronna etaimim va lo ateva oia vituu karika poi aue ekapa me

isaa o voto aue elutu. <sup>31</sup>Elomarase me kosa ateva oia aue ekapa me inangarighi karika poi aue ekapa.

**Karika teva ekilakila nau  
isaa o voto aue elutu**

(Mat 24:36-44)

<sup>32</sup>"Me ia o nau eteva o aoa ngateva, karika teva ekilakilaia. Ensolo ngepona liu tee atoa karika la kilakila, me Natuna tee. Nim Tamaghi nonga ekilakila. <sup>33</sup>Am anguu taatara me am aimonomosiaa† poli am tam kilakila va saa nau eteva isaa o voto aue emae. <sup>34</sup>Nonginaaili tau-mattu ngateva ang ghe kasukasu vuli tanguena, me ghe taula niuungu ta kapuna tau ngai nongonongo anna atoa. Ghe aikoitata niuungu ta kateva kateva etaira, me ghe uela ta lo ateva ghe aitoya atamana atee va eanguu taatara.

<sup>35</sup>"Mausina avalua o me am anguu taatara atoka poli karika am kilakila va lovisaa tau ngalena emene kiriaa: aue elo alai, o eleivoo, o elo pai, o elue talaua. <sup>36</sup>Erau rekata parasi va etaraiem ta am aseasekanua. <sup>37</sup>Voto aghaauliaa etaimim, aghaauliaa tee ta taumattu ngakapa atoa va, 'Am anguu taatara atoka!'"

**Laghe paepae salana  
tani uvi emate Iesu**

(Mat 26:1-5; Luk 22:1-2; Jon 11:45-53)

**14** Kasi ghalua nau me auena niaimonomosiaa tale ninamanama atee ta Pasova ngateva me ninamanama atee tale verete karika righi isti etana ghe mae. Me namu ngatoya tale pristi etoa me tau ngai aapasunga atoa tale inangari nipaopao ngila ghe paepae righi salana tani kune aisuliaa Iesu me la uvi ematea. <sup>2</sup>Laghe uela

\*13:25 Aisaea 13:10; 34:4

†13:33 *aimonomosiaa* Kasina uru ngai laghe pitila, laghe uela va, *aimonomosiaa me am looloo sae*

va, “Ita rau mene ghelei tale nau nina-manama, ta taumattu ngatōa la rau tiuaa teae niaiuvi.”

**Vause ateva ghe kaola llo masi  
ngusungusuaane ta uruna Iesu**

(Mat 26:6-13; Jon 12:1-8)

<sup>3</sup>Iesu eBetani tale alena ateva Sae-mon emua arau lepaana ia. Nau Iesu ang ghe namanama, me vause ateva ghe sso tee mae aikakkaai eteva, laghe ghelelela tale atu eteva alabasta<sup>‡</sup> ia, pasu ia tale aiaavusuvusuena laghe ghelelela nonga tale oane natu ai erighi la koloa va nadi ia, aipolina namungaili. Ghe ghelei polakila aikakkaai eteva me ghe kaola aiaavusuvusuena ateva ta uruna Iesu.

<sup>4</sup>Katoa taumattu laghe tokatoka ghe sessailala me laghe aippooaa elome etaira va, “Vaalua me eruuruungia aiaavusuvusuena ateva? <sup>5</sup>La rooroo tani poli ta kotolu ai (300) silva koen<sup>¶</sup>, me viliki veu la tau lao ta taumattu karika righi peira.” Me laghe kisokisoia.

<sup>6</sup>Me Iesu ghe uela va, “Ratiela! Vaalua me am poppooaa teeia? Ange gheleila masi voto etaghi. <sup>7</sup>Llo taumattu karika peira la tokatoka teiem nau ekapa atoa. Am rooroo tani sausila nau eteva am aloanna. Aghi karika atokatoka teiem nau ekapa atoa. <sup>8</sup>Nge gheleila voto eroroo tani ghelei; ange kaola aiaavusuvusuena ta vilikighi tani aimonomosiaa ngamuemua tale nikkaia. <sup>9</sup>Aghaulia ngakoronna va eaa aue la ppoaa masi kiukiu eteva tale kosa ateva, aue la ghauliaa tee masi gheleiaane vause ateva oia, tani nnaainia.”

<sup>10</sup>Me Jiudas Iskariot, kateva ta kasan-gaulu ghalua (12) disaepolo, ghe lao sio ta namu ngatōa ta pristi etoa tani taula Iesu ta nimaira. <sup>11</sup>Laghe nongo aval-

uela o me laghe masimasila, me laghe gheleila inangari nialokoi va aue la taula righi viliki veu. Me Jiudas ghe tiuaala tani pae salana tani tau lao Iesu ta ngetaira.

**Iesu ghe namanama teela  
kapuna disaepolo atoa**

(Mat 26:17-25; Luk 22:7-14,  
21-23; Jon 13:21-30)

<sup>12</sup>Tale aitiutiueteva nau tale nivelu eitauaa tale verete karika righi isti etana, nau eteva laghe uviuvi emate Pasova sipsipi eteva, kapuna disaepolo atoa Iesu laghe mae sio me laghe uela etana va, “Eaa uanna va ami laa ghaimonomosiaa voto me ughelei nina-manama atea ta Pasova?”

<sup>13</sup>Liuna avalua o me ghe suula ghalua tani kapuna disaepolo. Ghe uela etairarua va, “Amalu lao tale masaliki taatara atea, me nau amalu tara taumattu ngateva, esuusunuki aikaai manu eteva, amalu usia. <sup>14</sup>Lo ateva ale elaa kupi sso etana, amalu ue ta tau ngalena va, ‘Tisa euela va, “Eaa ia lo atiulu rum aue atoka etana, me aue anama Pasova ngateva tee kapughu disaepolo atoa?”’ <sup>15</sup>Me aue eapasunga rum atiulu epona namuu ia, me ngeila aimonomosiaa ngatokaiela. Amalu aimonomosiaa aneita inana tale ia o rum atiulu.”

<sup>16</sup>Disaepolo alua lalu ghe lao sio tale masaliki taatara atea, me lalu ghe saopi ekapala voto Iesu ghe auliaala. Me lalu ghe aipanipaniaala inana tale Pasova ngateva.

<sup>17</sup>Vara elo alai me Iesu me kasan-gaulu ghalua disaepolo laghe rekatala.

<sup>18</sup>Laghe tiuaala tani namanama, me Iesu ghe uela etaira va, “Aghaulia ngakoronna etaimim va kateva etaimim

<sup>‡</sup>14:3 *alabasta* Utara *Malleeana inangari*

<sup>¶</sup>14:5 *silva koen* Silva koen ativilau (denarius) eroroo aipolina kateva nau



aue etaueghi lao ta nimaira tau ngai ssateeghi etoa. Taumattu ngateva ia oia ange namanama teeieghi.”

<sup>19</sup> Disaepolo atoa laghe tiuaala tani alousiusi, me kateva kateva etaira ghe kokkolomi Iesu va, “Koti aghi, no?”

<sup>20</sup> Ghe liula me ghe uela va, “Kateva ta kasangaulu ghalua kapughu disaepolo, lo ateva aue angalu asuu eitauaa verete tale pelete ativilau livulivukana ia aikaai nginana ia. <sup>21</sup> Poli Natuna ateva Taumattu ngateva aue elao nongina vaalua laghe piti elokoila va emate. Me alousiusi tale taumattu ngateva etautau lao Natuna ateva Taumattu ngateva ta tau ngai ssateena atoa. Aue ghele masina etana arova ghe tam lutula.”

**Iesu ghe tau lao sio verete  
me uaeni ta disaepolo atoa**

*(Mat 26:26-30; Luk  
22:15-20; 1 Kor 11:23-25)*

<sup>22</sup> Laghe namanama, me Iesu ghe ghaala verete ateva me ghe kaili emasina saela, me ghe piriela me ghe taue lao sio ta disaepolo atoa, me ghe uela va, “Am ghaala. Isaa oia verete malataughu.”

<sup>23</sup> Me ghe mene ghaala kapa uaeni eteva, me ghe kaili emasina saela ta God, me ghe taue lao sio etaira, me ila akapa laghe ropila tale ia o kapa uaeni eteva.

<sup>24</sup> Me ghe uela etaira va, “Uaeni eteva oia raeghi ia tani ghelei ouna inangari niaippooa ngaitauaa me aue eakala tani sausi oroi taumattu. <sup>25</sup> Aghaaulia ngakoronna etaimim va karika aue amene ropi uaeni lomosi ta aropi ouna uaeni tale ararimangalina ateva God.”

<sup>26</sup> Me laghe ueila kkinari eteae, me laghe kupi ghoala tale masaliki taatara atea me laghe saela tale motouru eteva eOliv.

**Iesu ghe aulia ngamuemua  
alokoila llo Pita aue eghelei**

*(Mat 26:31-35; Luk  
22:31-34; Jon 13:36-38)*

<sup>27</sup> Iesu ghe uela ta kapuna disaepolo atoa va, “Am akapaaili aue am ilou vulieghi, nongina Uru ngai Manga ateva eaauliaa. Eue va, ‘Aue auvi emate tau ngai toi sipsipi eteva, me sipsipi etoa aue la ilou reerekataa.’<sup>§</sup> <sup>28</sup> Me nau atotu tale nimate aue amuemue lao eGalili me aue am laa taraieghi okae.”

<sup>29</sup> Me Pita ghe uela va, “Arova ila akapa la ilou vulio, aghi karika poi arooroo tani ilou vulio.”

<sup>30</sup> Iesu ghe liula me ghe uela etana va, “Ia o vo ngateva auena taita ateva paolo eaangari ghaluaata, aue uue akasina kotoluaata va karika ukilakilaieghi.”

<sup>31</sup> Pita ghe aikaia ngakoronganaaili liuna avalua o me ghe uela va, “Aue amate teeio, me karika arooroo tani ue va karika akilakilaio.” Ila akapa inangariira nongina Pita.

**Iesu ghe looloo sae eGetsemeni**

*(Mat 26:36-46; Luk 22:39-46)*

<sup>32</sup> Iesu me kapuna disaepolo atoa laghe lao sio tale voto ateva la kolokolo Getsemeni etana, me Iesu ghe uela ta kapuna disaepolo atoa va, “Am toka oia, me alaa looloo sae.” <sup>33</sup> Me ghe kolola Pita, Jeimis me Jon va la usia, me nannaane ghe tiuaala tani maate, me ang ghe ateatea saasakia. <sup>34</sup> Me ghe uela etairatolu va, “Maamauluuaghi ange sessaili tee nialousiusi eteva, me egheleieghi arova amate. Am toka oia me am anguu taatara.”

<sup>35</sup> Ghe nim kasu tee lao sio, me ghe tau siola paane, me ang ghe looloo sae va, arova erooroo, isaa o sesa nau

§14:27 Sekaraia 13:7

eghele kelias. <sup>36</sup> Me ghe uela va, “*Abba*,\*\* Tamaghi, isaa akapa voto urooro tani ghelei. Ughaa velu kapa nimmarikana ateva etaghi, me urau mene ghelei tale aloaloannaaghi ta ughelei tale aloaloannaam.”

<sup>37</sup> Ghe kiriaa lao sio ta disaepolo kotolu me ghe tarailotolla ta latolu ghe aseasekanua, me ghe uela ta Pita va, “Saemon, uaseasekanua? Karika urooro tani anguu ta nim teva aoa? <sup>38</sup> Am anguu taatara me am looloo sae ta God va karika am mene sso tale nitotoonga. Nannaimim eanna tani ghelei voto, me vilikiimim mangoona.”

<sup>39</sup> Me ghe mene kasula tani looloo sae nongina ghe ghelei muela. <sup>40</sup> Vara ghe mene kiriaa mae sio etairotolu me ghe mene saopilotolla ta latolu ghe aseasekanua, poli matairotolu ghe maamateaili. Me karika latolu ghe kilakila sa ateva tani aulieinia.

<sup>41</sup> Ghe kiriaa mae sio aiaakotonna me ghe uela etairotolu va, “Amotolu aseasekanua me amotolu maamatua ngatoka, va? Ange roola! Nau eteva ange rekatala. Am tarala, Natuna ateva Taumattu ngateva ngeila tautauela ta nima maira sesa taumattu ngatoa. <sup>42</sup> Amotolu totula me ita kasu! Lo ateva etautauueghi lao ta tau ngai ssateieghi etoa ange reerekata.”

### **Jiudas ghe tau lao sio Iesu ta tau ngai ssateena atoa**

(*Mat 26:47-56; Luk 22:47-53; Jon 18:3-12*)

<sup>43</sup> Nau Iesu ghe samasama nonga me Jiudas, kateva ta kasangaulu ghalua (12) disaepolo, ghe rekata teela taumattu ngatoa. Laghe posoposo baenata atoa me tuku ngai etoa. Namu ngatoa ta pristi etoa, me tau ngai aapasunga atoa

tale inangari nipaopao, me namu ngatoa laghe sungilala.

<sup>44</sup> Lo ateva ghe taue lao sio etaira ghe auliaala aimatootoongana ateva va, “Lo ateva taumattu angusua, ia o lo ateva am kuneia me am kasueinia.” <sup>45</sup> Nau ghe rekatala, ghe lao sio arau ta Iesu me ghe uela va, “Rabae!” me ghe ngusuela. <sup>46</sup> Laghe kuneieila me laghe poso atinginaieila. <sup>47</sup> Kateva tana taumattu ghe tititingina ghe ghaala iemana baenata ateva, me ghe sai patela talingana ativilau kateva kapuna tau ngai nongonongo anna namu ngateva tale pristi etoa.

<sup>48</sup> Iesu ghe liula me ghe uela etaira va, “Am anna va aghi tau niainao aghi, va am maeaa sio iemaimim baenata me tuku ngai tani ghaaieghi? <sup>49</sup> Nau etoa aghe tokatoka teeiem tale ale manga tani apasungaa, me karika am ghe kunekuneieghi. Me masina, inangari tale Uru ngai Manga ateva ghaine elutu ekoronna.” <sup>50</sup> Me ila akapa disaepolo atoa laghe aitiuaala, me laghe ilou vuliela.

<sup>51</sup> Kateva aliki taita ghe ususia, ghe aitiitia nonga kalio atiulu usousoana ia, nau laghe kune teieila <sup>52</sup> ghe vella kaliona atiulu usousoana ia me ghe nim iloula karika kaliona.

### **Kansolo atoa laghe kookolomi Iesu**

(*Mat 26:57-68; Luk 22:54-55, 63-71; Jon 18:13-14, 19-24*)

<sup>53</sup> Laghe ghaala Iesu me laghe laoinie sio ta namu ngateva tale pristi etoa. Namu ngatoa ta pristi etoa, namu ngatoa, me tau ngai aapasunga atoa tale inangari nipaopao, laghe velu eitauaala. <sup>54</sup> Pita ghe aaimuli me karika ghe akalakalaa ta Iesu. Vara me ghe ssola tale valavala atea etaatatia alena ateva namu ngateva tale pristi etoa. Ghe toka tee siola kapuira tau ngai toitoi etoa

---

\*\*14:36 *Abba* Utara Malloeana inangari

pristi etoa tale sama kura atea me ghe maamaruu.

<sup>55</sup>Namu ngatoa ta pristi etoa me kansolo atoa laghe tootoongala tani pae teva taumattu ghe auliaa righi sesa eeieiaane Iesu me laghe uvi ematea, me karika laghe tarala teva. <sup>56</sup>Katoa taumattu laghe auliaa inangari kamena tee Iesu, me inangariira laghe poppooaa karika ghe laolao aituaa.

<sup>57</sup>Vara me katoa etaira laghe tinginala me laghe aikamea teela Iesu tani ue va, <sup>58</sup>“Ami ghe nongola ta ghe uela va, ‘Aghi aue arruti velu ale manga ateva taumattu ngatoa laghe atulueta ta nimaira, me elome tale kotolu nau aue aghatulu mene kateva, karika taumattu aue atulua ta nimaira.” <sup>59</sup>Me isaa o tee inangari laghe gheleila ghe aikasakasali-aala me ghe aitiaaala.

<sup>60</sup>Vara me namu ngateva ta pristi etoa ghe tinginala emua etaira me ghe kolomila Iesu va, “Karika aue uliu inangariira? Vaalua tale inangari la ghaauliaa teeio?” <sup>61</sup>Me Iesu ghe nim maamatua atingina me karika poi ghe liula inangariira.

Me namu ngateva tale pristi etoa ghe mene kolomiela va, “Koronna va io Mesaea ngateva, natuna io Goto ateva taumattu ngatoa la tautau sae niarangise etana?”

<sup>62</sup>Iesu ghe liula me ghe uela va, “Ue, aghi! Aue am tara Natuna ateva Taumattu ngateva ta etoka sio tale pai muenna ativilau lo ateva sarasarakana ia, me esio tale karaane epona liu.”<sup>††</sup>

<sup>63</sup>Namu ngateva ta pristi etoa ghe rasila ghinnanina, me ghe uela va, “Karika ita mene aloanna mene righi taumattu tani auliaa mene righi inangari. <sup>64</sup>Ngam nongola ange ghaala liuna

ateva God. Sa ateva am aloanna va ita gheleia etana?”

Laghe uela va, “Ange gheleila ssavoto, ita uvi ematea.” <sup>65</sup>Me katoa etaira laghe tiuaala tani kanusia; laghe iri rungaala matane tale kalio, me laghe tuutumaria ta nimaira, me laghe ue va, “Auliaala inangari ghe mae sae ta God va see ange uviuvio!” Me lo atoa la ghaitaraa ale manga ateva laghe ghaaiela me laghe tiuaala tani posalaia.

### Pita ghe uela va etam kilakila Iesu

(*Mat 26:69-75; Luk 22:56-62; Jon 18:15-18, 25-27*)

<sup>66</sup>Pita ghe tokatoka euu, elome tale valavala atea, me kateva vause kapuna tau ngai uungu ia namu ngateva tale pristi etoa ghe mae sio etana. <sup>67</sup>Nau eteva ghe tarala Pita ta ghe maamaruu, ghe lao akalakalangina sio me ghe taatara lao sio etana me ghe uela va, “Io tee ughe kasukasu tee Iesu aNasareti ia.”

<sup>68</sup>Pita ghe uela va, “Karika poi akilakila isaa ona inangari uaauliaa.” Me ghe kasula me ghe kupi ghoala tale atamana atea. Vara me taita paolo ateva ghe aangarila.<sup>‡‡</sup>

<sup>69</sup>Me ia o vause ateva tau ngai uungu ia ghe mene taraiela me ghe uela ta lo atoa laghe tiitingina teeia va, “Kateva tee o.” <sup>70</sup>Me Pita ghe mene uela va, “Karika.”

Karika masau me lo atoa laghe tiitingina kalakalaa laghe uela ta Pita va, “Koronna io kateva etaira, poli io aGalili io.”

<sup>71</sup>Me Pita ghe aulia ngakorokorongan va, “Koronnaaili karika akilakila taumattu ngateva ona am aulieinia. Arova anim kamekame, God aue egheleli righi voto sesa etaghi.”

<sup>††</sup>14:62 Daniel 7:13

<sup>‡‡</sup>14:68 Kasina uru ngai laghe pitila, karika laghe pitila va, *Vara me taita paolo ateva ghe aangarila.*

<sup>72</sup>Vara me taita paolo ateva ghe mene angari eghaluenela, me Pita ghe annaala inangarina Iesu ghe uela va, “Avena paolo taita ateva eaangari ghaluaata aue uue akasina kotoluuaata va karika uk- ilakilaieghi.” Me ang ghe ngangngala alousiusieilila.

### Laghe laooa sio Iesu ta Paelat

(*Mat 27:1-2, 11-14; Luk 23:1-5; Jon 18:28-38*)

**15** Elue talaua poopooa, namu ngatoa tale pristi etoa, namu ngatoa, me tau ngai aapasunga atoa tale inangari nipaopao, laghe velu eitauaala me laghe mae aitauaa sio nonga tale kateva ninannaa. Laghe irila Iesu, me laghe kasueiniela tani laoainia ta Paelat.

<sup>2</sup>Paelat ghe kolomiela va, “Io kingi io ta aJiu etoa?”

Me Iesu ghe uela va, “Ue, nongina uaauliaa.”

<sup>3</sup>Me namu ngatoa tale pristi etoa laghe ppooaala ta Paelat oroi voto karika masina ta Iesu. <sup>4</sup>Me Paelat ghe mene kolomiela va, “Karika aue uliui? Tarala, oroi inangari ngeila auliaa teeiio.”

<sup>5</sup>Me Iesu karika ghe liula inangarina, me Paelat ghe soghiaala eeleeiane.

### Paelat ghe uela va la ghavukala sae Iesu tale aikotoo

(*Mat 27:15-26; Luk 23:13-25; Jon 18:39–19:16*)

<sup>6</sup>Paelat ghe gheelei kateva ase voto nau ekapa atoa nau Pasova ngateva. Ghe tautau velu lo ateva taumattu, taumattu ngatoa la ghanna va ekupi ghoa tale ale mata voovoo. <sup>7</sup>Taumattu ngateva, ararina ateae ta Barabas, ghe tokatoka tale ale mata voovoo, ia me mene katoa taumattu, poli laghe aiuvi teela gavmani me laghe uvi ematela katoa tana taumattu. <sup>8</sup>Taumattu ngatoa laghe lao sio ta Paelat me laghe uela etana va eghelei voto nongina egheelei.

<sup>9</sup>Paelat ghe kolomilala va, “Am anna va atau velu kapuira kingi eteva aJiu etoa?” <sup>10</sup>Poli Paelat ghe kilakila va namu ngatoa tale pristi etoa laghe tam nannaa tee Iesu righi masina, liuna avalua o me laghe maeainie sio tale liu niiasakei. <sup>11</sup>Namuu ta pristi etoa laghe suusulungi taumattu tani ue sae ta Paelat va erau mene tau velu Iesu, ta la ghanna va etau velu Barabas.

<sup>12</sup>Me Paelat ghe mene kolomilala va, “Sa ateva am anna va agheleia ta lo ateva am ue va kapuira kingi aJiu etoa?”

<sup>13</sup>Laghe ovaova atingina tani ue sae va, “Uavukalaie sae tale aikotoo!”

<sup>14</sup>Paelat ghe kolomilala va, “Poli sa? Sa ateva voto sesa ghe gheleila?”

Me laghe mene ovaova anamuu tee lao sio tani ue va, “Avukalaie saela tale aikotoo!”

<sup>15</sup>Poli Paelat ghe aanna tani ghelei emasimasi taumattu ngatoa, liuna avalua o me ghe tau vella Barabas, me ghe taula Iesu ta soldia ngatoa, me laghe uetaiela mua me ghe vira mene tauela va la ghavukalaie sae tale aikotoo.

### Soldia ngatoa laghe auliaa teela Iesu tale inangari

(*Mat 27:27-31; Jon 19:2-3*)

<sup>16</sup>Soldia ngatoa laghe ssoaala Iesu tale ale gavmani eteva la kolokoloa va Praetorium ateva, me laghe kolo aitauaala soldia ngatoa me laghe mae akapa sio. <sup>17</sup>Laghe asaela aiseo ateva ghueghuenna ia ta Iesu me laghe navitaala kou nguru eteva tale uasa ateva rorroana ia, me laghe atokaie saela ta uruna Iesu. <sup>18</sup>Me laghe uue etana va, “Ei, kapuira kingi eteva aJiu etoa!” <sup>19</sup>Me laghe parula uruna ateva tale ai eteae, me laghe kanusuiela, me kateva kateva etaira ghe suusuuiiaa ta liue kkena Iesu tani tau lao namu ngateva etana. <sup>20</sup>Laghe ruu ekapala tani attara ta Iesu, me laghe ghaa

vella aiso e ateva ghueghuenna ia laghe asae tau lao sio etana, me laghe asae taula ghinnanina, me laghe ghaaie lao sio tani laa avukalaie sae tale aikotoo.

### Laghe avukala saela Iesu tale aikotoo

(Mat 27:32-44; Luk 23:26-43; Jon 19:17-27)

<sup>21</sup> Saemon atala nge Saerini ia, natuna ta Aleksanda me Rufus, ghe rekata mae sio me ghe aloanna tani kupi sso, me soldia ngatoo laghe aeala me laghe sungiela va esau aikotoo ateva unna ia Iesu.

<sup>22</sup> Laghe ghaala Iesu me laghe laoinie sio tale voto ateva ararina atea ta Gologota, malloeana va “Voto ateva arova Riu uru taumattu ngateva”. <sup>23</sup> Laghe tau lao sio uaeni laghe kaai teela *murr*<sup>¶</sup> ta Iesu, me ghe tam aloannala tani ropi. <sup>24</sup> Me laghe avukala saela Iesu tale aikotoo, me laghe tivaala tani anamisi tani aikoitaa ghinnanina.

<sup>25</sup> Ta 9 kilok elue talaua<sup>§§</sup> laghe avukala saela Iesu tale aikotoo. <sup>26</sup> Me laghe pitila inangari me laghe avukala tee saela. Laghe pitila laghe uela va, “Ierai oia kapuira Kingi ia aJiu etoa.” <sup>27-28</sup> Laghe avukala tee saela taita alua lalu ghe aiuvi me lalu ghe ghaaghaa peiira taumattu ngatoo, kateva ta pai muenna ativilau, me kateva ta pai uaise ativilau.\* <sup>29</sup> Taumattu ngatoo laghe kasukasu tapaa salana laghe aauliaa teeia inangari karika masina. Laghe ringaringa me laghe samasama anamuu tani ue va, “Ei! Io oia ughe uela va urooroo tani rruiti ale manga ateva me umene atulua ta kotolu nonga nau,

<sup>30</sup> erooroo va ghaine uasaangio me ukkure vulu sio aikotoo ateva?”

<sup>31</sup> Namu ngatoo ta pristi etoa me tau ngai aapasunga atoa tale inangari ni-paopao laghe aamammarasaia tani ue elome etaira va, “Ghe asaangi katoa, me karika erooroo tani asaangia! <sup>32</sup> Arova Mesaea ia, kapuira kingi alsraeli etoa, ghaine etani kkure vulu sio aikotoo ateva, me aue ita aieso etana nau ita tara.” Tau niainao me tau niaviu tee alua, lalu ghe aauliaa teeia inangari.

### Iesu ghe matela

(Mat 27:45-56; Luk 23:44-49; Jon 19:28-30)

<sup>33</sup> Tale pai ngelo sinaka ativilau<sup>†</sup> me saurrom ateva ghe mae sio, ghe akoula kosa ateva ghe roola kotolu aoa. <sup>34</sup> Me ta 3 kilok elo alai<sup>‡</sup> Iesu ghe sama anamungailila me ghe uela va, “*Eloi, Eloi, lama sabaktani?*” (malloeana va, “Kapughu Goto ateva, Kapughu Goto ateva, vaalua me angu tau velueghila?”<sup>¶</sup>)

<sup>35</sup> Nau katoa taumattu laghe tiitingina akalakalangina laghe nongola isaa o inangari, laghe uela va, “Am nongola, ekolokolo Elaija.”

<sup>36</sup> Me kateva taumattu ghe iloula tani laa asuu tuku kalio ateva tale uaeni kaakaalina, me ghe apasapasaiela tale ai eteae, me ghe taue saela va Iesu ghe mmua. Ghe uela va, “Ita toitoi mua, me ita tara va kotiva Elaija esio me eghaa velue sio.”

<sup>37</sup> Me Iesu ghe ovaova anamungailila, me inoane ghe kapala.

<sup>¶</sup>15:23 *murr* Utara Malloeana inangari

<sup>§§</sup>15:25 9 kilok elue talaua Tale inangari nge Grik, *aiakotonna ateva aoa*

\*15:27-28 Kasina uru ngai laghe pitila, laghe uela va, <sup>28</sup> *Inangari tale Uru ngai Manga ateva laghe pitila ange lutu ekoronnala va, “Eghe usila tani ghaa nimmarikana tee tau ssavoto atoa.”* (Luk 22:37)

<sup>†</sup>15:33 *pai ngelo sinaka ativilau* Tale inangari nge Grik, *ghaonovina (6) ateva aoa*

<sup>‡</sup>15:34 3 kilok elo alai Tale inangari nge Grik, *aiaghasio (9) ateva aoa*

<sup>¶</sup>15:34 Sams 22:1

<sup>38</sup> Kalio atiulu ghe vuuvukala tale ale manga ateva ghe tarrila elome, ghe tiuaala epona me ghe laa sio ruu euu. <sup>39</sup> Me nau lo ateva tau ngai uvi eaitoiaa kateva ai (100) tau ngai uvi ghe tiitingina emua tani tara Iesu ghe nongola Iesu ghe samala, me ghe tarala vaalua ghe matela, soldia ngateva ghe uela va, “Koronnaaili taumattu ngateva oia Natuna ia God!”

<sup>40</sup> Katoa tana vause laghe tiitingina amasau me laghe taatara. Elome etaira Meri aMakdala ia, Salome, me Meri kinairarue ia Jeimis ghauna me Joses. <sup>41</sup> Nau Iesu ghe tokatoka eGalili, ila o vause atoa laghe aimuli teeia me laghe saasausia, me mene oroi katoa vause laghe mae aitaaua teeie sio eJerusalem.

### **Laghe alokoila Iesu tale lienga niaikaia ngateae**

*(Mat 27:57-61; Luk  
23:50-56; Jon 19:38-42)*

<sup>42</sup> Nau ghe elo alaila ta nau niaimonomonosia ngateva, lo ateva nau emuli ia ta nau manga ateva, <sup>43</sup> Josep, tanguenua tale masaliki taatara atea eArimatia, namuu ia ta Kansolo atoa, me ie tee ghe toitoi ararimangalina ateva God, karika ghe moiela tani sso tara Paelat. Ghe loola Iesu tani laa kaieinia. <sup>44</sup> Paelat ghe soghila tani nongo va gharovaeata ta ang ghe matela, me ghe kolola namu ngateva ta soldia ngatoa, me ghe kolomiela va, “Ange matela?” <sup>45</sup> Nau namu ngateva ghe uela va ang ghe matela, Paelat ghe uela va Josep eroroo tani ghaa Iesu. <sup>46</sup> Josep ghe polila masi kalio atiulu usousoana ia, ghe ghaa velu siola Iesu tale aikotoo. Me ghe sumuela, me ghe laoainie sio tani alokoia tale lienga niaikaia ngateae

laghe kaie ssola elome tale vallae. Ghe atakirila atu eteva tani atingina runga liu eteva. <sup>47</sup> Me Meri aMakdala ia me Meri kinna ia Joses lalu ghe tarala nongina laghe alokoieia.

### **Iesu ghe totula tale nimate**

*(Mat 28:1-8; Luk 24:1-12; Jon 20:1-10)*

**16** Nau eteva nau manga ateva ghe kapala, Meri aMakdala ia, Salome me Meri kinna ia Jeimis, laghe polila oeli masi ngusungusuaana tani laa rariaa ta vilikina Iesu. <sup>2</sup> Elue talau poopooa tale aitiutiue eteva nau, laghe lao sio tale lienga niaikaia ngateae nau sinaka ateva ang ghe saela. <sup>3</sup> Laghe kasu aikolomi va, “See aue eatakiri velu atu eteva tale paa lienga atea?”

<sup>4</sup> Vara laghe taatarala, me laghe tarala va karika teva atu tale paa lienga niaikaia ngateae, me atu eteva namungaili ia ang ghe toka ppae lao sio. <sup>5</sup> Laghe kupi ssola tale paa lienga niaikaia ngateae, me laghe tarala aliki taita ateva ghe tokatoka tale pai muenna ativilau, ghe aasae ghinna usousoana, me laghe matautula.

<sup>6</sup> Alike taita ateva ghe uela etaira va, “Am rau mene matautu. Am paepae Iesu aNasareti ia, ia o ghe matela tale aikotoo. Ange totula, karika ia oia. Am tarala voto ateva laghe alokoieia etana. <sup>7</sup> Am laa auliaa ta kapuna disaepolo atoa, me Pita tee, va Iesu ange muemue lao sio eGalili. Aue am sio taraia okae, nongina ghe auliaala etaimim.”

<sup>8</sup> Gharovaeata ta laghe kupi velu ghoala, me laghe kasu vulila paa lienga niaikaia ngateae, me laghe iloula. Kovaira ghe tallula, me laghe reterete. Karika laghe aippooaa, ta laghe maamatautu.

**Iesu ghe aotuotula  
ta Meri aMakdala ia**

(Mat 28:9-10; Jon 20:11-18)

<sup>9</sup>Nau Iesu ghe totula elue talaua poopooa, tale aitiutiu eteva nau, ghe aotuotue akasinala ta Meri aMakdala ia, ia, ia o Iesu ghe ghaa vella raroai ghaitu (7) etana. <sup>10</sup>Vause ateva o ghe lao sio ghe auliaala ta lo atoa laghe tokatoka tee Iesu, me laghe alousiusi teeia. <sup>11</sup>Me nau laghe nongola Meri ghe uela va Iesu ang ghe sake-sakela, me ia ghe taraiela, karika laghe aiesoaala.

**Iesu ghe aotuotula  
ta mene ghalua disaepolo**

(Luk 24:13-35)

<sup>12</sup>Emulina ghe mene aotuotula ta ghalua kapuna disaepolo lalu ghe kasukasu elao-lao tale salana atikirighi, me taataraane ghe isaa ppaela. <sup>13</sup>Lalu ghe kiri lao sio ta mene katoa kapuna disaepolo tani auliaa, me karika laghe aiesoaala.

**Iesu ghe mene aotuotula ta  
kasangaulu kateva disaepolo**

(Mat 28:16-20; Luk 24:36-49;  
Jon 20:19-23; Apostolo 1:6-8)

<sup>14</sup>Emulina ghe mene aotuotula ta kasangaulu kateva (11) kapuna disaepolo,

nau laghe namanama. Karika ghe masieinilala poli karika laghe aiesoainia me nannaaira masaeili etana, ta poli karika laghe aiesoa lo atoa laghe auliaa va Iesu ange totula.

<sup>15</sup>Me ghe uela etaira va, “Am lao tale kosa akapa ateva, me am laa ppooaa masi inangari tale taumattu ngakapa atoa. <sup>16</sup>Lo ateva taumattu aue eaiesoa me la ghasuua, aue esaanga. Lo ateva karika eaiesoa aue eaisakei me eghaa nimmarikana. <sup>17</sup>Lo atoa la ghaiesoa aue la ghelei niaimatootoongana: Tale ararighi eteae aue la ghaa velu raroai etoa, me aue la ghaippooaa tale oroieili asease nisama. <sup>18</sup>Aue la poso katu ngatoa ta nimaira. Arova la ropi righi manu sesaaili, karika la rooro tani mate. Aue la poso tau sessa atoa me tau sessa atoa aue la masina.”

**Iesu ghe laa saesae epona liu**

(Luk 24:50-53; Apostolo 1:9-11)

<sup>19</sup>Emuli nau Vau eteva Iesu ghe ruula tani aippooaa teeila, God ghe ghaaiela, me ghe saela epona liu, me ghe tokala tale pai muenna ativilau ta God. <sup>20</sup>Laghe lao sio tani ppooa ngakapa see. Vau Palepale ghe uungu eitauaa teeila tani ghelei aiematootoongana atoa tani asarasarakana inangariira.

---

§16:9 Llo kasina alua tani buku pokane laghe piti ekasinala ta nimaira, karika uorooro tani tara Mak 16:9-20. Oro katoa tau ngalomasaanga la aikaaia va karika Mak ghe pitiela. Katoa tani taumattu laghe nim tara ssola tale mene kasina kiukiu elome tale Uru ngai Manga ateva me laghe nim piti mae sio ta buku eteva ta Mak.

*Masi kiukiu***Luk***ghe pitiela***Aitiutiu**

**1** Namu ngateva Tiopilus, kasina nina-manama ang ghe lao sio, oroi tau-mattu laghe tootoongala tani piti kiukiu-una voto Vau eteva ghe gheleila me ghe lutula elome etaimami. <sup>2</sup>Laghe aimuli tee inangariira lo atoa laghe tarala isaa o voto ta mataira. Laghe tiula ta nau voto ghe tani tiuaala. Isaa o taumattu ghe uungu tale inangarina ateva Vau ngepona ateva me ila laghe tau mae sio isaa oia kiukiu. <sup>3</sup>Liuna avalua o me aghi tee aghaloanna tani piti eghulughuluena isaa o kiukiu me aghasaokie atu ta nge-tam. Aghe ungula oroi nau tani kolomi emasina vaalua isaa o inangari ghe tani tiuaala. Namu ngateva, isaa oia voto ngapitila isaa akapaaili koronna. <sup>4</sup>Utara me aue ukila amasina va isaa o inangari laghe apasungala etam koronna akapa.

**Ensolo ateva ghe uela ta Sekaraea va Jon aue lutu**

<sup>5</sup>Nau Herot kingi ia eJudia, kateva pristi ghe tokatoka, ararina atea ta Sekaraea, tuvuna ia Abija, me vause na ateva, ararina atea ta Elisabet, ie tee tuvuna ta Eron. <sup>6</sup>Ilalua ghulughuluena ilalua ta matane Vau eteva. Lalu ghe aaimuli tee kannanangari nipaopao me inangarina Vau eteva me karika righi gheeleiaairarua sesa ta matane. <sup>7</sup>Me tee, karika righi natuirarua ta poli Elisabet kina ngere ia, me tee lalu ghe taita namuula me vause namuula.

<sup>8</sup>Kateva nau, kapuna atoa Sekaraea, laghe uungu tani ghelei uunguaaira pristi etoa, me Sekaraea, ie tee ghe uungu. <sup>9</sup>Vara me laghe gheleila kasina

salana tani kila va saa pristi eteva esso tale rum manga atiulu tani sso ghelei asu eteva masi ngusungusuaane esae ta Vau eteva. Laghe gheleila isaa o voto me laghe kilala va aue Sekaraea esso. <sup>10</sup>Nau ghe ghelei isaa o voto tani ghelei asu eteva masi ngusungusuaane, taumattu ngatoo laghe looloo sae eleka, elome tale vanisi eteva tale ale manga ateva.

<sup>11</sup>Vara me ensolo ateva kapuna ia Vau eteva ghe otuotula ta Sekaraea. Ghe tiitingina tale pai muenna ativilau tale olta ngateva laghe gheeghelei asu eteva masi ngusungusuaane etana. <sup>12</sup>Sekaraea ghe tarala ensolo ateva, me ghe soghieiniela, me ghe matautula. <sup>13</sup>Me ensolo ateva ghe uela etana va, “Sekaraea, urau mene matautu. Vau eteva ang ghe nongola kalum nilooloo sae etana. Vausenim ateva ta Elisabet aue eghaa aliki eteva taita ia me uase ararina atea ta Jon. <sup>14</sup>Nimasiasi aue etoka ta ngetaimalua me aue amalua toka amasina. Oroi tee taumattu aue emasimasi poli aliki eteva aue elutu, <sup>15</sup>poli ia aue enamuu ta taatarane Vau eteva, me erau mene ropi ueni me manu sarasarakana. Aue Spirit Manga ateva etoka etana nau ia ta kova kinna, me nau ekapa atoa. <sup>16</sup>Ia aue ekatula oroi tau-mattu nge Israeli etoa me aue la mene kiri me la oghi lao ta Vau eteva kapuira God ia. <sup>17</sup>Uunguaane me sarasarakani-aane aue onongina Elaija, me aue emuemue ta Vau eteva. Aue eghelei tamatama atoa me natuira atoa la mae aitaua, me aue la kateva nonga, me aue eghelei emasina nannaaira lo atoa karika la nongonongo usila me aue la ghaa masi ninannaa nongina lo atoa ghulughuluena ila. Aue eghelei taumattu eaimonomosiaa tale maemaeane Vau eteva.”

<sup>18</sup>Me Sekaraea ghe kolomila ensolo ateva va, “Vaalua arooroo tani kila va inangarim koronna, poli ngaghe taita



namuula me vausenighi tee ateva ang ghe vause namuula?”

<sup>19</sup>Me ensolo ateva ghe liula me ghe uela va, “Aghi Gabriel. Atiitingina emua ta matane Vau eteva me ia esungieghila tani sio auliaa isaa oia masi inangari ta ngetam. <sup>20</sup>Unongo! Poli karika uaaiesoaa inangarighi, aue upaavoo. Karika aue usama lomosi ta voto aghauliaala aue elutu. Inangarighi aue elutu ekoronna tale nau Vau eteva eaaloanna.”

<sup>21</sup>Me taumattu ngatoa laghe toitoi poi Sekaraea me ngila ghe nanna va saa ateva ange lutula me karika ange kupikupi ghoa parasi tale rum manga atiulu. <sup>22</sup>Vara me ghe kupi ghoa mae, me karika ghe roola tani aippooaa teeila, me laghe nim kilala va koti ange tarala teva nitaatara ie nonga ange kilaiela tale rum manga atiulu, poli ghe nim suisui me ghe aimatoonga ta nimane, ta ghe paavoola.

<sup>23</sup>Vara nauna tani uungu ghe ruula, me Sekaraea ghe oghi lao sio tangauena. <sup>24</sup>Emuli tale isaa o nau, me vausenna ateva ta Elisabet ang ghe sususunuku, me ghe tam aotuotu poila ghe roola ghalima ulana. <sup>25</sup>Ghe uela va, “Vau eteva ghe alousiusi teeieghila, me ang ghele gheleila ia oia voto ateva ange lutu etaghi, tani ghaa velu nipalata ateva etaghi ta mataira taumattu ngatoa.”

### **Ensolo ateva ghe auliaala kiena Meri va Iesu aue elutu**

<sup>26</sup>Tale aiaaghaonoma ateva (6) ulanina Elisabet nau ghe sususunuku, Vau eteva ghe suula ensol Gabriel tani sio tale natu masaliki erighi eGalili, ararina atea ta Nasareti. <sup>27</sup>Ghe lao sio tani tara aliki vause ateva, karika ghe aso tee poi teva taita, ararina atea ta Meri. Laghe aseainiela va elai ta Josep, tuvuna ia Deivit. <sup>28</sup>Ensolo ateva ghe lao sio etana me ghe uela va, “Elue talaua

etam! God ang ghe arangiseiola, me Vau eteva etokatoka teeio.”

<sup>29</sup>Meri ghe soghiaala tani nongo isaa o inangari, me ghe annangailila va tani saa inangari llo oia. <sup>30</sup>Me ensolo ateva ghe uela va, “Meri, urou mene matautu. Vau eteva aue eghelei masi voto etam. <sup>31</sup>Unongo! Aue ukaai aliki eteva taita ia, me uase ararina atea ta Iesu. <sup>32</sup>Ia aue enamuu, me aue la koloa va Natuna ateva Lo ateva Iaaili Epona. Me Vau eteva God aue egheleia ekingi nongina tuvuna ta Deivit. <sup>33</sup>Ia aue enamuu tale ararimangalina ateva Jekop nau ekapa atoa, me ninamu ngateae etana karika aue ekapa.”

<sup>34</sup>Me Meri ghe kolomila ensolo ateva va, “Isaa o voto, vaalua aue elutu, poli karika aghe aso tee poi teva taita?”

<sup>35</sup>Me ensolo ateva ghe liula inangarina me ghe uela va, “Aue Spirit Manga ateva emae toka etam, me sarasarakanianaane Lo ateva Iaaili Epona aue eakouo. Ia o aliki eteva auena umolenainia aue emanga, me aue la koloa va Natuna ia God. <sup>36</sup>Unongo, mangalim ta Elisabet ang ghe vause namuula, me ia oia ekakkaai me aue emolena, aliki eteva taita ia. Nau to ang ghe lao sio, laghe ue va karika erooro tani ghaa aliki. Me ia oia esusunuku ang ghele ghaonomola (6) ulanina. <sup>37</sup>Poli karika teva voto God etam rooro tani ghelei.”

<sup>38</sup>Me Meri ghe uela va, “Unongo, aghi kapuna vause tau ngai uungu ieghi Vau ngepona ateva. Erooro tani ghelei etaghi voto nongina uauliaa.” Vara me ensolo ateva ghe kasu vuliela.

### **Meri ghe lao sio tani tara Elisabet**

<sup>39</sup>Kasina nau ghe lange sio tale isaa o nau, Meri ghe ailuiluila tani lao tale voto ateva oroi motouru etana tale kateae ppae natu masaliki tale masaliki etea eJudia. <sup>40</sup>Me ghe kupi ssola tanganuena Sekaraea me ghe tarala Elisabet me

ghe uela va, “Elo alai etam.” <sup>41</sup> Nau Elisabet ghe nongola Meri ghe samasama teeia, aliki eteva ta kovane namungaili ta ghe aisiisiaala, me Spirit Manga ateva ghe pasula ta Elisabet. <sup>42</sup> Me ghe sama anamungailila tani ue va, “Vau eteva ang ghe tau aatu sio niarangise elaulau niarangise etautau ta mene katoa vause. la ona aliki eteva ukaakaia aue eghaa niarangise ta Vau eteva. <sup>43</sup> Kalughu saa ateva me kinna ateva Vaughu eteva ange mae sio tani taraieghi? <sup>44</sup> Nau eteva anongola ta usamala, arovaeaata ta aliki eteva ta kovaghi emasimasila me eaisiisiaala. <sup>45</sup> God aue earangiseio poli ughe aiesoala voto Vau eteva ghe uela va aue elutu ta ngetam.”

### Kinarina atea Meri

<sup>46</sup> Meri ghe uela va,  
 “Maamauluaaghi etautau sae ararina atea Vau eteva,  
<sup>47</sup> me urunguitanighi eteva emasimasiangaili God ta eaasaangieghi.  
<sup>48</sup> Aghi nim tau ngai uungu ieghi etana, karika teae ararighi, me ghe taraieghila tale maamasinaane.  
 Ia oia vituu eteva me llo auena vituu aue la ue va Vau eteva ghe arangiseieghila,  
<sup>49</sup> Lo ateva sarasarakanaaili ia ghe gheleila voto namungaili etaghi, me ararina atea manga ia.  
<sup>50</sup> Eaapasunga masi aalousiusiaane ta lo atoa la oneoneainia aue etoka gheelei evalua o tale ia oia vituu eteva me llo auena vituu.  
<sup>51</sup> Ghe gheleila kinatama voto ta nimana, me ta lo atoa la tautau sae nannaaira, aue egheleila la ghaitiuaa see.  
<sup>52</sup> Ghe atoka siola lo atoa taumattu namungila me sarasarakanaaili ila me ghe atingina saela lo atoa taumattu karika rigi arariira.

<sup>53</sup> Ghe tautau masi voto ta lo atoa taumattu maloona ila, me lo atoa tau peipeiena ila, ghe sungisungi vella, nim ila laghe kasukasu karika laghe ghaaghaa rigi voto.

<sup>54</sup> Ghe sausila kapuna tau ngai nongonongo anna atoa ta Israeli etoa, poli eannaa aalousiusiaane

<sup>55</sup> nongina ghe auliaala ta tuvuita atoa, ta Abraham me lo atoa tuvuna auena la lutu.”

<sup>56</sup> Meri ghe toka teela Elisabet ghe roola kotolu ulana me ghe vira mene kiriaa lao sio tanganuena.

### Lutulutuaana Jon tau ngai aasuu ia

<sup>57</sup> Nauna Elisabet tani molenaar, me ghe molenaala aliki eteva taita ia.

<sup>58</sup> Lo atoa taumattu tanganueira aitauaa me kapuna atoa, laghe nongola kiukiu vaalua Vau eteva aalousiusiaane ta Elisabet. Laghe masimasi eitauaa teeiela.

<sup>59</sup> Aiaaghaoaluna (8) ateva nau, taumattu ngatoa laghe mae sio tani velu eitauaa tani iso aliki eteva, me laghe aloanna tani ase ararina atea ta Sekaraea, poli ararina ia tamane.

<sup>60</sup> Kinna aliki eteva ghe uela va, “Karika! Ararina atea ta Jon.”

<sup>61</sup> Me laghe uela etana va, “Karika teva kapuimim ararina ia arari etea ona.”

<sup>62</sup> Me laghe aimatoonga ta nimaira tani kolomi tamana aliki eteva va saa arari etea eaaloannaia. <sup>63</sup> Sekaraea ghe aimatoongala etaira va la ghaa taula tevoo aipitipiti me epiti inangarina. Inangarina ghe pitila ghe uela va, “Aliki eteva, ararina atea ta Jon.” Taumattu ngatoa laghe soghiaala voto laghe tarala.

<sup>64</sup> Arovaeaata ta God ghe otila paane ateva Sekaraea, me Sekaraea ghe samala, me ghe mene tiuaala tani sama me ghe tau saela ararina atea God. <sup>65</sup> Me lo atoa masaliki kalakalangina ila laghe tarala isaa o voto ghe lutula, me ghe

moilala, me kiukiu ghe kasu ekapa seela, me lo akapa atoa laghe tokatoka tale voto ateva oroi motouru etana eJiudia, laghe nongo akapala. <sup>66</sup>Lo akapa atoa taumattu laghe nongola, laghe nnaa sosso laala isaa o kiukiu, me laghe aikolomieinila va, “Aliko eteva oia, aue saa taumattu nau enamuu?” Poli laghe tarala va sarasarakaniaane Vau eteva ghe toka aitauaa teieli.

### Kkinarina atea Sekaraea

<sup>67</sup>Spirit Manga ateva ghe pasula ta Sekaraea, tamane aliki eteva, me ghe poppooa ngamuemuea alokoila inangari tani ue va,

<sup>68</sup>“Ita tau sae ararina atea Vau eteva, kapuira Goto ia Israeli etoa, poli ghe mae sio tani sausi kapuna taumattu ngatoa me ghe poli aoghi teeilala.

<sup>69</sup>Ghe tau mae sio kateva taumattu sarasarakanaaili ia tani sausita elome ta tuvuna atoa Deiviti, kapuna tau ngai nongonongo anna ateva God.

<sup>70</sup>Nongina ghe gheleila inangari nialokoi ta propete atoa manga ila me ila laghe auliaala emua arau,

<sup>71</sup>ghe uela va aue esaangita ta tau ngai ssateeita atoa, me ta nimaira lo atoa esessaieilila etaita.

<sup>72</sup>Ta poli alousiusiaane ghe sausila tuvuita atoa, me eanna inangari manga emua arau ghe auliaa ngalokoila

<sup>73</sup>ghe auliaala inangari nialokoi ta tuvuita ateva ta Abraham.

<sup>74</sup>Eanna tani asaangita ta nimaira tau ngai ssateeita atoa me ita kkaueinia me ita rau mene matautu.

<sup>75</sup>Liuna avalua o me nau ekapa atoa, nau sakesake ita, ita kasu tale salana manga me ghulughuluena ta matane.

<sup>76</sup>Me io, natughu, aue la ghaseo va kapuna propete io Vau eteva;

me io aue umuemuaa Vau eteva tani aimonomosiaa salane atikirighi,

<sup>77</sup>tani ghelei masalika tale kapuna taumattu ngatoa, vaalua tani saanga me eghaa velu kaluira ssavoto,

<sup>78</sup>tale aalousiusiaane kapuira Goto ateva,

me mallanga ngepona liu eteva aue esio etaita

<sup>79</sup>tani tau mae mallanga ateva tale taumattu ngatoa la tokatoka tale saurrom

me tootoo nimate ateva

me tani aitaraa kasukasuaaita tani lao tale salana luei.”

<sup>80</sup>Ia o aliki eteva ghe namuula, me alomasaanganiaane ghe sarasarakanaailila, me ghe tokatoka tale voto ateva karika righe taumattu etana, elomosina ta ghe vira mene ghaala nauna tani ppooa tale taumattu nge Israeli etoa.

### Lutulutuaane Iesu

(Mat 1:18-25)

**2** Tale isaa o nau, Siisa Augustus ghe alokoila kateva inangari va la ghaa akapa arariira taumattu ngatoa. <sup>2</sup>Nau eteva Kuirinius gavana ia eSiria, laghe gheleila aitiutiu eteva sensis. <sup>3</sup>Liuna avalua o me isaa akapa taumattu ghe oghioghi lao tale masaliki tuvuita atoa, me gavmani ghe ghaaghaa arariira.

<sup>4</sup>Poli Josep ararimangalina aitauaa tee Deiviti, liuna avalua o me ghe kasu vulila masaliki etea eNasreti nge Galili, me ghe saela eJiudia tale masalika atea Deiviti, la kolokoloa va Bethlehem, tani aloko ai ararina atea. <sup>5</sup>Ia me vause ateva laghe aseainiela va eghaaia, ararina atea ta Meri, lalu ghe saela va gavmani ghe ghaa arariiraru. Isaa o nau Meri ghe suusunuku. <sup>6</sup>Ilalua eBetliem me ghe ghaala nauna Meri tani mole-

naa, <sup>7</sup> me ghe molenaala natuna aitiutiu eteva aliki taita ia, me ghe ghiisainiela tale kalio me ghe alokoie siola tale aikaai aneira inana ateva vulumakao atoa, poli isaa akapa ale aiasoaso ghe pasula.

### **Ensolo atoa laghe auliaala kieira tau ngai toi sipsipi etoa**

<sup>8</sup> Eleka tale masaliki eteae eBetliem, katoa tana tau ngai toi sipsipi laghe aaitoia kieira ghaata kkena tale voto ateva rarrasa etana, eleivo. <sup>9</sup> Me kateva kapuna ensolo Vau eteva ghe rekataala etaira me mallangina ateva ghe talieinilala me laghe matautu saasakiaala.

<sup>10</sup> Ensolo ateva ghe uela etaira va, “Am rau mene matautu, poli amae sio tani aulia kieimim tale masi kiukiu. Isaa oia inangari aue eghelei isaa akapa taumattu la masimasieili. <sup>11</sup> Ia oia nau eteva aliki eteva, aiasaangimim ia, ange lutula tale masalikina atea Deivit, ia Mesaea ia, me Vau ia. <sup>12</sup> Vaalua aue am kilaia, aue am taraia ghiighiisainia tale kalio, me easoaso tale aikaai aneira inana ateva vulumakao atoa.”

<sup>13</sup> Arovaea nonga ta mene katoa ensolo oroianaaili ila la tokatoka epona liu, laghe kaurekatila, me laghe tingina teela ia o ensolo ateva, me laghe tiuaala tani kkaua ararina atea God, laghe ue va,

<sup>14</sup> “Ita tau sae ararina atea Vau eteva epona liu

me tale kosa ateva luei aue etoka ta lo atoa God emamasieinila.”

<sup>15</sup> Nau ensolo atoa laghe kasu vulilala, me laghe saela epona liu, me tau ngai toi sipsipi etoa laghe aipoo ngaitauaala va, “Ita kasu me ita lao eBetlehem, me ita laa tara isaa o voto ange lutula, Vau eteva eauliaala.”

<sup>16</sup> Laghe ailuiluila tani kasu, me laghe laa saopi sio Meri me Josep me aliki

eteva, ghe asoaso tale aikaai aneira inana ateva vulumakao atoa. <sup>17</sup> Nau eteva laghe taraiela, laghe auliaa seela inangarina aliki eteva, ensolo ateva ghe auliaala etaira. <sup>18</sup> Me ila akapa taumattu ngatoa laghe nongola kiukiu tau ngai toi sipsipi etoa laghe auliaala, me laghe soghiaala. <sup>19</sup> Meri ghe ailokoia ngakapala isaa o inangari tale urunguitanina, me nau ekapa atoa ghe annaa. <sup>20</sup> Tau ngai toi sipsipi etoa laghe oghiaala, me laghe tau saela ararina atea God, me laghe masiasiangailila God, poli isaa akapa voto ensolo ateva ghe auliaala, laghe tarala me laghe nongola, nongina ghe auliaala.

### **Laghe asela ararina atea Iesu**

<sup>21</sup> Aiaaghaoaluna (8) ateva nau laghe isola aliki eteva, me laghe asela ararina atea ta Iesu, kinna karika ghe kaaia me ensolo ateva ghe ase alokoila ararina atea.

### **Simion me Anna lalu ghe tarala Iesu tale ale manga ateva**

<sup>22</sup> Ghe ghaala nau ta Josep me Meri tani raarangisana, tani aimulusi tee inangari nipaopao Moses ghe piti elokoila. Liuna avalua o me lalu ghe saula aliki eteva, me laghe saela eJerusalem tani apasungainia ta Vau eteva. <sup>23</sup> Lalu ghe anna tani aimuli tee inangari kanna Vau eteva eue va, “Isaa akapa aliki taita aitiutiu tani lutu, la apasungainila ta Vau eteva.”\*\* <sup>24</sup> Lalu ghe saela tani ghelei aiaavusuvusuea, nongina inangari Vau eteva ghe auliaala va, “Ghila alua nongina alikao alua, o valusu elua, lalu vira mene naanamuu.”††

<sup>25</sup> Isaa o nau kateva taumattu ghe tokatoka eJerusalem, ararina atea ta

\*\*2:23 Eksodas 13:2, 12

††2:24 Levitikas 12:8

Simion, ghe ghelei nonga voto ghulughuluena, me ghe aaimuli tee God. Spirit Manga ateva ghe tokatoka ta ngetana. Ghe toitoi ia o taumattu ngateva aue alona eusi Israeli etoa. <sup>26</sup> Spirit Manga ateva ang ghe aotula etana va karika aue emate lomosi ta etara mua kapuna Mesaea ngateva Vau eteva. <sup>27</sup> Spirit Manga ateva ghe gheleuela, me ghe kupi ssola elome tale vanisi eteva tale ale manga ateva, me kinna me tamane Iesu lalu ghe maeaa sio ia o aliki eteva Iesu etana, tani ghelei voto inangari nipaopao eaauliaa. <sup>28</sup> Me Simion ghe sauela me ghe kalopiela, me ghe tau saela ararina ateae God, me ghe uela va, <sup>29</sup> “Vau eteva, aghi kapum tau ngai nongonongo anna ieghi, ia oia urooroo tani tau velueghi tale luei, nongina ughe auliaala. <sup>30</sup> Mataghi ange tarala kalum niasaangi eteva, <sup>31</sup> ughe aimanomanosieiniela ta mataira isaa akapa taumattu ngatoa, <sup>32</sup> ia mallanga ia eaapasunga Vau eteva ta mene katoa anue namuu, me aue la gharua kapum taumattu nge Israeli etoa.”

<sup>33</sup> Tamana me kinna Iesu lalu ghe soosoghiaa voto Simion ghe aauliaa tee Iesu. <sup>34</sup> Me Simion ghe arangiseilaluela, me ghe uela ta Meri va, “Ia oia natum ateva aue eghelei oroī taumattu nge Israeli, katoa aue la mate, me katoa aue la saanga, aue etoka tani aimatootoongana ta taumattu ngatoa, me karika poi aue la annaia, <sup>35</sup> me aue eghelei nannaaira eaisulia aue eotu. Me io, Meri, alousiuisiam aue enongina iema ateva epasapasa urunguitanim ateva.”

<sup>36</sup> Vause ateva, propete ia, ghe vause namungailila, ararina ateae ta Anna, natuna ia Panuel, tale ararimangali eteva ta Asa, ie tee ghe tokatoka tale ale manga ateva. Nau ghe laila ghe toka teela taitanna ateva ghaituae (7)

ninamanama nonga me taitanna ateva ghe raue vulueta. <sup>37</sup> Taitanna ateva ghe raue vulueta, me ghe tokala ghe roola ghaolungaulu ghaatiae (84) anna ninamanama, me ghe kakkaua tale ale manga ateva ellaa me eleivo, me ghe naenae me ghe looloo sae tale nau laghe uela va la nae etana. <sup>38</sup> Nau Simion ghe aippooaa tee Meri me Josep, Anna ghe rekatala, me ghe tiuaala tani tau sae God, me ghe aauliaa aliki eteva ta lo atoa laghe toitoi kapuira tau ngai asaangi eteva Israeli etoa.

### **Josep me Meri lalu ghe kiriaa siola eNasaret**

<sup>39</sup> Nau Josep me Meri lalu ghe rungi ekapala voto Vau eteva ghe auliaala va la ghelei, me lalu ghe mene oghi siola tanganueirarua eNasareti, ta pai nge Galili. <sup>40</sup> Ia o aliki eteva ang ghe naanamuu, me sarasarakana ia, alomasaanga ia, me God ghe aarangiseia.

### **Iesu elome tale ale manga**

<sup>41</sup> Isaa akapaaili ninamanama, tamana me kinna Iesu lalu ghe saesae eJerusalem tale nivelu eitaua ngateae, laghe aseasea va Pasova. <sup>42</sup> Nau anna ninamanama Iesu ghe kasangaulu ghaluaela (12), laghe saela tale nivelu eitaua ngateae, nongina laghe ghelei arau. <sup>43</sup> Nau nivelu eitaua ngateae ghe ruula, tamane me kinna ngila ghe mene ooghiaa tani lao tanganueira, me taita arighi ta Iesu ghe tokala eJerusalem. Karika lalu ghe kilala. <sup>44</sup> Lalu ghe annaa va Iesu ghe kasukasu tee mene katoa taumattu. Laghe kasula ghe roola kateva nau, me lalu ghe tiuaala tani paea. Lalu ghe aaikolomainie see, ta mangaliira atoa me kapuira atoa. <sup>45</sup> Nau karika lalu ghe taraiela, lalu ghe mene oghiaa lao sio eJerusalem tani mene paea. <sup>46</sup> Ghalua nau ghe lange sio, me lalu ghe taraiela elome tale

ale manga, ghe tokatoka tee tau ngai aapasunga ngatoa. Ghe nongonongola, me ghe kookolomila tale nikokkolomi.<sup>47</sup> Lo atoa laghe nongonongoa laghe soosoghiaa aalomasanganiaane, me vaalua ghe liuliu uneira nikokkolomi.<sup>48</sup> Nau eteva kinna me tamane lalu ghe taraiela, lalu ghe soghieiniela, me kinna ghe uela etana va, “Natughu, vaalua me ughelei evaluengaluela o? Angalua me tamam angalu ghele nannangailio nau eteva angalu ghele paepaeo.”

<sup>49</sup>Ghe kolomilalueta va, “Vaalua me amalu paepaeaghi? Amalu rooroo tani kila va aghi tale alena ateva Tamaghi.”

<sup>50</sup>Karika lalu ghe kila amasinala malloeana voto ghe auliaala etairarua.

<sup>51</sup>Me ghe usilalueta, me laghe siola eNasareti, me nau ekapa atoa ghe nongonongo usilainilalua. Me kinna ghe aailokoia ngakapaailila isaa o voto tale urunguitanina ateva.<sup>52</sup> Me Iesu ghe naanamuu, me aalomasanganiaane tee ghe laa saesae, God me taumattu ngatoa laghe aaloannaailia.

### Jon tau ngai aasuu ia ghe aimonomosiaala salana atikirighi

(*Mat 3:1-12; Mak 1:1-8; Jon 1:19-28*)

**3** Tale aiaakasangaulu ghalimae (15) ninamanama Taiberias Siisa ghe aaitoiaa eRom, me Pontius Paelat gavana ia eJudia, me Herot ghe aaitoiaa eGalili, me tuena ta Pilip ghe aaitoiaa eltorea me eTrakonitis, me Lisantias ghe aaitoiaa eAbilen — <sup>2</sup>isaa o nau Annas me Kaepas namuu ilalua ta pristi etoa ta aJiu etoa, me isaa o nau tee, Jon natuna Sekaraea ghe tokatoka tale voto ateva karika rigghi taumattu ta ngetana, me inangarina God ghe mae sio etana.<sup>3</sup> Jon ghe kasukasu ekapa see tale masaliki eJodan, kalakalaa tale ateo atee, me ghe poppooaa ta taumattu ngatoa va

la nna ngaioghioghia me la ghaa niasuu, me God aue ekaluaa kaluira ssavoto.<sup>4</sup> Nongina propet Aisaea ghe pitila emua arau, ghe uela va,

“Tale voto ateva karika rigghi taumattu etokatoka etana, lingi ngalo taumattu ngateva ekolokolo, eue va, ‘Am aimonomosiaa salane atikirighi Vau eteva, am ghelei eghulughuluena akapala salane.

<sup>5</sup>Aue la rovii liu me voto saesaena pei nikai emasina, me lo salana viloviloana pei nighelei eghulughuluena

me voto sesaaili aue la ghelei emasina.

<sup>6</sup>Me taumattu ngakapa atoa aue la tara kanna niasaangi God.”<sup>††</sup>

<sup>7</sup>Oroiennaaili taumattu ghe mae sio ta Jon va easuula, me Jon ghe uela etaira va, “Am nongina va natuira iem katu ngatoa! See eueta etaimim va am ilou vuli sessaiaane Vau eteva ange anna tani lutu etaimim?”<sup>8</sup> Am kunea rigghi ueimim tani apasunga va ngam ghe vella kaluimim ssavoto. Am rau mene ue va, ‘Ami tuvuna amami Abraham.’ Poli aghaauliaa etaimim va God eroroo tani ghelei isaa o atu etuvuna Abraham.<sup>9</sup> Kulum ateva aimonomosiaana ia tani tue akatuu ai, me isaa o ai karika ekuukunea masi uene aue la tue me la sau velu sae tale kuraa atee.”

<sup>10</sup>Me taumattu ngatoa laghe kolomila Jon va, “O saa ateva ami gheleia?”

<sup>11</sup>Jon ghe uela etaira va, “Arova ghalua unem sioto, utau lao teva ta lo ateva karika teva unna, me arova rigghi anem inana, uparruu mene katoa.”

<sup>12</sup>Tau ngai ghaa viliki veu etoa tee laghe mae sio va easuula, me laghe uela ta Jon va, “Tisa, ami vaalua ami ghelei?”

<sup>13</sup>Jon ghe uela etaira va, “Am ghaa lo viliki veu gavmani eue va am

ghaa, am rau mene nim ghaa righi ta aloaloannaaimim.”

<sup>14</sup>Me katoa tana soldia laghe kolomiela va, “Me ami, saa ateva ami gheleia?”

Jon ghe uela etaira va, “Am rau mene amatautu taumattu tani ghaa uneira viliki veu, me am rau mene aikamea. Am masimasi tee aipoliimim.”

<sup>15</sup>Ila akapa taumattu ngatoa laghe toitoi Mesaeva ngateva, laghe nannaa va koti Jon Mesaeva ia. <sup>16</sup>Jon ghe uela etaira va, “Aghi aghaasuem tale manu, me mene kateva aue emae, ia sarasarakaniaane elaulau sarasarakaniaaaghi. Karika masi taumattu ngieghi tani pulaka unna aiiri aikasukasu. Ia aue easuue tale Spirit Manga ateva me tale kuraa atea.

<sup>17</sup>Aue emae arova taumattu ngateva eposoposo unna poko ateva aisaraki uiti ia tani pola uiti tale kou uit, me aue eatoka aitauaa uiti tale ale ngai atoka uiti eteva, me aue evelu sae kou uiti tale kuraa atea karika erooro tani pala.”

<sup>18</sup>Tale oro asease salana, Jon ghe poppooa masi kiuki tale taumattu ngatoa.

<sup>19</sup>Me Herot ia o gavana ia<sup>f</sup>, Jon ghe uela etana va, “Karika masina ta ughe lai sarila Herodias, poli vauseeni ia tuem.” Oro mene kasina ase gheleiaane sesa <sup>20</sup>me Herot ghe gheleila voto ateva sesaaili ia, nau ghe atoka ssola Jon tale ale mata voovoo.

### Iesu ghe ghaala niaasuu

(*Mat 3:13-17; Mak 1:9-11*)

<sup>21</sup>Nau Jon ghe aasuu taumattu ngatoa, ghe asuu teela Iesu. Epona liu ghe otiela nau Iesu ghe looloo sae, <sup>22</sup>me Spirit Manga ateva ghe sio mae ta Iesu nongina ghila ateva, valusu ia. Me lingi ngalo ateva epona liu ghe uela va,

“Io natughu io, aghaailousiangailiio me masimasiaaghi ta ngetam namungaili.”

### Arariira tuvuna atoa Iesu

(*Mat 1:1-17*)

<sup>23</sup>Nau Iesu ghe tiuaala uunguaane koti anna ninamanama kotolungauluae (30). Taumattu ngatoa laghe annaa va natuna ia Josep, Josep natuna ia Heli, <sup>24</sup>me Heli natuna ia Matat, me Matat natuna ia Livae, me Livae natuna ia Melki, me Melki natuna ia Jannai, me Jannai natuna ia Josep, <sup>25</sup>me Josep natuna ia Mattataeas, me Mattataeas natuna ia Amos, me Amos natuna ia Nahum, me Nahum natuna ia Esli, me Esli natuna ia Naggai, <sup>26</sup>me Naggai natuna ia Mahat, me Mahat natuna ia Mattataeas, me Mattataeas natuna ia Semein, me Semein natuna ia Josek, me Josek natuna ia Joda, <sup>27</sup>me Joda natuna ia Joanan, me Joanan natuna ia Resa, me Resa natuna ia Serubabel, me Serubabel natuna ia Sealtiel, me Sealtiel natuna ia Neri, <sup>28</sup>me Neri natuna ia Melki, me Melki natuna ia Addi, me Addi natuna ia Kosam, me Kosam natuna ia Elmadam, me Elmadam natuna ia Er, <sup>29</sup>me Er natuna ia Josua, me Josua natuna ia Eliesa, me Eliesa natuna ia Jorim, me Jorim natuna ia Mattat, me Mattat natuna ia Livae, <sup>30</sup>me Livae natuna ia Simion, me Simion natuna ia Jiuda, me Jiuda natuna ia Josep, me Josep natuna ia Jonam, me Jonam natuna ia Eliakim, <sup>31</sup>me Eliakim natuna ia Melea, me Melea natuna ia Menna, me Menna natuna ia Mattata, me Mattata natuna ia Naetan, me Naetan natuna ia Deivit, <sup>32</sup>me Deivit natuna ia Jesi, me Jesi natuna ia Obed, me Obed natuna ia Boasi, me Boasi natuna ia Salmon, me Salmon natuna ia Nason, <sup>33</sup>me Na-

<sup>f</sup>**3:19 gavana** Tale inangari nge Grik, *Tetrak*, lo ateva taita ghe aaitoiaa kateva anue namuu tale ghaatiae anue namuu.

son natuna ia Aminadab, me Aminadab natuna ia Admin, me Admin natuna ia Arni, me Arni natuna ia Hesron, me Hesron natuna ia Peres, me Peres natuna ia Jiuda, <sup>34</sup> me Jiuda natuna ia Jekop, me Jekop natuna ia Aisiki, me Aisiki natuna ia Abraham, me Abraham natuna ia Tera, me Tera natuna ia Nahor, <sup>35</sup> me Nahor natuna ia Seruk, me Seruk natuna ia Reu, me Reu natuna ia Pelek, me Pelek natuna ia Eber, me Eber natuna ia Sela, <sup>36</sup> me Sela natuna ia Keinan, me Keinan natuna ia Apaksat, me Apaksat natuna ia Sem, me Sem natuna ia Noa, me Noa natuna ia Lemek, <sup>37</sup> me Lemek natuna ia Metiusila, me Metiusila natuna ia Inok, me Inok natuna ia Jaret, me Jaret natuna ia Mahalalel, me Mahalalel natuna ia Kenan, <sup>38</sup> me Kenan natuna ia Enos, me Enos natuna ia Set, me Set natuna ia Adam, me Adam natuna ia God.

**Namu ngateva ta raroai etoa  
ghe tootoongaala Iesu**

(*Mat 4:1-11; Mak 1:12-13*)

**4** Iesu ghe lau sae mae tale ateo ateae eJodan, me Spirit Manga ateva ghe pasula etana, me ghe ssoainiela tale voto ateva karika righi taumattu etana. <sup>2</sup> Namu ngateva ta raroai etoa ghe tootoongaala Iesu tale ghaatingaulu (40) nau. Isaa o nau karika ghe namanama poila, me airuuruu tale isaa o nau ghe maloola.

<sup>3</sup> Namu ngateva ta raroai etoa ghe mae sio ta Iesu me ghe uela va, “Arova koronna va Natuna io God, uauliaa tale atu etiulu o me ekoli me everete.”

<sup>4</sup> Iesu ghe liula me ghe uela va, “Uru ngai Manga ateva eaauliaa va, ‘Karika

taumattu ngatoa va la maamaulue nonga tale inana.”<sup>§§</sup>

<sup>5</sup> Namu ngateva ta raroai etoa ghe saeaala Iesu tale motouru tani apasunga anue namu ngakapa atoa tale kosa ateva oia, me tale ia o tuku nau erighi ghe apasunga akapala kosa ateva. <sup>6</sup> Me ghe uela ta Iesu va, “Aue atau aatu matuutulienu, me unamuu tani aitaraa isaa o voto. Ta laghe tau mae sio etaghi, me arova aghaloanna tani taula ta see, aue ataula. <sup>7</sup> Isaa o voto aue peim arova usuuiaa me ukkaueinaghi.”

<sup>8</sup> Iesu ghe liula me ghe uela va, “Uru ngai Manga ateva eue va, ‘Ukkaua Vau eteva kapum Goto ia, me uaimulusi teeia nonga.”<sup>\*</sup>

<sup>9</sup> Ghe mene saeaala Iesu tale pungani ale manga ateva eJerusalem, me ghe uela va, “Arova Natuna io God, ulove velu sio. <sup>10</sup> Ta Uru ngai Manga ateva eue va,

“‘Ia aue esuu kapuna ensolo atoa tani sio aitara ngamasinaailiio,

<sup>11</sup> Me aue la sau evukalaio me karika aue utaghua kekem tale atu.”<sup>†</sup>

<sup>12</sup> Iesu ghe uela etana va, “Uru ngai Manga ateva eue va, ‘Urau mene tootoonga Vau eteva kapum Goto ia.”<sup>‡</sup>

<sup>13</sup> Namu ngateva ta raroai etoa ghe ruu ekapala unna nitootoonga ta Iesu, me ghe kasu vuliela tani mene toi mene teva masi nau ppae.

**Iesu ghe tiuaala niuungu eGalili**

(*Mat 4:12-17; Mak 1:14-15*)

<sup>14</sup> Iesu ghe ghaala sarasarakana tale Spirit Manga ateva, me ghe kiri lao sio eGalili, me kiukiuna ghe lao sio tale masaliki ekapa atoa. <sup>15</sup> Ghe aapasunga

§§4:4 Diuteronomi 8:3

\*4:8 Diuteronomi 6:13

†4:11 Sams 91:11-12

‡4:12 Diuteronomi 6:16



tale aleira ale nivelu eitaua ngatoa, me ila akapa laghe aarueinia.

### Laghe tiu vella Iesu eNasaret

(Mat 13:53-58; Mak 6:1-6)

<sup>16</sup>Iesu ghe lao sio eNasareti nongina ghe namuula, me tale nau manga ghe ssola tale ale nivelu eitaua ngat-eva, nongina eghe gheelei nau ekapa atoa, me ghe tingina saela tani riti Uru ngai Manga ateva. <sup>17</sup>Me laghe taula buku eteva unna ia propete Aisaea, laghe aseasea va skrol, ghe pulakaiela, me ghe paela inangari Aisaea ghe pitila, <sup>18</sup>ghe uela va,

“Spiriti eteva ta Vau eteva etokatoka etaghi,

poli eghe suitoongainaghila

tani ppooaa masi inangari ta lo atoa karika peiira.

Me ghe sungieghila tani ppooaa va la ghaa velu lo atoa tale ale mata voovoo,

mata salusalu etoa aue la taatara,

tani ruu maamaatana ta lo atoa la gheelei sesa etaira,

<sup>19</sup>me tani aulia ngaotu va nauna oia Vau eteva tani asaangi kapuna taumattu.”<sup>¶</sup>

<sup>20</sup>Iesu ghe mene talila skrol ateva, me ghe taue lao sio ta lo ateva ghe aaitaraa skrol atoa, me ghe toka siola tani ppooaa. Ila akapa laghe pasiaala mataira etana, <sup>21</sup>me Iesu ang ghe aauliaa etaira va, “Inangari oia ange koronala ghaine tale nongonongoaaimim.”

<sup>22</sup>Laghe soghila tani nongo masi inangari ghe kupi ghoa mae ta paane, me laghe masimasila, me laghe aaikolomieinila va, “Ia oia natuna Josep, o karika?”

<sup>23</sup>Iesu ghe auliaala etaira va, “Aki-lakila va aue am ue ta tuku inangari eteva va, ‘Io dokta io, ughelei emasinaio

mua.’ Me aue am ue etaghi va, ‘Ughelei mua righi voto oia tanguem, nongina ami ghe nongola ughe gheelei voto eKapenium.”

<sup>24</sup>Ghe mene uela va, “Aghaulia ngakoronna etaimim va karika toa la rooroo tani oneoneaa teva propete tanguueira aitauaa me ia. <sup>25</sup>Aghaulia ngakoronna va oroi vause raue vulu elIsraeli nau ta Elaija, nau karika teva vaoo tale kotoluae (3) ninamanama me ghaonomo (6) ulana, me paka maloo ateva ghe asola elIsraeli. <sup>26</sup>Vau eteva ghe tam suula Elaija va ghe lao ta teva Israeli, ta ghe lao sio tale masaliki eteae eSarepat, ta vause raue vulu eteva elome tale anue namu ngateae eSaedon. <sup>27</sup>Me tee, oroi taumattu nge Israeli, isiki tasussuku eteva ghe ghaailala, nau ta Elaisa, karika laghe raarangisanala, me Naaman nonga, aSiria ia, ghe raarangisanala.”

<sup>28</sup>Lo atoa elome tale ale nivelu eitaua ngateva laghe nongola inangarina me ghe sessaieililala. <sup>29</sup>Laghe tingina saela, me laghe kuneiela, me laghe ae velue ghoala eleka tale masaliki taatara atea, me laghe saeainiela tale motouru eteva. Laghe aloanna tani bbi velue sio tale val-lae. <sup>30</sup>Me Iesu ghe kasula ta mallomeira, me ghe kasu vulilala.

### Iesu ghe ghelei emasinala taita ateva raroai eteva etana

(Mak 1:21-28)

<sup>31</sup>Iesu ghe lao sio eKapenium, masaliki taatara ia eGalili. Vara nau manga ateva ghe mae sio, me ghe tiuaala tani apasunga inangarina God ta taumattu ngatoa. <sup>32</sup>Laghe soghiaala voto ghe aauliaa nonginaaili taumattu ngateva matu-utuliena ia.

<sup>33</sup>Elome tale ale nivelu eitaua ngat-eva, taita ateva, raroai eteva ghe toka-

<sup>¶</sup>4:19 Aisaea 61:1-2; 58:6

toka etana. Ghe sama anamuula, <sup>34</sup> me ghe uela va, “Iesu aNasareti io, umae sio tani ghelei saa ateva etaimami? Vara ughelei saasakieinamami? Akilakilaio, io manga io kapuna io God.”

<sup>35</sup> Iesu ghe uela va, “Urau mene sama! Kupi ghoa mae!” Ghe kupi ghoala, me ghe gheleila taumattu ngateva ghe katu-ula elome ta taumattu ngatoa, me karika ghe vakovakola.

<sup>36</sup> Ila akapa laghe soghiaala tani nongo me tara, me ngila ghe aippooaa elome etaira va, “Saa voto llo oia? Matuutuliena me sarasarakana inangarina! Epoppooaa ta raroai etoa, me la kupikupi ghoa!” <sup>37</sup> Kiukiuna Iesu ghe lao sio tale mene kasina masaliki.

### **Iesu ghe ghelei emasinala oroi taumattu**

*(Mat 8:14-17; Mak 1:29-34)*

<sup>38</sup> Iesu ghe kupi ghoala tale ale nivelu eitaua ngateva, me ghe lao sio tanganue Saemon. Alumuna Saemon ghe iisiki, vilikina ghe aanasa atingina. Laghe aulieiniela ta Iesu va esausia. <sup>39</sup> Iesu ghe tingina valaala ta komona vause ateva, me ghe paola isiki eteva, me ghe kapala. Vause ateva ghe masinala, ghe totula, me ghe kaisila aneira inana.

<sup>40</sup> Nau sinaka ateva ang ghe suusuu, laghe maea ngakapa sio taumattu asease isiki etaira, tani ghaa niaisausi ta Iesu. Ghe nim saasaoaa nimana etaira me laghe maamasina. <sup>41</sup> Raroai etoa laghe kupikupi vulu ghoa taumattu ngatoa, me laghe samasama anamungaili, laghe ue va, “Io Natuna io God.” Iesu ghe paopaola me ghe uela ta raroai etoa va, “Am rau mene sama,” poli ila raroai etoa la kilakila va ia Mesaea ia.

### **Iesu ghe poppooaa**

*(Mak 1:35-39)*

<sup>42</sup> Elue talaua poopooa Iesu ghe ssola tale voto ateva karika righi

taumattu etana, me laghe paepaea. Nau laghe taraiela, laghe auliaala etana va erau mene kasu. <sup>43</sup> Ghe uela etaira va, “Karika apoppooaa nonga etaimim. Atani ppooaa masi inangarina ararimangalina ateva God ta mene kasina masaliki taatara, mausina avalua o me Tamaghi ghe sungieghila.” <sup>44</sup> Liuna avalua o me ghe poppooaa tale ale nivelu eitaua ngatoa eJudia.

### **Iesu ghe kolola aitiutiu etoa tana disaepolo**

*(Mat 4:18-22; Mak 1:16-20)*

**5** Kateva nau, Iesu ghe tiitingina elosamarra tale ateo talia ngateae eGenesaret, me oroieili taumattu ngatoa laghe mene tomuela, tani nongo inangarina ateva God. <sup>2</sup> Me Iesu ghe tarala paanaka aluepai, lalu ghe vuuvukala tale ateo talia ngateae, me tau ngai pae kko atoa laghe kkure vululaluela, me laghe porapora uneira uvena. <sup>3</sup> Me ghe aikaaila tale gharighi paanaka, unna ia Saemon, me ghe uela ta Saemon va esiki tee ghoa paanaka arighi mala masau elosamarra. Me ghe toka siola tale paanaka arighi, me ghe mene tiuaala tani apasunga.

<sup>4</sup> Nau ghe ruula tani sama, me ghe uela ta Saemon va, “Ose tee ghoala elo malionge, me am velu sio uneimim uena aighaa kko.”

<sup>5</sup> Saemon ghe liula tani ue va, “Namu ngateva, eleivo ami tootoonga poila tani luku kko, me karika poi ami ghaala teva, me elue talaua teiemamila. Me poli angu aaulia, aue amene velu sio isaa oia uena.”

<sup>6</sup> Me nau eteva laghe velu siola uneira uena, laghe ghaala oroieili kko, me uneira uena ghaisa ngarighi ghe tarrii. <sup>7</sup> Vara me angila ghe palepale lao mene kasina kapuira, laghe vuuvukala tale mene kateva paanaka, tani mae sausila. Me laghe mae sio, laghe kaaila kko tale

paanaka alua, me ghaisa ngarighi lalu ghe vuluu.

<sup>8</sup> Nau eteva Saemon Pita ghe tara aval-uela o, ghe turrula ta liue kkena Iesu, me ghe uela va, “Vau eteva, kasu vulueghila; ta aghi tau ssavoto ieghi.”<sup>9</sup> Poli ia me kapuna atoa laghe soghiaala voto oia, nau laghe tarala,<sup>10</sup> me tee Jeimis me Jon, natuna ilalua Sebedi, lalu ghe uungu eitauaa tee Saemon.

Me Iesu ghe uela ta Saemon va, “Karika umene matautu: aue llo to nau emamae, aue utau ngai luku taumattu.”<sup>11</sup> Me nau eteva laghe ssola elae, laghe kasu vulula isaa akapa voto me laghe usiela.

### **Iesu ghe ghelei emasinala tau tasussukuna ateva**

*(Mat 8:1-4; Mak 1:40-45)*

<sup>12</sup> Kateva nau, Iesu ghe tokatoka tale kateae masaliki, me kateva taumattu, anna tasussuku eteva, ghe tarala Iesu, me ghe suuiaala ta kkena, me ghe uela etana va, “Vau eteva, marova ualoanna, urooroo tani ghelei eraarangisanaieghi ta mata God!”

<sup>13</sup> Iesu ghe ssuaala nimana, me ghe posoala, me ghe uela va, “Aghaaloanna. Angu raarangisanala!” Arovaeaata ta sesa isiki eteva ghe kasu vulula taumattu ngateva.

<sup>14</sup> Iesu ghe uela etana va, “Urou mene kiukiu ta teva taumattu, ta ulaa tara mua pristi eteva, me ia aue eauliaa ta taumattu ngatoa va angu raarangisanala, me ughelei sae aiaavusuvusuena, nongina Moses ghe auliaala.”

<sup>15</sup> Me kiukiuna Iesu ghe kasu ekapa seela, me oroieili taumattu ghe mae sio tani nongoa, me ghe ghelei emasinailala.<sup>16</sup> Me oroiaata nau ghe kasukasu vuli taumattu ngatoa, me ghe laolao tale voto karika rigi taumattu etana, me ghe looloo sae.

### **Iesu ghe ghelei emasinala tangorengorena ateva**

*(Mat 9:1-8; Mak 2:1-12)*

<sup>17</sup> Kateva nau, Iesu ghe mene aapasunga, me kasina Paresi me tau ngai apasunga ngatoa tale inangari nipaopao, laghe mene mae sio tani toka. Laghe kasula eJerusalem, me isaa akapa lutu masaliki eGalili me eJudia. Me sarasarakaniaane Vau eteva ghe toka aitaua teela Iesu, tani ghelei emasina lo atoa laghe iisiki.<sup>18</sup> Katoa taumattu laghe sau mae sio kateva taita. Ia oia taita ateva riuna atoa matena ila, me ghe asoaso tale komona atiulu. Laghe aaloanna tani saue sso tale ale ateva tani taue lao ta Iesu.<sup>19</sup> Me poli oroieili taumattu ghe tokatoka, me karika rigi salana tani ssoainia, laghe saue saela epona tale pungani ngale ateva, laghe ghaa vella aiaakou, me laghe taue siola tee komona atiulu elome ta taumattu ngakapa atoa, me emua ta Iesu.

<sup>20</sup> Nau eteva Iesu ghe tarala uneira niaiesoa, me ghe uela ta taumattu ngateva va, “Kapughu, kalum ssavoto ange kapala!”

<sup>21</sup> Tau ngai aapasunga tale inangari nipaopao atoa, me Paresi etoa, laghe tiuaala tani nnaa elome ta ngetaira va, “Saa taumattu ia ierai oia me eaauliaa saasakia tee God, nau egheeleia va eaairoo tee God! Poli God nonga erooroo tani kkalua ssavoto!”

<sup>22</sup> Iesu ghe kilala nannaaira, me ghe uela etaira va, “Vaalu me am nanaa isaa oia ase voto tale urunguitanimim?”<sup>23</sup> Vaalu, malumina tani ue va, ‘Kalum ssavoto ange kapala,’ o tani ue va, “Tingina saela, me ukasu?”<sup>24</sup> Ghaine aghaloanna va am tara kila, va Natuna ateva Taumattu ngateva matuutuliena teeia tani kalua ssavoto tale kosa ateva.” Me Iesu ghe uela ta taumattu ngateva oia va, “Aghaauliaa etam va,

tingina saela, me usau komom, me ulao tanguem!”<sup>25</sup> Katengaata ta taumattu ngateva ghe tingina saela, ta mataira taumattu ngakapa atoa, ghe saula komona ghe asoaso etana, me ghe lao sio tanguena, me ghe tau saela ararina atea God.<sup>26</sup> Taumattu ngakapa atoa laghe soghiaala isaa oia voto ghe lutula. Laghe matautula, me ila tee laghe tau saela God, laghe ue va, “Ngami tarala kateva ase voto ghaine!”

### Iesu ghe kolola Livae

(*Mat 9:9-13; Mak 2:13-17*)

<sup>27</sup> Emulina, Iesu ghe laolao, me ghe tarala tau ngai ghaa viliki veu eteva, ararina atea ta Livae, ghe tokatoka tale natu ngale arighi aighaa viliki veu ia. Iesu ghe uela etana va, “Mae usieghi.”<sup>28</sup> Livae ghe tingina saela, ghe kasu vuli ekapaaila voto, me ghe usiela.

<sup>29</sup> Me Livae ghe gheleila kinatama ninamanama atea tanguena mausi Iesu, me tale ninamanama atea, oroieili tau ngai ghaa viliki veu etoa, me mene katoa taumattu, laghe toka aitaaua teeilaluela.<sup>30</sup> Paresi etoa me tau ngai aapasunga tale inangari nipaopao, ila tee Paresi ila, angila ghe kiso kapuna disaepolo atoa Iesu. Laghe ue va, “Vaalua me am namanama me am ropiropi, aitaaua tee tau ngai ghaa viliki veu etoa me tau ssavoto atoa?”

<sup>31</sup> Me Iesu ghe liula inangariira me ghe uela va, “Karika va masina atoa la laa taatara dokta, ta isikinna atoa.”<sup>32</sup> Karika aghe sio mae tani kolo ghulughuluena taumattu, ta aghe sio mae tani kolo tau ssavoto atoa tani nna ngaioghioghia.”

### Iesu ghe auliaala uungua ninae

(*Mat 9:14-17; Mak 2:18-22*)

<sup>33</sup> Me taumattu ngatoa laghe uela ta Iesu va, “Oroiaata nau, kapuna disaepolo atoa Jon laghe naenae, me laghe looloo sae, me kapuira disaepolo tee

atoa Paresi etoa, la ghelei evalua oia. Me io, kapum disaepolo atoa la tam naenae.”

<sup>34</sup> Me Iesu ghe uela va, “Marova kateva taita ealoanna tani lai, koti aue am aulia ta kapuna atoa va la rau mene namanama, nau eteva ia o taita eteva etokatoka teeila? Karika!”<sup>35</sup> Me auena, nau la vira kaakasuaa taita ateva, ia o nau eteva, la vira nae.”

<sup>36</sup> Iesu ghe aulia teela kateva kiukiu niaimatoonga etaira va, “Marova pokane ateva aiaasae ange tarriila, karika teva taumattu erooroo tani mene rasi ouna ateva aiaasae, tani samapi tarrii eteva tale pokane ateva aiaasae. Marova eghelei evalua oia, aue eghelei kiukiu ouna ateva aiaasae, me tee ia oia ouna ateva aiaasae, karika aue masina tee pokane ateva aiaasae.”<sup>37</sup> Karika teva taumattu etottoli kaai ouna uaeni tale pokane ateva aikaai viliki meemee. Marova eghelei evalua o, aue ouna uaeni eghelei polaki aikaai eteva, me aue ilalua akapa uaeni eteva me aikaaina ateva aue lalu peisaane.<sup>38</sup> Liuna avalua o me la tottoli kaai ouna uaeni tale ouna aikaai manu ghelei tale viliki meemee.<sup>39</sup> Me lo atoa taumattu la ropiropi pokane uaeni, karika aue la aloanna ouna. La ue va, “Llo pokane masinaaili.”

### Vau tale nau manga ateva

(*Mat 12:1-8; Mak 2:23-28*)

**6** Kateva nau manga, Iesu ghe kasu longotila tale utani uiti eteae. Kapuna disaepolo atoa laghe ghaala kasina tana uiti, me laghe sapsapulaala vilikina ta nimaira, me laghe namala.<sup>2</sup> Katoa tana Paresi laghe uela etaira va, “Vaalua me am ghelei voto o, inangari nipaopao eue va karika masina tani ghelei tale nau manga ateva?”

<sup>3</sup> Iesu ghe liula me ghe uela etaira va, “Koti karika am ghe ritila kiukiuna atea Deivit, nau ia me kapuna atoa laghe mal-

oola,<sup>§</sup> 4 me ghe ssola tale alena ateva God, me ghe ghaala verete laghe amangala, me ghe namala, me ghe tau lao sio tee ta lo atoa laghe kasukasu teeia. Isaa oia verete karika eroroo va nim taumattu enama, ta pristi nonga atoa.”<sup>5</sup> Me Iesu ghe uela etaira va, “Natuna ateva Taumattu ngateva Vau ia tale nau manga ateva.”

**Iesu ghe ghelei emasinale taumattu ngateva nimana atelange matena ia**

*(Mat 12:9-14; Mak 3:1-6)*

<sup>6</sup> Mene kateva nau manga, Iesu ghe kupi ssola tale ale nivelu eitaaua ngateva tani ppoaaa, me kateva taita ghe tokatoka, nimane muenna atelange matena ia. <sup>7</sup> Tau ngai aapasunga ngatoa tale inangari nipaopao, me Paresi etoa, laghe taatara usiusi Iesu, laghe aloanna tani kila va aue eghelei emasina tau sessa atoa ta nau manga ateva, o karika. Laghe paepae righi salana tani laoa Iesu tale niaisakei. <sup>8</sup> Me Iesu ang ghe kila vella nannaaira, me ghe uela ta taumattu ngateva, nimana atelange matena ia, va, “Tingina saela, me la taraio.” Me ghe tingina saela.

<sup>9</sup> Me Iesu ghe uela etaira va, “Aghaloanna tani kolomiem kateva voto. Emaamasina tani ghelei masi voto, o sesa voto, ta nau manga ateva? Tani asaangi maamaulua kateva taumattu, o tani turungia?”

<sup>10</sup> Ghe aitara ngakapa seela etaira, me ghe uela ta taumattu ngateva va, “Korosila nimam atelange.” Me ghe gheleila, me nimana atelange ghe masinala nongina emua arau. <sup>11</sup> Me tau ngai aapasunga ngatoa tale inangari nipaopao, me Paresi etoa, ghe sessai etinginaailala. Me angila ghe aailoe va, “Saa ateva ita gheleia ta Iesu?”

**Iesu ghe kolola 12 apostolo**

*(Mat 10:1-4; Mak 3:13-19)*

<sup>12</sup> Kateva nau tale isaa o nau, me Iesu ghe saela tale motouru tani looloo sae, ghe looloo saela ta God tale ia o vo ngateva, lomosi ta ghe paila. <sup>13</sup> Nau eteva ghe paila, ghe kolo aitauala kapuna disaepolo atoa, me ghe kolola kasangaulu ghalua (12), me ghe mene aselela va apostolo ila. <sup>14</sup> Kateva ta Saemon (Iesu ghe aseala va Pita etana), me ghe kolo teela Andru, tue me nenga ilalua me Saemon, me Jeimis, me Jon, me Pilip, me Batolomiu, <sup>15</sup> me Matiu me Tomas, Jeimis natuna ia Alpeas, me Saemon laghe aseala va Selot ia, <sup>\*\*</sup> <sup>16</sup> me Jiudas natuna ia Jeimis, me Jiudas Iskariot, ia auena ghe tau lao Iesu ta nimaira tau ngai ssateena atoa.

**Iesu ghe ghelei emasinale oroieili taumattu ngatoa**

*(Mat 4:23-25)*

<sup>17</sup> Iesu me ila o kapuna disaepolo atoa, laghe sio mae tale motouru eteva, me laghe tinginala tale malaale. Ia, me oroieili kapuna disaepolo atoa, me oroieili tee taumattu, laghe kasula tale distriki eteva eJiudia, me masaliki taatara ateae eJerusalem, me tale samarra ateva kalakalangina tale masaliki taatara aluae eTaer me eSaedon, <sup>18</sup> laghe mae sio tani nongoa, me laghe maeaa tee sio kapuira tau sessa atoa va la masina. Me lo atoa tee sesa spiriti eteva ghe tokatoka etaira, Iesu ghe ghelei emasinailala. <sup>19</sup> Me oroieili taumattu angila ghe paepaea tani nim tulia, poli sarasarakana ghe kasukasu etana, me ghe ghelei emasina akapailala.

<sup>§</sup>6:3 Utara 1 Samuel 21:1-9

<sup>\*\*</sup>6:15 *Selot* Utara *Malloeana inangari*.

**Nimasimasi me nialousiusi***(Mat 5:1-12)*

<sup>20</sup> Iesu ghe taatara lao sio ta kapuna disaepolo atoa, me ghe uela va,  
 “Aue emasinaailli ta lo atoa karika tue peipeiena am,  
 poli ararimangalina ateva God uneimim ia.

<sup>21</sup> Aue emasinaailli ta lo atoa ghaine am maamaloo,  
 ta auena essoiem.

Aue emasinaailli ta lo atoa ghaine am aalousiusi,  
 ta auena am kanga.

<sup>22</sup> Aue emasinaailli etaimim nau eteva taumattu ngatoa la sessa teeiem,  
 me nau eteva la aatokaa polapolaiem,  
 me la lakolakoam,  
 me la ue va, ‘Io sesa taumattu io,’ mausi Natuna ateva Taumattu ngateva!

<sup>23</sup> “Am rooroo tani masimasi nau eteva llo o elutu, me am loku, me am masimasi, poli namungaili aipoliimim etoitaiem epona liu. Nongina emua arau, tuvuirā atoa laghe gheleila isaa oia voto ta propete atoa.

<sup>24</sup> “Me am lo atoa tue peipeiena am, aue esesailli etaimim,  
 poli nimasimasi ghaine am ghaaghaa, auena ekarika.

<sup>25</sup> Me am lo atoa ghaine esossoiem, aue esesailli etaimim;  
 auena am maloo!

Me lo atoa ghaine am kangkanga, aue esesailli etaimim;  
 auena am alousiusi me am ngala!

<sup>26</sup> Me marova taumattu ngakapa atoa la asaesae arariimim, aue esesailli etaimim;  
 nongina emua arau, tuvuirā atoa laghe gheleila isaa o voto ta propete kamekame atoa.

**Tani ailousia tau ngai ssateeita atoa***(Mat 5:38-48; 7:12a)*

<sup>27</sup> “Me aghaauliaa ta lo atoa am nongonongo, va am ailousia tau ngai ssateeimim atoa, am ghelei masi niuungu ta lo atoa la sessa teeiem. <sup>28</sup> Am arangise lo atoa la poppooaa saasakia teeiem, me am pure ta lo atoa la aloanna tani ghelei saasakieiniem. <sup>29</sup> Me marova teva eposala kativilau bbam, utau lao mene kativilau me eposala teeia; me marova teva taumattu ealoanna tani ghaa unem saketi eteva, masina eghaa tee unem sioto ateva. <sup>30</sup> Utau lao peim ta lo ateva ekolomio, me marova lo ateva ange ghaala rigi peim, urau mene kolomia va emene kiriaa mae. <sup>31</sup> Am ghelei voto ta mene kateva taumattu nongina am aloanna va emene ghelei mae etaimim.

<sup>32</sup> “Marova am ailousia lo atoa la ailousieiniem, vaalua me am aaloanna tani ghaa nimasimasi? Tau ngai ghelei ssavoto atoa tee la ailousia lo atoa la ailousieinila! <sup>33</sup> Me marova am ghelei masi niuungu ta lo atoa la ghelei masina etaimim, vaalua me am aaloanna tani ghaa nimasimasi? Tau ngai ghelei ssavoto tee atoa, la ghelei evalua o! <sup>34</sup> Me marova am tau viliki veu nonga ta lo atoa am nannaa va aue ila mene liu etaimim, vaalua me am aaloanna tani ghaa nimasimasi? Tau ngai ghelei ssavoto tee atoa la tautau viliki veu ta tau ngai ghelei ssavoto atoa, me la mene ghaaghaa isaa o viliki veu la tautaula! <sup>35</sup> Am ailousia tau ngai ssateeimim atoa, me am ghelei masi voto etaira; am aiparrua viliki veu, me am rau mene nnaa va am mene ghaa ailiuna. Poli am, aue am ghaa namungaili aipolipoli, me aue natuna iem lo ateva Iaaili Epona. Ta eghelei masina ta lo atoa karika la kaakaili emasina me lo atoa sesa gheleiaaira. <sup>36</sup> Am alou-

siusi tee mene katoa taumattu, nongina Tamaimim ateva ealousiusi teeiem.”

**Am rau mene auliaa  
katoa gheeieiaaira**

*(Mat 7:1-5)*

<sup>37</sup> Iesu ghe mene uela va, “Am rau mene ue va katoa nonga taumattu la gheeiei ssavoto, me God karika aue eue teeiem va am tee am gheeiei ssavoto; am rau mene sunganaa tau lao sesa aipolipoli ta kateva; me God karika aue esunganaa tau aatu sesa aipolipoli etaimim. Am kkalua gheeieiaa kateva taumattu, me God aue ekkalua gheeieiaaimim. <sup>38</sup> Am parru, aue God emene tau aatu etaimim; ekaai, me emonnaa tau sio, me emene kaai, me aue epasu, me ekao velu kasina. Llo am tau-tau lao ta katoa, aue God emene tau aatu nongina am tautaula.”

<sup>39</sup> Iesu ghe kiukiuuuala kateae kiukiu niaimatoonga, “Kateva mata salusalu karika eroroo tani katulaa mene kateva mata salusalu; marova egheeiei, aue lalu katu velu sio tale liu eteva. <sup>40</sup> Tau ngai ghaa alomasaanga ateva karika namuu ia ta kapuna tau ngai aapasunga ngateva. Nau ange kila akapala voto, aue enongina kapuna tau ngai aapasunga ngateva.

<sup>41</sup> “Vaalua me utaatara nonga vongovongo ta matana kapum ateva, me karika utaatara paka palanga ateva ta matam? <sup>42</sup> Vaalua me ualoanna tani ue ta kateva kapum va, ‘Kapughu, aghaaloanna tani ghaa velu vongovongo ta matam,’ me io karika urooroo tani tara paka palanga ateva ta matam? Usimaghalue io, ughaa velu mua paka palanga ateva ta matam, me utaatara amasina tani ghaa velu vongovongo ta matana kapum ateva.

**Ai eteae me uene**

*(Mat 7:17-20; 12:34b-35)*

<sup>43</sup> “Masi ai eteae karika ekuukuneeaa sesa ue ngai, tee sesa ai eteae karika ekuukuneeaa masi ue ngai. <sup>44</sup> Isaa akapa ai la taatara kila tale ueira la kuukuneeaa. Karika am ghaaghaa ue ngai tale uasa karasa atikirighi, me ue uasa tale ai roroana atea. <sup>45</sup> Masi taumattu ngateva eaapasunga masi voto tale masi urunguitanina ateva, me sesa taumattu ngateva, sesa voto eghooa tale llo sesa etokatoka tale urunguitanina ateva. Sesa voto taumattu ngateva egheeiei, etokatoka tale urunguitanina ateva, eaapasunga nau eteva eaaippooaa.”

**Tau ngalomasaanga ateva  
me alo kapakapa ateva lalu  
ghe atulula ale alua**

*(Mat 7:24-27)*

<sup>46</sup> Iesu ghe mene aulia tee lao sio va, “Vaalua me am aseaseaghi va, ‘Vau eteva,’ me karika am gheeiei nongina aghaaulia? <sup>47</sup> Aue aghapasunga va saa taumattu ia lo ateva emaemae etaghi, me enongonongo inangarighi, me eaimulusi tee. <sup>48</sup> Ia nongina lo ateva taumattu ghe kai liu siola, me ghe atulula alena ateva epona tale atu. Nau eteva ateo atea ghe ghoaala, me ghe taghu poila ale ateva, karika poi ghe aisiisiaala, poli ghe atulu ekorokoronganaailliela. <sup>49</sup> Me lo ateva taumattu enongonongo inangarighi, me karika egheeiei, ia nongina lo ateva taumattu ghe atulula alena ateva tale kosa karika korokorongana. Me nau eteva ateo atea ghe ghoaala, me ghe taghula ale ateva, ale ateva ghe katuula, me ghe akalaainiela.”

**Aikaaiaane kapuira namu  
ngateva tau ngai uvi etoa**

*(Mat 8:5-12; Jon 4:43-54)*

**7** Nau eteva Iesu ghe ruula tani au-  
liaa isaa o voto ta nongonongoa  
taumattu ngatoa, me ghe ssola eKape-  
nium. <sup>2</sup> Kateva namuu eaitoia kateva ai  
(100) tau ngai uvi, kapuna tau ngai non-  
gonongo anna ateva ghe isikila, me ghe  
ailousiangailiia, me ang ghe ainasia tani  
mate. <sup>3</sup> Namu ngateva ta tau ngai uvi  
etoea ghe nongola va Iesu oia, me ghe su-  
ula namuu ta aJiu etoea, tani laa koloa  
va emae ghelei emasina kapuna tau ngai  
nongonongo anna ateva. <sup>4</sup> Nau laghe lao  
sio ta Iesu laghe aipoopoliangaili tani  
kolo Iesu, me laghe ue va, “Utani sau-  
sia, <sup>5</sup> poli eailousiangailiita aJiu etoea, me  
ghe sausitala tani atulu aleita ale nivelu  
eitaua ngateva.” <sup>6</sup> Liuna avalua o me  
Iesu ghe usilala.

Ang ghe aakalakanginala tanganu-  
ena, me namu ngateva ta tau ngai uvi  
etoea ghe suula kapuna atoa tani laa  
ue etana va, “Vau eteva, urau mene  
naa. Karika masina ieghi va umae tan-  
ganueghi. <sup>7</sup> Mausina avalua o me karika  
ataataraieghi va masi taumattu ieghi  
tani mae taraio. Anim anna va uppoaa  
teva tuku inangari, me aue kapughu tau  
ngai nongonongo anna ateva emasina.  
<sup>8</sup> Aghi tee auungu ta namu ngatoa, me  
aghaaitoiaa katoa tani tau ngai uvi.  
Arova aue ta kateva va, ‘Lao sio,’ aue  
elao, va aue va, ‘Mae sio,’ aue emae,  
me arova aghele ue ta kapughu tau ngai  
nongonongo anna ateva va, ‘Gheleila llo  
toko,’ egheelei.”

<sup>9</sup> Iesu ghe soghieiniela nau ghe non-  
goala. Ghe kiriela, me ghe taatara lao sio  
ta taumattu ngatoa laghe aaimuli teeia,  
me ghe uela va, “Aghaaulia etaimim va  
ia oia ase niaikaia ngateva namuu ia,  
karika aghe tara poia eIsraeli.” <sup>10</sup> Me  
taumattu ngatoa ghe sungilala, laghe

oghi lao sio elo ale, me laghe tarala tau  
ngai nongonongo anna ateva, ta ang ghe  
masinala.

**Iesu ghe totula natuna aliki taita  
ateva vause raue vulu eteva**

<sup>11</sup> Kasina nau ghe lange sio, me Iesu  
ghe lao sio tale masaliki eteae eNain. Ka-  
puna disaepolo atoa me tana taumattu  
ngatoa laghe usiela tani lao. <sup>12</sup> Nau ang  
ghe reerekata tale namu ngateae ata-  
mana tale ia o masaliki eteae, me ngeila  
ghe sausau emae ghoa taumattu ngat-  
eva matena ia. Vause ateva raue vulu  
ia, ie nonga o natuna ateva ghe matela.  
Me oroieili taumattu tale ia o masa-  
liki eteae laghe usiuser kinna. <sup>13</sup> Nau Vau  
eteva ghe taraiela, urunguitanina ateva  
ghe alousiuser teeieila, me ghe uela etana  
va, “Urou mene ngala.”

<sup>14</sup> Ghe lao sio tale aisalo atea laghe  
sausaua etana, me ghe posoala, me lo  
atoa laghe sausaua laghe matua ating-  
inala. Me ghe uela va, “Taita ateva,  
aghaaulia etam va totula!” <sup>15</sup> Taumattu  
ngateva matena ia ghe totu etokala, me  
ghe tiuaala tani sama. Me Iesu ghe taue  
lao sio ta kinna.

<sup>16</sup> Taumattu ngatoa laghe soghiaala,  
me laghe kkauaala God, me laghe ue va,  
“Propete ateva namuu ia ange rekataala  
elome etaita. Me God ange mae sio tani  
sausai kapuna taumattu ngatoa.” <sup>17</sup> Isaa  
o kiukiuna Iesu ghe kasu ekapa seela  
eJudia, me tale distriki kalakalanginga  
eJudia.

**Iesu me Jon tau ngai aasuu ia**

*(Mat 11:2-19)*

<sup>18</sup> Kapuna disaepolo atoa Jon laghe  
aulia ngakapala isaa o kiukiu etana. Ghe  
kolola ghalua, <sup>19</sup> me ghe sungilalueta va  
lalu laa kolomi Vau eteva va, “Io ia o tau-  
mattu ngateva laghe uela va aue emae,  
o aue ami mene toi ppae mene teva?”



<sup>20</sup> Nau lalu ghe laa rekata sio ta Iesu, lalu ghe uela ta Iesu va, “Jon tau ngai aasuu ia esungiengaluela tani mae kolomio va, ‘Io ia o taumattu ngateva laghe uela va aue emae, o ami mene toi ppae mene teva?’”

<sup>21</sup> Ia o nau eteva, Iesu ghe ghelei emasinala oroi taumattu tau sessa, me lo atoa raroai etoa laghe tokatoka etaira, me ghe gheleila mata salusaluna atoa laghe taatarala. <sup>22</sup> Ghe liula ta lo atoa Jon ghe sungilala va, “Am oghi lao sio, me am laa ghaulaa ta Jon llo ngam tarala, me ngam nongola. Mata salusaluna atoa la taatarala, me vereverenna atoa la kasukasula me tasussukuna atoa la raaranganala, me talinga volongo atoa la nongonongola, me matena atoa la totula, me lo atoa karika peiira la nongola masi kiukiu.†† <sup>23</sup> Me aue emasinaaili ta taumattu ngateva, unna niaiesoa etam kaakatuu vulueghi.”

<sup>24</sup> Vara me lo atoa Jon ghe sungilala laghe kasula, me Iesu ghe tiuaala tani auliaa Jon ta taumattu ngatoa. Ghe ue va, “Saa ateva am ghe ssola tani taraia tale voto ateva karika righi taumattu etana? Pitpiti eteva ghe kuukuueinia? <sup>25</sup> Arova karika, tani saa ateva am ghe kasueiniela tani sso taraia? Teva taumattu ghe aasae righi masi ghinna? Karika va isaa avalua o, ta lo atoa la asae masi ghinna, me la tokatoka tale masi nitoka, la tokatoka tanganuena king. <sup>26</sup> Tani saa ateva am ghe kasula tani sso taraia? Propete ateva? Aghaauliaa etaimim va ue, me emene laulau mene katoa propete. <sup>27</sup> Ia o taumattu ngateva, Uru ngai Manga ateva ghe aaulieinia nau ghe uela va,

““Tarala, aue asuu aikasuaa inangarighi eteva emuemueinio,

me ia aue eaimonomosiaa ngamue-mue ngalokoi salam.”‡‡

<sup>28</sup> Aghaauliaa etaimim va, ta lo atoa laghe lutula tale kosa ateva oia, karika teva erooroo ta Jon. Me lo ateva karika teae ararina, me iaaili euu tale ararimangalina ateva God, elaulau Jon.”

<sup>29</sup> (Taumattu ngakapa atoa, me tau ngai ghaa viliki veu etoa, nau laghe nongola inangarina Iesu, laghe akoronnala va salane God koronna, poli Jon ghe asulalala. <sup>30</sup> Paresi etoa me lo atoa tau ngalomasaanga ila tale inangari nipaopao, laghe ratila aloaloannaane God etaira poli karika va Jon ghe asulalala.)

<sup>31</sup> Me Iesu ghe mene uela va, “Saa ateva voto arooroo tani auliaa me eaima-toonga taumattu tale lo ateva oia vituu? Me ila saa taumattu ngila? <sup>32</sup> Ila nonginaaili aliki etoa la tokatoka tale liu ni-anamisi, katoa la ue lao ta mene lutu katoa va,

““Ami ghe vuuvuu kkinari nisighaa ngateae etaimim, me karika am ghe lokuloku; ami ghe uei kkinari tani kkinariaa matena atoa, me karika am ghe aalousiusi.’

<sup>33</sup> Nau Jon tau ngai aasuu ia ghe mae sio, me karika ghe namanama verete, me karika ghe ropiropi uaeni, am ue va, ‘Raroai eteva ghe tokatoka etana.’ <sup>34</sup> Me nau Natuna ateva Taumattu ngateva ghe mae sio, me ghe namanama, me ghe ropiropi, am ue va, ‘Tau ninamanama ia, me tau niropiropi ia, me kapuira ia tau ngai ghaa viliki veu etoa, me tau ssavoto atoa.’ <sup>35</sup> Masi ninannaa kanna God eepasunga va koronna ia tale maamaulu-aira lo akapa atoa la aimuli teeia.”

††7:22 Utara Aisaea 61:1; 35:5-6; 29:18

‡‡7:27 Malakai 3:1

### Vause ateva sesa gheegheleiaane ghe kaola masi aiaaoo ta Iesu

<sup>36</sup> Kateva Paresi ghe kolola Iesu va ghe laa namanama teeia tanganuena. Liuna avalua o me Iesu ghe lao sio tanganuena, me ghe lao sio tale tevoo tani namanama. <sup>37</sup> Kateva vause tale ia o masaliki eteva, tau ngai ghelei ssavoto ia, ghe nongola va Iesu ghe namanama tanganuena Paresi eteva. Liuna avalua o me ghe ghaa lao sio aikaai eteva alabasta ia, pasu ia tale aiaaoo masinaaili ngusungusuaane. <sup>38</sup> Ghe suuiaala emuli ta liue kkena Iesu, me ghe tiuaala tani ngala, me ghe apposi kkena Iesu tale raru matane, me ghe uluulu tale uu nguruna, me ghe nguungusuaa kkena, me ghe kaokao masi aiaaoo.

<sup>39</sup> Paresi eteva ghe koloala ghe tarala isaa o voto, me ghe tiuaala tani nna ngainao elome etana va, “Arova taumattu ngateva oia va propete ia, aue ghele kila va see eposoposoa, ta vause ateva oia tau ssavoto ia.”

<sup>40</sup> Iesu ghe liula etana me ghe uela va, “Saemon, aghanna tani aulia kateva voto ta ngetam.”

Saemon ghe liula me ghe uela va, “Tisa, aulieiniela.”

<sup>41</sup> Iesu ghe kiukiuuuala kiukiu eteae, ghe uela va, “Taumattu ngalua lalu ghe ghaala viliki veu pei niliu ta kateva taumattu. Kateva ghe ghaala ghalima ai (500) silva koen<sup>f</sup>, me mene kateva ghe ghaala ghalimangaulu (50). <sup>42</sup> Karika teva etairarua ghe roola tani liu unna viliki veu lao taumattu ngateva. Liuna avalua o me ghe uela va unna viliki veu pei niliu enim vulla. See etairarua aue eailousiangaili ia o taumattu ngateva?”

<sup>43</sup> Saemon ghe liula me ghe uela va, “Aghannaa va koti lo ateva taumattu, unna viliki veu pei niliu oroi.”

Iesu ghe liula me ghe uela va, “Angu aulia ngakoronnala.”

<sup>44</sup> Vara me ghe kiriela, me ghe taatara lao sio ta vause ateva, me ghe uela ta Saemon va, “Tarala vause ateva o. Amae sio tanganuem, me karika utau mae sio righi manu aipora kkeghi. Epotala kkeghi tale raru matane, me eulula tale uu nguruna. <sup>45</sup> Karika ungsueghila nau arekatala, me ia, nau akupi sso mae arau, karika ghe ruu poi tani ngusu kkeghi. <sup>46</sup> Io karika ukaola righi oeli ta urughu, me ia ekaola llo masi ngusungusuaane ta kkeghi. <sup>47</sup> Liuna avalua o me aghaauliaa etam va kanna ssavoto oroieili, ange kapala, liuna avalua o me ailousiaane namungaili. Me lo ateva karika oroi llo laghe kkaluaala etana, aielousiaane karika namuu.”

<sup>48</sup> Me Iesu ghe uela ta vause ateva va, “Kalum ssavoto ange kapala.”

<sup>49</sup> Mene katoa laghe kololala tani mae namanama, laghe ue elome etaira va, “See etana ierai, me eue va ekakkalua ssavoto?”

<sup>50</sup> Iesu ghe uela ta vause ateva va, “Kalum niaikaai ange asaangiola. Kasula tale luei.”

### Vause atoa laghe kasukasu tee Iesu

**8** Emulina, Iesu ghe lao sio tale mene kasina masaliki taatara me llo masaliki ghauna, tani ppoaa masi kiukiu tale ararimangalina ateva God. Kasangaulu ghalua (12) disaepolo laghe usuisia, <sup>2</sup> me tee lo atoa vause Iesu ghe tiu vella raroai etoa me ghe ghaa vella isiki etoa etaira; Meri aMakdala ia, lo ateva vause ghaitu (7) raroai laghe kupi ghoala etana; <sup>3</sup> Joana vausenna ia Kusa (Kusa ia namuu ia ta lo atoa laghe aaitaraa voto tale paa ngalena ateva Herot); Susana; me oroila mene katoa vause. Ila laghe saasausi Iesu me kapuna

<sup>f</sup>7:41 *silva koen* Utara Malloeana inangari.

atoa tani tau lao peiira me viliki veu tani sausi niuungu.

**Kiukiu niaimatoongana tale tau  
ngai pasa katu ue ngai eteva**

*(Mat 13:1-9; Mak 4:1-9)*

<sup>4</sup>Taumattu ngatoa laghe kasukasu tale masaliki taatara atoa tani mae tara Iesu. Nau laghe oroieili ila, me Iesu ghe auliaala kiukiu niaimatoongana ngateae, ghe uela va, <sup>5</sup>“Tau ngai pasa katu ue ngai eteva ghe kasula tani pasa katu ue ngai. Nau eteva ghe kaokaoaala katu ue ngai, kasina katu ue ngai ghe katuula tapaa salana, me laghe asala me ghila atoa laghe namala. <sup>6</sup>Kasina ghe katuula tale atu. Nau eteva ghe piipinosa, ghe mallela, ta poli euu atu ia, me karika righi manu. <sup>7</sup>Kasina ghe katuu ssola elome tale uasa karasa atoa, me nau eteva laghe pinosa aitaaua teela uasa karasa atoa, uasa karasa atoa laghe kavili ematelala. <sup>8</sup>Kasina ghe katuula tale masi kosa. Ghe pinosala me ghe kuneaala katu ue ngai ghe roola kateva ai (100), me ghe laula oroia llo katu ue ngai ekasina ghe kaokaoaala.”

Nau eteva ghe ruula tani kiukiu, ghe sama anamuula me ghe uela va, “See talingane manee aue enongo isaa oia inangari.”

**Mausina kiukiu niaimatoongana**

*(Mat 13:10-17; Mak 4:10-12)*

<sup>9</sup>Kapuna disaepolo atoa Iesu laghe kolomiela tale malloeana kiukiu niaimatoongana atea. <sup>10</sup>Iesu ghe uela va, “Alomasaanga tale voto eaaisulia tale ararimangalina ateva God, Tamaghi ghe tau aatu sio etaimim, ta mene katoa aghaauliaa inangari niaimatoonga, poli, “La taatara, karika aue la tara kila; la nongonongo me karika la aalomasanga tee.”<sup>§§</sup>

**Iesu ghe auliaala malloeana  
kiukiu niaimatoongana atea**

*(Mat 13:18-23; Mak 4:13-20)*

<sup>11</sup>“Malloeana kiukiu niaimatoongana atea ia avalua toko va: Katu ue ngai eaimatoonga inangarina ateva God. <sup>12</sup>Llo ghe katuula etapaa salana eaimatoonga lo atoa la nongonongo, vara me namu ngateva ta raroai etoa emaema, me eghaaghaa velu inangari tale urunguitaniira. Liuna avalua o me karika aue la aikaiaa me la saanga. <sup>13</sup>Llo tale atu, aue la masimasi tani nongo inangarina God, me aikaiaaira karika aluse, ta poli karika righi oaira. Nau nitotoonga emae, aue la katuu vulu God. <sup>14</sup>Llo katu ue ngai ghe katuu ssola elome tale uasa karasa eaimatoonga lo atoa la nongonongo, me nau la tokatoka, la nannangaili asease voto atoa, me la aloanna tani tue peipeiena, me la aloanna tani ghaa voto aue eamasi-masi maamauluaaira, me isaa o voto aue ekavili ekatungila. Me karika aue la kunea righi uene. <sup>15</sup>Katu ue ngai tale masi kosa eaimatoonga lo atoa masina nannaaira me urunguitaniira masina, la nongonongo aikaiaa inangari, me la posoposo parasi tale inangarina ateva God me la kuukunea masi ue ngai.

**Lam atea tale aitiitinginaane ateva**

*(Mak 4:21-25)*

<sup>16</sup>“Karika teva earrokoti lam atea me eaakou rungainia tale teva aiaku manu, me eaatoka pakeainia tale aisalo. Ta eatokaie sae tale aitiitinginane ateva, me lo atoa la sso tale ale ateva, aue la taatara etana. <sup>17</sup>Me karika righi voto eaaisulia va aue etam otu, me karika righi voto la aituttuia va aue etam otu, va taumattu ngakapa atoa karika aue la kila. <sup>18</sup>Lo ateva righi voto etana, God aue emene tau

lao kasina etana; me lo ateva karika righi voto etana, voto eannaa va isaa etana, God aue eghaa vulu etana.”

**Iesu, kinna me kapuna atoa**

(*Mat 12:46-50; Mak 3:31-35*)

<sup>19</sup> Vara me kinna Iesu me kapuna atoa laghe mae sio tani tara Iesu, karika laghe roola tani lao akalakalangina ta Iesu, poli oroieili taumattu ngatoo. <sup>20</sup> Katoa laghe auliaala ta Iesu va, “Kinam me kapum atoa ila eleka, me la ghaloanna tani taraio.”

<sup>21</sup> Iesu ghe liula me ghe uela va, “Lo atoa la nongonongo inangarina ateva God me la ghelei uunguaane, ila kinaghi ila me kapughu ila.”

**Iesu ghe paola ttasi eteva me ghe lueila**

(*Mat 8:23-27; Mak 4:35-41*)

<sup>22</sup> Kateva nau Iesu me kapuna disaepolo atoa laghe aikaaila tale paanaka ateva, me Iesu ghe uela va, “Ita lao tale pai kativilau tale ateo talia ngateae.” Vara me laghe tiu ghoala. <sup>23</sup> Nau eteva laghe oseose elaolao, Iesu ghe asekanue alokoila, me ghe llusula. Paka kuukuu ttasi eteva ghe tiuaala tale ateo talia ngateae. Ttasi eteva ang ghe aavulu paanaka ateva, me laghe tokala tale paka nimoia.

<sup>24</sup> Disaepolo atoa laghe angunila Iesu me laghe uela va, “Vau eteva, vau eteva, ngita raaraual!”

Iesu ghe tingina saela me ghe paola kuukuu eteva me paka kotoo atoa laghe aakope, me ttasi eteva ghe kapala, me luei eteva ghe asola. <sup>25</sup> Ghe kolomila kapuna disaepolo atoa va, “Vaalua karika righi aikaaiiaaimim?”

Tale nimoia laghe soghiaala voto oia ghe lutula, me ngila ghe aikolomieinila va, “See ia taumattu ngateva oia? Esama

teela ttasi eteva me kotoo atoa, me la nongo usilainia.”

**Iesu ghe ghelei emasinala taumattu ngateva raroai etoa etana**

(*Mat 8:28-34; Mak 5:1-20*)

<sup>26</sup> Laghe ose lao sio tanganue aGerasa ngatoo, tale mene pai kativilau eGalili. <sup>27</sup> Nau Iesu ghe tingina ssola elae, taita ateva, raroai etoa laghe tokatoka etana, tale masaliki taatara ateae, ghe ghoa mae tani sou Iesu. Oroï nau ang ghe lao sio ghe tam aasae righi ghinna, me ghe tam tokatoka tale teva ale ta ghe tokatoka tale liu niaikkaiaa. <sup>28</sup> Nau ghe tarala Iesu ghe aore anamungailila, me ghe turru siola ta liue kkena Iesu, me namungaili ta ghe samala me ghe uela va, “Saa ateva ualoannaia etaghi Iesu, Natuna io God iaaili Epona? Aghaaloanna va urau mene ghelei righi sesa etaghi!” <sup>29</sup> Poli Iesu ghe aulia ngasarasarakanala ta raroai etoa va la kupi vulu ghoa ia o taumattu ngateva. Oroiaata raroai etoa ngila ghe tokala etana, liuna avalua o me nau laghe iri-iri poi nimane me kkena tale sene, me taumattu ngateva ghe aaitoia poia, ghe gheeghelei patepate sene, me raroai etoa laghe kookoueinie see tale voto karika righi taumattu etana.

<sup>30</sup> Iesu ghe kolomiela va, “See ia ararim ateae?”

Ghe liula va, “Aghi Liijen\*,” ta oroi raroai etoa laghe tokatoka etana. <sup>31</sup> Me laghe aipoopolia ta Iesu va ghe rau mene suu vella lao tale liu eteva karika aioghioghi etana.

<sup>32</sup> Oroieili mosu ghe tingina suesue see tale motouru. Raroai etoa laghe nongonongoaa ta Iesu va etau vella, me la laa kupi sso ta mosu etoa, me Iesu ghe tau vellala. <sup>33</sup> Nau eteva raroai etoa laghe kasu vulila taumattu ngateva oia,

\*8:30 *Liijen* Utara *Malloeana inangari*.

laghe kupila mosu etoa, me mosu etoa laghe aikarati velu siola tale voto ateva siosiona ia, me laghe aoso velu siola tale ateo talia ngateae, me ghe arropi ematelala.

<sup>34</sup> Lo atoa laghe aaitaraa mosu, laghe tarala vaalua isaa o voto ghe lutula. Laghe iloula tani laa kkailaa tale masaliki taatara atea, me mene kasina lutu masaliki kalakalangina. <sup>35</sup> Me taumattu ngatoa laghe lao sio tani tara isaa o voto ghe lutula. Nau eteva laghe mae sio ta Iesu, laghe tarala taumattu ngateva ia o raroai etoa laghe kasu vuliela, ghe tokatoka ta liue kkena Iesu, ghe molu etokala, me nannaane ang ghe masinala; me laghe matautula. <sup>36</sup> Lo atoa laghe tarala, laghe auliaala kiukiuna taumattu ngateva oia, raroai etoa etana, saa voto ghe lutula, me ghe masinala. <sup>37</sup> Isaa avalua o me taumattu tale masaliki eteae eGerasa me llo masaliki kalakalaa etana, laghe kolomila Iesu va ekasu, poli paka nimoia ateva ghe ghaailala. Iesu ghe aikaaile tale paanaka ateva, me laghe aimonomonosiaala tani kasu.

<sup>38</sup> Taumattu ngateva raroai etoa laghe kasu vuliela, ghe aloannaaili tani usi Iesu. Iesu ghe sungiaa oghiela, me ghe uela etana va, <sup>39</sup> “Ukiri lao tanguem, me ulaa ghauliaa saa voto God ghe gheleila etam.” Liuna avalua o, taumattu ngateva oia ghe lao sio tanguena, me ghe kiukuaala tale masaliki taatara atea saa voto Iesu ghe gheleila etana.

**Vause arighi matena ia me  
vause ateva isikina ia**

(*Mat 9:18-26; Mak 5:21-43*)

<sup>40</sup> Nau eteva Iesu ghe oghiaala, taumattu ngatoa laghe souela tale nimasi-masi, poli ila akapa laghe aloanna tani taraia. <sup>41</sup> Taumattu ngateva ararina

ateae ta Jaeras, namuu ia tale ale nivelu eitaua ngateva, ghe mae sio, me ghe suuiaala ta liue kkena Iesu, poli ghe aloannaaili va Iesu ghe usia, me lalu ghe lao tanguena, <sup>42</sup> poli kateva nonga ia natuna aliki vause ateva, anna nimanama eroroo kasangaulu ghaluae (12), me ang ghe aainasia tani mate.

Nau eteva Iesu ang ghe laolao, taumattu ngatoa laghe tomtomia. <sup>43</sup> Me vause ateva rae ateva ghe iloueinia ghe roola kasangaulu ghaluae (12) nimanama, ie tee elome ta taumattu ngatoa. Ghe rungiala unna viliki veu tani ghaa niaisausi<sup>†</sup>, me karika teva ghe roola tani ghelei emasinaia. <sup>44</sup> Ghe keola emuli ta Iesu, me ghe posola euu tale sama unna aisoe ateva Iesu, me katen-gaata nonga ta rae ateva ghe ruula tani ilou.

<sup>45</sup> Iesu ghe kolomila va, “See etulieghila?”

Nau eteva laghe uela va karika poi teva ghe tuliela, Pita ghe uela va, “Vau eteva, taumattu ngatoa oroieili ila, me la aikerrei tani atu etam.”

<sup>46</sup> Me karika ta Iesu ghe mene uela va, “Kateva etulieghila; aghateateaala va kasina tani sarasarakana ange kasula etaghi.”

<sup>47</sup> Me vause ateva, ghe kilala va karika ghe roola tani aisulia, ghe moiela, me ghe lao sio tani suuiaa ta liue kkena Iesu. Ta mata taumattu ngatoa, ghe auliaala mausi saa, me ghe tulila Iesu, me vaalua arovaeaata nonga ta ghe masinala. <sup>48</sup> Iesu ghe uela ta vause ateva va, “Natughu, tale unem niaikaia etaghi angu masinala. Kasula tale luei.”

<sup>49</sup> Nau eteva Iesu ghe aippooaa, me taumattu ngateva ghe kasula tanguena Jaeras, ia o namuu ia tale ale nivelu eitaua ngateva, ghe rekatala. Ghe uela

<sup>†</sup>8:43 Kasina uru ngai laghe pitila, karika laghe uela va *Ghe rungiala unna viliki veu tani ghaa niaisausi*

va, “Natum vause arighi ange matela. Urou mene ghelei va emene aanasa ta tisa ngateva.”

<sup>50</sup> Iesu ghe nongola, me ghe uela ta Jaeras va, “Urou mene matautu; unim aikaiaa, me aue emasina.”

<sup>51</sup> Nau eteva ghe rekatala tanganuena Jaeras, ghe tam aloannala righi taumattu tani usie sso elo ale, ta Pita nonga me Jeimis, Jon, me tamane me kinna aliki vause arighi, ila nonga laghe ssola. <sup>52</sup> Taumattu ngatoa laghe ngangn-gala, me laghe aalousiusi teeia. Iesu ghe uela va, “Angenna ngam ngalala. Aliko vause arighi karika ematela, ta enim aseasekanua.”

<sup>53</sup> Laghe kangainiela, ta laghe kilakila va aliki vause ateva matena ia. <sup>54</sup> Iesu ghe kune siola nimane atelange, me ghe uela va, “Aliko erighi, totula!” <sup>55</sup> Aliko vause arighi ghe sakesakela, me arovaeaata ta ghe laa sio totu, me ghe tingina saela. Me Iesu ghe uela etaira va la tau lao righi inana, me enama. <sup>56</sup> Tamane me kinna lalu ghe soghiaala tani tara, me Iesu ghe aulia ngakorokoronganalala etairarua va lalu rou mene aulia ta righi taumattu isaa o voto ghe lutula.

### **Iesu ghe suula 12 disaepolo**

*(Mat 10:5-15; Mak 6:7-13)*

**9** Iesu ghe kolo aituaala kasangaulu ghalua (12) kapuna disaepolo, me ghe taula sarasarakana me nimatuu-tuliena etaira tani ghaa velu raroai, me tani ghaa velu isiki ta taumattu ngatoa. <sup>2</sup> Me ghe sungilala tani laa ppoaa ngaotu ararimangalina ateva God, me tani ghelei emasina tau sessa atoa. <sup>3</sup> Ghe uela etaira va, “Am rau mene ghaa righi voto nau am kasu. Karika mene tiulu aikkatulu tani kkatulu, teva aikaai ghinna, me righi inana me viliki veu, me karika am mene ghaa ghalua aiso. <sup>4</sup> Me arova am laa toka tale lo ateva ale,

am toka elaa ghaa nau am kasu vuli lo atea o masaliki. <sup>5</sup> Me arova karika la ghaaiem, am kasu. Nau am kasu, am rariaa velu kosa ta kkeimim, me aue la kila va voto laghe gheleila karika masina.” <sup>6</sup> Me disaepolo atoa laghe kasula tani laa ppoaa see masi inangari tale kateae kateae masaliki, me tani ghelei emasina tau sessa atoa.

### **Herot ghe aloanna tani kila va Iesu tani see ia**

*(Mat 14:1-12; Mak 6:14-29)*

<sup>7</sup> Gavana ngateva Herot ghe nannangaili ta ghe nongola oroieili voto Iesu ghe ghelei, poli laghe uue va Jon ang ghe mene totula tale nimate, <sup>8</sup> me katoa laghe uue va Elaija ghe kaurekatila, me katoa laghe uue va kateva ta propete atoa emua arau ang ghe mene totula. <sup>9</sup> Liuna avalua o me Herot ghe ue va, “Jon ngaghe auliaala me laghe sai pulela alona atiulu, me tani see ia taumattu ngateva oia, amene nongonongo uunguaane?” Me ghe aaloanna tani taraia.

### **Iesu ghe taula inana ta 5,000 taumattu**

*(Mat 14:13-21; Mak 6:30-44; Jon 6:1-14)*

<sup>10</sup> Apostolo atoa laghe kiriaa mae sio ta Iesu, me laghe aulia ngakapala voto laghe gheleila. Ghe ghaailala, me ila nonga laghe lao sio tale masaliki taatara atea eBetsaida. <sup>11</sup> Nau taumattu ngatoa laghe nongola va ang ghe kasula, laghe aimulila etana. Ia ghe masimasieinilala, me ghe tiuaala tani ppoaa ararimangalina ateva God etaira, me ghe ghelei emasina tau sessa atoa.

<sup>12</sup> Auena sinaka ateva ghe suu, me kasangaulu ghalua (12) disaepolo laghe mae sio, me laghe uela ta Iesu va, “Sungi vellala, me la lao tale righi masaliki, o paa ngutana, tani laa poli righi inana me la nama, me la ghaso. Ta voto ateva oia ita tokatoka etana vurunganna ia.”

<sup>13</sup> Iesu ghe uela etaira va, “Am, am taula righi inana, me la nama.”

Laghe liula me laghe uela va, “Ghalima nonga verete me ghaluepai kko. Ualoanna va ami laa poli see righi aneira inana?” <sup>14</sup> Erooroo ghalima airari (5,000) taita oia etokatoka.

Iesu ghe uela etaira va, “Am laa ghaulia etaira va la laa toka aitauaa sio ghalimangaulu (50) taumattu ta kateae uela.” <sup>15</sup> Disaepolo atoa laghe auliaala, me laghe toka siola tale uela. <sup>16</sup> Iesu ghe ghaala verete ghalima me kko aluepai, me ghe taatara saela epona liu, me ghe kaili emasina saela, me ghe piri popapolakila, me ghe taula ta disaepolo atoa tani laa koita ta taumattu ngatoa. <sup>17</sup> Laghe namala, me ila akapa laghe tuvula, me disaepolo atoa laghe kaai esokosokoiaala tapiri nginana, ghe roola kasangaulu ghaluae (12) laka.

**Pita ghe aulia ngaotula  
va Iesu tani see ia**

(*Mat 16:13-19; Mak 8:27-29*)

<sup>18</sup> Kateva nau Iesu ghe puupure, me kapuna disaepolo atoa laghe tokatoka teeia, me ghe kolomilala va, “Taumattu ngatoa la uue va aghi tani see?”

<sup>19</sup> Laghe liula me laghe uela va, “Katoa la ue va io Jon tau ngai aasuu ia, me katoa la ue va io Elaija, me katoa la ue va io kateva ta propete atoa emua arau ang ghe mene totula.”

<sup>20</sup> Me ghe kolomilala va, “Me am, am ue va aghi see?”

Me Pita ghe liula me ghe uela va, “Io kapuna Mesaea ngateva God.”

**Iesu ghe uela va aue  
emate me emene totu**

(*Mat 16:20-28; Mak 8:30-9:1*)

<sup>21</sup> Iesu ghe paolala va, “Karika am mene auliaa see va aghi tani see.” <sup>22</sup> Me ghe uela va, “Natuna ateva Taumattu ngateva aue eghaa oroieili mmarikana,

me namu ngatoa, me namu ngatoa ta pristi etoa, me tau ngai apasunga ngatoa tale inangari nipaopao, aue la liu viliira etana, me aue la uvi ematea. Me aue kotonna ateva nau, emene totu.”

<sup>23</sup> Vara me ghe uela ta kapuna disaepolo atoa va, “Arova lo ateva ealoanna tani usieghi, etani sioaa nannaane, me esunuki unna aikotoo ateva nau ekapa atoa, me eaimuli etaghi. <sup>24</sup> Ta poli arova lo ateva eannaa nonga maamauluaane, aue eraua. Me arova lo ateva eraua ta poli mausighi, aue esaanga. <sup>25</sup> Me arova lo ateva eghaa voto akapaaili tale kosa ateva, me maamauluaane ekapa, vaalua isaa o voto aue esausia? <sup>26</sup> Arova lo ateva taumattu epalataainaghi me inangarighi eteva, aue Natuna ateva Taumattu ngateva epalataainia, nau eteva emae tee maamallangiaane, me maamallangiaane Tamane, me tee kapuna ensolo atoa manga ila. <sup>27</sup> Aghaaulia ngakoronna etaimim va katoa oia etaimim am tiitingina, karika aue am mate, me aue am tara ararimangalina ateva God.”

**Vilikina Iesu ghe mene isaa ppaela**

(*Mat 17:1-8; Mak 9:2-8*)

<sup>28</sup> Koti ghaoalu (8) nau ghe lange sio, nau ghe ppoaala llo inangari, me ghe kolola Pita me Jon me Jeimis, me laghe saela tale motouru tani looloo sae. <sup>29</sup> Ghe looloo sae, me taatara matane ghe isaa ppaela, ghinnanina ghe usousoanaailila, me ghe ravaravaiaenaaailila. <sup>30-31</sup> Vara me ghalua taumattu, Moses me Elaija, lalu ghe kaurekatila tale mallanginaane ateva God, me lalu ghe samasama tee Iesu. Lalu ghe aauliaa saa llo voto aue elutu etana eJerusalem, me vaalua aue ekasu vuli kosa ateva oia. <sup>32</sup> Matana Pita me mene ghalua tana kapuna ghe maamaatana tani asekanu. Me nau laghe totula, laghe tarala mallanga ateva ta matana Iesu, me mene ghalua lalu ghe tiitingina teeia. <sup>33</sup> Me nau lalu

ghe aloanna tani kasu vuli Iesu, me Pita ghe uela ta Iesu va, “Vau eteva, masina ta ngeita tokala oia, me angatolu atulu ale paapali kotolu, kateva alem ia, me kateva alena ia Moses, me kateva Elaija.” Pita ghe auliaala isaa o inangari, me karika ghe kilakila saa ateva ghe aaulieinia.

<sup>34</sup> Nau Pita ghe aulia isaa o inangari, me urukookoo ateva ghe akoulala, me ngilotolu ghe maamatautu. <sup>35</sup> Lingi ngalo ateva ghe mae sio tale urukookoo ateva, ghe uela va, “Ia o taita ateva natughu ia, ngaghe suitoongainiela. Am nongoa.” <sup>36</sup> Nau lingi ngalo eteva ghe ruula, me laghe tara nongala Iesu. Nau laghe oghi sio mae, karika laghe auliaa poila ta mene toa tale voto laghe tarala.

**Iesu ghe ghelei emasinala taita arighi raroai eteva ghe tokatoka etana**

*(Mat 17:14-18; Mak 9:14-27)*

<sup>37</sup> Ghe paila ta mene kateva nau, nau eteva laghe sio mae tale motouru eteva, me laghe tarala oroieili taumattu ngatoa, laghe mae sio tani sou Iesu. <sup>38</sup> Kateva etaira ghe samala me ghe uela va, “Tisa! Mae tara natughu eteva, ta kateva nonga natughu, me ughelei emasinaia. <sup>39</sup> Nau eteva raroai eteva ekupikupia, esamasama anamungaili, me egheleia eoo, me usouso paane eghoa, me eghelele saasakia vilikina, me karika poi ekasukasu vuli parasia. <sup>40</sup> Anim auliaa poila ta kapum disaepolo atoa tani ghaa velu raroai eteva, me karika laghe roola.”

<sup>41</sup> Iesu ghe liula me ghe uela va, “Am lo ateva oia vituu, karika righi uneimim niaiesoaa, nannaaimim me gheeleiaaimim karika ghulughuluena. Ghaisaa ta atoka teeiem? Me aue ghaisa ta aue atoiem va am aiesoa? Ghaa mae natum ateva.”

<sup>42</sup> Nau aliki eteva ghe maemae, me raroai eteva ghe sau velu elokoie siola

tapaa kosa, me ghe tiuaala tani oo. Iesu ghe paola raroai eteva, me ghe ghelei emasinala aliki eteva, me ghe tauela ta tamana. <sup>43</sup> Ila akapa taumattu ngatoa laghe soghiaala tani tara sarasarakani-aane God.

**Ghaluene Iesu ghe uela va aue emate**

*(Mat 17:22-23; Mak 9:30-32)*

Taumattu ngakapa atoa laghe nannangaili isaa akapa voto Iesu ghe gheleila, me Iesu ghe uela ta kapuna disaepolo atoa va, <sup>44</sup> “Am nongo amasina saa ateva aghaaulieinia ta ngetaimim, va Natuna ateva Taumattu ngateva aue la tauae lao ta nimaira taumattu ngatoa.” <sup>45</sup> Karika laghe alomasaanga teela malloeanina inangari Iesu ghe auliaala, ta malloeanina ghe aaisulia etaira. Laghe maamatautu tani kolomia.

**See aue enamuu?**

*(Mat 18:1-5; Mak 9:33-37)*

<sup>46</sup> Kateva nau, laghe aaissakeanna va tani see aue enamuu etaira. <sup>47</sup> Iesu ghe kilala nannaaira, liuna avalua o me ghe ghaala aliki erighi, me ghe mae atingina valainie sio etana. <sup>48</sup> Vara me ghe uela etaira va, “See umasimasi tani ghaa aliki etoa tale ararighi eteae, ughaaghaa teeieghi, me ughaaghaa tee lo ateva ghe sungieghila. See etaimim esio euu, ia namuu ia etaimim.”

**See karika tau ngai ssateimim ia, kapuimim ia**

*(Mak 9:38-40)*

<sup>49</sup> Jon ghe liula me ghe uela va, “Vau eteva, ami ghe tarala taumattu ngateva, ghe sungi vella raroai etoa tale ararim atea, me ami ghe tootoonga tani pao rungainia, poli karika va eusiusita.”

<sup>50</sup> Iesu ghe uela va, “Am rau mene paoa, ta lo ateva karika esessa teeita, kapuita ia.”



**ASameria ngatoa karika laghe  
aloanna va Iesu ghe lao tanganueira**

<sup>51</sup> Nauna Iesu ang ghe aakalakalangina tani sae epona liu, me ghe annaaili tani sae eJerusalem. <sup>52</sup> Ghe sungi emuemuela katoa kapuna tani laa ghaimanomanosieinila tale kateae masalikiira aSameria ngatoa. <sup>53</sup> Karika laghe aloanna tani aikoloainia, ta poli ghe aloanna tani sae eJerusalem. <sup>54</sup> Disaepolo alua ta Jemis me Jon, lalu ghe tarala ta laghe ghelei evaluela o, me lalu ghe kolomila Iesu va, “Vau eteva, ualoanna va ami kolo sae kura atea epona liu, me esio ataila?”<sup>‡</sup> <sup>55</sup> Iesu ghe kiriela, me ghe paolaluela,<sup>¶</sup> <sup>56</sup> me laghe mene lao sio ta mene kateae masaliki.

**Iesu ghe auliaala vaalua  
tani aimuli teeia**

(Mat 8:19-22)

<sup>57</sup> Nau laghe kasukasu elaolao tapaa salana, kateva taumattu ghe uela ta Iesu va, “Aghaloanna tani usio nongina ea ulao.”

<sup>58</sup> Iesu ghe liula me ghe uela va, “Paua nge tapaa tuvui etoa tue liuira, me ghila atoa aleira, me Natuna ateva Taumattu ngateva karika teva alena tani laa ghasekanua etana.”

<sup>59</sup> Me ghe uela ta mene kateva taumattu va, “Mae usieghi.”

Me taumattu ngateva ghe liula me ghe uela va, “Vau eteva, utau velueghi mua, me alaa kkaia tamaghi.”

<sup>60</sup> Iesu ghe uela etana va, “Utau vella matena atoa la laa kkaia matena atoa. Me ulao, me ulaa aotu see ararimangalina ateva God.”

<sup>61</sup> Kateva ghe uela ta Iesu va, “Aghi aghaloanna tani usio, me utau velueghi mua, me alaa akorova kapughu etoa tanganueghi.”

<sup>62</sup> Iesu ghe liula me ghe uela etana va, “Arova teva taumattu eoseose me etaatara lao emuli, karika erooroo tani uungu tale ararimangalina ateva God.”

**Iesu ghe suula 72**

**10** Emulina tale isaa o voto, Vau eteva ghe mene suitoongala ghaitungaulu ghalua (72)<sup>§</sup>, me ghe sungi emuemuilala ghalua ghalua ta ngetaira, tani lao akapa see tale masaliki taatara, me tale masaliki auena ghe lao etana. <sup>2</sup> Ghe uela ta ngetaira va, “Utana ateva ang ghele matuela, me tau ngai uungu etoa karika oroi ila. Liuna avalua o, am kolomi sae Vau tale tau ngai mukemuke atoa, va emene sungi toa tau ngai mukemuke, tani lao tale utana atingiu matuenna ia. <sup>3</sup> Am kasula! Asungisungiem nongina natu sipsipi etoa la tiitingina tee ueli paua atoa. <sup>4</sup> Karika am mene ghaa aikaai viliki veu, aikaai ghinna, o aiaasae tale keke. Karika am mene tingina aippooaa elaolao etapaa salana.

<sup>5</sup> “Nau am kupi sso tale ale ateva, am ue akasina va, ‘Luei etoka tale ale ateva oia.’ <sup>6</sup> Marova teva taumattu tale luei etokatoka, kaluimim luei aue easo ta ngetana; marova karika, aue luei eteva eoghi aatu ta ngetaimim. <sup>7</sup> Am toka tale ia o ale ateva, marova la tau aatu inana me manu, am ghaa, poli emaamasina va tau ngai uungu eteva eghaa aipolipoli tale uunguaane eghelei. Karika am mene kasu ekapa see tale ale atoa.

<sup>‡</sup>9:54 Kasina uru ngai laghe pitila, laghe uela va *Vau eteva, ualoanna va ami kolo sae kura atea epona liu, me esio ataila, nongina Elaija ghe gheleila?* Utara 2 Kings 1:10-12.

<sup>¶</sup>9:55 Kasina uru ngai laghe pitila, laghe uela va *me ghe uela etairarua va, “Karika amalu kilakila saa spiriti eteva etoka etaimalua. 56 Natuna ateva Taumattu ngateva karika ghe sio mae tani uvi emate taumattu, ta tani asaangila.”*

<sup>§</sup>10:1 Kasina uru ngai laghe pitila laghe uela va, *ghaitungaulu (70).*

<sup>8</sup>“Nau am lao tale masaliki taatara me la ghaaiem, am nama inana la tau aatu. <sup>9</sup>Am ghelei emasina tau sessa atoa, me am ue ta ngetaira va, ‘Ararimangalina ateva God ange kalakalanginala etaimim.’ <sup>10</sup>Me marova am sso tale masaliki taatara, me la ratiem, am lao tale tummatavanga, me am ue va, <sup>11</sup>‘Kosa tale masalikiimim etokata tale kkengalua, ngangalu raararia velu poli ngam ratiengaluela. Me am kila isaa oia voto: Ararimangalina ateva God ange aakalakalaala.’ <sup>12</sup>Aghaauliaa ta ngetaimim va, aue nau niaisakei eteva, God aue eapasunga maomaona nimmarikana tale masaliki eteae eSodom, me sesaaili tale lo ateaie oia masaliki!

**Nialousiusi ta llo masaliki taatara etoa karika la nanna ngaioghioghiaa**

*(Mat 11:20-24)*

<sup>13</sup>“Aue esesaaili ta ngetam, Korasin! Aue esesaaili tee ta ngetam, Betsaida! Marova mirikolo oia laghe gheleila eTaer me eSaedon, taumattu ngatoa aue laghe molu tale ghinna nialousiusi me auu kura, tani apasunga va ngila ghe oghi vulula sesa gheeleiaaira. <sup>14</sup>Aue emaomaona nimmarikana ta eTaer me eSaedon tale nau niaisakei eteva, me am karika. <sup>15</sup>Me io, Kapenium, uanna va aue usae epona? Karika, io aue usioaili euu.

<sup>16</sup>“See enongonongoam, enongonongoghi; me see eratiem, eratiratiegghi, me see eratiratiegghi, eratirati lo ateva ghe sungieghila.”

<sup>17</sup>Kasina nau ghe lange sio, me ghaitungaulu ghalua (72)\*\* taumattu, laghe oghi mae sio tee nimasimasi, me laghe uela va, “Vau eteva, raroai etoa tee laghe nongonongo usilainamami, nau ami ghe auliaa voto tale ararim ateaie.”

<sup>18</sup>Eghe liula me ghe uela va, “Aghe tarala Satana ghe katuula nongina ravaravaia ateva ghe sio mae epona liu. <sup>19</sup>Ngaghe tau aatu sio sarasarakana tani asa katuu me onioni, me tani apala tau ngai ssateim ateva; karika righi voto aue eghelei saasakieinam. <sup>20</sup>Karika am mene masimasi va raroai etoa la nongonongo usilainam, ta am masimasi va arariimim laghe piti elokoila epona liu.”

**Iesu ghe masimasi**

*(Mat 11:25-27; 13:16-17)*

<sup>21</sup>Tale ia o nau eteva, Iesu ghe pasula tale nimasimasi kanna Spirit Manga ateva, me ghe uela va, “Atautauo sae, Tamaghi, Vau ngepona liu io me kosa ateva, poli ughe aisuliaala isaa oia voto ta tau ngalomasanga atoa, me angu aotuotula ta natum natu aliki etoa. Ue Tamaghi, ughelei isaa o voto tani aimuli tee masi aaloannaam.

<sup>22</sup>“Tamaghi ang ghe tau mae sio isaa akapa voto oia etaghi. Karika teva ekilakila va see ia Natuna, Tamane nonga; me karika teva ekilakila va see ia Tamane, Natuna nonga, me lo atoa Natuna ghe suitoongainilala, me ghe apasungaala Tamane etaira.”

<sup>23</sup>Eghe kirela me ghe aulia ngainaola ta kapuna disaepolo atoa va, “Niarangise tale lo atoa taumattu la taatara voto am taatara. <sup>24</sup>Aghaauliaa ta ngetaimim va oroieili propete atoa me kingi etoa laghe aaloanna tani tara voto am taatara ghaine, me karika laghe tarala, me laghe aaloanna tani nongo voto am nongonongo ghaine, me karika laghe nongola!”

**Kiukiu niaimatoongana ta masi taumattu nge Sameria ngateva**

<sup>25</sup>Kateva nau, kateva taumattu, muen-naaili ia tale inangari nipaopao, ghe

\*\*10:17 Kasina uru ngai laghe pitila laghe uela va, *ghaitungaulu (70)*.

tingina saela tani tootoonga Iesu tale kateva nikokkolomi. Ghe uela va, “Tisa, saa ateva aghelaia tani ghaa mauhue ateva tokatoka liu ia?”

<sup>26</sup> Iesu ghe liula me ghe uela va, “Saa ateva laghe pitiela tale inangari nipaopao? Saa kilakilaam ta ngetana?”

<sup>27</sup> Eghe liula me ghe uela va, “Uaielousia Vaum ateva kapum Goto ia tale urunguitanim ateva, me tale maamaulu-aam, me tale sarasarakaniaam, me tale nannaam; me uaielousia tee taumattu ngateva kalakalangina ia etam, nongina uaielousieinio.”††

<sup>28</sup> Iesu ghe liula me ghe uela va, “Inangari angu liula koronnaaaili; ughelei isaa o voto, me aue utoka.”

<sup>29</sup> Eghe aloanna tani apasunga va ia ghulughuluena ia, me ghe kolomila Iesu va, “See ia taumattu ngateva kalakalangina ia etaghi?”

<sup>30</sup> Iesu ghe liula me ghe uela va, “Kateva taumattu ghe kasula eJerusalem tani sio eJeriko, me tau niainao atoa laghe uviela. Laghe ghaa velu ekapala ghinnanina, laghe uviela, me laghe kasu vuli elokoiela, me ghaisa ngarighi ghe mate.

<sup>31</sup> Pristi eteva ghe usi laala ie nonga o salana atikirighi. Nau ghe tarala taumattu ngateva uviuvina ia, ghe keoa ngalokoiela, me ghe kasula. <sup>32</sup> Tee me Livae ateva,‡‡ nau eteva ghe mae sio tale ia o voto ateva taumattu ngateva ghe asoaso etana, ghe taraiela, me ghe keoa ngalokoiela. <sup>33</sup> Vara me taumattu nge Sameria ngateva, ie tee ghe usi laala ia o salana atikirighi. Ghe mae sio nongina taumattu ngateva ghe asoaso; nau ghe taraiela, ghe alousiusi teeiela.

<sup>34</sup> Ghe lao akalakalaa sio ta ngetana, me ghe kaola oeli me uani ta vilik-

ina, me usaina, me ghe ghiisila. Ghe sau etokaie saela ta kiena donki eteva,¶¶ me ghe laoainie sio tale ale aiasoaso ateva me ghe aitarainia. <sup>35</sup> Elue talaua, ghe tau lao sio ghaluevilau viliki veu ta tau ngai toitoi eteva, me ghe uela va, ‘Uaitarainia, me marova uaitarainia tee tale mene righi peim, aue amae aliu voto akapa ughe gheleila ta ngetana.’

<sup>36</sup> “See ta ngetairotolu uannaa va ia kalakalangina ia ta taumattu ngateva, tau niainao atoa laghe uviela?”

<sup>37</sup> Tau ngalomasaanga ateva tale inangari nipaopao ghe liula me ghe uela va, “Ia o taumattu ngateva ghe alousiusi teeiela.”

Iesu ghe uela va, “Lao sio, me ughelei nongina ia o taumattu ngateva ghe gheleila.”

### Iesu tanganue Mata me Meri

<sup>38</sup> Nau Iesu me kapuna disaepolo atoa laghe kasukasu elaolao, me laghe rekatala tale masaliki eteae. Vause ateva, ararina ateae ta Mata, ghe kolola lao sio tanganuena. <sup>39</sup> Nengana vause ateva, ararina ateae ta Meri, ghe toka siola ta liue kkena Vau eteva, tani nongoa ta ghe aaiippoaa. <sup>40</sup> Mata ghe aaivengevengesi, poli ia nonga ghe aimonomosia inana. Ghe mae sio, me ghe uela va, “Vau eteva, emamasina va aghi nonga aghaimonomosia inana, me nengaghi enim tokatoka? Auliaala, me emae sausieghi!”

<sup>41</sup> Vau eteva ghe liula me ghe uela va, “Mata, Mata, unannaa oroieili voto, <sup>42</sup> me kateva nonga voto ateva ualoannaia, me karika ia etam. Meri ange aloannala ia o voto ateva masina ia, me karika aue aghaa velua etana.”

††10:27 Diuteronomi 6:5; Levitikas 19:18

‡‡10:32 *Livae ateva* Utara *Malloeana inangari*.

¶¶10:34 Karika va kateva nonga donki taumattu nge Sameria ghe iilou etana. Ghe iilou ta kateva, me ghe kaakaai peina ta mene kasina donki.

## Iesu ghe aapasunga vaalua tani looloo sae

(Mat 6:9-15; 7:7-11)

**11** Kateva nau Iesu ghe looloo sae tale kateva voto, me nau ghe ruula, kateva kapuna disaepolo ghe uela etana va, “Vau eteva, uapasunga etaimami vaalua tani looloo sae, nongina Jon ghe aapasunga ta kapuna disaepolo atoa.”<sup>2</sup> Iesu ghe uela etaira va, “Nau am looloo sae, am looloo sae avalua toko va,

“Tamamami, usausiemami tani oneoneaa ararim ateae va manga ia, ami aloanna va ararimangalim ateva esio.

<sup>3</sup> Utau roorooa mae anemami inana tale kateva kateva nau.

<sup>4</sup> Me ukkaluaa kaluimami ssavoto, nongina ami kakkaluaa lo akapa atoa la gheelei sesa voto etaimami, me urau mene tau veluemami va ami lao tale nitotoonga.”

<sup>5</sup> Iesu ghe mene uela etaira va, “Arova teva kapum ghele mae rekataa etam elomatua voo, me ughele laa kolomi mene teva kapum va, ‘Aghaloanna va utau mae verete kotolu, <sup>6</sup> poli kapughu eteva ekasu emasaula, me ange mae sio tanganueghi, me karikaaili righi inana etaghi va atau lao.’

<sup>7</sup> “Arova kapum ateva ghele liu etam va, ‘Urau mene angunainaghi. Anga kavatila atamana ateae. Aghi me natughu etoa angami asekanuela. Atam rooroo tani totu va atau aatu voto ualoanna.’

<sup>8</sup> Aghaaulia etam va karika aue ghele totu me etau aatu verete, me poli uarrekana tani toka kookolomia, aue etotu, me etau aatu voto akapaaili ualoanna, poli karika upaapalata tani toka kokkolomi nau ekapa atoa.

<sup>9</sup> “Aghaaulia etaimim va am kolomi, me aue etau aatu, me am pae, aue

am tara, me am mirimiri, aue atamana ateae eotia. <sup>10</sup> Lo atoa la kookolomi, la ghaaghaa, me lo atoa la paepae, la taatara, me atamana eotioti ta lo atoa la mirimiri.

<sup>11</sup> “Arova teva natum elooloo teva kko, aue ughele taula teva katuu etana? <sup>12</sup> O arova ghele loo teva otolu ghila, aue ughele tau lao teva onioni? <sup>13</sup> Am arova sesa gheegheleiaaimim, me am kilakila tani tau lao masi voto ta natuimim atoa, aue Tamaimim ateva epona liu aue etau sio Spirit Manga ateva oroiata ta lo atoa la kookolomia.”

## Iesu me Belsibul

(Mat 12:22-30; Mak 3:20-27)

<sup>14</sup> Iesu ghe tiu vella raroai eteva tale taumattu ngateva ghe gheeleia me taumattu ngateva ghe tam samasama. Nau raroai eteva ghe kupi vulu ghoala taumattu ngateva, me ghe tiuaala tani sama, oroieili taumattu ngatoa laghe soghiaala voto Iesu ghe gheleila. <sup>15</sup> Me katoa laghe ue va, “Etiutiu velu raroai etoa tale sarasarakaniaane Belsibul, kapuira namuu ia raroai etoa.” <sup>16</sup> Me katoa laghe nim anna tani tootoonga Iesu. Laghe kookolomia tale righi aima-tootoongana ngepona liu.

<sup>17</sup> Me Iesu ghe kilakila nan-naaira, me ghe uela etaira va, “Lo ateva ararimangali eaaipola, karika aue etoka liu, me lo ateva pamili eaipola aue ila tee la ghaitiuaa. <sup>18</sup> Arova ararimangalina ateva Satana eghaluevilau ia, vaalua aue etingina aitaaua? Aghaauliaa etaimim poli am ue va atiutiu velu raroai tale sarasarakaniaane Belsibul. <sup>19</sup> Me arova atiutiu velu raroai tale ararina ateae Belsibul, kapuim atoa tani taumattu laghe tiutiu velu raroai tale ararina ateae see? Ila aue la ghele auliaa va inangari am auliaa kamena. <sup>20</sup> Ta poli arova atiutiu velu ta nimane God, eaapasunga va ara-

rimangalina ateva God ang ghe sio mae ta ngetaimim.

<sup>21</sup>“Nau eteva lo ateva taumattu sarasarakana ia, me eposoposo ghinna niaiuvu, aue eaitara ngamasina alena ateva, me ghinnanina aue etoka amasina. <sup>22</sup>Me arova sarasarakanaaili eteva taumattu emae tee ghinna niaiuvu, aue euvia, me eghaa velu ekapa ghinna niaiuvu me eaikoita peina ta mene katoa taumattu.

<sup>23</sup>“Lo ateva karika kapughu ia, tau ngai ssateeghi ia, me lo ateva karika esaasausieghi tani atoka aitaaua, ia etani aatoka apolapola.

### **Sesa spiriti eteva ghe mene oghi mae sio**

*(Mat 12:43-45)*

<sup>24</sup>“Nau sesa spiriti eteva ekasukasu vuli taumattu ngateva, ekasukasu ekapa see tale voto mallangona, epaepae teva voto aue eainoana etana. Va etam rooroo tani tara teva voto tani ainoana, ange ue va, ‘Ame oghi lao tale ale ateva aghe tokatoka etana.’ <sup>25</sup>Nau ange laa rekataa sio va ange tarala alena ateva raarangisana ia, me elome masina tani toka etana, <sup>26</sup>liuna avalua o me aue emene kasu tani laa kolo ghaitu (7) sesa spiriti eeleaaira mene sesaaili. Me aue la kupi sso, me la sso toka tale ale ateva. Gheeleiaane esesaaili, elaulau llo gheeleiaane akasina.”

### **Niarangise koronna**

<sup>27</sup>Nau Iesu ghe aippoosaa, me vause ateva ghe tokatoka teeila ghe sama anamuula, me ghe uela ta Iesu va, “Niarangise etokatoka ta lo ateva vause ghe kaaiola, me ghe ssuola.”

<sup>28</sup>Iesu ghe liula me ghe uela va, “Koronnaaili inangarim, me kinatama

niarangise ta lo atoa la nongonongo me la uusila inangarina God.”

### **Laghe kolomila niaimatoonga ngateva**

<sup>29</sup>Nau taumattu ngatoa ngeila ghe ooro, Iesu ghe uela va, “Lo ateva oia vituu, karika va masi taumattu ngam, ta am anna nonga tani tara niaimatoonga. Saa ghe lutu teela Jona, ie nonga o niaimatoongana ateva aue elutu.

<sup>30</sup>Nongina emua arau ta nau Jona, ia ghe aimatootoongana ta taumattu nge Ninive, aue enongina Natuna ateva Taumattu ngateva tale lo ateva oia vituu.

<sup>31</sup>Tale nau niaisakei, aue Kuin nge Saot ateva etingina tee lo ateva oia vituu, me aue eue va sesa am, poli Kuin ateva ghe kasu emasaeuilila tani mae nongo alomasaanganiaane Solomon, me lo ateva taumattu namuu ia ta Solomon ange toka teeiemla. <sup>32</sup>Aue taumattu nge Ninive atoa la tingina tale niaisakei eitaaua teeiem, me la ue va sesa am, poli aNinive atoa laghe nna ngaioghioghi-aala, nau Jona ghe poppooaa etaira, me ia oia, lo ateva namuu ia ta Jona ange toka teeiemla.”

### **Mallanga**

*(Mat 5:15; 6:22-23)*

<sup>33</sup>“Karika teva eaarokoti kuraane lam atea va eaatoka aisulieinia, o eaakou rungainia tale teva aikaai manu<sup>§§</sup>, ta eaatokaie sae epona tale aitiitinginane ateva, me nau taumattu ngatoa la kupi sso, aue la rooroo tani tara mallangina ateva. <sup>34</sup>Matam alua emaamallangi vilikim. Arova matam va masina, vilikim akapaaili aue epasu tale mallanga ateva, va nau matam nge sesala, isaa akapa vilikim aue esauroromiena. <sup>35</sup>Liuna avalua o me ukaarasi tani ai-

§§11:33 Kasina uru ngai laghe pitila, karika laghe uela va, o eaakou rungainia tale teva aikaai manu.

monomonosia, poli mallanga ateva etam karika va saurrom ia. <sup>36</sup>Liuna avalua o me arova vilikim akapaaili emalanga me karika mene teva tuku vilikim saurromiena, isaa akapaaili aue emalanga, nonginaaili lam ateaemaamalanga etam.”

### Ghaonomo voto sesaaili

(*Mat 23:1-36; Mak 12:38-40; Luk 20:45-47*)

<sup>37</sup>Nau Iesu ghe ruula tani aippoaa, me kateva Paresi ghe koloala tani laa namanama tanganuena. Iesu ghe usiela me ghe lao sio tale tevoov ateva tani namanama. <sup>38</sup>Paresi eteva ghe soghiaala tani tara va Iesu ghe tam pora akasinala nimana, nongina gheeleiaaira Paresi etoa, me ghe nim namanama.

<sup>39</sup>Me Vau eteva ghe uela etana va, “Am Paresi etoa, am porapora raarangisana uneimim kapa me pelete eleka, me elome etaimim kuruetuna am, me sesaaili iem. <sup>40</sup>Am alo kapakapa am! Am tam kilakila va lo ateva ghe gheleila eleka ghe ghelei teela elome? <sup>41</sup>Me am taula saa llo voto elome tale uneimim aikakkaai ta lo atoa karika peira, me aue isaa akapaaili voto aue eraarangisana etaimim.

<sup>42</sup>“Aue esesaaili etaimim Paresi etoa, poli am tautau lao aiaasokolo tale lutu voto ghaunaaili am ghaaghaa eutana, me am kakkalua tani ghelei voto ghulughuluena me tani aielousia God. Am ghelei ekapa voto tani ghelei ghulughuluena voto, me tani aielousia God, me tee tani taula aiaasokolo.

<sup>43</sup>“Aue esesaaili etaimim Paresi etoa, poli am tani aloannaaili aitokatoka nge-mua tale ale nivelu eitauaa, me am aloanna va taumattu ngatoa la souem me la ue va, ‘Elue talaua’ me ‘Elo sinaka’ etaimim tale maketi.

<sup>44</sup>“Aue esesaaili etaimim, ta am nongina liu niaikkaia ngateva taumattu nga-

toa la kasukasu saooa etana, me la tam kilakila va liu niaikkaia ia.”

<sup>45</sup>Kateva tau ngai aapasunga tale inangari nipaopao ghe liula, me ghe uela va, “Tisa, nau eteva uaauliaa isaa oia voto, uaauliaa teiemami.”

<sup>46</sup>Iesu ghe liula me ghe uela va, “Am tau ngai aapasunga iem tale inangari nipaopao, aue esesaaili etaimim, poli inangariim aanasaaili tale taumattu ngatoa tani aimuli tee, nongina am aatoka sae voto maamaatanaaili ta katoa, me karika la rooroo tani sau, me karika am saasausila.

<sup>47</sup>“Aue esesaaili etaimim ta am atuutulu atu niaimatoonga tale liu niaikkaiaaira propete atoa, tuvuim atoa laghe uvi ematelala. <sup>48</sup>Am aaulia ngaotu va am masimasiaa saa voto tuvuim atoa laghe gheleila nau laghe uvi ematela propete atoa. Liuna avalua o me am atuutulu atu niaimatoonga tale pongasovuire. <sup>49</sup>Liuna avalua o me tale aalomasanganiaane God ghe uela va, ‘Aue asungi tau lao propete atoa me apostolo atoa, katoa aue la uvi saasakieinila, me katoa aue la uvi ematela.’ <sup>50</sup>Liuna avalua o me lo ateva oia vituu, aue la ghaa sesa ngaipolipoli mausi propete akapa atoa laghe uvi ematelala emua arau, tale aitiuti tale kosa ateva, <sup>51</sup>ghe tiuaala ta matemateane Eibol, me ghe mae sio ta Sekaraea, laghe uvi emateala tale mal-lome liu nighelei aiaavusuvusuena me tale rum manga atiulu. Aghaaulia ngakoronnaaili etaimim va lo ateva oia vituu aue eghaa sesa aipolipoli.

<sup>52</sup>“Aue esesaaili etaimim lo atoa alo-masangaaili iem tale inangari nipaopao, poli am ghe ghaa vella kii eteva tani ghaa alomasaanga, me am, karika am sosso, me lo atoa vara la kupi sso, am gheleleirungainila.”

<sup>53</sup>Me nau Iesu ghe kasu vulila ia o voto ateva me Paresi etoa me tau ngai

apasunga ngatoa tale inangari nipaopao laghe sessaieililala, me laghe kookolomi oroieili nikokkolomi. <sup>54</sup>Laghe sassaia tani nongo va ghe auliaa righi sesa inangari.

**Am paniem tale gheeieiaaira  
usimaghalua atoa**

**12** Nau eteva oroi airari taumattu laghe mae aitauaa sio, laghe aikkerrei tani tara, me Iesu ghe tiuaa ngakasinala tani aippooaa tee kapuna disaepolo atoa. Ghe uela va, “Am taatara amasina tale uneira isti Paresi etoa, usimaghalua ia. <sup>2</sup>Karika righi voto am aaituttuia va aue etam otu, isaa akapa voto pei niaisulia, aue la kila. <sup>3</sup>Liuna avalua o, me voto ngam auliaala tale vo ngateva aue la nongo ellaa, me voto ngam aulia ngaghaunala tale paa ngaleimim, aue la aulia ngaotu tale tummatavanga.

**God nonga ita matautainia**

(*Mat 10:28-31*)

<sup>4</sup>“Aghaauliaa etaimim, kapughu etoa, am rau mene matauta lo atoa la uvi emateam, poli auena karika mene righi uunguaaira etaimim. <sup>5</sup>Aue aghapasunga lo ateva am matautainia. Am matauta lo ateva eroroo tani uvi emate taumattu, me tani sau velula sae tale Gehenna”. Aghaauliaa etaimim va am matautainia! <sup>6</sup>God karika eroroo tani aikkalua kateva ta ghalima natu ghila aipoliira eroroo ghaluevilau viliki veu. <sup>7</sup>Ekilakila ghaisa uu ngurum tale urum ateva. Urau mene matautu, ta maamaluuaam namungaili ta matane God, elaulau ghila atoa.

**Aulia ngaotu Iesu ta taumattu ngatoa**

(*Mat 10:32-33; 12:32; 10:19-20*)

<sup>8</sup>“Aghaauliaa etaimim, va lo ateva eaulia ngaotu ta taumattu ngatoa va kapughi ia, aue Natuna ateva Taumattu ngateva eaulia ngaotu ta kapuna ensolo atoa God va ia kapuna ia. <sup>9</sup>Lo ateva taumattu eue va karika ekilakilaieghi, aue aghauliaa ta kapuna ensolo atoa God va karika akilakilaia. <sup>10</sup>Me lo atoa la auliaa tee Natuna ateva Taumattu ngateva, aue God ekkaluaa. Me lo atoa la auliaa saasakia tee Spirit Manga ateva, God karika aue ekkaluaa.

<sup>11</sup>“Nau eteva la ssoainiem tale liu niaisakei, emua ta namu ngatoa me taumattu matuutuliena, am rau mene matautu tani nnaa va, ‘Vaalua ami liu inangari, me sa ateva ami aulieinia?’ <sup>12</sup>ta Spirit Manga ateva, tale ia o nau eteva, aue eapasunga sa ateva aue am aulieinia.”

**Kiukiu niaimatoongana tale tau  
peipeiena ateva alo kapakapa ia**

<sup>13</sup>Kateva elome tale taumattu ngatoa ghe uela etana va, “Tisa, uauliaa ta tueghi eteva me eaikoita peina tamaingalua etaingalua.”

<sup>14</sup>Iesu ghe liula va, “See ghe uela va aghi aghelei niaisakei, me akoita voto etaimalua?” <sup>15</sup>Vara me ghe uela etaira va, “Am taatara amasina, me am tingina akorokorongana. Am rau mene raunga peimim, poli karika aue am ghaa maulue ateva tale peimim.”

<sup>16</sup>Me ghe auliaala kiukiu niaimatoongana atea etaira va, “Kateva taita tue peipeiena ia, kosane ateva ghe apinosa oroieili masi inana atoa tale kateae ninamanama. <sup>17</sup>Ghe nannaa va, ‘Sa ateva agheleia? Karika teva ale tani atoka aitauaa aneghi inana.’

\*12:5 *Gehenna* Utara Malloeana Inangari.

<sup>18</sup>“Vara me ghe uela va, ‘Aghelai evalua toko o, va arruti alegi ale nginana atoa, me amene ghelei righi namuu, me aghatoka aitauaa sso aneghi inana me peighi. <sup>19</sup>Me aghauliaa etaghi va, ‘Aghi ngaghaala oroieili masi voto atoa, aue la toka oroi ninamanama. Aghainoana, anamanama, aropi, me amasimasi.’”

<sup>20</sup>“God ghe uela etana va, ‘Alo kapakapa ateva! Ghaine eleivoo aghaa velu maamauluaam, me see eghaa voto ughe aimonomosiaala?’

<sup>21</sup>“Aue enongina avalua o tale tue peipeiena atoa la ghaaghaa oroieili voto, me karika la nannaa God.”

### **Am rau mene ghelei nannaaimim va esio euu**

*(Mat 6:25-34)*

<sup>22</sup>Vara me Iesu ghe uela ta kapuna disaepolo atoa va, “Liuna avalua o, me aghauliaa etaimim va, am rau mene annaa maamauluaaimim me am ue va, ‘Sa ateva ami namaia,’ me am rau mene annaa vilikiimim, me am ue va, ‘Sa ateva ami asaea?’ <sup>23</sup>Karika am kilakila va maulue ateva namuu ia ta matane God, me inana isaa euu, me vilikiimim isaa epona, me aisoe isaa euu? <sup>24</sup>Am tara ghila atoa. Karika la pasapasa, me karika la mukemuke, me karika righi aleira tani atoka aneira inana, ta God eangiinginila. Am taumattu ngatoa namuu iem ta matana God. <sup>25</sup>See etaimim enannangaili eroroo tani ghelei maamauluaane emene toka tee lao? Karika poi! <sup>26</sup>Ta poli karika am rooroo tani ghelei isaa o lutu voto, vaalua me am nannaa mene kasina voto?

<sup>27</sup>“Am tara vaalua palaoa ngatoa la piipinosa. Karika la uungu aanasa tani ghaa peiira. Aghauliaa etaimim va molumoluaane Solomon masinaaili, me palaoa ngatoa, la laulau molumoluaane Solomon. <sup>28</sup>God eaamolumolu evalua o

rarrasa atoa, la piipinosa ghaine, me ni mana la taula sae tale kura atea. Am rooroo tani aikaaia va aue eaamolumolu evaluateiem tee o, ghauna uneimim ni aikaaia. <sup>29</sup>Karika am mene atoka nannaaimim va sa ateva am namaia, me sa ateva am ropia. Am rau mene nnaa isaa o voto. <sup>30</sup>Ta poli taumattu tale kosa ateva la iilou paepae isaa o voto, me Tamaimim epona liu ekilakila va sa ateva am tuutukuna etana. <sup>31</sup>Am pae ararimangalina ateva God, me aue etau aatu isaa o voto etaimim.

<sup>32</sup>“Am rau mene matautu, lutu tinaua sipsipi etoa, ta poli Tamaimim epona liu emasimasi tani tau aatu ararimangalina ateva etaimim. <sup>33</sup>Am taula peimim me la poli, me viliki veu am taula ta lo atoa karika righi peiira. Me am ghaa lo ateva aikkaai viliki veu karika aue epoka, me am ghaa ghinnani ngepona liu, karika aue esesa, me karika teva tau niainao eroroo tani ainao, me karika aue eavu. <sup>34</sup>Ta poli voto ateva peimim etokatoka etana, aue urunguitaniimim tee ateva aue etoka etana.

### **Am toka anguenguu**

*(Mat 24:45-51)*

<sup>35</sup>“Am aimonomosiaa tale niuungu. Am ghelei kuraimim lam etoka ramerame, <sup>36</sup>nongina lo atoa tau ngai nongonongo anna, la toitoi vauira ateva tani kiri mae tale nisighaa ngateae. Nau eteva emae, me emirimiri etapaa ngatamana, gharovaeaata nonga ta aue la oti, me ekupi sso. <sup>37</sup>Niarangise etoka ta lo atoa tau ngai uungu, vauira ateva etaraila va karika la aseasekanua, nau emae. Aghaulia ngakoronna etaimim va aue emolu tani aipanipania aneira inana kapuna tau ngai nongonongo anna atoa, me la mae tale tevoo ateva, me etau lao inana etaira. <sup>38</sup>Niarangise aue etoka ta lo atoa tau ngai uungu vauira ateva etara va la aimonomosiaa,



marova emae elomatua voo, o elopai.  
<sup>39</sup>Am nim nnaa va marova taumattu ngateva ekilakila nau eteva tau niainao ateva emae etana, karika aue ghele tau velu alena ateva va ghele rrutia. <sup>40</sup>Am tee am aimonomosiaa, ta poli Natuna ateva Taumattu ngateva aue emae tale nau eteva karika am nannaa va aue emae etana.”

<sup>41</sup>Pita ghe kolomila va, “Vau eteva, uaauliaa ia ona kiukiu niaimatoongana atea etaimami, o ta taumattu ngakapaaili etoa?”

<sup>42</sup>Iesu ghe liula va, “See ia lo ateva eghelei masi niuungu, me alomasaanga ia tani aitaraa voto, aue eaitara ngakapaaili tau ngai nongonongo anna atoa, tani taula inana tale nau nighaa inana.

<sup>43</sup>Niarangise aue etoka tale lo ateva tau ngai nongonongo anna, vauna ateva etara va eghelei isaa o niuungu, nau eteva ekiriaa mae. <sup>44</sup>Aghaaulia ngakoronna etaimim va aue eatokaia va eaitaraa ngakapaaili peina. <sup>45</sup>Marova ia o tau ngai nongonongo anna ateva ennaa va, ‘Vaughu eteva karika aue emae parasi,’ me etiuua tani uvi mene katoa tau ngai nongonongo anna, me etiuua tani namanama, me ropi uaeni, me nannaane eaisavisavila, <sup>46</sup>aue kapuna vau ateva ia o tau ngai nongonongo anna ateva emae, tale ia o nau eteva eannaa va karika aue emae etana, aue esai putuputua me eatoka aitauaa teeia me lo atoa karika la aikaia.

<sup>47</sup>“Lo ateva tau ngai nongonongo anna ekilakila sa ateva vauna ateva ealoanna va egheleia, me karika eaimonomosiaa tani gheleia, aue vauna ateva euvi saasakieinia. <sup>48</sup>Me lo ateva karika ekilakila sa ateva vauna ateva ealoannaia etana, me eghelei voto

sesa, ia o lo ateva karika aue la uvi saasakieinia. Lo atoa laghe taula oroi voto, la ghanna tani ghaa oroi voto etaira, me lo ateva laghe taula oroieili voto va eaitaraa, aue la ghanna oroieili voto va eliu etaira.

### **Karika luei ta niaipolapolaai**

*(Mat 10:34-36)*

<sup>49</sup>“Aghe mae sio tani tau kura atea tale kosa ateva oio, me aghannaaili va arova ghele rame. <sup>50</sup>Me aue asuu tale kateva ase niaasuu, me ngamamarikana teeia, lomosi ta niaasuu etea eruu etaghi. <sup>51</sup>Am annaa va aghe mae sio tani tau luei tale kosa ateva? Karika! Aghaauliaa etaimim va, karika va luei, ta niaipolapolaai. <sup>52</sup>Ange tiitiuaa oia me ange laolao; aue ghalima taumattu tale kateva pamili aue la aitiuaa, kotolu aue lotolu ssa tee ghalua, me ghalua aue lala ssa tee kotolu. <sup>53</sup>Aliki taita ateva aue essa tee tamane, me tamane aue essa tee natuna aliki taita ateva. Me aliki vause ateva aue essa tee kinna, me kinna aue essa tee natuna aliki vause ateva. Vause ateva aue essa tee alumuna vause ateva, me alumuna vause ateva aue essa tee vause ateva.”

### **Tani kila nau**

*(Mat 16:2-3; 5:25-26)*

<sup>54</sup>Ghe uela ta taumattu ngatoa va, “Nau am tara urukookoo ange saesae ta pai sinaka esuu, gharovaeata nonga ta am ue va, ‘Aue evaoo.’ Me evaavaoo.<sup>†</sup> <sup>55</sup>Me nau eteva am taatara kuukuu eteva emaemae ta saot, am ue va, ‘Aue aanasa ateva elutu’, me aanasa ateva emaemae.<sup>‡</sup> <sup>56</sup>Am usimaghalua am! Am kilakila tani tara kila voto euu me eunakookoo, me

<sup>†</sup>12:54 Elisraeli, vaoo ateva elaa ghaitoka ta pai sinaka esuu, ta poli paamanu eteva (Mediterranean), ia tee ta pai sinaka esuu.

<sup>‡</sup>12:55 Elisraeli, aanasa ateva emaemae ta pai saot ativilau, ta poli voto ateva aanasa ia, karika oroi voto epiipinosa etana.

vaalua me karika am rooroo tani tara kila nau etiulu oia?

<sup>57</sup>“Vaalua me am, karika am rooroo tani kila saa voto ghulughuluena? <sup>58</sup>Marova ngamalu laolao tale niaisakei me teva aissanim, utootoonga tani kkaluaa etana etapaa salana, ta erau laoaio ta lo ateva egheelei niaisakei, va etauo lao ta polisi etoa, va la atokaio sso tale ale mata voovoo. <sup>59</sup>Aghaauliaa etam va karika aue ukupi ghoa lomosina ta utau ekapa lao viliki veu la ghasa va utau lao.”

### Nna ngaioghioghia o umate

**13** Tale ia o nau eteva, katoa tana taumattu laghe auliaala ta Iesu vaalua Paelat ghe uvi ematela katoa tana aGalili nau eteva laghe gheelei sae aiaavususuuena ta Vau ngepona ateva. <sup>2</sup>Iesu ghe liula etaira me ghe uela va, “Poli ila o aGalili etoa laghe mate avaluela o, am annaa va ila sesaaili kaluira ssavoto, me lo atoa oia aGalili karika laghe matela? <sup>3</sup>Aghaauliaa etaimim va karika! Arova am tam nna ngaioghioghia, am tee aue am mate. <sup>4</sup>Vaalua tale kasangaulu ghaoalu (18) taumattu nge Siloam laghe matela nau aitiketike ateva ghe katuu sauuaala ta ngetaira? Am annaa va gheeleiaira sesaaili ta mene lo atoa eJerusalem? <sup>5</sup>Aghaauliaa etaimim va karika! Arova am tam nna ngaioghioghia, am tee aue am mate.”

### Kiukiu niaimatoongana tale ai eteae (fig)

<sup>6</sup>Iesu ghe auliaala kateae kiukiu ni-aimatoongana ta taumattu ngatoa, ghe uela va, “Kateva taumattu, aina fig ateeae ghe tiitingina tale umana paa ngutani uaeni etingiu. Ghe lao sio tani taatara poi va ghe tara righi uene me karika ghe tarala righi. <sup>7</sup>Ghe uela ta kapuna tau ngai pasa utana atingiu va, “Tarala,

kotoluae ninamanama aghe mae taatara vara aghe tara righi uene, me karika poi righi ataatara. Tue veluela! Vaalua me enim ruurungia inanina kosa ateva?”

<sup>8</sup>“Tau ngai pasa utana atingiu ghe li-ula me ghe uela va, ‘Vau eteva, rati etinginaiaela, me emene tingina kateae ninamanama. Aue amene kai talieinia, me amene kuukumui poia. <sup>9</sup>Marova ekune tale mene kateae ninamanama, aue emasinaaili. Marova karika, aue ita tue velua.”

### Iesu ghe ghelei emasinala vause ateva poupouena ia tale nau manga ateva

<sup>10</sup>Kateva nau manga, Iesu ghe aapa-sunga tale kateva ale nivelu eitauaa. <sup>11</sup>Vause ateva raroai eteva ghe tokatoka ta ngetana ghe roola kasangaulu ghaoaluae (18) ninamanama; raroai eteva ghe gheeleia ghe poupou tani kasu, me karika ghe rooroo tani korosia. <sup>12</sup>Nau eteva Iesu ghe taraiela, eghe kolua mae sio etana, me ghe uela va, “Vause ateva, angu masinala tale voto ghe gheelei saasakieinio.” <sup>13</sup>Eghe saoaala nimane ta ngetana, me katen-gaata ta ghe korosiela, me ghe tiuaala tani tau sae God.

<sup>14</sup>Kateva tana namuu tale ale nivelu eitaua ngateva ghe sessaiela ta Iesu, poli ghe ghelei emasinala vause ateva ta nau manga ateva, ghe samala me ghe uela ta taumattu ngatoa va, “Nauita ghaonomo tani ghelei uunguaaita, am mae tale isaa o nau va la ghelei emasinaiem, karika va ta nau manga ateva!”

<sup>15</sup>Iesu ghe liula me ghe uela etana va, “Usimaghalua am! Am oia, aue am ghele pulaka kieimim vulumakao o donki, me aue am ghele laa gharopropi tale nau manga ateva. <sup>16</sup>Vaalua, karika ita rooroo tani sausi ia oia vause ateva tale nau manga ateva? Poli ie tee natuna vause ia Abraham, Satana ghe ghaaiela

ghe roola kasangaulu ghaoaluae (18) ninamanama.”

<sup>17</sup> Ailiuliu tale inangarina ghe ghelei epalatala tau ngai sstateena atoa, me taumattu ghe taatara masi voto ghe ghelei, laghe masimasi.

**Kiuki niaimatoongana tale katu ue ngai erighi me isti eteva**

*(Mat 13:31-33; Mak 4:30-32)*

<sup>18</sup> Vara me Iesu ghe kolomila va, “Vaalue ia ararimangalina ateva God? Aue asuimatoongainia tale sa ateva?”

<sup>19</sup> Ia nongina katu ue ngai erighi la kolokoloa va mastet, taumattu ngat-eva ghe ghaala katu ue ngai erighi, ghe pasaiela tale umana utana atingiu. Ai erighi ghe pinosala, me ghe namungailila, me ghila atoa laghe gheleila aleira tale laangina.”

<sup>20</sup> Iesu ghe mene kolomila va, “Sa ateva aue asuimatoonga ararimangalina ateva God etana? <sup>21</sup> Ia avalua toko, va vause ateva ghe ghaala isti me ghe ghelei eitauaa teela oroieili palaoa lomosi ta palaoa ngateva ghe rrangala.”

**Ghauna atea atamana**

*(Mat 7:13-14, 21-23)*

<sup>22</sup> Iesu ghe laolao see tale masaliki taatara atoa, me tale ghauna atoa masaliki, ghe aapasunga elaolao ta taumattu ngatoa, me ghe lao sio eJerusalem. <sup>23</sup> Kateva taumattu ghe kolomiela va, “Vau eteva, karika oroi taumattu aue esaanga?”

Iesu ghe uela etaira va, <sup>24</sup> “Am sarasarakana tani kupi sso tale atamana atea ghauna ia; poli oroieili taumattu ngatoa aue la tootoonga tani kupi sso, me karika aue la roo. <sup>25</sup> Namuu tale ale ateva aue etingina, me eghoa kavati atamana atea; me aue am tingina eleka, me am mirimiri, me am kolokolo tale atamana atea, me aue am ue va,

‘Namu ngateva, otila atamana atea etaimami!’

“Aue eliu etaimim me eue va, ‘Karika akilakilaie me am see iem!’

<sup>26</sup> “Aue am liu me am ue va, ‘Ami ghe namanama me ropiropi eitauaa teeio; uge aapasunga tale masalikiimami!’

<sup>27</sup> “Aue emene ue va, ‘Karika akilakilaie me am see iem. Am kasu vulieghila, am akapa sesa gheleiaaimim!’

<sup>28</sup> “Aue am ngala me am ingeresia ngalungaluumim, nau am tara Abraham, Aisiki me Jekop, me propete akapa atoa tale ararimangalina ateva God, me am, aue la tiu veluem! <sup>29</sup> Taumattu aue ekasu tale sinaka esae me sinaka esuu, me tale mene ghalue vilau pai not me saot tale kosa ateva, aue la mae sio tale tevo ateva tale kinatama ninamanama atea tale ararimangalina ateva God. <sup>30</sup> Non-gola! Kasina taumattu arariira eue aue la matuutuliena, me kasina taumattu matuutuliena ila aue la sioaili eue.”

**Iesu ghe alousiusi teela eJerusalem**

*(Mat 23:37-39)*

<sup>31</sup> Ia o nau eteva katoa tana Paresi laghe mae sio ta Iesu, me laghe uela etana va, “Ukasu vuli voto ateva oia, me ulao ppae tale mene teae masaliki, poli Herot ealoanna tani uvi emateo.”

<sup>32</sup> Iesu ghe liula etaira me ghe uela va, “Am laa ghauliaa etana tau nikamekame ateva okae va, ‘Aghi aue atiu velu raroai etoa, me aue aghelei emasina taumattu ghaine me nimana, me tale aiaakotonna ateva nau, aue aruu uunguaaghi.’ <sup>33</sup> Karika aue atoka, ghaine, nimana me luevo; koronnaaili karika teva propete aue emate eleka eJerusalem!

<sup>34</sup> “Jerusalem, Jerusalem! Uge uvi ematela propete atoa, uge osala tau ngai kasuaa inangarina atoa God tale atu! Oroiaata aghaaloanna tani atoka aitaueinam kapughu taumattu ngatoa, nongina kina paulo ateva eaakou natuna

atoa tale kaekaena, me karika am aaloanna! <sup>35</sup>Liuna avalua o, me am nongola! God aue ekasu vuli alena ale manga ateva, me masalikiimim taatara ateaue aue eturungia. Aghaauliala etaimim va karika aue am mene taraieghi, lomosi ta nau eteva aue emae, me aue am ue va, ‘Niarangise ta lo ateva emaeae tale ararina ateaue Vau eteva.’”<sup>f</sup>

### Iesu ghe ghelei emasinala taumattu ngateva ghe aiorrongoi

**14** Kateva nau manga, Iesu ghe lao sio tani namanama tanganue kateva namuu ta Paresi etoa, me taumattu ngatoa karika laghe ghaaghaa velu mataira ta Iesu. <sup>2</sup>Taita ateva, ni mane me kkena ghe rorrongo, ghe tokatoka emua ta Iesu. <sup>3</sup>Iesu ghe kolomila tau ngai aapasunga tale inangari nipaopao me ta Paresi etoa va, “Vaalua uneita inangari nipaopao eaaulia, masina tani ghelei emasina teva taumattu tale nau manga ateva, o karika?” <sup>4</sup>Karika laghe liu poila. Iesu ghe posola taita ateva, me ghe ghelei emasinaiela, me ghe sungi veluela.

<sup>5</sup>Vara me ghe uela etaira va, “Arova teva etaimim, teva natuna o kiena ghaata kkena, ghele katu velu sio tale liu eteva tale nau manga ateva, karika aue am ghele ae velue sae parasi?”

<sup>6</sup>Karika laghe roola tani liu inangarina.

### Iesu ghe uela va ita siuaa nannaaita

<sup>7</sup>Iesu ghe taatara vaalua katoa tana namuu ta Paresi etoa laghe taatara masi liuira tani toka, me ghe auliaala lo ateaue oia kiukiu niaimatoongana ta taumattu ngakapa atoa: <sup>8</sup>“Nau eteva kateva ange koloola tani lao tale ninamanama eteaue, karika umene tara masi aitokatoka va utoka ta ngetana. Karika uki-

lakila va mene kateva taumattu la kolo teeieia mene namuu teeia ta ngetam. <sup>9</sup>Lo ateva, unna ninamanama ateaue, ghe kolo akapaiemaluela, aue emae etam me eue va, ‘Tinginala, me ierai etoka sio!’ Aue upalata, nau la ghaaio me la ghoa atokaio emuli. <sup>10</sup>Nau eteva ngila koloola, ulaa toka sio tale aitokatoka ateva emuli. Nau lo ateva, unna ninamanama ateaue, emae, eue va, ‘Kapughu, mae sio, me ulaa toka tale masi aitokatoka ateva.’ Isaa o voto aue eghelai, masi ararim ateaue emua tale taumattu ngakapa atoa tale lo ateaue o nivelu eitaaua. <sup>11</sup>See ualoanna tani saeaa nannaam, aue God eatokaio sio euu, me see usiuua nannaam aue God eatokaio sae epona.”

<sup>12</sup>Iesu ghe uela ta taumattu ngateva unna ninamanama ateaue va, “Nau eteva ualoanna tani ghelei ninamanama, urau mene kolo kapum atoa, tuem atoa, nengam atoa, mangalim atoa, o taumattu tue peipeiena — poli auena la mene koloo me la liu voto ughe gheleila ta ngetaira. <sup>13</sup>Nau ughelei ninamanama ateaue, ukolo lo atoa karika righi peira, tokatoka ngeuu etoa, kke tapakase atoa, me mata salusaluna atoa; <sup>14</sup>aue ughaa niarangise, poli ila karika la rooro tani liu voto ughelei ta ngetaira. God aue eliu, tale nau eteva tau ghulughuluena atoa aue la totu tale nimate.”

### Kiukiu niaimatoongana tale paka ninamanama ateaue

(Mat 22:1-10)

<sup>15</sup>Nau eteva kateva tana taumattu ghe tokatoka tale ia o ninamanama ateaue ghe nongola isaa oia inangari, me ghe uela ta Iesu va, “Niarangise aue eghaa see atoa aue la toka tale paka ninamanama ateaue tale ararimangalina ateva God!”

<sup>f</sup>13:35 Sams 118:26

<sup>16</sup> Jesu ghe uela etana va, “Kateva taumattu ghe aimonomosiaala kinatama ninamanama atea, me ghe suula inangari ta oroi taumattu va la mae. <sup>17</sup> Ghe ghaala nau ninamanama, me ghe suula kapuna tau ngai nongonongo anna ateva va elaa kolo taumattu ang ghe uela va la mae, ta voto akapa ang ghe aimonomosiaala.

<sup>18</sup> “Ila akapa laghe tiuaala tani aikamekamea me laghe auliaa vaalua me karika laghe roola tani lao. Aitiutiu eteva ghe uela ta tau ngai nongonongo anna ateva va, ‘Aghe polila tuku kosa ateva. Aghaloanna tani laa taraia. Alousiusi, ta karika aue amae.’

<sup>19</sup> “Mene kateva ghe uela va, ‘Aghe polila kasangaulu (10) kieghe vulumakao, me alaolao tani taraila, me atoongainila tani uungu, alousiusi ta karika aue amae.’

<sup>20</sup> “Mene kateva ghe uela va, ‘Amina laila, o karika arooroo tani mae.’

<sup>21</sup> “Tau ngai nongonongo anna ateva ghe lao sio, me ghe auliaala ta vauna ateva. Vau eteva ghe sessaiela, me ghe uela etana va, ‘Ailuiluila, me ukasu parasi me ulao tale liu nivelu eitauaa, me tale salana atoa tale masaliki taatara, me ukolo mae lo atoa karika righi peiira, tokatoka ngeuu etoa, mata salusaluna atoa, me kke tapakase atoa.’

<sup>22</sup> “Tau ngai nongonongo anna ateva ghe kasula tani ghelei llo vauna ateva ghe auliaala, me nau ghe kiraa mae sio, ghe uela va, ‘Inangarim ngami gheleila, me oroi aitokatoka karika righi taumattuna.’

<sup>23</sup> “Vauna ateva ghe uela va, ‘Ulaolao tale salana namuu, me ukkele valaa tale ghauna salana, me ukolo asarasarakana taumattu ngatoa, me la mae, me la ghasu aleghi eteva. <sup>24</sup> Aghaauliaa etaimim va karika poi teva taumattu aghe kolo akasinala, aue la nama aneghi inana!’”

### **Taumattu ngateva enannaa ngamasina me eaimuli tee Jesu**

*(Mat 10:37-38)*

<sup>25</sup> Oroieili taumattu ngatoa laghe usiusi see Jesu. Ghe kirela me ghe uela etaira va, <sup>26</sup> “Lo ateva ualoanna tani aimuli teieghi, karika urooroo va ukapughu disaepolo arova utam rooroo tani rati etoka tamam me kinam, vausenim ateva me natum atoa, tuem atoa me nengam atoa, me maamaluam. <sup>27</sup> See karika urooroo tani sunuki unem ateva tani aikotoo, me umae aimuli etaghi, karika urooroo tani kapughu disaepolo.

<sup>28</sup> “Arova teva etaimim eaimonomosiaa tani atulu ale ateva, etokatoka sio mua, me eatara mua ghaisa aipolina, me tani tara va viliki veu rooroona tani ruu ale ateva, o karika. <sup>29</sup> Arova etiuua ale ateva me etam rungia, taumattu ngatoa aue la amamarasa, <sup>30</sup> me la ue va, ‘Ia o taumattu ngateva ghe tiuaala ale ateva, me karikaaili ang ghe roola tani rungia!’

<sup>31</sup> “Arova kingi eteva ange laolao tani aiuvi, me kapuna tau ngai uuvi etoa erooroo kasangaulu airari (10,000), aue etoka mua, me eannaa va erooroo tani laa aiuvi tee mene kateva kingi, kapuna tau ngai uuvi etoa erooroo ghaluengaulu airari (20,000), me aue apalaia, o karika? <sup>32</sup> Arova karika erooroo, aue esungi kapuna tau ngaikasuaa inangari etoa tani laa sou kingi eteva, me la loo luei nau eteva masau ila. <sup>33</sup> Tale ia nonga o salana atikirighi, karika teva etaimim erooroo tani kapughu disaepolo, arova etam oghi vulu peina akapaaili.

### **Uela ateva karika righi namina**

*(Mat 5:13; Mak 9:50)*

<sup>34</sup> “Uela ateva masina ia, me marova ekapa namina, vaalua urooroo tani mene ghelei me euelana? <sup>35</sup> Ia o ase uela

ateva karika erooroo tani ghelei righi voto etana, liuna avalua o me la nim sausau velu.

“Arova righi talingaimim, am nongo.”

**Kiukiu niaimatoongana tale  
sipsipi eteva ghe rauela**

*(Mat 18:12-14)*

**15** Kateva nau, tau ngai ghaa viliki veu etoa me tau ssavoto atoa, laghe mae sio tani nongo Iesu. <sup>2</sup>Paresi etoa me tau ngai aapasunga tale inangari nipaopao atoa, laghe tiuaala tani auliulia Iesu, laghe ue va, “Ia oia taumattu ngateva ealoanna tau ssavoto atoa tani toka, me tani namanama teeila.”

<sup>3</sup>Me Iesu ghe auliaala etaira kiukiu niaimatoongana atea etaira. Ghe uela va, <sup>4</sup>“Arova kateva etaimim kiena sipsipi erooroo kateva ai (100), me kateva etaira ghele raua, am anna va karika aue ghele kasu vuli ghasiongaulu ghasio (99) sipsipi nongina la ghele namanama, me ghele laa pae lo ateva ghe rauela, lomosi ta aue ghele taraia? <sup>5</sup>Nau eteva ghele taraia, aue ghele masimasi, ghele saua, me ghele alokoie sae ta pappana, <sup>6</sup>me ghele saue lao tanguena. Aue ghele kolo kapuna akapa atoa, me lo atoa la tokatoka kalakalaa teeia, me ghele ue ta ngetaira va, ‘Masimasiaaghi namungaili, poli ngatarala kieghi sipsipi eteva ghe rauela. Am mae masimasi teeieghi!’ <sup>7</sup>Aghauliaa etaimim va, tale isaa o ase salana, namungaili nimasimasi elutulutu epona liu, nau eteva kateva tana tau ssavoto enanna ngaioghioghiaa ta ghasiongaulu ghasio (99) taumattu ghulughuluena, karika righi kaluira ssavoto va la nna ngaioghioghiaa.

**Kiukiu niaimatoongana tale  
viliki veu etivilau ghe rauela**

<sup>8</sup>“Marova teva vause unna kasan-gauluvilau (10) viliki veu, me ghele rau

kativilau, sa ateva aue ghele gheleia? Aue ghele arokoti kurane lam atea, me ghele kkala tani paea masinaaili alena ateva, lomosi ta ghele taraia. <sup>9</sup>Nau ghele taraia, ghele kolo kapuna atoa, me lo atoa la tokatoka akalakalangina tanguena, me ghele ue va, ‘Masimasiaaghi namungaili, ta ngatarala uneghi viliki veu etivilau ghe rauela. Am mae masimasi eitauaa teeieghi!’ <sup>10</sup>Tale ia o ase salana atikirighi, aghauliaa etaimim va ensolo atoa kapuna ila God, masimasiaaira namungaili, nau eteva kateva tana tau ssavoto enanna ngaioghioghiaa.”

**Kiukiu niaimatoongana tale  
aliki taita ateva ghe rauela**

<sup>11</sup>Iesu ghe mene uela va, “Taumattu ngateva, natuna taita alua. <sup>12</sup>Muli eteva taita ghe uela ta tamane va, ‘Tamaghi, tau mae peighi nau umate aue aghaa.’ Me tamairarua ghe koitaala peirarua natuna taita alua.

<sup>13</sup>“Karika masau nau ghe lange sio me muli eteva taita ghe tau ekapala peina laghe polila, ghe ghaala viliki veu, me ghe kasula tani lao tale masau anue namuu. Ghe tiuaala tani poli aloannane, <sup>14</sup>me unna viliki veu ghe kapala, me tale isaa o nau, paka maloo ateva ghe tinginala, me ghe karikala righi peina. <sup>15</sup>Liuna avalua o me ghe lao sio tani pae niuungu. Kateva taumattu tale ia o anue namu ngateva ghe sungiela tani laa ghaitoia mosu etoa me eanginila. <sup>16</sup>Eghe aloannaaili tani nama righi inana aneira mosu etoa, poli karika teva ghe tautau lao righi inana va ghe nama.

<sup>17</sup>“Nau eteva masi ninannaa ghe ghaaiela me ghe uela va, ‘Kapuna tau ngai uungu etoa tamaghi oroieili aneira inana, me aghi oia maloo ateva ange ghelei emateaghi!’ <sup>18</sup>Akasu, me alao ta tamaghi, me aue alaa ue va, “Tamaghi, aghe ghelei saasakiaala ta mata God,

me ta matam. <sup>19</sup> Karika masina aghi va uaseaghi va natum ieghi; uaseaghi va marova kateva kapum tau ngai uungu.”  
<sup>20</sup> Ghe tingina saela, me ange laolao ta tamane.

“Masau ia tanganue tamane, me tamane ghe taraiela; urunguitanina ateva ghe pasula tale nialousiusi, me ghe ilou lao sio tani sou natuna, me ghe llotiela me ghe ngusuela.

<sup>21</sup> “Aliko taita ateva ghe uela va, ‘Tam-aghi, aghe ghelei saasakiaala ta mata God, me ta matam. Karika masina aghi va uaseaghi va natum ieghi.’

<sup>22</sup> “Me tamane ghe uela ta kapuna tau ngai uungu etoa va, ‘Am ailuiluila! Am maeaa sio teva aisoe masinaaili, me easae. Am atokala teva ringi ta vuvu ni-mane, me am asae taula lua aikasukasu ta kkena. <sup>23</sup> Am laa ghaa morona ateva natu vulumakao, me am uvi ematea, me ita namanama aitauaa teeia, me ita masi-masi. <sup>24</sup> Poli ia oia natughu taita ateva ghe matela, me ange mene sakesakela, me ghe rauela, me ange rekatala.’ Me laghe tiuaala tani masimasi.

<sup>25</sup> “Karika masau, me natuna mua ateva taita ghe oghiaa mae sio etapaa ngutana. Eghe kasukasu emaemae, ang ghe kalakalangina elo ale, me ghe nongola paka mangalia ateva tale nikau me niloku. <sup>26</sup> Ghe kolola kateva tani aliki, me ghe kolomiela va, ‘Vaalua me la gheelei mangalia ateva okae?’

<sup>27</sup> “Aliko eteva ghe liula me ghe uela va, ‘Nengam ateva ange rekatala. Tamam euvi ematela morona ateva natu vulumakao, poli nengam ange mae sio tani rekata etana, me emasimasi.’

<sup>28</sup> “Mua ateva taita ghe sessaiela, me ghe tam aloannala tani sso elo ale. Tamane ghe ghoa mae tani aipoopoli-liaa poi teeia. <sup>29</sup> Ghe liula ta tamane me ghe uela va, ‘Tarala, ninamanama atoa ngaghe uungula etam nonginaaili tau ngai nongonongo anna ateva, me karika

poi aghe nongonongo vulu inangarim. Sa ateva ughe taue mae sio etaghi? Karika poi va ughe tau mae sio arova nim teva natu meemee va aghe ghelei teae ninamanama, me aghe masimasi eitauaa tee kapughu etoa! <sup>30</sup> Me natum taita ateva oia ghe nim lao sio tani run-gia see peim tale vause ngetapaa salana atoa, me nau erekatala, ughuvi ematela morona ateva natu vulumakao va eanna ia!’

<sup>31</sup> “Tamane ghe liula me ghe uela va, ‘Natughu, io utokatoka teeieghi nau ekapa atoa, isaa akapa peighi peim. <sup>32</sup> Me ita velu eitauaa me ita tani masi-masi, poli nengam ghe matela, me ange sakesakela, me ghe rauela, me ange rekatala.’”

#### Kiukiu niaimatoongana atae tale taumattu ngateva ghe aitoia tau ngai uungu etoa

**16** Iesu ghe uela ta kapuna disaepolo atoa va, “Kateva tau peipeiena, kapuna tau ngai uungu eteva, laghe ue va karika masina ia, ta karika ghe aaitara ngamasina peina kapuna namu ngateva. <sup>2</sup> Kapuna namu ngateva ghe koloala me ghe kolomiela va, ‘Vaalua tale inangari anongonongo la ghaauliaa teeio? Laa ghaimonomosiaa kiukiuna uunguam tale peighi uaitaraa, poli karika urooroo tani mene aitaraa peighi.’

<sup>3</sup> “Tau ngai uungu eteva ghe nnaala va, ‘Kapughu namu ngateva ange ghaaghaa velu niuungu etaghi. Sa ateva agheleia? Karika sarasarakana ieghi tani kaikaii me palatana ieghi tani nim loo viliki veu. <sup>4</sup> Ngakilala sa ateva agheleia, me nau eteva aruu tale uunguaaghi, taumattu ngatoa aue la ghaikoloainaghi nau alao tanganueira.’

<sup>5</sup> “Liuna avalua o me ghe kolokolo kateva kateva tale taumattu laghe nim ghaala voto ta vauna ateva. Ghe kolomila aitiutiu eteva va, ‘Ghaisa

kalum voto ughe nim ghaala ta vaughu eteva?’

<sup>6</sup>“Lo ateva taumattu ghe nim ghaala voto ghe liula me ghe uela va, ‘Ghaoalu ai (800) galon oliv oeli.’

“Tau ngai uungu eteva ghe uela etana va, ‘Ghaala uru ngai etikirighi laghe pitila kalum voto ughe nim ghaala ta vaughu eteva, me arovaeaata ta utoka sio, me upiti nonga ghaata ai (400).’

<sup>7</sup>“Me ghe kolomila mene kateva va, ‘Ghaisa kalum voto ughe nim ghaala?’

“Me taumattu ngateva ghe uela va, ‘Kateva ai (100) aikaai uiti raisi.’

“Tau ngai uungu eteva ghe uela etana va, ‘Ghaala uru ngai eteva laghe pitila kalum voto ughe nim ghaala etana, me upiti nonga ghaalungaulu (80).’

<sup>8</sup>“Nau vauna ateva ghe kilala voto kapuna sesa tau ngai uungu eteva ghe gheleila, ghe arueiniela, poli ghe gheleila voto tau muenna nonga atoa la ghelei. Taumattu tale kosa ateva oia muenaaili ila tale ase salana tani ghelei uunguaaira, me taumattu tale mallanga atoa karika. <sup>9</sup>Aghaauliaa etaimim va am ghinaghina masi voto tale kosa ateva tani ghelei, me eoroi kapuimim. Me nau eteva isaa o voto ekapa aue la masimasi tani ghaaiem tale voto ateva tokatoka liu ia.

<sup>10</sup>“Lo ateva la atoka tuutuliira etana tale lutu voto pisike, aue la atoka tee tuutuliira tee etana tale namuu voto. Me lo ateva etam ghelei voto koronna tale lutu voto pisike, karika aue eghelei voto koronna tale llo voto namuu. <sup>11</sup>Arova karika la ghaatoka tuutuliira etaimim tani aitaraa masi voto tale kosa ateva, karika teva aue eatoka tuutulina etaimim tani ghaa voto koronna. <sup>12</sup>Me arova la tam aatoka tuutuliira va am rooroo tani aitaraa katoa peiira, karika teva aue ghele tau aatu righi voto va ghele peiimim.

<sup>13</sup>“Karika teva tau ngai nongonongo anna eroroo tani uungu ta ghalua vau, poli aue ghele ssa tee kateva, me ghele aielousia kateva. O aue ghele nongo usilaa kateva, me ghele liu vilina ta mene kateva. Karika am rooroo tani uungu ta God me viliki veu.”

### **Inangari nipaopao me ararimangalina ateva God**

*(Mat 11:12-13)*

<sup>14</sup>Parsi etoa, la ghaielousiangaili viliki veu, nau laghe nongola isaa o inangari, laghe tiuaala tani amammarasa Iesu. <sup>15</sup>Iesu ghe uela etaira va, “Am, am ghelei masina voto ta mata taumattu ngatoa, me God ekilakila urunguitanimim, poli voto masinaaili ta mata taumattu ngatoa, sesaaili ta matane God.

### **Voto nau laghe aapasunga laghe mene aalokoi saoa mene kasina ase voto etana**

<sup>16</sup>“Inangari nipaopao me inangariira propete atoa laghe pitila, ghe laa ghaasio nau ta Jon, me ghe tiuaala tale nau etiulu o, masi inangari tale ararimangalina ateva God laghe tiuaala tani ppooa ngaotua, me taumattu ngakapa atoa laghe annaaili tani kupi sso etana. <sup>17</sup>Elomarase me kosa ateva lalu rooroo tani kapa, me teva tuku voto ghaunaaili tale inangari nipaopao karika eroroo tani kapa.

<sup>18</sup>“Lo ateva erati vauseena ateva me elai ta mene teva vause ange lai sarila. Me lo ateva taita emene ghaa vause ateva oia laghe rati etokaiela, ia tee ange lai sarila.

### **Tau peipeiena ateva me Lasarus**

<sup>19</sup>“Kateva tau peipeiena ghe molu-molu me ghe aasae masi ghinna atoa, me ghe ghelei ninamanama nau ekapa atoa. <sup>20</sup>Tapaa ngatamana tale valavala atea tanganuena, tau nilooloo ateva,



ararina atea ta Lasarus, laghe mae aatokaia, pasu ia tale usai. <sup>21</sup> Ghe anna va enama llo inana aue ekatuu tale unna tevoo ateva tue peipeiena ateva. Me tee paua atoa laghe mae raarameaa usaina.

<sup>22</sup> “Ghe ghaala nau eteva, tau nilooloo ateva ghe matela, me ensolo atoa laghe saue lao sio, me laghe laa ghalokoi valainie sio ta Abraham.<sup>§</sup> Tau peipeiena tee ateva ghe matela, me laghe kaieiniela. <sup>23</sup> Tale Hades<sup>\*\*</sup>, ghe aateatea paka mmarikana ateva, me vara ghe sae taatara, me ghe tarala Abraham masaueli ia, me Lasarus ghe tokatoka vala etana. <sup>24</sup> Ghe kolokolo saela etana me ghe uela va, ‘Tamaghi Abraham, alom eusieghi me usuu Lasarus tani asuu elo vena tale vuvu nimane ateva tale manu me esio amakarri ramuramuti paaghi eteva, poli aghateatea paka mmarikana tale kura atea oia.’

<sup>25</sup> “Abraham ghe liula me ghe uela va, ‘Natughu, unnaa nau ta sakesake, io ughe ghaaghaa masi voto, nau Lasarus ghe ghaaghaa voto sesa. Me ghaine ange tokatoka amasina oia, me io angu ghaaghaa mmarikana. <sup>26</sup> Me tee, elome etaimami me io, paka salesalena ateva easoaso. Lo atoa la anna tani kasu oia me la ghatu ona, karika la rooro, me lo tee atoa la anna tani kasu ona me la mae etaimami, karika aue la roo.’

<sup>27</sup> “Ghe liula me ghe uela va, ‘Tana aghaloannaaili, Tamaghi, va usuu Lasarus me elao tanganue tamaghi, <sup>28</sup> poli ghalima nengaghi, me Lasarus elaa ghauliaa kieira, poli ila tee la rau mae tale voto ateva oia sesaaili ia.’

<sup>29</sup> “Abraham ghe liula me ghe uela va, ‘Inangariira Moses me propete atoa isaa okae etaira; aue la nongola.’

<sup>30</sup> “Tau peipeiena ateva ghe uela va, ‘Karika, Tamaghi Abraham! Arova teva ang ghe matela ghele lao etaira, aue la ghele nna ngaioghioghia tale kaluira ssavoto.’

<sup>31</sup> “Abraham ghe uela etana va, ‘Arova la tam rooro tani nongo Moses me propete atoa, karika aue la akoronna voto, arova teva ghele totu tale nimate, me ghe auliaa etaira.’”

### Ssavoto

(Mat 18:6-7)

**17** Iesu ghe uela ta kapuna disaepolo atoa va, “Voto eghelei taumattu ekaakatuu tale ssavoto ange ailutua, me aue esesaaili ta taumattu ngateva eghelei voto oia elutulutu! <sup>2</sup> Aue ghele masinaaili etana marova la ghele iri atu etiulu maate ia ta ngalona, me la ghele ghoa allusia elo malionge, ta erau ghelei teva aliki va unna niaikaia ekatuu. <sup>3</sup> Am paniem tale voto am ghelei!

“Marova tuem ateva o nengam ateva eghelei ssavoto, upaoa, me marova enna ngaioghioghia, ukkaluaa. <sup>4</sup> Marova eghelei teeio voto karika masina ghaituaata (7) tale kateva nau, me emae kkaluaa ghaituaata, me eue va, ‘Nganna ngaioghioghiaala,’ ukkaluaa voto eghelei teeio etana.”

### Niaikaia

<sup>5</sup> Apostolo atoa laghe uela ta Vau eteva va, “Ughelei unemami niaikaia me enamuu.”

<sup>6</sup> Vau eteva ghe liula va, “Marova uneimim niaikaia naanamungaane nongina katu ue ngai erighi ghaunaaili ia (mastet), am rooro tani ue ta ai eteae o va etammuti tee uane, me emene

§16:22 AJiu etoa laghe anna va epona liu ghulughuluena atoa taumattu la tokatoka tale ninamanama atea. Lo ateva etokatoka tee sio Abraham, eaapasunga va ia namuu ia.

\*\*16:23 *Hades* Tarala Malloena inangari

ghoa pinosa elamana, aue ghele roo tani nongongo usilainiem.

**Uunguaane tau ngai  
nongonongo anna ateva**

<sup>7</sup>“Marova kateva etaimim kapuna tau ngai nongonongo anna ateva euungu etapaa ngutana, o eaaitaraa kiem sipsipi, nau ekiriaa mae elo ale, vaalua, aue uailuiluieinia tani namanama? <sup>8</sup>Karika! Aue ughele ue etana va, ‘Uaimonomosiaa aneghi inana, me uaipanipaniaa, me ukkaisi tau mae aneghi inana, me uaku ateoghu me anamanama me aropi, me akena umina namanama me uropi.’ <sup>9</sup>Vaalua, karika aue ukaili emasina tale uunguaane ange gheleila? <sup>10</sup>Nim nongina am, nau ngam gheleila voto God eaauliaa etaimim tani ghelei, airuuruu am nim ue va, ‘Uunguaamami arau, poli ami nim tau ngai nongonongo anna iemami erau.’”

**Iesu ghe ghelei emasinala  
kasangaulu (10) tau tasussuku (lepa)**

<sup>11</sup>Iesu ghe mene laa saesae eJerusalem, ghe kasu eloi lao sio tale aioloa ngateva eSameria me eGalili. <sup>12</sup>Ghe kasukasu elaolao tale masaliki eteae, me kasangaulu (10) taita aneira tasussuku eteva, laghe sousouela, laghe tingina amasaula, <sup>13</sup>me laghe kolokolo atingina tani ue va, “Iesu! Namu ngateva! Alousiusi teiemamila!”

<sup>14</sup>Nau Iesu ghe tarailala, me ghe uela va, “Am lao sio, me am laa apasungainam ta pristi etoa.” Laghe kasukasu elaolao, me laghe raarangisanala.

<sup>15</sup>Kateva etaira, nau ghe tarala va ghe raarangisanala, ghe oghi lao sio, me namungaili ta ghe tau sae God. <sup>16</sup>Ghe lao sio me ghe suuiaala ta liue kkena Iesu, me ghe kaili emasinala etana. Taita ateva oia aSameria ia.

<sup>17</sup>Iesu ghe uela va, “Kasangaulu (10) taumattu la raarangisanala, me eaa gha-

sio (9)? <sup>18</sup>Vaalua me taitani ngeleka ateva, ia nonga emae sio tani amasina ta God?” <sup>19</sup>Iesu ghe uela etana va, “Tingina saela me ukasu; unem niaikaia ange ghelei emasinaiaola.”

**Maemaeaa ararimangalina ateva God  
(Mat 24:23-28, 37-41)**

<sup>20</sup>Katoa tana Paresi laghe kookolomi Iesu va lovisa ararimangalina ateva God aue emae. Ghe liula me ghe uela va, “Ararimangalina ateva God karika aue emae nongina am, am taatara. <sup>21</sup>Karika teva aue eue va, ‘Tarala, ie toko!’ o, ‘Ie teke!’ ta ararimangalina ateva God ia oia elome ta ngetaimim.”

<sup>22</sup>Vara me ghe uela ta kapuna disae-polo atoa va, “Nau too emaemae, aue am aloannaaili tani tara Natuna ateva Taumattu ngateva tale teva nau, me karika aue am taraia. <sup>23</sup>Katoa aue la ue etaimim va, ‘Tarala, ie teke!’ o, ‘Tarala, ie toko!’ Karika am mene akoronmaila va am usila. <sup>24</sup>Poli nongina ravaravaia ateva eravaravaia elomarase, me emam-mallanga akapa tale pai etoa, aue enongina Natuna ateva Taumattu ngateva tale nauna ateva. <sup>25</sup>Aitiutiu aue eateatea mmarikana, me taumattu tale lo ateva oia vituu aue la ratia.

<sup>26</sup>“Me nauna atoa Natuna ateva Taumattu ngateva aue enongina nau Noa. <sup>27</sup>Taumattu ngatoa laghe namanama me ropiropi, taita me vause atoa laghe lailai, me ghe ghaala nau eteva Noa ghe kupi ssola tale anua ateva, me manu ghagga ateva ghe mae sio, me ghe turungi ekapailala.

<sup>28</sup>“Aue enongina tee nau ta Lot. Taumattu ngatoa laghe namanama, ropiropi me laghe aaiPOLIA peiira, laghe pasapasa, me laghe atuutulu. <sup>29</sup>Me nau eteva Lot ghe kasu vulila eSodom, kura atea me atu ramerame ateva ghe sio mae epona liu, ghe tturungi ekapailala.

<sup>30</sup>“Aue enongina nau eteva Natuna ateva Taumattu ngateva emae rekata. <sup>31</sup>Tale ia o nau eteva, taumattu ngateva etokatoka eleka tale ale ateva, erau mene kupi sso tanganuena va esso ghaa peina; aue enongina tee taumattu ngateva euungu tapaa ngutana, erau mene oghi ghoa tanganuena. <sup>32</sup>Am annaa sa ateva ghe lutula ta vausenna ateva Lot! <sup>33</sup>See etootoonga tani asaangi maamauluaane, aue eraua; me see erau maamauluaane, aue esaanga. <sup>34</sup>Tale ia o nau eteva, aghauliaa etaimim va, aue ghalua taumattu lalu aso tale kateae nonga aisalo eleivo: kateva aue la ghaaia, me kateva aue la rati elokoia. <sup>35-36</sup>Ghalua vause aue lalu gheelei putuputu palaoa: kateva aue la ghaaia, me kateva la rati etokaia.”<sup>††</sup>

<sup>37</sup>Disaepolo atoa laghe kolomiela va, “Vau eteva, llo oia eaa aue elaa lutu?”

Iesu ghe liula me ghe uela va, “Nongina eaa matena ateva taumattu easoaso, paka ghila atoa la veluvelu eitauaa.”<sup>‡‡</sup>

### Kiukiu niaimatoongana atea ta vause raue vulu eteva me tau ngai ghelei niaisakei eteva

**18** Iesu ghe auliaala kiukiu niaimatoongana atea ta disaepolo atoa tani apasunga etaira va la tani looloo sae tale nau ekapa atoa, me karika la mene sio asoasooa. <sup>2</sup>Me ghe uela va, “Tale kateae masaliki tau ngai ghelei niaisakei eteva, karika ghe maamatautu God ateva, me tee karika ghe oneoneaa tee kasina taumattu. <sup>3</sup>Me tee vause raue vulu eteva, ie tee elome tale masaliki eteae, ghe maemae nonga ta tau ngai ghelei niaisakei eteva. Ghe aaloannaaili va esausia, tale aloaloannaane.

Ghe ue etana va, ‘Usausieghi tale tau ngai ssateieghi eteva.’

<sup>4-5</sup>“Kasina nau ang ghe lange sio, karika ghe aloanna tani nongoa me sausia, vara me ghe nnaala va, ‘Arongona ta karika aoneoneaa God me taumattu tee atoa, me poli vause raue vulu eteva oia etautau mae maate etaghi, asausia, poli erou toka maemae nonga va eghelei emangoieghi.”

<sup>6</sup>Vau eteva ghe uela va, “Am nongo inangarina sesa tau ngai ghelei niaisakei eteva ghe auliaala. <sup>7</sup>Am annaa va God karika aue eghelei sausi kapuna atoa ghe aimatoongainilala, la looloo sae etana tale lla me voo? Vaalua, am annaa tee va aue ghele aipetana tani sausila? <sup>8</sup>Aghauliaa etaimim va arovaeangaili ta aue ghele sausila. Tale isaa o salana, nau Natuna ateva Taumattu ngateva aue esio tale kosa ateva, aue etara righi taumattu eaiesoa etana?”

### Iesu ghe auliaala kiukiu niaimatoongana atea ta Paresi eteva me tau ngai ghaa viliki veu eteva

<sup>9</sup>Kasina taumattu la nannaainila nonga va ila ghulughuluena ila, me katoa taumattu karika. Iesu ghe kiukiuuuala etaira ia oia kiukiu niaimatoongana atea, ghe uela va, <sup>10</sup>“Ghalua taumattu lalu ghe saela tale ale manga ateva tani looloo sae, kateva taumattu Paresi ia, me kateva tau ngai ghaa viliki veu ia. <sup>11</sup>Taumattu tale Paresi eteva ghe tingina saela me ghe looloo saela, me ghe aauliaa masi uunguaane. Ghe uela va, ‘God, aghi akaakaili emasina etam va aghi karika nongina lo atoa taumattu la ainao, gheeleiaaira karika masina, me la lailai sari, me nongina ia o tau ngai

<sup>††</sup>17:35-36 Kasina uru ngai laghe pitila, laghe pitila va, <sup>36</sup> *Ghalua aue lalu uungu etapaa ngutana: kateva aue la ghaaia; me kateva la rati etokaia.* (Mat 24:40)

<sup>‡‡</sup>17:37 Paka ghila atoa, la aseasela va valsa, la namanama nonga voto ang ghe matela me mauuna.

ghaa viliki veu eteva. <sup>12</sup>Ghaluaata tale ghaitu (7) nau anaenae, me atautau aiaasokolo tale voto akapa aghaaghaa.’

<sup>13</sup>“Tau ngai ghaa viliki veu eteva ghe tingina amasaula, me ghe sioaala nannaane, me ghe looloo saela, ghe uela va, ‘God, ualousiusi teieghi, poli aghi tau ssvavoto aghi.’

<sup>14</sup>“Aghaauliaa etaimim va ia oia tau-mattu ngateva, karika nongina Paresi eteva, nau ghe kasula tani lao tanganuena, God ghe taraiela va ia ghulughuluna ia. See esaeaa nannaane, aue God etaue sio euu, see esioaa nannaane euu, God aue eanamunamunganeia.”

### **Natu aliki etoa me Iesu**

*(Mat 19:13-15; Mak 10:13-16)*

<sup>15</sup>Kinakina atoa me tamatama atoa laghe maeaa sio natuira raaraina atoa ta Iesu, va esaoaa nimane etaira me earangiseila. Disaepolo atoa laghe tarailala me laghe paolala. <sup>16</sup>Me Iesu ghe kolola natu ngaliki etoa laghe mae sio etana me ghe uela va, “Am tau velu natu aliki etoa la mae etaghi, karika am mene ghelei rungainila. Ta poli ararimangalina ateva God anueira ia taumattu ngatoa nongina natu ngaliki etoa. <sup>17</sup>Aghaaulia ngakoronnaaili, va arova see karika eghaa lo ateva o ararimangalina God nongina natu aliki etoa, karika aue la sso etana.”

### **Tau peipeiena ateva**

*(Mat 19:16-30; Mak 10:17-31)*

<sup>18</sup>Tau peipeiena ateva ghe mae sio ta Iesu, me ghe kolomiela va, “Masi tisa ngateva, vaalua aroo tani ghelei, me aghaa lo ateva o mauhue tokatoka liu ia?”

<sup>19</sup>Iesu ghe liula me ghe uela etana va, “Vaalua me uue va masina ieghi? Karika teva masina, ta God nonga masina ia. <sup>20</sup>Ukilakila inangari nipaopao eue va, ‘Karika umene lai sari, karika umene aiuvi emate, karika umene ainao, me tee

karika umene kamekame tale niiasakei, uoneoneaa tamam me kinam.”

<sup>21</sup>Ghe uela ta Iesu va, “Isaa ona voto ngaghe aimuli teela nau aliki ieghi arau.”

<sup>22</sup>Nau Iesu ghe nongola isaa o inangarina, ghe uela etana va, “Kateva voto karika ughe gheleia. Utau lao peim la poli, me ughaa viliki veu me ulaoa ta taumattu karika righi peira. Arova ughelei evalua o, aue utau peipeiena epona liu, me umae aimuli teieghi.”

<sup>23</sup>Me nau ghe nongola isaa o inangari, ghe alousiusila, ta poli ia tau peipeiena ia. <sup>24</sup>Iesu ghe taatara lao sio etana, me ghe uela va, “Aanasaaili ta tau peipeiena ateva tani kupi sso tale ararimangalina ateva God! <sup>25</sup>Poli masukasukale ta teva kamolo tani kupi sso tale teae mata raum. Me teva tue peipeiena tani kupi sso tale ararimangalina ateva God aue emasukasukaleaili.”

<sup>26</sup>Taumattu ngatoa laghe nongoala, me laghe kolomiela va, “See nonga erooroo tani saanga?”

<sup>27</sup>Iesu ghe liula me ghe uela va, “Voto taumattu karika erooroo tani ghelei, God nonga erooroo.”

<sup>28</sup>Pita ghe uela etana va, “Tarala, ngami ghe kasu vulila tanganueimami me peimami tani aimuli teeio!”

<sup>29</sup>Iesu ghe uela ta ngetaira va, “Arova teva taumattu ekasu vuli tanganuena, manna, tuena atoa, nengana atoa, kinna me tamana me natuna atoa, mausi ararimangalina ateva God, <sup>30</sup>aue God etau lao etana oroieili peina tale nau oia, me nau aue emae, eghaa lo ateva mauhue tokatoka liu ia.”

### **Iesu ghe aulia ngamuemuela matemateane**

*(Mat 20:17-19; Mak 10:32-34)*

<sup>31</sup>Iesu ghe kolo aitauaala kapuna kasangaulu ghalua (12) disaepolo, me ghe uela etaira va, “Ngita laa sae-

sae eJerusalem, me isaa akapa inangari propete atoa laghe piti emuemuela ta Natuna ateva Taumattu ngateva aue ekoronna. <sup>32</sup> Aue la taue lao ta taumattu ngeleka atoa, me aue la kusiaa teeia, me kangainia, me kanusua, la parua, me la uvi ematea. <sup>33</sup> Emuli tale kotolu nau, aue etotu.”

<sup>34</sup> Disaepolo atoa karika laghe aalomasanga tee inangarina. Malloeana inangari ghe aaisulia, karika laghe kilakila sa ateva Iesu ghe aaulieinia etaira.

### **Tau nilooloo ateva mata salusalu ia ghe taatarala**

*(Mat 20:29-34; Mak 10:46-52)*

<sup>35</sup> Nau Iesu ang ghe mae akalakalaa sio eJeriko, mata salusalu eteva ghe tokatoka tale sama salana atikirighi, uunguaane tani looloo. <sup>36</sup> Ghe nongonongo oroieili taumattu ngatoa laghe kasukasu elangelange nongina ghe tokatoka, me ghe samala, me ghe kolomilala va sa ateva ange lutula. <sup>37</sup> Laghe uela etana va, “Iesu aNasareti ia toko ekasukasu emamae.”

<sup>38</sup> Me ghe kolokolo va, “Iesu, natuna io Deivit, ualouslyi teieghi!”

<sup>39</sup> Taumattu ngatoa laghe muemue, laghe paopaoa va, “Urou mene sama.” Me karika, ta ghe mene kolokolo anamuula tani ue va, “Natuna ateva Deivit, ualouslyi teieghi!”

<sup>40</sup> Iesu ghe tinginala, me ghe uela va, “Taumattu ngateva emae etaghi.” Nau ghe mae akalakalaa sio, Iesu ghe kolomiela va, <sup>41</sup> “Sa ateva ualoanna va agheleia etam?”

Ghe liula me ghe uela va, “Vau eteva, aghaloanna tani taatarala.”

<sup>42</sup> Vara me Iesu ghe uela etana va, “Angu taatarala; tale kalum niaikaia angu masinala.” <sup>43</sup> Ia arau o me ghe taatarala, me ghe aimulila ta Iesu, ghe tautau sae ararina atea God. Nau tau-

mattu ngatoa laghe taraiela, ila tee laghe tau saela ararina atea God.

### **Iesu me Sakies**

**19** Iesu ghe ssola eJeriko, me ang ghe mene aainasia tani kasu. <sup>2</sup> Kateva taumattu ghe tokatoka okae, ararina atea ta Sakies, namuu ia ta lo atoa uunguaaira tani ghaa viliki veu, me tue peipeiena ia. <sup>3</sup> Ghe aloanna tani tara va Iesu saa taumattu ia, me karika ghe rooroo, ta poli tukunaaili ia, me oroieili taumattu ngatoa. <sup>4</sup> Liuna avalua o me ghe ilou emuemuela me ghe saela ai etea ta ghe kilakila va Iesu aue emae avalua o.

<sup>5</sup> Nau Iesu ghe rekatala tale ia o ai etea, ghe taatarala saela, me ghe uela va, “Sakies, kure parasi sio mae ta ghaine atani laa toka teeio tanganuem.” <sup>6</sup> Gharavaea nonga ta ghe kure siola, me ghe masimasieilila me ghe kolola Iesu va lalu lao tanganuena.

<sup>7</sup> Nau taumattu ngatoa laghe tara avaluela o, laghe tiuaala tani auliulieinia tani uue va Iesu ange lao sio tani toka tee tau ssavoto ateva.

<sup>8</sup> Sakies ghe tingina saela me ghe uela ta Iesu va, “Vau eteva, aue ataula kasina peighi ta lo atoa karika righi peira. Me arova aghe kamekame me aghe ghaaghaa peira taumattu ngatoa, aue aliu ghaatiaata.”

<sup>9</sup> Iesu ghe uela etana va, “God ange asaangila taumattu tale lo ateva oia ale, poli ia tee taumattu ngateva oia, tuvuna ia Abraham. <sup>10</sup> Poli Natuna ateva Taumattu ngateva ghe sio mae tani pae me asaangi taumattu ghe rauela.”

### **Kiukiu niaimatoongana tale kasangaulu tau ngai nongonongo anna**

*(Mat 25:14-30)*

<sup>11</sup> Nau eteva laghe nongonongo isaa o ingangari Iesu ghe auliaala, me

ghe mene tiuaala tani auliaa kateae kiukiu niaimatoongana, ta poli ang ghe reerekata eJerusalem, me taumattu ngatoa laghe anna va Iesu aue ekingi tale ia arau o nau eteva. <sup>12</sup>Ghe uela va, “Kateva namuu ghe lao sio tale anue namuu masau tani ghaa ninamuu va ekingi, me auena emene kiri mae. <sup>13</sup>Ghe kolola kasangaulu kapuna tau ngai nongonongo anna me ghe tau lao sio kativilau gol koen<sup>f</sup> ta kateva kateva etaira. Me auena ghe kasu, ghe uela etaira va, ‘Am uungu tani mene saooa mene righi lomose ta amene kiri mae.’

<sup>14</sup>“Taumattu ngatoa tale masalikina atea karika laghe masimasieiniela, me laghe suula kasina etaira tani laa auliaa va, ‘Karika ami aaloanna va ierai enamuu etaimami.’

<sup>15</sup>“Me karika, ta ghe ghaala ninamu ngateae va ekingi, me ghe kiri lao sio tanganuena. Ghe kolola kapuna tau ngai nongonongo anna kasangaulu me tani tara va ngila ghe unguuala mene righi viliki veu tani saooa tale llo laghe ghaa akasinala o karika.

<sup>16</sup>“Aitiuti eteva ghe lao sio me ghe uela va, ‘Namu ngateva, unem gol koen ativilau, aghe uunguaala me aghe mene ghaala kasangaulu vilau.’

<sup>17</sup>“Vauna ateva ghe liula va, ‘Masi uunguaam, poli ughe sarasakanala tale pisike niuungu, aue uaitaraa kasangauluae masaliki taatara.’

<sup>18</sup>“Aiaaghalua ateva ghe lao sio me ghe uela va, ‘Namu ngateva, unem gol koen ativilau, aghe ungula me aghe mene gheleila ghalimavilau.’

<sup>19</sup>“Me ghe uela etana va, ‘Me io, aue uaitaraa ghalimae masaliki taatara.’

<sup>20</sup>“Mene kateva kapuna tau ngai nongonongo anna ghe lao sio me ghe uela va, ‘Unem gol koen ativilau toko. Aghe

suumi elokoiela tale tuku tapiri kalio ateva. <sup>21</sup>Aghe matautainiola ta io karika masi taumattu io, unim ghaaghaa voto karika kalum, me unim mukemuke voto karika ughe pasala.’

<sup>22</sup>“Namu ngateva ghe liula me ghe uela etana va, ‘Aue uaisakei tale isaa o voto uauliaa, io sesa tau ngai nongonongo anna io. Ughe kilakila va aghi karika masi taumattu ieghi, anim ghaaghaa voto karika kalughu, me anim mukemuke voto karika aghe pasala. <sup>23</sup>Vaalua me karika ughe alokoi ssola uneghi viliki veu tale ale aialokoi viliki veu eteva? Me nau eteva ngaghe kiriaa mae sio aue aghele ghaa tee llo laghe saooa saela tee me llo aghe tau aatu.’

<sup>24</sup>“Me ghe auliaala ta lo atoa laghe tiitingina akalakala va, ‘Am ghaa vella unna gol koen ativilau, me am taue lao ta lo ateva ghe ghaala kasangaulu vilau gol koen.’

<sup>25</sup>“Laghe uela va, ‘Namu ngateva, ia ang ghe ghaala kasangaulu vilau!’

<sup>26</sup>“Me ghe liula me ghe uela va, ‘Aghaauliaa etaimim va lo ateva euungu aanasa tale voto laghe taula aue la mene saooa mene kasina, me lo ateva karika euunguaa voto laghe taula etana aue la ghaa velu saa voto isaa etana. <sup>27</sup>Me isaa o taumattu karika laghe aloanna va aghi aue ekapuira kingi ieghi, am ghaaila mae me am uvi ematela emua ta ngetaghi.”

### Iesu ang ghe aakalakalaa eJerusalem

(*Mat 21:1-11; Mak*

*11:1-11; Jon 12:12-19*)

<sup>28</sup>Nau eteva Iesu ghe ruula tani auliaa llo oia, me ghe kasu emuemuela tani sae eJerusalem. <sup>29</sup>Nau eteva ang ghe aakalakalaa tale masaliki elua eBetpeis me eBetani tale motouru eteva la

<sup>f</sup>**19:13 gol koen** Tale inangari nge Grik, *mina*. Kateva mina erooroa aipolipoli ta kotolu ulana.

kolokolo va Oliv, ghe sungila disae-polo alua, <sup>30</sup>me ghe uela etairarua va, “Amalu lao tale ia o masaliki eteae. Me nau amalu kupi sso tale masaliki eteae, aue amalu tara atingina natu donki eteva iriiri etingina ia, karika teva taumattu ghe sae toka ta nge-tana me ghe iloueinia. Amalu pulakaia, me amalu maeainia oia. <sup>31</sup>Marova teva ekolomiemalua va, ‘Vaalua me amalu puupulakaia?’ amalu ue etana va, ‘Vau eteva eaaloannaia.’”

<sup>32</sup>Nau lalu ghe lao sio, lalu ghe tarala va llo Iesu ghe auliaala, ghe koronnala.

<sup>33</sup>Nau lalu ghe puupulakaia, tau kiena ghe kolomilalueta va, “Vaalua me amalu puupulaka natu donki eteva?”

<sup>34</sup>Lalu ghe liula me lalu ghe uela va, “Vau eteva eaaloannaia.”

<sup>35</sup>Lalu ghe laoainie sio ta Iesu, me lalu ghe pulela uneirarua aiaasae ngeleka epona tale ghaata kkena ateva, me laghe sausila Iesu tani sae toka sae etana. <sup>36</sup>Nau eteva Iesu ghe iilou elaolao, taumattu ngatoa laghe aalokoi aiaasae ngeleka tapaa salana.

<sup>37</sup>Nau eteva ang ghe aakalakalaa tale voto ateva nongina salana atikirighi ghe laa siosio tale motouru eteva eOliv, ila akapaaili lo atoa laghe ususi Iesu laghe tiuaala tani masimasieili. Laghe kikkinari enamungaili tani kkaua asae God, ta poli laghe annaa isaa o mirikol laghe tarala Iesu ghe gheleila.

<sup>38</sup>“Aue God eghelei emasina ta kingi eteva emaemae tale ararina atea Vau ngepona ateva!”<sup>§§</sup>

“Luei etoka epona liu, me ita tau sae ararina atea God iaaili epona!”

<sup>39</sup>Katoa elome tale ila o taumattu ngatoa Paresi ila laghe ue ta Iesu va, “Tisa, pao rungaala kapum disae-polo atoa!”

<sup>40</sup>Iesu ghe liula me ghe uela etaira va, “Aghaauliaa etaimim va, marova la matua atoka, aue atu etoa la sama anamungaili tani tau sae ararighi eteae.”

<sup>41</sup>Nau eteva ang ghe aakalakalaa me ghe taatara siola eJerusalem, ghe alousiusi teeiela. <sup>42</sup>Me ghe uela va, “Jerusalem, ghaine tale nau eteva oia aghaloanna va arova ughele kila sa ateva egheleio me utokatoka tale luei. Me karika, ta isaa o voto eaaisulia etam, me karika urooro tani tara kila. <sup>43</sup>Nau too emaemae aue tau ngai ssateem atoa, aue la atulu aivativati eteva, me la talieinio, me la toka rungainio tale pai ekapa. <sup>44</sup>Aue la turungio, io me taumattu ngatoa la tokatoka elome etam. Karika aue la rati etoka tiulu atu va aue emene toka saooa ta mene tiulu, ta poli karika ughe kilala nau eteva God ghe mae sio tani sausio.”

### Iesu elome tale ale manga ateva

(*Mat 21:12-17; Mak 11:15-19; Jon 2:13-22*)

<sup>45</sup>Iesu ghe ssola tale ale ngeleka atiulu tale ale manga ateva, me ghe ameti velu ghoala lo atoa laghe aaitauaa me laghe aipoliaa elome. <sup>46</sup>Me ghe uela etaira va, “Uru ngai Manga ateva eue va, ‘Aleghe eteva aue eale ailooloo sae ia’<sup>\*</sup>; me ngam ghelelela va ‘aleira ale niaisuliaa ia tau niainao atoa.’<sup>†</sup>”

<sup>47</sup>Nau ekapa atoa ghe aapasunga asease voto tale ale manga. Namu ngatoa ta pristi etoa me tau ngalomasaanga tale inangari nipaopao, me lo atoa laghe muemuea taumattu ngatoa, laghe paepae salana tani uvi emate Iesu. <sup>48</sup>Me karika laghe rooro, poli taumattu ngatoa laghe aloanaaili tani nongo Iesu.

§§19:38 Sams 118:26

\*19:46 Aisaea 56:7

†19:46 Jeremaia 7:11

**Nikokkolomi tale  
matuutulienaane Iesu**

(Mat 21:23-27; Mak 11:27-33)

**20** Kateva nau Iesu ghe aapasasunga ta taumattu ngatoa elome tale ale ngeleka atiulu tale ale manga ateva, ghe poppooaa masi inangari, me namu ngatoa ta pristi etoa, tau ngalomasaanga atoa tale inangari nipaopao me lo atoa la muemueaa taumattu ngatoa, laghe mae akalakalaa sio etana. <sup>2</sup>Me laghe uela etana va, “See ghe tau aatu sio matuutuliena etam, me see ghe sungiola tani mae ghelei isaa oia voto?”

<sup>3</sup>Iesu ghe liula me ghe uela va, “Aghi tee amene kolomiem, me am liu mae etaghi. <sup>4</sup>See ghe tau lao sio matuutuliena ta Jon tani asuu, taumattu ngatoa, o God?”

<sup>5</sup>Laghe ailoele me laghe uela va, “Marova ita ue va, ‘God,’ aue eue va, ‘Me vaalua me karika am ghe aaiesoa ta nge-tana?’ <sup>6</sup>Me marova ita ue va, ‘Taumattu ngatoa,’ taumattu ngakapa atoa aue la osaita tale atu, ta ila, la aaiesoa va Jon propete ia.”

<sup>7</sup>Me laghe liula tani ue va, “Karika ami kilakila va see ghe taula matuutuliena.”

<sup>8</sup>Me Iesu ghe uela etaira va, “Aghi tee karika aue aghauliaa va see ghe tau mae sio matuutuliena etaghi.”

**Kiukiu niaimatoongana tale  
sesa tau ngeutana atoa laghe  
aaitaraa utani uaeni etingiu**

(Mat 21:33-46; Mak 12:1-12)

<sup>9</sup>Me ghe tiuaala tani kiukiuua kateae kiukiu niaimatoonga. Ghe uela va, “Kateva taumattu ghe pasala utani uaeni etingiu, ghe taue lao sio ta katoa tau ngeutana tani aitarainia, me ghe kasu emasaeuilila tani laa toka see. <sup>10</sup>Ghe

ghaala nau eteva tani pariki utani uaeni etingiu, me ghe sungila kateva kapuna tau ngai uungu tani laa ghaa rigi ue uaeni tale utani uaeni etingiu, me lo atoa laghe aaitaraa utana atingiu laghe uvi emaamateala me laghe sungiaa oghiela; karika ghe ghaala rigi voto. <sup>11</sup>Ghe mene sungila mene kateva tau ngai uungu; me laghe mene uvi emaamateala, me laghe apalataiela me laghe sungiaa oghiela; ie tee karika ghe ghaala rigi voto. <sup>12</sup>Aiaakotolu eteva tau ngai uungu laghe uvi saasakieiniela me laghe sau velue ghoala eleka.

<sup>13</sup>“Me tau ngumana ghe nnaala va, ‘Sa ateva agheleia? Aue asungi lo ateva natughu taita aghailousiangailia, me koti aue la oneoneainia.’

<sup>14</sup>“Nau eteva lo atoa laghe aaitaraa utani uaeni etingiu laghe tarala natuna ateva tau ngumana ghe maemae, laghe ailoe va, ‘Ia oia taumattu ngateva, auena eghaa peina tamane. Ita uvi ematea, me ita, aue ita ghaa akapa utana atingiu.’ <sup>15</sup>Me laghe sau velue ghoala eleka me la ghe uvi emateala.

“Sa ateva tau ngumana aue egheleia ta ngetaira? <sup>16</sup>Aue emae me euvi emate akapa lo atoa laghe aaitaraa utani uaeni etingiu, me etau lao utana atingiu ta mene kasina ppae taumattu.”

Me nau eteva taumattu ngatoa laghe nongola isaa oia inangari, laghe uela va, “Karika emene ghelei evalua o!”

<sup>17</sup>Iesu ghe taatara lao sio etaira me ghe kolomilala va, “Isaa oia voto laghe pitila tale Uru ngai Manga ateva, mal-loanina avalue toko?

“Ia o atu eteva tau ngai atulu ale atoa laghe ratiela ghe aitiutiula tale atu ekapa atoa tani suei ale ateva.”<sup>‡</sup>

<sup>18</sup>See ukatuu saooa tale ia o atu eteva, aue utakotokoto. Me arova ia oia

<sup>‡</sup>20:17 Sams 118:22



atu eteva ekatuu saooa sae etam, aue utaputuputu.”

<sup>19</sup> Me tau ngalomasaanga tale inangari nipaopao atoa me namu ngatoa ta pristi etoa laghe kilala va Iesu ghe auliaala kiukiu niaimatoonga mausi gheeleiaaira, me angila ghe paepae va vaalua la kuneia. Karika laghe roola, ta laghe maamatauta taumattu ngatoa.

### **Tani tau lao viliki veu ta Siisa**

*(Mat 22:15-22; Mak 12:13-17)*

<sup>20</sup> Ila oia taumattu ngatoa laghe paepae salana tani kune Iesu. Laghe suula katoa tani gheleila va voto laghe aauliaa vara mene koronna. Laghe annaa tani ghaaia tale inangari ghe aauliaa, me la rooroo tani taue lao ta Gavana. <sup>21</sup> Vara me laghe kolomiela va, “Tisa, ami kilakila va inangarim me llo uaapasunga koronna. Karika uaaimassia, me uaapasunga ngakoronna salane God. <sup>22</sup> Vaalua uannaa? Inangari nipaopao eue va masina etaita tani tau lao takis ta Siisa o karika?”

<sup>23</sup> Iesu ang ghe kila vella kamekameaaira taumattu ngatoa oia laghe anna tani ghelei, me ghe uela etaira va, <sup>24</sup> “Am apasungaala tivilau viliki veu etaghi. See tootoona ateva me ararina ateae o etana?”

Me laghe uela va, “Siisa.”

<sup>25</sup> Iesu ghe uela etaira va, “Liuna avalua o me am tau lao llo voto kanna Siisa, me llo voto kanna God am tau lao ta God.”

<sup>26</sup> Karika laghe roola tani ghaaia tale inangarina ghe aauliaa tale matavanga. Laghe soghiaala llo ghe liula me laghe paavoola.

### **Matena atoa aue la totu**

*(Mat 22:23-33; Mak 12:18-27)*

<sup>27</sup> Sadiusi etoa, karika la ghaiesoa tale nitotu tale nimate, katoa etaira laghe mae sio ta Iesu me laghe kolomiela kateva nikokkolomi. <sup>28</sup> Laghe uela va, “Tisa, Moses ghe pitila va, ‘Arova taita ateva emate vulu vausenna ateva, me karika teva natuirarua, teva tuena o nengane taita etani ghaa vause ateva, me ealutu righi natuna lo ateva taita ang ghe matela.’” <sup>29</sup> Ia avalua o, me ghaitu (7) taita tue me nenga laghe tokatoka. Mua ateva ghe ghaala vause ateva, me karika teva natuna, me ghe matela. <sup>30</sup> Aiaaghaluene ateva taita, <sup>31</sup> vara me aiaakotolu eteva ghe mene ghaala vause ateva, me ghe nim isaa avaluela o, me taita ghaitu oio laghe mate akapala, karika laghe alutula righi aliki. <sup>32</sup> Airu-uruu, vause ateva tee ghe matela. <sup>33</sup> Isaa avalua o, me nau la totu tale nimate, nongina uauliaa, see aue evausenna ia, poli ila akapa laghe laila etana?”

<sup>34</sup> Iesu ghe liula me ghe uela va, “Tau-mattu tale nau etiulu oia la lailai. <sup>35</sup> Me lo atoa Vau ngepona ateva aue etaraila va ila ghulughuluena ila va la totu tale nimate, me la toka tale nau ekapa atoa, karika aue la mene lai, <sup>36</sup> poli karika aue la mene mate. Aue la nongina ensolo atoa. Ila natuna ila God, poli laghe totula tale nimate. <sup>37</sup> Moses tee ghe apasungaala etaita va taumattu ematemate emene tottotu. Tale kiukiu eteae ghe pitliela tale nau eteva ghe tarala natu ai erighi ghe ataataia, ghe uela va, ‘Vau ngepona ateva kapuna Goto ia Abraham, me kapuna Goto ia Aisiki, me kapuna Goto ia Jekop.’” <sup>38</sup> Me God ateva, karika va kapuira ia lo atoa matena ila, karika.

<sup>†</sup>20:28 Utara Diuteronomi 25:5

<sup>§</sup>20:37 Eksodas 3:6

Kapuiria ia lo atoa mauhue ila, poli ta taataraane God ila akapa mauhue ila.”

<sup>39</sup> Kasina tau ngai aapasunga tale inangari nipaopao laghe liula me laghe uela va, “Masinaaaili, Tisa!” <sup>40</sup> Me karika la ghe mene roo poiila tani kolomi mene righi nikokkolomi.

**See tuvuna ia Mesaea?**

(*Mat 22:41-46; Mak 12:35-37*)

<sup>41</sup> Me Iesu ghe uela etaira va, “Vaalua me ila ue va Mesaea tuvuna ia Deivit?

<sup>42</sup> Poli ia Deivit ghe pitila elome ta vuku eteva ta Sams va,

“Vau ngepona ateva ghe uela ta kapughu Vau eteva va,

“Toka siola tale pai muenna ativilau

<sup>43</sup> lomose ta aghatoka sio lo atoa la sessa teeio euu,

me uatingina saooa kkem etaira.”\*\*

<sup>44</sup> Isaa avalua o, me Deivit ekolokoloa va kapuna Vau eteva. Vaalua me mene nim tuvuna ia?”

**Am paniem ta tau ngai apasunga ngatoa tale inangari nipaopao**

(*Mat 23:1-36; Mak 12:38-40; Luk 11:37-54*)

<sup>45</sup> Nau eteva taumattu ngakapa atoa laghe nongonongo, me Iesu ghe uela ta kapuna disaepolo atoa va, <sup>46</sup> “Am paniem tale tau ngalomasanga atoa tale inangari nipaopao. La aloannaaili tani asae masi ghinna me nongina namu ngatoa, me la tingina kasu see, me la aloanna va taumattu ngatoa la soula tale masi inangari nongina oroi taumattu etokatoka. Me la aloannaaili tani toka tale uneira aitokatoka namu ngatoa elome tale ale nivelu eitaua me nong-

ina namu ngatoa la namanama. <sup>47</sup> La ghaaghaa aitauteauaa peira vause raue vulu etoa, me la kamekame tani ghelei aluseaaili nilooloo sae. Nau eteva la lao tale niaisakei, aue la ghaa namungaili nimmarikana.”

**Unna viliki veu vause ateva raue vulu ia ghe taula ta God**

(*Mak 12:41-44*)

**21** Tale ale manga ateva, Iesu ghe atangarola me ghe tarala taumattu ngatoa tue peipeiena ila, laghe veluvelu viliki veu nongina laghe laa kaakaai viliki veu. <sup>2</sup> Me ghe tara teela vause ateva raue vulu ia, karikaaili righi peina, ghe velu kaaila ghaluevilau nonga viliki veu tapirina.†† <sup>3</sup> Me ghe uela va, “Aghaaulia etaimim va ia o vause ateva raue vulu ia karika peina, ange kaaila oroi viliki veu, me ngeapalala katoa. <sup>4</sup> Poli katoa oia oroieili uneira viliki veu etokatoka, me la nim vella nonga kasina tale aikaai eteva. Me ia o vause ateva karikaaili tivilau eoghi elokoila, ange kapaailila viliki veu eposoposo tani poli anna inana.”

**Iesu ghe auliaala vaalua aue la ttruu ale manga ateva**

(*Mat 24:1-2; Mak 13:1-2*)

<sup>5</sup> Katoa laghe aarua ale manga ateva. Laghe ue va, “Masinaaaili taatarane atu, me kasina masi voto laghe tau lao sio ta God tani amolumolu emasina ia o ale ateva.” Me Iesu ghe uela va, <sup>6</sup> “Isaa o llo am aarua — nau aue emae karika teva atu aue etoka saooa ta mene kateva. Aue taumattu ngatoa aue la puli reerekata isaa akapaaili oia voto.”

\*\* 20:43 Sams 110:1

†† 21:2 Tale inangari nge Grik, *ghaluevilau lepton*. Lepton ghaunaaili etivilau viliki veu, nongina kativilau toea, me 100 lepton erooroo kateva denarius.

### Sesa nau me niaiui aue mae

(Mat 24:3-14; Mak 13:3-13)

<sup>7</sup>Me laghe kolomila va, “Tisa, aue lo-  
visa isaa oia voto aue elutu? Me saa voto  
aue elutu tani apasunga va ange naula?”

<sup>8</sup>Iesu ghe liula me ghe uela va,  
“Am paniem teva taumattu erau mene  
kameam. Poli oroi taumattu aue la  
mae tale ararighi eteae, me la ue va,  
‘Aghi Mesaea ieghi.’ Me aue la ghau-  
liaa va nau aue mae akalakalaa sio,  
me am rau mene aimuli teeila. <sup>9</sup>Am rau  
mene matautu nau am nongo niaiui  
me niamakatakata. Isaa o voto etani  
lutu ekasina me karika la aimatoonga va  
airuuruu tale kosa ateva, ange rekatala.”

<sup>10</sup>Eghe mene auliaa tee lao sio etaira  
va, “Anua atoa aue la aiuvieinila,  
me ararimangali etoa tee. <sup>11</sup>Kinatama  
rukeruke atoa aue la lutu tale kosa ateva.  
Maloo atoa aue la lutu tale kasina masa-  
liki me sessa atoa aue la lutu. Aue ni-  
aimatoonga sesaaili me matautuna aue  
elutu elomarse.

<sup>12</sup>“Emua ta isaa akapa o voto, aue la  
kuneiem me aue am ghaa nimmarikana,  
me la laoiniem tale ale nivelu eitaua  
ngatoa tani aisakei, me la atokaiem tale  
ale mata voovoo. Aue la ghaaiem tani  
atinginaiem emua ta mata kingi etoa  
me gavana ngatoa tani aisakei, mausi  
ararighi eteae. <sup>13</sup>Isaa avalua o me aue  
eoti salaimim tani ppoaaa aikaiaaimim  
ta ngetaghi. <sup>14</sup>Liuna avalua o am rau  
mene aimonomosia va saa inangari  
aue am liu etaira, <sup>15</sup>ta aghi aue atau aatu  
inangari tani ppoaaa me alomasaanga,  
me tau ngai ssateemim atoa karika  
aue la roorroo tani liu. <sup>16</sup>Tamaimim  
me kinaimim, tueimim atoa me nen-  
gaimim atoa, me mangaliimim atoa me  
kapuimim atoa, ila tee aue la tauem lao  
ta tau ngai ssateemim atoa, me aue la  
uvi emate katoa etaimim. <sup>17</sup>Ila akapaaili  
aue la ssa teeim poli ararighi eteae.

<sup>18</sup>Me karikaaili tikirighi uu nguruimim  
aue eraua. <sup>19</sup>Am tingina akorokoron-  
gana, me aue am ghaa mauue ateva  
tokatoka liu ia.

### Iesu ghe auliaa teela vaalua aue la tturuu eJerusalem

(Mat 24:15-21; Mak 13:14-19)

<sup>20</sup>“Nau eteva am tara eJerusalem  
tau niaiui etoa angila taatalieinia, aue  
am kila va eJerusalem nauna ange  
kalakalaala va la turungia. <sup>21</sup>Tale ia  
o nau eteva, lo atoa elome eJudia  
am ilou sae tale motouru, me see  
atoa elome eJerusalem am kupi ghoa  
me am ilou. Me see atoa am toka-  
toka tale paa ngutana, karika am mene  
kupi sso eJerusalem. <sup>22</sup>Poli nau tani  
ghaa aipolipoli tale sesa gheeieiaaira  
aJerusalem atoa me voto laghe piti  
elokoila tale Uru ngai Manga ateva ange  
lutulutu. <sup>23</sup>Alousiusi ta lo atoa la su-  
usunuku me lo atoa la sussu tale isaa  
o nau! Poli namungaili voto sesa tale  
ia o masaliki eteae, me sessaiaane God  
aue etoka tale isaa o taumattu. <sup>24</sup>Katoa  
aue la uvi ematela tale baenata, me ka-  
toa aue la ghaaila nongina karavusu etoa  
tani lao tale kasina anua, anueira ativuu  
etoea, me aue anueira ativuu etoa la asa  
tau sio eJerusalem lomosina ta nauira  
eruu.

### Maemaeane Natuna ateva Taumattu ngateva

(Mat 24:29-31; Mak 13:24-27)

<sup>25</sup>“Aue niaimatootongana aue elutu  
tale sinaka ateva me ulana ateva me  
katto atoa. Tale kosa ateva, taumattu  
tale anua atoa aue la matautu me karika  
aue la alomasaanga tee lingi niaanga-  
rina manu eteva me manu ghagga at-  
eva. <sup>26</sup>Me taumattu aue enngaili me  
la matautu poli la kila va voto sesa  
ange maemae tale kosa akapa ateva,  
poli God aue eaisisia voto atoa koroko-

rongana ila elomarase. <sup>27</sup>Tale ia o nau eteva aue la tara Natuna ateva Taumattu ngateva esio tale urukookoo tee sarasarakaniaane me kinatama mallangina ateva. <sup>28</sup>Nau isaa o voto etiuua tani lutu, am tingina sae me am masimasi, poli nauna Vau ngepona tani asaangiem ange akalakalaala.”

### Kiukiu niaimatoongana tale fig atee

(*Mat 24:32-35; Mak 13:28-31*)

<sup>29</sup>Me Iesu ghe mene auliaala kateae kiukiu niaimatoongana, “Am tarala fig atee me mene kasina tana ai. <sup>30</sup>Nau eteva utara ange vubbuleaa uruna, angu kilala va masi nau tale sinaka ateva ange aakalakalaa. <sup>31</sup>Liuna avalua o me nau eteva am tara isaa o voto, aue am kila va maemaeane Natuna ateva Taumattu ngateva nongina kingi ange aakalakalaa.

<sup>32</sup>“Aghaaulia ngakoronna etaimim va ia oia vituu eteva karika poi aue ekapa me isaa o voto aue elutu. <sup>33</sup>Elomarase me kosa ateva aue lalu kapa, me inangarighi eteva karika poi aue ekapa.

<sup>34</sup>“Am tani taatara amasina. Am rau mene laa ropi see sesa manu va am veeveena, me am rau mene annaa voto tale kosa ateva, ta erau gheleiem va am katu, me am nim soghi ta ia o nau eteva erekata, <sup>35</sup>am nannaa va karika aue emae etana. Isaa o voto aue elutu tale taumattu ngakapa atoa la tokatoka tale kosa ateva. <sup>36</sup>Nau ekapa atoa am anguu taatara me am looloo sae va aue am sarasarakana tani saanga tale isaa oia voto ange anna tani lutu, me am rooro tani tingina emua ta matane Natuna ateva Taumattu ngateva.”

<sup>37</sup>Ellaa Iesu ghe aapasungaa tale ale manga ateva, vara elo alai ghe sae asoaso tale motouru eteva eOliv. <sup>38</sup>Vara elue talau poppooa, taumattu ngakapa atoa laghe maemae tale ale manga ateva tani nongoa.

### Jiudas ghe aloannala tani taula Iesu

(*Mat 26:1-5, 14-16; Mak 14:1-2, 10-11; Jon 11:45-53*)

**22** Nau nivelu eitaua ngateae tani nama verete karika righi isti etana ang ghe aakalakalaa, la kolokoloa va “Pasova.” <sup>2</sup>Namu ngatoa ta pristi etoa me tau ngalomasanga ngatoa tale inangari nipaopao laghe paepae righi salana tani uvi eisulia Iesu, me laghe maa-matauta taumattu ngatoa. <sup>3</sup>Satana ghe kupila Jiudas la kolokoloa va Iskariot, ia tee kateva ta kasangaulu ghalua (12) disaepolo. <sup>4</sup>Liuna avalua o me ghe kasula tani laa aippooaa tee namu ngatoa ta pristi etoa me namu ngatoa polisi etoa, laghe aaitoia ale manga ateva, va vaalua erooro tani tau lao Iesu etaira. <sup>5</sup>Laghe masimasiangailiela me laghe uela etana va, “Aue ami tau aatu righi viliki veu.” <sup>6</sup>Jiudas ghe aloannala me ghe tiuaala tani pae righi salana tani ghelei va la kune Iesu, nau taumattu ngatoa karika ila.

### Niaipanipaniaa tale Pasova ngateae

(*Mat 26:17-25; Mak 14:12-21; Jon 13:21-30*)

<sup>7</sup>Ang ghe ghaala nau eteva tale nivelu eitauaa tale verete karika righi isti etana, me nau niuvi emate sipsipi, me la nama tale ia o Pasova ngateva. <sup>8</sup>Iesu ghe uela ta Pita me Jon va, “Amalu kasu me amalu laa aipanipaniaa nina-manama atee ta Pasova.” <sup>9</sup>Lalu ghe kolomiela va, “Eaa uanna va angalu laa aipanipanieinia?”

<sup>10</sup>Ghe liula me ghe uela va, “Nau eteva amalu laa sosso tale masaliki taatara atee, aue amalu sou taita ateva esuusunuki manu tale aikaai manu eteva. Nau eteva amalu taraiia, amalu usie sso tale ale ateva. <sup>11</sup>Me amalu ue ta lo ateva alena ateva va, ‘Tisa ngateva eanna tani kila va eaa ia rum atiulu

enama inani Pasova tee kapuna disaepolo atoa.’<sup>12</sup> Me aue ia eapasunga rum atiulu, ia epona tale ale ateva namuu ia, voto akapa isaa etana. Amalu sae aipanipaniaa inana etana.”

<sup>13</sup> Lalu ghe kasula me lalu ghe lao sio, me lalu ghe tarala voto Iesu ghe auli-aala etairarua, me lalu ghe aipanipaniaa inana tale Pasova ngateva.

**Disaepolo atoa laghe namanama teela Iesu**

*(Mat 26:26-30; Mak 14:22-26; 1 Kor 11:23-25)*

<sup>14</sup> Nau eteva ghe ghaala nau nina-manama, me Iesu me apostolo atoa laghe lao sio tale tevoo tani namanama.

<sup>15</sup> Me ghe uela etaira va, “Aghaaloan-naaili tani namanama teeiem tale lo ateva oia Pasova, me auena aghaa nimmari-kana. <sup>16</sup> Ta poli aghaauliaa etaimim va karika aue amene namanama tale mene teva Pasova lomose ta malloeana koronna elutu tale ararimangalina ateva God.”

<sup>17</sup> Iesu ghe ghaala kapa ueni eteva, me ghe kaili emasina saela ta God, me ghe uela va, “Am ghaala, me am aikoita see elome etaimim. <sup>18</sup> Ta poli aghaauliaa etaimim va, karika aue amene ropi righi ueni lomosina ta God aue eaitoia ngakapa kosa ateva.”

<sup>19</sup> Iesu ghe mene ghaala verete ateva, me ghe kaili emasinala, me ghe piri polapolakiela, me ghe tau lao sio ta kapuna disaepolo atoa, me ghe uela va, “Isaa oia verete malataughu, ngatautau aatu. Nau am namaia, am annainaghi nau ekapa atoa.”

<sup>20</sup> Nau laghe ruula tani namanama, tale ia o salana atikirighi, ghe mene ghaala kapa ateva airopiropi ia, me ghe uela va, “Ia oia ouna ateva inangari niaippooa ngaitauaa tale raeghi eteva aue eakala etaimim. <sup>21</sup> Me lo ateva aue etaueghi lao ta tau ngai ssateeghi etoa,

ie tee oia tale tevoo ateva. <sup>22</sup> Ta poli Natuna ateva Taumattu ngateva aue elao nongina God ghe uela va elao, me alousiusi ta lo ateva ange tautau velua.” <sup>23</sup> Me laghe tiuaala tani aikolomieinila va see etaira ange gheelei evalua o.

**See aue tani namuu?**

<sup>24</sup> Karika masau, me angila ghe mene aissakeana tee ninamu ngateae va see etaira aue tani namuu. <sup>25</sup> Iesu ghe uela etaira va, “Kapuiria kingi etoa tau ngeleka atoa, la gheelei taumattu enim uungu aanasa etaira, me lo atoa namuu ila, la ghaaloanna va taumattu ngatoa la asaesae arariira. <sup>26</sup> Me am, karika am mene ghelei nongina ila la gheeghelei. Ta lo ateva etaimim namuu ia, etani sio euu nongina teva aliki, me lo ateva emuemuaa niuungu, etani nongina teva tau ngai nongonongo anna. <sup>27</sup> Am annaa va, see tani namuu ia? Lo ateva etokatoka tale tevoo me enamanama, o lo ateva ekaakaisi anna inana? Lo ateva etokatoka tale tevoo me enam-anama. Aghi atokatoka elome etaimim nongina tau ngai nongonongo anna ateva. <sup>28</sup> Am, am ghe toka teeieghila, nau aghe ghaala nitootoonga. <sup>29</sup> Me nongina Tamaghi ghe tau mae sio ararimangalina ateva tani aitarainia, ngamene tautau aatu ararimangali eteva etaimim tani aitarainia. <sup>30</sup> Liuna avalua o me aue am namanama me am ropi tale uneghi tevoo ateva tale ararimangalighi eteva, me aue am toka tale uneira aitokatoka namu ngatoa, me am ghelei niaisakei tale kasangaulu ghalua (12) ararimangali nge Israel.”

**Iesu ghe uela va Saemon Pita aue eue va karika ekilakilaia**

*(Mat 26:31-35; Mak 14:27-31; Jon 13:36-38)*

<sup>31</sup> Vara me Iesu ghe mene uela va, “Saemon, Saemon, aghaauliaa etam va

Satana ange kolomila va etootoon-gainam nongina la sausau kirikiri uit.  
<sup>32</sup> Me aghe looloo saela mausim Saemon, va unem niaikaai karika emene katuu. Me nau eteva ukiriaa mae etaghi, uakororongana nengam atoa.”

<sup>33</sup> Pita ghe liula ta Iesu me ghe uela va, “Vau eteva, aghi aipanipaniaa tani usio tani lao tale ale mata voovoo me tani mate teeio.”

<sup>34</sup> Iesu ghe liula me ghe uela va, “Aghaauliaa etam Pita, va auena paolo ateva taita ia eaangari elopai, aue uue akasina kotoluaata va karika ukilakilaieghi.”

<sup>35</sup> Vara me Iesu ghe kolomilala va, “Ia o nau eteva aghe sungiemla tani laa ppooaa masi kiukiu, me karika am ghe ghaala righi aikaai viliki veu, me aikaai ghinna, o aiaasae tale keke, am ghe annala mene righe voto?”

Laghe liula me laghe uela va, “Karika.”

<sup>36</sup> Me ghe uela etaira va, “Isaa oia arova righe uneimim aikaai viliki veu, am ghaa tee me uneimim aikaai ghinna, me arova karika righe iemaimim, am tau uneimim aiaasae ngeleka ateva me la polia, me am poli iemaimim. <sup>37</sup> Ta poli Uru ngai Manga ateva eue va, ‘Laghe ioi teeie la va, ie tee sesa taumattu ia,’<sup>‡‡</sup> me aghaauliaa etaimim va, isaa o voto aue elutu etaghi. Nongina saa voto laghe pitila va aue elutu etaghi, ange maemae ta ekaurekati ekapa.”

<sup>38</sup> Disaepolo atoa laghe ue va, “Vau eteva, tarala, ghalua toko iema.”

Me ghe uela etaira va, “Ange roola.”

### **Iesu ghe looloo sae tale motouru eteva eOliv**

(*Mat 26:36-46; Mak 14:32-42*)

<sup>39</sup> Iesu ghe kupi ghoala me ghe mene saela tale motouru eteva eOliv tani mene

looloo sae nongina arau ghe gheeghelei, me disaepolo atoa laghe usiela. <sup>40</sup> Nau eteva laghe laa sae rekata, ghe uela etaira va, “Am looloo sae va karika am mene katuu tale nitootoonga.” <sup>41</sup> Me ghe kasu vulilala, me ghe lao tee sio, maamasauaane nongina ughele osaosa tiulu atu, me ghe suuia siola patu kkena me ghe tiuaala tani looloo sae. <sup>42</sup> Ghe looloo sae avalua toko va, “Tamaghi, arova uanna, ughaa velu kapa nimmarikana ateva etaghi. Me ughelei nongina aloaloanaam, me karika va aloaloo-naghi.” <sup>43</sup> Ensolo ateva ghe kasula epona liu ghe sio mae tani akororonganaia. <sup>44</sup> Iesu ghe ateateaala maamaatana namungaili, me karika ghe aamaomao tani looloo sae. Ghe aapaka, me aupaka ateva ghe akaakala sio tale kosa ateva tani nonginaaili rae ateva.<sup>¶¶</sup>

<sup>45</sup> Ghe tingina saela nau eteva ghe ruula tani looloo sae, me ghe lao sio ta disaepolo atoa, me ghe tarailala va laghe aseasekanua, poli nialousiusi ghe ghelei emangoolala. <sup>46</sup> Ghe kolomilala va, “Vaalua me am aseasekanua? Am anguula, me am looloo sae va karika am mene katuu tale nitootoonga.”

### **Jiudas ghe aitaualala Iesu**

(*Mat 26:47-56; Mak 14:43-50; Jon 18:3-11*)

<sup>47</sup> Nau ghe tingina aippooaa me tana taumattu ngatoa laghe rekatala. Jiudas, kateva ta kasangaulu ghalua (12) disaepolo, ghe muemueinila. Ghe mae akalakalaa sio ta Iesu, tani ngusua. <sup>48</sup> Me Iesu ghe uela etana va, “Aghalousiusi teeio Jiudas, ta vara umene ngusun-gusueghi tale masi niaingusu, me karika ta angu aaitauaa Natuna ateva Taumattu ngateva ta tau ngai ssateena atoa.”

<sup>‡‡</sup>22:37 Aisaea 53:12

<sup>¶¶</sup>22:44 Kasina uru ngai laghe pitila, karika laghe pitila ves 43-44.

<sup>49</sup> Nau eteva lo atoa laghe tiitingina tee Iesu laghe tarala saa ateva aue elutu, me laghe uela va, “Vau eteva, erooroa va ami aiuvi tale iema?” <sup>50</sup> Me kateva etaira ghe sai patela talingana muenna ativilau kapuna tau ngai nongonongo anna ateva namu ngateva ta pristi etoa.

<sup>51</sup> Iesu ghe uela va, “Ange roola!” Me Iesu ghe tulila talingana taumattu ngateva, me ghe mene masinala.

<sup>52</sup> Iesu ghe uela ta namu ngatoa ta pristi etoa, me polisi etoa laghe aaitaraa ale manga ateva, me lo atoa la mue-mueaa taumattu ngatoa, laghe mae sio tani kuneia va, “Am anna va aghi amuemua tau niainao atoa, va am mae sio tee tuku ngai me baenata tani kuneieghi?” <sup>53</sup> Me isaa o nau ekapaaili aghe tokatoka teeiem tale ale manga ateva, me karika am ghe kunekuneieghi? Nau eteva oia ange nauimm iela, nau eteva sarasarakania saurrom ateva ange muemueinamla.”

### **Pita ghe uela va etam kilakila Iesu**

*(Mat 26:57-58, 69-75; Mak 14:53-54, 66-72; Jon 18:12-18, 25-27)*

<sup>54</sup> Laghe kuneieila, me laghe kasueiniela. Laghe laoinie sio tale alena ateva namu ngateva ta pristi etoa. Pita ghe aaimuli, me masaueili ia etana. <sup>55</sup> Katoa taumattu laghe gheleila kura atea elome tale valavala atea, me laghe toka taliaala etana. Me Pita ghe toka teeila siola. <sup>56</sup> Vause ateva tau ngai nongonongo anna ia ghe taraiela ta ghe tokatoka nongina kura atea ghe ramerame, me ghe tara sossolainiela, me ghe uela va, “Ia tee, ia o taumattu ngateva ghe kasukasu teeia.”

<sup>57</sup> Pita ghe ssakeaala me ghe uela ta vause ateva va, “Karika poi akilakilaia.”

<sup>58</sup> Karika masauna arighi me mene kateva ghe taraiela, me ghe ue etana va, “Io tee kateva etaira.”

Me Pita ghe uela ta taita ateva va, “Karika va aghi tee.”

<sup>59</sup> Kateva aoa ghe lange sio me kateva etaira ghe mene uela va, “Koronnaaili, ia oia taumattu ngateva ghe ususia, ta ie tee aGalili ia.”

<sup>60</sup> Me Pita ghe uela ta taumattu ngateva va, “Karika akilakila sa ateva uaulieinia.” Nau eteva ghe tingina aip-pooaa me paolo ateva taita ia ghe aangarila. <sup>61</sup> Vau eteva ghe kiriela me ghe taatara lao sio ta Pita, me Pita ghe anaala inangarina Vau eteva ghe auli-aala etana ghe uela va, “Ghaine auena paolo ateva taita ia eaangari, aue kotolu-aata uue va utam kilakilaieghi.” <sup>62</sup> Liuna avalua o me ghe kupi ghoala, me ghe ngala alousiusieilila.

### **Lo atoa laghe aaitoia Iesu laghe piipilosia**

*(Mat 26:67-68; Mak 14:65)*

<sup>63</sup> Lo atoa laghe aaitoia Iesu laghe tiuaala tani pilosia, me laghe uviuvia.

<sup>64</sup> Laghe sum rungaala matane, me laghe kookolomia va, “Uauliaa inangari ghe mae sae ta God va see ange posalaiola.”

<sup>65</sup> Me laghe aauliaa oroieili inangari karika masina tani auliaa teeia.

### **Iesu ghe tinginala emua ta kansolo atoa**

*(Mat 26:59-66; Mak 14:55-64; Jon 18:19-24)*

<sup>66</sup> Nau eteva ghe paila, namu ngatoa me namu ngatoa ta pristi etoa me tau ngai apasunga ngatoa tale inangari ni-paopao, laghe toka aitauaala me laghe ssoaala Iesu etaira. <sup>67</sup> Me laghe uela va, “Arova Mesaea io, uauliaa etaimami.”

Me Iesu ghe liula me ghe uela va, “Arova aghauliaa etaimim, karika poi aue am aiesoa etaghi. <sup>68</sup> Me arova aghele kolomiem va vaalua nannaaimim tale Mesaea, karika poi aue am ghele liu.

<sup>69</sup> Me nau too emaemae karika masau

me aue Natuna ateva Taumattu ngateva aue etoka tale pai muenna ativilau ta God sarasarakanaaili ia.”

<sup>70</sup>Laghe kolomiela va, “Ia avalua o, me io Natuna io God?”

Ghe liula me ghe uela va, “Ngam auli-aala va aghi Natuna aghi God.”

<sup>71</sup>Laghe uela va, “Sa ateva inangari ita mene laa pae ta mene righi taumattu? Ta angita tani nongola ta paane.”

### Laghe laoa sio Iesu ta Paelat

(*Mat 27:1-2, 11-14; Mak 15:1-5; Jon 19:28-38*)

**23** Vara me ila akapa kansolo atoa laghe tingina saela me laghe kasueiniela, laghe laoinie sio ta Paelat. <sup>2</sup>Me laghe tiuaala tani auliaa teeia. Laghe ue va, “Ngami ghe tarala taumattu ngateva etiituaa ppae kasina ninannaa tani ghelei saasakiaa tokatokaa taumattu. Karika ealoanna va ami tau lao viliki veu ta Siisa, me eue va ia Mesaea ngateva, kingi ia.”

<sup>3</sup>Paelat ghe kolomila Iesu va, “Io kapuira kingi io aJiu etoa?”

Iesu ghe liula me ghe uela va, “Ue, nongina uaauliaa.”

<sup>4</sup>Paelat ghe auliaala ta namu ngatoa ta pristi etoa me taumattu ngatoa va, “Karika ngatarala righi sesa gheeieiaane taumattu ngateva oia.”

<sup>5</sup>Me laghe aulia ngasarasarakana va, “Ekasukasu ekapa see oia eJudia, me etiituaa voto sesa tale voto eaapasunga tale taumattu ngatoa. Ghe tiuaala eGalili me ange mae sio eriere.”

### Paelat ghe suu tau lao sio Iesu ta King Herot

<sup>6</sup>Tale nongonongoaane Paelat tale isaa o voto, ghe kolomila va, “Taumattu ngateva oia aGalili ia, o karika?” <sup>7</sup>Nau

eteva ghe kilala va Iesu ghe tokatoka tale pai etivilau King Herot ghe aaitarainia, ghe sungi taue lao sio ta Herot. Isaa o nau, Herot ghe sae mae eJerusalem.

<sup>8</sup>Nau eteva Herot ghe tarala Iesu, ghe masimasieilila, ta poli ang ghe aloanna vella tani taraia. Poli tale uunguaane ghe nongonongo, me ghe aloannaaili tani taraia eghelei righi mirikol. <sup>9</sup>Eghe kolomiela tale oroi nikokkolomi, me Iesu karika ghe liu poila. <sup>10</sup>Namu ngatoa ta pristi etoa me tau ngai apa-sunga ngatoa tale inangari nipaopao laghe tiitingina, laghe auliaa teeia inangari sarasarakanaaili. <sup>11</sup>Herot me kapuna tau ngai uvi etoa laghe piipilosia, laghe kangkangainia, me laghe amolumu emasinaailiela, me laghe sungiela ghe mene lao sio ta Paelat. <sup>12</sup>Ia o nau eteva, Paelat me Herot lalu ghe aikapukapuaala, poli emua arau lalu ghe aaisessaii.

### Paelat ghe uela va Iesu emate

(*Mat 27:15-26; Mak 15:6-15; Jon 18:39-19:16*)

<sup>13</sup>Paelat ghe kolo aitauaala namuu ta pristi etoa, namu ngatoa me taumattu ngatoa. <sup>14</sup>Me ghe uela etaira va, “Am maeaa sio taumattu ngateva oio etaghi poli am ue va ia etiituaa ppae kasina ninannaa tani ghelei saasakiaa tokatokaa taumattu. Ghe tiitingina emua etaimim me aghe kolomiela kasina nikokkolomi, me aghe tarala va karika righi gheeieiaane sesa. <sup>15</sup>Ta nim nongina Herot ange sungiaa oghie mae sio etaita. Am taatara va karika righi sesa gheeieiaane va eghaa nimate. <sup>16-17</sup>Liuna avalua o anim parua, me atau velua.”<sup>§§</sup>

<sup>18</sup>Katengaata nonga ta laghe aiovaova ngalokoila tani ue va, “Ukasuaa taumattu ngateva ona, me utau velu

§§23:16-17 Kasina uru ngai laghe pitila, laghe uela va <sup>17</sup> Me etani tau velu kateva taumattu elao etaira tale nivelu eitaua ngateae la kolokoloa va Pasova.



Barabas emae etaimami!”<sup>19</sup> (Barabas laghe atokaie ssola tale ale mata voovoo, ta poli ia ghe muemua niamakatakata tale masaliki taatara, me ghe aiuvi ematela.)

<sup>20</sup> Poli aaloannaane tani tau velu Iesu, Paelat ghe mene kolo taula taumattu ngatoa.<sup>21</sup> Me laghe ovaova atingina me laghe ue va, “Avukalaie saela tale aikotoo!”

<sup>22</sup> Aiaakotonna ghe mene uela etaira va, “Poli saa? Sa ateva voto sesa taumattu ngateva oio ghe gheleila? Karika ngaghe tarala righi gheleiaane sesa va emate, liuna avalua o aparua me atau velua.”

<sup>23</sup> Laghe ovaova me laghe akorokorongana va esae vukala tale aikotoo. Uneira niaore ghe koronnala.<sup>24</sup> Paelat ghe nnaala va eaimuli tee aaloannaaira.<sup>25</sup> Ghe tau vella taita ateva laghe aloannaiea ghe tokatoka tale ale mata voovoo mausi ghe muemua niamakatakata me ghe aiuvi ematela, me ghe taula Iesu tale aloannaaira.

### Laghe avukala saela Iesu tale aikotoo

(*Mat 27:32-44; Mak 15:21-32; Jon 19:17-27*)

<sup>26</sup> Nau eteva tau ngai uvi etoa laghe kaakasueinia elaolao, laghe kune atokala Saemon atala nge Saerini ia, ghe rekata sae mae me ghe aloanna tani sso tale masaliki taatara atae. Me laghe tau lao sio aikotoo ateva etana va esaua, me eaimuli tee Iesu.<sup>27</sup> Oroieili taumattu ngatoa laghe aaimuli tee Iesu, me elome etaira vause atoa laghe aalousiusi teeia.<sup>28</sup> Iesu ghe kirielia me ghe uela etaira va, “Vauseni nge Jerusalem atoa, am rau mene alousiusi teeieghi. Am alousiusi teeiem me natuim atoa.<sup>29</sup> Ta poli kateva nau aue

emae, aue am ue va, ‘Nimasimasi tale vause atoa kina ngere ila, lo atoa karika righi natuira, me lo atoa karika laghe sussu.’<sup>30</sup> Tale isaa o nau,

“‘Aue la kolo motouru etoa va, “Am katuu sae etaimami!”

me saesaena atoa va, “Am akoue-nami!””\*

<sup>31</sup> Taumattu ngatoa la ghelele teeieghi, me karika aghe gheleila righi voto sesa. Alousiusi etaimim arova auena la ghelele teeiem, poli am ghe gheleila voto sesa.”

<sup>32</sup> Mene ghalua taumattu, ghelelaairua sesa, laghe ghaa teelaluela tani laa uvi ematelalua.

<sup>33</sup> Nau eteva laghe lao sio tale voto ateva la kolokoloo va “Voto ateva arova Riu uru taumattu ngateva” etana, tale ia o voto ateva laghe avukalaie saela tee lo alua ghelelaairua sesa, kateva tale pai muenna ativilau, me kateva tale pai uaise ativilau.<sup>34</sup> Iesu ghe uela va, “Tamaghi, ukaluaa, ta poli karika la kilakila va voto ateva la ghelelele sesaailia.”† Me tau ngai uvi etoa laghe tiuaala tani anamisi tani aikoitaa ghinnanina.

<sup>35</sup> Taumattu ngatoa laghe tingina taatara, me namu ngatoa laghe attara teeia. Me laghe ue va, “Ghe asaangila katoa, tau veluela me easaangia, kotiva kapuna Mesaea ia God, me God ghe suitoonganiela.”

<sup>36</sup> Tau ngai uvi tee atoa laghe sae mae, me laghe piipilosia, me laghe tau lao sio manu eteva sarasarakana ia,<sup>37</sup> me laghe ue va, “Kotiva kapuira kingi io aJiu etoa, uasaangio.”

<sup>38</sup> Epona etana laghe pitila tuku inangari eteva va, “Ierai oia kapuira kingi ia aJiu etoa.”

<sup>39</sup> Kateva ta lo alua ghelelaairua sesa ghe poppooa tee Iesu va, “Karika

\*23:30 Hosea 10:8

†23:34 Kasina uru ngai laghe pitila, karika laghe pitila isaa oia inangari.

io va Mesaea io? Uasaangio me uasaangi teeiengalua!”

<sup>40</sup> Mene kateva ghe sessaiela tani nongo, me ghe uela va, “Karika umaamatauta God? Poli kateva nonga ia aipolipoli eteva angita ghaaiela. <sup>41</sup> Italu, italu ghaaghaa aipolipoli tale gheeleiaaitalua sesa. Me ia oio taumattu ngateva karika righi sesa gheeleiaane!”

<sup>42</sup> Vara me ghe uela va, “Iesu, un-nainaghi nau eteva umae tale ararimangalim ateva.”

<sup>43</sup> Iesu ghe liula me ghe uela va, “Aghaaulia ngakoronna etam, ghaine angu toka teeiaghila tale umana utana atingiu God.”

### Matemateaane Iesu

(Mat 27:45-46; Mak 15:33-41; Jon 19:28-30)

<sup>44</sup> Pai ngelo sinaka ativilau<sup>‡</sup> ghe mae sio, me saurrom ateva ghe akou ekapala kosa ateva lomosina ta 3 kilok elo alai,<sup>¶</sup> <sup>45</sup> ta poli sinaka ateva ghe saurromien-ala tale ia o voto ateva. Me kalio atiulu ghe vuuvukala tale ale manga ateva ghe tarriila me ghe ghaluevilaula. <sup>46</sup> Iesu ghe sama anamuula me ghe uela va, “Tam-aghi, maamauluaaghi ngatautau aatu ta nimam.”<sup>§</sup> Nau eteva ghe auliaala llo me ghe ainoana aruula me ghe matela.

<sup>47</sup> Kapuira namu ngateva tau ngai uvi etoa ghe tarala isaa o voto ghe lutula, ghe tau saela God me ghe uela va, “Koronna, ia oia taumattu ngateva tau ghulughuluena ia.” <sup>48</sup> Oroi taumattu laghe mae sio laghe tarala sa ateva ghe lutula, laghe aalousiusi me laghe kasula. <sup>49</sup> Me lo atoa laghe kilakilaia me vause atoa laghe usiela arau eGalili laghe tiitingina amasau, me laghe tarala sa ateva ghe lutula.

### Laghe kaijala Iesu

(Mat 27:57-61; Mak 15:42-47; Jon 19:38-42)

<sup>50</sup> Kateva taita, ararina atea ta Josep, ia kateva kansolo me masi taumattu ia me ghulughuluena ia, <sup>51</sup> karika ghe lao aitauaa tee sio nannaaira kansolo atoa laghe nnaala me voto laghe gheleila. Tanganuena tale masaliki taatara atea eArimatia, kateae uneira masaliki taatara aJiu etoa. Me ghe toitoi tani tara ararimangalina ateva God. <sup>52</sup> Ghe lao sio ta Paelat me ghe kolomila Iesu etana. <sup>53</sup> Me ghe ghaaiela me ghe sumuela tale kalio, me ghe alokoiera tale lienga atea laghe kai essola tale atu. Karika laghe alokoi poi teva taumattu etana. <sup>54</sup> Nau eteva oia nau niaimonomonosiaa ia, me nau manga ateva ang ghe aakalakalaa.

<sup>55</sup> Vause atoa laghe mae aitauaa tee sio Iesu eGalili laghe mene usila Josep, laghe tarala lienga atea, me laghe tarala vaalua laghe alokoie ssola. <sup>56</sup> Vara me laghe lao sio tanganueira, laghe aimonomosiaala voto masi ngusungusuaane. Me laghe ainoanala tale nau manga ateva nongina inangari nipaopao eaauliaa.

### Iesu ghe mene totula

(Mat 28:1-10; Mak 16:1-8; Jon 20:1-10)

**24** Me tale aitiutiu eteva nau, elue talaua poopooa, vause atoa laghe ghaala voto masi ngusungusuaane laghe aimonomosiaala me laghe lao sio tale lienga niaikaia ngateae. <sup>2</sup> Me laghe tarala atu eteva angila ghe atakiri veluela nongina laghe atingina rungaala atamani lienga niaikaia ngateae. <sup>3</sup> Laghe kupi ssola me karika laghe tarala Vau

<sup>‡</sup>23:44 *Pai ngelo sinaka ativilau* Tale inangari nge Grik, *ghaonominia* (6) ateva aoa

<sup>¶</sup>23:44 *3 kilok elo alai* Tale inangari nge Grik, *ta aiaaghasiona* (9) ateva aoa

<sup>§</sup>23:46 Sams 31:5

eteva Iesu. <sup>4</sup> Laghe tingina nannaa, vara me laghe tarala taita alua lalu ghe ti-tingina akalakalaa etaira, mallanga ateva tale ghinnaniiraru. <sup>5</sup> Vause atoa oia laghe matautula, me laghe turru siola tapaa kosa, me taita alua oia lalu ghe uela etaira va, “Vaalua me am paepae taumattu sakesake nongina taumattu matena? <sup>6</sup> Karika ia oia; ange to-tula! Am rooroo tani annaa nongina ghe auliaala etaimim nau eteva ghe tokatoka arau eGalili. <sup>7</sup> Ghe uela etaimim va, ‘Aue la tau lao Natuna ateva Taumattu ngateva ta nimaira tau ngai ghelei ssavoto atoa, me aue la avukalaie sae tale aikotoo ateva, me aue kotonna ateva nau aue emene totu.’” <sup>8</sup> Me laghe nnaala isaa oia inangari Iesu ghe auliaala.

<sup>9</sup> Me laghe kasu vulila lienga niaikaia ngateae. Nau eteva laghe kiriaa lao sio, laghe kiukiuuuala isaa oia voto ta kasangaulu kateva disaepolo, me mene katoa taumattu. <sup>10</sup> Meri aMakdala ia, Joana, me Meri kinna Jeimis, me mene kasina vause, laghe auliaala isaa oia voto ta apostolo atoa. <sup>11</sup> Me laghe nannaa va vause atoa laghe auliaa kapa atoa, me karika laghe aiesoaala inangariira. <sup>12</sup> Vara me Pita ghe tingina saela me ghe ilou lao sio tale lienga niaikaia ngateae, ghe turruua siola me ghe tarala nonga kalio, me ghe oghiaa lao sio tanganuena, me ghe nnangailila isaa o voto ghe lutula.

### Nikasu tani lao Emmaus

(Mak 16:12-13)

<sup>13</sup> Ie nonga o nau eteva ghalua tana kapuna Iesu lalu ghe laolao tale kateae masaliki la asease va Emmaus, erooroo kasangaulu kateva (11) kilomita\*\* tani kasu eJerusalem me tani lao etana, <sup>14</sup> me lalu ghe kiukiuuaa isaa akapa oia voto ghe lutula. <sup>15</sup> Lalu ghe aikolomi me lalu

ghe kiukiu, me Iesu ghe sokotilaluela me ghe kasu eitauaa teeilaluela; <sup>16</sup> God ghe ghelei rungainilaluela va lalu rau mene tara kilaia.

<sup>17</sup> Iesu ghe uela etairaru va, “Sa ateva amalu kiukieunia nau eteva amalu kasukasu emaemae?”

Lalu ghe tinginala, me taatarairaru ghe alousiusinnala. <sup>18</sup> Kateva etairaru, ararina atea ta Kliopas, ghe liula me ghe uela etana va, “Koti io nonga kateva taumattu eJerusalem karika ukilakila saa voto ghe lutula isaa to nau ang ghe lao sio, no?”

<sup>19</sup> Iesu ghe kolomilaluela va, “Saa voto?”

Lalu ghe liula me lalu ghe uela va, “Voto ghe lutula ta Iesu aNasareti ia. Ia oia taumattu ngateva propete ia, me inangarina me gheeleiaane sarasarakana ta matane God me taumattu ngatoa. <sup>20</sup> Kapuita namu ngatoa ta pristi etoa me mene katoa tau ngai toitoi laghe tau veluela me laghe uvi emateala tale aikotoo. <sup>21</sup> Ami ghe nannaa va ia oia taumattu ngateva aue ghe ghaa oghi ita alsraeli etoa! Me tee, ghaine ange kotonna atevala nau isaa oia voto ghe lutula. <sup>22</sup> Me tee, katoa kapuimami vause la asoghisoghiemamila; nau la siola nongina laghe alokoila Iesu, <sup>23</sup> me karika la taraiela. La oghila, me la uela va la tara nongala ensolo alua, me ensolo alua lalu uela va ange totula. <sup>24</sup> Me katoa kapuimami la lao sio nongina laghe alokoila Iesu, me la tarala va koronna llo vause atoa la ghauliaala, poli karika la taraiela.”

<sup>25</sup> Me Iesu ghe uela etaira va, “Karika righe nannaaimalua, aanasaaili iemalu tani aiesoa voto akapa propete atoa laghe auliaala! <sup>26</sup> Karika amalu kilakila va Mesaea etani ghaa mua nimmarikana tale isaa o voto me auena ekupi sso

\*\*24:13 kasangaulu kateva kilomita Tale inangari nge Grik, 60 stadia.

tale mallangina ateva?" <sup>27</sup> Vara me Iesu ghe kiri tau lao sio etairarua saa voto laghe auliaala ekiukiueinia elome tale Uru ngai Manga akapa ateva. Etiitiuaa tale unna vuku Moses me voto propete atoa laghe pitila.

<sup>28</sup> Vara angilotolu ghe reerekata tale masaliki eteae lalu ghe laolao etana, me Iesu ang ghe gheeleei va ghe kasu lulilalua. <sup>29</sup> Me angilalu ghe gheeleei rungarungainia tani ue va, "Ita ghaso. Sinaka ateva ange laa siosio, me ghaisa ngarighi evoo." Me ghe kupi ssola tani toka teeilalua.

<sup>30</sup> Nau eteva ghe toka aitauaa teeilalue siola tale tevoo ateva, ghe ghaala verete, ghe kaili emasinala, ghe pirila me ghe tiuaala tani tau lao etairarua. <sup>31</sup> Me matairarua ghe otila, me lalu ghe tara kilaiela, me ghe aikapaka-paaiila tale taatarairarua. <sup>32</sup> Me angilalu ghe aikolomieinilalua va, "Koti isaa oia voto eataatala tale urunguitaniitalua nau eteva esamasama teetalua tapaa salana me nau ekiri tau mae sio Uru ngai Manga ateva etaitalua."

<sup>33</sup> Arovaegangaili ta lalu ghe tingina saela me lalu ghe kiriaa siola eJerusalem. Me lalu ghe tarala kasangaulu kateva disaepolo me mene katoa kapuira taumattu laghe tokatoka aitauaa <sup>34</sup> me laghe ue va, "Koronna! Iesu ange totula me erekatala ta Saemon." <sup>35</sup> Me taita alua lalu ghe kiukiuaala sa ateva ghe lutula tapaa salana, me vaalua lalu ghe tara kilala Iesu nau eteva ghe pirila verete.

### **Iesu ghe rekataala ta disaepolo atoa**

*(Mat 28:16-20; Mak 16:14-18;  
Jon 20:19-23; Apostolo 1:6-8)*

<sup>36</sup> Nau eteva laghe toka kiukiuaa isaa o voto me katengaata ta Iesu ghe tingina polakila elome etaira, me ghe uela etaira va, "Luei aue etoka aitauaa teeiem."

<sup>37</sup> Laghe soghila me laghe matautula, ta laghe annaa va laghe tarala raroaina ateva Iesu. <sup>38</sup> Ghe uela etaira va, "Vaalua me am soghila? Vaalua me nannaaimim eghaaghalua? <sup>39</sup> Am tarala nimaghi me kekeghi. Aghi oia! Am posoaghila me am tara; raroai eteva karika righi malatauna me riuna, nongina aghi!"

<sup>40</sup> Nau eteva ghe auliaala voto oia me ghe apasungaala nimane me kekena. <sup>41</sup> Laghe masimasieilila me laghe soghila tani tara Iesu, me karika laghe aiesoa va voto laghe tarala koronna, me Iesu ghe kolomilala va, "Righi aneimim inana?" <sup>42</sup> Laghe tau lao sio tuku kko arighi laghe tungi esaela tale kura, <sup>43</sup> ghe ghaaiela, laghe taatara me ghe namaiela.

<sup>44</sup> Ghe uela etaira va, "Isaa oia voto ngaghe auliaala etaimim nau eteva aghe tokatoka teeiem. Isaa akapa voto laghe piti elokoila elome tale kanna inangari nipaopao Moses, propete atoa me Sams, etani lutu ekoronna."

<sup>45</sup> Me ghe otila nannaaira va la tara kila Uru ngai Manga ateva. <sup>46</sup> Ghe uela etaira va, "Isaa o voto laghe piti elokoila va: Mesaea aue emmarikana me aue emate, me aue emene totu tale nimate tale kotonna ateva nau, <sup>47</sup> me aue la ppooaa ninna ngaioghioghia tale ararina atea, me nikkaluaa tale uunguaa ssavoto, aue erooa ngakapa kosa ateva, etiuua eJerusalem. <sup>48</sup> Am oia am ghe tarala me aue am ppooaa isaa oia voto. <sup>49</sup> Aghi aue asungi tau aatu sa ateva Tamaghi ghe aulieiniela tale inangari nialokoi; am toka arau oia tale masaliki taatara lomose ta am ghaa sarasarakana aue ekasu epona liu."

### **Iesu ghe saela epona liu**

*(Mak 16:19-20; Apostolo 1:9-11)*

<sup>50</sup> Vara me ghe kasueinilala, me laghe lao sio eBetani, ghe atingina saela nimana epona me ghe arangiseilala. <sup>51</sup> Nau eteva ghe aarangiseila, me ghe kasu

vulilala me God ghe ghaaie saela epona liu. <sup>52</sup>Me laghe kkaueiniela, me laghe oghi lao sio eJerusalem tee nimasimasi.

<sup>53</sup>Laghe nim tokala o tale ale manga ateva me laghe tautau sae ararina atae God.

*Masi kiukiu*

**Jon**

*ghe pitiela*

### Inangari eteva ghe taumattula

**1** Emua arau, nau karika righi voto ghe lutu, Inangari eteva ghe tokatoka. Ghe tokatoka tee God, me ie tee Goto ia.

<sup>2</sup>Emua arau, ia ghe tokatoka tee God.

<sup>3</sup>Tale ia o Inangari eteva God ghe ghelei ekapala voto. Karika righi voto God ghe gheleila va ghe gheleila ta nge-tana. <sup>4</sup>Maulue ateva etokatoka ta nge-tana, me maulue ateva, mallangiira ia taumattu ngatoa. <sup>5</sup>Ia o mallanga ateva, elallaa tale saurrom ateva, me saurrom ateva karika erooroo tani ghelei epalaia.<sup>††</sup>

<sup>6</sup>God ghe suula taumattu ngateva, ararina atea ta Jon. <sup>7</sup>Ghe mae sio tani auliaa mallanga ateva oia ta taumattu ngatoa, poli ghe aloanna va ila akapa la ghaiesoa inangarina. <sup>8</sup>Jon karika va mallanga ia. Ia ghe nim mae sio tani ppoa ngaotu inangarina mallanga ateva. <sup>9</sup>Mallanga ateva koronna ia ghe sso mae tale kosa ateva, me emaamallanga tale taumattu ngakapa atoa.

<sup>10</sup>Ia o Inangari eteva ghe tokala oia tale kosa ateva, me arongona ta God ghe gheleila kosa ateva tale ia o Inangari eteva, me karika teva ghe kilakilaia. <sup>11</sup>Ghe tani mae sio tanganuena, me kapuna atoa karika laghe aikoloainiela. <sup>12</sup>Katoa tana taumattu laghe aikoloainiela, me laghe aiesoala etana, me tale ararina atea. Liuna avalua o, me ghe tau lao sio niavavau etea va ila natuna ila God. <sup>13</sup>Karika va

natuna ila God tale raeira taumattu ngatoa, me aloannaira taita atoa me vause atoa, me nannaa taita atoa. Nim ia God ghe gheleilala va natuna ila.

<sup>14</sup>Inangari eteva ghe taumattula, me ghe toka teeiemamila. Ami ghe tarala naanamunganiaane ateva tale ie nonga o Natuna ateva, Tamana ghe sungiela. Ia pasu ia tale maamasinaane me inangari koronna.

<sup>15</sup>Jon ghe aulieiniela nau ghe sama anamungailila me ghe uela va, “Ia oia taumattu ngateva aghe aaulieinia va aue emae. Ia namuu ia etaghi, me aghi ghauna aghi etana, poli ia ghe tokala arau, me avirina aghe lutula.” <sup>16</sup>Poli pasu ia tale maamasinaane, liuna avalua o me ita ghaaghaa asease niarangise. <sup>17</sup>Poli God ghe tau lao sio inangari ni-paopao ta Moses, me Moses ghe tau mae sio etaita, me Iesu Karisto ghe tau lao sio maamasinaane me inangari koronna.

<sup>18</sup>Karika poi teva ghe tara God. Natuna nonga, ia koronna ia va Goto ia me kalakalanginaaili ia ta Tamana, ia ghe apasungaala etaita va God vaalua ia.

### Jon tau ngai aasuu ia ghe aulia ngaotula Iesu

*(Mat 3:1-12; Mak 1:2-8; Luk 3:15-17)*

<sup>19</sup>AJiu etoa laghe suula pristi etoa me Livaeti<sup>‡‡</sup> etoa eJerusalem tani laa kolomi Jon va ia see. <sup>20</sup>Jon karika ghe aisuliaala etaira, me ghe uela etaira va, “Karika aghi va Mesaea ieghi.”

<sup>21</sup>Laghe mene kolomiela va, “Io Elaija?”

Ghe liula me ghe uela va, “Karika.”

Me laghe mene kolomiela va, “Io Propete io?”<sup>¶¶</sup>

Ghe mene liula me ghe uela va, “Karika.”

<sup>††</sup>1:5 tani ghelei epalaia o tani tara kilaia

<sup>‡‡</sup>1:19 Livaeti Livaeti etoa laghe saasausi tani uungu tale ale manga ateva

<sup>¶¶</sup>1:21 Utara Diuteronomi 18:15

<sup>22</sup> Vara me laghe uela etana va, “Me uue va io see? Me ami laa ghauliaa ta lo atoa la sungiemamila tani mae kolomi va io see.”

<sup>23</sup> Jon ghe liula tale inangarina propet Aisaea ghe uela va, “Aghi lingi ngalo taumattu ngateva ekolokolo tale voto ateva karika rigi taumattu etokatoka etana ghe ue va, ‘Ghelei eghulughuluena salane atikirighi Vau eteva.’”<sup>§§</sup> <sup>24</sup> Elome tale lo atoa laghe lao sio tani kolomi Jon, katoa etaira Paresi ila. <sup>25</sup> Laghe kolomiela va, “Vaalua me uasuu taumattu me karika va Mesaea etam, karika va Elaija etam me karika va Propete io?”

<sup>26</sup> Jon ghe uela etaira va, “Aghi aghasuuem tale manu, me kateva elome etaimim karika am kilakilaia. <sup>27</sup> Arongo ta aghi aghe muemue mae sio, me karika masi taumattu ngieghi tani pulaka velu oasa tale unna aikasukasu elua, ia aue eaimuli etaghi.”

<sup>28</sup> Isaa o voto ghe lutula eBetani tale pai kativilau eJodan, nongina Jon ghe aasuu.

### Natuna sipsipi eteva God

<sup>29</sup> Mene kateva nau me Jon ghe tarala Iesu ghe maemae aloi etana me ghe uela va, “Am tarala! Natuna sipsipi eteva oia God! Ia aue eghaa velu ssavoto tale kosa ateva. <sup>30</sup> Ia aghe aulieiniela etaimim, nau aghe ue va, ‘Kateva taumattu aue emae, ia namuu ia ta ngetaghi, poli ghe tokala arau, me avirina aghe lutula.’ <sup>31</sup> Karika aghe kilala va ia see, ta anim aasuu taumattu tale manu va aue alsraeli etoa la taraia.”

<sup>32</sup> Jon ghe aulia ngoatula ta taumattu ngatoa, ghe uela va, “Aghi tee okae, me aghe tarala Spiriti eteva ghe kasula epona liu nonginaaili va ghila ateva valusu ia ghe mae sio toka etana.

<sup>33</sup> Karika aghe kilala va ia see, ta lo ateva ghe sungieghila tani asuueem tale manu eghe uela etaghi va, ‘Aue utara Spiriti eteva esio toka tale kateva taumattu, me aue ukila va ia o taumattu ngateva aue easuueem tale Spirit Manga ateva.’ <sup>34</sup> Aghi aghe tarala isaa o voto ghe lutula. Liuna avalua o me aghauliaa etaimim va ia Natuna ia God.”

### Aitiutiu etoa kapuna disaepolo Iesu

<sup>35</sup> Mene kateva nau Jon me ghalua tana kapuna disaepolo latolu ghe tiitingina aitauaa. <sup>36</sup> Nau ghe tarala Iesu ghe kasukasu elaolao me ghe uela va, “Am tarala! Ia o natuna sipsipi eteva God!”

<sup>37</sup> Ilalua o disaepolo alua lalu ghe nongola, me lalu ghe lao sio tani aimuli tee Iesu. <sup>38</sup> Iesu ghe kiriela me ghe tarailaluela, me ghe uela va, “Sa ateva amalu aloannaia?”

Lalu ghe liula me laghe uela va, “Rabae, eaa utokatoka?” (Ta inangari nge Ibru, ‘Rabae’ malloeana va ‘tisa’.)

<sup>39</sup> Iesu ghe liula me ghe uela va, “Amalu usieghila, me amalu laa tara.”

Laghe usila tani laa tara nongina Iesu ghe tokatoka. Ang ghe 4 kilokola elo alai,\* me laghe toka teeiela vara me ghe voola.

<sup>40</sup> Andru, nengane ia Saemon Pita, kateva ta ilalua o taumattu ngalua lalu ghe nongola Jon, me lalu ghe usila Iesu. <sup>41</sup> Aitiutiu eteva voto Andru ghe gheleila, ghe kasula tani pae tuena ta Saemon Pita tani auliaa etana va, “Ngami ghe paela Mesaea ngateva.” (Ta inangari nge Ibru, malloeana ‘Mesaea’ elaolao aitauaa tee samasama nge Grik va ‘Karisto.’) <sup>42</sup> Andru ghe laoa sio tuena ta Iesu. Me nau Iesu ghe taraiela, ghe uela va, “Saemon natuna io Jon. Aue la kolo ararim atea ta Kepas” (mal-

§§1:23 Aisaea 40:3

\*1:39 4 kilokola elo alai Tale inangari nge Grik, aiaakasangalua ateva aoa

loeana ta inangari nge Grik va Pita, atu ia).

### Iesu ghe kolola Pilip me Nataniel

<sup>43</sup> Vara ghe pai saela ta mene kat-eva nau, me Iesu ang ghe anna tani lao eGalili. Nau ta ghe lao sio, ghe paela me ghe tarala Pilip, me ghe uela etana va, “Mae usieghi.”

<sup>44</sup> Pilip atala nge Betsaida ia, tanganeirua Andru me Pita. <sup>45</sup> Pilip ghe paela me ghe tarala Nataniel me ghe uela etana va, “Ngami tarala taumattu ngateva Moses ghe pitila me ghe aulieiniela tale inangari nipaopao, me propete atoa laghe piti emuemue alokoila maemaeane, Iesu ta ngetana, natuna ia Josep aNasareti ia.”

<sup>46</sup> Me Nataniel ghe kolomiela va, “Righi masi voto elutulutu eNasareti?”

Pilip ghe liula me ghe uela va, “Mae sio me ulaa tara.”

<sup>47</sup> Nau Iesu ghe tarala Nataniel ghe kasukasu emaemae etana me ghe uela va, “Tarala! Taumattu ngateva o, ia taumattu koronna ia ta aIsraeli etoa, karika eghelei me eauliaa voto kamena.”

<sup>48</sup> Nataniel ghe kolomila Iesu va, “Vaalua ughe kilaieghila?”

Iesu ghe liula me ghe uela va, “Ngaghe taraiola nau Pilip ghe koloola ta ughe tokatoka tale liue fig atee.”

<sup>49</sup> Me Nataniel ghe uela va, “Tisa, io Natuna io God, me io kingi nge Israeli io.”

<sup>50</sup> Iesu ghe liula me ghe uela va, “Uaikaiaia etaghi poli auela va aghe taraiola ughe tokatoka tale liue fig atee? Aue utara mene kasina voto namungaili aue elutu. <sup>51</sup> Aghaaulia ngakoronna etaimim va aue am tara epona liu aue eotia, me kapuna ensolo atoa God aue la siosio me la saesae ta Natuna ateva Taumattu ngateva.”†

### Nisigha ngateae eKena

**2** Ghalua nau ghe lange sio me Meri, kinna Iesu, ghe siola tale nisigha ngateae tale masaliki eteae eKena ta pai nge Galili. <sup>2</sup> Laghe aloanna va Iesu me kapuna disaepolo atoa la usi sio tale nisigha ngateae. <sup>3</sup> Nau uaeni ghe kapala, kinna ghe lao sio tani auliaa ta Iesu va, “Uaeni ange kapala.”

<sup>4</sup> Iesu ghe liula me ghe uela va, “Vause ateva, urau mene auliaa voto va aghelei, ta naughu karika ghe mae.”

<sup>5</sup> Kinna ghe uela ta tau ngai nongonongo anna atoa va, “Am ghelei saa voto eauliaa etaimim.”

<sup>6</sup> Elome tale ale ateva, ghaonomo (6) aikaai manu laghe gheleila tale atu ghe tokatoka, uneira aJiu etoa aiporapora nau la ghaloanna tani aimuli tee uneira lo. Kateva aikaai manu erooroo tani kaai koti kateva ai (100) lita.

<sup>7</sup> Iesu ghe uela ta tau ngai nongonongo anna atoa va, “Am aku kaai manu esae pasu tale aikaai manu.” Me laghe gheleila voto ghe auliaala.

<sup>8</sup> Me Iesu ghe mene uela va, “Am akula righi me am laa tau ta lo ateva eaaitoia ninamanama atee.” Tau ngai nongonongo anna atoa laghe gheleila voto Iesu ghe auliaala.

<sup>9</sup> Taumattu ngateva ghe aaitoia ninamanama atee ghe tootongala manu ang ghe uaenila. Karika ghe kilala va eaa laghe ghaala; tau ngai nongonongo anna atoa laghe akula manu, ila nonga laghe kilala. Vara me tau ngaitoi ninamanama atee ghe kolola lo ateva taita ghe sighaala, <sup>10</sup> me ghe uela etana va, “Ila akapa taumattu ngatoa la ghaaikoita ngakasina masi uaeni, me nau taumattu ngatoa la ropiropi, me nannaaira ange aisavisavilaala, me la vira mene tautau lao llo uaeni karika tani masina. Me

†1:51 Utara Aitiutiu 28:12



io, uarongi etokala masinaaili uaeni, me angu vira mene maeaa sio.”

<sup>11</sup> Ia o niaimatoongana ateva Iesu ghe gheleieia, aitiutiua ia tale isaa akapa ni-aimatoonga. Ghe gheleieia eKena ta pai nge Galili. Tale ia o nau eteva Iesu ghe apasungaala sarasarakaniaane, me kapuna disaepolo atoa laghe aiesoaala etana.

<sup>12</sup> Vara me Iesu ghe kasula eKena me ghe siola eKapenium, ia, kinna, nengane atoa me kapuna disaepolo atoa. Laghe tokala kasina nau tale ia o masaliki eteae.

**Iesu ghe ameti vella taumattu ngatoa laghe poppoli me laghe aitaaua voto tale ale manga ateva**

*(Mat 21:12-13; Mak 11:15-17; Luk 19:45-46)*

<sup>13</sup> Nivelu eitauaa ta nau Pasova uneira aJiu etoa ang ghe aakalakalaa, liuna avalua o me Iesu ghe saela eJerusalem.

<sup>14</sup> Ghe tarala taumattu ngatoa elome tale valavala atea tale ale manga ateva, laghe aitaaua me aipoliaa vulumakao me sipsipi me valusu. Ghe tara teela lo atoa laghe aikolikoliaa viliki veu.

<sup>15</sup> Iesu ghe ghaala uasa me ghe gheleila uip ateva, me ghe ameti velu ghoala taumattu ngatoa tale ale manga ateva, tee me kieira ghaata kkena, me ghe sau etakila uneira tevoa atoa lo atoa laghe aikolikoliaa viliki veu, me uneira viliki veu ghe kao reerekataala. <sup>16</sup> Me ghe uela ta lo atoa laghe aitaaua ghila valusu va, “Am ghaala valusu me am kasu. Am rau mene ghelei alena ateva Tamaghi va arova maketi ia.”

<sup>17</sup> Me disaepolo atoa laghe annaala sa ateva Uru ngai Manga ateva ghe aulieiniela, ghe uela va, “Aielousiaaghi tale alem ateva eramerame elome etaghi arova kura atea.”<sup>‡</sup>

<sup>18</sup> Namuu ta aJiu etoa laghe kolomila Iesu va, “Sa ateva aimatootoongana aue ugheleia tani apasunga etaimami va io ughe ghaala matuutulienu tani ghelei isaa o voto angu gheleila ghaine?”

<sup>19</sup> Iesu ghe liula me ghe uela va, “Am rruti ale manga ateva o, me aue aghatulu ta kotolu nonga nau.”

<sup>20</sup> Me aJiu etoa laghe uela va, “Ghe roola ghaatingaulu ghaonomo (46) ninamanama laghe gheleila ale manga ateva, me io aue unim gheleia ta kotolu nonga nau?” <sup>21</sup> Ta ale manga ateva Iesu ghe aaulieinia, vilikina ia. <sup>22</sup> Liuna avalua o me nau God ghe totuela tale nimate, kapuna disaepolo atoa laghe nnaala inangarina ghe auliaala, me laghe aiesoaala tale Uru ngai Manga ateva tee me inangari Iesu ghe auliaala.

**Iesu ghe kilakila eeleiaaira taumattu ngatoa**

<sup>23</sup> Nau ghe tokatoka eJerusalem tale nivelu eitaua ngateae ta nau Pasova, oroi taumattu laghe aikaaiaala ta Iesu poli laghe tarala ghe gheleila niaimatoonga. <sup>24</sup> Iesu ghe kilakila saa voto elome tale maamauluaaira, liuna avalua o me karika ghe aatoka tuutuulina etaira. <sup>25</sup> Karika teva ghe rooroo tani auliaa ta ngetana va saa taumattu ila, poli ghe kilakila urunguitaniira.

**3** Kateva taumattu, ararina atea ta ta aJiu etoa. <sup>2</sup> Kateva nau, nau ang ghe aitarrauiila, Nikodimas ghe lao sio tani tara Iesu, me ghe uela va, “Tisa, ami kilakila va God ghe sungiola tani sio apasunga voto etaimami, poli karika teva erooroo tani ghelei niaimatoonga ughelei, arova God karika etokatoka teeia.”

<sup>3</sup> Iesu ghe liula me ghe uela va, “Aghaaulia ngakoronna etam va, karika

<sup>‡</sup>2:17 Sams 69:9

teva erooroo tani kupi sso tale ararimangalina ateva God, arova karika etam lutu ppae.”

<sup>4</sup>Me Nikodimas ghe kolomila va, “Vaalua aue lo ateva taumattu ang ghe namuula emene lutu? Erooroo tani kupi sso ta kova kinna me emene lutu eghaluene?”

<sup>5</sup>Iesu ghe liula me ghe uela va, “Aghaaulia ngakoronna etam va, arova uanna tani sso tale ararimangalina ateva God, utani lutu tale manu me Spiriti eteva. <sup>6</sup>See elutulutu tale taumattu, taumattu ia, me see elutulutu tale Spiriti eteva, spiriti ia. <sup>7</sup>Urau mene soghiaa inangarighi nau aue va, ‘Am tani lutu ppae.’ <sup>8</sup>Kuukuu eteva ekuukuu ekapa see tale voto ealoanna tani lao etana. Arongona ta urooroo tani nongoa, karika ukilakila va eaa ekasukasu me eaa elao-lao. See elutu tale Spiriti eteva, ia nongina kuukuu eteva, karika teva erooroo tani tara kila.”

<sup>9</sup>Me Nikodimas ghe kolomila Iesu va, “Vaalua isaa o voto aue elutu?”

<sup>10</sup>Iesu ghe liula me ghe uela va, “Vaalua me io tau ngai apasunga ia ta eIsraeli, me karika ukilakila isaa o voto? <sup>11</sup>Aghaaulia ngakoronna etam va ami, ami kilakila sa ateva ami aulieinia poli ngami ghe tarala. Karika teva etaimim aue ealoanna voto ami auliaa. <sup>12</sup>Arova am tam aiesoa nau aghaauliaa etaimim voto oia tale kosa ateva, vaalua aue am ghele aiesoa nau aghela auliaa voto epona liu? <sup>13</sup>Karika teva ghe sae epona liu. Natuna ateva Taumattu ngateva nonga ghe kasula epona liu, me ghe sio mae tale kosa ateva. <sup>14</sup>Nongina Moses ghe avukala saela katu ngateva tale voto ateva karika righi taumattu etokatoka etana<sup>†</sup>, Natuna ateva Taumattu ngateva aue esae vukala, <sup>15</sup>tani tau lao maulue ateva etoka nau ekapa atoa ta lo atoa aue

la ghaikaafia ta Natuna ateva Taumattu ngateva.”

<sup>16</sup>Poli God ghe aielousiangaili taumattu tale kosa ateva oia, liuna avalua o me ghe tau mae sio Natuna ateva, kateva nonga ia, me see aue eaikaafia etana karika aue emate, ta aue eghaa maulue ateva etokatoka nau ekapa atoa.

<sup>17</sup>Karika va God ghe suula Natuna tani sio tale kosa ateva oia tani ghelei niaisakei ta taumattu tale kosa ateva. Ghe sungiela tani sio asaangi taumattu. <sup>18</sup>Lo ateva eaikaafia ta ngetana, karika aue eghaa sesa aipolipoli tale niaisakei, me lo ateva etam aikaafia ta ngetana aue evira ghaa sesa aipolipoli tale niaisakei, ta poli karika eaikaafia tale ararina atee Natuna ateva God. <sup>19</sup>Niaisakei eteae ia avalua toko: Mallanga ateva ghe mae sio tale kosa ateva, me taumattu ngatua la ghaloanna saurrom, me karika la ghaloanna mallanga, poli gheeleiaaira sesa. <sup>20</sup>Lo atoa taumattu la ghelei voto sesa la tam maamasiaa mallanga ateva, me karika la ghaloanna tani mae etana, poli mallanga ateva eaapasunga voto la ghelei. <sup>21</sup>Me lo atoa la tokatoka tale voto koronna, aue la lao tale mallanga ateva, poli la ghaaloanna va mene katoa taumattu la kila va voto la ghelei God eghelei taula.

### Iesu me Jon tau ngai aasuu ia

<sup>22</sup>Vara me Iesu me kapuna disae-polo atoa laghe siola eJudia, ghe toka teeilala, me ghe aasuu taumattu. <sup>23</sup>Jon tee ghe aasuu taumattu tale voto ateva la kolokolo Aenon ta ngetana, kalakalaa tale masaliki eteae eSalim, poli ia o voto ateva manu ia. Me oroi taumattu ghe mae sio ta Jon, me Jon ghe asuulala. <sup>24</sup>(Isaa o nau Herot karika ghe atoka sso Jon tale ale mata voovoo.) <sup>25</sup>Vara me kapuna disae-polo atoa Jon me kateva

<sup>†</sup>3:14 Utara Nambas 21:4-9

tana aJiu laghe tiuaala tani aissakeana tee saa tikirighi salana nisuu me nipo-rapora la usilaa nau la ghaloanna tani aimuli tee uneira lo. <sup>26</sup>Kapuna disaepolo atoa Jon laghe lao sio ta Jon me laghe uela etana va, “Tisa, taumattu ngateva ghe toka teeiola ta pai kativilau tale ateo atea eJodan me ughe aauliaa kiukiuna, ia oia ange aasuu taumattu, me ila akapa ngeila laolao ta ngetana.”

<sup>27</sup>Jon ghe liula me ghe uela va, “Karika teva taumattu eroroo tani ghaa righi voto, arova God epona liu etam anna va eghaa. <sup>28</sup>Am ghe nongoaghila nau aghe ue etaimim va, ‘Karika va aghi Mesaea ieghi. Aghi God ghe sungieghila tani muemueainia.’ <sup>29</sup>Nau taumattu ngateva esiisighaa, vause ateva lalu sighaa me ia aue vausenna ia. Me lo ateva taita euiiuitnesi, ie tee emasimasi nau enongonongo kapuna ateva esiisighaa, nongina aghi nimasimasi eteva elome etaghi namungaili ia. <sup>30</sup>Emaamasina va ararina atea esae epona, me ararighi etea esio euu.”

<sup>31</sup>Lo ateva ghe kasula epona liu me ghe sio mae, ia epona, me elaulau isaa akapa voto. Taumattuna kosa ateva oia egheelei gheeleiaa kosa ateva, me eaauliaa voto tale kosa ateva. Me lo ateva ghe kasula epona liu, ia epona tale taumattu ngakapa atoa. <sup>32</sup>Eaauliaa poi voto ghe tarala me ghe nongola, me karika teva eaiesoa inangarina. <sup>33</sup>Me lo ateva eaiesoa inangarina eaapasunga va God koronna ia. <sup>34</sup>Poli lo ateva God ghe sungiela eauliaa inangarina God, me God ghe tau lao sio Spiriti eteva etana, karika eroroo tani kapa. <sup>35</sup>Tamane eailousiaa Natuna, liuna avalua o me ghe taula isaa akapa voto ta ngetana. <sup>36</sup>Lo ateva eaikaia ta Natuna, maulue ateva aue etoka liu etana. Lo ateva etam

nongo usilainia, karika aue eghaa lo ateva o maulue, me God sessaiaane etana aue etoka nau ekapa atoa.

### Iesu me vauseni nge Sameria ngateva

**4** Iesu<sup>§</sup> ghe kilala va Paresi etoa ngeila ghe nongola va ia ang ghe ghaaghaa oroi taumattu tani asuu, me Jon karika. <sup>2</sup>Me karika va Iesu ghe aasuu, ta kapuna disaepolo atoa.

<sup>3</sup>Iesu ghe kasu vulila eJudia, me ang ghe mene laa saesae eGalili. <sup>4</sup>God ghe aloanna va eusilaa salana atikirighi esosso elome eSameria. <sup>5</sup>Ghe kasukasu elaolao me ghe rekatala tale masaliki etea la kolokoloa va Sika eSameria, kalakalangina ia tale tuku kosa ateva Jekop ghe taue lao sio ta natuna ta Josep emua arau. <sup>6</sup>Ateo kaikai etea Jekop ghe kaiela ghe asoaso tale masaliki etea Iesu ghe kasukasu elaolao etana. Vara me ang ghe maamangoo poli ghe kasula tale aluse salana, me ghe toka siola kalakalangina tale ateo kaikai etea. Ang ghe pai ngelo sinakala.\*\*

<sup>7</sup>Kateva vauseni nge Sameria ghe mae sio tani aku, me Iesu ghe uela etana va, “Aku tau mae sio righi manu, me aropi.” <sup>8</sup>(Kapuna disaepolo atoa laghe ssola elo masaliki tani poli inana.)

<sup>9</sup>Vauseni nge Sameria ngateva ghe uela etana va, “Io aJiu io me aghi vauseni nge Sameria ngaghi. Vaalua me ulooloo manu etaghi?” (Ghe auliaala llo poli aJiu etoa me aSameria ngatoka karika laghe samasama aitaaua.)

<sup>10</sup>Iesu ghe liula me ghe uela va, “Arova ughele kila masi voto God eanna tani tau aatu, me ughele kila tee lo ateva ekookolomio tani ropi, aue ughele kolomia tale llo ateo etautau mae maulue.”

<sup>11</sup>Me vause ateva ghe uela va, “Namu ngateva, karika teva unem aiakueku, me

§4:1 Iesu Kasina uru ngai laghe pitila, laghe uela va *Vau eteva*

\*\*4:6 *pai ngelo sinaka* Tale inangari nge Grik, *ghaonoma* (6) ateva aoa

ateo atea sio liuna ia, me eaa aue ulaa ghaaia lo atea ateo etau mae mauue?

<sup>12</sup>Tuvuimami eteva ta Jekop ghe kaiela ateoimami etea oia, me natuna atoa me kieira ghaata kkena atoa laghe ropiropi etana. Koti io namuu io ta Jekop, va?”

<sup>13</sup>Iesu ghe liula me ghe uela va, “Lo atoa aue la ropi tale ia oia ateo kaikai etea, aue la mene aloanna tani ropi.

<sup>14</sup>Me lo ateva eropi tale ateo atea aghi aue atauela, karika aue mene aloanna tani ropi. Lo atea ateo aue atauela aue etoka etana nonginaaili lo atea ateo enim toka akaakala me karika emati-mati, me aue etaula mauue ateva karika ekapakapa.”

<sup>15</sup>Me vause ateva ghe uela ta Iesu va, “Namu ngateva, utau mae ia o ateo atea, me auena arau mene aloanna tani ropi va amene mae aku oia.”

<sup>16</sup>Me Iesu ghe uela etana va, “Lao sio me ulaa kolo taitanim ateva, me amalu mae.”

<sup>17</sup>Me vause ateva ghe uela va, “Karika teva taitanighi.”

Me Iesu ghe uela va, “Uaulia ngakoronna va karika teva taitanim. <sup>18</sup>Poli angu ghe ghaa muela ghalima taita, me lo ateva taita utokatoka teeia karika va taitanim ia. Liuna avalua o me inangarim uauliaa koronnaaili.”

<sup>19</sup>Me vause ateva ghe uela va, “Namu ngateva, ngakilala va io propete io.

<sup>20</sup>Tuvuimami etoa la kakkaua tale ia o motouru eteva, me am aJiu etoa, am ue va masaliki nikkaua ngateae eJerusalem.”

<sup>21</sup>Iesu ghe uela etana va, “Uaiesoa inangarighi va aue kateva nau ta isaa to nau emaema karika aue am kkaua Tamaita ateva tale ia o motouru eteva me eJerusalem. <sup>22</sup>Am aSameria ngatoa, karika am kilakila see am kaakaueinia. Ami aJiu etoa, ami kilakila God ateva ami kaakaueinia, poli ta aJiu etoa aue niasaangi emae. <sup>23</sup>Me nau ie emaema

me ange rekatala va Spiriti eteva kanna ia God aue eghelei taumattu la rooroo tani kkaua God tale koronna. Tamaita ateva ealoanna va isaa o ase taumattu la kaueinia. <sup>24</sup>God spiriti ia, me lo atoa la kaakaueinia, Spirit Manga ateva ekaakatulainila tani kkaua tale voto koronna.”

<sup>25</sup>Me vause ateva ghe uela va, “Aki-lakila va Mesaea ngateva aue emae (la kolokoloa va Karisto etana). Nau emae aue eaulia ngamasinaaili ekapa voto etaimami.”

<sup>26</sup>Me Iesu ghe uela etana va, “Aghi oia asamasama, aghi oia taumattu ngateva uaaulieinia.”

<sup>27</sup>Isaa o nau me kapuna disaepolo atoa ngila ghe kiriaala, me laghe soghi-aala tani tara Iesu ghe samasama tee vause ateva. Me karika teva ghe kookolomia va, “Sa ateva ualoannaia?” me, “Vaalua me usamasama teeia?”

<sup>28</sup>Vause ateva ghe velu etokala ateaon aikaai manu eteva, me ghe ilou ssola tale masaliki etea, me ghe uela ta taumattu ngatoa va, <sup>29</sup>“Am mae sio, me am laa tara taumattu ngateva, eaulia ngakapala voto aghelei. Koti ia Mesaea ia?”

<sup>30</sup>Taumattu ngatoa tale masaliki etea laghe lao sio tani taraia.

<sup>31</sup>Nau isaa o voto ghe lutulutu, me kapuna disaepolo atoa Iesu laghe ue etana va, “Tisa, namanamala mua.”

<sup>32</sup>Iesu ghe liula me ghe uela etaira va, “Aneghi tani inana karika am kilakila.”

<sup>33</sup>Disaepolo atoa laghe tiuaala tani aikolomieinila va, “Teva taumattu emae sio tani anginia?”

<sup>34</sup>Iesu ghe uela etaira va, “Inana anamanama nau aghelei uunguaane lo ateva ghe sungieghila, me tani ruu isaa o niuungu ghe uela va aghelei. <sup>35</sup>Am roo tani ue va, ‘Kasi ghaata ulana me ita laa ghaa inana tale utana atingiu.’ Aghaauliaa etaimim va am taatara sso, me am tara utana atingiu ang ghele matuela,

me ang ghele roola tani ghaa inanina. <sup>36</sup>Lo ateva taumattu euungu tani ghaa inana tapaa ngutana eghaaghaa arau aipolina, me eghaaghaa aitaaua inana aue etoka nau ekapa atoa. Liuna avalua o me lo ateva epasapasa inana me lo ateva eghaaghaa, ilalua akapa lalu masimasi. <sup>37</sup>Koronnaaili ia tuku inangari eteva eue va, 'Kateva epasapasa, me mene kateva emukemuke.' <sup>38</sup>Ngasungisungiem tani laa ghaa inana tale utana atingiu, katoa ppae ghe matela uunguairi etana, me am, am ghe nim ssola tani ghelei eru uunguairi."

<sup>39</sup>Oroi taumattu nge Sameria tale ia o masaliki erighi laghe aikaaiaala ta Iesu poli vause ateva ghe uela va, "Ia oia taumattu ngateva eaulia ngakapala voto agheelei." <sup>40</sup>Laghe lao sio tani kolomi esarasarakana Iesu va emene toka teeila mua. Liuna avalua o me Iesu ghe mene toka teeilala ghalua nau. <sup>41</sup>Ghe mene oroila taumattu nge Sameria ghe aikaaiaala ta Iesu poli inangarina laghe nongola.

<sup>42</sup>Me laghe ue ta vause ateva va, "Karika va ami aikaaia ta Iesu poli isaa o inangari uauliaala etaimami. Ami tee ngami nongoala, me ngami kilala va ia aue easaangi taumattu ngatoa tale kosa ateva."

### **Iesu ghe ghelei emasinala natuna taita arighi kateva namuu**

*(Mat 8:5-13; Luk 7:1-10)*

<sup>43</sup>Iesu ghe toka teela aSameria ngatoga ghalua nau, me ghe kasu vulilala tani mene sae eGalili. <sup>44</sup>Iesu ghe auliaala va, propete ateva, la oneoneainia tale kasina ppae masaliki, me tanganuena karika. <sup>45</sup>Liuna avalua o, nau ghe saela eGalili, laghe masimasila va etoka teeila, poli ila tee laghe saela tale nivelu eitaua ngateae

eJerusalem, me laghe tarala voto Iesu ghe gheleila.

<sup>46</sup>Nau ia eGalili, Iesu ghe mene lao sio eKena, masaliki eteae ghe gheleila manu ghe uae nila. EKapenium, kateva namuu, kapuna tau ngai uungu ia kingi, natuna taita arighi ghe iisiki. <sup>47</sup>Nau eteva ghe nongola va Iesu ang ghe kasula eJudia me ang ghe rekatala eGalili, ghe lao sio tani tara Iesu, me tani koloa va esio ghelei emasina natuna, poli ang ghe ainasiaa tani mate.

<sup>48</sup>Iesu ghe uela etana va, "Karika am rooro tani aikaaia, arova am tam tara niaimatoonga."

<sup>49</sup>Me taumattu ngateva ghe uela va, "Namu ngateva, italu sio tara parasi natughu, me erau mate."

<sup>50</sup>Me Iesu ghe uela etana va, "Natum aue etoka. Kasula, me ulaa taraia."

Namu ngateva ghe aiesoala inangarina Iesu, me ghe kasula. <sup>51</sup>Karika ghe rekata eKapenium, me kapuna tau ngai uungu etoa laghe sousouela tapaa salana tani auliaa etana va natuna ang ghe masinala. <sup>52</sup>Me ghe kolomilala va lovisa ghe masinala, me laghe uela va, "Ghalaillo ta 1 kilok<sup>††</sup> aanasa ateva ghele kapala."

<sup>53</sup>Me tamane ghe kilala va ia o nau eteva ghalaillo Iesu ghele uela va, "Natum aue etoka." Taumattu ngateva me lo atoa elome tale paa ngalena ateva, laghe aiesoala ta Iesu.

<sup>54</sup>Aiaaghaluene ateva o niaimatoon-gana Iesu ghe gheleila nau ghe kasula eJudia me ghe saela eGalili.

### **Iesu ghe ghelei emasinala tangorengorena ateva**

**5** Kasina nau ang ghe lao sio me Iesu ghe saela eJerusalem tale mene kateva uneira nivelu eitaua aJiu etoa. <sup>2</sup>EJerusalem kateae atamana

<sup>††</sup>4:52 **1 kilok** Tale inangari Grik, *ghaituna (7) ateva aoa*

laghe aseasea va Atamani Sipsipi ia. Kalakalaa tale atamana atea, ateo talia ngateae taumattu ngatoa laghe kaiela ghe asoaso, ghalima varandaane, me ta samasamaaira albru etoa laghe aseasea va Betesda.<sup>‡‡</sup> <sup>3-4</sup>Oroi tau sessa ghe asoaso akalakalaa tale ia o ateo talia ngateae, katoa mata salusalu ila me katoa tapakase ila me katoa vilikiira matena.<sup>¶</sup> <sup>5</sup>Kateva taumattu ghe tangorengorela kotolungaulu ghaoaluae (38) ninamanama, ie tee ghe asoaso akalakalaa tale ateo talia ngateae. <sup>6</sup>Iesu ghe tarala ia o taumattu ngateva ghe asoaso, ghe kilala va ang ghe tangorengorela oroi ninamanama, me ghe uela etana va, “Ualoanna tani masina?”

<sup>7</sup>Tangorengorena ateva ghe liula me ghe uela ta Iesu va, “Namu ngateva, karika teva tani saueghi, me elaa sau velueghi sio tale ateo talia ngateae nau eaisiisia. Vara atootoonga, me karika arooroo, ta mene katoa ppae taumattu la siosio akasina.”

<sup>8</sup>Iesu ghe uela etana va, “Tingina saela, usau komom, me ukasu.” <sup>9</sup>Gharavaeaata ta taumattu ngateva ghe masinala, ghe saula komona, me ghe tiuaala tani kasu.

Isaa o voto ghe lutula tale nau manga ateva. <sup>10</sup>Liuna avalua o me nau aJiu etoa laghe tarala ia o taumattu ngateva ghe masinala, me laghe uela etana va, “Ghaine nau manga ateva. Karika masina tani sau komom etana.”

<sup>11</sup>Ghe liula me ghe uela va, “Lo ateva taumattu eghelei emasinaieghila, euela va asau komoghu me akasu.”

<sup>12</sup>Me laghe kolomiela va, “See ia taumattu ngateva euela etam va usau komom me ukasu?”

<sup>13</sup>Taumattu ngateva ghe masinala karika ghe kilala va see ghe ghelei emasinaiea, poli oroiannaaili taumattu, me Iesu ang ghe aisavisavilainiela elome tale taumattu ngatoa.

<sup>14</sup>Emulina Iesu ghe ssola tale ale manga ateva, me ghe paela me ghe tarala taumattu ngateva. Me ghe uela etana va, “Tarala, angughe masinala. Isaa oio nau urau nim ghelei ssavoto va llo sesaaili emene lutu ta ngetam.”

<sup>15</sup>Ghe lao sio me ghe laa ghauliaa sio ta aJiu etoa va Iesu ghe ghelei emasinaiea.

<sup>16</sup>Liuna avalua o me aJiu etoa laghe tiuaala tani ghelei voto sesaaili ta Iesu, poli ghe ghelei isaa o voto tale nau manga ateva. <sup>17</sup>Iesu ghe uela va, “Tamaghi euungu me karika ghe ruu, me aghi tee auungu.” <sup>18</sup>AJiu etoa laghe aloannaaili tani uvi emate Iesu, poli karika va ghe ghelei laelaeaa nonga nau manga ateva, me poli ghe ue tee va Tamane ta God, ghe gheleia va lalu ghe airoaa me God.

### Natuna ateva God namuu ia, me ie tee erooroo tani ghelei niungu

<sup>19</sup>Iesu ghe uela ta aJiu etoa va, “Aghaaulia ngakoronna etaimim va Natuna ateva God karika erooroo tani ghelei voto ta nannaane, ta eghelei nonga voto etaatara ta Tamane eghelei. Isaa akapa voto Tamane eghelei, Natuna tee ateva eghelei. <sup>20</sup>Tamana eaaielousia Natuna, liuna avalua o me isaa akapa voto eghelei, eaapasunga etana. Me ealoanna va

<sup>‡‡</sup>5:2 *Betsda* Kasina uru ngai laghe pitila, laghe uela va, *Betsata*, me kasina laghe ue va, *Betsaida*

<sup>¶</sup>5:3-4 Kasina uru ngai nau laghe pitila, laghe ue teela va, *laghe toitoi nau manu eteva ghe aisiisia*. 4 Kasina nau kapuna ensolo ateva *Vau ngepona ateva ghe siosio, ghe aisiisia manu eteva, me lo ateva ghe siosio akasina tale ateo talia ngateae, nau ghe aisiisia, arova saa ase isiki etana, ghe maamasina*.

am soghiala, liuna avalua o me aue mene apasunga taula mene kasina paka voto. <sup>21</sup>Nongina Tamane etottotu taumattu matena, me etautau lao maulue etaira, Natuna tee etautau lao maulue ta taumattu tale aloaloannaane. <sup>22</sup>Tamane karika eghelei niaisakei ta teva taumattu. Ghe taula ta Natuna va ie nonga eghelei niaisakei tale isaa akapa taumattu. <sup>23</sup>Liuna avalua o me taumattu ngakapa atoa aue la tau sae ararina atea Natuna ateva God, nongina la tautau sae ararina atea Tamane. Lo ateva etam tautau sae ararina atea Natuna, karika etautau sae ararina atea Tamane, ia ghe sungiela.

<sup>24</sup>“Aghaaulia ngakoronna etaimim va lo ateva enongo inangarighi, me eaikaia ta lo ateva ghe sungieghila va asio, maamauluaane aue etoka amasina nau ekapa atoa, me karika aue eghaa sesa aipolipoli tale niaisakei, poli ang ghe kasu vulila nimate, me ang ghe tokala tale maulue. <sup>25</sup>Aghaaulia ngakoronna etaimim va aue kateva nau, me nau eteva oia ange rekatala, lo atoa taumattu laghe matela, aue la nongo lingi ngalona ateva Natuna ateva God, me lo atoa taumattu la nongoa, aue la ghaa maulue. <sup>26</sup>Maulue ateva etokatoka ta Tamane, me ghe tauela ta Natuna, me maulue ateva etokatoka tee ta Natuna. <sup>27</sup>Tamane ghe avauvauela me ghe tau lao sio niuungu tani ghelei niaisakei tale taumattu, poli Natuna ia Taumattu ngateva.

<sup>28</sup>“Am rau mene nnangaili inangari oio aghaaulia, poli aue nau to emae-mae lo atoa taumattu la asoaso tale liu, aue la nongo lingi ngalona ateva Natuna ateva Taumattu ngateva, <sup>29</sup>me aue la totu tale liu. Lo atoa laghe ghelei masi voto, aue la totu me la ghaa maulue, me lo atoa laghe ghelei sesa voto, aue la totu me la ghaa sesa aipolipoli. <sup>30</sup>Karika

arooroo tani ghelei voto tale aloaloannaaghi. Aghaaimuli tee inangarina lo ateva ghe sungieghila. Me ia eaaulia tau mae vaalua aghelei niaisakei. Niaisakei aghelei ghulughuluena, poli karika aghaimuli tee nannaaghi.”

### **Mene katoa laghe aulia ngaotu tee va Iesu saa taumattu ia**

<sup>31</sup>Iesu ghe mene uela va, “Arova aghi nonga aghaaulia ngaotu uunguaaghi me eeleiaaghi, taumattu ngatoa la rau mene aiesoa inangarighi aghaaulia. <sup>32</sup>Mene kateva tee eaaulia ngaotu uunguaaghi me eeleiaaghi, me akilakila va voto eaauliaa koronna.

<sup>33</sup>“Am ghe suula taumattu tani laa kolomi Jon, me Jon ghe auliaala voto koronna etaira. <sup>34</sup>Aghi karika atuutuli inangariira taumattu ngatoa, mausina me aghaaulia inangari oia poli aghaaloanna va am saanga. <sup>35</sup>Jon nongina lama atea eramerame me emaamallanga, me am ghe masimasi tani ghaa isaa o mallanga, vara karika masau me ngam ghe maamangoo.

<sup>36</sup>“Isaa o voto Jon ghe auliaala eima-toonga mae etaghi, me karika erooroo tale voto isaa oia nau aghelei. Isaa akapa o niuungu, Tamaghi ghe tau mae sio va aghelei me aruu. Isaa o niuungu aghelei eaaulia ngaotu ta taumattu ngatoa va Tamaghi ghe sungieghila tani sio oia. <sup>37</sup>Tamaghi, ia o ghe sungieghila tani sio, ie tee eaaulia ngaotueghi. Am karika am ghe nongo poi lingi ngalona ateva, me karika am ghe tara taataraane, <sup>38</sup>me inangarina tee karika elome tale maamauluaaimim, poli karika am aiesoa tale taumattu ngateva ghe sungiela, me ghe sio mae oia. <sup>39</sup>Am annaa va inangari tale Uru ngai Manga ateva aue etau aatu maulue, liuna avalua o me am paepae me am ritiritia. Me Uru ngai Manga ateva eaaulieinaghi, <sup>40</sup>me karika

am aloanna tani mae etaghi va am ghaa maule.

<sup>41</sup>“Karika aghanna va taumattu ngatoa la arueinaghi. <sup>42</sup>Akilakilaiem va aielousiaane ateva God karika ia etaimim. <sup>43</sup>Aghe sio mae ta ararina atea Tamaghi, me karika am anna inangarighi, me arova teva ghele mae tale aloannaane, arovaeata ta aue am ghele anna tani nongo inangarina. <sup>44</sup>Vaalua aue am aikaia? Poli am anna nonga va kapuimim atoa la arueinam, me karika am anna niarua God nonga erooro tani tau aatu.

<sup>45</sup>“Karika am mene nnaa va aghi aue aghauliaa eeleiaimim sesa ta Tamaghi. Ia o Moses am anna va aue esausiem, ia aue eauliaa sesa gheeleiaimim. <sup>46</sup>Arova am ghele aiesoa tale inangarina Moses, aue am ghele aiesoa tee tale inangarighi, poli inangari ghe pitila eaaulieinaghi. <sup>47</sup>Arova karika am aiesoa tale inangari ghe pitila, vaalua aue am aiesoa inangarighi?”

### Iesu ghe anginila 5,000 taumattu

(*Mat 14:13-21; Mak 6:30-44; Luk 9:10-17*)

**6** Vara me Iesu ghe mene lao sio ta pai kativilau tale ateo talia ngateae eGalili, mene kateae ararina ta Taiberias. <sup>2</sup>Oroiannaaili taumattu ghe usiela, poli laghe taraiela ghe gheleila naimatoonga tani ghelei emasina tau sessa atoa. <sup>3</sup>Iesu ghe saela tale motouru tani toka tee kapuna disaepolo atoa. <sup>4</sup>Pasova ngateva, nivelu eitauaa ia ta Jiu etoa, ang ghe aakalakalaa.

<sup>5</sup>Nau Iesu ghe atangarola me ghe tarala taumattu ngatoa laghe maemae etana, me ghe uela ta Pilip va, “Eaa ita laa ghaa verete me ita angini isaa oia taumattu?” <sup>6</sup>Ghe auliaala isaa o voto

tani tootonga unna niaikaia Pilip, me Iesu ang ghe kila vella sa ateva aue egheleia.

<sup>7</sup>Pilip ghe uela va, “Arova ita ghele poli verete ta ghalua ai (200) silva koen,<sup>§§</sup> karika aue ghele roo. Marova ita ghele taula tuku gharighi tuku gharighi ta kateva taumattu, karika aue ghele roo akapa etaira.”

<sup>8</sup>Kateva kapuna disaepolo, Andru etana, tue me nengailalua me Saemon Pita, ghe uela ta Iesu va, <sup>9</sup>“Kateva aliki oia anna bali verete ghalima me anna kko ghalua. Me karika aue eroo tani sausi tani angini ekapa taumattu oia oroiannaaili.”

<sup>10</sup>Iesu ghe uela ta kapuna disaepolo atoa va la ghauliaa ta taumattu ngatoa me la toka sio. Oroinnaaili rarrasa etana ia o voto ateva, me oroi tee taita atoa, ghe rooro ghalima airari (5,000).

<sup>11</sup>Nau laghe toka siola, Iesu ghe ghaala verete, me ghe kaili emasina saela ta God, me ghe taula ta kapuna disaepolo atoa va la laa ghaikoita. Ghe ghelei evaalue teela o tale kko. Me ila akapa laghe roola tale inana.

<sup>12</sup>Nau ghe ssoilala tani namanama, Iesu ghe uela ta kapuna disaepolo atoa va la kaai eitauaa tapiri nginana, me erau nim vulla nonga. <sup>13</sup>Disaepolo atoa laghe ghaa aisokosokoiaala tapiri nginana laghe nama vulla tale verete ghalima, me laghe kaaila kasangaulu ghaluae (12) laka isaa o inana ghe oghila ta ghe ssoilala.

<sup>14</sup>Taumattu ngatoa laghe tarala isaa o naimatoonga Iesu ghe gheleila, me laghe ue va, “Koronna, ia propete ateva laghe uela va aue emae tale kosa ateva oia.”\* <sup>15</sup>Iesu ghe kilala va laghe anna tani gheleia va ghe kapuira kingi ia, me karika aloannaane Iesu. Liuna avalua o

§§6:7 *silva koen* Silva koen ativilau (denarius) aipolina kateva nau.

\*6:14 Utara Diuteronomi 18:15-19



me ghe kasu vulilala, me ie nonga ghe saela tale motouru.

### Iesu ghe kasula epona tale manu

(Mat 14:22-27; Mak 6:45-54)

<sup>16</sup>Pai ngelo alai, kapuna disaepolo atoa Iesu laghe siola elamana tale ateo talia ngateae. <sup>17</sup>Laghe aikaaila tale paanaka ateva, me laghe tiuaala tani ose tani lao eKapenium. Ang ghe aaitar-raui me Iesu ghe tam laa rekata etaira. <sup>18</sup>Kuukuu eteva ghe tiuaala, me tiasi eteva ghe lutula tale paamanu eteva. <sup>19</sup>Nau ta disaepolo atoa laghe osela ghe roola 5–6 kilomita<sup>†</sup> me laghe tarala Iesu ghe kasukasu epona tale paamanu eteva. Ghe kasukasu emaemae etaira me ngeila ghe maamatautu etingina. <sup>20</sup>Me Iesu ghe uela etaira va, “Aghi oia. Am rau mene matautu.” <sup>21</sup>Me disaepolo atoa laghe vira mene masimasila tani kaaia, me arovaeaata ta paanaka ateva ghe ssola elae nongina eaa laghe aloanna tani lao.

### Taumattu ngatoa laghe paepae Iesu

<sup>22</sup>Vara ghe paila ta mene kateva nau, me taumattu ngatoa elamana ta pai nge sinaka sae tale ateo talia ngateae laghe kilala va ghalailo kateva nonga paanaka ghe vuuvukala, me nau disaepolo atoa laghe aikaaila, Iesu ghe tam aikaai teeilala. <sup>23</sup>Mene katoa tani paanaka nge Taiberias laghe mae sio nongina Iesu ghe kaili emasinala tale verete me laghe namala. <sup>24</sup>Taumattu ngatoa laghe tarala va Iesu me kapuna disaepolo atoa karika ila, liuna avalua o me laghe aikaaila tale isaa o paanaka me laghe lao sio eKapenium tani pae Iesu.

### Iesu verete maulue ia

<sup>25</sup>Laghe laa rekata sio tale pai kativilau tale ateo talia ngateae, me laghe tarala Iesu, me laghe kolomiela va, “Tisa, lovisaa umae sio oia?”

<sup>26</sup>Iesu ghe liula me ghe uela etaira va, “Aghaaulia ngakoronna etaimim va karika am paepaeaghi poli am taatara naimatoonga agheeleei, ta nim mausi inana am namanama me esossoiem. Liuna avalua o me am paepaeaghi. <sup>27</sup>Am rau mene uungu tani ghaa llo inana esessa. Am uungu tani ghaa lo ateva inana etautau aatu maulue etokatoka liu, Natuna ateva Taumattu ngateva aue etau aatu ia o inana ateva, poli Tamane ta God ghe anamunamungainiela tani gheleei isaa o voto.”

<sup>28</sup>Vara me laghe uela etana va, “Saa righi voto ami gheleei, me aue ami roo tani gheleei niuungu God ealoanna?”

<sup>29</sup>Me Iesu ghe liula me ghe uela etaira va, “Kateva nonga niuungu God ealoannaia, va am aikaaila tale taumattu ngateva God ghe sungiela tani mae.”

<sup>30</sup>Liuna avalua o me laghe mene uela va, “Sa ateva naimatoonga aue ugheleei me aue ami tara, me ami aikaaila ta ngetam? Me saa niuungu aue ugheleei?”

<sup>31</sup>Nongina tuvumami etoa, nau ila tale voto ateva karika righi taumattu etokatoka etana, laghe namanama mena, nongina Uru ngai Manga ateva eue va, ‘Moses ghe tau lao sio inana ngepona liu eteva va la namaia.’”<sup>‡</sup>

<sup>32</sup>Liuna avalua o me Iesu ghe uela etaira va, “Aghaaulia ngakoronna etaimim va karika va Moses ghe tau aatu sio isaa o verete ngepona liu. Tamaghi nonga etautau aatu lo ateva verete ngepona liu koronna ia. <sup>33</sup>Lo ateva verete God etautauela, ia o

<sup>†</sup>6:19 5-6 kilomita Tale inangari nge Grik, 25 o 30 stadia.

<sup>‡</sup>6:31 Sams 78:24

taumattu ngateva ghe kasula epona liu tani tau lao maulue tale taumattu tale kosa ateva.”

<sup>34</sup> Me laghe uela etana va, “Namu ngateva, utau mae ia o verete ateva tale nau ekapa atoa.”

<sup>35</sup> Iesu ghe liula me ghe uela va, “Aghi ia o verete ateva etautaula maulue. Lo ateva emae etaghi, karika aue emaloo, me lo ateva eaikaaia etaghi, karika aue eanna tani mene ropi. <sup>36</sup> Ngaghe auli-aala etaimim me ngam ghe taraieghila, me karika am aikaia etaghi. <sup>37</sup> Isaa akapa taumattu Tamaghi etautau mae etaghi, aue la mae etaghi, me karika poi arooroo tani sungi velu teva. <sup>38</sup> Karika aghe kasula epona liu tani sio ghelei nannaaghi. Aghe sio mae tani ghelei nannaane lo ateva ghe sungieghila. <sup>39</sup> Nannaane lo ateva ghe sungieghila va karika teva ta lo atoa ghe taula mae sio etaghi emene raua. Eanna va atotula, me la ghaa maulue nau airuuruu tale kosa ateva. <sup>40</sup> Aloannaane Tamaghi va ila akapa lo atoa la tara Natuna me la ghaikaaia etana, la ghaa maulue ateva etokatoka nau ekapa atoa me aghi aue atotula me la ghaa maulue tale airuuruu tale kosa ateva.”

<sup>41</sup> Vara me aJiu etoa laghe tiuaala tani olueinia tale inangari, poli Iesu ghe uela va, “Aghi verete ateva ghe kasula epona liu.” <sup>42</sup> Laghe ue va, “Taumattu ngateva oia Iesu etana, natuna ia Josep, ami kilakila tamana me kinna, vaalua me eue va ghe kasula epona liu?”

<sup>43</sup> Iesu ghe uela etaira va, “Am rau mene olueinaghi. <sup>44</sup> Karika teva erooroo tani mae etaghi arova Tamaghi, ia o ghe sungieghila, etam gheleia tani mae etaghi. Me arova teva emae etaghi, aghi aue atotua, me eghaa maulue tale airuuruu eteva nau. <sup>45</sup> Kateva propet ghe pitila ghe uela va, ‘God aue eapasunga

voto tale isaa akapa taumattu.”<sup>¶</sup> Liuna avalua o me lo atoa la nongonongo usilaa Tamaghi me la ghaaghaa alo-masaanga etana, aue la mae etaghi. <sup>46</sup> Karika mene teva taumattu ghe tarala Tamaghi, ta llo nonga ateva ghe tokatoka teeia, me ghe sio mae. Nim ie nonga, me mene karika teva. <sup>47</sup> Aghaaulia ngakoronna etaimim va lo ateva eaikaaia etaghi, maulue ateva etokatoka etana. <sup>48</sup> Aghi verete ateva etautau maulue ateva. <sup>49</sup> Tuvuimim atoa laghe namala mena tale voto ateva karika rigi taumattu etokatoka etana, vara me laghe matela. <sup>50</sup> Me lo ateva verete ghe kasula epona liu me ghe sio mae, lo ateva enamaia, karika aue emate. <sup>51</sup> Aghi verete maulue ieghi, aghe kasula epona liu. Lo ateva enama ia o verete ateva aue etoka nau ekapa atoa. Me ia o verete ateva aue atauela, malataughu eteva. Aghe taue lao sio tale taumattu tale kosa ateva oia, me aue la roo tani ghaa maulue.”

<sup>52</sup> Nau eteva aJiu etoa laghe nongola isaa o inangarina, ghe sessailala, me laghe ue va, “Vaalua aue etau mae malatauna, me ita nama?”

<sup>53</sup> Iesu ghe liula me ghe uela etaira va, “Aghaaulia ngakoronna etaimim va karika am rooroo tani ghaa maulue, arova am tam nama malatauna Natuna ateva Taumattu ngateva, me am tam ropi raena ateva. <sup>54</sup> Lo ateva taumattu enama malataughu, me eropi raeghi eteva, aue eghaa maulue ateva tokatoka liu ia, me aue atotua, me eghaa maulue tale airuuruu tale kosa ateva. <sup>55</sup> Poli malataughu eteva inana tuungia, me raeghi eteva ateo tuungia. <sup>56</sup> Lo ateva enama malataughu, me eropi raeghi, etokatoka teeieghi, me aghi atokatoka teeia. <sup>57</sup> Tamaghi, aita maulue ia, ghe sungieghila tani sio, me atokatoka poli Tamaghi etautau mae maulue. Liuna

<sup>¶</sup>6:45 Aisaea 54:13

avalua o me lo ateva enamaieghi, mausighi me aue eghaa maulue.<sup>58</sup> Lo ateva o verete ghe kasula epona liu karika nongina lo ateva verete tuvuumim atoa laghe namaiela, me ngeila ghe matela. See enama lo ateva oia verete aue etoka nau ekapa atoa.”<sup>59</sup> Isaa o inangari Iesu ghe aauliaa me ghe aapasunga tale aleira nivelu eitauaa aJiu etoa eKapenium.

### Inangari maulue ateva

<sup>60</sup> Oroil ila lo atoa disaepolo laghe nongola me laghe uela va, “See aue enongo, poli aanasaaili inangari eauliaa?”

<sup>61</sup> Iesu ghe kilala sa ateva kapuna disaepolo atoa laghe annainia, liuna avalua o me ghe kolomilala va, “Vaalua me isaa o inangari ange ghelei saasakiaala aikaiaaimim?”<sup>62</sup> Vaalua ta arova am ghele tara Natuna ateva Taumattu ngateva ghele sae nongina ghe kasula?<sup>63</sup> Spirit Manga nonga ateva etautau lao maulue tale taumattu. Sarasarakaniana taumattu karika aue eghelei righi llo. Isaa o inangari aghaauliaa etaimim ekasukasu tale Spirit Manga ateva, me etautau aatu maulue ateva.<sup>64</sup> Me katoa etaimim karika am aikaiaa.” (Iesu ghe auliaa llo poli ang ghe kila vella va see karika aue aikaiaa etana, me ang ghe kila teela see aue etaue lao ta nimaira tau ngai ssateena atoa.)<sup>65</sup> Me Iesu ghe uela etaira va, “Mausina avalua o me aghaauliaa etaimim, va karika teva erooroo tani mae etaghi, arova Tamaghi etam gheleia tani mae.”

<sup>66</sup> Poli isaa o inangarina Iesu ghe auliaa me oroi kapuna disaepolo laghe liliu viliira ta Iesu, me laghe ruula tani usia.

<sup>67</sup> Iesu ghe kolomila kapuna kasangaulu ghalua (12) disaepolo va, “Am tee am aloanna tani kasu vulieghi?”

<sup>68</sup> Saemon Pita ghe liula me ghe uela va, “Vau eteva, ami mene lao ta see? Poli inangarim nonga ateva etautau lao maulue ateva etokatoka liu ia.”<sup>69</sup> Ami aikaiaa etam, me ami kilakilaaili va io taumattu ngateva manga ia kapuna ia God.”

<sup>70</sup> Iesu ghe liula me ghe uela va, “Am oia kasangaulu ghalue iem aghe koloamla, me kateva etaimim nongina raroai eteva!”<sup>71</sup> Iesu ghe auliaa Judas, natuna ia Saemon Iskariot, ie tee elome ta kasangaulu ghalua kapuna disaepolo, me ia aue etau lao Iesu ta tau ngai ssateena atoa.

### Nengane atoa Iesu karika laghe aiesoa etana

**7** Vara me Iesu ghe kasu seela eGalili, me karika ghe aloanna tani sae eJiudia, poli aJiu etoa laghe anna tani uvi ematea.<sup>2</sup> Nau ang ghe aakalakalaa tani velu eitauaa me aJiu etoa laghe ghelei lutu ale kamekame.<sup>3</sup> Nengane atoa Iesu laghe ue etana va, “Kasula me usae eJiudia, me kapum disaepolo atoa aue la tara uunguaam ughelei.<sup>4</sup> Lo ateva eanna va taumattu ngatoa la kilaa karika eaisulia va eghelei voto. Liuna avalua o me emasina va ugheleia tale tummata-vanga me kosa akapa ateva aue ekilaio.”<sup>5</sup> Nengane atoa laghe aulia ngavaluela o, poli ila tee karika laghe aikaiaa ta Iesu.

<sup>6</sup> Iesu ghe uela etaira va, “Naughu karika ghe mae. Am nauimim etokatoka arau.<sup>7</sup> Taumattu tale kosa ateva oio karika aue la ssa teeiem. Aue esesaila nonga etaghi, poli aghaulia ngaotu eeleeiaa karika masina.<sup>8</sup> Am saela tale nivelu eitaua ngateae. Karika aue asae poli naughu karika ghe mae.”<sup>9</sup> Ghe auliaa isaa o inangari, me ghe tokala eGalili.

**§7:2 ale kamekame** AJiu etoa laghe ghelei lutu ale kamekame tani aso etana tani nnaa vaalua tuvuiira atoa laghe tokatoka nau laghe kasukasu tee Moses. Utara Levitikas 23:33-43.

**Iesu ghe lao sio tale nivelu  
eitaua ngateae nau la ghe  
ghelei ale kamekame**

<sup>10</sup> Vara nengana atoa laghe kasula tani sae tale nivelu eitaua ngateae, me Iesu ghe vira aimulila. Kasukasuaane karika toa laghe kilaiela, ghe nim kasu einaola tani sae. <sup>11</sup> Tale ia o nivelu eitaua ngateae, namuu ta aJiu etoa ngila ghe paepae Iesu, me laghe aikolomainie see va, “Eaa ia?”

<sup>12</sup> Ta polina me taumattu ngatoa ngila ghe auliuluieinia. Katoa laghe ue va, “Iesu masi taumattu ia.” Me katoa laghe ue va, “Enim kamekame taumattu ngatoa.” <sup>13</sup> Karika teva ghe auliaa isaa o inangari ta mata ngoroi etoa, poli laghe maamatauta kapuira namu ngatoa aJiu etoa.

<sup>14</sup> Laghe ghaa longotila tale ia o nivelu eitaua ngateae, me Iesu ghe tiuaala tani apasunga voto ta taumattu ngatoa tale rum eleka atiulu tale ale manga ateva. <sup>15</sup> Namuu ta aJiu etoa laghe soghiaala tani nongoa, me laghe ue va, “Vaalua me ekilakila oroi voto nau karika teva ghe apasungala etana?”

<sup>16</sup> Iesu ghe liula me ghe uela va, “Karika aghaapasunga nim nannaaghi. Voto aghaapasunga kanna lo ateva ghe sungieghila. <sup>17</sup> Arova teva eannaaili tani aimuli tee aloannaane God, aue ghele kila va voto aghaapasunga ekasukasu ta God, me karika va nim kalughu. <sup>18</sup> Lo ateva taumattu eauliaa nannaane enim aloanna tani ghelei ararina atea, me lo ateva ealoanna tani tau sae ararina atea lo ateva ghe sungiela, voto eauliaa koronna, karika kamena. <sup>19</sup> Moses ghe tau aatu sio inangari nipaopao etaimim, me karika teva etaimim eaaimuli tee. Mause saa me am anna tani uvi emateaghi?”

<sup>20</sup> Taumattu ngatoa laghe ue etana va, “Raroai eteva etam. See eanna tani uvio?”

<sup>21</sup> Iesu ghe liula me ghe uela va, “Aghe gheleila kateva voto, me am ghe soghieiniela. <sup>22</sup> Moses ghe uela etaimim va am iso natuimim taita atoa (karika va tani Moses ghe auliaala, ta tuvuumim atoa). Me am isoisoila tale nau manga ateva. <sup>23</sup> Arova am rooroo tani iso aliki eteva tale nau manga ateva, tani nongo usilaa lo kanna Moses ghe auliaala, o vaalua esessaiem etaghi, poli aghe ghelei emasina akapala vilikina taumattu ngateva tee tale nau manga ateva? <sup>24</sup> Am rau mene auliaa gheeleia taumattu tale taataraimim, am ghelei ni-aisakei tale ghulughuluena salana.”

**Taumattu ngatoa laghe anna tani  
kila va Iesu tani saa taumattu ia**

<sup>25</sup> Katoa tana taumattu nge Jerusalem laghe ue va, “Ia oia taumattu ngateva la paepaea tani uviala? <sup>26</sup> Tarala, epoppooaa ta mata ngoroi etoa, me karika la ghelei righe voto etana. Koti namu ngatoa la kilakila va ia Mesaea ia. <sup>27</sup> Me iekai ita kilakila tanguena, me Mesaea ngateva, karika aue ita kila va eaa tanguena.”

<sup>28</sup> Iesu ghe aapasunga tale ale manga ateva, me ghe sama anamungailila, me ghe uela va, “Am anna vara am kilakilaieghi, me vara am kilakila tanguenaghi. Aghi karika aghe mae sio tale aloannaaghi. Lo ateva ghe sungieghila koronna ia, me am, karika am kilakilaia. <sup>29</sup> Aghi akilakilaia, poli aghe tokatoka teeia, me ghe sungieghila tani sio.”

<sup>30</sup> Katoa taumattu laghe anna tani kuneia, me karika laghe roola tani kuneia, poli nauna karika ghe mae. <sup>31</sup> Oroi taumattu ghe aikaaiala etana, me laghe ue va, “Arova Mesaea ngateva esio, koti voto aue eghelei aue elau llo ia oia taumattu ngateva eghelei?”

### Laghe suula polisi etoa tani mae kune Iesu

<sup>32</sup> Nau Paresi etoa laghe nongola taumattu ngatoa laghe aissakeana, laghe lao sio tani tara namuu ta pristi etoa, ila me namuu ta pristi etoa laghe suula polisi etoa tani laa kune Iesu.

<sup>33</sup> Me Iesu ghe uela etaira va, “Karika oroi nau aue atoka teeiem, me amene kasu tani sae ta lo ateva ghe sungieghila. <sup>34</sup> Aue am pae poieghi, me karika aue am taraieghi, poli voto ateva alao etana am karika am rooroo tani lao etana.”

<sup>35</sup> Taumattu nge Jiu etoa laghe tiuaala tani aikolomieinila va, “Eaa aue elao me karika aue ita taraia? Koti aue elao tale llo masaliki aGrik atoa la ghaitoia, me katoa tani kapuita la tokatoka etana. Koti aue mene laa apasunga ta aGrik atoa. <sup>36</sup> Saa malloeana inangarina nau eue va, ‘Aue am pae poieghi, me karika aue am taraieghi’, me ‘Voto ateva alao etana am karika am rooroo tani lao etana?’”

### Iesu ghe auliaala ateo ateaie maulue ia

<sup>37</sup> Airuuruu tale ia o nivelu eitaua ngateae, kinatama nauira ateva, Iesu ghe tinginala, me ghe sama anamungailila me ghe uela va, “Lo ateva ukaakangnata tani ropi, umae etaghi me uropi. <sup>38</sup> Lo ateva eaikaaia etaghi, aue ateo ateaie maulue ia aue eakala elome tale urunguitanina ateva, nongina Uru ngai Manga ateva eaauliaa.” <sup>39</sup> Iesu ghe aauliaa Spirit Manga ateva va lo atoa la aikaaia etana aue la ghaaia. Isaa o nau Spirit Manga ateva karika ghe mae, poli God karika ghe tau sae Iesu.

### Taumattu ngatoa ghe ghalue ilala

<sup>40</sup> Katoa taumattu laghe nongola isaa o inangari Iesu ghe aauliaa etaira me laghe

uelu va, “Koronna, taumattu ngateva oia ia o propete ateva Moses ghe aulieniela.” <sup>41</sup> Mene katoa laghe ue va, “Ia oia taumattu ngateva Mesaea etana.” Mene katoa laghe ue va, “Karika va Mesaea ngateva aue ekasu eGalili. <sup>42</sup> Uru ngai Manga ateva eue va Mesaea ngateva aue elutu ta mangalina atoa Deiviti, me aue elutu eBetlehem, ia o masalikina ia Deiviti.” <sup>43</sup> Taumattu ngatoa ghe ghalue ilala tale ninannaa ta poli Iesu. <sup>44</sup> Katoa ngila ghe anna tani kunea, me karika teva ghe roola.

### Namu ngatoa karika laghe aikaaiaala ta Iesu

<sup>45</sup> Polisi etoa laghe laa rekata sio, me namuu ta pristi etoa me Paresi etoa laghe kolomilala va, “Vaalua me am tam maeaa sio Iesu?”

<sup>46</sup> Polisi etoa laghe liula me laghe uela va, “Karika teva taumattu erooroo tani aippooaa nongina taumattu ngateva okae.”

<sup>47</sup> Me Paresi etoa laghe uela va, “Ae! Am tee ange kamekameam? <sup>48</sup> Ngam tarala va teva namuu ta aJiu etoa me Paresi etoa eaikaaia etana? <sup>49</sup> Lo atoa la ghaikaaia etana karika la kilakila inangari nipaopao, me God ang ghe kasikienainilala.”

<sup>50</sup> Nikodimas, ia o ghe lao akasina sio ta Iesu, ie tee ghe tokatoka me ghe uela va, <sup>51</sup> “Uneita inangari nipaopao eue va, ita rau mene ghelei righi voto ta teva taumattu, ita tani nongo mua va sa ateva ghe gheleila.”

<sup>52</sup> Me laghe uela etana va, “Koti io tee aGalili io? Uriti Uru ngai Manga ateva, me utara va karika teva propete

aue ekasu eGalili.”<sup>53\*\*</sup> *Me laghe tiu reerekataala tani lao tanganueira.*

**8** *Iesu ghe saela tale motouru eteva ararina ateae eOliv.* <sup>2</sup> *Elue talaua poopooa ghe mene ssola tale ale manga ateva, me taumattu ngakapa atoa laghe mene mae sio tani taraia, me ghe toka siola, me ghe tiuaala tani apasunga etaira.* <sup>3</sup> *Vara me Paresi etoa me tau ngai apasunga ngatooa tale inangari nipaopao ngila ghe reerekataa vause ateva etana. Laghe tariela ghe aso teela taita ateva karika manna ia, me laghe atinginaia elome ta mata taumattu ngatooa.* <sup>4</sup> *Me laghe uela ta Iesu va, “Tisa, ia oia vause ateva ghe asoaso tee taita ateva karika manna ia, me ami ghaiaia.* <sup>5</sup> *Tale inangari nipaopao Moses ghe uela va ia oia ase vause ateva eghelei evalua o pei nikumu ematea. Me io, aue uue va saa?”* <sup>6</sup> *Laghe aaulia ngavalua o tani tootoonga Iesu, me saa llo ghe auliaa aue laghe tingina etana tani ghelei niaisakei etana.*

*Iesu ghe turru siola euu, me ghe tiuaala tani pitipiti tale vuvu nimane ateva nonginaaili va karika ghe nongonongola.* <sup>7</sup> *Laghe mene kookolomia, me Iesu ghe tinginala, me ghe uela etaira va, “Lo ateva elome etaimim etam ghelei righi voto sesa, ughaa tiulu atu, me io uaitiutiu tani kumua.”* <sup>8</sup> *Vara me ghe mene turru siola euu, me ghe mene tiuaala tani pitipiti.*

<sup>9</sup> *Me lo atoa laghe nongola, laghe tiuaala tani kasu kateva kateva, ghe tiuaala ta namu ngatooa, me ghe laa ruu sio tale airuuruu eteva taumattu. Me Iesu nonga me vause ateva lalu ghe tokala.* <sup>10</sup> *Iesu ghe mene tingina saela, me ghe uela etana va, “Eaa ila? Karika teva eanna tani tau aatu sesa aipolipoli etam?”*

<sup>11</sup> *Ghe liula me ghe uela va, “Karika teva, namu ngateva.”*

*Me Iesu ghe uela va, “Aghi tee atam anna tani tau aatu sesa aipolipoli etam. Kasula, me unim ruu tani ghelei ssavoto.”*

### **Iesu mallanga ia tale kosa ateva**

<sup>12</sup> *Iesu ghe mene uela ta taumattu ngatooa va, “Aghi mallanga ieghi tale kosa ateva oia. Lo ateva eaimuli teeieghi, karika aue ekasu tale saurrom ateva, ta aue eghaa lo ateva o mallanga etautau aatu maulue.”*

<sup>13</sup> *Paresi etoa laghe nongola, me laghe uela ta Iesu va, “Io nonga uaulia ngaoutu eeleiaam me uunguaam. Liuna avalua o me voto uauliaa karika koronna.”*

<sup>14</sup> *Iesu ghe liula me ghe uela va, “Koronna va aghaulieinaghi nonga, me voto aghauliaa koronna. Ta poli akilakila tanganueghi me eaa alaolao, me am, am tam kilakila tanganueghi me eaa aue alao.* <sup>15</sup> *Am, am ghelei niaisakei tale taumattu nongina eeleiaa kosa ateva, me aghi karika. Karika aghelei niaisakei tale teva taumattu.* <sup>16</sup> *Arova aghele ghelei niaisakei aue aghele ghelei ekoronna poli karika va aghi nonga aue aghele ghelei ta aghi, me Tamaghi ghe sungieghila aue angalu ghele ghelei.* <sup>17</sup> *Uneimim inangari nipaopao eue va, arova ghalua taumattu lalu auliaa inangariirua me elao aitaava, isaa o inangari am vira kaili ekoronna.* <sup>18</sup> *Aghi aghaulia ngaoutu uunguaaghi me eeleiaaghi, me Tamaghi, ia o ghe sungieghila, ie tee eaauliaa uunguaaghi me eeleiaaghi.”*

<sup>19</sup> *Vara me laghe kolomiela va, “O eaa ia tamam?”*

*Iesu ghe liula me ghe uela va, “Arova am kilakilaieghi, aue am ghele kila Tamaghi, me poli am tam kilakilaieghi, karika aue am kila Tamaghi.”* <sup>20</sup> *Iesu ghe*

**\*\*7:53** Llo akasina uru ngai laghe pitila, karika laghe pitila Jon 7:53-8:11. Oroila lo atoa laghe pitila kiukiu eteae ta Jon 7:53, me kasina laghe piti reerekataainie ssola. Katoa laghe pitila elome ta Jon 7:36 me Jon 7:37, me katoa laghe pitila ta airuuruu ta Jon 21:25, me mene katoa laghe pitila emuli ta Luk 21:38.

auliaa isaa o inangari kalakalaa tale ale atiulu laghe kaakaai viliki veu etana tale ale manga ateva. Karika teva taumattu ghe anna tani kuneia, poli nauna karika ghe mae.

### **Karika am rooroo tani lao nongina alaolao**

<sup>21</sup> Iesu ghe mene uela etaira va, “Aue akasu vuliem, me aue am pae poieghi, me am mate tee kaluimim ssavoto. Karika am rooroo tani lao nongina aue alao.”

<sup>22</sup> AJiu etoa laghe aikolomieinila va, “Vaalua me eue va, ‘Karika am rooroo tani lao nongina aue alao’? Koti enim aloanna tani uvi ematea?”

<sup>23</sup> Iesu ghe uela etaira va, “Am, tanganeuimim oia euu, me aghi, tanganeueghi epona liu, me am taumattu tale kosa ateva oia, me aghi karika. <sup>24</sup> Aghaauliaa etaimim va aue am mate tee kaluimim ssavoto, poli arova am tam aiesoa va aghi see, aue am mate tee kaluimim ssavoto.”

<sup>25</sup> Me laghe kolomiela va, “Io see io?”

Me Iesu ghe uela etaira va, “Aghi ia o taumattu ngateva aghe aulieiniela etaimim emua arau. <sup>26</sup> Oroianaaili voto arooroo tani auliaa tani aotu eeieiaaimim karika masina, me tani ghelei niaisakei etaimim. Ta lo ateva aghaaulieinia koronna ia, poli lo ateva ghe sungieghila koronna ia, me aghi aghaulia ngaotu tale taumattu tale kosa ateva saa voto aghe nongola etana.”

<sup>27</sup> Karika laghe kilakila va Iesu ghe aauliaa Tamane. <sup>28</sup> Iesu ghe ue etaira va, “Nau eteva aue am avukala sae Natuna ateva Taumattu ngateva, me aue am vira mene kila va aghi see. Me karika agheelei righi voto ta nannaaghi, ta agheelei nonga voto Tamaghi ghe apasungala. <sup>29</sup> Lo ateva ghe sungieghila etokatoka teeieghi. Karika etautau velueghi va aghi nonga atoka-

toka, poli nau ekapa atoa agheeghelei llo voto ealoanna.” <sup>30</sup> Nau taumattu ngatoa laghe nongola inangarina, oroi ila lo atoa laghe aikaaiaala etana.

### **Koronna inangari aue egheleiem am toka amasina**

<sup>31</sup> Vara me Iesu ghe uela ta lo atoa aJiu laghe aiesoa etana va, “Arova nau ekapa atoa am aimuli tee inangarighi, am aue kapughu disaepolo tuungi iem, <sup>32</sup> me aue am kila koronna inangari, me llo koronna aue gheleiem am ruu tani nim uungu ta katoa, me karika am tokatoka tale aloannaaimim.”

<sup>33</sup> Laghe liula me laghe uela va, “Ami tuvuumami ta Abraham, karika teva etaimami enim uungu me karika etokatoka tale aloaloannaane. Vaalua me uue va, ‘Aue am ruu tani uungu ta katoa?’”

<sup>34</sup> Iesu ghe liula me ghe uela va, “Aghaaulia ngakoronna etaimim va lo ateva enim toka ghelei voto sesa, ia tau ngai uungu ia tale voto llo sesa, karika etokatoka tale aloannaane. <sup>35</sup> Tau ngai nongonongo anna ateva enim tokatoka tau tee vauna ateva. Natuna nonga ateva vauna ateva aue etoka teeia nau ekapa atoa. <sup>36</sup> Arova natuna ateva egheleiem am ruu tani uungu ta katoa, aue am vira ruu tani uungu ta katoa. <sup>37</sup> Akilakila va tuvuna am Abraham, me poli inangarighi karika elome tale urunguitaniimim, me am aloanna tani uvi emateaghi. <sup>38</sup> Voto aghe tarala ta Tamaghi, aghauliaa. Voto am ghe nongola ta tamaimim ateva am gheeghelei.”

### **Am tamaimim ateva ta Satana**

<sup>39</sup> Laghe liula me laghe uela ta Iesu va, “Ami tuvuumami eteva ta Abraham.”

Me Iesu ghe uela etaira va, “Arova tuvuna am Abraham aue am ghele ghelei voto nongina Abraham ghe ghelei. <sup>40</sup> Nau eteva aghaauliaa voto koronna aghe nongola ta God, am aloanna tani

uvi emateaghi. Abraham karika ghe ghelei evalua o. <sup>41</sup> Am, am tani ghelei nonginaaili tamaimim ateva.”

Me laghe uela etana va, “Vara natu ngerengere iemami? Ami kateva nonga tamaimami God ta ngetana.”

<sup>42</sup> Iesu ghe uela etaira va, “Arova natuna iem God, aue am ghele aielousieinieghi, poli aghe kasula nongina etokatoka. Karika nim nannaaghi va aghe sio mae, ia ghe sungieghila tani sio. <sup>43</sup> Vaalua me karika am nongonongo kila inangarighi? Poli karika am rooroo tani nongo inangarighi, <sup>44</sup> am tamaimim ateva ta Satana, poli am aloanna tani ghelei voto ealoanna. Ia emua arau ghe aiuvi ematela, me karika eaauliaa righi koronna poli karika righi koronna etana. Nau eaauliaa kamena, euusila ngarau gheegheleiaane kamena. Poli ia ekamekame, o tamaira akapa ia lo atoa la kamekame. <sup>45</sup> Ta poli aghaauliaa voto koronna, karika am aikaaia etaghi. <sup>46</sup> Teva etaimim erooroo tani auliaa righi gheleiaaghi karika masina? Arova aghauliaa koronna, vaalua me am tam aikaaia ta ngetaghi? <sup>47</sup> Lo atoa natuna ila God, aue la nongo usilaa inangarina, me am, karika am aloanna tani nongo inangarina, poli karika va natuna am God.”

### Iesu me Abraham

<sup>48</sup> Me aJiu etoa laghe liula me laghe uela ta Iesu va, “Inangarimami ami auliaa koronna va io aSameria io, me raroai eteva etokatoka etam?”

<sup>49</sup> Iesu ghe liula me ghe uela va, “Karika teva raroai etaghi, ta anim tau-tau sae ararina ateae Tamaghi, me am aasiosio ararighi eteae. <sup>50</sup> Me aghi karika aghanna tani ghelei ararighi eteae. Kateva nonga eanna tani tau sae ararighi

eteae, me ia tau ngai ghelei niaisakei ia. <sup>51</sup> Aghaaulia ngakoronna etaimim va arova lo ateva onongo usilaa inangarighi, ia o taumattu ngateva karika aue etara nimate.”

<sup>52</sup> Me aJiu etoa laghe uela etana va, “Ia oia ngami kilala va raroai eteva etokatoka etam, poli Abraham me mene katoa propete ngila ghe matela. O me uue va, ‘Lo atoa la nongo usilaa inangarighi karika aue la ateatea nimate.’ <sup>53</sup> Vara io va namuu io ta tuvuumami eteva ta Abraham me mene katoa propete ngila ghe matela? Vara mene see etam?”

<sup>54</sup> Iesu ghe liula me ghe uela va, “Arova aghele tau sae ararighi eteae, ararighi eteae nim kapa ia. Me Tamaghi, ia o am ue va kapuimim Goto ia, etau-tau sae ararighi eteae. <sup>55</sup> Am karika am kilakilaia. Aghi nonga akilakilaia. Arova aghele ue va karika akilakila, aue aghele kamekame nongina am tau nikamekame iem. Aghi akilakilaia, me anongonongo usilaa inangarina. <sup>56</sup> Tuvuumim ateva ta Abraham ghe masimasielila tani tara nau etiulu oia etaghi. Nau eteva ghe tarala ghe masimasielila.”

<sup>57</sup> Me aJiu etoa laghe uela etana va, “Meie! Anem ninamanama karika ghe nim sae ta ghalimangauluae (50), me vaalua ughe tarala Abraham?”

<sup>58</sup> Iesu ghe uela etaira va, “Aghaaulia ngakoronna etaimim va auena Abraham ghe lutu, aghi ngaghe toka vella arau<sup>††</sup>!” <sup>59</sup> Me ngila ghe reirei atu tani kumua. Iesu ghe aisuliaala, me ghe kupi ghoala tale ale manga ateva.

### Iesu ghe ghelei emasinala mata salusalu eteva

**9** Iesu ghe kasukasu elaolao, me ghe tarala taumattu ngateva ghe lutu emata salusalula. <sup>2</sup> Kapuna disaepolo atoa laghe kolomiela va, “Tisa, vaalua

<sup>††</sup>8:58 Iesu ghe ghaala ararina ateae God, nongina Eksodas 3:14 eauliaa.



me ghe mata salusalunala, poli ia kanna ssavoto, o tamana me kinna?”

<sup>3</sup>Iesu ghe liula etaira me ghe uela va, “Karika va ia kanna ssavoto, o tamana me kinna, ta mausi aue taumattu ngatoka la tara uunguaane God etana.

<sup>4</sup>Aue ita ghelei uunguaane lo ateva ghe sungieghila tani mae ghelei. Ellaa ita tani uungu, va nau eleivoo, karika teva erooroo tani uungu. <sup>5</sup>Nau atokatoka oia tale kosa ateva, aghi mallanga aghi tale kosa ateva.”

<sup>6</sup>Nau ghe aippoaa, me ghe kanusuila tuku kosa ateva, va ghe maramarakanala, me ghe atavainie saela tale matana alua, <sup>7</sup>me ghe uela etana va, “Kasula, me ulaa pora matam tale ateo atea kaikaina ia, ararina atea ta Siloam.” (Malloeana Siloam va ‘sungieghila’.) Ghe porala matana, me ghe kiriaala, me ghe taatara.

<sup>8</sup>Kapuna atoa me lo atoa laghe taatarara ta ghe toka looloo, laghe ue va, “Karika va ia okae taumattu ngateva ghe toka looloo nonga tapaa ngatamana tale ale manga ateva?” <sup>9</sup>Katoa laghe ue va, “Ia oio taumattu ngateva.”

Mene katoa laghe ue va, “Karika, arova taatarane va ia okae.”

Ia ghe uela va, “Aghi oia.” <sup>10</sup>Laghe kolomiela va, “Vaalua me matam ghe taatarala?”

<sup>11</sup>Ghe liula me ghe uela va, “Taumattu ngateva la kolokoloo va Iesu etana, ghe ghelei emaramarakanala tuku kosa ateva, me ghe atavainie saela ta mataghi, me ghe uela etaghi va, ‘Ulaa pora matam tale ateo atea eSiloam.’ Agho lao sio va agho porala mataghi, me agho taatarala.”

<sup>12</sup>Laghe kolomiela va, “Eaa ia, ia ona taumattu ngateva uaulienia?”

Ghe liula me ghe uela etaira va, “Karika anga kilaiela.”

<sup>13</sup>Laghe laooa sio taumattu ngateva mata salusalu ia ta Paresi etoa. <sup>14</sup>Ia

o nau eteva nau manga ia Iesu ghe ghelei emaramarakanala tuku kosa ateva, me ghe gheleila matana alua lalu ghe taatarala. <sup>15</sup>Paresi tee atoa laghe kolomiela va, “Vaalua utaatarala?”

Ghe uela etaira va, “Ghe atavaa saela kosa maramarakana ta mataghi, me agho lao sio tani pora mataghi, me agho taatarala.”

<sup>16</sup>Katoa Paresi laghe ue etana va, “Taumattu ngateva oia karika va God ghe sungieghila, poli etam aitaraa nau manga ateva.”

Mene katoa laghe ue va, “Vaalua sesa taumattu ngateva erooroo tani ghelei righi niaimatoonga?” Ghe ghaluela nannaaira me laghe aitiuaala.

<sup>17</sup>Laghe mene ue ta mata salusalu eteva va, “Io, vaalua nannaam etana, ta poli ghe otila matam alua?”

Ghe uela va, “Ia propete ia.”

<sup>18</sup>Poli aJiu etoa laghe tam aikaaia inangarina mata salusalu eteva, va ghe mata salusaluna ia, me ghe mene taatarala, laghe suula inangari ta tamana me kinna va lalu mae. <sup>19</sup>Angila ghe kookolomi tamana me kinna va, “Ierai natuimalue ia? Amalu ghe ue va ghe lutu emata salusalunala? Me vaalua me ghaine etaatara?”

<sup>20</sup>Tamana me kinna lalu ghe liula etaira va, “Angalu kilakilaia va natungalue ia ta ghe lutu emata salusalunala. <sup>21</sup>Vaalua me ghaine etaatara, angalu tam kilakila va see ghe otila matana alua. Am kolomia, ta namuu ia, me ia aue eauliaa etaimim.” <sup>22</sup>Lalu ghe aulia ngavalua o poli lalu ghe maamatauta namuu ta aJiu etoa, ta namuu ta aJiu etoa laghe ue va arova lo atoa la ase Iesu Mesaea ngateva, aue la tiu vella tale ale nivelu eitaua ngateva, me karika aue la mene mae kkaua teeila. <sup>23</sup>Liuna avalua o tamana me kinna lalu ghe uela va, “Am kolomia, ta namuu ia.”

<sup>24</sup>Laghe mene kolola mata salusalu eteva ghe mae sio. Me laghe uela etana va, “Utau sae God,<sup>‡‡</sup> poli ami kilakila taumattu ngateva ona va tau ngai gheelei ssavoto ia.”

<sup>25</sup>Ghe liula etaira va, “Arova tau ngai gheelei ssavoto ia o karika, atam kilakila. Kateva nonga voto akilakilaia va, aghi mata salusalu ieghi, me isaa oia ataatarala.”

<sup>26</sup>Laghe mene kolomiela va, “Saa llo ghe gheleila etam, me vaalua ghe otila matam?”

<sup>27</sup>Ghe liula etaira va, “Ngaghe auliaa muela etaimim, me karika am ghe aloanna tani nongo. Vaalua me am aloanna tani mene nongo? Koti am tee, am anna va ekapuna disaepolo iem?”

<sup>28</sup>Parsi etoa laghe auliaa saasakiaala etana. Laghe uela etana va, “Io nonga kapuna disaepolo io, ami kapuna disaepolo iemami Moses. <sup>29</sup>Ami kilakila va God ghe aippooaa ta Moses. Me ia ona taumattu ngateva, ami tam kilakila tanguenua.”

<sup>30</sup>Taita ateva oia ghe liula etaira va, “Nga soghiaala inangariimim! Am ue va am tam kilakila tanguenua, me ia oia taumattu ngateva ghe otila mataghi elua. <sup>31</sup>Ita kilakila va God etam rooroo tani nongo usilaa tau ngai gheelei ssavoto atoa, me arova lo ateva ekakkaua God me eaimuli usi tee aloanaane God, ia aue God enongo usilainia. <sup>32</sup>Emua arau nau kosa ateva ghe tiuaala, karika ita ghe nongo poila rigghi taumattu ghe lutu esalusulunala me matana ghe mene otila. <sup>33</sup>Arova ghe tam kasula ta God, karika erooroo tani gheleli rigghi voto.”

<sup>34</sup>Me laghe liula me laghe uela etana va, “Ughe lutula tale ssavoto, me vaalua me uanna tani apasunga voto

etaimami!” Me laghe tiu veluela va karika emene mae kkaua teeila.

<sup>35</sup>Iesu ghe nongola va ngila ghe tiu veluela. Nau ta ghe paeala me ghe taraiela, ghe uela etana va, “Uaikaia ta Natuna ateva Taumattu ngateva?”

<sup>36</sup>Me taumattu ngateva o ghe kolomila va, “Namu ngateva, auliaala etaghi va see ia, ia ona taumattu ngateva, me aue aghaikaia ta ngetana.”

<sup>37</sup>Iesu ghe uela etana va, “Angu ghe taraiela, me ia oia esamasama teeio.”

<sup>38</sup>Me taumattu ngateva o ghe uela va, “Vau eteva, aghaikaia,” me ghe suuiaala ta liue kkena Iesu me ghe kaueiniela.

<sup>39</sup>Iesu ghe uela va, “Aghe sio mae tale kosa ateva tani gheleli niaisakei ta taumattu ngatoa, me aue lo atoa mata salusaluna ila la taatara, me lo atoa la taatara la mata salusaluna.”

<sup>40</sup>Katoa Parsi laghe tokatoka me laghe nongola llo Iesu ghe auliaala, me laghe kolomiela va, “O ami tee mata salusalu iemami?”

<sup>41</sup>Iesu ghe liula me ghe uela va, “Arova mataimim salusaluna, karika aue gheleli rigghi kaluimim ssavoto, me poli am ue va, ‘Ami taatara,’ liuna avalua o me kaluimim ssavoto, ie etokatoka etaimim.”

### Iesu masi tau ngai toi sipsipi ia

**10** Iesu ghe mene uela va, “Aghaaulia ngakoronna etaimim va lo ateva taumattu, karika ekupikupi sso tale atamani valavala sipsipi eteae, ta etattakole tale valavala atea, tau niainao ia, me aisari katoa ghinnaniira ia. <sup>2</sup>Lo ateva taumattu ekupikupi sso tale atamana atea, ia tau ngai toi sipsipi ia. <sup>3</sup>Tau ngai toi atamana atea etaatara kila tau ngai toi sipsipi eteva,

me eotioti atamana atea, me tau ngai toi sipsipi eteva ekupikupi sso, me sipsipi etoa la nongonongo kila lingi ngalona ateva. Ekolokoloa arariira kiena sipsipi etoa, me ekuukupieinila ghoa eleka. <sup>4</sup>Nau eteva ekuukupia ngakapa ghoa kiena sipsipi, me emuemueinila, me kiena sipsipi etoa la ghaimuli teeia, poli la nongonongo kila lingi ngalona ateva. <sup>5</sup>Karika la rooroo tani usi me teva ppae taumattu. Me aue la ghele ilou vuli teeia, poli karika la nongonongo kila lingi ngalona ateva.” <sup>6</sup>Iesu ghe auliaala ia o kiukiu niaimatoongana atea, me nannaaira karika ghe masalike teela voto ghe auliaala etaira.

<sup>7</sup>Liuna avalua o me Iesu ghe mene uela etaira va, “Aghaaulia ngakoronna etaimim va aghi atamani sipsipi etoa ieghi. <sup>8</sup>Lo atoa laghe muemue mae akasina sio etaghi, tau niainao ila me aisari ghinna ila, me sipsipi etoa karika laghe nongo kilailala. <sup>9</sup>Aghi atamana ieghi. Lo ateva ekupikupi sso etaghi aue esaanga. Aue esso me eghoa, me aue eghaa masi inana. <sup>10</sup>Tau niainao ateva emaemae tani ainao, me tani aiuvi emate, me tani tturuu. Me aghi aghe mae sio va la ghaa maulue, me maamaulu-  
 aaira epasu tale masi voto. <sup>11</sup>Aghi masi tau ngai toi sipsipi ieghi. Masi aitoi sipsipi eteva, etautau maamauluaane tani sausi kiena sipsipi etoa. <sup>12</sup>Polipolina ateva taumattu, nau eteva ueli paua ateva emaemae tani nama sipsipi etoa, aue eilou vuli sipsipi etoa, poli karika va tau ngai toi sipsipi ia, me karika va kiena tuungi ila. Me paua ateva aue ghele namaila me ghele ameti reerekatainila. <sup>13</sup>Ia o taumattu ngateva eilou vuli sipsipi etoa poli enim uungu tani ghaa viliki veu, me karika nannaane tani aitaraa sipsipi.

<sup>14</sup>“Aghi masi aitoi sipsipi ieghi. Akilakila kieghe sipsipi, me ila la kilakilaieghe, <sup>15</sup>nongina Tamaghi ekilak-

ilaieghe, me aghi akilakila Tamaghi, me atautau maamauluaaghi tani sausi kieghe sipsipi etoa. <sup>16</sup>Mene katoa tana kieghe sipsipi, karika ila elome tale ia oia valavala atea. Aue atani ghaaila, me la mae kupi sso, me ila tee aue la nongo lingi ngalogu eteva, me aue ekateva nonga ila, me ekateva nonga tau ngai toiira. <sup>17</sup>Tamaghi eailousieinaghi, poli aue atau velu maamauluaaghi, me auena amene ghaa. <sup>18</sup>Karika teva erooroo tani ghaa velu maamauluaaghi. Aghi atautau velu maamauluaaghi, me aghi nonga arooroo tani tau velu maamauluaaghi me arooroo tani mene ghaa. Tamaghi ghe auliaa tau mae isaa oia inangari va aghelei.”

<sup>19</sup>Isaa o inangarina ghe gheleila me aJiu etoa ghe ghalueilala. <sup>20</sup>Oroi ila taumattu ngatoa laghe ue va, “Raroai eteva etokatoka etana, me veeveena ia. Vaalua me am anna tani nongo inangarina?”

<sup>21</sup>Me katoa laghe ue va, “Lo ateva raroai eteva etokatoka etana karika erooroo tani auliaa isaa o voto. Raroai eteva karika erooroo tani oti mataira salusaluna atoa.”

### **AJiu etoa karika laghe aiesoa ta Iesu**

<sup>22</sup>Nau eteva tani nnaa lao nau laghe tau saela ale manga ateva ghe rekatala. Ia o nivelu eitaua ngateae ghe lutulutu tale nau kkaili eJerusalem, <sup>23</sup>me Iesu eleka tale ale manga ateva ghe kasukasu tale varanda ngateva laghe asease Solomon etana. <sup>24</sup>Me aJiu etoa laghe mae sio tani tingina talieinia me ngila ghe ue etana va, “Lovisaa uauliaa kiemami? Ange matemate toitoiaaimami. Arova io Mesaea ngateva, uaulia ngamasina etaimami.”

<sup>25</sup>Iesu ghe liula me ghe uela etaira va, “Aghauliaa etaimim, me karika am aiesoa. Niuungu aghe ghelei tale ararina atea Tamaghi eaauliaa va aghi see ieghi. <sup>26</sup>Am tam aiesoa poli karika va

kieghi sipsipi iem. <sup>27</sup> Kieghi etoa sipsipi la nongonongo kila lingi ngaloghu eteva. Akilakilaila me la ghaimuli teeieghi. <sup>28</sup> Atautaula mauleve ateva etokatoka nau ekapa atoa, me karika aue la mate. Karika teva eroroo tani ghaa vella ta nimaghi. <sup>29</sup> Tamaghi, ghe taula mae sio etaghi, enaanamuu vulu isaa akapaaili taumattu, me karika teva eroroo tani ghaa vella ta nimane Tamaghi. <sup>30</sup> Aghi me Tamaghi kateva nonga iengalua.”

<sup>31</sup> Me aJiu etoa ngila ghe mene reirei atu tani kumua. <sup>32</sup> Me Iesu ghe uela etaira va, “Aghe apasungala oroianaaili masi niuungu kanna Tamaghi. Am anna tani kumueghi tale mausi sa ateva tale isaa o niuungu?”

<sup>33</sup> AJiu etoa laghe liula me laghe uela va, “Karika ami anna tani kumuo poli isaa o voto, ta poli uauliaa saasakia ta God, poli nim taumattu io, me uue va io God.”

<sup>34</sup> Me Iesu ghe liula me ghe uela etaira va, “Karika am ghe ritila tale uneimim inangari nipaopao, eue va, ‘Aghe uela va am goto iem?’”<sup>f</sup> <sup>35</sup> Emua arau God ghe ppoaala inangarina ta taumattu ngatua me ghe uela va goto ila. Inangarina God tale Uru ngai Manga ateva karika eaikolikoliaa. <sup>36</sup> Me aghi, Tamaghi ghe amangaieghila me ghe sungieghila tani sio tale kosa ateva oia. Liuna avalua o me aue va Natuna ieghi God. Vaalua me am ue va aghaauliaa saasakia ta God? <sup>37</sup> Am rau mene aiesoa etaghi arova atam gheeleei uunguaane Tamaghi. <sup>38</sup> Arova am tam aiesoa etaghi, am aiesoa tale niuungu agheeleei, poli agheeleei uunguaane Tamaghi, me aue am kila va Tamaghi etaghi me aghi ta Tamaghi.” <sup>39</sup> Laghe mene anna tani kuneaia, me karika laghe roola.

<sup>40</sup> Me Iesu ghe mene oghi lao sio, me ghe lau longotila eJodan, me ghe lao sio

tale voto ateva Jon ghe aasuu taumattu etana, me ghe tokala tale ia o voto ateva. <sup>41</sup> Me oroieili taumattu ghe mae sio etana. Laghe ue va, “Koronna va Jon ghe tam gheleila teva niaimatoonga, me voto ghe auliaala tale ia oia taumattu ngateva koronna akapa.” <sup>42</sup> Tale ia o voto ateva oroi taumattu ghe aiesoaala ta Iesu.

### Lasarus ghe matela

**11** Kateva taumattu, Lasarus etana, ghe iisiki. Ghe tokatoka eBetani, tanguueiraru Meri me tuena ta Mata. <sup>2</sup> Meri ia o vause ateva ghe kaola voto masi ngusungusuaane ta kkena Vau eteva, me ghe ulula tale uu nguruna, ia o Meri kapuna taita ateva oia ta Lasarus ghe iisiki. <sup>3</sup> Liuna avalua o me kapuna vause alua lalu ghe suula inangari ta Iesu tani auliaa kiena va, “Vau eteva, unongo, masi kapum ateva eiisiki.”

<sup>4</sup> Nau eteva Iesu ghe nongola, ghe uela va, “Ia okae isiki eteva karika aue eruu tale nimate. Enim lutula tani apasunga sarasarakaniaane God, me la tau tee sae ararina ateae Natuna ateva God.” <sup>5</sup> Iesu ghe aielousiangaili Mata me nengane ta Meri me Lasarus. <sup>6</sup> Liuna avalua o, nau eteva Iesu ghe ghaala inangari va Lasarus eiisiki, ghe mene tokala ghalue nau nongina ghe tokatoka arau.

<sup>7</sup> Vara me ghe uela ta kapuna disaepolo atoa va, “Ita kasu me ita mene sae eJiudia.”

<sup>8</sup> Me kapuna disaepolo atoa laghe uela etana va, “Tisa, vaalua me umene anna tani sae eJiudia, aJiu etoa okae ghalavo nonga laghe anna tani kumu emateo tale atu?”

<sup>9</sup> Iesu ghe uela etaira va, “Karika am kilakila va kasangaulu ghalua (12) aoa ta kateva nau? Arova lo ateva ekasu el-laa, karika aue etaghueinia, poli etaatara tale mallanga ateva tale kosa ateva.

<sup>f</sup>10:34 Sams 82:6

<sup>10</sup> Me arova lo ateva taumattu ekasu eleivoo, aue etaghueinia, poli karika etaatara teva mallanga.”

<sup>11</sup> Vara ghe ruula tani auliaa llo me ghe mene uela etaira va, “Kapuita ateva ta Lasarus enim sio aseasekanua, me anga laa siosio oia tani anguunia.”

<sup>12</sup> Me disaepolo atoa laghe uela etana va, “Vau eteva, arova enim sio aseasekanua, aue emasina.” <sup>13</sup> Iesu ghe auliaa va ang ghe matela, me ila laghe annaa va ghe auliaa niasekanue atee ta ghainoana etana.

<sup>14</sup> Me Iesu ghe vira mene aulia ngamasinala va, “Lasarus ang ghe matela.

<sup>15</sup> Nau eteva aghannainam anim masimasi va karika aghe toka teeiela, poli isaa o voto aue egheleiem am aiesoa. Ita kasu, me ita sio taraia.”

<sup>16</sup> Vara me Tomasi, kateae ararina laghe kolokoloa va Palue ia, ghe uela ta disaepolo akapa atoa va, “Elauo! Ita akapa ita usia, me ita laa mate teeia.”

### **Iesu etottotu taumattu matena me etautaula maulue**

<sup>17</sup> Nau eteva Iesu ghe laa rekata sio eBetani, ghe nongola va ang ghe asola ghaata nau tale lienga niaikaia. <sup>18</sup> Betani kalakalangina ia eJerusalem, maa-masauaane erooro nim kotolu nonga kilomita. <sup>19</sup> Oro i aJiu etoa laghe mae sio tani aippooa me toka tee Mata me Meri tani aalea mate, poli kapuirarua taita ateva ghe matela. <sup>20</sup> Nau eteva Mata ghe nongola va Iesu ang ghe rekatala, ghe lao sio tani soua, me Meri ghe tokala elo ale.

<sup>21</sup> Me Mata ghe uela ta Iesu va, “Vau eteva, arova ughe tokatoka oia, kapughu taita ateva karika aue ghe mate. <sup>22</sup> Me ia oia akilakila va arova ughele kolomi righi voto ta God, aue ghele tau aatu.”

<sup>23</sup> Iesu ghe uela etana va, “Kapum taita ateva aue emene sakesake.”

<sup>24</sup> Mata ghe uela etana va, “Akilakila va aue etotu tale nau taumattu ngatoo aue la totu tale liu, tale airuuruu tale nau.”

<sup>25</sup> Iesu ghe uela etana va, “Aghi atototu taumattu matena, me atautaula maulue. Lo ateva eaiesoa etaghi, arova emate, aue emene sakesake. <sup>26</sup> Lo ateva etokatoka me maulue ia, arova eaikaia etaghi, karika aue emate. Uaiesoa tale isaa oia inangari?”

<sup>27</sup> Mata ghe uela ta Iesu va, “Ue, Vau eteva. Aghaaiesoa va io Natuna io God, me io Mesaea io, ia o laghe uela va aue emae.”

### **Iesu ghe alousiisi teela Lasarus me ghe ngalaiela**

<sup>28</sup> Mata ghe ruula tani ppoaa isaa o inangari me ghe lao sio tani tara Meri, me ghe aulia ngainaola etana va, “Tisa ange rekatala, me eanna tani taraio.” <sup>29</sup> Nau eteva Meri ghe nongola, arovaeaata ta ghe tinginala, me ghe lao sio tani tara Iesu. <sup>30</sup> Iesu karika ie ghe mae rekata. Ghe aitoka see tale voto ateva Mata ghe lao sio tani soua etana. <sup>31</sup> AJiu etoa laghe tokatoka tee Meri elo ale tani alousiisi eitauaa teeia. Vara me laghe taraiela ta ghe tinginala, me ghe ailuiluila tani kupi ghoa. Laghe usiela, poli laghe anna va ang ghe laolao tani ngala nongina laghe alokoila taumattu ngateva matena ia.

<sup>32</sup> Nau eteva Meri ghe laa rekata sio nongina Iesu ghe tiitingina, ghe taraiela, me ghe suuiaala ta liue kkena, me ghe uela va, “Vau eteva, arova ughe tokatoka oia, kapughu taita ateva karika aue ghe mate.”

<sup>33</sup> Iesu ghe tarala Meri me aJiu etoa laghe ngangngala me ghe sessaiela, me ie tee ang ghe anna tani ngala. <sup>34</sup> Me ghe uela va, “Eaa am ghe alokoila?”

Me laghe uela etana va, “Vau eteva, mae sio me ulaa tara.”

<sup>35</sup> Me Iesu ghe ngalala.

<sup>36</sup> AJiu etoa laghe ue va, “Am tarala, Iesu eailousiangaili Lasarus.”

<sup>37</sup> Me katoa laghe ue va, “Ghe gheelei emasinala mata salusaluna ateva, me karika erooroo va ghele sausi Lasarus va karika ghele mene mate?”

### Iesu ghe totula Lasarus tale nimate

<sup>38</sup> Iesu ghe mene sessaiela nau eteva ghe kasukasu elaolao nongina laghe alokoila Lasarus. Tale voto ateva lien-gani niaikaia ia me laghe atoka rungala atu eteva etana. <sup>39</sup> Iesu ghe uela va, “Am ghaa vella atu eteva.”

Me Mata, kapuna vause ia tau rraua, ghe uela va, “Vau eteva, aiaaghaatane ateva oia nau ang ghe asola tale liu. Nei mauuna ateva ang ghe tiuaala.”

<sup>40</sup> Me Iesu ghe uela etana va, “Auela va saa etam? Auela va arova uaiesoa, ghaine utara sarasarakaniaane God.”

<sup>41</sup> Vara me laghe ghaa vella atu eteva. Me Iesu ghe taatara saela epona me ghe uela va, “Tamaghi, akaakaili emasinaaili ta ughe nongola kalughu nikokkolomi.

<sup>42</sup> Me akilakila va nau ekapa atoa un-ongonongoaghi, me poli mausi taumattu toko la tiitingina, liuna avalua o me ngamene aauliaa isaa oia inangari me aue la ghaiesoa va io ughe sungieghila tani sio.”

<sup>43</sup> Nau eteva ghe ruula tani auliaa llo, me ghe kolokoloa nganamungailiila me ghe uela va, “Lasarus, kupi ghoa mae!”

<sup>44</sup> Me ia o taumattu ngateva ghe matela ghe kupi ghoa mae. Nimane me kkena sumsum tale kalio la sumsumaa matena atoa, me matane sumsum tale mene tuku kateva kalio.

Iesu ghe uela va, “Am pulaka vella tapiri kalio, me am tau velua me ekasu.”

### Namu ngatoa laghe tingina aitauaala tani uvi emate Iesu

(*Mat 26:1-5; Mak 14:1-2; Luk 22:1-2*)

<sup>45</sup> Oroil ila aJiu etoa laghe mae sio tani alousiusi tee Meri, laghe tarala ia o voto ateva Iesu ghe ghelelela, me laghe aiesoala etana. <sup>46</sup> Me katoa etaira laghe lao sio tani tara Paresi etoa tani auliaa etaira sa ateva Iesu ghe ghelelela. <sup>47</sup> Namu ngatoa ta pristi me Paresi etoa laghe lao sio tani kolo kansolo atoa.

Me laghe velu eitauaala me laghe uela va, “Sa ateva ita ghelelela, poli taumattu ngateva oia ange gheelei oroi niaima-toonga? <sup>48</sup> Arova ita tau velua, me ita tam ghelelela rungania, taumattu ngakapa atoa aue la ghaikaia etana, me aue aRom atoa la mae, me la uvi tuuturun-gita, me la ghaa velu ale manga ateva.”

<sup>49</sup> Kateva taumattu elome etaira, ararina atea ta Kaeapas, ia namuu ia ta pristi etoa tale ia o ninamanama atea, ghe uela va, “Am oia, karika am kilakila righe voto! <sup>50</sup> Am tee, karika am kilakila va emaamasina arova kateva nonga taumattu ghele mate tani ghaa liuira akapa taumattu ngatoa, karika masina arova taumattu ngakapa ghele mate.”

<sup>51</sup> Karika Kaeapas ghe nim auliaa isaa o inangari tale aloaloannaane, poli ia namuu ia ta pristi etoa tale ia o ninamanama atea, me ghe aulia ngamue-mua alokoila inangari o va Iesu aue emate tani sausi taumattu ngakapa atoa.

<sup>52</sup> Karika va aue emate ta aJiu nonga atoa, ta mene katoa tani natuna God la tokatoka see, aue eghelelela la velu eitauaa me ekateva nonga ila. <sup>53</sup> Ghe tiuaala tale ia o nau eteva, namu ngatoa laghe tiuaala tani aippoaaa tee salana vaalua tani uvi ematea.

<sup>54</sup> Poli isaa o voto me Iesu ghe ruula tani kasu ta mata ngoroi etoa elome ta aJiu etoa. Ghe ssola tani toka tau tale masaliki etea eEpraim, kalakalangina

tale voto ateva karika righi taumattu ta ngetana, ia me kapuna disaepolo atoa.

<sup>55</sup>Pasova ngateva ang ghe aakalakalaa. Oroieili taumattu nge Jiu etoa la tokatoka amasau eJerusalem laghe tiuaala tani rekata eJerusalem tani ghelei velu kaluira ssavoto me auena Pasova ngateva ghe tiuaa. <sup>56</sup>Laghe paepae Iesu me laghe ssola kona aile manga ateva, me laghe tiuaala tani aikolomeinila. Laghe ue va, “Am annaa va aue emae tale ia oia nivelu eitaua ngateae?” <sup>57</sup>Namuu ta pristi etoa me Paresi etoa laghe uela ta taumattu ngatoa va, arova lo ateva etara Iesu, elaa ghaulienia etaira. Ia o salana atikirighi laghe annaa va aue la kune Iesu ta ngetana.

**Meri ghe kaola voto ateva  
masi ngusungusuaane ta  
kkena Iesu eBetani**

(*Mat 26:6-13; Mak 14:3-9*)

**12** Kasi ghaonomo nau ghe tokatoka me ghe laa ghaa nau Pasova, Iesu ghe mene siola eBetani, tanganue Lasarus, ia o Iesu ghe totuela tale nimate. <sup>2</sup>Laghe gheleila ninamanama atea tani amasimasi Iesu. Mata ghe aikoitaa see inana, me Lasarus ghe tokatoka tee taumattu ngatoa laghe mae sio tani namanama tee Iesu. <sup>3</sup>Meri ghe ghaala botolo ateva ghe kaakaai voto aiaavususuvusuaane laghe ghelelela nonga tale oane natu ai erighi la koloa va nadi ia atea me aipolina namungaili, me ghe kaoala ta kkena Iesu, me ghe uluulu kekena tale uu nguruna, me masi neina ateva ghe rooaala ale ateva tani aoo.

<sup>4</sup>Me kateva kapuna disaepolo, Jiu-das Iskariot etana, ia aue ghe taula Iesu ta tau ngai ssateena atoa, ghe uela va, <sup>5</sup>“Vaalua me karika am rooro tani

tauela va la poli ia okae voto ateva masi ngusungusuaane ta kotolu ai (300) silva koen,<sup>§§</sup> me am ghele taula ta lo atoa karika righi peiira?” <sup>6</sup>Jiudas ghe auulialia isaa o inangari karika va poli ghe annaa llo taumattu karika righi peiira, ghe auulialia poli ia tau niainao ia, me ia ghe posoposo aikaai viliki veu eteva, me kasina nau ghe aainao etana.

<sup>7</sup>Iesu ghe liula me ghe uela etana va, “Tau velueta, poli eaatoka ia oia voto ateva masi neina, me aue elaa ghaa nau eteva aue amate, me la laa kaieinaghi. <sup>8</sup>Lo atoa karika righi peiira, la tokatoka teeiem nau ekapa atoa, me aghi, karika aue atoka teeiem nau ekapa atoa.”

**Namuu ta pristi etoa laghe  
aailoe tani uvi emate Lasarus**

<sup>9</sup>Oroieili aJiu etoa laghe kilala va Iesu eBetani. Liuna avalua o me laghe lao sio karika mausi Iesu nonga va laghe lao sio. Laghe lao tee sio poli laghe aloanna tani tara tee Lasarus, ia o Iesu ghe totuela tale nimate. <sup>10</sup>Liuna avalua o me namuu ta pristi etoa laghe aailoe va la uvi emate tee Lasarus, <sup>11</sup>ta mausi Lasarus me oroieili aJiu etoa ngeila ghe liuliu viluira ta pristi etoa, me ngeila ghe aakaia ta Iesu.

**Iesu ghe kupi ssola eJerusalem  
nonginaaili kingi eteva**

(*Mat 21:1-11; Mak 11:1-11; Luk 19:28-40*)

<sup>12</sup>Vara mene kateva nau, me oroieili taumattu laghe saela eJerusalem tale Pasova ngateva, me laghe nongo teela va Iesu aue emae tee tale ia o nivelu eitaua ngateae. <sup>13</sup>Liuna avalua o me laghe ghaala uru ootou, me laghe lao sio tani sou Iesu tapaa salana. Laghe aore me laghe ue va, “Ita tau sae God! God aue ghelei masi voto ta ia oia taumattu

§§12:5 *silva koen* Silva koen ativilau (denarius) kateva nau aipolina.

ngateva ghe mae sio tale ararina atea!\*  
Ia kingi ia ta alsraeli etoa!”<sup>14</sup> Iesu ghe  
ghaala donki eteva, me ghe laa sae toka  
etana, nongina inangari laghe pitila tale  
Uru ngai Manga ateva va,

<sup>15</sup> “Natuna aliki vause ateva Saeon, urau  
mene matautu.

Am tara kapuimim kingi eteva emaemae  
eillou tale natu donki eteva.”†

<sup>16</sup> Isaa o nau kapuna disaepolo atoa  
karika laghe kilakila malloeana isaa o  
voto, me nau eteva God ghe vira mene  
tau saela ararina atea Iesu, me laghe  
vira mene nnaala voto Uru ngai Manga  
ateva ghe auliaala, me vaalua me tau-  
mattu ngatoa laghe gheleila isaa o voto  
ta ngetana.

<sup>17</sup> Lo atoa taumattu laghe tarala Iesu  
ghe kolola Lasarus tani kupi ghoa tale  
lienga niaikaia ngateae, laghe auliaa  
isaa o voto laghe tarala. <sup>18</sup> Taumattu  
ngatoa laghe nongola ia o naimatoon-  
gana ngateva ghe gheleila, liuna avalua  
o me laghe ghoala tani soua tapaa  
salana. <sup>19</sup> Paresi etoa laghe tarala isaa  
o voto me laghe ue va, “Tarala! Llo ita  
anna tani ghelei karika ita rooroo, poli  
taumattu ngakapa tale kosa ateva ngila  
usiusia.”

### **Katoa taumattu nge Grik laghe anna tani tara Iesu**

<sup>20</sup> Katoa taumattu nge Grik laghe sae  
teela eJerusalem tani kkaua ta nau  
nivelu eitaua ngateae. <sup>21</sup> Laghe lao sio  
tani tara Pilip aBetsaida ia eGalili, me  
laghe kolomiela va, “Namu ngateva, ami  
aloanna tani sama tee Iesu.” <sup>22</sup> Pilip ghe  
lao sio tani auliaa ta Andru, me lalu ghe  
lao sio tani tara Iesu, me lalu ghe auli-  
aala etana.

<sup>23</sup> Iesu ghe liula me ghe uela va, “Ange  
ghaala nauna God tani tau sae ara-

rina atea Natuna ateva Taumattu ngat-  
eva. <sup>24</sup> Aghaaulia ngakoronna etaimim  
va, arova la tam pasa katu uiti eteva  
tale kosa ateva va emmate, aue nim kat-  
eva nonga aue etoka. Me arova emmate,  
aue eapinosa oroianaaili uit. <sup>25</sup> Lo at-  
eva eaielousiaa maamauluaane, aue er-  
aue. Me lo ateva etam anna maamaulu-  
aane tale kosa ateva oia, eghelei tani  
ghaa maulue ateva tokatoka liu ia. <sup>26</sup> Lo  
ateva taumattu esaasusieghi, eaimuli  
teeieghi me voto ateva atokatoka etana,  
ie tee aue etoka aitaua teeieghi etana.  
Lo ateva taumattu esaasusieghi, Tam-  
aghi etautau sae ararina atea.

### **Aue la avukala sae Natuna ateva Taumattu ngateva**

<sup>27</sup> “Ia oia voto maateaili ange lutu-  
lutu tale maamauluaaghi, me nganan-  
nangaili, me karika akilakila sa ateva  
atani aulieinia. Koti aue va, ‘Tamaghi,  
ughaa velu isaa o llo voto maamaatane.’  
Karika! Ta poli isaa o voto maamaatana  
me aghe sio mae va elutu etaghi. <sup>28</sup> Tam-  
aghi, utau sae ararim atea!”

Vara Iesu ghe auliaa isaa o inan-  
gari me lingi ngalo ateva ghe kasula  
epona liu ghe uela va, “Ngaghe tau saela  
ararighi etea me aue amene ghelei.”  
<sup>29</sup> Taumattu ghe tiitingina teeia laghe  
nongola, me katoa laghe uela va pala-  
palanga ateva, me katoa laghe ue va,  
“Ensolo ateva ghe sama teeila.”

<sup>30</sup> Me Iesu ghe uela etaira va, “Ia  
o lingi ngalo ateva eppooaala inangari  
tani sausiem, karika va esaasusieghi.  
<sup>31</sup> Taumattu tale kosa ateva oia, God  
ange tiitiuaa tani ghelei niaisakei ta nge-  
taira. Me vau tapaa kosa ateva oia, God  
aue esau velue sio. <sup>32</sup> Me aghi, nau la  
ghavukalaieghi sae tale kosa ateva oia,  
aue aghelei taumattu ngakapa atoa la

\* 12:13 Sams 118:25-26

† 12:15 Sekaraia 9:9



mae etaghi.”<sup>33</sup> Iesu ghe auliaala inangari o tani auliaa vaalua aue emate.

<sup>34</sup> Me taumattu ngatoa laghe uela ta Iesu va, “Inangari nipaopao eue va Mesaea ngateva aue etoka nau ekapa atoa. Vaalua me uue va aue la avukala sae Natuna ateva Taumattu ngateva? See ia Natuna ateva Taumattu ngateva?”

<sup>35</sup> Iesu ghe liula me ghe uela va, “Nauna mallanga ateva tani toka teeiem karika aluse. Liuna avalua o me nau etokatoka teeiem am kasu teeia, poli saurrom ateva erau akouem. Poli lo ateva ekasukasu tale saurrom etam kilakila va eaa elaolao.”<sup>36</sup> Am aikaaiia tale mallanga ateva nau etokatoka teeiem, me aue natuna am mallanga ateva.” Nau eteva Iesu ghe ruula tani ppooaa isaa o inangari, ghe kasu vulilala me ghe lao sio tani aisulia.

#### **Taumattu ngatoa laghe tam anna tani aikaaiia ta Iesu**

<sup>37</sup> Ghe gheleila oroiannaaili niaima-toonga elome ta mata ngoroi etoa, me karika laghe aikaaiia ta ngetana.<sup>38</sup> Isaa o voto ghe lutula tani elei ekoronna inangarina Aisaea propete ia ghe uela va, “Vau eteva, karika teva ghe aikaaiia inangariimami, me karika teva ang ghe tarala sarsarakaniam.”<sup>‡</sup>

<sup>39</sup> Taumattu ngatoa karika la rooroo tani aiesoa ta Iesu, nongina Aisaea ghe mene uela va,

<sup>40</sup> “Vau ngepona ateva ghe ghelei emata salusaluna ilala me urunguitaniira korokoronganaaili poli la rau taatara ta mataira me la kila tale urunguitaniira me la mae etaghi me agheleila va la mene masina.”<sup>¶</sup>

<sup>41</sup> Aisaea ghe tarala sarasarakaniaane Iesu, liuna avalua o me ghe auliaala isaa o voto ta ngetana.

<sup>42</sup> Me oroi ila kapuira namu ngatoa laghe aikaaiia ta Iesu, me karika laghe aootu, poli Paresi etoa laghe uela va lo ateva aikaaiia ta Iesu, aue la tiu velua tale ale nivelu eitaua ngateva,<sup>43</sup> poli laghe annaaili va taumattu earueinila, karika va God.

#### **Iesu ghe mae sio tani asaangi kosa ateva**

<sup>44</sup> Iesu ghe sama anamungailila me ghe uela va, “Lo ateva aikaaiia etaghi, aikaaiia tee ta lo ateva ghe sungieghila.”<sup>45</sup> Me lo ateva etaraieghi, etaatara tee lo ateva ghe sungieghila.<sup>46</sup> Aghi aghe mae sio tale kosa ateva oia arova mallanga ateva va lo ateva eaiesoa etaghi, karika aue etoka tale saurrom.

<sup>47</sup> “Arova lo ateva enongo inangarighi me etam aimuli tee, karika aue agheleia va eaisakei, poli karika aghe mae sio tani ghelei niiasakei tale taumattu tale kosa ateva oia, ta aghe mae sio tani asaangila.”<sup>48</sup> Lo ateva etam annaieghi, me erati inangarighi, aue isaa o inangari aue egheleia eaisakei nau airuuruu tale kosa ateva.<sup>49</sup> Karika aghaulia righi voto tale nim nannaaghi. Tamaghi ghe sungieghila ghe auliaala sa ateva tani aulieinia me vaalua tani auliaa.<sup>50</sup> Akilakila va llo ghe auliaala aue etau mae mauue ateva tokatoka liu ia. Liuna avalua o me atani auliaa voto Tamaghi ghe auliaa tau mae sio.”

#### **Iesu ghe porala kkeira kapuna disaepolo atoa**

**13** Nau Pasova ngateva karika ghe mae, me Iesu ang ghe kilala va nauna ange aakalakalaa tani kasu vuli

<sup>‡</sup>12:38 Aisaea 53:1

<sup>¶</sup>12:40 Aisaea 6:10

kosa ateva, me emene sae ta Tamane. Ghe aielousiangaili kapuna atoa tale kosa ateva oia. Aielousiaane etaira ghe laa ghaa sio nau ghe mate vululala.

<sup>2</sup>Nau laghe namanama ta pai ngelo alai, Satana ang ghe atoka ssola ninnanna ngateva ta Jiudas, natuna ia Saemon Iskariot, tani laoaa Iesu ta tau ngai ssateena atoa. <sup>3</sup>Iesu ghe kilakila va God ghe tau ekapala voto ta nimane, me ia ghe kasula ta God, me aue emene sae ta God. <sup>4</sup>Liuna avalua o me Iesu ghe tingina saela nongina laghe namanama, me ghe ghaa vella unna aiaasae ngeleka ateva, me ghe ainavitaala taolo ateva. <sup>5</sup>Ghe kao kaaila manu tale aikaai manu etivilau, me ghe tiuaala tani pora kkeira disaepolo atoa, me ghe uluulu tale taolo ateva ghe aainavitainia etana.

<sup>6</sup>Ghe rekatala ta Saemon Pita, me Pita ghe uela etana va, “Vau eteva, uaanna tani pora kkeghi?”

<sup>7</sup>Me Iesu ghe liula me ghe uela etana va, “Voto aghelei, karika aue ukila ghaine, auena uvira mene kila.”

<sup>8</sup>Me Pita ghe uela etana va, “Karikaaili umene pora kkeghi!”

Me Iesu ghe uela va, “Arova atam pora kkem, karika urooro tani toka teeieghi.”

<sup>9</sup>Saemon Pita ghe uela etana va, “Vau eteva, karika umene pora nonga kkeghi ta upora tee nimaghi me urughu eteva!”

<sup>10</sup>Me Iesu ghe uela va, “Lo ateva ang ghe suusuula karika erooro tani mene suusu, ta enim pora nonga kkena, me aue eraangisana. Am raangisana am, karika va am akapa.” <sup>11</sup>Poli Iesu ghe kilakila va see aue etau elao ta tau ngai ssateena atoa, liuna avalua o me ghe uela va, “Karika va am akapa raarangisana am.”

<sup>12</sup>Nau eteva ghe ruula tani pora kkeira, me ghe mene asaela unna

aisoe ngeleka ateva, me ghe toka siola nongina aillaai inana ateva, me ghe uela etaira va, “Ngam tara kilala voto ngagheleila? <sup>13</sup>Am ue etaghi va ka puimim tisa ieghi me Vauimmi ieghi. Isaa o voto am asease etaghi masinaaili, ta koronna. <sup>14</sup>Arova aghi, vauimmi ieghi me tisa ieghi, me ngaporala kkeimim, am tee am pora kkeira mene katoa etaimim. <sup>15</sup>Ngaghaapasunga tau aatu voto am ghelei, am ghelei nongina ngagheleila. <sup>16</sup>Aghaaulia ngakoronna etaimim va tau ngai nongonongo anna ateva karika namuu ia ta vauna ateva, me tau ngai kasuaa inangari eteva karika tee enaanamuu ta lo ateva esungisungia. <sup>17</sup>Arova am kila isaa o voto me am ghelei, aue am masimasi.

<sup>18</sup>“Karika va aghaauliaa inangari oia etaimim akapa, ta poli akilakila lo atoa aghe koloamla, me llo Uru ngai Manga ateva ghe auliaala aue ekoronna. Ghe uela va, ‘Lo ateva enamanama teeieghi aue essa teeieghi.’<sup>8</sup>

<sup>19</sup>“Aghaaulia ngamuemue aalokoi llo oia, me nau aue elutu aue am aiesoa etaghi va aghi ia o taumattu ngateva. <sup>20</sup>Aghaaulia ngakoronna etaimim va lo ateva eghaaghaa lo ateva aghe sungiela, eghaaghaaieghi, me lo ateva eghaaghaaieghi, eghaaghaa lo ateva ghe sungieghila.”

### **Iesu ghe auliaala voto aue elutu etana**

*(Mat 26:20-25; Mak  
14:17-21; Luk 22:21-23)*

<sup>21</sup>Nau eteva Iesu ghe ruula tani auliaa isaa o inangari, nannaane ghe maatela me ghe siuailila euu, me ghe uela va, “Aghaaulia ngakoronna etaimim va kat-eva etaimim aue etaueghi lao ta nimaira tau ngai ssateeghi etoa.”

<sup>22</sup>Aloira disaepolo atoa ghe kaakapa va ghe auliaa tee see, liuna avalua o

me laghe aitara atokala. <sup>23</sup> Me lo ateva disaepolo Iesu ghe ailousiangailiia ghe tokatoka akalakalanginaaili ta Iesu. <sup>24</sup> Saemon Pita ghe matamatai elao va ghe kolomi Iesu va see aue ghe ghelei isaa o voto ghe auliaa.

<sup>25</sup> Ia o disaepolo ateva ghe valaa lao sio ta Iesu me ghe kolomiela va, “Vau eteva, see aue eghelei isaa o voto?”

<sup>26</sup> Iesu ghe liula me ghe uela va, “Lo ateva aue aghasuu verete me ataula etana.” Me ghe asuala verete me ghe taula ta Jiudas, natuna ia Saemon Iskar-iot. <sup>27</sup> Jiudas ghe ghaala isaa o inana me Satana ghe valaiela. Me Iesu ghe uela etana va, “Voto uanna tani ghelei, ughelei parasi.” <sup>28</sup> Lo atoa laghe tokatoka tale ia o ninamanama atea laghe tam kilala malloeana inangari Iesu ghe auliaa etana. <sup>29</sup> Katoa laghe annaa va poli Jiudas ghe posoposo uneira viliki veu, o Iesu ghe sungisungia tani laa poli righi voto eaimonomosiaa tale nivelu eitaua ngateva, o tani laa tau righi voto ta lo atoa karika peiira. <sup>30</sup> Jiudas ghe ghaala tuku verete ateva me ghe kupi ghoala. Ang ghe voala.

### Iesu ghe taula ouna tana inangari niloeloe

<sup>31</sup> Vara Jiudas ghe kasula me Iesu ghe uela va, “Ia oia Natuna ateva Taumattu ngateva ararina atea ange saela epona, me God tee ararina atea ange saela epona tale Natuna ateva Taumattu ngateva. <sup>32</sup> Arova ararina atea God esae epona tale Natuna ateva Taumattu ngateva, God nonga aue emene asaesae ararina atea Natuna ateva Taumattu ngateva, me isaa o voto aue eghelei parasi.

<sup>33</sup> “Kapughu aliki etoa! Karika oroi nau aue atoka teeiem, me ghaisa ngarighi am tiuaa tani paeaghi. Aghauliaa llo nongina aghe auliaa ta aJiu etoa, ‘Karika am rooroo tani lao nongina ngalaolao.’

<sup>34</sup> “Ngatautau aatu ouna inangari niloeloe: elome etaimim am aielousi. Nongina aghi aghe aielousieiniemla, elome etaimim am tani aielousi. <sup>35</sup> Arova elome etaimim va am aielousi, ila akapa aue la kila va am kapughu disaepolo iem.”

### Iesu ghe uela va Pita aue eliu vilina etana

(*Mat 26:31-35; Mak 14:27-31; Luk 22:31-34*)

<sup>36</sup> Saemon Pita ghe kolomila Iesu va, “Vau eteva, eaa aue ulao?”

Iesu ghe liula me ghe uela va, “Karika urooroo tani lao nongina ngalaolao tale isaa oia nau. Auena aue uaimuli.”

<sup>37</sup> Pita ghe liula me ghe uela va, “Vau eteva, vaalua me karika arooroo tani usio tale isaa oia nau? Aghi aue amate ta polim.”

<sup>38</sup> Iesu ghe kolomiela va, “Uannaa va aue umate ta mausighi? Aghaaulia ngakoronna etam va aue uaulia ngakasina kotoluata va karika ukilak-ilaieghi, me auena taita paolo ateva eaangari.

### Iesu salana ia tani lao ta Tamane

**14** “Am rau mene alousiusi. Am aiesoa ta God, me am aiesoa tee etaghi. <sup>2</sup> Tanganuena Tamaghi oroianaaili voto tani toka etana, me ngalaolao tani aimonomosiaa isaa o voto aue kaluimim. Karika aue aghele auliaa arova isaa o voto kamena. <sup>3</sup> Poli ngalaolao tani aimonomosiaa tanganueimim, me aue amene sio ghaaiem, me am laa toka teeieghi tale voto ateva atokatoka etana. <sup>4</sup> Ngam ghe kilala salana atikirighi tani lao tale voto ateva ngalaolao etana.”

<sup>5</sup> Me Tomasi ghe uela etana va, “Vau eteva, karika ami kilakila va eaa aue ulao. Vaalua aue ami kila salana atikirighi?”

<sup>6</sup>Iesu ghe uela etana va, “Aghi salana aghi, koronna ieghi me maulue ieghi. Karika teva aue eroroo tani lao ta Tamaghi ta emae mua etaghi. <sup>7</sup>Arova ngam ghe kilaieghila, ngam ghe kilala Tamaghi. Etiitiuaa ghaine ngam kilaiela, me ngam ghe taraiela.”

<sup>8</sup>Pilip ghe uela etana va, “Vau eteva, ami anna va uapasunga Tamam etaimami, me aue vira mene masina etaimami.”

<sup>9</sup>Iesu ghe uela etana va, “Ei Pilip! Vaalua me ngaghe toka teeiemla oroi nau, me karika ughe kilaieghi? Lo ateva ang ghe taraieghila, ang ghe tarala Tamaghi. Vaalua me uue va, ‘Uapasunga Tamam etaimami?’ <sup>10</sup>Karika uaiesoa va aghi ta Tamaghi, me ia etaghi? Inangari aghaauliaa etaimim karika nim nannaaghi, ta Tamaghi etokatoka etaghi, me ia eghelei isaa o niuungu. <sup>11</sup>Am aiesoa nau eteva aue va aghi ta Tamaghi, me ia etaghi. Arova karika, am anna niuungu aghe gheleila me aue eakorokorongana uneimim niaikaaia. <sup>12</sup>Aghaaulia ngakoronna etaimim va lo ateva eaiesoa etaghi, isaa o niuungu aghelei ie tee aue eghelei me voto aue eghelei aue elau llo oia aghelei, ta poli ngalaa saesae ta Tamaghi. <sup>13</sup>Me saa voto am kolomi tale ararighi eteae aue aghelei. Tale ia o salana atikirighi, Natuna aue etau sae ararina ateae Tamane. <sup>14</sup>Arova righi voto am kolomi etaghi, tale ararighi eteae, aue aghelei.

### **Iesu ghe uela va aue etau sio Spirit Manga ateva**

<sup>15</sup>“Arova am aielousieinieghi, aue am nongo usilaa inangarighi aue va am ghelei. <sup>16</sup>Aue akolomi Tamaghi, me aue etau aatu mene kateva tau ngai sausi aue etoka teeiem nau ekapa atoa, <sup>17</sup>Spiriti eteva aue eapasunga voto koronna. Taumattu tale kosa ateva oia karika la rooroo tani ghaaia, poli karika la kilak-

ilaia, me karika laghe taraia. Me am, am kilakilaia, poli etokatoka teeiem, me auena aue etoka elome etaimim. <sup>18</sup>Karika aue anim kasu vuliem arova aliki raue vulu etoa; aue amene mae taraiem. <sup>19</sup>Karika aue emasau, me taumattu tale kosa ateva oia la ruu tani taraieghi, me am aue am taraieghi. Poli aghi maulue ieghi, am tee aue am maulue. <sup>20</sup>Me ia o nau eteva aue am kila va aghi ta Tamaghi, me am etaghi, me aghi etaimim. <sup>21</sup>Lo ateva taumattu ekila inangarighi niloeloe me enongo usilaa, eaielousieinaghi. Me Tamaghi eaielousieinia, me aghi tee aue aghaielousieinia, me aue aghapasungainaghi etana.”

<sup>22</sup>Mene kateva Jiudas (karika va Iskariot) ghe uela ta Iesu va, “Vau eteva, vaalua me aue uapasungainio nonga etaimami, me karika va taumattu tale kosa akapa ateva?”

<sup>23</sup>Iesu ghe liula me ghe uela etana va, “Lo ateva taumattu eaielousieinaghi, aue enongo usilaa inangarighi, me Tamaghi aue eaielousieinia, me aue angalu mae etana tani toka aitauaa teeia. <sup>24</sup>Lo ateva etam aielousieinaghi, karika aue enongo usilaa inangarighi. Isaa oia inangari am nongonongo karika inangarighi, ta inangarina Tamaghi, ia ghe sungieghila tani sio.

<sup>25</sup>“Isaa oia inangari aghaauliaa nau atokatoka teeiem. <sup>26</sup>Me Tau ngai sausi eteva, Spirit Manga ia, aue Tamaghi esungia tani sio tale ararighi eteae, aue eapasunga ngakapa voto etaimim me aue esausiem tani mene nnaa llo voto aghe auliaala etaimim. <sup>27</sup>Luei eteva aghalokoia etaimim. Kalughu luei eteva ngatautau aatu etaimim. Lo ateva o luei karika nongina lo ateva luei kosa ateva etautau aatu. Am rau mene alousiisi me am matautu.

<sup>28</sup>“Ngam ghe nongola ngaghe auliaala etaimim va, ‘Aue akasu, me aue amene

mae taraiem.’ Arova am ailousieinaghi, aue am ghele masimasi poli aue asae ta Tamaghi, ta poli Tamaghi namuu ia etaghi. <sup>29</sup> Avena isaa o voto elutu, me anim aulia ngakasina alokoi kieimim, poli nau isaa o voto elutu, aue am aikkaaia etaghi. <sup>30</sup> Karika aue aghaippooa ngaoroi teeiem, poli vau tapaa kosa ateva ange reerekata. Me karika righi sarasarakaniaane tani ghelei righi voto ta ngetaghi, <sup>31</sup> me aue taumattu tale kosa ateva la kila va aghaielousia Tamaghi, poli llo Tamaghi ghe auliaa tau mae sio agheelei.

“Am tingina saela me ita kasu.”

### Iesu koronna atea uasa uani

**15** Iesu ghe mene uela va, “Aghi koronna atea uasa uani, me Tamaghi umana paa ngutana atingiu. <sup>2</sup> Lo atikirighi tuuna etaghi etam kuukunea righi uenenna, esaisai velua, me llo tuuna ekunekune, esaisai velu ltu llo tuuna karika masina, me eraangisana tani mene kuneaa mene righi uenena. <sup>3</sup> Inangari aghe ppoaala etaimim ghe gheleiemla ngam ghe raarangisanala. <sup>4</sup> Am toka etaghi me aue atoka etaimim. Laa ngai eteva karika aue righi uenenna arova etam tuutuu tale aina ateva. Nongina am, arova am tam toka etaghi, karika aue am kuneaa righi ue ngai.

<sup>5</sup> “Aghi aina aghi me am laangina iem. Lo ateva etoka etaghi me aghi atoka etana, aue ekuneaa oroi ue ngai. Poli karika urooro tani ghelei teva voto arova karika ieghi. <sup>6</sup> Lo ateva taumattu karika etokatoka etaghi, aue la ghaa velua nongina la ghaaghaa velu laa ngai, me nau ange mmatela, la ghaaghaa me la tautau sae tale kuraa. <sup>7</sup> Arova am toka etaghi me inangarighi etoka etaimim, nau am kolomi righi voto, aue am ghaa. <sup>8</sup> Arova am kuneaa oroi ue ngai, aue la tau sae ararina atea Tamaghi, me am aue ekapughu disaepolo iem.

<sup>9</sup> “Nongina Tamaghi ghe ailousieinaghila, aghi tee aghe ailousieinamla. Am toka tale ia o niaelousi eteva kalughu ia. <sup>10</sup> Arova am nongo usilaa inangarighi niloeloe, aue am toka tale ailousiaaghi eteva, nongina aghi aghe nongo usilaala inangarina niloeloe Tamaghi, me aghe tokatoka tale ailousiaane ateva. <sup>11</sup> Aghannaaili va lo ateva nimasimasi kalughu ia etoka etaimim, me epasu tale maamauluaaimim. Liuna avalua o me aghauliaa isaa oia inangari etaimim. <sup>12</sup> Inangarighi niloeloe isaa avalua toko: am ailousia mene kateva elome etaimim nongina aghi aghe ailousieinamla. <sup>13</sup> Arova teva taumattu eailousiangaili kapuna atoa me ghele tau velu maamauluaane tani sausila, ia o lo ateva ase niaielousi, namungaili ia elaulau ekapa mene kasina ase niaielousi. <sup>14</sup> Aue kapughu iem arova am ghelei voto aloeloeam etana. <sup>15</sup> Ia oia karika ngakolokoloam va tau ngai nongonongo anna iem, poli tau ngai nongonongo anna ateva etam kilakila voto vauna ateva eannaa tani ghelei. Ngakolokoloam va kapughu iem poli isaa akapa voto aghe nongola ta Tamaghi ngaghe aulia ngaotula etaimim. <sup>16</sup> Karika va am, am ghe koloaghila, ta aghi aghe koloamla, me aghe tau aatu sio niuungu tani kasu, me am kuneaa oroi llo ue ngai etokatoka liu. Liuna avalua o me nau eteva am kolomi righi voto ta Tamaghi tale ararighi etea, aue Tamaghi etau aatu. <sup>17</sup> Isaa o inangari niloeloe aghaauliaa etaimim: am ailousia mene kateva elome etaimim.

### Taumattu tale kosa ateva aue la ssa tee disaepolo atoa

<sup>18</sup> “Arova taumattu tale kosa ateva oia la ssa teeiem, am nim annaa va laghe ssa tee akasina teieghila. <sup>19</sup> Arova kosa

ateva oia tanganueimim tuungia, aue la ghele masieinam va kapuira iem, me poli ngaghe suitoongainamla tale kosa ateva oia, liuna avalua o me la sessa teeiem. <sup>20</sup> Am annaa llo aghe auliaala etaimim va, ‘Tau ngai nongonongo anna ateva karika namuu ia ta vauna ateva.’ Arova laghe gheelei saasakia etaghi, aue la ghelei tee etaimim. Arova laghe nongo usilaala inangarighi, aue laghele nongo usilaa tee inangariimim. <sup>21</sup> Aue la ghelei teeiem isaa o voto poli mausi ararighi eteae, ta poli karika la kilakila lo ateva ghe sungieghila tani sio. <sup>22</sup> Arova aghe tam sio mae tani auliaa inangari etaira, karika aue la ghele tara kila va gheegheleiaaira sesa, me ia oia karika la rooroo tani ue va la tam kilakila va gheegheleiaaira sesa. <sup>23</sup> Lo ateva esessa teeioghi, esessa tee Tamaghi. <sup>24</sup> Arova aghe tam toka teeilala me aghe tam gheleila niuungu elome etaira, nongina karika mene teva taumattu ghe gheleila emua arau, karika aue la ghele tara kila va gheegheleiaaira sesa. Me poli laghe tarala, liuna avalua o me la sessa teeiengalua me Tamaghi. <sup>25</sup> Isaa oia voto elutulututu tani asokoi inangari laghe pitila tale uneira inangari nipaopao, eue va, ‘Karika esuisui kkai tale teva voto me la nim sessaila etaghi.’\*\*

<sup>26</sup> “Nau tau ngai sausi eteva emae, aue eauliaa uunguaaghi etaimim. Aue asungia tani sio etaimim, ia o Spiriti eteva eaapasunga voto koronna, aue ekasu ta Tamaghi. <sup>27</sup> Me am tee, aue am aulia ngaotueghi poli am ghe toka teeioghila nau aghe tiuaala uunguaaghi.

**16** “Aghaauliaa isaa o voto etaimim poli am rau mene oghi vulu aikaaiaaimim. <sup>2</sup> Aue la tiu veluem tale aleira ale nivelu eitauaa, me aue nau emaemae lo atoa la uvi emateam, aue la

ghannaa va la gheelei uunguaane God. <sup>3</sup> Isaa o voto aue la ghelei etaimim poli karika la kilakilaiengalua me Tamaghi. <sup>4</sup> Aghaauliaa isaa o voto etaimim me nau isaa o voto etiuua tani lutu, aue am nnaa va ngaghe auliaala kieimim.

### Uunguaane Spirit Manga ateva

“Aghe tokatoka teeiem, liuna avalua o me karika aghe auliaa isaa o voto emua arau. <sup>5</sup> Me ia oia ngamene laa saesae ta lo ateva ghe sungieghila tani sio, me karika teva etaimim ekookolomieghe va, ‘Eaa ulao?’ <sup>6</sup> Nau ngaghaauliaa me ngam nongonongo isaa o inangari ngam nim aalousiusi. <sup>7</sup> Aghaaulia ngakoronna etaimim va emaamasina va akasu, poli arova atam kasu, tau ngai sausi eteva karika aue esio etaimim, me poli ngakasukasuu aue asungia tani mae etaimim. <sup>8</sup> Nau eteva emae aue eghelei taumattu tale kosa ateva oia la kila amasina ssavoto me ghulughuluena me niaisakei. <sup>9</sup> Tale ssavoto, poli la tam aiesoa etaghi, <sup>10</sup> me tale ghulughuluena, poli ngalaa saesae ta Tamaghi, me karika aue am mene taraieghi. <sup>11</sup> Me tale niaisakei, poli vau tapaa kosa ateva oia ang ghe aisakeila, me ghe tam roola.

<sup>12</sup> “Oroianaaili voto aghanna tani auliaa etaimim, me poli isaa oia nau karika aue am kila amasina. <sup>13</sup> Nau Spiriti eteva eaapasunga voto koronna aue emae, aue eauliaa voto koronna etaimim. Karika aue eauliaa righi voto nim nannaane. Aue eauliaa llo ghe nongola me aue eauliaa kieimim tale voto auena emae. <sup>14</sup> Aue easaesae ararighi eteae, poli aue eghaa inangarighi me eauliaa etaimim. <sup>15</sup> Isaa akapannaaili voto kanna Tamaghi, kalughu. Liuna avalua o me aue va, ‘Aue eghaa inangarighi, me eauliaa etaimim.’

\*\* 15:25 Sams 35:19; 69:4

### Nialousiusi me nimasimasi

<sup>16</sup>“Karika masauna arighi me aue am lungieghi, me karika aue emasau me aue am mene taraieghi.”

<sup>17</sup>Me katoa tani kapuna disaepolo laghe aikolomieinila va, “Vaalua me eue va, ‘Karika masauna arighi me aue am lungieghi, me karika masau me aue am mene taraieghi,’ me eue tee va, ‘Alao ta Tamaghi?’” <sup>18</sup>Laghe aikolomieinila va, “Vaalua malloeana nau eue va ‘karika masauna arighi’? Karika ita kilakila amasina llo eaauliaa.”

<sup>19</sup>Iesu ghe kilakila saa voto ateva laghe anna tani kolomia. Liuna avalua o me ghe uela etaira va, “Nga uela va, ‘Karika masauna arighi me aue am lungieghi, me karika masau me aue am mene taraieghi.’ Isaa o llo am aikolomainiem etana? <sup>20</sup>Aghaaulia ngakoronna etaimim va aue am ngala me am alousiusieili, me taumattu tale kosa ateva oia aue la masimasi. Me am, aue am alousiusieili, me alousiusi-aaimim aue am mene masimasi etana. <sup>21</sup>Nau aliki eteva ange anna tani lutu, vause ateva ealousiusi poli ekilakila va nau nimmarikana ange rekatala, me nau aliki eteva elutulutu, eaikkaluaa nimmarikana ghe ghaala, poli emasimasi va aliki eteva ange lutula tale kosa ateva. <sup>22</sup>Ia o voto ateva nonginaaili am. Ia oia am aalousiusi me aue amene taraiem, me aue am masimasi. Lo ateva nimasimasi, karika teva aue eghaa velua etaimim. <sup>23</sup>Ia o nau eteva karika aue am kolomieghi tale teva voto. Aghaaulia ngakoronna etaimim va Tamaghi aue etau aatu voto am kolomi tale ararighi eteae. <sup>24</sup>Nau too ang ghe lao sio karika am ghe kookolomi righi voto tale ararighi eteae. Am kolomi me aue am ghaa me aue am pasu tale nimasimasi.

### Iesu ghe apalala kosa ateva

<sup>25</sup>“Isaa o voto aghaauliaa etaimim tale inangari niaimatoonga, me aue nau too emaemae, karika aue aghaauliaa voto etaimim tale inangari niaimatoonga. Aue aghaaulia ngamasalika ngaili Tamaghi etaimim, me aue am kila amasinaailia. <sup>26</sup>Ia o nau eteva aue am kokkolomi tale ararighi eteae, me karika aue va aghi aue akolomi Tamaghi tani sausiem, <sup>27</sup>poli Tamaghi tee eaielousieinam ta am, am ghe aielousieinaghila me am aiesoa va aghi aghe tokatoka tee God, me aghe sio mae. <sup>28</sup>Aghe kasula ta Tamaghi, me aghe sio mae tale kosa ateva oia, me aue amene kasu vuli kosa ateva oia tani mene sae ta Tamaghi.”

<sup>29</sup>Me kapuna disaepolo atoa laghe uela va, “Ngami vira mene ghaaghaa amasina inangarim, poli karika umene poppooaa inangari niaimatoonga. <sup>30</sup>Ia oia ngami kilakila va ukilakila akapa voto, me karika teva aue ekolomio tale righi nikokkolomi, poli ukilakila akapa nannaaimami. Liuna avalua o me ami aiesoa va ughe kasula ta God.”

<sup>31</sup>Iesu ghe liula me ghe uela etaira va, “Angam vira aikaia etaghi? <sup>32</sup>Nau ange aakalakalaa me ange rekatala va aue la ghameti reerekatainam, me kateva kateva etaimim aue eilou lao tangauena. Aue am ilou vulieghi me aue ekapa kapughu, me karika va aue eka paaili kapughu, ta poli Tamaghi aue etoka teieghi.

<sup>33</sup>“Aghe aauliaa isaa oia inangari etaimim, poli aghanna va am toka etaghi, me aue luei eteva etoka etaimim. Kosa ateva oia oroieili nimmarikana am ghaaghaa, me am rau mene sio asoasoa, poli ngaghe apalala voto tale kosa ateva oia.”

**Iesu ghe pureaala  
kapuna disaepolo atoa**

**17** Nau Iesu ghe ruula tani aippoaa me ghe taatara saela epona liu me ghe uela va, “Tamaghi, ange ghaala nau. Utau sae ararina ateaee natum, me natum tee etau sae ararim ateaee. <sup>2</sup>Poli uغه tau lao sio ninamu ngateva etana tani aitaraa taumattu ngakapaaili, va aue etaula maulue ateva tokatoka liu ia ta lo atoa taumattu uغه taula lao sio etana. <sup>3</sup>Maulue ateva tokatoka liu ia, ia avalua toko, va taumattu ekilaio, va io God koronna io, me la kila tee Iesu Karisto uغه sungiela tani sio. <sup>4</sup>Aghe asaesaala ararim ateaee me sarasarakani-aam tale kosa ateva; ngaghe ruula niu-ungu uغه tau mae sio etaghi va aghelei. <sup>5</sup>Isaa oia Tamaghi, tale voto ateva utokatoka, utau mae ninamu ngateee ghe tokatoka teeieghi emua arau, nau kosa ateva karika ghe lutu.

<sup>6</sup>“Ngaghe aulia ngaotula ararim ateaee tale taumattu tale kosa ateva oia uغه taula mae sio etaghi. Kapum ila me uغه taula mae sio etaghi, me ngila ghe nongo usilaala inangarim. <sup>7</sup>Ia oia ngila ghe kilala va isaa akapa voto uغه tau mae sio etaghi kalum. <sup>8</sup>Ngaghe auliaa tau lao sio inangari uغه auliaa tau mae sio etaghi me ngila ghe ghaala, me ngila ghe akoronnaailila va aghi aghe kasula etam me ngila ghe aikaiaala va io uغه sungieghila. <sup>9</sup>Akookolomi sae mausiira. Karika akookolomio sae tale taumattu ngakapa atoa tale kosa ateva oia. Akookolomio sae mausi taumattu uغه tau mae sio, poli kapum ila. <sup>10</sup>Taumattu ngakapa kapughu, kapum tee, me lo kapum kapughu tee ila, la ghaapasunga masi gheeleiaaghi. <sup>11</sup>Me ia oia karika aue amene toka tale kosa ateva ta ngamene laa sae-sae etam. Me ila ngila tokatoka. Tamaghi manga io, uaitarainila tale ararim

ateaee sarasarakana ia, ia o ararim eteaee uغه tau mae sio etaghi, me aue ekateva nonga ila, nongina italu ekaakat-eva nonga italu. <sup>12</sup>Nau aghe tokatoka teeila, aghe aitara ngamasainila tale sarasarakania ararim ateaee, ia o arari eteaee uغه tau mae sio. Aghe aitarainilala, karika teva ghe rauela, llo nonga ateva taumattu ghe annala va eraua ghe rauela. Isaa avalua o me inangari tale Uru ngai Manga ateva ghe koronnala.

<sup>13</sup>“Ia oia ngamene mae saesae etam. Isaa oia voto aghaauliaa tale nau oia atokatoka tale kosa ateva, me aue la ghaa kalughu nimasimasi, me aue epasu tale urunguitaniira. <sup>14</sup>Aghe auliaa tau lao sio inangarim, me taumattu ngatoa tale kosa ateva oia esessaila etaira, poli karika va mene taumattu tale kosa ila, nongina aghi karika va taumattu tale ia oia kosa ateva. <sup>15</sup>Karika va akookolomio sae va ughaa vella tale kosa ateva oia. Akookolomio tani aitarainila tale sesa taumattu ngateva. <sup>16</sup>Karika va taumattu tale kosa ila, nongina aghi karika va taumattu tale kosa ieghi. <sup>17</sup>Uamangaila tale llo voto koronna; poli inangarim koronna. <sup>18</sup>Nongina uغه sungieghila tani sio tale kosa ateva, aghi ngamene sungisungila tani lao akapa see tale kosa ateva. <sup>19</sup>Mausiira me aghe tau ekapa aatu sio maamauluaaghi etam, me ila tee aue la tau ekoronna lao maamauluaaira etam.

<sup>20</sup>“Karika apuupure nonga etaira, ta apuupure tee ta lo atoa aue la ghaikaaila etaghi nau eteva la nongo inangariira. <sup>21</sup>O Tamaghi, apuupure etaira va ekateva nonga ila, nongina io utokatoka etaghi, me aghi etam. Aghaloanna va ila tee la toka etaitalu, me taumattu ngatoa tale kosa ateva oia aue la ghaikaaila va io uغه sungieghila. <sup>22</sup>Uغه tau mae sio sarasarakana etaghi, me aghi, ngaghe tau lao sio isaa o sarasarakana etaira va aue ekateva nonga ila, nongina



italua ekaakateva nonga italua, <sup>23</sup>aghi etaira me io etaghi, me aue ugheleila la tani kateva nonga ila, me aue taumattu tale kosa ateva oia la kila va io ughe sungieghila tani sio, me uailousieinila nongina uailousieinaghi.

<sup>24</sup>“Tamaghi, aghaloannaaili va taumattu ughe tau mae sio etaghi, la toka teeieghi tale masaliki eteae alaa toka etana, me aue la tara sarasarakana ughe tau mae sio etaghi nau ughe tam ghelei kosa ateva, poli ughe ailousieinaghi.

<sup>25</sup>“O Tamaghi, e eleiaam ghulughuluena, me taumattu tale kosa ateva la tam kilakilaio, ta aghi akilakilaio, me kapughu etoa la kilakila va io ughe sungieghila tani sio. <sup>26</sup>Aghe auliaala me apasungaala eeleiaam etaira, me aue amene auliaa etaira. Me aue lo ateva ni-aielousi ugheleia etaghi aue etoka tee etaira, me aghi tee atoka etaira.”

### Laghe kunela Iesu

(*Mat 26:47-56; Mak 14:43-50; Luk 22:47-53*)

**18** Nau eteva Iesu ghe ruula tani looloo sae, ia me kapuna disaepolo atoa laghe laula tale ateo arighi eKidron, me laghe lao sio tale paa ngutana atingiu.

<sup>2</sup>Jiudas, ia o taumattu ngateva aue etaula Iesu ta tau ngai ssateena atoa, ghe kilakila nongina Iesu ghe lao sio, poli oroi nau ia me kapuna disaepolo atoa laghe laolao etana. <sup>3</sup>Jiudas ghe lao sio tale paa ngutana atingiu tee soldia ngatoa me polisi etoa, namuu ta pristi etoa me Paresi etoa laghe sungilala. Laghe sausau lam me usulu me voto aiiaiuvi.

<sup>4</sup>Iesu ange kila akapala voto aue elutu tale maamauluaane. Liuna avalua o me ghe tingina ghoala etaira me ghe uela etaira va, “Am paepae see?”

<sup>5</sup>Laghe liula me laghe uela va, “Ami paepae Iesu aNasreti ia.”

Me Iesu ghe uela va, “Aghi oia.” Jiu-das, ia o ghe tau lao sio Iesu, ghe tiitingina teeila. <sup>6</sup>Nau eteva ghe ruula tani ue va, “Aghi oia,” me laghe kaakatungaala viliira etapaa kosa.

<sup>7</sup>Me Iesu ghe mene kolomilala va, “Am paepae see?”

Me laghe uela va, “Iesu aNasreti ia.”

<sup>8</sup>Iesu ghe liula me ghe uela etaira va, “Ngaghauliaala etaimim va aghi oia. Arova am paepaeaghi, am tau velu lo atoa toko, me la kasu.” <sup>9</sup>Isaa o voto ghe lutula me inangari ghe aulia ngakasina alokoila ghe koronnala va, “Karika teva ughe tau mae sio etaghi ghe rauela.”

<sup>10</sup>Saemon Pita ghe sausau baenata ateva. Ghe kapeala, me ghe patoala kapuna tau ngai nongonongo anna ateva Namu ngateva tana Pristi, me ghe sai patela talingane ativilau tale pai muenna atelange. Ararina ateaie ia o tau ngai nongonongo anna ateva ta Malkus.

<sup>11</sup>Me Iesu ghe uela ta Pita va, “Kaaila baenata ateva tale aikakkaaina ateva. Uannaa va karika arooroo tani ropi kapa ateva Tamaghi ghe taue mae sio?”

### Laghe laoa sio Iesu ta Annas

(*Mat 26:57-58; Mak 14:53-54; Luk 22:54*)

<sup>12</sup>Me kapuira namu ngateva soldia me kapuna soldia ngatoa me polisi etoa me kapuira namu ngatoa aJiu etoa laghe kunela Iesu, me laghe irila nimana. <sup>13</sup>Me laghe laoa ngakasinaie sio mua ta Annas. Annas alumuna ta Kaeapas, Kaeapas namuu ia ta pristi etoa tale ia o nimanama ateaie. <sup>14</sup>Kaeapas ia o taumattu ngateva ghe uela ta aJiu etoa va emaamasina arova kateva nonga taumattu ghele mate tani ghaa liuira akapa taumattu ngatoa.

**Aitiuti ta Pita tani ue  
va etam kilakila Iesu**

(*Mat 26:69-70; Mak  
14:66-68; Luk 22:55-57*)

<sup>15</sup> Saemon Pita me mene kateva disaepolo lalu ghe aimuli tee Iesu. Poli namu ngateva tana pristi ekilakila ia o disaepolo ateva, liuna avalua o me ia o disaepolo ateva ghe sso teela Iesu elome tale unna valavala ateaie ia o namu ngateva tana pristi. <sup>16</sup> Me Pita nonga ghe toitoi eleka tale atamana ateaie. Ia o disaepolo ateva, namu ngateva tana pristi ghe kilakilaia, ghe oghi ghoala, me ghe aip-pooaa teela aliki vause ateva ghe aaitoia atamana ateaie, me ghe kolola Pita, me lalu ghe kupi ssola.

<sup>17</sup> Me aliki vause ateva ghe aaitoia atamana ateaie ghe uela ta Pita va, “Io tee kateva kapuna disaepolo ia okae tau-mattu ngateva, va?”

Pita ghe liula me ghe uela va, “Karika va aghi tee.”

<sup>18</sup> Poli kkaili eteva me tau ngai nongonongo anna atoa me polisi etoa laghe aisokosokolaala kura ateaie, me laghe maamaruu. Pita tee ghe tiitingina teeila tani maruu.

**Namu ngateva tana pristi ghe  
kolomila Iesu tale nikokkolomi**

(*Mat 26:59-66; Mak  
14:55-64; Luk 22:66-71*)

<sup>19</sup> Namu ngateva tana pristi ghe kolomila Iesu ta kapuna disaepolo atoa me tale voto ghe aapasunga.

<sup>20</sup> Iesu ghe liula me ghe uela va, “Aghe aapasunga voto ta mata ngoroi etoa. Aghe aapasunga tale ale nivelu eitauaa me tale ale manga, isaa o voto aJiu etoa laghe mae veluvelu eitauaa etana. Karika aghe aulia ngaeisulia righi voto. <sup>21</sup> Vaalua me ukookolomieghe? Ukolomi lo atoa laghe nongonongoaghi, poli ila la kilakila sa ateva aghe aaulieinia.”

<sup>22</sup> Nau ta Iesu ghe aulia ngaval-uela o, me kateva polisi ghe tiitingina akalakalaa etana ghe posalaiela me ghe uela va, “Vaalua me uliuliu ase inangari eteva o ta namu ngateva tana pristi?”

<sup>23</sup> Iesu ghe liula me ghe uela va, “Arova aghauliaala righi voto sesa, uaulia ngaotu, me arova aghauliaa voto koronna, vaalua me uposalaieghila?” <sup>24</sup> Me Annas ghe sungiela va elao ta Kaeapas, ia namuu ia ta pristi etoa. Iriiri ia me laghe laoinie sio.

**Pita ghe mene uela va  
karika ekilakila Iesu**

(*Mat 26:71-75; Mak  
14:69-72; Luk 22:58-62*)

<sup>25</sup> Saemon Pita ghe tingina maamaruu me laghe kolomiela va, “Io tee kateva kapuna disaepolo, va?”

Ghe liula me ghe uela va, “Karika va aghi tee.”

<sup>26</sup> Kateva kapuna tau ngai nongonongo anna namu ngateva ta pristi etoa, kapuna ia ia o taumattu ngateva Pita ghe patoa vella talingane atelange, ghe uela va, “Aghe tara teeiela tapaa ngutana nau eteva am me ia, va?”

<sup>27</sup> Me Pita ghe mene uela va, “Karika.” Me paolo ateva taita ia ghe aangarila.

**Laghe laooa sio Iesu ta Paelat**

(*Mat 27:1-2, 11-14; Mak  
15:1-5; Luk 23:1-5*)

<sup>28</sup> Vara me aJiu etoa laghe ghaala Iesu ta Kaeapas, me laghe laoinie sio tanganuena Gavana ngateva. Elue talaua poopooa. Laghe tam aloanna tani kupi sso tanganuena, poli laghe rau gheleila va laghe tam raarangisana, poli laghe aloanna va la usi tani namanama ta Pasova ngateae. <sup>29</sup> Paelat ghe kupi ghoa mae me ghe uela va, “Vaalua me am maeaa sio taumattu ngateva oia va aisakei?”

<sup>30</sup> Me laghe uela va, “Arova karika ghe ghelei righi sesa voto, karika aue ami ghele maeania etam.”

<sup>31</sup> Me Paelat ghe uela etaira va, “Am ghaaiela, me am laa ghelei niaisakei etana nongina uneimim lo eaauliaa.”

Me aJiu etoa laghe liula me laghe uela va, “Karika erooroo va ami, ami uvi emate teva taumattu.” <sup>32</sup> Isaa o voto ghe lutula me inangarina Iesu ghe aaima-toonga ase nimate atae aue eghaia ghe lutu ekoronala.

<sup>33</sup> Paelat ghe mene kupi ssola tale ale ateva me ghe uela va la kolo mae Iesu, me ghe kolomila Iesu va, “Io kapuira kingi io aJiu etoa?”

<sup>34</sup> Me Iesu ghe kolomiela va, “Nannaam llo ona, o toa laghe auliaa tau aatu sio etam?”

<sup>35</sup> Paelat ghe liula me ghe uela va, “Vara aJiu eghi? Kapum atoa me namuu ta pristi etoa la maeanio sio etaghi. Sa ateva ughe gheleila?”

<sup>36</sup> Iesu ghe uela va, “Ararimangalighi eteva karika va pei tale kosa ateva oia. Arova pei tale kosa ia, aue kapughu tau ngai nongonongo anna atoa la ghele aiuuvu tani ghelei runga aJiu etoa, me karika aue la ghele kuneioghi. Me ia oia, ararimangalighi eteva karika pei tale kosa ateva ia.”

<sup>37</sup> Paelat ghe uela va, “O io kingi io, va?”

Me Iesu ghe uela va, “Uaulia ngakoronna tani ue va aghi kingi eghi, poli mausina avalua o me aghe lutula, me aghe sio mae tale kosa ateva tani aulia ngaotu voto koronna. Lo atoa tale pai koronna ativilau, la nongonongo usilainaghi.”

<sup>38</sup> Paelat ghe kolomiela va, “Saa ia koronna ateva voto?”

Ghe aulia ngavalua o me ghe ghoala eleka nongina aJiu etoa, me ghe uela va, “Karika ngatarala righi voto esuisui kkai va sesa voto ghe ghelei. <sup>39</sup> Kateva ase

voto agheeleia nau Pasova, atautau velu kateva taumattu etokatoka tale ale mata voovoo ekupikupi ghoa. Am aloanna va atau velu kapuimim kingi eteva aJiu etoa?”

<sup>40</sup> Laghe ovaova anamuu tani liu va, “Karika mene ia! Utau velu Barabas!” Barabas tau niaiuvu ia.

### **Paelat ghe uela va la uvi emate Iesu**

(*Mat 27:15-31; Mak 15:6-20; Luk 23:13-25*)

**19** Me Paelat ghe uela va la ghaa Iesu me la uetaia. <sup>2</sup> Me soldia ngatoa laghe navitaala uasa roroana tani ghelei unna kou nguru eteva, me laghe atokaie saela ta uruna, me laghe amolumoluela tale aisoe ateva ghuaghuanna ia. <sup>3</sup> Laghe laolao akalakala etana me laghe ue va, “Ei, kapuira kingi eteva aJiu etoa!” Me laghe pooposala pasipasi matane.

<sup>4</sup> Paelat ghe mene kupi ghoala me ghe uela ta aJiu etoa va, “Am tarala, ngamene aatinginaie ghoa etaimim tani auliaa kieimim va karika ngatarala righi voto esuisui kkai va sesa voto ghe ghelei.” <sup>5</sup> Nau ta Iesu ghe kupi ghoa mae, ghe aatoka kou nguru eteva roroana ia me ghe aasae aisoe ateva ghuaghuanna ia. Me Paelat ghe uela etaira va, “Taumattu ngateva ie toko, am taraiela.”

<sup>6</sup> Nau eteva namuu ta pristi etoa me polisi etoa laghe taraiela, laghe ovaova atingina tani ue va, “Esae vukala tale aikotoo, esae vukala tale aikotoo!”

Me Paelat ghe uela va, “Am ghaaiela, me am laa ghavukalaie sae tale aikotoo. Ta ngetaghi, karika ngatarala righi voto sesa ghe gheleila.”

<sup>7</sup> AJiu etoa laghe liula me laghe uela va, “Tale uneimami inangari nipaopao, eauliaa va erooroo tani mate, poli eue va Natuna ia God.”

<sup>8</sup>Nau Paelat ghe nongola isaa o inangari, maamatautuaane ghe mene lao tee sio, <sup>9</sup>me ghe mene kupi ssola tangane Gavana ngateva, me ghe kolomila Iesu va, “Eaa ughe kasula?” Me Iesu karika ghe liula unna nikokkolomi eteva. <sup>10</sup>Me Paelat ghe uela va, “Karika uanna tani sama teieghi, va? Karika ukilakila va aghi aroroo tani auliaa, me aue ughele kasu, o la ghele avukalaio sae tale aikotoo?”

<sup>11</sup>Iesu ghe liula me ghe uela va, “Karika aue ghele righi sarasarakaniaa inangarim ta ngetaghi arova God epona liu ghe tam tau aatu sio. Liuna avalua o me lo ateva etautauoghi atu etam, kanna ssavoto elaulau kalum tani ssavoto, me namungaili.”

<sup>12</sup>Ghe tiuaala o, Paelat ang ghe paepae salana vaalua tani ghelei, me etau velu Iesu me ekasu, me la rau mene uvi ematea. O me karika ta aJiu etoa laghe ovaova atingina, me laghe ue va, “Arova utau velua va ekasu, karika kapuna io Siisa. Poli lo ateva taumattu eue va kingi ia, ia tau ngai ssateena ia Siisa.”

<sup>13</sup>Nau Paelat ghe nongola isaa o voto, ghe kupiaa ghoa mae Iesu, me ghe toka siola tale aitokatoka ateva aighelei niaisakei ia, tale voto ateva eleka la kolokoloa va ‘Atu ia’, me tale inangari nge Aramaik la ue va ‘Gabbata’. <sup>14</sup>Ia o nau eteva laghe aimonomosiaa Pasova ngateva, me sinaka ateva ange tokatoka polaki, me Paelat ghe uela ta aJiu etoa va, “Kapuumim kingi eteva toko!”

<sup>15</sup>Laghe ovaova atingina me laghe ue va, “Kasueiniela! Kasueiniela me elaa vukala tale aikotoo!”

Me Paelat ghe kolomilala va, “Alaa ghavukala sae kapuumim kingi eteva tale aikotoo?”

Me namuu ta pristi etoa laghe liula me laghe uela va, “Karika mene teva kapuumami kingi, ta nim Siisa nonga.”

<sup>16</sup>Liuna avalua o me Paelat ghe taue lao sio etaira va la laa ghavukalaie sae tale aikotoo.

### Laghe nili evukala saela Iesu tale aikotoo

(*Mat 27:32-44; Mak 15:21-32; Luk 23:26-43*)

Me laghe ghaala Iesu me laghe kasueiniela. <sup>17</sup>Ghe saula unna aikotoo ateva me ghe kupi ghoala, me ghe lao sio tale voto ateva arova Riu uru taumattu ngateva, tale inangari nge Aramaik la aseasea va Golgota. <sup>18</sup>Tale ia o voto ateva laghe nili evukala saela Iesu tale aikotoo ateva, ia me mene ghalua taumattu, kateva ta kativilau, me kateva ta mene kativilau, me Iesu elome.

<sup>19</sup>Paelat ghe aimonomosiaala inangari ghe pitila, me laghe nili evukala tee saela tale aikotoo. Inangari isaa avalua toko va, “Iesu aNasareti ia, kapuira kingi ia aJiu etoa.” <sup>20</sup>Oroi ila aJiu etoa laghe ritila isaa o inangari, poli voto ateva laghe avukalala Iesu etana kalakalangingina ia tale masaliki taatara, me inangari laghe pitila tale inangari nge Aramaik, Latin me Grik. <sup>21</sup>Namuu ta pristi etoa aJiu ila laghe lao sio tani tara Paelat, me laghe uela etana va, “Urau mene piti va uue va ‘Kapuira kingi ia aJiu etoa,’ ta upiti va ‘Ghe ue va, ‘Aghi kingi ieghi ta aJiu etoa.’”

<sup>22</sup>Paelat ghe liula me ghe uela va, “Llo ngapitila, etoka nongina ngapitila.”

<sup>23</sup>Soldia ngatoa laghe ruula tani nili evukala sae Iesu tale aikotoo, me laghe ghaala ghinnanina, me laghe aikoiataala ghe rooaala taumattu ghaata. Me aisoe ngelome nonga ateva ghe oghila, me laghe tarala va karika laghe saikiela tale oroi tuku kalio, ta laghe ghelelela tale tuku kateva nonga kalio, karika saasaiki ia.

<sup>24</sup> Liuna avalua o me soldia ngatoa laghe uela va, “Ita rau mene rasia, ta ita anamisi tani kila va see aue eghaaia.”

Isaa o voto ghe lutula tani asokoi inangari Uru ngai Manga ateva ghe aulia ngamuemua alokoila va, “Aue la ghaikoita uneghi aisoe ngelome ateva etaira, me aue la anamisi tani kila va see eghaa uneghi koloso ateva.”<sup>††</sup>

Soldia ngatoa laghe ghelei evaluela o.

<sup>25</sup> Kinna ghe tiitingina akalakalangina tale aikotoo ateva Iesu ghe vuuvukala etana, ia me nengane vause ateva kinna, me Meri vausenna ia Klopas, me mene kateva Meri aMakdala ia. <sup>26</sup> Nau eteva Iesu ghe tarala kinna me disaepolo ateva ghe ailousiangailiia, lalu ghe tiitingina akalakalaa, me ghe uela ta kinna va, “Kinaghi, ierai o natum ia.” <sup>27</sup> Me ta disaepolo ateva ghe uela va, “Kinam o.” Ghe tiuaala ta ia o nau eteva ia o disaepolo ateva ghe ghaaiela me ghe laoainie sio tanguenua.

### Matemateaane Iesu

(*Mat 27:45-56; Mak 15:33-41; Luk 23:44-49*)

<sup>28</sup> Nau eteva Iesu ghe kilala va isaa akapa voto ang ghe ruula, me tani ghelei voto Uru ngai Manga ateva ghe auliaala ekoronna, ghe uela va, “Aloghu etiulu ange kangngatala.” <sup>29</sup> Aikaai ueani kaakaalina ghe tokatoka. Liuna avalua o me laghe asuula tuku kalio ateva me laghe tueiela tale tuu ngai eteva isopi ia, me laghe ssueinie saela ta paane Iesu. <sup>30</sup> Nau Iesu ghe ropila uaeni kaakalina, me ghe uela va, “Ngaruu ekapala uunguaghi!” Me ghe turrula, me ghe tau vella maamauluaane.

### Soldia ngateva ghe soala kativilau ta Iesu

<sup>31</sup> Ia o nau eteva nau niaipanipaniaa ia, me aue ghe pai sae nau manga ia. Poli aJiu etoa laghe tam aloanna va vilikiira ghe vukala tale nau manga ateva tale aikotoo, liuna avalua o me laghe kolomila Paelat va la paru kotokotoo kkeira, me la ghaa velu sio vilikiira. <sup>32</sup> Soldia ngatoa laghe lao sio tale aitiutiu eteva taumattu, me laghe paru kotoola kekena, me laghe mene lao sio ta mene kateva ta ilalua o taumattu ngalua laghe avukala teeilalue saela me Iesu. <sup>33</sup> Nau eteva laghe mae sio ta Iesu va laghe tarala va ang ghe matela, karika laghe paru kotoola kkena. <sup>34</sup> Kateva soldia ghe soala kativilau ta Iesu tale vaalau eteva, me arovaeaata ta rae me manu ghe akalala. <sup>35</sup> Lo ateva taumattu ghe tarala eaauliaa voto ghe tarala, me voto eaauliaa koronna. Ekilakila va voto eaauliaa koronna, me aue am aikaai. <sup>36</sup> Isaa o voto ghe lutula tani ghelei inangari tale Uru ngai Manga ateva laghe aulia ngalokoila ekoronna va, “Karika aue la paru kotoo teae riuna.”<sup>‡‡</sup> <sup>37</sup> Me mene kasina inangari tale Uru ngai Manga ateva ghe uela va, “Aue la tara lo ateva taumattu laghe soaiela.”<sup>¶¶</sup>

### Laghe kaiaala Iesu

(*Mat 27:57-61; Mak 15:42-47; Luk 23:50-56*)

<sup>38</sup> Vara me Josep, tanguenua tale masaliki taatara ateae eArimatia, ghe lao sio tani kolomi Paelat va ghe ghaa Iesu ang ghe matela. Josep kateva kapuna disaepolo Iesu me ghe aaisulia poli ghe maamatauta aJiu etoa. Paelat ghe uela va eghaaia, liuna avalua o me Josep

<sup>††</sup>19:24 Sams 22:18

<sup>‡‡</sup>19:36 Eksodas 12:46; Nambas 9:12; Sams 34:20

<sup>¶¶</sup>19:37 Sekaraia 12:10

ghe lao sio tani ghaa Iesu me ghe kasueiniela. <sup>39</sup>Me Nikodimas tee ghe mae sio. Ia, ia o taumattu ngateva ghe lao sio tani tara Iesu eleivoo. Nikodimas ghe ghaa lao sio voto masi ngusungusuaane la ghelei tale murr me aloes laghe kao aitauala, maamatanianaane erooro kotolungaulu ghaata (34) kilogram. <sup>40</sup>Lalu ghe ghaala Iesu me lalu ghe rariaala voto masi ngusungusuaane, me lalu ghe sumuela tale masi kalio, nongina aJiu etoa laghe ghelei. <sup>41</sup>Voto ateva laghe avukala saela Iesu etana tale aikotoo, utana atingiu ta ngetana, me liengani niaikaia ngateae ouna ia etana, karika laghe alokoi teva taumattu ta ngetana. <sup>42</sup>Me poli nau niaipanipaniaa ia tale nau manga ateva, me liengani niaikaia ngateae kalakalangina ia, laghe alokoila Iesu tale ia o voto ateva.

### Iesu ghe totula tale nimate

(Mat 28:1-10; Mak 16:1-8; Luk 24:1-12)

**20** Elue talua poopooa tale aitiuti e teva nau tale uiki, nau ghe tam pai emasina, Meri aMakdala ia ghe ssola tale liengani niaikaia ngateae, me ghe tarala va ngeila ghe atakiri vella atu e teva tale atamani liengani niaikaia ngateae. <sup>2</sup>Liuna avalua o me Meri ghe ilou lao sio ta Saemon Pita me lo ateva disaepolo Iesu ghe ailousiangailia, me ghe uela etairarua va, “Ngeila sau vella Vau e teva tale liengani niaikaia ngateae, me karika ngami kilala va eaa ngeila alokoila!”

<sup>3</sup>Liuna avalua o me Pita me mene kateva disaepolo ngilalu ghe laolao tale liu e teva. <sup>4</sup>Lalua akapa lalu ghe iilou, me kateva etairarua ghe ilou emuemuela ta Pita, me ghe laa sso rekata akasina. <sup>5</sup>Ghe turruaala tani taatara sso, me ghe tarala kalio laghe sumuela etana, me karika ghe kupi ssola. <sup>6</sup>Vara me Saemon Pita ghe aaimuli etana ghe rekatala me ghe kupi ssola tale liengani niaikaia ngateae

me ghe tara alokoila kalio ghe asoaso. <sup>7</sup>Me lo atiulu kalio laghe sumla uruna ateva etana ghouhou ia, me ghe asoaso ppae. <sup>8</sup>Vara me ia o disaepolo ateva ghe rekata akasinala ghe kupi ssola, ghe tarala isaa o voto me ghe aikaiaala. <sup>9</sup>Karika aloira ghe maamasaanga llo Uru ngai Manga ateva ghe auliaala va Iesu aue emene totu tale nimate.

### Iesu ghe rekatala ta Meri aMakdala ia

(Mak 16:9-11)

<sup>10</sup>Me disaepolo alua lalu ghe lao sio nongina laghe tokatoka, <sup>11</sup>me Meri ghe tingina ngangngala eleka tale liu e teva. Ghe ngangngala, me ghe turruaala tani taatara sso elome tale liengani niaikaia ngateae, <sup>12</sup>me ghe tarala ensolo alua tale usousoana ghinna lalu ghe tokatoka nongina Iesu ghe asola, kateva ta komo ghuruna, me kateva ta komo kkena.

<sup>13</sup>Me lalu ghe kolomiela va, “Vause ateva, vaalua me ungangngala?”

Meri ghe liula me ghe uela va, “Ngeila sau vella Vaughu e teva, me karika akilakila va eaa ngeila alokoila.” <sup>14</sup>Ghe auliaa llo me vara ghe kirielia, me ghe tarala Iesu ghe tiitingina, me karika ghe kilakila va Iesu etana.

<sup>15</sup>Me Iesu ghe uela etana va, “Vause ateva, vaalua me ungangngala, me upaepae see?”

Meri ghe annaa va tau ngai toi utana ia, ghe liula me ghe uela va, “Namu ngateva, arova io ughe ghaaia, uauliaa va eaa ughe alokoila me alaa ghaaia.”

<sup>16</sup>Iesu ghe uela etana va, “Meri.”

Ghe kirielia me ghe uela va, “Rabboni!” (Inangari nge Aramaik, malloana va “Tisa”.)

<sup>17</sup>Iesu ghe uela va, “Urou mene posoaghi, poli karika aghe sae ta Tamaghi. Lao sio me ulaa ghauliaa ta nengaghi etoa va, ‘Ngalaa saesae ta Tamaghi

me Tamaimim teeia, me kapughu Goto ia me am tee kapuimmi ia.”

<sup>18</sup> Meri aMakdala ia ghe laoa sio masi kiukiu ta disaepolo atoa, me ghe uela va, “Aghe tarala Vau eteva!” Me ghe auliaaala inangari Iesu ghe auliaaala etana.

### Iesu ghe rekataala ta kapuna disaepolo atoa

(*Mat 28:16-20; Mak 16:14-18; Luk 24:36-39*)

<sup>19</sup> Elo alaina ateva aitiutiueteva nau tale uiki, nau disaepolo atoa laghe lao aitauaa sio, me laghe aikavati runga poli laghe maamatauta aJiu etoa, Iesu ghe rekataala me ghe tinginala elome etaira, me ghe uela va, “Luei etoka etaimim.”

<sup>20</sup> Ghe aulia ngavalueta o me ghe apa-sungaala nimane me lo ativilau pai laghe soaiela. Disaepolo atoa laghe masimasi etinginala nau laghe tarala Vauira ateva.

<sup>21</sup> Me Iesu ghe mene uela va, “Luei etoka etaimim. Nongina Tamaghi ghe sungieghila, aghi ngamene sungisungiem.” <sup>22</sup> Ghe aulia ngavalueta o, me ghe inoaa tau lao sio etaira me ghe uela va, “Am ghaa Spirit Manga ateva.” <sup>23</sup> Arova am kkaluaa sesa gheeleiaaira mene katoa, aue isaa o voto aue ekapa, me arova am tam kkaluaa, isaa o voto karika aue ekapa.”

### Iesu ghe rekataala ta Tomasi

<sup>24</sup> Ia o nau eteva Iesu ghe rekataala ta disaepolo atoa, Tomasi (la kolokoloa va kateva ta palua alua), kateva ta kasan-gaulu ghalua disaepolo, karika ia. <sup>25</sup> Liuna avalua o me katoa tani disaepolo laghe uela etana va, “Ami tarala Vau eteva!”

Me Tomasi ghe uela va, “Arova atani tara liu nili ta nimane, me atuli liu nili ta nimane tale vuvu nimaghi, me aposo lo ativilau pai laghe soaiela, aue avira mene aikkaia.”

<sup>26</sup> Ghaitu (7) nau ghe lange sio me disaepolo atoa laghe mene tokatoka tale ale ateva, ila me Tomasi, me laghe aaikavati rungaa, me Iesu ghe tinginala elome etaira me ghe uela va, “Luei etoka etaimim.” <sup>27</sup> Me ghe uela ta Tomasi va, “Posola toko, me utara nimaghi. Ssuua mae sio nimam, me uposo lo ativilau pai laghe soaiela etaghi. Erau mene ghalua nannaam, unim aiesoa.”

<sup>28</sup> Tomasi ghe uela etana va, “Vaughu io me kapughu Goto io!”

<sup>29</sup> Me Iesu ghe uela etana va, “Poli angu taraieghila, uaaiesoa. Niarangise ta lo atoa karika la taatara, me la nim aaiesoa.”

<sup>30</sup> Iesu ghe gheleila oroi mene kasina niaimatoongana ta mataira disaepolo atoa, me karika aghe pitila tale ia oia buku eteva. <sup>31</sup> Me llo oia aghe pitila va am aiesoa etana va Iesu Mesaea ia, me Natuna ia God, me nau am aiesoa, aue am ghaa mauue tale ararina atea.

### Ghaitu (7) disaepolo laghe tarala Iesu

**21** Vara me Iesu ghe mene rekataala ta kapuna disaepolo atoa tale manu talia ngateae eTaiberias. Ghe rekataala etaira avalue toko va: <sup>2</sup> Sae-mon Pita, Tomasi (la kolokoloa va kateva ta palua alua), me Nataniel aKena ia ta pai nge Galili, me natuna taita alua Sebedi, me mene ghalua tana disaepolo laghe mae aitauaa sio. <sup>3</sup> Me Pita ghe uela etaira va, “Aghoa luku.” Me laghe uela etana va, “Ami usio.” Liuna avalua o me laghe saesaela tale paanaka ateva, me laghe ghoala tani luku, me ia o vo ngateva, karika laghe lukula righi kko.

<sup>4</sup> Elue talua poopooa me laghe tarala Iesu ghe tiitingina elosamarra, me karika laghe tara kilaiela.

<sup>5</sup> Ghe ue ghoa etaira va, “Kapughu aliki etoa, am ghaala righi kko?”

Me laghe ue sso va, “Karika.”

<sup>6</sup>Ghe uela etaira va, “Am velu ue-naimim atea tale pai muenna ativilau tale olimoim paanaka ateva, me aue am ghaa righi kko.” Nau laghe gheleila isaa o voto karika ngila ghe rooroo tani ae uvena atea, poli kko ghe oroianaaaila ila.

<sup>7</sup>Me lo ateva disaepolo Iesu ghe ailousieiniaaila ghe uela ta Pita va, “Vau eteva okae!” Nau eteva Saemon Pita ghe kilala va Iesu okae, ghe mene asaela unna aiaasae ngeleka ateva (poli ghe ghaa velu elokoiela) me ghe aoso velu siola tapaa manu. <sup>8</sup>Me mene katoa etaira tana disaepolo laghe aaimuli tale paanaka ateva, laghe aea uvena atea pasu ia tale kko. Karika masau ila elae, ghe rooroo kateva ai (100) mita nonga. <sup>9</sup>Nau eteva laghe sokolaala, me laghe tarala kura atea me kko etoa laghe asoaso etana me verete.

<sup>10</sup>Me Iesu ghe uela etaira va, “Am ghaa mae sio righi kko avirina am lukula.”

<sup>11</sup>Saemon Pita ghe saesaela me ghe ae alokoi saela uvena atea elae, pasu ia tale kko namuu, ghe roola kateva ai ghalimangaulu kotolu (153). Arongona ta oroi kko me uvena atea karika ghe marala. <sup>12</sup>Iesu ghe uela etaira va, “Am mae namanama.” Disaepolo atoa laghe anna tani kolomia va ia see, me karika teva ghe rooroo tani ue va ekolomia, poli laghe kilakila va ia Vau eteva. <sup>13</sup>Iesu ghe lao sio tale kura atea me ghe suraki saela verete me ghe tau lao sio etaira. Me ghe ghelei evalue tee lao o tale kko. <sup>14</sup>Aiaakotonna ateva o nau Iesu ghe rekataala ta disaepolo atoa nau eteva ghe totula tale nimate.

### **Iesu ghe uela ta Pita va caitaraa kiena sipsipi etoa**

<sup>15</sup>Nau eteva laghe ruula tani namanama me Iesu ghe uela ta Pita va, “Saemon natuna io Jon, tani koronna va

uailousieinaghi? Me ailousiaam etaghi elaulau mene katoa disaepolo?”

Me Pita ghe uela va, “Ue, Vau eteva, ukilakila va aghailousieinio.”

Iesu ghe uela etana va, “Uangini kieghi lutu sipsipi etoa.”

<sup>16</sup>Me Iesu ghe mene uela etana va, “Saemon natuna io Jon, koronnaaila va uailousieinaghi?”

Me Pita ghe liula me ghe uela va, “Ue, Vau eteva, io ukilakila va aghailousieinio.”

Me Iesu ghe uela etana va, “Uaitaraa kieghi sipsipi.”

<sup>17</sup>Aiaakotonna ta Iesu ghe mene uela etana va, “Saemon natuna io Jon, uailousieinaghi?”

Pita ghe tam masimasila poli ghe mene kolomiela aiaakotonnaata ateva va koronna va eaielousiaa Iesu. Pita ghe liula me ghe uela va, “Vau eteva, ukilakila akapa voto, me ukilakila va aghaailousieinio.”

Iesu ghe uela etana va, “Uangini kieghi sipsipi. <sup>18</sup>Aghaaulia ngakoronna etam va nau eteva aliki taita io, uaaititio, me ulaolao nongina aloannaam, me nau utaita namuu, aue ussuaa sae nimam, me kateva ppae aue eaititio, me ekatulainio lao nongina utam aloanna tani lao.” <sup>19</sup>Iesu ghe aaulia ngavalua o tani apasunga ase nimate ateva Pita aue ghaaia tani tau sae God. Vara me Iesu ghe uela ta Pita va, “Uaimuli teieghi!”

### **Inangarina lo ateva disaepolo Iesu ghe ailousieinia**

<sup>20</sup>Pita ghe kiriela me ghe tarala lo ateva disaepolo Iesu ghe ailousieinia ghe aimuli teeilalua. (Ia, ia o ghe tani vaavala lao ta Iesu nau laghe namanama me ghe ue va, “Vau eteva, see aue etaou lao ta nimaira tau ngai ssateem atoa?”)

<sup>21</sup>Nau Pita ghe taraie lao sio me ghe kolomila Iesu va, “Vau eteva, vaalua ta ierai o?”



<sup>22</sup>Iesu ghe liula me ghe uela va, “Arova aghanna va ghele tokatoka me aghele mene kiriaa mae, vaalua ta ngetam? Unim aimuli teeieghi.” <sup>23</sup>Poli isaa o inangari me kiukiu ghe kasu ekapa seela ta tue me nenga atoa va ia o lo ateva disaepolo karika aue emate. O me Iesu karika va ghe uela va karika aue emate, ta ghe nim ue va, “Arova aghanna va ghele tokatoka me aghele kiriaa mae, vaalua ta ngetam?”

<sup>24</sup>Ia o disaepolo ateva, ia oia eaaulia ngaotu isaa o voto me ghe piti elokoila. Ami kilakila va voto ghe auli-aala koronna.

<sup>25</sup>Iesu ghe gheleila mene oroieili voto. Aghannaa va arova la ghele piti kateva kateva tale vuku, aue karika righi voto tale kosa ateva oia tani alokoi isaa o vuku.

## Gheegheleiaaira Apostolo Atoa

### Iesu ghe saela epona liu

**1** Tiopilus, tale lo ateva to buku aghe piti ekasinaiela, aghe auliaala niu-ungu Iesu ghe tiuaala tani ghelei me tani apasunga, <sup>2</sup> nau ghe ruula tani aip-pooaa tee kapuna apostolo atoa ia o ghe suitoongainilala, me tale sarasarakaniaane Spirit Manga ateva ghe auliaa tau lao sio vaalua la uungu me ghe ghaala nau eteva ghe oghi saela epona liu. <sup>3</sup> Emuli tale nimmarikana ghe ghaala, ghe apasungaala oroieili voto tani apasunga va ia maulue ia ta ila oia apostolo atoa. Ghe kaurekatila etaira ghe roola ghaatingaulu (40) nau, me tani auliaa ararimangalina ateva God. <sup>4</sup> Kateva nau laghe namanama aitaava me ghe uela etaira va, “Karika am mene kasu vuli mua eJerusalem. Am toi kateva voto Tamaghi ghe aulieiniela tale inangari nialokoi va aue enim tau aatu etaimim, ia o aghe aulieiniela. <sup>5</sup> Jon ghe aasuu taumattu tale manu, me karika masau me aue am ghaa niaasuu tale Spirit Manga ateva.”

<sup>6</sup> Nau laghe velu eitauaala me laghe kolomiela va, “Vau eteva, tale isaa oia nau erooroo va umene asaesae arariira atee alisraeli etoa?”

<sup>7</sup> Ghe uela etaira va, “Karika uunguaaimim tani kila nau Tamaghi ghe atokala tale sarasarakaniaane. <sup>8</sup> Me am, aue am ghaa sarasarakana nau Spirit Manga ateva emae etaimim, me saa llo am ghe tarala me nongola, aue am laa ppooaa tale masaliki taatara eJerusalem, tale provinsi eteva eJudia, eSameria me tale kosa akapa ateva.”

<sup>9</sup> Nau ghe ruula tani auliaa llo me God ghe ghaaie saela epona liu emua ta mataira, me urukookoo ateva ghe aisulieiniela tale taataraaira.

<sup>10</sup> Nau laghe taatara usiusie sae elomarase nongina ghe laa saesae, arovaeaata ta taumattu ngalua lalu ghe aasae kalio usousoana lalu ghe kaurekatila me lalu ghe tingina teeilala.

<sup>11</sup> Me lalu ghe uela va, “Taumattu nge Galili etoa, vaalua me am tingina taatara sae elomarase? Ia o Iesu God ange ghaaie saela epona liu aue mene oghi sio nongina ngam taraiela elaa saesae.”

### Mataeasi ghe ghaala liuna ateva Jiudas

<sup>12</sup> Nau ensolo alua lalu ghe kasula, laghe oghi sio mae eJerusalem ta laghe laa sae kasu tale motouru eteva la aseasea va eOliv, maamasauaane erooroo kasukasuaaira ta sambati.<sup>§§</sup>

<sup>13</sup> Nau laghe rekatala, laghe saela epona tale rum atiulu nongina laghe tokatoka. Lo atoa laghe mae sio, Pita, Jon, Jeimis me Andru me Pilip, Tomas, Batolomiu, Matiu, Jeimis natuna ia Alpeas, me Saemon laghe aseasea va Selot ia,\* me Jiudas natuna ia Jeimis. <sup>14</sup> Ila me vause atoa, me Meri kinna ia Iesu, me tuena atoa me nengane atoa Iesu, laghe mae-mae aitaava nonga tani looloo sae.

<sup>15</sup> Tale isaa o nau Pita ghe tingina saela elome ta lo atoa laghe aiesoa, ila akapaaili erooroo kateva ai me ghalu-engaulu (120). <sup>16</sup> Ghe uela va, “Tueghi me nengaghi etoa, Spirit Manga ateva ghe auliaala emua arau ta paane Deivit va Jiudas aue muemuaa lo atoa aue la laa kune Iesu. Isaa o inangari Uru ngai Manga ateva etani lutu eko-

§§1:12 *kasukasuaaira ta sambati* AJiu etoa la uue va urooroo tani kasu tale sambati ta kateva kilomita nonga.

\*1:13 *Selot* Utara *Malloeana inangari*.

ronna. <sup>17</sup>Poli Iesu ghe suitoongainiela tani uungu teeita, Jiudas ia kateva elome etaita.”

<sup>18</sup>(Ia o taumattu ngateva ghe ghaala aipolipoli tale sesa gheeleiaane me ghe polila kosa ateva, ghe katuuula ghe akasa ngamateala, me kovane ateva ghe tapo-lakala, me tinena ghe ghoa mae eleka.

<sup>19</sup>Ila akapa eJerusalem laghe nongola me laghe asela voto ateva o tale inangari tanganueira va Akeldama, malloeana va “Kosa ateva rae etana.”)

<sup>20</sup>Pita ghe uela va, “Laghe pitila tale buku eteva ta Sams va,

“Alena ateva aue enim toka me karika teva tani toka etana”<sup>†</sup> me,

‘Liuna ateva tani muemuaa niuungu kat-eva ppae aue eghaaia.’<sup>‡</sup>

<sup>21</sup>Liuna avalua o me ita tara teva taumattu ghe kasukasu teeita nau ekapa atoa nau Iesu ghe tokatoka teeita, <sup>22</sup>eti-tiuaa nau Jon ghe aasuu me ghe laa ghaa sio nau God ghe ghaa saela Iesu epona liu. Ita ghaa teva ghe tani tarala isaa o voto me tottotuaane Iesu.”

<sup>23</sup>Laghe asela ghalua taumattu, Josep laghe aseasea va Barsabas, me laghe asease teeia va Jastas<sup>¶</sup>, me mene kateva taumattu, Mataeasi etana. <sup>24</sup>Me laghe looloo saela, laghe uela va, “Vau nge-pona ateva, io ukilakila akapa urungui-taniira taumattu ngatoo, uapasunga va see etairarua ughe suitoongainiela va

<sup>25</sup>eghaa niuungu eteva va eapostolo me eghaa niuungu eteva Jiudas ghe katuu vulueta tani lao nongina aue elao.”

<sup>26</sup>Laghe kaaila voto aluepae eaima-toonga arariirarua aluae. Nau laghe senusenuaala, ararina atea Mataeasi

ghe katuu ekasinala, me ie tee ghe lao aitauaa tee sio kasangaulu kateva apostolo.

### Spirit Manga ghe sio mae ta Nau Pentikos

**2** Ghe ghaala nau ta Pentikos,<sup>§</sup> taumattu ngatoo laghe aaiakaia, ila akapa laghe mae sio tani velu eitauaa tale kateva voto. <sup>2</sup>Katengaata nonga ta laghe nongola niaangari eteva arova paka kuukuu eteva, ghe sio mae epona liu me ghe pasula elome tale ale ateva. <sup>3</sup>Laghe tarala lo ateva ghe sio mae arova kura ataata atea, me ghe polaie seela nonginaaili ramuramuti paa atoa, me ghe tokala epona ta kateva kateva etaira. <sup>4</sup>Laghe pasula tale Spirit Manga ateva, me laghe tiuaala tani aippooaa tale asease nisama karika samasama tanganueira, ta Spirit Manga ateva ghe tau lao sio.

<sup>5</sup>Tale ia o nau eteva oroi aJiu etoo laghe aaiesoa ta God, laghe mae akapa see sio tale kosa akapa ateva tani velu eitauaa eJerusalem. <sup>6</sup>Nau laghe nongola mangalia ateva, laghe mae sio tani velu eitauaa, me laghe soghila tani nongo inangari tanganueira, disaepolo atoa laghe aauliaa. <sup>7</sup>Mataira ghe otilla me laghe kolomila va, “Taumattu ngatoo oia la aippooaa ila akapa laghe mae sio eGalili. <sup>8</sup>Vaalu me ita oia kateva kateva ita nongonongo kila inangari tanganueita? <sup>9</sup>Ita taumattu tale Patia, Midia, Elam, me taumattu nge Mesopoteimia, Jiudia, Kapadosia, Pontus me Eisia, <sup>10</sup>Prigia me Pampilia, Ijip, me katoa laghe mae sio tale kasina masaliki eLibia kalakalangina tale masa-

<sup>†</sup>1:20 Sams 69:25

<sup>‡</sup>1:20 Sams 109:8

<sup>¶</sup>1:23 Josep arari nge Ibru ia, me Jastas arari nge Latin ia. Barsabas malloeana va ghe lutula ta sambati.

<sup>§</sup>2:1 *Pentikos* Utara Malloeana inangari.

liki eteae eSaerini, me katoa laghe mae sio eRom, <sup>11</sup> ita aJiu etoa me lo atoa ghavirina laghe mene aiesoa teecitala, aKrit me aArabia, ita akapa ngita nongola kinatama voto God nge gheleila nau ngila ppoaala tale inangari tanguaueita.” <sup>12</sup> Laghe soghila me aloira ghe kapaala me laghe aikolomieinila va, “Sa malloeana llo oia?”

<sup>13</sup> Katoa laghe aanamisainila tani ue va, “La ropila manu eteva sarasarakana ia.”

### Pita ghe ppoaala ta taumattu ngatoa

<sup>14</sup> Pita ghe tingina aitaue teela kasan-gaulu kateva (11) apostolo, ghe sama anamuula me ghe uela va, “Am aJiu etoa me lo atoa am tokatoka eJerusalem, am nongo amasina inangari aghauliaa.

<sup>15</sup> Taumattu oia karika la ropila nongina am aauliaa. Elue talaua arau oia ta 9 kilok. <sup>\*\*</sup> <sup>16</sup> Isaa oia voto am taatara, propet Joel ang ghe aulia ngalokoila, <sup>17</sup> ghe uela va,

“God eue va, Airuuruu tale kosa ateva, aue atau sio kapughu Spirit Manga ateva tale taumattu ngatoa.

Natuimim taita atoa me vause atoa aue la aulia ngaotu inangarighi.

Aliki taita atoa aue la tara nitaatara, me taita namu ngatoa aue la asoasopoi.

<sup>18</sup> Me kapughu tau ngai uungu etoa, taita ila me vause ila,

aue atau sio tee Spirit Manga ateva etaira,

me aue la aulia ngaotu inangarighi.

<sup>19</sup> Aghi aue aghaapasunga aimatootoon-gana elomarase

me epona tale kosa ateva, rae, kura atea, me paka asu eteva.

<sup>20</sup> Sinaka ateva aue saurrom, ulana ateva aue eraeraeana,

me auena kinatama nau eteva emae, ia o nau eteva, naughi ia Vau ngepona.

<sup>21</sup> Me lo atoa la kolo tau

ararina atea Vau ngepona ateva aue la saanga.”<sup>††</sup>

<sup>22</sup> Pita ghe mene uela va, “Israeli etoa, am nongo. Iesu aNasareti ia God ghe sungie mae sio etaimim, ghe gheleila paka mirikol me aimatootoon-gana elome etaimim tani apasunga etaimim va ia ghe kasula ta God. Am akapa am kilakila isaa oia voto.

<sup>23</sup> Ia o taumattu ngateva emua arau God ghe kilaiela me ghe loela tani taue sio etaimim, am me ssa taumattu ngatoa am ghe uvi emateala tale aikotoo.

<sup>24</sup> God ang ghe totuela tale nimmarikana nimate atea, poli nimate atea karika righi sarasarakaniaane tani poso aoghia.

<sup>25</sup> Deivit ghe pitila va Mesaea ghe auli-aala va,

“Aghe taatara Vau ngepona ateva emua ta ngetaghi tale nau ekapa atoa, poli ia etokatoka tale pai muenna ativilau etaghi,

me karika arooroo tani katuu.

<sup>26</sup> Liuna avalua o me urunguitanighi eteva emasimasi me paaghi eteva ekinari tau sae ararina atea,

me vaulanighi eteva aue etoka tale voto aue aghaa maulue etana.

<sup>27</sup> Poli io karika urooroo tani tau velueghi va alao ta tanguaueira matena atoa,

me karika aue utau velu kapum taumattu manga va emauu.

<sup>28</sup> Ughe apasungaala va aue amene sakesake,

me tokatokaam teeieghi aue eapasueghi tale nimasimasi.”<sup>‡‡</sup>

<sup>29</sup> “Tueghi me nengaghi etoa, aghi aghaaulia ngakorokoronganaaili

<sup>\*\*</sup>2:15 9 kilok Tale inangari nge Grik, *tale aiaakotoluna ateva aoa.*

<sup>††</sup>2:21 Joel 2:28-32

<sup>‡‡</sup>2:28 Sams 16:8-11

etaimim va, tuvuita ateva ta Deivit ghe matela, laghe kaieiniela, me liuna ateva, ia etokatoka teeita tale isaa oia nau. <sup>30</sup>Ia propete ia, me God ghe gheleila kinatama inangari nialokoi eteva va teva tuvuna aue ekingi nongina ia. <sup>31</sup>Me ia ghe taatara lao sio emua, me ghe auliaala tototuaane Mesaea, poli karika ghe tau veluela va ghe aso tanganueira matena atoa, me vilikina karika ghe mauula tale liu. <sup>32</sup>Ia o Iesu, God ghe totuela tale nimate, ami oia ami ghe taraiela, me ami aulia ngaotua. <sup>33</sup>God ghe asaesaala tani toka tale pai muenna ativilau, me ghe tau sio mae Spirit Manga ateva nongina ghe auliaala tale inangari nialokoi. Me Iesu ghe tau sio mae Spirit Manga ateva etaimami, ghaine am taatarai me am nongonongoa. <sup>34</sup>Poli Deivit karika ghe saela epona liu, me ghe uela va, “Vau ngepona ateva ghe uela ta kapughu Vau eteva va, “Toka siola tale pai muenna ativilau <sup>35</sup>Iomosi ta aghatoka sio lo atoa la sessa teeio euu, me uatingina saoa kkem etaira.”<sup>¶¶</sup>

<sup>36</sup>“Liuna avalua o me Israeli ekapa atoa am tani kila amasina va ia o taumattu ngateva am ghe avukalaie saela tale aikotoo, Iesu etana, God ghe ghelelela va Vau ia me Mesaea ia.”

<sup>37</sup>Nau laghe nongola inangarina Pita ghe ppoaala, ghe ttukula riura me laghe uela ta Pita me mene katoa apostolo va, “Kapumami etoa, sa ateva ami gheleia?”

<sup>38</sup>Pita ghe liula etaira me ghe uela va, “Am nna ngaioghioghia, me am ghaa niaasuu tale ararina atea Iesu, me kaluimim ssavoto aue ekapa, me God aue etau aatu Spirit Manga ateva etaimim. <sup>39</sup>Inangari nialokoi uneimim

me natuimim atoa me taumattu ngeleka atoa, lo akapa atoa oia Vau ngepona ateva kapuita Goto ia aue ekolola.”

<sup>40</sup>Oroieili inangari Pita ghe ppoa ngasarasarakanaailila etaira tani ue va, “Am asaangiem tale lo ateva oia vituu sesa ia.” <sup>41</sup>Lo atoa laghe aikaiaala inangari laghe ghaala niaasuu, ghe roola kotoolu airari (3,000) taumattu taita me vause tale ia o nau eteva.

### **Tau ngaikaaia ngatoa laghe velu eitauaala**

<sup>42</sup>Nau ekapa atoa tau ngaikaaia ngatoa laghe veluvelu eitauaa tee apostolo atoa, me laghe nongonongo me laghe taatara voto apostolo atoa laghe aapasunga, me laghe namanama, me laghe looloo sae aitauaa. <sup>43</sup>Ila akapa laghe taatara sarasarakaniaane God tale mirikol me aimatootoongana apostolo atoa laghe ghelei, liuna avalua o me laghe oneonea God. <sup>44</sup>Me ghe kateva nonga ilala, me laghe aitauaa peiira. <sup>45</sup>Laghe tautau velu kasina kosa me peiira laghe polipoli me viliki veu laghe kookoita ta lo atoa laghe tuutukuna tale kasina voto. <sup>46</sup>Nau ekapa atoa laghe veluvelu eitauaa tale ale ngeleka atiulu tale ale manga, me laghe aikasuaa see elome tale paa ngaleira tani namanama<sup>§§</sup> me laghe masimasi eitauaa, <sup>47</sup>laghe tautau sae ararina atea God, me taumattu ngatoa laghe oneoneainila. Me tale nau ekapa atoa Vau ngepona ateva ghe mene tautau sso ouna taumattu ghe aasaangi, tani lao aitauaa tee lo atoa akasina.

### **Pita ghe ghelei emasinala tangorengorena ateva tau nilooloo ia**

**3** Kateva nau Pita me Jon lalu ghe laa saesae tale ale manga ateva tani

<sup>¶¶</sup>2:35 Sams 110:1

<sup>§§</sup>2:46 Katoa la anna va malloeana va la ghe ghelei Lord's supper.

looloo sae ta 3 kilok elo alai\*, nau nilooloo sae. <sup>2</sup>Taumattu ngateva, ghe lutu etangorengorena, laghe sausaue sae tale atamani ale manga ateva la ghaseasea va Masi Taatarane. Laghe aatokaia nau eka pa atoa tani loo viliki veu tale taumattu ghe kupikupi sso tale ale manga ateva. <sup>3</sup>Nau ghe tarala Pita me Jon ta lalo ghe mae sosso tale ale manga ateva, ghe looloo viliki veu etairarua. <sup>4</sup>Pita ghe tara sossolainiela, me tee Jon, me Pita ghe uela etana va, “Utaraiegalue mae.” <sup>5</sup>Nau ghe taatarailalua ghe annaa va ghe ghaa righi voto etairarua.

<sup>6</sup>Me Pita ghe uela etana va, “Karika righi viliki veu etaghi. Voto auunusi aue atau aatu etam. Tale ararina nonga atea Iesu Karisto aNasareti ia aghaauliaa etam va, tingina saela me ukasukasu.”

<sup>7</sup>Pita ghe kunela nimana muenna atelange me ghe kune atinginaie saela me katengaata nonga ta kkena me kunikuni kkena ghe sarasakanala. <sup>8</sup>Ghe aosola me ghe tingina saela me ang ghe kasukasu, ghe kupi eitauaa tee ssola taita alua tale ale manga ateva, ghe aoaoso me ghe kakkaua sae ararina atea God. <sup>9</sup>Nau taumattu ngatoa laghe taraiela ta ghe kasukasula me ghe kakkaua ararina atea God, <sup>10</sup>laghe kilaiela va ia oia taita ateva ghe tokatoka nonga tale atamani ale manga ateva la ghaseasea va Masi Taatarane tani loo viliki veu, laghe soghiaala tani taraiela va ghe kasukasula.

<sup>11</sup>Nau laghe nongola kiukiuna tau ngorengorena ateva va ang ghe kasukasula, ila akapaaili taumattu ngatoa laghe lao sio tani taraiela elome tale ale manga ateva tale varanda ngateva laghe asease va Solomon etana. Ghe kunekune atingina ta taita alua tale ale manga ateva. <sup>12</sup>Nau Pita ghe tara avaluela o, ghe uela ta taumattu ngatoa va, “Am Israeli etoa, vaalua me am mammanuenna voto oia

elutula, me vaalua me am taatara sossolainangalua? Am nannaa va taumattu ngateva oia emasinala tale sarasarakani-aangalua o masi tokatokaangalua? <sup>13</sup>Kapuiria Goto ateva Abraham, Aisiki me Jekop, kapuiria Goto ateva tuvuita ia, ia ghe asaesaela ararina atea kapuna tau ngai nongonongo anna ateva ta Iesu. Am ghe tauela ta aRom atoa va la uvi ematea, me am ghe ratiela va ia king ia emua ta Paelat, arongona ta Paelat ghe kilala va Iesu karika righi sesa gheegheleiaane. <sup>14</sup>Iesu raarangisana ia me ghulughuluena ia, me am, am ghe ratiela, me am ghe aloannala va tau ngai uvi emate ateva etoka. <sup>15</sup>Lo ateva etautau mae maulue, am ghe uvi emateala, me God ghe totuela tale nimate. Angalua oia angalu ghe taraiela ta mataingalua me angalu aulieinia etaimim. <sup>16</sup>Tale ni-aikaaia ta ararina atea Iesu, taumattu ngateva am taataraiela me am kilakilaila, ange korokorongana. Lo ateva o ni-aikaaia ta Iesu ghe ghelei emasina akapaailiela tale taataraimim.

<sup>17</sup>“Me anga kilaiem, tueghi me nengaghi etoa, va voto am me kapuim namu ngatoa am ghe ghelei karika am ghe aalomasaanga tee. <sup>18</sup>Aviri am ghe gheleila, me God ang ghe kila vella emua arau sa ateva auena elutu. Kapuna propete atoa laghe aulia ngamuemue alokoila va Mesaea aue emae ghaa nimmarikana. <sup>19</sup>Am aikolikolia me am nna ngaioghioghia tale kaluimim ssavoto, me God aue ekkaluaa, me esei velu kaluimim ssavoto. <sup>20</sup>Me Vau ngepona ateva aue etau aatu nau tani mene akorokorongana maamauluaaimim, me aue emene suu Mesaea, eghe suimatoon-gainiela tani sausiem, Iesu etana. <sup>21</sup>Ia etani toka epona liu lomosina ta emene oghi sio tani mene ghelei eouna voto akapaaili. Ghe auliaala ta propet manga

\*3:1 3 kilok elo alai Tale inangari nge Grik, tale aiaaghasona (9) ateva aoa.

atoa emua arau. <sup>22</sup>Llo Moses ghe auliaala va, ‘Vau eteva kapuimim Goto ateva aue etau mae teva propete aue enongina ghe atinginaieghi saela, elome ta ngetaimim. Nau propete ateva emae, am rooroo tani nongo usilainia, me am ghelei voto eauliaa. <sup>23</sup>Arova see atoa la tam nongo usila voto eauliaa aue God eturuu vella elome ta kapuna atoa.’<sup>†</sup>

<sup>24</sup>“Etiitiuaa ta Samuel me elaolao ta mene katoa propete, laghe aulia ngaotu teela isaa oia nau. <sup>25</sup>Am natuira iem propete atoa, me tale niaipooa ngaitaua ngateva God ghe gheleila ta tuvumim atoa nau ghe uela ta Abraham va, ‘Ta tuvum ateva isaa akapaaili taumattu tale kosa ateva aue la ghaa niarangise.’<sup>‡</sup> <sup>26</sup>Nau eteva God ghe atingina saela kapuna tau ngai nongonongo anna ateva, ghe sungi ekasinaie mae sio etaimim tani arangiseiem me tani ghelei eoghiem tale gheeleiaaimim sesa.”

#### **Laghe atoka ssola Pita me Jon tale ale mata voovoo**

**4** Pita me Jon karika lalu ghe ruu tani aipooaa tee taumattu ngatoa, me pristi etoa, me namu ngateva ghe aaitoia polisi etoa tale ale manga ateva, me Sadiusi etoa laghe rekatala. <sup>2</sup>Laghe kilakila va lalu ghe aauliaa ta taumattu ngatoa me aapasangu va Iesu ang ghe totula tale nimate, me ila akapa taumattu ngatoa ngila ghe matela ila tee aue la totu. Liuna avalua o me ghe sessaieiliila etairaru. <sup>3</sup>Me laghe kuneilalu tani laoinilalu tale niaisakei. Poli ang ghe elo alaila, laghe atokailalu ssola tale ale mata voovoo, me laghe toi ta ghe pai sae ta mene kateva nau. <sup>4</sup>Oroianaaili ila lo atoa laghe nongola me laghe aikaaiaala

ta Iesu, me lo atoa taita laghe aikaaiaala erooroo ghalima airari (5,000).

#### **Laghe tau lao sio Pita me Jon va lalu aisakei ta mata kansolo atoa**

<sup>5</sup>Ghe paila ta mene kateva nau, tau ngai toitoi etoa, namu ngatoa me tau ngalomasanga atoa tale inangari ni-paopao laghe velu eitauaala eJerusalem.

<sup>6</sup>Annas, namuu ia ta pristi etoa, ghe toka teeilala. Ila me Kaeapas, me Jon, Aleksanda, me mene katoa taumattu mangalina ila Annas, laghe toka teeilala.

<sup>7</sup>Laghe atinginala Pita me Jon emua etaira, me laghe kolomilalu va, “See ghe tau aatu sio sarasarakana etaimalua tani ghelei isaa oia voto? Me ta see ararina ateae amalu gheeghelei isaa o voto?”

<sup>8</sup>Spirit Manga ateva ghe pasula ta Pita me ghe uela etaira va, “Am tau ngai toitoi me namuu nge Israeli etoa, <sup>9</sup>ngam aloanna tani kolomiengalua ghaine poli angalu ghe gheleila masi niuungu ta tangorengorena ateva, me am aloanna tee tani kila va vaalua taumattu ngateva ghe masinala. <sup>10</sup>Me isaa oia am me Israeli ekapa atoa am rooroo tani kila va tale ararina ateae Iesu Karisto aNasareti ia, am ghe avukalaie saela tale aikootoo, me God ghe totuela tale nimate, ia ghe gheleila me ia o taumattu ngateva ghe masinala, me ange tinginala emua etaimim. <sup>11</sup>Ia Iesu, ‘Atu eteva am tau ngai atulu ale atoa am ghe uela va sesa ia me am ghe ratiela, ia ghe aitiutiula tale atu ekapa atoa tani suei ale ateva.’<sup>¶</sup> <sup>12</sup>Karika teva taumattu erooroo tani mene asaangita, karika poi. Nim ararina ateae nonga Iesu taumattu ngatoa tale kosa ateva oia ita rooroo tani saanga.”

<sup>†</sup>3:23 Diuteronomi 18:15-16, 19; Levitikas 23:29-30

<sup>‡</sup>3:25 Aitiuti 22:18

<sup>¶</sup>4:11 Sams 118:22

<sup>13</sup> Namu ngatoa laghe kilakila va Pita me Jon karika lalu ghe sikulula, nim taumattu ilalua, me laghe taatara ta karika ghe moimoilalua. Liuna avalua o me laghe soghiaala tani tara, me laghe kilala va lalu ghe toka teela Iesu. <sup>14</sup> Me laghe tarala ia o taumattu ngat-eva, vilikina ghe masinala, ghe tiitingina eitauaa teeilalua, liuna avalua o me ghe karikala righi inangariira tani liu etairarua. <sup>15</sup> Isaa avalua o me namu ngatoa laghe uela etairotolu va lotolu kupi vulu ghoa kansolo atoa. Nau angilotolu ghe kupi ghoala, laghe aikolomi va, <sup>16</sup> “Vaalua aue ita ghelei taita alua oia? Ngi lalu ghele gheleila kateva ppae ase niaimatootoongana, me taumattu ngakapa atoa eJerusalem angila ghele kilaiela, ita tee karika poi ita rooro tani ue va kamena. <sup>17</sup> Me inangari erau namungaili va elao akapa see ta taumattu ngatoa. Liuna avalua o me ita aulia ngasararakana etairarua va lalu rau mene ppooaa tale ararina ateaie ia o taumattu ngateva tale mene katoa tana taumattu.”

<sup>18</sup> Emulina laghe kololaluela, me laghe paolaluela va lalu rau mene ppooaa me apasunga tale ararina ateaie Iesu. <sup>19</sup> Pita me Jon lalu ghe liula me lalu ghe uela va, “Vaalua, emaamasina ta matane God tani nongo usila inangariimim me karika inangarina God? Am tani laa anna ngamasina. <sup>20</sup> Karika aue angalu rooro tani matua, angalu tani aulia ngakapa voto angalu ghe tarala me angalu ghe nongola.”

<sup>21</sup> Kansolo atoa laghe mene tau lao sio inangari sarasarakana etairarua, me laghe sungi velulaluela, poli laghe maa-matauta taumattu ngatoa. Ila akapa taumattu ngatoa laghe nnaala voto ateva oia God ghe gheleila, me laghe tautau sae ararina ateaie God. Liuna avalua o

me karika righi salaira kansolo atoa tani ghelei teeilalua. <sup>22</sup> Ia o taumattu ngateva lalu ghe gheleila niaimatoonga etana me ghe masinala, anna ninamanama ang ghe laula ghaatingaulu (40).

**Laghe kokkolomi sae tani  
ghaa sarasarakana  
tani ppooaa inangarina Iesu**

<sup>23</sup> Kansolo atoa laghe tau vella Pita me Jon me lalu ghe oghi lao sio ta mene katoa tau ngaiesoa, me lalu ghe aulia ngakapaailiila inangariira namu ngtoa ta pristi etoa me namu ngatoa laghe auliaala etairarua. <sup>24</sup> Nau laghe nongola, me nannaairra ghe kateva nongala me laghe kakkaua sae tale kaluira nilooloo sae ta God va, “Vau palepale, ughe gheleila eunakookoo me kosa ateva me manu etoa me isaa akapaaili voto etokatoka etana. <sup>25</sup> Emua arau kapum Spirit Manga ateva ghe tau lao sio inangari eteva ta tuvumami eteva, ia o kapum tau ngai uungu eteva ta Deiviti, me Deiviti ghe uela va,

“Vaalua me tau ngeleka atoa esessaieiliila?

Vaalua me taumattu ngatoa la loeloe asease salana atoa, me karika God etautau vella va la ghelei?

<sup>26</sup> Kingi etoa tale kosa akapa ateva la ghaimonomosiaa tani aiuvi me namu ngatoa la veluvelu eitauaa tani tau sio Vau ngepona ateva me tani tau sio kapuna Mesaea ngateva.”<sup>§</sup>

<sup>27</sup> Koronnaaili Herot me Pontius Paelat me katoa tau ngeleka me Israeli etoa, laghe velu eitauaala tale ia o masaliki taatara ateaie tani loe Iesu tani uvi ematea, ia o kapum tau ngai uungu eteva manga ia ughe suimatoongainiela va ia Mesaea ia. <sup>28</sup> Nau laghe gheleila isaa o voto laghe nim aimulisi teela nannaam



me aloaloannaam. Tale sarasarakani-aam emua arau ughe suimatoongaala va isaa o voto aue elutu. <sup>29</sup>Me ghaine, Vau eteva, urooro tani annaa inangari isaa o laghe ghelei tani amatautue-mami, me usausiemami kapum tau ngai uungu etoa, me ami rooro tani ppoa ngasarasarakana inangarim me karika ami mene matautu. <sup>30</sup>Me urooro tani saooa nimam ta tau sessa atoa tani gheleila me la mene masina, me urooro tani ghelei asease aimatoonga tale ararina atea Iesu, ia kapum tau ngai uungu ia.”

<sup>31</sup>Nau eteva laghe ruula tani looloo sae, ale ateva laghe velu eitauaala etana ghe aisiisiaala, me laghe pasula tale Spirit Manga ateva, me laghe ppoa ngaotula inangarina God. Laghe aip-poo ngasarasarakana me karika laghe maamatautu.

### **Tau ngaiesoa ngatoo laghe aitauala peiira**

<sup>32</sup>Ila akapa tau ngaiesoa ngatoo laghe kateva nonga ilala tale ninanna me nialoanna. Karika teva taumattu ghe ue va peina kanna nonga. Karika, isaa akapaaili voto laghe aitaualaa elome etaira. <sup>33</sup>Tale kinatama sarasarakana atoa, apostolo atoa laghe aulia ngaotula tototuaane Vau eteva Iesu. Me oroieili maamasinaane God ghe tokala etaira akapa, <sup>34</sup>me karika teva taumattu elome ta ngetaira ghe tuutukuna tale inana me voto. Kasina taumattu kosaira me aleira laghe tau lao sio va la poli. Nau eteva laghe polipoli, isaa o viliki veu laghe ghaaghaa laghe laolao <sup>35</sup>ta apostolo atoa, me apostolo atoa laghe aikoitaa ta lo atoa laghe tuutukuna tale kasina voto.

<sup>36</sup>Kateva taumattu tale arariman-galina ateva Livae, ararina atea ta Josep, ghe lutula tale patunganua ateva eSaeprasi me ghe tokatoka eJerusalem, apostolo atoa laghe kolokolo Banabas

etana (malloeana va tau ngai sausia ia tale masi ninanna), <sup>37</sup>ghe taula tuku kosane ateva me laghe poliela, me ghe ghaala viliki veu me ghe laooa sio ta apostolo atoa.

### **Ananaeas me Sapaera lalu ghe matela**

**5** Taita ateva ararina atea ta Ananaeas me vausenna ateva ta Sapaera, lalu ghe tau vella tuku kosairarua ateva laghe poliela. <sup>2</sup>Ananaeas me vausenna ateva lalu ghe ghaa oghila kasina viliki veu. Ananaeas ghe laooa sio nonga kasina viliki veu ta apostolo atoa.

<sup>3</sup>Vara me Pita ghe uela ta Ananaeas va, “Vaalua me utau vella Satana eapasula urunguitanim ateva me angu kamela Spirit Manga ateva, me angu ghaa oghila kasina aipolipoli tale kosa ateva? <sup>4</sup>Nau ghe asoaso kosam ia, ughe ghelei aloannam etana, me nau ughe aitaueiniela me laghe polia, viliki veu ghe unem. Me vaalua me ughe aloanna tani ghelei isaa o voto? Karika ukamekame nonga taumattu ngatoo, ta ukamekame tee God.”

<sup>5</sup>Nau Ananaeas ghe nongola, ghe matela me ghe katuula. Kinatama nimatautu ghe ghaala taumattu ngatoo laghe nongola sa ateva ghe lutula. <sup>6</sup>Vara me aliki taita atoa laghe kupi sso mae me laghe ghiisainiela me laghe sauela, me laghe lao sio tani kaieinia.

<sup>7</sup>Koti erooro kotolu aoa ghe lange sio me vausenna ateva ghe kupi ssola. Karika ghe kilala sa ateva ang ghe lutula. <sup>8</sup>Pita ghe kolomiela va, “Auliaala etaghi, va isaa nonga oia aipolipoli tale tuku kosa ateva?”

Me ghe liula me ghe uela va, “Ue, nim isaa nonga o.”

<sup>9</sup>Pita ghe uela etana va, “Vaalua amalu aloanna tani kame kapuna Spiriti ateva Vau eteva? Tarala! Lo atoa la lao

sio tani kaiia taitanim ateva, ila etapaa ngatamana, me aue la mene sau teeio.”

<sup>10</sup> Me katengaata nonga ta vause ateva ghe matela me ghe katuula ta liue kkena Pita. Alike taita atoa laghe sso mae me laghe saopiela ta ang ghe matela. Laghe sauela tani laa kaiia valainia ta taitanna ateva. <sup>11</sup> Kinatama nimatautu ghe lutula ta tau ngaiesoa ngatoa, me see ila lo atoa laghe nongola llo kiukiu.

### **Asease voto ouna ghe lutula**

<sup>12</sup> Ta ngetaira apostolo atoa, oroieli niaimatootoongana laghe gheelei. Tau ngaiesoa ngakapa atoa laghe tokatoka aitauaa tale varanda ngateva ta Solomon. <sup>13</sup> Lo atoa karika tau ngaiesoa ila laghe maamatautu tani mae aitauaa tee tau ngaiesoa ngatoa, me karika, ta taumattu ngatoa laghe oneoneainila. <sup>14</sup> Me oroieli taita me vause laghe aiesoaala ta Vau ngepona ateva laghe lao teeila sio. <sup>15</sup> Taumattu ngatoa laghe tarala oroieli voto apostolo atoa laghe gheelei, o laghe sausau tau sessa atoa laghe ghoa aalokoila tapaa salana tale aisalo me tale komo va nau Pita ghe kasukasu emaemae, tootoona ateva eakoula. <sup>16</sup> Oroieli taumattu ngatoa tanganeira kalakalaa eJerusalem, laghe maemaeaa tau sessa atoa me lo atoa raroai etoa laghe ghelei saasakieinila, ila akapa laghe maamasina.

### **Laghe atoka ssola apostolo atoa tale ale mata voovoo**

<sup>17</sup> Namu ngateva ta pristi etoa me kapuna akapa atoa, ila elome tale pati eteva ta Sadiusi, laghe nannaa saasakia tee apostolo atoa. <sup>18</sup> Liuna avalua o me laghe kunela apostolo atoa, me laghe atokaila ssola tale ale mata voovoo. <sup>19</sup> Nau eleivoo ensolo ateva kapuna ia Vau ngepona ateva ghe otila atamana atoa tale ale mata voovoo ateva me ghe kupieinila ghoala. Me ghe uela va,

<sup>20</sup> “Am kasula, me am laa tingina tale ale ngeleka atiulu tale ale manga ateva me am ppoaaa ta taumattu ngatoa inangari tale ia oia maulue ateva.”

<sup>21</sup> Elue talaua poppooa tale mene kat-eva nau laghe ssola tale ale ngeleka atiulu tale ale manga, nongina ensolo ateva ghe auliaala etaira, me laghe tiuaala tani apasunga ta taumattu ngatoa.

Vara me namu ngateva ta pristi etoa me kapuna atoa laghe kolo aitauaala kansolo atoa, namu ngatoa ta natuna atoa Israeli. Laghe suu lao sio inangari tale ale mata voovoo va la maeaa apostolo atoa. <sup>22</sup> Nau laghe rekataala tale ale mata voovoo, polisi etoa tale ale manga ateva laghe tara luulala. Laghe oghi lao sio tani auliaa va, <sup>23</sup> “Ale mata voovoo ateva kaakavati emasinaaila ia, tee tau ngai toitoi etoa la tiitingina etapaa ngatamana. Nau ami otila karika ami tarala teva.” <sup>24</sup> Nau laghe nongola kiukiu namu ngateva ghe aaitoiaa polisi etoa tale ale manga ateva, me namu ngatoa ta pristi etoa laghe annaa sossola va sa ateva aue elutu.

<sup>25</sup> Kateva taumattu ghe mae sio etaira me ghe uela va, “Am nongola! Taumattu am ghe atoka ssola tale ale mata voovoo, ila tale ale manga ateva la sso aapasunga ta taumattu ngatoa.” <sup>26</sup> Liuna avalua o, polisi etoa me lo ateva ghe aitoieinila laghe ssola tani kuneila, karika laghe karatainilala poli laghe maamatauta taumattu ngatoa, va la rau kumla.

<sup>27</sup> Nau laghe maeainila sio tale liu niaisakei, namu ngateva ta pristi etoa ghe tiuaala tani kolomila. <sup>28</sup> Ghe uela va, “Ami ghe tau aatu sio inangari sarasarakana va karika am mene laa ghasasunga see tale ararina ateaie ia o taumattu ngateva. Me karika, ta ngam ghele rooa ngakapa seela eJerusalem, me am aaliu teiemami va ami, ami ghe uvi emateala.”

<sup>29</sup> Vara me Pita ghe ghaala liuira apostolo atoa tani liu inangariira, me ghe uela va, “Ami nongo usila nonga God me karika taumattu. <sup>30</sup> Kapuira Goto ateva tuvuita atoa ghe totula Iesu tale nimate. Ia o am ghe avukalaie saela tale aikotoo. <sup>31</sup> Ia God ghe asaesaela me ghe atokaiela tale pai muenna ativilau va ia Vauita ia me tau ngai asaangita ia, tani taula ninna ngaioghioghia me nikalua kaluira ssavoto Israeli etoa. <sup>32</sup> Ami tee ami auliaa voto oio, me tee Spirit Manga ateva, ia o God ghe nim tauae lao sio ta lo atoa laghe nongo usilainiela.”

<sup>33</sup> Nau laghe nongola llo ghe sessailala etaira, me laghe aippooa ngaitauaala tani uvi ematela. <sup>34</sup> Me kateva etaira ghe tingina saela, ararina atea ta Gamaliel, ie tee Paresi ia, alomasaangaaila ia tale inangari nipaopao me taumattu ngakapa atoa laghe oneoneainia, ghe uela va, “Tau vellala me la kasu mua.” <sup>35</sup> Me ghe uela etaira va, “Am taumattu nge Israeli etoa, am paniem arova am aaloanna tani ghelei rigi voto etaira. <sup>36</sup> Poli kasina nau ang ghe lange sio taumattu ngateva ghe tingina saela, ghe poppooa va ia namuu ia, ararina atea ta Tiudas. Ghe ghaala kapuna ghaata ai (400) taumattu. Me aRom atoa laghe uvi emateala me kapuna atoa laghe ilou reerekataa seela. Uunguairra ghe nim kapala. <sup>37</sup> Emuli etana, Jiudas nge Galili ghe mene kaurekatila, nau nighaa arari taumattu, me oroi taumattu ghe mene usiela. Vara me laghe mene uvi emateala. Me kapuna atoa laghe mene ilou reerekataa seela. <sup>38</sup> Liuna avalua o me tale lo atea oia niainsakei aghaauliaa etaimim va am tau vellala me la kasu, ta arova nim uunguairra taumattu ngatoa, aue enim peisaane. <sup>39</sup> Va arova kanna God, karika am rooro tani paola. Am rau nim aiuvi tee nonga God.”

<sup>40</sup> Me ila akapa laghe aimuli teela inangarina Gamaliel. Laghe kolola apostolo atoa laghe kupi ssola, me laghe uela va la parula me laghe uela etaira va karika la mene laa ppooa see tale ararina atea Iesu, me laghe sungi vellala.

<sup>41</sup> Nau laghe kasula laghe masimasila, poli God ghe tarailala va la rooro tani ghaa nimmarikana tale ararina atea Iesu. <sup>42</sup> Tale nau ekapaaili elome tale ale ngeleka atiulu tale ale manga ateva me tale ale akapaaili, apostolo atoa karika laghe ruula tani ppooa me apasunga va Iesu Mesaea ia.

### Ghaitu tau ngai sausi

**6** Tale isaa o nau, disaepolo atoa ngila ghe ooro me lo atoa etaira laghe samasamaa nge Grik laghe auliuliaa albru etoa ta poli karika laghe aikoitana ngamasina voto ta kapuira vause raue vulu etoa tale nau ekapa atoa. <sup>2</sup> Liuna avalua o me kasangaulu ghalua (12) apostolo laghe kolo aitauaala tau ngaikaaia ngakapa atoa me laghe uela etaira va, “Karika masina arova ami ruu tani ppooa inangarina ateva God me ami mae koita inana. <sup>3</sup> Isaa avalua o tuemami me nengamami etoa, am tara elome etaimim ghaitu (7) taita pasu ila tale Spirit me alomasaanga, me ami suitoongainila tani ghelei ia o niuungu eteva, <sup>4</sup> me ami uunguaa nonga tani looloo sae me tani ppooa inangarina God.”

<sup>5</sup> Isaa o inangari ghe masinala ta taumattu ngakapa atoa, me laghe asela Stipeni pasu ia tale niakaaia me Spirit Manga ateva, me Pilip, Prokorus, Nikano, Timon, Pamenas, Nikolasi atala nge Antioko ia, karika aJiu ia nau ghe lutula, vara me ghe aiesoala me ghe aJiula, me emulina ghe mene aiesoala ta Karisto. <sup>6</sup> Laghe laoainila sio ta apostolo atoa, me laghe looloo sae me laghe saoaala nimaira etaira tani

amangaila va la ghelei ia o niuungu eteva.

<sup>7</sup>Inangarina ateva God ang ghe naanamu me eJerusalem oroieili taumattu laghe aiesoaala, me oroieili pristi tee atoa laghe nongo usilaala masi inangari.

### Laghe kunela Stipeni

<sup>8</sup>Stipeni pasu ia tale sarasarakana me maamasinaane God ghe gheelei niaimatoonga sarasarakana elome tale taumattu ngatoa. <sup>9</sup>Me katoa taumattu karika laghe laolao aitauaa tee aloanaane Stipeni. Isaa o taumattu laghe velu eitauaala tale kateva ale nivelu eitauaa la kolokoloa va aleira ia lo atoa emua akasina karika laghe tokatoka tale aloanaaira. Isaa o taumattu atalange eSaerini ila me Aleksandria ila, me provinsi elua ta eSilisia me eEisia. Katoa ta ngetaira laghe sessaila ta Stipeni. <sup>10</sup>Spirit Manga ateva ghe tau lao sio alomasaanga ta Stipeni, liuna avalua o me karika laghe rooro tani apala inangari Stipeni ghe poppooaa.

<sup>11</sup>Kasina taumattu laghe polilala tani aikamea tee Stipeni va laghe nongoala ghe poppooaa saasakia ta Moses me God.

<sup>12</sup>Tale isaa o inangari, taumattu ngatoa laghe sessailala, me taumattu ngatoa me namu ngatoa me tau ngalomasaanga atoa tale inangari nipaopao laghe kunela Stipeni me laghe laoainie sio ta Kansolo atoa. <sup>13</sup>Laghe ghaala kasina taumattu va eaikamea teeia, ila o taumattu ngatoa laghe uela va, “Ia oia taumattu ngateva enim toka aauliaa saasakia tee voto ateva oia manga ia me kanna inangari nipaopao Moses. <sup>14</sup>Poli ami ghe nongola ta ghe uela va ia o Iesu atala nge Nasareti ia ghe uela va aue etturuu ale manga

ateva me eaiokolikoliaa voto emua arau Moses ghe tau mae sio.”

<sup>15</sup>Me taumattu ngatoa tale ia o nivelu eitaua ngateae laghe taatara lao sio ta Stipeni, me laghe tarala matane ghe nonginala ensolo ateva.

### Inangarina Stipeni

**7** Namu ngateva ta pristi etoa ghe kolomila Stipeni va, “Koronna llo oia?”

<sup>2-3</sup>Stipeni ghe liula me ghe uela va, “Tueghi me nengaghi me tamaghi etoa, am nongoaghi va God ateva pasu ia tale mallanga ghe rekataala ta tuvuita ateva ta Abraham nau eteva ghe tokatoka eMesopoteimia. Ghe uela etana va, ‘Ukasu vuli tanguem me kapum atoa, me ulao tale kosa ateva aue aghapasungainia etam.’\*\* Me auena ghe laa toka eHaran.

<sup>4</sup>“Me ghe kasu vulila tanguem aKaldia ngatoa me ghe lao sio tani toka eHaran, me vara tamane ghe matela me ghe mene mae sio tani toka tale kosa ateva oia am tokatoka etana. <sup>5</sup>God karika ghe tau lao sio teva tuku kosa etana va ghe kanna. Karikaaili tuku teva. God ghe alokoila inangari nialokoi etana va ia me tuvuna atoa emuli etana aue la ghaa kosa ateva o, arongona ta ia o nau eteva Abraham karika righi natuna. <sup>6</sup>God ghe uela etana va, ‘Aue tuvum atoa aue la ativuu tale mene kateae ppae masaliki me la nim tau ngai uungu me taumattu ngatoa tale ia o masaliki eteae aue la ghelei saasakia etaira aue eroo ghaata ai (400) ninamanama. <sup>7</sup>Me aue aghi aghatara matana lo ateva anua eghaaila va la nim tau ngai uungu.’†† Me God ghe mene uela va, ‘Emulina aue la kasu vuli ia o anua ateva me aue la mene mae

\*\*7:2-3 Aitiutiu 12:1

††7:7 Aitiutiu 15:13-14

kkaueinaghi tale masaliki eteae oia.<sup>††</sup>

<sup>8</sup> God ghe gheleila inangari niaulia ngaitauaa tee Abraham tale ni-isoiso atae me Abraham ghe tamane iela Aisiki me vara ghaitu nau ghe lange sio me Abraham ghe isola Aisiki. Vara me Aisiki ghe natunala ta Jekop me Jekop ghe natunala kasangaulu ghalua ghe tuvuitala.

<sup>9</sup> “Me tuena atoa Josep laghe nannaa saasakia teeia, liuna avalua o me laghe taue lao sio me ghe siola eljip me laghe ghaala aipolipoli, me God ghe tokatoka aitaaua teeia, <sup>10</sup> me ghe aasaangia tale isaa akapaaili voto sesa, me ghe tau lao sio alomasaanga etana va Pero kingi nge Ijip ateva ghe masimasiaa uunguaane me ghe gheleielala ghe namuula eljip me tale alena akapa ateva.

<sup>11</sup> “Vara me kinatama maloo ateva ghe lutula eljip me eKeinan me voto sesa ghe lutu teeilala, me tuvuita atoa karika laghe roola tani ghaa rigi inana. <sup>12</sup> Nau Jekop ghe nongola va inana eljip, ghe suula tuvuita atoa tani sio eljip tale aitiutiu eteva uneira nisio. <sup>13</sup> Aiaaghaluene atae nisio, Josep ghe aulia ngaotula ta tuena atoa va ia see, me liuna avalua o me Pero ghe kilala kapuna atoa. <sup>14</sup> Josep ghe suula inangari va tamane ta Jekop me kapuna akapa atoa la sio. Ila akapaaili erooro ghaitungaulu ghalima (75) taumattu. <sup>15</sup> Vara me Jekop ghe siola eljip, ia me tuvuita atoa laghe matela okae. <sup>16</sup> Nau laghe matela laghe mene saeainilala eSekem tale liu ni-aikaia ngateva Abraham ghe polie lao sio ta natuna atoa Hamor tale kasina ase viliki veu.

<sup>17</sup> “Nau ang ghe aakalakalaa va God ghe ghelei rooroa inangari nialokoi ghe auliaala ta Abraham me Israeli etoa eljip laghe oroienaaili ila. <sup>18</sup> Vara me kingi eteva ghe tam kilakila Josep ghe tiuaala

tani aitoia eljip. <sup>19</sup> Ghe tiuaala tani pae salana tani ghelei saasakia tuvura atoa me tani ghelei voto karika masina etaira. Tee ghe uela va la sau velu natuira aliki etoa me aue la mate.

<sup>20</sup> “Tale isaa o nau Moses ghe lutula. Masi taataraane ta matane God me laghe aitaraniela elo ale erooro kotolu (3) ulana. <sup>21</sup> Me nau laghe ghaa velue ghoala eleka tanguaaneira, natuna vause ateva king ghe ghaaiela, me ghe aaitarania va natuna ia. <sup>22</sup> Ghe ghaa akapala alomasaangia nge Ijip me inangarina me gheeleiaane sarasarakanaaili.

<sup>23</sup> “Nau anna ninamanama ghe ghaatingauluvela (40), ghe nnaala tani laa tara kapuna atoa, tuvuna atoa Jekop. <sup>24</sup> Ghe tarala kateva alIsraeli, aljipi eteva ghe ghelei saasakieinia me ghe sausila kapuna ateva, me tani liu, ghe uvi ematela aljipi eteva. <sup>25</sup> Ghe anna va kapuna atoa aue laghe kila va God ang ghe tiituaa tani sausila tani asaangila tale niuungu Moses ang ghe tiituaa tani ghelei, me karika laghe aalomasaanga. <sup>26</sup> Mene kateva nau ghe mene tarala kapuna alua alIsraeli ilalua lalu ghe aaiuvi me ghe tootongaala tani ghelei rungainilalua me ghe uela etairaru va, ‘Amalua, albru nonga iemalua, me vaalua me amalua aaiuvi?’

<sup>27</sup> “Me lo ateva ghe tiuaala tani aiuvi ghe bbi vellao sio Moses me ghe uela etana va, ‘See ghe uela va io unamu me ughelei niisakei etaimami?’ <sup>28</sup> Ualoanna tani uvi emateaghi nongina ughele uvi ematela aljipi eteva ghaillo?’ <sup>29</sup> Nau Moses ghe nongola llo, ghe iloula eljip me ghe lao sio tani ativuu etoka eMidien me isaa okae me ghe natunala ghalua.

<sup>30</sup> “Nau ghaatingauluae (40) ninamanama ghe ruula me ensolo ateva ghe otuotula ta ngetana tale voto ateva

karika righi taumattu etana kalakalaa ia tale motouru eteva eSaenae, tale ram-erame kura atea ghe ataata ai erighi. <sup>31</sup>Moses ghe soghiaala nau ghe tarala me ghe lao akalakalangina sio tale ai erighi tani tara amasinaia me ghe nongola lingi ngalona ateva Vau eteva. <sup>32</sup>Ghe uela va, ‘Aghi kapuira Goto ieghi tuvum atoa me kapuna Goto ieghi Abraham, Aisiki me Jekop.’<sup>¶</sup> Moses ang ghe reterete poli ghe matautula, me karika ghe aloanna tani taatara lao.

<sup>33</sup>“Vau eteva ghe uela etana va, ‘Ghaa vella unem aikasukasu ta kkem ta voto ateva utiitingina etana, manga ia. <sup>34</sup>Aghe tarala sesa nimmarikana kapughu etoa laghe ghaala eljip me ngaghe nongola nganggalaaia me ngasio mae tani ghaa vella tale karavusu. Mae sio me asungio me umene oghi sio eljip.’<sup>§§</sup>

<sup>35</sup>“Nim ie nonga o lo ateva Moses aIsraeli etoa laghe ratiela me laghe auliaa teeia inangari va, ‘See ghe uela va unamuu me ughelei niaisakei?’ Ta God nonga, tale ensolo ateva eghe aotutula etana tale ai erighi ghe ataata, ghe sungiela va ia namuu ia me tau ngai ghaa oghi ia. <sup>36</sup>Ia ghe ghaa vellala eljip me ghe gheleila niaimatoongana me ase voto atoa eljip me eRet Sii\* me ghaatingauluae (40) ninamanama tale voto ateva karika righi taumattu etana.

<sup>37</sup>“Ie nonga o Moses ghe uela ta Israeli etoa va, ‘God aue etau aatu teva propete aue onongina ghe atinginaieghi saela, elome ta ngetaimim.’<sup>†</sup> <sup>38</sup>Moses ghe tokatoka aitauaa teeila tale voto ateva karika righi taumattu etana, me ensolo ateva ghe sama teeila tale motouru

eteva eSaenae me ghe ghaala inangari mauue tani asaoki etaita.

<sup>39</sup>“Me tuvuita atoa laghe tam nongo usilainiela me laghe ratiela me elome tale urunguitaniira, laghe mene oghiaa lao sio eljip. <sup>40</sup>Laghe uela ta Eron va, ‘Gheleila righi kapuuta goto me emue-mueinita, poli ia oia taumattu ngateva ta Moses ghe kolo velutala eljip, karika ngami ghe kilala va sa ateva ang ghe lutula etana.’<sup>‡</sup> <sup>41</sup>Isaa o nau laghe gheleila natu tootoo vulumakao arighi me laghe gheleila aiaavusuvusuena etana, me laghe gheleila paka maakiiki eteva tani tau sae voto nimaira ghe gheleila. <sup>42</sup>God ghe oghi vululala me ghe tau vellala tani kkaua voto elomarase. Isaa o voto ghe asokoila llo propete atoa laghe pitila tale uneira buku va,

“Am Israeli etoa karika am ghe tau mae sio righi aiaavusuvusuena etaghi nau am ghe kasula ghaatingauluae (40) ninamanama tale voto ateva karika righi taumattu etana.

<sup>43</sup>Am ghe sausau see alena ale kandisi eteva kapuimim goto ateva ta Molok me kapuimim katto goto ateva ta Repan tootoo ateva am ghe gheleila va am kauinia.

Liuna avalua o me aue atau veluem me la ghaaiem sio eBabilon.’<sup>¶</sup>

<sup>44</sup>“Tuvuita atoa laghe tokatoka tee ale manga kandisi eteva ia laghe sausau see tani apasungaa va God etokatoka elome etaira nau laghe kasukasu tale voto ateva karika righi taumattu etana. Laghe gheleila nongina vaalua God ghe auliaala ta Moses me vaalua ghe tarala tootoona ateva. <sup>45</sup>Mene kateva vituu ta

<sup>¶</sup>7:32 Eksodas 3:6

§§7:34 Eksodas 3:7-8, 10

\*7:36 Ret Sii Utara Malloeanan inangari.

†7:37 Diuteronomi 18:15

‡7:40 Eksodas 32:1

¶7:43 Amos 5:25-27

tuvuita atoa laghe ghaaiela, me nau Josua ghe mene aitarainilala, laghe sau teeie lao sio nau laghe lao sio tani ghaa ia oia kosa ateva tale llo anua God ghe karati vellala. Ghe tokala o lomosina ta ghe laa ghaa sio nau ta Deiviti. <sup>46</sup> God ghe masimasieiniela, liuna avalua o me Deiviti ghe kolomila va eghelei teva ale aitokatokane kapuna Goto ateva Jekop. <sup>47</sup> Me karika, ta Solomon ghe atulula alena ateva.

<sup>48</sup> “Me lo ateva Iaaili Epona karika etokatoka tale ale taumattu ngatoa la ghelei, nongina propete ateva ghe uela va,

<sup>49</sup> “Vau ngepona ateva ghe uela va, “Epona liu aitokatokaghi ia me kosa ateva, aiatingina kkeghi ia. Sa ateva ale am mene anna tani atulu me ealeghi?

O saa mene teva voto aue aghainoana etana?

<sup>50</sup> Karika va nimaghi ghe gheleila isaa akapa o voto?”<sup>§</sup>

<sup>51</sup> “Am aakorokorongana nannaaimim me urunguitaniimim me nongonongoaimim nongina tau ngeleka atoa. Nau ekapa atoa karika am aaloanna tani nongo Spirit Manga ateva nongina tuvuim atoa. <sup>52</sup> Am annaa teva propete tuvuim atoa karika laghe ghelei saasakiaa teeie? Laghe uvi emate teela lo atoa laghe aulia ngamuemua ngalokoi, mae-maeane lo ateva ghulughuluena ia. Me isaa oia nau ngam ghe aitaueiniela me ngam ghe uvi emateala. <sup>53</sup> Am oia am ghe ghaala inangari nipaopao ensolo atoa laghe taula ta Moses me karika am aimuli teel!”

### Laghe kumla Stipeni tale atu

<sup>54</sup> Nau laghe nongola llo ghe sessai etingainilala me laghe katakata ngalungaluiria etana. <sup>55</sup> Me Stipeni, pasu ia tale

Spirit Manga ateva, ghe taatara saela epona liu me ghe tarala mallangina ateva God me Iesu ghe tiitingina tale pai muenna ativilau ta God. <sup>56</sup> Me ghe uela va, “Am tarala, ngatarala epona liu ange otiela me Natuna ateva Taumattu ngateva etiiingina tale pai muenna ativilau ta God.”

<sup>57</sup> Tale isaa o inangarina me laghe rrongi rungaala talingaira me laghe aore atingina me ila akapa laghe iilou lao sio etana. <sup>58</sup> Laghe ae velue ghoala tale masaliki taatara atea me laghe tiuaala tani kumua tale atu. Me lo atoa laghe nongoala laghe alokoila ghinnanira ta liue kkena aliki taita ateva, Sol ta ngetana.

<sup>59</sup> Nau laghe kumkumua, Stipeni ghe looloo saela me ghe uela va, “Vau eteva Iesu, ughaa maamauluaaghi.” <sup>60</sup> Me ghe suuiaala ta patu kkena me ghe sama anamuula me ghe uela va, “Vau eteva, urau mene annaa kaluira ssavoto.” Nau ghe aulia ngavaluela o me ghe asekanuela.

**8** Me Sol ie tee okae, me ta matane Sol, voto laghe ghelei teela Stipeni ghe tarala va masina.

### Sol ghe tiuaala tani tturuu tau ngaiesoa ngatoa

Tale nau eteva Stipeni ghe matela etana, laghe tiuaala o tani uvi saasakia tau ngaiesoa ngatoa eJerusalem. Liuna avalua o me tau ngaiesoa ngatoa laghe iloula eJerusalem me laghe lao sio tale masaliki etoa eJudia me eSamaria. Me apostolo atoa laghe tokala. <sup>2</sup> Kapuna taita atoa laghe tani aikaaiaa ta God laghe kaiaala Stipeni me laghe kaarasila tani ngalaia. <sup>3</sup> Me Sol ghe tiuaala tani tturuu tau ngaiesoa ngatoa. Ghe kupikupi kateva kateva ale me ghe kunekune velu ghoa taita me vause atoa

<sup>§</sup>7:50 Aisaea 66:1-2

me ghe laa ghaatokaila sso tale ale mata voovoo.

### **Pilipi ghe poppooaa eSameria**

<sup>4</sup>Lo atoa laghe ilou reerekataa seela laghe poppooaa inangarina ateva Iesu ta kona laghe laolao. <sup>5</sup>Pilipi ghe lao sio tale kateae masaliki taatara eSameria me ghe ppooaala Mesaea etaira. <sup>6</sup>Oroi ila taumattu ngatoa nau eteva laghe nongola inangarina Pilipi, me laghe tarala ni-aimatootoongana ghe gheleila me laghe nongo amasinaailila inangari ghe auli-aala. <sup>7</sup>Laghe tarala Pilipi ghe tiu vella raroai etoa tale oroi taita me vause. Raroai etoa laghe aore anamuula nau eteva laghe kupi velu ghoala taumattu ngatoa. Me oroi ila lo atoa vilikiira matena me tangorengore laghe masi-nala. <sup>8</sup>Isaa avalua o me paka nimasimasi eteva ghe lutula elome tale ia o masaliki taatara atea.

### **Saemon tau raroai ia**

<sup>9</sup>Kateva taumattu ghe tokatoka elome tale masaliki taatara atea, ararina atea ta Saemon, muennaaili ia tani ghelei nialaala. ASameria ngatoa laghe soosoghiaa voto laghe taatara ta ghe gheeghelei, me ghe saasaea nannaa va ia namuu ia. <sup>10</sup>Tau ngaitoitoe etoa me nim taumattu ngatoa, ila akapa laghe nongonongo inangarina, me laghe ue va, "Taumattu ngateva oia sarasarakaniaa ngepona liu namungaili etana." <sup>11</sup>Laghe nongonongoa poli oroiata laghe soosoghiaa nialaala ghe ghelei. <sup>12</sup>Me nau eteva Pilipi ghe poppooaa masi inangari tale ararimangalina ateva God me ararina atea Iesu Karisto, lo atoa laghe aikaaia, taita atoa me vause atoa, laghe ghaala niaasuu. <sup>13</sup>Saemon ia tee eghe aikaaiaala me ghe ghaala niaasuu. Ghe aimuli teela Pilipi me ghe taatara

kinatama niimatootoongana Pilipi ghe ghelei me ghe soghiaala.

<sup>14</sup>Nau apostolo atoa eJerusalem laghe nongola va aSameria ngatoa laghe aikaa-iaala inangarina God, laghe suula Pita me Jon tani lao etaira. <sup>15</sup>Nau lalu ghe rekatala, lalu ghe looloo saela ta God va Spirit Manga ateva esio ta aSameria ngatoa, <sup>16</sup>poli Spiriti eteva karika ghe mae etaira. Laghe nim ghaala niaasuu tale ararina atea Vau eteva Iesu. <sup>17</sup>Nau eteva lalu ghe ruula tani looloo sae, lalu ghe soaala nimairarua etaira me laghe ghaala Spirit Manga ateva.

<sup>18</sup>Saemon ghe tarala va apostolo alua lalu ghe soaala nimairarua etaira me laghe ghaala Spiriti eteva. Liuna avalua o me eghe ghaala viliki veu me ghe laooa sio etairarua, me ghe uela va, <sup>19</sup>"Amalu tau mae sarasarakana ateva ona tee etaghi, me arova asaoa tee nimaghi ta toa taumattu, la rooroo tani ghaa Spirit Manga ateva."

<sup>20</sup>Pita ghe liula ta Saemon me ghe uela va, "Aue God eturungi eitaua teeo me unem viliki veu, poli unannaa va up-oli tale viliki veu voto God enim tau-tau mae. <sup>21</sup>Karika righi uunguaam tale niuungu eteva oia, ta nannaam karika ghulughuluena ta matane God. <sup>22</sup>Unna ngaioghioghia me uvelu sesa ninanna me ulooloo sae ta Vau ngepona ateva va marova ealoanna, aue ekkaluaa isaa o sesa ninanna tale urunguitanim ateva. <sup>23</sup>Ataatara va nannaam epasupasu tale nissai, liuna avalua o ssavoto ateva ang ghele iri etokaiola."

<sup>24</sup>Vara me Saemon ghe uela va, "Amalu looloo sae ta Vau ngepona ateva me amalu aulieinaghi sae me isaa o voto amalu auliaala erau mene lutu etaghi."

<sup>25</sup>Nau lalu ghe ruula tani ppooaa inangarina ateva Vau ngepona ateva, lalu ghe kiriaa saela eJerusalem, lalu ghe kasu poppooaa elaa saesae masi kiukiu tale oroi masaliki eSameria.



### Pilipi me altiopia ngateva

<sup>26</sup> Kateva kapuna ensolo Vau ngepona ateva ghe uela ta Pilipi va, “Ukasu me ulao tale pai saot ativilau tale salana atikirighi karika righi taumattu etana, ia o salana atikirighi ekasukasu eJerusalem me esiosio eGaza.” <sup>27</sup> Pilipi ghe tiumaala tani kasu, ghe laolao me ghe soula taumattu nge Itiopia ngateva, namuu ia, uunguaane tani aitaria isaa akapaaili unna viliki veu Kandake, kuiini nge Itiopia ia.\*\* Ia o taumattu ngateva ghe saela tani kkaua eJerusalem, <sup>28</sup> me ghe oghiaala tani lao tanganuena, ghe tokatoka epona tale ailou eteva, me ghe ritiriti buku eteva ta propete ateva ta Aisaea. <sup>29</sup> Me Spiriti eteva ghe uela ta Pilipi va, “Ulaa kasu karangaa tale unna ailou eteva.”

<sup>30</sup> Liuna avalua o me Pilipi ghe ilou lao sio tale unna ailou eteva, me ghe nongola taumattu ngateva ghe ritiriti inangari tale buku eteva ta propete ateva Aisaea. Me Pilipi ghe kolomiela va, “Vaalua, ukilakila llo ona uritiriti?”

<sup>31</sup> Ghe uela ta Pilipi va, “Vaalua akila, nau eteva karika teva tani asaoki tau mae me akila? Lau sae mae tale ailou eteva me usae toka teeioghi.”

<sup>32</sup> Namu ngateva ghe ritiriti inangari tale Uru ngai Manga ateva eue va,

sipsipi eteva,

me nonginaaili tee natu sipsipi erighi nau la ghaaloanna tani sunapi velu uuna tale vilikina,

karika ghe otila paane ateva tani ppoaaa righi inangari.

<sup>33</sup> Laghe gheleila ararina atea ghe siola euu me ghe sesala. Karika laghe

gheleie eghulughuluena unna niaisakei etea.

Isaa avalua o me karika aue la kiukiuaa natuna atoa, poli laghe ruula maamaulaane tale kosa ateva.”††

<sup>34</sup> Namu ngateva ghe kolomila Pilipi va, “Uauliaa etaghi va propete ateva oia ghe auliaa see? Eaulieinia, o mene kateva ppae taumattu?” <sup>35</sup> Vara me Pilipi ghe otila paane ateva me ghe tiumaala tani auliaa isaa o inangari tale Uru ngai Manga ateva me ghe auliaala masi kiukiuna Iesu etana.

<sup>36-37</sup> Lalu ghe iilou elaoale tale salana atikirighi me lalu ghe rekatala tale atea atea, me ghe uela namu ngateva oia va, “Tarala, atea atea o. Vaalua, karika urooro tani asueoghi?”‡‡ <sup>38</sup> Namu ngateva ghe auliaala ta lo ateva ghe iilouaa ailou eteva va etoka. Pilipi me namu ngateva lalu ghe kure siola me lalu ghe siola tale atea atea me Pilipi ghe asu-uela. <sup>39</sup> Nau eteva lalu ghe lau sae mae tale atea atea, kapuna Spiriti eteva Vau ngepona ateva ghe ghaala Pilipi me ghe kasueiniela. Namu ngateva ghe tam mene tara poila Pilipi. Ghe pasula tale nimasiasi poli ghe aiesoala ta God, me ghe lao sio tanganuena. <sup>40</sup> Pilipi ghe rekatala tale masaliki taatara atea eAsotus, me ghe kasu ekapa seela tale mene kasina masaliki tani ppoaaa masi inangari lomosi ta ghe laa rekata sio eSiisaria.

### Sol ghe aikolikoliaala

**9** Tale isaa o nau Sol ghe kaakalui tani uvi emate lo atoa laghe aimuli tee Vau eteva. Liuna avalua o me ghe lao sio tani tara namu ngateva ta pristi etoa,

\*\*8:27 *Kandake* Utara Malloeana inangari.

††8:33 Aisaea 53:7-8

‡‡8:36-37 Kasina uru ngai laghe pitila laghe piti teela va, <sup>37</sup> *Pilipi ghe liula me ghe uela va, “Arova uaaikaiaa tale urunguitanim ateva, urooro tani ghaa niaasuu.”* Namu ngateva ghe liula me ghe uela va, “Aghaikaiaa va Iesu Karisto Natuna ia God.”

<sup>2</sup> me ghe kolomiela va epiti uru ngai me Sol esau sio ta namu ngatoa tale ale nivelu eitaua ngakapaaili eDamaskas. Me uru ngai eauliaa va arova Sol etara lo atoa, taita me vause, la uusila salane Iesu, aue ekuneila me esaeainila tale ale mata voovoo ateva eJerusalem. <sup>3</sup> Nau Sol ghe kasu vulila eJerusalem me ang ghe kalakalaa eDamaskas me arovaeaata nonga ta mallanga ateva ghe sio mae epona liu me ghe akouela. <sup>4</sup> Me Sol ghe katuu siola tapaa kosa me ghe nongola lingi ngalo ateva ghe uela va, “Sol, Sol, vaalua me ugheelei saasakieinaghi?”

<sup>5</sup> Me Sol ghe kolomila va, “Namu ngat-eva, io see?”

Lingi ngalo ateva ghe liula me ghe uela va, “Aghi Iesu ugheelei saasakieinaghi. <sup>6</sup> Totula me usso tale masaliki taatara atea me aue uso kila sa ateva aue ugheleia.”

<sup>7</sup> Taita atoa laghe kasukasu tee Sol laghe matautu etinginala me karika righi nisama etaira. Laghe nongola lingi ngalo ateva me karika laghe taatara teva taumattu. <sup>8</sup> Sol ghe totu saela tapaa kosa me nau ghe otila matane karika ghe roola tani tara teva voto. Liuna avalua o me laghe kunela nimane me laghe katu-lainie ssola eDamaskas. <sup>9</sup> Kotolu nau ghe mata salusalula me karika ghe namanamala me karika ghe ropi poila.

<sup>10</sup> Kateva disaepolo eDamaskas, ararina atea ta Ananaeas, Iesu ghe sama teeiela tale nitaatara atea, ghe uela etana va, “Ananaeas!”

Ananaeas ghe liula me ghe uela va, “Ue Vau eteva, aghi toko.”

<sup>11</sup> Me Vau eteva ghe uela etana va, “Aimanomanosiaala me ukasu lao tale salana atikirighi la kolokoloo va Ghulughuluena etana, me tanganuena Jitudas ukolomi taumattu ngateva atala nge Tasesi ia, ararina atea ta Sol. Ia okae esso looloo sae, <sup>12</sup> me tale nitaatara atea Sol ghe tarala taita ateva ararina

atea ta Ananaeas ghe kupi ssola me ghe soaala nimane etana me matana ghe mene taatarala.”

<sup>13</sup> Ananaeas ghe liula me ghe uela va, “Vau eteva, oroi taumattu ghe auliaala etaghi kiukiuna Sol me voto sesa ghe gheleila ta kapum taumattu ngatoa eJerusalem. <sup>14</sup> Me ghe sio mae oia eDamaskas ta ghe ghaala matuutuli-ena ta namu ngatoa ta pristi etoa tani kune lo atoa la kolokolo tau ararim atea.”

<sup>15</sup> Vau eteva ghe uela ta Ananaeas va, “Lao sio poli ngaghe suuiela va ia aue eghelele uunguaaghi tani aulia ngaotu ararighi etea ta taumattu ngeleka atoa me kingi etoa me taumattu nge Israeli tee atoa. <sup>16</sup> Aue aghapasunga etana va aue etani ghaa oroi nimmarikana ta poli ararighi etea.”

<sup>17</sup> Vara me Ananaeas ghe lao sio me ghe ssola tale ale ateva Sol ghe tokatoka etana me ghe soaala nimane ta Sol me ghe uela va, “Nengaghi Sol, Vau eteva esungieghila, ia o Iesu etana ghe aotuo-tula etam etapaa salana nau ughe mae siosio. Esungieghi mae sio etam va io urooroo tani mene taatara, me aue upasu tale Spirit Manga ateva.” <sup>18</sup> Arovaeaata nonga ta llo arova vaka kko ghe katuula ta matane Sol me ghe mene taatarala. Ghe totu saela me ghe ghaala niasuu. <sup>19</sup> Me nau eteva ghe namanamala me ghe mene sarasarakana.

### Sol ghe poppooaa eDamaskas

Sol ghe mene tokala kasina nau tee disaepolo atoa eDamaskas. <sup>20</sup> Arovaeaata ta ghe tiuaala tani ppoaaa Iesu tale aleira ale nivelu eitaua, ghe aulia ngaotu va Iesu Natuna ia God. <sup>21</sup> Taumattu ngakapa atoa laghe nongola me laghe soghieiniela me laghe aippooaa elome etaira va, “Ia oia taumattu ngateva ghe uviuvi lo atoa eJerusalem la kolokolo tau ararina atea Iesu. Me ghe sio mae oia tani

kune tau ngaiesoa ngatoa va esaeainila ta namu ngatoa ta pristi etoa.” <sup>22</sup> Me nau eteva Sol ghe poppooaa inangarina ateva Iesu, ghe tuttukueili aJiu etoa laghe tokatoka eDamaskas, me laghe soghiaala me karika laghe roola tani kaili ekamena va Iesu Mesaea ia.

<sup>23</sup> Oroï nau ghe lange sio me aJiu etoa laghe velu eitauaala me ngila ghe loeloe Sol tani uvi ematea. <sup>24</sup> Me karika, ta Sol ghe kilala voto laghe loela. El-laa me eleivo laghe lollosainia tale isaa akapa paa ngatamana elome tale masaliki taatara atea tani uvi ematea. <sup>25</sup> Kateva eleivoo, kapuna disaepolo atoa Sol laghe ghaala kinatama keru eteva me laghe kaaila Sol me laghe rekatila uasa eluekirighi, me laghe taue siola eleka tale valata me ghe kasula.

### Sol ghe saela eJerusalem

<sup>26</sup> Nau eteva Sol ghe rekatala eJerusalem ghe tootoonga tani lao aitauaa tee disaepolo atoa, me ila akapa laghe maamatautainia ta karika laghe aaiesoa va Sol ang ghe disaepolola. <sup>27</sup> Vara me Banabas ghe mae sio tani sausia. Ghe ghaala Sol me ghe laoainie sio ta apostolo atoa tani aulia ngamasalika etaira vaalua Sol ghe tarala Vau eteva etapaa salana me ghe sama teeiela, me ghe mene lao tee sio tani auliaa vaalua Sol karika ghe maamatautu tani ppooaa tale ararina atea Iesu eDamaskas. <sup>28</sup> Liuna avalua o me Sol ghe toka aitauaa teeilala me ghe kasukasu ekapa see eJerusalem me karika ghe maamatautu tani ppooaa tale ararina atea Vau eteva. <sup>29</sup> Sol me lo atoa aJiu ila la samasama nge Grik laghe aisakeanaala me ngila ghe loeloe tani uvi ematea. <sup>30</sup> Nau katoa disaepolo laghe kilala, laghe sioaala Sol eSiisaria me laghe sungie lao sio eTases.

<sup>31</sup> Liuna avalua o me ale manga aka-paaili eJudia, eGalili me eSameria laghe

tokala tale luei me Spirit Manga ateva ghe akorokoronganaailala tani toka me tani tau sae Vau eteva, me ghe aisausieinilala me laghe oroieili ila.

### Aenias me Dokas

<sup>32</sup> Nau Pita ghe kasu ekapa seela ghe lao tee sio eLida tani tara katoa kapuna taumattu God laghe tokatoka okae.

<sup>33</sup> Isaa eLida me ghe tarala taumattu ngateva ararina atea ta Aenias tangorengorena ia me ghe asola tale komo ghaoaluae (8) ninamanama. <sup>34</sup> Pita ghe uela etana va, “Aenias, Iesu Karisto aue eghelei emasinaio. Totu saela me ughou komom.” Arovaeangaili ta Aenias ghe totu saela. <sup>35</sup> Taumattu ngakapa atoa laghe tokatoka eLida me eSeron laghe taraiela me laghe tiuaala tani aiesoa ta Vau ngepona ateva.

<sup>36</sup> Isaa eJopa kateva disaepolo vause ia ararina atea ta Tabita (tale aseasea nge Grik, Dokas, malloeana va, kateva ghaata kkena la aseasea va dia). Tale nau ekapaaili ghe gheelei masi niuungu me ghe saausi taumattu karika righi peira. <sup>37</sup> Tale isaa o nau, Tabita ghe isikila me ghe matela. Laghe suusiela me laghe saeainiela tale ale ngepona atiulu. <sup>38</sup> EJopa kalakalangina ia eLida, liuna avalua o me nau disaepolo atoa laghe nongola va Pita eLida, laghe suula taumattu ngalua tani laa kolo Pita va emae parasi.

<sup>39</sup> Isaa arau o Pita ghe usilaluela. Nau lotolu ghe rekatala eJopa lotolu ghe saela epona tale ale atiulu me ghe tarala vause atoa raue vulu ila pasueili ila tale ale atiulu, me laghe tiitingina emua ta Pita me laghe ngangngala, me laghe aapasunga ghinna Dokas ghe gheleila nau maulue ia.

<sup>40</sup> Pita ghe sungi vella ghoala eleka me ghe suuiaala tani looloo sae. Vara me ghe taatara lao sio tale vause ateva matena ia me ghe uela va, “Tabita,

totu saela.” Tabita ghe otila matane, me nau ghe tarala Pita me ghe totu etokala. <sup>41</sup>Pita ghe posola nimane atelange me ghe sausiela tani tingina sae. Vara me ghe kolola vause atoa raue vulu ila tee mene katoa tau ngaiesoaa me ghe tau lao sio Tabita etaira maulue ia. <sup>42</sup>Kiukiu ghe rooaala eJopa me oroieili taumattu ghe aikaaiiaala ta Vau ngepona ateva. <sup>43</sup>Pita ghe mene tokala oroi nau eJopa tee taumattu ngateva ararina atea ta Saemon uunguaane tani kuluki viliki ghaata kkena tani ghelei mene kasina asease voto.<sup>¶</sup>

### Konilies ghe kolola Pita

**10** Isaa eSiisaria, taumattu ngateva, ararina atea ta Konilies, ghe tokatoka. Ia kateva namuu ghe mue-muaa kateva ai (100) tau ngai uvi tale Kohot laghe aseasea va Kohot nge Itali ia.<sup>§§</sup> <sup>2</sup>Ia me vausenna ateva me natuna atoa laghe aikaaiiaa ta God me laghe oneoneainia. Ghe tautau lao voto tale taumattu karika righi peiira me ghe looloo sae ta God nau ekapa atoa. <sup>3</sup>Kateva nau ta 3 kilok elo alai\* ghe tarala kateva nitaatara. Ghe tarala kapuna ensolo ateva God ghe mae sio etana me ghe uela etana va, “Konilies!”

<sup>4</sup>Konilies ghe taatara lao sio etana me ghe matautula me ghe uela va, “Vau eteva, vaalua?”

Me ensolo ateva ghe uela etana va, “Unem nilooloo sae me masi uunguaam tale taumattu karika peiira, God ghe masimasiaala. <sup>5</sup>Ghaine usuu righi taumattu tani lao eJopa me la laa kolo taumattu ngateva Saemon la kolokoloa va Pita etana. <sup>6</sup>Etokatoka tee mene kat-

eva Saemon uunguaane tani kuluki viliki ghaata kkena tani ghelei mene kasina asease voto, me alena ateva etokatoka kalakalangina ghoa elamana.”

<sup>7</sup>Nau ensolo ateva ghe kasula, me Konilies ghe kolola ghalua tana kapuna tau ngai nongonongo anna me kateva kapuna tau ngai uvi ie tee ghe aaesoa ta Vau ngepona ateva, <sup>8</sup>me ghe au-lia ngakapala voto ghe lutula me ghe sungilotolla me laghe lao sio eJopa.

### Unna nitaatara atea Pita

<sup>9</sup>Mene kateva elo sinaka, nau ngila ghe kalakalangina tale masaliki taatara atea eJopa, me Pita ghe saela epona tale ale ateva† tani looloo sae. <sup>10</sup>Ghe maamaloo me ghe anna tani nama righi inana. Nau laghe aimonomosiaa inana me ghe tarala nitaatara atea. <sup>11</sup>Ghe tarala epona liu ghe otiela me ghe tarala voto ateva namuu ia nongina tiulu kalio reerekati aighoughouna ghaata me ghe sio mae tale kosa ateva. <sup>12</sup>Elome etana asease ghaata kkena atoa me llo erarra euu me ghila atoa la looloo elomarase. <sup>13</sup>Vara me lingi ngalo ateva ghe uela va, “Pita! Totu saela me ughuvi emate llo me unama.”

<sup>14</sup>Pita ghe liula me ghe uela va, “Karika poi, Vau ngepona ateva! Karika poi aghe nama righi voto karika raarangisana.”

<sup>15</sup>Lingi ngalo ateva ghe mene mae sio ghaluene etana me ghe uela va, “Urau mene ue va karika raarangisana llo God ang ghe ghelei eraarangisanala.”

<sup>16</sup>Ghe lutula kotoluaata vara me arovaeaata ta kalio atiulu ghe mene saela epona liu.

<sup>¶</sup>9:43 Voto atoa nongina aikasukasu, aikaai ghinna, kou nguru, paisi, me mene kasina ase voto.

<sup>§§</sup>10:1 **Kohot nge Itali ia** Utara *Malloeana inangari*. Tau ngai uvi tale Kohot nge Itali ia, ila atala nge Itali ila.

\*10:3 **3 kilok elo alai** Ta inangari nge Grik, *tale aiaaghasona (9) ateva aoa*.

†10:9 Ale atoa eIsraeli karika righi pungane nongina ale ghaine.

<sup>17</sup> Nau Pita ghe annaa poi va saa mal-loeana ia o nitaatara atea me taumattu Konilies ghe suula laghe tarala alena ateva Saemon me laghe tingina ssola tapaa ngatamana. <sup>18</sup> Laghe kolokolola me laghe kolomila va, “Saemon Pita etokatoka oia?”

<sup>19</sup> Pita karika ghe ruu tani nnaa nitaatara atea me Spiriti eteva ghe uela etana va, “Saemon, taumattu kotolu lotolu paepaeo. <sup>20</sup> Tingina saela me usio tarailotolu me urau mene rati tani usilotolu ta aghi asungilotolula.”

<sup>21</sup> Pita ghe siola me ghe uela ta taita kotolu va, “Aghi oia, am paepaeaghi. Vaalua me am mae sio?”

<sup>22</sup> Taita kotolu lotolu ghe liula va, “Ami kasula tanganue Konilies, kateva namuu, tau ghulughuluena ia me eoneoneaa God. Taumattu nge Jiu ekapa atoa la oneoneainia. Ensolo manga ateva ghe auliaala etana va ekoloo me ulao tanganuena me ulaa ghaulia saa llo voto aue uauliaa me aue enongo.” <sup>23</sup> Pita ghe uela etairotolu va, “Ita ghaso.”

### **Pita tale alena ateva Konilies**

Ghe pai saela ta mene kateva nau, me Pita me mene katoa tau ngaiesoa nge Jopa laghe usila taita kotolu me laghe kasula. <sup>24</sup> Aiaaghaluene ateva nau, laghe rekataala eSisaria. Konilies ghe kolo aitauaala mangalina atoa me kapuna atoa, me laghe toitoi Pita. <sup>25</sup> Nau eteva Pita ghe maemae, Konilies ghe souela me ghe suuiaala ta liue kkena tani oneoneainia. <sup>26</sup> Pita ghe kune atinginaie saela me ghe uela etana va, “Tingina saela! Aghi nim taumattu ieghi nongina io.”

<sup>27</sup> Nau lalu ghe samasama, me lalu ghe kupi ssola me Pita ghe tarala oroi taumattu ngatoa ngila ghe velu eitauaala. <sup>28</sup> Ghe uela etaira va, “Am kilakilaaili

uneimami inangari nipaopao va aJiu etoa karika la rooroo tani aighui tee tau ngeleka atoa me tani laa taraila. Me God ghe apasungaala etaghi va karika amene ue va kasina taumattu karika raarangisana. <sup>29</sup> Liuna avalua o me nau eteva am ghe suula inangari etaghi va amae, karika aghe ratila tani mae. Erooroo va am auliaa vaalua me am ghe uela va amae?”

<sup>30</sup> Konilies ghe liula me ghe uela va, “Kotolu nau ang ghe lange sio, aghe tokatoka tanganueghi me ta 3 kilok elo alai,<sup>‡</sup> nongina ghaine, aghe looloo sae me taumattu ngateva ghinnanina ghe maamallanga ghe tinginala emua etaghi. <sup>31</sup> Me ghe uela etaghi va, ‘Konilies, unem nilooloo sae me masi uunguaam tale taumattu ngatoa karika peiira, God ghe masimasiaala. <sup>32</sup> Usungi righe taumattu elao ta Saemon Pita eJopa etokatoka tanganuena Saemon uunguaane tani kuluki viliki ghaata kkena tani ghelei mene kasina asease voto, me alena ateva etokatoka akalakalangina ghoa elamana.’ <sup>33</sup> Liuna avalua o me arovaeaata ta aghe suula inangari etam me masinaaili etam ta angu mae sio. Vau ngepona ateva aue etoka aitauaa teeita nau eteva uauliaa sa ateva ghe sungiola tani mae aulieinia me ami nongoa.”

<sup>34</sup> Vara me Pita ghe tiuaala tani aippooaa, ghe uela va, “Ghaine ngatarala va koronna God karika eaaimassiaa. <sup>35</sup> Me tale isaa akapaaili patunganua namuu, God ealoanna lo atoa la oneoneaa nonga God, me la ghelei voto masina. <sup>36</sup> Am kilakila inangarina God ghe suula ta taumattu nge Israeli etoa, masi inangari va luei ekasu ta Iesu Karisto, ia Vau ia tale ila akapaaili taumattu ngatoa. <sup>37</sup> Am kilakila sa ateva ghe ailtuaala eJudia. Jon ghe aippooaa tale niaasuu etee, me emulina, Iesu ghe

<sup>‡</sup>10:30 3 kilok elo alai Ta inangari nge Grik, tale aiaaghasiona (9) ateva aoa.

tiuaala tani uungu eGalili. <sup>38</sup> Me am kilakila vaalua God ghe tau lao sio Spirit Manga ateva me sarasarakana ta Iesu aNasareti ia, me vaalua ghe kasu ekapa seela me ghe gheeghelei masi niuungu me ghe gheeghelei emasina lo atoa taumattu sesa taumattu ngateva ghe ghelei saasakieinilala, ta poli God ghe tokatoka teeia.

<sup>39</sup> “Ami, ami ghe tara akapala voto ghe gheleila tale masalikiira aJiu etoa me eJerusalem. Laghe avukalaie saela tale ai eteae tani uvi ematea. <sup>40</sup> Tale aiaakotonna ateva nau, God ghe totuela tale nimate va taumattu ngatoa la taraia. <sup>41</sup> Karika va ila akapa taumattu ngatoa laghe taraiela ta llo nonga atoa God ang ghe suitoongainilala. Nau ghe totula tale nimate, ami, ami ghe namanama me ami ghe ropi teeiela. <sup>42</sup> Ghe uela etaimami va ami ppooaa ta taumattu ngatoa me auliaa etaira va ia God ghe suitoongainiela va eghelei niaisakei ta lo atoa sakesake ila me lo atoa matena ila. <sup>43</sup> Ila akapa propete atoa laghe aaulieinia va lo atoa la ghaiesoaa etana God aue ekalua kaluira ssavoto tale ararina ateaie Iesu.”

<sup>44</sup> Nau eteva Pita ghe poppooaa isaa o inangari me Spirit Manga ateva ghe sio mae ta lo akapa atoa laghe nononongo isaa o inangari. <sup>45</sup> Tau ngaiesoa ngatoa isoisona ila laghe mae aitauea tee sio Pita laghe soghila tani tara va Spirit Manga ateva ghe sio mae tee ta taumattu ngeleka atoa. <sup>46</sup> Laghe nongolala ta laghe aippooaa tale asease nisama karika samasama tangananueira me tee laghe tautau sae God.

Me Pita ghe uela va, <sup>47</sup> “Teva erooroo tani ue va isaa oia taumattu erau mene ghaa niaasuu tale manu? Poli ngila ghaala Spirit Manga ateva nongina ita.” <sup>48</sup> Me Pita ghe uela va la ghaa niaasuu tale ararina ateaie Iesu Karisto. Me laghe kolomila Pita va emene toka teeiela mua mene righe nau.

### Pita ghe auliaala malloeaana voto ghe gheleila

**11** Vara me apostolo atoa me tau ngaiesoa ngakapa atoa eJudia laghe nongola va taumattu ngeleka atoa tee laghe aikkaaiala inangarina ateva God. <sup>2</sup> Liuna avalua o me nau Pita ghe saela eJerusalem lo atoa isoiso ila tau ngaiesoaa ila laghe sama anamuu teeiela, <sup>3</sup> me laghe ue va, “Io ughe lao sio tangananueira lo atoa karika isoiso ila me ughe namanama teeilala.”

<sup>4</sup> Me Pita ghe tiuaala tani aulia ngamasalika saa voto ghe lutula. <sup>5</sup> “Aghe tokatoka tale masaliki taatara ateaie eJopa me aghe looloo sae me aghe tarala nitaatara ateaie. Aghe tarala voto ateva namuu ia nongina tiulu kalio reerekati aighoughouna ghaata me ghe sio mae epona liu nongina aghe tokatoka. <sup>6</sup> Nau aghe taatara ssola elome tale kalio atiulu aghe tarala asease ghaata kkena atoa, lo atoa ita aitarainila me lo atoa karika ita aitarainila, me llo erarra euu me ghila atoa la looloo elomarasae. <sup>7</sup> Vara me aghe nongola lingi ngalo ateva ghe ue etaghi va, ‘Pita, utotu me ughuvi emate llo me unama.’

<sup>8</sup> “Aghe liula me aghe uela va, ‘Karika poi, Vau ngepona ateva! Karika poi aghe nama righe voto karika raarangisana.’

<sup>9</sup> “Lingi ngalo ateva ghe mae sio epona liu ghe mene aippooaala ghaluene me ghe uela va, ‘Urau mene ue va karika raarangisana llo God ang ghe ghelei eraarangisana.’ <sup>10</sup> Llo oia ghe lutula kotoluata me isaa akapa llo ghe mene saela epona liu.

<sup>11</sup> “Karika masau me taita kotolu laghe sungilotolla tani kasu eSiisaria tani mae taraieghe, lotolu ghe mae sio tale ale ateva ami ghe tokatoka etana. <sup>12</sup> Me Spiriti eteva ghe uela etaghi va, ‘Urau mene rati tani usilotolu ta aghi aghe sungilotolla,’ me isaa toko ghaonomo (6) kapughu

laghe usieghila ami ghe kupi ssola tale alena ateva taumattu ngateva. <sup>13</sup>Ghe auliaala etaimami vaalua ghe tarala ensolo ateva ghe lao sio tanganuena me ghe uela va, 'Suula inangari ta Saemon la kolokoloa va Pita ia eJopa. <sup>14</sup>Ia aue emaeaa inangari egheleio me lo atoa tee tanganuem aue am saanga.'

<sup>15</sup>"Nau eteva aghe tiuaala tani aippooaa, Spirit Manga ateva ghe sio mae etaira nongina ghe sio mae etaita nau ta Pentikos. <sup>16</sup>Me aghe annaala sa ateva Vau ngepona ateva ghe aulieiniela nau ghe uela va, 'Jon ghe aasuu taumattu tale manu me am aue am ghaa niaasuu tale Spirit Manga ateva.' <sup>17</sup>Liuna avalua o me poli God ghe tau lao sio kateva nonga ia voto ateva karika ita polipolia nongina ang ghe taue mae sio etaita lo atoa ita aikaaia ta Iesu Karisto, aghi tee karika arooro tani ghelei runga uunguaane God."

<sup>18</sup>Nau eteva laghe nongo avaluela o karika laghe mene auliaala righi voto. Ta ngila ghe nim aamasina sae ta God me laghe ue va, "God ange tau lao sio ninna ngaioghioghia ta taumattu ngeleka atoa va la kiri mae etana me la saanga."

### Ale manga eAntiok

<sup>19</sup>Nau eteva lo atoa laghe ilou reerekata seela nau laghe uvi ematela Stipeni, laghe lao sio arau tale distriki eteva ePoenisia me patunganua ateva eSaeprasi me tale masaliki taatara eAntiok tale provinsi eteva eSiria me laghe poppooaa ta aJiu nonga atoa. <sup>20</sup>Katoa etaira atala nge Saeprasi ila me masaliki taatara atea eSaerini laghe lao sio eAntiok me laghe tiuaala tani ppooaa ta aGrik tee atoa. Laghe aauliaa masi inangarina Vau eteva Iesu. <sup>21</sup>Sarasarakaniaane Vau eteva ghe tokatoka teeila, mausina avalua o me oroieili taumattu ghe aikaaiaala me laghe kiri mae sio ta Vau eteva.

<sup>22</sup>Tau ngaiesoa ngatoa eJerusalem laghe nongola voto o me laghe suula Banabas tani lao eAntiok. <sup>23</sup>Nau eteva ghe rekatala me ghe tarala vaalua maa-masinaane God namungaili, ghe masimasieliila me ghe asarasakanailala tani toka akorokorongana ta Vau eteva tale urunguitaniira. <sup>24</sup>Banabas masi taumattu ia me pasu ia tale Spirit Manga ateva me korokorongana ia tale niaikaia, me oroieili lo atoa laghe mene sso mae tani aimuli tee Vau eteva.

<sup>25</sup>Vara me Banabas ghe lao sio eTases tani pae Sol. <sup>26</sup>Nau eteva ghe taraiela ghe koloala me ghe laoainie sio eAntiok. Tale kasangaulu ghalua (12) ulana lalu ghe tokatoka tee ale manga atoa me lalu ghe aapasunga inangarina ateva God ta oroi taumattu ngatoa. Me isaa eAntiok laghe ase akasinala disaepolo atoa va Kristen ila.

<sup>27</sup>Tale isaa o nau katoa propete laghe kasula eJerusalem me laghe sio mae eAntiok. <sup>28</sup>Kateva etaira, ararina atea ta Agabas, ghe tinginala tale korokoronganiaane Spiriti eteva me ghe aulia ngaotula va maloo ateva sesaaili ia aue erooa ngakapa kosa ateva, me nau Klaodies Siisa ghe aaitoia eRom, maloo ateva ghe lutula. <sup>29</sup>Nau laghe nongola inangarina Agabas, laghe annaala va la sausi lo atoa eJiudia, me kateva kateva ta disaepolo atoa laghe aisokosokoiaala viliki veu tale aloannaaira. <sup>30</sup>Banabas me Sol lalu ghe ghaala viliki veu me lalu ghe laooa sio ta namu ngatoa tale ale manga eJerusalem.

### Laghe uvi ematela Jeimis, me Pita laghe atokaie ssola tale ale mata voovoo

**12** Isaa o nau king Herot ghe tiuaala tani kune katoa tale ale manga, tani ghelei saasakieinila. <sup>2</sup>Ghe auliaala me laghe sai pulela alona Jeimis tuena Jon tale baenata ateva. <sup>3</sup>Nau Herot ghe

tarala va aJiu etoa laghe masimasiaala llo ghe gheleila, me ghe mene auliaala me laghe mene kunela Pita, tale nau nivelu eitaua ngateae tani nama verete karika righi isti etana. <sup>4</sup>Ghe atoka ssola Pita tale ale mata voovoo me ghe atinginala kasangaulu ghaonomo (16) soldia laghe aaikoli tani aitoieinia, ghaata mua soldia ta kateae nitoitoi. Herot ghe anna va eaisakei tale tummatavanga nau Pasova eruu.

<sup>5</sup>Nau Pita ghe tokatoka tale ale mata voovoo me tau ngaiesoa ngatoa tale ale manga laghe looloo asarasarakana sae ta God va esausia.

### **Pita ghe kupi ghoala tale ale mata voovoo**

<sup>6</sup>Ia o vo ngateva me ghe pai Herot ghe atinginaia emua ta mata ngoroi etoa me ghe aisakei, Pita ghe aseasekanua ta mallomeirarua soldia ngalua iriiri ia tale sene alua, me mene ghalua soldia lalu ghe aaitoia atamana atea. <sup>7</sup>Vara me kapuna ensolo ateva Vau ngepona ateva ghe rekatala me mallanga ateva ghe lutula tale ale mata voovoo me ensolo ateva ghe posola usuena ativilau Pita tani angunia me ghe uela etana va, “Totu parasila,” me sene alua lalu ghe kao vel-laluela ta nimane.

<sup>8</sup>Me ensolo ateva ghe uela etana va, “Asaela ghinnanim me unem aikasukasu ta kkem.” Me Pita ghe gheleila. Vara me ensolo ateva ghe uela va, “Uasae unem aiaasae ngeleka ateva me uaimuli teeieghi.” <sup>9</sup>Liuna avalua o me Pita ghe kasu vulila ale mata voovoo atiulu me ghe aimuli teela ensolo ateva. Ghe anna va ghe nim asoasopoi. Karika ghe kilakila va isaa o voto ghe lutulutu ekoronna. <sup>10</sup>Lalu ghe laula aitiutiuteva soldia ghe toitoi atamana atea me mene aiaaghaluene ateva me lalu ghe rekatala tale atamana atea aeana ia tale ale mata voovoo tale ia o masaliki taatara

atea, me ia o atamana atea ghe otiela, karika teva ghe otiela, me lalu ghe kupi ghoala. Lalu ghe kasu tee siola tale mene katikirighi salana, vara me arovaeaata nonga ta ensolo ateva ghe kasu vulila Pita.

<sup>11</sup>Vara me Pita ghe vira kilala sa ateva ghe lutula etana me ghe uela va, “Koronnaaili Vau ngepona ateva esuula kapuna ensolo ateva tani sio asaangieghi ta nimane Herot me voto aJiu etoa laghe anna va aue la ghelei etaghi.”

<sup>12</sup>Ghe tinginala ghe nannaala mua me ang ghe laolao tanganue Meri kinna ia Jon, kateae ararina Jon ta Mak, nongina oroi taumattu ghe veluvelu eitauaa tani looloo sae. <sup>13</sup>Ghe mirimirila tale atamani ngeleka atea me vause ateva Roda etana tau ngai nongonongo anna ia ghe ghoa mae tani nongo. <sup>14</sup>Nau eteva ghe nongo kilala lingi ngalona ateva Pita ghe masimasi etinginala me karika ghe otila atamana atea ta ghe ilou ssola elome me ghe uela ta taumattu ngatoa va, “Pita eleka tale atamana atea eghoa tiitingina.”

<sup>15</sup>Me laghe ue teeieela va, “Angu veeveela?” Me nau ghe sarasarakana tani auliaa me laghe nnaala va, “Koti kapuna ensolo ateva okae.”

<sup>16</sup>Pita ghe mene mirimirila me laghe ghoala tani oti atamana atea me laghe soghiaala tani taraia. <sup>17</sup>Me Pita ghe paopaola ta nimane va la rau mene sama, me ghe auliaala sa ateva ghe lutula me vaalua Vau ngepona ateva ghe ghaa velue ghoa mae tale ale mata voovoo, me ghe uela etaira va, “Am auliaa ta Jeimis me mene katoa kapuita, sa ateva ghe lutula.” Me ghe mene lao ppae sio.

<sup>18</sup>Vara ghe paila me soldia ngatoa nannaaira ghe aisavisavilaala me ngila ghe aaiokolomieinila va, “Sa ateva ghe lutula ta Pita?” <sup>19</sup>Herot ghe uela va la laa paea. Nau eteva karika laghe roola tani



taraia, ghe kolomila soldia ngatoa laghe aaitoieiniela, me karika laghe roola tani liu, me ghe uela va la uvi ematela.

### Matemateane Herot

Vara me Herot ghe kasula eJiudia tani mene laa toka tau eSiisaria. <sup>20</sup>Herot ang ghe sessai veluela ta taumattu nge Taer me Saedon, me laghe aloannala luei etana, poli laghe ghaaghaa inana tale llo masaliki king ghe aaitaraa. Liuna avalua o me katoa etaira laghe mae aitauea sio me laghe siola tani taraia. Laghe lao akasina sio ta Blastus, ia ghe aaitaraa tanganuena king, va ghe sausila, me laghe mina lao sio tani tara king.

<sup>21</sup>Tale nau eteva laghe suitoon-gainiela, Herot ghe asaela ase aiaasae ateva tani apasunga va ia kingi ia me ghe tokala tale unna aitokatoka ateva uneira ia kingi etoa me ghe gheleila kateva niaippooaa ta taumattu ngatoa. <sup>22</sup>Me taumattu ngatoa laghe aare tani ue va, “Karika va lingi ngalo taumattu ia, ta lingi ngalo goto ia.” <sup>23</sup>Arovaeaa nonga ta kapuna ensolo ateva Vau ngepona ateva ghe taula sessa ateva etana me toliiti etoa laghe nama amateala, poli taumattu ngatoa laghe kaakauenia tani arueinia me karika ghe tautau sae ararina atea God.

<sup>24</sup>Me masi inangarina ateva God ang ghe laolao akapa see me ang ghe pipinosa anamuu.

<sup>25</sup>Banabas me Sol lalu ghe ruula uunguaairarua tani taula viliki veu eJerusalem me lalu ghe mene lao sio eAntiok me lalu ghe kolo teela Jon Mak.

### Tau ngaiesoa ngatoa laghe suula Banabas me Sol tani laa ppoaa

**13** Tale ale manga ateva eAntiok katoa propete me tisa laghe aapasunga masi nitoka God ghe aloanna: Ba-

nabas, me Simion, mene kateae ararina ta Niger,<sup>1</sup> me Lusias aSaerini ia, me Sol, me Manain, lalu ghe namu ngaitauaala me Herot, gavana ia. <sup>2</sup>Kateva nau laghe kakkaua Vau ngepona ateva, me laghe naenae, me Spirit Manga ateva ghe uela va, “Am amanga Banabas me Sol me lalu ghelei niuungu eteva oia, aghe suitoon-gainilalueta tani gheleia.” <sup>3</sup>Liuna avalua o me nau laghe mene naela me laghe looloo saela, me laghe saoaala nimaira etairarua, me laghe sungilalueta tani kasu.

### eSaepras

<sup>4</sup>Spirit Manga ateva ghe sungi taulalue ghoala eSeleusia, lalu ghe aikaaila me lalu ghe lao sio tale patunganua ateva eSaepras. <sup>5</sup>Nau eteva lalu ghe rekatala tale masaliki taatara atea eSalamis, lalu ghe ppoaaala inangarina ateva God elome tale aleira ale nivelu eitauaa aJiu etoa. Jon Mak ghe toka teeilalueta tani sausalua.

<sup>6</sup>Lotolu ghe kasu ekapa seela tale patunganua ateva me lalu ghe mae sio ePapos. EPapos lalu ghe tarala kateva aJiu, tau nighelei nialaala ia me propete kamekame ia, ararina atea ta Bar-Iesu. <sup>7</sup>Ia oia taumattu ngateva ghe tokatoka tee gavana ngateva, ararina atea ta Sejas Polus. Gavana tee alo-masaanga ia. Ghe kolola Banabas me Sol ta ghe aaloanna tani nongo inangarina God. <sup>8</sup>Ia o ase taumattu ngateva ghe ghelelei nialaala, tale inangari nge Grik la aseasea ararina atea ta Elimas. Elimas ghe aloanna tani ghelei saasakia uunguaairarua Banabas me Sol, ta karika ghe aloanna va gavana ngateva eaiesoaa ta Iesu. <sup>9</sup>Me Sol, mene kateae ararina ta Pol, pasu ia tale Spirit Manga ateva, ghe alumila Elimas me ghe uela va, <sup>10</sup>“Io natuna io Satana. Me tau

<sup>1</sup>13:1 *Niger* Tale inangari nge Latin, malloana va veroverongana.

ngai ssateira io llo voto ghulughuluena! Me isaa akapa gheeleia nikamekame me ssavoto epasupasu etam. Erooroo va uruu tani ghelei saasakia salane Vau ngepona ghulughuluena? <sup>11</sup> Ghaine ni-mane atelange Vau ngepona ateva esae etam, me umata salusalu. Karika aue utara sinaka ateva me aue utoka mala ngaluse nau.”

Pol ghe nim ruuruu poi tani auliaa me matane Elimas ghe saurorromien-ala me ghe mata salusalula me ang ghe paepae teva taumattu tani posoa me ekatulania. <sup>12</sup> Nau eteva gavana ngat-eva ghe taraiela, ghe aiesoala, me ghe soghiangailiila kanna niapasunga Vau ngepona ateva.

**Banabas me Pol lalu ghe  
lao sio tani ppoaaa eAntiok  
elome ePisidia distrik**

<sup>13</sup> Pol me kapuna atoa laghe kasu vulila ePapos, me anua ateva ghe kaailala me laghe lao sio tale masaliki taatara atea ePerga tale provins ateva ePampilia. Me Jon Mak ghe oghi vulu-laluela me ghe oghi lao sio eJerusalem. <sup>14</sup> Lalu ghe kasu vulila ePerga, me laghe kasu lao sio eAntiok elome ePi-sidia Distrik. Me ta nau manga ateva, laghe kupi ssola tale aleira ale nivelu eitaua ngateva aJiu etoa me laghe toka siola. <sup>15</sup> Vara katoa laghe ruula tani riti inangari tale inangari nipaopao me propete atoa me namu ngatoa tale ale nivelu eitaua ngateva laghe suula inan-gari ta Pol me kapuna atoa va, “Ka-puimami etoa, marova righi inangari ni-sarasarakana am aaloanna tani auliaa etaimami, masina am rooroo tani sso auliaa.”

<sup>16</sup> Pol ghe tingina saela me ghe pao-lala tale nimane atelange va karika la mene toka samasama, me ghe uela va,

“Am Israeli etoa me am tau ngeleka atoa am tautau sae ararina atea God, am nongoaghi! <sup>17</sup> Kapuira Goto ateva Israeli etoa, ghe suitoongaala tuvuita atoa va kapuna ila. Me nau eteva laghe kasu vulila kosaira me laghe siola eJjip, ghe gheleilala laghe oroienaailiila. Vara me tale sarasarakaniaane, ghe mene ghaaila mae sio. <sup>18</sup> Me nau eteva laghe tokala tale voto ateva karika righi taumattu etana, karika ghe liula sesa ta nge-taira erooroo ghaatingauluae (40) nina-manama. <sup>19</sup> Ghe tturuula ghaitu (7) ara-rimangali nge Keinan, me ghe tau lao sio isaa oia kosa va eksaira kapuna atoa. <sup>20</sup> Isaa akapa voto oia ghe lutula erooroo ghaata ai me ghalimangauluae (450) ninamanama.

Vara me God ghe tau lao sio kapuira namu ngatoa tani aitarainila erooroo nau eteva propete Samuel ghe tingi-nala. <sup>21</sup> Vara me taumattu ngatoa angila ghe kookolomi teva king, me God ghe tau lao sio Sol natuna ia Kish, tale ararimangali eteva ta Benjamin. Ghe aitarainilala ta ghaatingauluae (40) ni-namanama. <sup>22</sup> Vara ghe ghaa vella Sol, me ghe gheleila Deivit ghe kingila. Ghe auliaa tootoongaala va, ‘Ngatarala Deivit, natuna ia Jesi, ia lo ateva tau-mattu aghaloannaailiia tale urungui-tanighi eteva. Ia aue eghelei ekapa voto aghaloanna va eghelei.’<sup>§</sup>

<sup>23</sup> “Nongina God ang ghe auliaala tale inangari nialokoi, va ghe tau lao sio tau ngai asaangi eteva ta Israeli etoa, tuvuna ia Deivit, Iesu etana. <sup>24</sup> Auenaa Iesu ghe mae, Jon ghe ppoaala ninna ngaioghioghia me niaasuu ta taumattu nge Israeli ekapa atoa. <sup>25</sup> Jon ange ruuruu uunguaane, me ghe uela va, ‘Am an-naa va aghi see etaghi? Karika va aghi Mesaea am toitioia. Karika, ia eaaimuli

§13:22 1 Samuel 13:14; Sams 89:20

etaghi, me aghi karika tani masina aghi tani pulaka unna aiiri aikasukasu.’

<sup>26</sup>“Kapughu etoa, tuvuna atoa Abraham, me am tau ngeleka atoa am kakkaua God, God ghe tau mae sio isaa o inangari niasaangi etaita! <sup>27</sup>Taumattu nge Jerusalem atoa me kapuira namu ngatoa karika laghe tara kilala Iesu, aloira karika ghe masaangaala inangari-ira propete atoa isaa o laghe ritiriti tale isaa akapa nau manga, laghe ghelei rooroaala nau laghe uela va aue emate. <sup>28</sup>Karika laghe tarala righe masi salana tani tingina etana me la uvi ematea, me laghe kolomila Paelat va la uvi ematea. <sup>29</sup>Nau eteva laghe ghelei ekapala voto Uru ngai Manga ateva ghe uela va la ghelei, laghe ghaa veluela tale ai eteae me laghe lao sio tani alokoie sso tale lienga niaikaia ngateae. <sup>30</sup>God ghe mene totuela tale nimate <sup>31</sup>me oroieili nau, ghe otuotula ta lo atoa laghe kasu teeiela eGalili tani sae eJerusalem nau maulue ia. Ila lo atoa laghe taraiela, ghaine la aulia ngaotu ta kapuira taumattu ngatoa.

<sup>32</sup>“Me angalu aauliaa masi kiukiu etaimim: Sa ateva God ghe aulieiniela tale inangari nialokoi ta tuvuita atoa <sup>33</sup>ang ghe ghelei erooroaala etaita, nau ghe totula Iesu. Nongina laghe piti elokoila ta aiaaghalua ateva Sam, va “To natughu io, Ghaine nge tamam ieghila.”\*\*

<sup>34</sup>Koronna inangari va God ghe totuela tale nimate, karika aue emene mate, nongina ghe auliaala tale isaa toko inangari, va

“Aue atau aatu etaimim niarangise ateva manga ia me koronna ia tale

inangari nialokoi aghe auliaala ta Deivit.’††

<sup>35</sup>Nongina ghe auliaala tale mene kat-eva inangari va,

“Karika aue utau velu kapum taumattu manga va emauu.”‡‡

<sup>36</sup>“Nau eteva Deivit ghe ruula tani ghelei uunguaane God tale unna ateva vituu, ghe matela; me laghe kaieiniela nongina tuvuna atoa me vilikina ghe mauula. <sup>37</sup>Me lo ateva taumattu God ghe totuela tale nimate karika ghe mauula.

<sup>38</sup>“Liuna avalua o, kapughu etoa, aghaloanna tani aulia ngaotu me am kila va ta Iesu, God aue ekalua kaluita ssavoto. <sup>39</sup>Ta ngetana lo atoa la ghaikaiaa aue egheleila va karika righe kaluira ssavoto. Isaa avalua o me inangari nipaopao kanna Moses karika erooro tani asaangiem tale kaluimim ssavoto. <sup>40</sup>Am paniem! Saa voto God ghe auliaala ta propete atoa erau lutu etaimim, laghe uela va

<sup>41</sup>“Am tarala, lo atoa taumattu am at-tara nonga tani sama,

aue am soghiaa sa ateva aue agheleia, me aue am mate,

Tale nau oia aue aghelei kasina voto, karika aue am nnaa va koronna, arongona ta marova kasina taumattu aue eaulia poi etaimim!”¶¶

<sup>42</sup>Nau eteva Pol me Banabas angilalu ghe kasukasu vuli ale nivelu eitaua ngat-eva, taumattu ngatoa laghe mene aloan-naillaluela va lalu mene ppooaa isaa oia voto tale lo ateva too nau manga. <sup>43</sup>Nau eteva lo atoa laghe mae sio tani velu eitauaa laghe kasu reerekatala, oroi aJiu etoa me mene katoa taumattu avirina laghe vira aiesoala tee aJiu etoa, laghe

\*\*13:33 Sams 2:7

††13:34 Aisaea 55:3

‡‡13:35 Sams 16:10

¶¶13:41 Habakuk 1:5

usila Pol me Banabas. Lalu ghe aippooaa teeila tale inangari niaisausiaa tani poso parasi maamasinaane God.

<sup>44</sup>Tale mene kateva nau manga, ghaisa ngarighi me taumattu ngakapa atoa tale lo atea o masaliki taatara laghe velu eitauaala tani nongo inangarina ateva Vau ngepona ateva. <sup>45</sup>Nau eteva aJiu etoa laghe tarala oroieili taumattu, me angila ghe nannaa saasakia me angila ghe aauliaa tee Pol me saa voto ghe aauliaa.

<sup>46</sup>Pol me Banabas, karika lalu ghe matautula, lalu ghe liula me lalu ghe uela etaira va, “Ami tani ppoaa inangarina ateva God akasina etaimim. Ta am, am ghe ratiela me eaapasunga va God karika ghe suitoongainiemia tani ghaa maulue ateva etokatoka liu. Liuna avalua o, koti ami lao ta tau ngeleka atoa. <sup>47</sup>Vau ngepona ghe uela ta kateva kateva etaingalua va,

“Aghe gheleiola va io mallanga io ta taumattu ngeleka atoa, me urooro tani sausila tani ghaa niasaangi tale kosa akapa ateva.”<sup>§§</sup>

<sup>48</sup>Nau eteva taumattu ngeleka atoa laghe nongola llo oia, laghe masiasieliila me laghe oneoneaala inangarina ateva Vau ngepona ateva, me lo atoa God ghe suimatoongainilala va la ghaa maulue ateva etokatoka nau ekapa atoa, laghe aiesoaala.

<sup>49</sup>Inangarina ateva Vau ngepona ateva ghe rooa ngakapaailiila ia o voto ateva. <sup>50</sup>Vara me aJiu etoa laghe ghelei saasakiaala nannaaira lo atoa vause laghe oneoneaa God me ila namuu ila, me lo atoa taita namuu ila tale lo atea o masaliki taatara, me laghe tiuaala tani ghelei saasakiaa tee Pol me Banabas, me laghe tiu vellalueta tale ia o voto ateva. <sup>51</sup>Lalu ghe rariaa vella au kosa ta kkeirarua tani apasunga va gheleeiaaira

sesa. Me lalu ghe lao sio elkoniam. <sup>52</sup>Me disaepolo atoa eAntiok elome ePisidia Distrik laghe pasula tale nimasimasi me tale Spirit Manga.

### eElkoniam

**14** Elkoniam Pol me Banabas lalu ghe mene gheleila uunguaairarua nongina lalu ghe ghelei eAntiok elome ePisidia Distrik. Lalu ghe ssola tale aleira ale nivelu eitaua ngeveva aJiu etoa me lalu ghe aippooaala me tale poppooairarua sarasarakanaaili, oroieili taumattu ngatoa aJiu ila me aGrik ila laghe aiesoaala. <sup>2</sup>Katoa tana aJiu karika laghe aikaaiaala laghe tau lao sio sesa ninanna ta katoa tana taumattu ngeleka me laghe ghelei esessaila tau ngaiesoa ngatoa. <sup>3</sup>Lalu ghe tokala oroi nau eElkoniam me karika lalu ghe maamatautu tani aulia ngaotu Vau ngepona ateva, me Vau eteva ghe tau lao sio sarasarakana etairarua me lalu ghe gheleila oroieili ase niaimatootoongana atoa, me tale isaa o voto lalu ghe ghelei, Vau eteva ghe aapasunga ta taumattu ngatoa va voto o lalu ghe aulia ngaotu tale maamasinaane koronna akapa. <sup>4</sup>Me taumattu tale ia o masaliki taatara atea ghe ghalua atokailala; katoa laghe lao aitauaa tee sio aJiu etoa, me katoa laghe lao aitauaa tee sio apostolo alua. <sup>5</sup>Emulina aJiu etoa me mene katoa tana taumattu ngeleka laghe tingina aitauaa teela kapuira namu ngatoa, me laghe aaloanna tani uvi taita alua me tani kumlalua tale atu va lalu mate. <sup>6</sup>Pol me Banabas lalu ghe nongola me lalu ghe iloula. Lalu ghe lao sio tale distriki eteva eLikaonia, tale masaliki taatara aluae eListra me eDebi me mene kasina lutu masaliki. <sup>7</sup>Me lalu ghe mene ppoaala masi kiukiu.

### eListra me eDebi

<sup>8</sup> EListra kateva tana taita, tangoren-gorena ia, tokatoka ngeuu ia nau ghe lutula karika ghe kasukasula. <sup>9</sup> Ghe tokala me ghe nongola nau Pol ghe aippooaala. Pol ghe taatara lao sio etana me ghe tarala va aikaaiiane erooroo tani ghelei emasinaia, <sup>10</sup> me ghe sama anamuula etana me ghe uela va, “Tingina saela,” me taita ateva ghe aoso atingina saela me ghe kasukasula.

<sup>11</sup> Nau eteva taumattu ngatoa laghe tarala isaa o voto Pol ghe gheleila, laghe tiuaala tani sama me aore atingina tale inangari tanganueira eLikaonia, laghe ue va, “Goto atoa ngila nonginala taumattu ngatoa me ngila sio mae etaita.”

<sup>12</sup> Banabas laghe asela ararina atea ta Sius me Pol laghe asela ararina atea ta Hermes\* poli ia ghe muemuaa niaip-pooaa. <sup>13</sup> Alena ale manga ateva goto ateva Sius ghe tokatoka akalakalangina eleka tale masaliki taatara atea. Pristi eteva ta goto ateva ta Sius ghe maeaa sio vulumakao me pusi ngai tale namu ngateae atamana poli ia me taumattu ngatoa laghe anna tani ghelei aiaavusu-vusuena etairarua.

<sup>14</sup> Apostolo alua ta Banabas me Pol lalu ghe nongola voto o laghe aaloanna tani ghelei etairarua me lalu ghe rasila uneirarua aiaasae tani apasunga va karika lalu ghe masimasi me lalu ghe ilou ssola elome ta taumattu ngatoa me lalu ghe tiuaala tani sama anamuu. <sup>15</sup> Lalu ghe ue va, “Vaalua me am anna tani ghelei isaa ona voto? Angalua nim taumattu iengalua nongina am. Angalu ghe mae sio tani aulia ngaotu masi kiukiu va am kiri tale voto kamena me am taatara lao tale Goto ateva tokatoka liu ia ghe gheleila elomarase me kosa ateva, paamanu eteva me isaa akapaaili

voto elome tale isaa o voto. <sup>16</sup> Emua arau taumattu ngeleka atoa karika laghe kilakila God, liuna avalua o me God ghe tau vellala tani kasu tale aloaloannaaira. <sup>17</sup> Me ghe aapasunga voto tani aima-toonga va ia etautau masi voto, me eapasunga maamasinaane ta etautau sio vao ateva epona liu, me inana tale nauna, me etautau aatu inana, me eapasu urunguitaniimim tale nimasimasi.” <sup>18</sup> Tale isaa o inangari, ghaisa ngarighi karika lalu ghe roo tani ghelei runga taumattu ngatoa tani ghelei aiaavusu-vusuena lao ta ngetairarua.

<sup>19</sup> Katoa tana aJiu laghe mae sio eAntiok elome ePisidia Distrik me elkoniam laghe pasalila taumattu ngatoa me laghe kumla Pol tale atu me laghe ae velue ghoala tale masaliki taatara atea poli laghe anna va ang ghe matela. <sup>20</sup> Nau disaepolo atoa laghe tingina talieiniela me ghe totu saela me ghe kiriaa ssola tale masaliki taatara atea. Eghe paila tale mene kateva nau, ia me Banabas lalu ghe lao sio eDebi.

### Lalu ghe oghi lao sio eAntiok eSiria

<sup>21</sup> Pol me Banabas lalu ghe ppoaaala masi kiukiu eDebi me oroieili taumattu laghe aiesoala. Vara me lalu ghe oghiaa siola eListra, elkoniam me eAntiok elome ePisidia Distrik. <sup>22</sup> Lalu ghe aasarasakanala tau ngaiesoa ngatoa me lalu ghe auliaala va la poso parasi lo ateva o niaikaia. Lalu ghe ue ta taumattu ngatoa va, “Tani kupi sso tale ararimangalina ateva God, aue ita tani sou oroieili voto aanasa.” <sup>23</sup> Tale kateva kateva ale manga, lalu ghe suimatoongaala elda ngatoa me lalu ghe naela me lalu ghe looloo saela tani taula lao ta nimanane Vau ngepona ateva, ia laghe atoka tuutuliira etana. <sup>24</sup> Nau lalu ghe lao akapa see sio tale distriki eteva ePisidia

\*14:12 Sius me Hermes Utara Malloeana inangari.

me lalu ghe mae sio tale distriki eteva ePampilia. <sup>25</sup> Isaa o lalu ghe aippooaala tale masaliki taatara atea ePerga vara me lalu ghe siola tale masaliki taatara atea eAtalia.

<sup>26</sup> EAtalia lalu ghe aikaaila tale anua ateva me lalu ghe lao sio eAntiok tale provinsi eteva eSiria nongina laghe taulalue lao sio ta God va tale maamasinaane God lalu ghelei isaa o niuungu lalu ghe kasula tani ghelei, me lalu ghe ruula, me lalu ghe kiriaa mae sio. <sup>27</sup> Nau lalu ghe rekataala eAntiok lalu ghe kolo aitauaala taumattu ngatoo tale ale manga ateva me lalu ghe auliaala voto God ghe sausaluelu tani ghelei me vaalua ghe otila salaira taumattu ngeleka atoa tani aiesoaa. <sup>28</sup> Lalu ghe tokala oroi nau tee lo atoa laghe aikaaila tale ia o masaliki etea.

### Nivelu eitaua ngateae eJerusalem

**15** Katoa taumattu laghe kasula eJiudia me laghe sio mae eAntiok tani mene apasunga ta tau ngaiesoa ngatoo. Laghe ue va, “Karika am rooro tani saanga marova am tam aimuli tee inangari nipaopao kanna Moses va la iso taita atoa.” <sup>2</sup> Isaa oia inangari ghe gheleila kinatama niaisamaaii tee Pol me Banabas. Elda ngatoo laghe suitoongaala Pol me Banabas tee mene katoa tana tau ngaiesoaa tani sae eJerusalem tani sae tara apostolo atoa tee elda ngatoo tale isaa o inangari. <sup>3</sup> Tau ngaiesoa tale ale manga ateva ghe sungilala tani sae eJerusalem me nau laghe laa saesae, laghe sso teela ePoenisia me eSamaria me laghe kiukiuuuala vaalua taumattu ngeleka atoa laghe aikolikoli-aala. Nau laghe nongola isaa o inangari, laghe masmasieiliila. <sup>4</sup> Nau laghe rekatala eJerusalem, tau ngaiesoa ngatoo, apostolo atoa me elda ngatoo laghe masmasieiliila tani soula, me lalu ghe

auliaala vaalua God esaasausilalua tale uunguairarua.

<sup>5</sup> Katoa tana tau ngaikaaia laghe aimuli usi tee katoa tana Paresi, laghe tingina saela me laghe uela va, “Am tani iso taumattu ngeleka atoa me la tani usila inangari nipaopao kanna Moses.”

<sup>6</sup> Apostolo atoa me elda ngatoo laghe toka siola tani aisakeiaa isaa o inangari. <sup>7</sup> Oroieili niaippooaa ghe lange sio me Pita ghe tingina saela me ghe uela va, “Kapughu etoa, am kilakila kasina nau ang ghe lao sio God ghe suitoongainghila elome etaimim va aghaulia ngaotu lo ateva oia masi kiukiu ta taumattu ngeleka atoa me ila tee aue la roo tani nongo me la aikaaila. <sup>8</sup> God ekilakila akapa urunguitaniira taumattu ngatoo, liuna avalua o me tani apasunga va eaaloanna tee taumattu ngeleka atoa, me etautau lao Spirit Manga ateva, nongina ghe taue mae sio ta ngetaita. <sup>9</sup> God etaatara taumattu ngeleka atoa me ita aJiu etoa va kateva nonga ita. Poli ang ghe kaluaala kaluira ssavoto nau laghe aiesoaala. <sup>10</sup> Vaalua me am aaloanna tani tootoonga God me am tautau lao maamaatana ta mene katoa tau ngaiesoaa me emua arau ita me tuvuuta atoa ita ghe tam rooro tani sau? <sup>11</sup> Karika! Ita aiesoaa va ita me ila aue ita saanga tale maamasinaane ateva Vau eteva Iesu.”

<sup>12</sup> Ila akapa taumattu ngatoo laghe matua ngatokala me laghe nongola Banabas me Pol lalu ghe auliaala llo aimatootoongana God ghe sausaluelu tani ghelei nau lalu ghe uungu ta taumattu ngeleka atoa. <sup>13</sup> Nau lalu ghe ruula tani aippooaa, Jeimis ghe liula me ghe uela va, “Kapughu etoa, am nongoaghi. <sup>14</sup> Saemon Pita ghe auliaala etaita vaalua God ghe apasunga ngakasinala ailousiaane ateva ta taumattu ngeleka atoa me ghe gheleila katoa etaira va kapuna tuungi ila. <sup>15</sup> Inangariira propete atoa elao-

lao aitauaa tee isaa oia inangari va taumattu ngeleka atoa la aiesoaa, nongina laghe pitila, laghe uela va:

<sup>16</sup>“Emuli tale isaa oia voto aue aoghi me alaa ghatulu alena ateva Deivit<sup>†</sup> ghe katuula

me voto ghe sesala, aue amene atulu me aue aghelei nongina arau.

<sup>17</sup>Poli aghaloanna va mene kasina taumattu aue la mene pae Vau ngepona ateva,

tee ila o taumattu ngeleka atoa aghe kololala va kapughu ila,’ ghe uela Vau eteva ia eghelei isaa oia voto.

<sup>18</sup>Ngila ghe kilala oroi ninamanama ang ghe lange sio.”<sup>‡</sup>

<sup>19</sup>Jeimis ghe uela va, “Nannaaghi va ita rau mene ghelei voto eanasaaili ta ngetaira taumattu ngeleka atoa la mae-mae ta God. <sup>20</sup>Ita roo tani piti tikirighi uru ngai elao etaira me ita auliaa isaa oia voto va la rau mene nama inana la tautau lao tale kapuira tootoo goto atoa, me la rau mene ghelei uunguaa niailai rorrou see atea, me la rau mene nama ghaata kkena la kiikii pule aloira, me la rau mene nama malatau rae ta ngetana. <sup>21</sup>Ta emua arau inangari nipaopao kanno Moses laghe aulia ngaotu tale isaa akapaili masaliki taatara, me laghe ritir-iti tale ale nivelu eitaua ngatoa tale isaa akapaaili nau manga.”

### Uru ngai etikirighi laghe pitiela ta tau ngaikaia ngeleka atoa

<sup>22</sup>Vara me apostolo atoa me elda ngatoa me ila akapa tale ale manga ateva laghe uela va la suitoonga righi taumattu me la sungila sio eAntiok tee Pol me Banabas. Laghe asela Jiudas (la aseasea va Barsabas) me Saelas. Taita alua oia

lalu ghe muemuaa tau ngaiesoa ngatoa.

<sup>23</sup>Laghe pitila uru ngai etikirighi eue va, Ami apostolo atoa me elda ngatoa, ita aiesoa ngaitauaa, Ami tautau aatu masimasi-aaimami etaimim akapa taumattu ngeleka atoa am ghe aiesoala isaa ona tale masaliki taatara eAntiok me tale provinsi elua eSiria me eSilisia.

<sup>24</sup>Ami ghe nongola va katoa ta ngetaimami laghe sio atu ta ngetaimim me laghe auliaa inangari eghelei saasakia tokatokaaimim me eghelei saasakia nannaaimim me karika ami ghe sungilala. <sup>25</sup>Ami masimasi eitauaala tani suu katoa ta ngetaimami tani kasu eitauaa tee masi kapuira alua ta Banabas me Pol tani sio taraiem. <sup>26</sup>Taumattu ngalua oia angilalu ghe tau lao sio maamauluaairaru tale ararina atea kapuira Vau eteva Iesu Karisto. <sup>27</sup>Liuna avalua o ngami sungisungi tee Jiudas me Saelas tani akorokorongana inangari ami ghe pitila. <sup>28</sup>Ngami aulia ngaitauaala me Spirit Manga ateva va emaa-masina va karika ami mene saooa sae mene righi inangari maate tee isaa o inangari nipaopao. <sup>29</sup>Karika am mene nama inana la tautau lao ta kapuira tootoo goto atoa, me am rau mene nama llo ghaata kkena la kiikii pule aloira, me malatau rae ta ngetana, me am rau mene ghelei uunguaa niailai rorrou see atea. Aue am toka amasina marova am usila isaa oia inangari.

Masinaaili.

<sup>30</sup>Apostolo atoa me elda ngatoa laghe sungila isaa oia taumattu tani sio eAn-

<sup>†</sup>15:16 Alena ateva Deivit eaimatoonga kingi etoa tuvuna ila Deivit.

<sup>‡</sup>15:18 Amos 9:11-12

tiok, me laghe kolo aitauaala taumattu ngatoa laghe aiesoaa me laghe taula uru ngai etikirighi. <sup>31</sup> Nau laghe nongola uru ngai etikirighi, laghe pasula tale nimasimasi poli laghe nongola inangari niaaisausia. <sup>32</sup> Jiudas me Saelas ilalua tee propete ilalua me lalu ghe kaarasila tani aippoaaa teela me tani asarasakanaila tale masi inangari. <sup>33-34</sup> Laghe tokala kasina nau me ghe ghaala nauirarua taita alua tani mene oghiaa sae nongina laghe sungilaluela. Laghe sungilaluela tee kaluira niarangise me luei.<sup>¶</sup> <sup>35</sup> Pol me Banabas lalu ghe tokala eAntiok tee mene katoa me laghe aapasunga me laghe aaulia ngaotu inangarina ateva Vau eteva.

### Pol me Banabas lalu ghe aitiuaala

<sup>36</sup> Oroi nau ghe lange sio me Pol ghe uela ta Banabas va, “Italu mene oghi lao ta kapuitalua atoa tale masaliki taatara atoa nongina italu ghe ppoaala inangarina ateva Vau eteva, me ita laa taraila va vaalua aikaaiiaira.” <sup>37</sup> Banabas ghe aloanna va Jon Mak eusilalua, <sup>38</sup> me Pol karika ghe aaloanna poli eghe oghi vululaluela ePampilia me karika ghe usilaluela tani laa ghelei niuungu. <sup>39</sup> Taita alua lalu ghe aisavalaa teela tuku ninanna ngateva o me lalu ghe aitiuaala. Banabas ghe kolola Jon Mak me lalu ghe aikaaila me lalu ghe lao sio eSaeprasi. <sup>40</sup> Me Pol ghe kolola Saelas me tau ngaiesoa ngatoa laghe taulalue lao sio tale maamasinaane Vau ngepona ateva, me lalu ghe kasula. <sup>41</sup> Lalu ghe lao sio eSiria, eSilisia me lalu ghe aasarasarakana taumattu ngatoa tale ale manga atoa.

### Timoti ghe usila Pol me Saelas

**16** Pol me Saelas lalu ghe lao sio eDebi me lalu ghe mene lao tee sio eListra. Tale masaliki eteae o, kateva disaepolo ghe tokatoka, ararina atea ta Timoti, kinna ateva aJiu ia me ghe aaiesoaa, me tamane ateva aGrik ia. <sup>2</sup> Tau ngaiesoa ngatoa eListra me elkoniam laghe arueinia. <sup>3</sup> Pol ghe anna tani koloa va lotolu ghe kasu, liuna avalua o me ghe isoiela poli ghe nnaala aJiu etoa nongina lotolu ghe laolao me laghe kilakila va tamane ateva aGrik ia. <sup>4</sup> Nau eteva laghe laolao tale isaa akapa masaliki taatara laghe aauliaa saa ninanna apostolo atoa me elda ngatoa eJerusalem laghe mae aitauaa sio etana va taumattu ngatoa la aimuli tee. <sup>5</sup> Liuna avalua o me isaa akapa ale manga ghe sarasakanala tale aikaaiiaira me nau ekapa atoa tau ngaiesoa ngatoa laghe ooori.

### Pol ghe tarala nitaatara atea eTroas

<sup>6</sup> Pol me kapuna atoa laghe kasu ekapa seela tale voto alua ePrigia me Galaisia poli Spirit Manga ateva ghe paolala va la rau mene ppoaaa inangari eteva tale provinsi eteva eEisia. <sup>7</sup> Nau laghe rekatala tale aioloa ngateva eMaesia laghe anna tani sso eBitinia me kapuna Spiriti eteva Iesu ghe tam annala va laghe sso. <sup>8</sup> Liuna avalua o me laghe kasu ssola eMaesia me laghe siola eTroas. <sup>9</sup> Vara eleivoo me Pol ghe tarala tale unna nitaatara atea ghe tarala taumattu nge Mesedonia ngateva ghe tiitingina me ghe kolokolo Pol, ghe ue va, “Umae eMesedonia me umae sausiemami.” <sup>10</sup> Nau eteva Pol ghe ruula tani tara unna nitaatara atea, arovaea

<sup>¶</sup>15:33-34 Kasina uru ngai laghe pitila laghe mene piti teela va, <sup>34</sup> Me Saelas ghe anna tani toka, me Jiudas nonga ghe oghi sae eJerusalem.



nonga ta ami<sup>§</sup> ghe aimonomosiaala tani lao eMesedonia. Ami ghe kilala va God ang ghe koloamamila tani laa ppoaaa masi kiukiui etaira.

### Lidia ghe aikolikoliaala ePilipae

<sup>11</sup> Ami ghe tiu ghoala eTroas me ami ghe kautula tale patunganua ateva eSamotres, vara mene kateva nau, ami ghe lao sio tale masaliki taatara atea eNiapolis. <sup>12</sup> Ami ghe kasula o me ami ghe mene lao sio ePilipae, aRom atoa laghe aaitarainia me ia masaliki namuu ia ta masaliki taatara atoa tale ia o distriki eteva eMesedonia. Me ami ghe tokala o kasina nau.

<sup>13</sup> Vara nau manga ateva, me ami ghe kupi vulu ghoala atamana atea tale masaliki taatara atea, me ami ghe lao sio tale ateo atea. Ami ghe annaa va ami ghe tara teva voto, me ami ghe looloo sae etana. Vause atoa laghe velu eitauaala tale ia o voto ateva me ami ghe toka siola, me ami ghe tiuaala tani aippooaa teeila. <sup>14</sup> Kateva ta ila o lo atoa laghe nongonongo inangari, kateva vause, ararina atea ta Lidia, ia tau ngai kaua ia ta God me karika va aJiu ia, laghe polipoli ghinna ghueghuenna etana, tanguenua tale masaliki taatara atea eTaeataera. Vau ngepona ateva ghe otila urunguitanina ateva tani nongo amasina voto Pol ghe ppoaaala. <sup>15</sup> Vara me ia me lo atoa laghe tokatoka aitaua nonga tale kateva ale, laghe ghaala niaasuu, me ghe koloamamila va ami lao tanguenua. Ghe uela va, “Arova am aaiosoa va aghaikaaiiaa ta Vau ngepona ateva, am mae toka tanguueghi.” Ghe tani kolokolo rerrekananiemami, liuna avalua o me ami ghe toka teeila.

### Pol me Saelas tale ale mata voovoo

<sup>16</sup> Kateva nau, ami ghe laolao tale voto ateva ailooloo sae ia, me ami ghe soula aliki vause ateva, karika ghe tokatoka tale aloannaane, me kateva spiriti ghe tokatoka etana me ghe aaulia ngamue-mue voto, me ghe vira ghe lutulutu. Ghe gheeleei oroieili uneira viliki veu lo atoa laghe aaitarainia poli ghe aauliaa voto auena elutu. <sup>17</sup> Ia o aliki vause ateva ghe aaimuli teeiemami me Pol, me ghe ovaova ghe ue va, “Isaa oia taumattu, kapuna tau ngai nongonongo anna ila Goto ateva iaaili epona, me la ghaauliaa etaimim salana tani saanga.” <sup>18</sup> Ghe gheeleei evaluela o oro nau, me Pol ang ghe maamangoo teeia, liuna avalua o me ghe kiriela me ghe uela ta spiriti eteva va, “Tale ararina atea Iesu Karisto, aghaauliaa etam va ukupi vulue ghoa!” Tale ia o tuku nau erighi, spiriti eteva ghe kasu vuliela.

<sup>19</sup> Nau eteva lo atoa laghe aaitaraa ia o aliki vause ateva, karika ghe tokatoka tale aaloannaane, laghe kilala va salaira tani ghaa viliki veu ang ghe kapala, laghe kunela Pol me Saelas me laghe aelalue lao sio tale matavanga tani laa tingina ta mataira namu ngatoa. <sup>20</sup> Laghe laoaialalue sio ta lo atoa laghe gheeleei niaisakei me laghe uela va, “Taumattu ngalua oia aJiu ilalua, me lalu ghe gheleila me nissaia ang ghele namuula tale masaliki etea oia. <sup>21</sup> Lalu ghe aapa-sunga voto karika masina va ita aRom atoa ita aimuli tee.”

<sup>22</sup> Taumattu ngatoa laghe usila kaluira tani gheleei tee Pol me Saelas, me tau ngai gheleei niaisakei etoa laghe aauliaala me polisi etoa laghe ghaa vella ghinnaniirua me laghe parulaluela. <sup>23</sup> Laghe paru emaamaatelaluela me laghe atokailalue ssola tale ale

<sup>§</sup>16:10 Luk ghe usilala eTroas, liuna avalua o me ghe pitila va “ami”.

mata voovoo ateva, me laghe auliaala ta tau ngai toitoi eteva va, “Ukaarasi tani tara rungarungainilalua.” <sup>24</sup>Nau ghe ghaala inangari matuutuliena, ghe atokailalueta tale ale ngelome atiulu me ghe sikilaala kkeirarua tale aikakkamoti eteva me ghe kamotila kkeirarua.

<sup>25</sup>Elomatuaa voo me Pol me Saelas ngilalu ghe looloo sae me kikkinari sae ta God me karavusu etoa laghe nongongolalua. <sup>26</sup>Vara me kinatama rukeruke ateva ghe rukela. Nau eteva rukeruke ateva ghe rukela ale mata voovoo ateva, atamana akapa atoa ghe otillala me sene ta karavusu etoa ghe kaola. <sup>27</sup>Tau ngai toi ale mata voovoo ateva ghe totula me ghe tarala ta atamana tale ale mata voovoo ghe otilla, me ghe ghaala iemane baenata ateva me vara ghe pasa amatea poli ghe annaa va karavusu etoa ngila ghe iloula.\*\*

<sup>28</sup>Pol ghe kolokolo anamungainiela me ghe uela va, “Urau mene pasa amateo ta ami ekapa ami tokatoka!”

<sup>29</sup>Me tau ngai toi ale mata voovoo ateva ghe reterete poli ghe matautula, me ghe kolokolola va la maeaa teae lam, ghe ilou velu ssola, me ghe suuiaala emua ta Pol me Saelas. <sup>30</sup>Vara me ghe ghoainilalueta eleka me ghe kolomilalueta va, “Namu ngalua, sa ateva arooro tani gheleia me asaanga?”

<sup>31</sup>Lalu ghe liula me lalu ghe uela etana va, “Uaiesoa ta Vau ngepona Iesu, me aue usaanga, io me kapum atoa tanguem.” <sup>32-34</sup>Tale ia o vo ngateva, tau ngai toi ale mata voovoo ateva ghe ghaailalue lao sio tanganuena me ghe porala usaiirarua, me ghe anginilalueta. Me lalu ghe auliaala inangarina Vau ngepona ateva etana, me tee ta lo atoa laghe tokatoka tanganuena. Ia ghe aiesoala, me arovaeeaa ta lalu ghe asuuela me lo

atoa tee tanganuena. Emuli ta nau laghe suula, me ghe pasula tale nimasimasi poli ghe aiesoala ta God, ia me natuna akapa atoa me vausenna ateva.

<sup>35</sup>Vara ghe paila, me tau ngai ghelei niaisakei etoa laghe suula inangari ta kapuira polisi etoa va la laa ue va la tau velu taita alua. <sup>36</sup>Vara me tau ngai toi ale mata voovoo ateva ghe uela ta Pol va, “Tau ngai ghelei niaisakei etoa la uela va ami tau veluemalua. Amalu rooro tani kasu, me aue amaluku kasu tale luei.”

<sup>37</sup>Pol ghe uela ta polisi etoa va, “Angalua sitisen nge Rom iengalua, me karika laghe ghelei mueta niaisakei etaingalua me laghe paruengalua ta mata ngoroi etoa. Me tee laghe atokaiengalua ssola tale ale mata voovoo. Me isaa oia ngila nim anna tani sungieinangalua va angalu kasu? Karika poi! Ila laa tani mae ghaaiengalua, me la kasueinangalua.”

<sup>38</sup>Polisi etoa laghe lao sio tani auliaa inangarina Pol ta tau ngai ghelei niaisakei etoa. Me nau laghe nongola va Pol me Saelas sitisen nge Rom ilalua, ghe moilala tale llo laghe ghelei teeilalueta.

<sup>39</sup>Laghe lao sio tale ale mata voovoo tani kaluaa etairarua me laghe kololalueta me laghe kasu eitauaa teeilalue ghoala eleka, me laghe uela etairarua va, “Masina, amaluku mene toka oia, amaluku kasu.” <sup>40</sup>Nau lalu ghe kupi ghoala tale ale mata voovoo, lalu ghe lao sio tanganue Lidia, me lalu ghe saopila lo atoa laghe aiesoala ta Iesu me lalu ghe aippooaa teeilala tani asarasakanaila, me lalu ghe mene kasula.

## eTesalonika

**17** Pol me kapuna atoa laghe kasu eloi lao sio tale masaliki taatara aluae eAmpipolis me eApolonia tani

\*\* 16:27 Marova karavusu etoa laghe iloula, namu ngatoa aue laghe uvi emate tau ngai toi ale mata voovoo ateva.

lao tale masaliki taatara atea eTesa-  
lonika. Isaa okae ale nivelu eitaua ngat-  
eva aleira ia aJiu etoa ghe tokatoka.  
<sup>2</sup>Pol ghe kupi ssola tale ale nivelu eitaua  
ngateva me ghe tiuaala tani ppoaa  
nongina nau etoa ghe ghelei. Kotolu  
nau manga ghe toka teeilala me laghe  
aippooa ngaitaua teela Uru ngai Manga  
ateva. <sup>3</sup>Ghe aulia ngamasalikangaili-  
ila etaira me ghe aapasunga tale Uru  
ngai Manga ateva va koronna Mesaea  
aue eghaa nimmarikana me emate me  
aue emene totu tale nimate. Me ghe  
uela va, “Iesu ia Mesaea ia, aghi apop-  
pooainia etaimim.” <sup>4</sup>Katoa tana aJiu  
laghe aiesoaa, me laghe aimuli teela  
Pol me Saelas. Oroi tee aGrik atoa laghe  
aiesoaa ta God, me oroi namuu tale  
vause atoa laghe usila Pol me Saelas.

<sup>5</sup>Katoa tana aJiu karika laghe  
aaiesoaa, laghe annaa saasakiaala.  
Liuna avalua o me laghe kolo aitauaala  
kasina taumattu makatakattanna, me  
tee taumattu tale matavanga, me laghe  
aaikkalui see tale masaliki taatara  
ateae. Laghe aore atingina, me laghe  
lao sio laghe ilou ssola tale alena ateva  
Jeson tani ae velu ghoa Pol me Saelas  
etaira. <sup>6</sup>Me nau eteva karika laghe  
tarailaluella, laghe aela Jeson me mene  
katoa tau ngaiesoa me laghe laoinila  
sio emua ta namu ngatoa tale masaliki  
taatara atea. Laghe ovaova me laghe  
ue va, “Isaa oia taumattu laghe ghelei  
saasakia ngakapala voto tale kosa akapa  
ateva, ila oia ngila mae sio. <sup>7</sup>Me Jeson  
ghe masimasiaala Pol me kapuna atoa,  
me ghe ghaailala laghe ssola tale alena  
ateva. Ila akapa la sassakeaa inangarina  
Siisa, la ue va kateva kingi, ararina  
ateae ta Iesu.” <sup>8</sup>Nau eteva taumattu  
ngatoa me namuu tale masaliki taatara  
atoa laghe nongola ghe sessaieililala.  
<sup>9</sup>Vara me laghe uela ta Jeson me tau  
ngaiesoa ngatoa va, “Ange roola mua  
tani aisakei me am tau mae sio viliki

veu, me am kasu. Arova la matua atoka  
auna am mene mae ghaa uneimim  
viliki veu.”

### eBeriiia

<sup>10</sup>Nau eteva ghe voola, tau ngaiesoa  
ngatoa laghe suula Pol me Saelas tani  
lao eBeriiia. Nau lalu ghe laa rekata sio,  
lalu ghe ssola tale ale nivelu eitaua ngat-  
eva, aleira ia aJiu etoa. <sup>11</sup>ABeriiia nga-  
toa, masi taumattu ila, me nannaaira  
masalikeaili ta aTesaalonika ngatoa, poli  
laghe aloannaaili tani nongo inangari  
Pol ghe poppooaa, me isaa akapa nau  
laghe taatara tale Uru ngai Manga ateva  
tani tara va voto Pol ghe poppooaa ko-  
ronnaaili. <sup>12</sup>Liuna avalua o me oroi tau-  
mattu nge Jiu etoa laghe aiesoaa, me  
oroi vause me taita nge Grik tee, namuu  
ila tale ia o masaliki taatara atea, laghe  
aiesoaa.

<sup>13</sup>Nau aJiu etoa eTesaalonika laghe  
nongola va Pol ghe poppooaa inanga-  
rina ateva God eBeriiia, ila tee laghe  
lao sio. Laghe tiuaala tani ghelei aisav-  
isavilaa nannaaira taumattu ngatoa va  
la rau mene nongo inangarina God Pol  
ghe poppooaa. <sup>14</sup>Lo atoa laghe aaiesoa  
ngaitauaa laghe suula Pol tani sio ela-  
mana tani sio pae teva anua. Saelas me  
Timoti lalu ghe tokala eBeriiia. <sup>15</sup>Me  
lo atoa taumattu laghe laoa sio Pol  
tale masaliki taatara atea eAten, auna  
laghe kasu, Pol ghe suula inangari etaira  
va, “Am lao me Saelas me Timoti lalu  
mae tara parasieghi, me ngotolu uungu  
eitauaa.”

### Pol eAten

<sup>16</sup>Nau eteva Pol ghe toitoi Saelas me  
Timoti eAten, ghe alousiusieiliila tani  
tara va masaliki taatara atea pasu ia  
tale tootoo goto atoa. <sup>17</sup>Liuna avalua o  
me ghe ssola tale ale nivelu eitaua ngat-  
eva tani aippooaa tee aJiu etoa me aGrik

atoa laghe kakkaua God tee aJiu etoa<sup>††</sup>, me tee nau ekapaaili ghe poppooa ta taumattu ngatoa tale matavanga. <sup>18</sup> Tau ngai apasunga ngatoa ta Epikuria<sup>‡‡</sup> me Stoik<sup>¶¶</sup> laghe tiuaala tani aisakeanna teeia. Katoa etaira laghe kokkolomi va, “Vara eue va saa, ia oia taumattu ngat-eva etam kilakila sa ateva eaulieinia?” Katoa laghe ue va, “Eanna tani aulia ngaotu mene kasina ase goto.” Laghe aauliaa isaa o inangari poli Pol ghe aulia ngaotu masi inangarina Iesu me tototuaaira matena atoa. <sup>19</sup> Vara me laghe koloala me laghe ssoainiela tale voto ateva eAreopagas, kansolo atoa la veluvelu eitauaa etana, me laghe uela etana va, “Erooroo va ami kila isaa oia voto ouna uaulia ngaotu? <sup>20</sup> Ta io angu ghaaghaa mae ouna voto tale nongonongoaimami, me ami anna tani kila malloeana isaa o voto.” <sup>21</sup> (Ila akapa taumattu nge Ateni etoa, me mene katoa tana taumattu karika tanganueira okae laghe mae sio tani toka eAten, karika la gheeleei righi voto, karika, ta laghe nim aloannaaili tani nongo me auliaa kiukiu ouna.)

<sup>22</sup> Vara me Pol ghe tingina saela elome ta namu ngatoa tale ia o masaliki taatara atea tale motouru eteva eAreopagas me ghe uela va, “Taumattu nge Ateni etoa, ataatara va nannaaimim namungaili tale isaa akapa uunguaa nikkaua. <sup>23</sup> Poli nau akasukasu see ataatara voto am kakkaua etana, me aghe tara teela kateva liu nigheleei aiaavusuvusuena, laghe pitila inangari etana laghe uela va, ‘Ta Goto ateva karika ami kilakilaia.’ Am nongo, God am kakkauaeinia me karika am kilak-

ilaia, ghaine aghaulia ngaotu etaimim. <sup>24</sup> Ia o Goto ateva, ia ghe gheleila kosa ateva me isaa akapaaili voto etana. Ia Vau ia tale kosa ateva me epona liu. Karika etokatoka tale ale manga taumattu ngatoa la gheeleei. <sup>25</sup> Karika etu-utukuna poi tale teva voto, me ita taumattu ngatoa karika ita gheeleei teva voto ta nimaita tani sausia, karikaaili, poli ia nonga etautau mae maulee me ain-oaita me tee isaa akapaaili mene kasina voto. <sup>26</sup> Tale kateva nonga taumattu ghe gheleila ararimangali ekapa atoa, va la toka akapa see me la apasu kosa ateva. Me ghe suitoongaala nauira aue la toka, me ghe apasunga teela aioghioghi tale kosaira. <sup>27</sup> God ghe gheleila isaa oia voto va taumattu ngatoa aue la paea. Me nau la paepae, koti aue la taraia, me ia karika emene masau tale kateva kateva etaita. <sup>28</sup> ‘Poli ta ngetana ita tokatoka me ita aikasuaa, me taumattu ita.’<sup>§§</sup> Nongina kasina inangariimim am ghe pitila eue va, ‘Ita tee natuna ita.’\*

<sup>29</sup> “Liuna avalua o, poli ita natuna ita God, ita rau mene anna va ia nongina tootoo gol, silva me atu, taumattu ngatoa la gheeleei tale aalomasangani-aaia. <sup>30</sup> Tale nau ang ghe lao sio, God ghe nim taatara avalua o gheeleeiaaira taumattu ngatoa, poli karika laghe kilakila amasina aloannaane God. Me ghaine eaaulia ngakorokorongana tale taumattu ngakapa atoa tani oghi vulu gheeleeiaaira sesa. <sup>31</sup> Poli ang ghe suila nau eteva, aue egheleei niaisakei ghulughuluena tale kosa ateva tale uunguaane ia o taumattu ngateva ang ghe suitoongainiela. Ang ghe apasungaala

<sup>††</sup>17:17 aGrik atoa laghe kakkaua God tee aJiu etoa Katoa aGrik laghe kakkaua ngaitauaa tee aJiu etoa, me karika laghe aaimuli ekapa tee inangari nipaopao kanna Moses.

<sup>‡‡</sup>17:18 Epikuria Utara Malloeana inangari.

<sup>¶¶</sup>17:18 Stoik Utara Malloeana inangari.

<sup>§§</sup>17:28 Pol ghe auliaala nongina Epimenidis aKrit ia ghe pitila.

\* 17:28 Pol ghe mene auliaala nongina Aratus aSilisia ia ghe pitila.

isaa oia voto tale taumattu ngatoa nau ghe totula ia o taumattu ngateva tale nimate.”

<sup>32</sup>Nau laghe nongola va matena atoa aue la mene totu, katoa etaira laghe tiuaala tani pilosia, me katoa laghe ue etana va, “Ami aaloanna va umene auliaa isaa o voto etaimami.” <sup>33</sup>Vara me Pol ghe kasu vulilala. <sup>34</sup>Karika tani oroi ila lo atoa laghe aiesoaala, me laghe tiuaala tani usila Pol. Elome etaira Dionisius tee ghe usila, kateva tana namuu tale kansolo ateva ta Areopagas, tee me kateva vause ararina atea ta Damaris, me mene katoa taumattu.

### eKorint

**18** Vara me Pol ghe kasula eAten, me ghe lao sio tale masaliki taatara atea eKorint. <sup>2</sup>Isaa eKorint Pol ghe soula taumattu ngateva aJiu ia, ararina atea ta Akuila, ia atala nge provinsi eteva ePontus. Karika oroi nau ia me vausenna ateva ta Prisila lalu ghe kasula eItali me lalu ghe lao sio eKorint, poli Klaodies Siisa ghe uela va aJiu ekapa atoa la kasu vuli eRom. Vara me Pol ghe lao sio tani tara Akuila me vausenna ateva ta Prisila. <sup>3</sup>Me poli uunguaane tani ghelei tenti nongina ilalua o lailai elua, liuna avalua o me ghe toka teeilalueta me ghe uungu teeilalua. <sup>4</sup>Me tale isaa akapa nau manga, Pol ghe laa ghaip-pooaa tale ale nivelu eitaua ngateva, ghe tootoonga tani ghaa nannaaira aGrik me aJiu etoa va la ghaiesoa ta Iesu.

<sup>5</sup>Nau Saelas me Timoti lalu ghe kasu vulila provinsi eteva eMesedonia me lalu ghe rekatala eKorint, Pol ghe ruula tani uungu tani ghelei tenti, me ghe pop-pooaa nonga masi kiukiu ta taumattu ngatoa, me ghe aapasunga ta aJiu etoa va Iesu Mesaea ia. <sup>6</sup>Me nau eteva aJiu etoa laghe tam anna poi me laghe auliaa saasakia teeia, Pol ghe kaokaoaa vella kosa tale ghinnanina tani apasunga

va karika ghe laolao aitauaa tee nannaaira, me ghe uela etaira va, “Marova am tam saanga, rangane ateva aue etoka etaimim. Ngaghe gheleila uunguaaghi etaimim. Nge tiitiuaa oia, ngalaolao ta taumattu ngeleka atoa.”

<sup>7</sup>Vara me Pol ghe kasu vulila ale nivelu eitaua ngateva, me ghe lao sio tale kateva ale kalakalaa ia tale ale nivelu eitaua ngateva, alena ia kateva taumattu ararina atea ta Titias Jastas, ia aGrik ia me ghe kakkaua ngaitauaa tee aJiu etoa. <sup>8</sup>Krispas, namuu ia tale ale nivelu eitaua ngateva, ia me ila akapanaailli taumattu ngatoa laghe tokatoka tanganuena laghe aiesoaala ta Vau eteva, me tee oroi mene katoa aKorint laghe nongola Pol ghe poppooaa, laghe aiesoaala me laghe asuulala.

<sup>9</sup>Kateva eleivo Vau eteva ghe aip-pooaa teela Pol tale nitaatara atea. Ghe uela ta Pol va, “Karika umene matautu! Uppooa ngasarasarakana ta taumattu ngatoa me karika umene ruu tani ppooaa. <sup>10</sup>Ta aghi aue atoka teeio, me karika teva aue eroo tani ghelei saasakieinio. Poli oroi ila kapughu taumattu ngatoa tale lo atea oia masaliki taatara.” <sup>11</sup>Liuna avalua o me Pol ghe tokala eKorint erooroo kateae nina-manama me ghaonomo (6) ulana, tani apasunga inangarina ateva God etaira.

<sup>12</sup>Me nau Galio ghe gavanaala tale provinsi eteva eKaia, aJiu etoa laghe tingina aitauaala tani kune atoka Pol, me laghe laoainie sio tale liu niaisakei nongina Galio ghe ghelele niaisakei. <sup>13</sup>Laghe ue va, “Taumattu ngateva oia ghe auliaa ta taumattu ngatoa va la kkaua God tale llo salana karika eaaimuli tee kaluita tana inangari nipaopao.”

<sup>14</sup>Nau Pol ghe anna tani sama, Galio ghe uela ta aJiu etoa va, “Marova lo ateva oia taumattu ghe gheleila righi voto sesaaili, aghi aue aroo tani nongo inan-gariimim. <sup>15</sup>Me isaa o nikokkolomi tale

inangari, arari me tale uneimim inangari nipaopao, am, am ghelei me am toka amasina. Karika va aghi aue aghelei niaisakei tale isaa o ase voto.”<sup>16</sup> Li-una avalua o me Galio ghe sungi vel-lala tale liu niaisakei.<sup>17</sup> Vara me ila aka-panaaili laghe poso atokala Sostenes, ia namuu ia tale ale nivelu eitau ngateva me laghe uviela emua tale liu niaisakei. Galio karika ghe aisauelinilala.

### Prisila, Akuila me Apolos

<sup>18</sup> Pol ghe mene toka taula eKorint oroi nau. Vara me ghe kasu vulila tau ngaiesoa ngatoa me ghe lao sio tale masaliki taatara atea eKenkria tani aikaai tale anua ateva tani lao eSiria, me Prisila me Akuila lalu ghe usiela. Auena ghe aikaai ghe galila uu nguruna eKenkria mausi inangari nialokoi ghe gheleila ta God.<sup>19</sup> Laghe rekatala eIpises, me Pol ghe kasu vulila Prisila me Akuila. Pol ghe lao sio tale ale nivelu eitau ngateva tani aippooaa tee aJiu etoa.<sup>20</sup> Nau laghe kolomiela va etoka teeila tale mene kasina nau, Pol karika ghe aloannala.<sup>21</sup> Nau ang ghe kasukasu, ghe gheleila inangari niaolokoi eteva, ghe uela va, “Aue† amene mae etaimim arova aloanaane God.” Vara me ghe saesaela tale anua ateva tani kasu.<sup>22</sup> Nau ghe rekatala eSiisaria, ghe saela eJerusalem, me ghe soula taumattu ngatoa tale ale manga ateva tale nimasimasi, me ghe aippooaa teelala. Vara me ghe siola eAntiok tale provinsi eteva eSiria.

<sup>23</sup> Pol ghe tokala kasina nau okae eAntiok, vara me ghe kasula tani lao akapa see tale ia o provins ateva eGalaisia, me tee ePrigia, tani asarasarakana tau ngaiesoa ngakapa atoa.

<sup>24</sup> Kateva tana aJiu, ararina atea ta Apolos, ghe lutula tale masaliki taatara atea eAleksandria, me ghe mae sio tani toka eIpises. Alomasaanga ia tale Uru ngai Manga ateva, me muenna ia tee tani aippooaa.<sup>25</sup> Auena ghe mae eIpises, laghe apasungaala salane Vau ngepona ateva etana, me nannaane sarasarakanaaili tani mene apasunga ta mene katoa. Ghe aaulia ngamasinaaili voto Iesu ghe gheleila, arongona ta ghe kilakila nonga niaasuu kannna Jon.<sup>26</sup> Ghe tiuaala tani ppooa ngasarasarakana tale ale nivelu eitau ngateva, me karika ghe maamatautu. Nau Prisila me Akuila lalu ghe nongoala, lalu ghe koloala va elao tanganueiraru me lalu tani aulia ngamasinaaili salane God etana.

<sup>27</sup> Nau Apolos ghe aloanna tani lao eAkaia, tau ngaiesoa ngatoa laghe asarasakanaiela, me laghe pitipiti lao sio tale lo atoa okae disaepolo laghe tokatoka eAkaia va la soua me la ghaaia. Nau ghe rekatala, ghe saasausi emasinaaili lo atoa taumattu tale maamasinaane God me laghe aiesoala.<sup>28</sup> Ghe apalala aJiu etoa, nau laghe aissakeanaala tale tummatavanga, poli ghe aapasunga tale Uru ngai Manga ateva va Iesu Mesaea ia.

### eIpises

**19** Nau Apolos ghe tokatoka eKorint, Pol ghe usilaala salana nge-lae atikirighi. Emulina ghe rekatala tale masaliki taatara atea eIpises me ghe saopila katoa tana disaepolo.<sup>2</sup> Me ghe kolomilala va, “Ngam ghe ghaala Spirit Manga ateva nau eteva am ghe aikaiaala?”

†18:21 Kasina uru ngai laghe pitila, laghe mene pitila va “Aue atani lao eJerusalem tani toka tale nivelu eitau ngateae.

Laghe liula me laghe uela va, “Karika, me karika ami ghe nongo poi va teva Spirit Manga etokatoka.”

<sup>3</sup> Me Pol ghe kolomilala va, “Saa talo niaasuu eteva am ghe ghaaiela?”

Me laghe liula me laghe uela va, “Kanna niaasuu Jon.” <sup>4</sup> Pol ghe uela va, “Lo ateva niaasuu Jon ghe gheeieia, pei ninna ngaioghioghia ia. Me ghe uela ta taumattu ngatoa va la ghaiesoa tale lo ateva taumattu aue emae emuli etana, ia o taumattu ngateva Iesu ta ngetana.”

<sup>5</sup> Nau eteva laghe nongola isaa o inangari, me laghe ghaala niaasuu tale ararina atea Vau eteva Iesu. <sup>6</sup> Nau Pol ghe saoaala nimane etaira, me Spirit Manga ateva ghe sio mae etaira me laghe samala tale asease nisama me laghe poppooaa inangari ghe mae sio ta God. <sup>7</sup> Ila o disaepolo atoa ooroiaaira eroroo kasangaulu ghalua (12).

<sup>8</sup> Pol ghe ssola tale aleira ale nivelu eitaua ngateva me ghe poppooaa inangarina Iesu me ararimangalina ateva God, me karika ghe maamatautu, me kotolu ulana ghe ppooaala isaa o inangari me ghe tootoonga tani ghaa oghi nannaaira.

<sup>9</sup> Me katoa laghe tam anna tani nongo me laghe tam aikaiaia. Laghe poppooaa saasakia tale salane Vau ngepona ateva ta tummatavanga. Isaa avalua o me Pol me disaepolo atoa laghe ruula tani lao tale aleira ale nivelu eitaua ngateva. Pol ghe poppooaa inangari tale kateva kateva nau elome tale unna sikulu eteva Tiranus. <sup>10</sup> Ghe roola ghaluae nimanama Pol ghe ghelei evaluela o, liuna avalua o me ila akapa taumattu ngatoa tale provinsi eteva eEisia, aJiu ila me aGrik ila, laghe nongola inangarina ateva Vau eteva.

### Natuna atoa Skeva

<sup>11</sup> God ghe ghelei niaimatoonga ouna tale uunguaane Pol. <sup>12</sup> Taumattu nga-

toa laghe mae ghaaghaa unna aiseo ateva Pol aiuungu ia me unna aiulua matane, me emulina laghe laa ghaat- ulituli ta kapuira tau sessa atoa, me laghe maamasina me lo atoa raroai etoa laghe kupilala, raroai etoa laghe kasukasu vulila.

<sup>13</sup> Katoa aJiu laghe uungu ekapa see tani tiu velu raroai etoa, me laghe asease ararina atea Vau eteva Iesu tani toongi tani tiu velu raroai etoa tale taumattu ngatoa. Laghe ue va, “Tale ararina atea Iesu, ia o Pol epoppooaa inangarina ateva, ami aauliaa etaimim va am kupi ghoa mae.” <sup>14</sup> Natuna taita ghaitu (7) Skeva, ia namuu ia ta pristi etoa, laghe ghelei isaa o voto. <sup>15</sup> Kateva nau laghe gheleila ase nippooa ngateva o me raroai eteva ghe liula me ghe uela va, “Akilakila Iesu me akilakila Pol, me am tani see am?” <sup>16</sup> Me taumattu ngateva oia raroai eteva elome etana ghe aoso atoka saela etaira me ghe uvi saasakieinilala. Ase niuviuvi eteva ghe uvilala etana sesaaili ia, laghe ilou velu ghoala tale ale ateva karika ghinnaniira me vilikiira ghe raerae.

<sup>17</sup> Ila akapa aJiu etoa me Grik etoa eIpises laghe nongo avaluela o me laghe matautu saasakiaala me laghe tau saela ararina atea Vau eteva Iesu. <sup>18</sup> Oroieili lo atoa laghe aikaiaia laghe mae sio tale matavanga me laghe aulia ngautula sesa gheeieiaaira. <sup>19</sup> Me oroi ila taumattu ngatoa laghe ghelei nialaala laghe maeaa tee sio uneira buku isaa o inangari nialaala elome etana me laghe tuula buku ta mata taumattu ngatoa. Laghe ira akapala aipolipolina isaa o voto laghe tuula ghe roola ghaliman-

gaulu airari (50,000) silva koen<sup>‡</sup>. <sup>20</sup>Tale ia o salana atikirighi me inangarina ateva Vau ngepona ateva ghe kasu ekapa seela me ghe pinosa akorokoronganala.

<sup>21</sup>Nau llo ghe lutula, me Pol ghe nnaala tani lao eJerusalem me ghe anna va elao mua tale provinsi elua eMesedonia me eAkaia, me ghe uela va, “Nau eteva atara eJerusalem, atani lao tee eRom.” <sup>22</sup>Pol ghe suula kapuna tau ngai sausi elua ta Timoti me Erastus tani muemue lao eMesedonia me ia Pol ghe toka taula tale provinsi eteva eEisia.

### Niaikkalui eteae elpises

<sup>23</sup>Tale isaa o nau kinatama niaikkalui eteae ghe lutula mausi salane Vau eteva.

<sup>24</sup>Tau ngai ghelei tootoo voto tale silva, ararina ateae ta Demetrius, ghe ghelei isaa o lutu tootoo ale, alena ia o goto ateva vause ia, ararina ateae ta Artemis. Ia me lo atoa laghe ghelei isaa o voto, laghe ghaaghaa oroieili viliki veu. <sup>25</sup>Demetrius ghe kolo aitauaala lo atoa la uungu eitauaa tale ia o niuungu eteva me ghe uela etaira va, “Kapughu etoa, am kilakila va ita ghaaghaa masi viliki veu tale ia oia niuungu eteva. <sup>26</sup>Me am taatara me am nongonongo vaalua taumattu ngateva oia ta Pol nge ghaala oroī taumattu elpises me tale provinsi ekapa ateva eEisia. Eue va tootoo goto atoa taumattu ngatoa la ghelei karika va goto ila. <sup>27</sup>Aue ita sesa, karika nonga tale niuungu eteva oia ta tee tale uunguaa nikkaua, tale alena nikkaua ngateva goto ateva vause ia ta Artemis, me karika aue la oneoneainia, me karika masau me lo atoa tee la tautae sae eEisia me tale kosa akapa ateva aue la ruu tani taue sae.”

<sup>28</sup>Nau laghe nongola llo oia, ghe sesai saasakienilala me laghe tiuaala tani ovaova. Laghe ue va, “Atemis, kapuita

ia alpises atoa, namuu ia.” <sup>29</sup>Karika masau me ia akapa masaliki taatara ateae elpises laghe tiuaala tani aisamaai etingina, me katengaata nonga ta laghe kunela Gaeas me Aristakus, taumattu ngalua oia aMesedonia ilalua, me lalu ghe kasukasu tee Pol, me laghe ssoainilalueta tale liu ngai velu eitaua ngateva uneira ia alpises atoa. <sup>30</sup>Pol ghe anna tani lao ta taumattu ngatoa me disaepolo atoa laghe aarongia. <sup>31</sup>Me tee katoa namuu ta gavaman kapuna ila Pol laghe suula inangari ta Pol va erau mene laa sso elome tale liu ngai velu eitaua ngateva.

<sup>32</sup>Taumattu ngatoa laghe aisamaai. Laghe ovaova me laghe aaulia inangari karika isaa aitauaa me oroī ila lo atoa laghe lao sio karika laghe kilakila vaalua me laghe lao sio tale ia o nivelu eitaua ngateva. <sup>33</sup>AJiu etoa laghe bbi tau ssola Aleksanda emua ta taumattu ngatoa me katoa laghe ovaovainia va eghelei rigi voto. Me ghe paopaola ta nimane va la matua atingina poli ghe anna tani aulia ngamasalika inangari ta taumattu ngatoa. <sup>34</sup>Nau eteva laghe kilala va aJiu ia laghe ovaovala ghe roola ghalua aoa. Laghe ue va, “Atemis, kapuita ia alpises atoa, namuu ia.”

<sup>35</sup>Kapuira tau ngaipitipiti eteva kansolo atoa ghe paola taumattu ngatoa me ghe uela va, “Taumattu nge Ipises atoa, kosa akapa ateva ekilakila va masaliki taatara ateae elpises eaaitaraa ale nikkaua ngateva kinatama goto ateva Artemis me tootoona ateva ghe katulu elomarase me ghe sio mae. <sup>36</sup>Liuna avalua o me voto oia karika teva eue va kamena. Am tani matua atoka me am rau mene ailuilui tani ghelei rigi voto me aue masi ninanna emae. <sup>37</sup>Am maeaa sio taumattu ngalua oia me karika laghe ainao poila rigi voto tale ale manga me karika laghe auliaa

<sup>‡</sup>19:19 *silva koen* Silva koen aipolina kateva nau.



saasakia teela kapuita goto ateva vause ia. <sup>38</sup>Arova Demetrius me kapuna atoa righi sessaiaaira ta teva taumattu, la laoa tale niaisakei, me gavanaa etokatoa aue erooro tani ghelei eghulughu-luena niaisakei. <sup>39</sup>Arova righi voto am mene anna tani auliaa, am laoa tale nivelu eitaua ngateva nau namu ngatoo la kolokolo me la laa nongoam. <sup>40</sup>Isaa avalua o me ngita tokala tale voto sesa me ita rooroaaili va ita aisakei poli marova la kolomi va mausi saa ita gheleila isaa o voto, karika aue ita ghele auliaa righi liuena.” <sup>41</sup>Nau ghe ruula tani auliaa isaa o voto me ghe sungi vellala.

### Isaa eMesedonia me eGris

**20** Nau niaikkalui ghe kapala me Pol ghe kolo aitauaala disae-polo atoa me ghe aippooaa teeilala tani asarasakanaila, me ghe kasu vulilala tani sio eMesedonia. <sup>2</sup>Ghe kasu seela tale lo ateva o provins me ghe kaarasila tani aippooaa teeila tale oroieili masi inangari tani asarasarakana isaa o taumattu, me ghe rekatala eGris, <sup>3</sup>me ghe tokala kotolu ulana. Nau ghe anna tani lao eSiria tale anua ateva, aJiu etoa laghe loeloe tani ghelei teeia. Liuna avalua o me ghe mene aikolikoliaala nannaane va emene oghi sae eMesedonia. <sup>4</sup>Ghe kasu eitauaa teela Sopata natuna ia Pirus, aBeriiia ia, me Aristakus me Sekundus aTesalonika ilalua, Gaeas aDebi ia, Tikikus me Tropimus tanganueirarua eEisia, me Timoti. <sup>5</sup>Isaa o taumattu laghe muemuela tani sio toiengalua eTroas. <sup>6</sup>Me angalu<sup>f</sup> ghe tiu ghoala ePilipae nau nivelu eitaua ngateae tale verete karika righi isti etana ghe ruula. Ghalima (5) nau angalu ghe

iloula tale anua ateva, me angalu ghe siola tani tara isaa o taumattu ghe toitoiengalua eTroas. Ami ghe tokala ghaitu (7) nau eTroas.

### Iutikas ghe totula tale nimate eTroas

<sup>7</sup>Airuuruu tale nau manga ateva, ami ghe toka aitauaala tani piri verete<sup>8</sup> me Pol ghe ppoaala ta taumattu ngatoo. Ta aue ghe pai me ghe kasu, ghe ppoaala lomosi ta ghe ghaala elomatua voo. <sup>8</sup>Oroieili lam aitaatara tale ale ngepona atiulu ami ghe tokatoka etana. <sup>9</sup>Tale uindoo ngateae aliki taita ateva ararina atee ta Iutikas ghe asekanue atokala. Nau Pol ghe aippooaa Iutikas ghe llusu etokala, me ghe laa sae katu arau epona tale aiaakotonna atiulu ale tale ale ngepona ateva, me ghe siola arau etapaa kosa. Laghe siola tani saua me matena ia. <sup>10</sup>Pol ghe kure siola me ghe tturru siola me ghe saula aliki taita ateva me ghe uela va, “Am rau mene matautu, ta sake-sake ia.” <sup>11</sup>Vara ghe mene saela epona me ghe pirila verete me laghe namana-mala. Laghe aippooaala lomosi ta ghe paila me ghe kasula. <sup>12</sup>Taumattu ngatoo laghe ghaala aliki taita ateva oia me laghe laoinie sio tanganuena sakesake ia me laghe masimasiellila.

### Pol ghe aippooa ngaruula ta elda ngatoo eIpises

<sup>13</sup>Ami ghe muemuela tale anua ateva me ami ghe ssola tale masaliki etee eAsos tani kaai Pol ta ghe uela va aue enim kasuaa me ami mae kaai okae. <sup>14</sup>Nau ta ghe souemamila eAsos ami ghe kaaiela me ami ghe lao sio tale masaliki taatara atee eMitilini. <sup>15</sup>Mene kat-eva nau ami ghe tiu ghoala me ami ghe rekatala tale patunganua ateva eKios.

<sup>f</sup>20:6 Luk ghe kasukasu eitauaa tee Pol, me ghe pitila va “angalu”.

§20:7 *piri verete* Katoa la nanna va malloeana va ninamanama atee nongina Iesu me disae-polo atoa laghe gheleila tale ale ngepona atiulu, me katoa la nanna va nim ninamanama atee.

Lo ateva o nau ghe lange sio me ami ghe ssola tale patunganua ateva eSamos me ghe pai ta mene kateva nau, me ami ghe rekataala tale masaliki taatara atea eMiletus. <sup>16</sup> Pol ghe nnaala tani lau etoka elpises ta la rau mene appataia tale provinsi eteva eEisia. Ta ghe aailuilui tani lao parasi eJerusalem nau ta Pentikos, arova ghe rooroo.

<sup>17</sup> Isaa o eMiletus Pol ghe suula inangari ta elda ngatoa tale ale manga elpises va la mae taraia eMiletus. <sup>18</sup> Nau ta laghe rekatala ghe uela etaira va, “Am kilakila vaalua aghe toka teeiemla tale mata nge-mua ateva nau, nau aghe tani rekatala tale lo ateva oia provinsi eEisia lomosi ta nau oia. <sup>19</sup> Auungu ta Vau ngepona ateva tale nisioa ninanna, me rarum mata me maate ta poli aJiu etoa ngila ailoe tani uvi emateaghi. <sup>20</sup> Am kilakila va karika aghe sio asoasooa poi tani ppoosaa voto llo erooroo tani sausiem. Aghe aip-pooaa tale matavanga me elome tale paa ngaleimim. <sup>21</sup> Aghaaulia ngaotu ta aJiu etoa me Grik atoa va la kiri mae ta God tale ninna ngaioghioghiaa me la aiesoa ta kapuita Vau eteva ta Iesu.

<sup>22</sup> “Me ghaine Spiriti eteva ange tau esarasarakana mae sio ninanna va asio eJerusalem me karika akilakila va saa llo aue elutu etaghi. <sup>23</sup> Me akilakila nonga va, tale masaliki taatara akapa atoa, Spirit Manga ateva eaauliaa kieghi va aue ale mata voovoo me sesa voto etoitoeighi. <sup>24</sup> Amasimasi tani mate mausi Vau ngepona ateva, arova aghele ruu uunguaa Vau eteva Iesu ghe sungieghila tani ghelei, va appooaa masi ingangari tale maamasinaane God.

<sup>25</sup> “Aghe kasu ekapa seela etaimim tani ppoosaa ararimangalina ateva God me ghaine akilakila va karika teva etaimim aue emene taraieghi. <sup>26</sup> Aghaauliaa etaimim ghaine va, marova toa etaimim karika la saanga, karika righi uunguaaghi etaimim, <sup>27</sup> poli

karika aghe maamatautu tani aulia ngaotu aloannaane akapa God etaimim. <sup>28</sup> Am aitara ngamasinaiem me isaa o llo taumattu Spirit Manga ateva ang ghe gheleila va am tau ngaitoitoeim tale ale manga ateva. Ia o ale manga ateva God ghe poliela tale raena ateva. <sup>29</sup> Akilakila va nau akasu vuliem katoa taumattu nongina ueli paua atoa aue la kupi sso tani tootoonga tani ghelei saasakia taumattu. <sup>30</sup> Me elome ta ngetaimim katoa aue la tingina sae tani auliaa voto llo kamena me oroi ila lo atoa etaimim la aikaaiaa aue la ogghi tani laa aimuli teeila. <sup>31</sup> Liuna avalua o me am paniem. Me am rau mene kkaluaa va kotoluae ninamanama karika aghe aamaomao tani auliaa kie kateva kateva ta ngetaimim, ellaa me eleivoo rarum mataghi ghe kaokao ta poliimim.

<sup>32</sup> “Ghaine ngatautauem lao ta God me inangarina tale maamasinaane erooroo tani atuutulu ta ngetaimim me etau aatu voto akapa ghe aulia ngalokoila ta lo atoa ang ghe suilala va ila manga ila. <sup>33</sup> Karika aghe saasaii poi lo atoa un-eira viliki veu me ghinnaniira. <sup>34</sup> Am kilakila vaalua aghe uungu tale nimaghi eluelange tani ghaa aloannaaghi me kapughu etoa. <sup>35</sup> Tale voto akapa agheelei, aghaapasunga etaimim va ita uungu aanasa avalua o tani aisusia lo atoa karika sarasarakana ila, me anannaa inangarina Vau eteva Iesu ghe auliaala va, ‘Oroieili nimasimasi emaemae ta lo ateva taumattu epaaparru, elaulau lo ateva enim anna tani toka ghaaghaa.”

<sup>36</sup> Nau ghe ruula tani auliaa llo, me ghe suuiaala me tee lo atoa laghe ususia me ghe looloo saela. <sup>37</sup> Ila akapa laghe tiuaala tani ngala me laghe llotiela me laghe ngusuela. <sup>38</sup> Voto ateva ghe tani gheleilala me laghe alousiusieiliila, ia o tuku inangarina ateva ghe uela va karika aue la mene taraia. Vara me laghe kasu eitauaa teieila tani sio tale anua ateva.

### Pol ghe saela eJerusalem

**21** Ami ghe kasu vulilala me ami ghe laa ghoa aikaai tale anua ateva me ami ghe tiu ekorokoro ghoala tani lao tale patungania ateva eKos. Ghe pai saela me ami ghe rekatala tale masaliki taatara atea eRodis me ami ghe mene lao sio tale masaliki taatara atea ePatara. <sup>2</sup> Ami ghe tarala anua ateva ghe laolao ePoenisia me ami ghe aikaaila etana me ami ghe tiu ghoala. <sup>3</sup> Ami ghe kautula eSaeprasi me karika ami ghe ssola, ta ngami ghe laa siosio tale pai saot ativilau me ami ghe lao sio eSiria. Ami ghe ssola tale masaliki taatara atea eTaer me anua ateva ghe kapela ghinna. <sup>4</sup> Ami ghe tarala disaepolo atoa me ghaitu (7) nau ami ghe toka teeilala. Spiriti eteva ghe auliaala ta taumattu me laghe aulia ngasarasarakana ta Pol va erau mene sae eJerusalem. <sup>5</sup> Nau eteva naumami tani toka ghe kapala, ngami ghe mene tiutiu ghoa. Disaepolo atoa, vauseniira atoa me natuira atoa laghe ghoala tani oghi eleka tale masaliki taatara atea me ami ghe suuiaala tani looloo sae elosamarra. <sup>6</sup> Laghe oghi ghoala etaimami me ami ghe aikaaila tale anua ateva me ila laghe oghi lao sio tanguaneira.

<sup>7</sup> Ami ghe tiu ghoala eTaer me ami ghe lao sio tale masaliki taatara atea eTolima. Ami ghe soula katoa laghe aiesoa ngaitauaa teiemami, me ami ghe toka teeilala kateva nonga nau. <sup>8</sup> Ghe pai saela me ami ghe kasula tani lao eSiisaria. Ami ghe tokala tanguena Pilipi, tau ngai ppooaa masi kiukiu ia, me kateva ta ghaitu (7) tau ngai uungu laghe suitoongainilala eJerusalem. <sup>9</sup> Ghaata natuna vause karika lailai laghe poppooaa inangarina Vau ngepona ateva.

<sup>10</sup> Ami ghe tokala mene kasina nau me kateva propete ararina atea ta Agabas ghe kasula eJudia ghe sio mae. <sup>11</sup> Ghe

mae sio etaimami me ghe ghaala aiirina atea Pol me ghe irila nimane me kkena etana. Me ghe uela va, “Spirit Manga ateva euela va nongina nga irieghila, aue aJiu etoa eJerusalem la iri etoka lo ateva aiirina atea oia me la taue lao ta tau ngeleka atoa.”

<sup>12</sup> Ami ghe nongo avaluela o me ami me taumattu nge Siisaria ngatoa ami ghe aulia ngakorokorongana ta Pol va, “Urau mene sae eJerusalem.” <sup>13</sup> Vara me Pol ghe liula me ghe uela va, “Vaalua me am nganggala me am ghelei nannaaghi eaalousiisi? Karika aghaimonomosiaa nonga tani karavusu ta tani mate tee eJerusalem tale ararina atea Vau eteva Iesu.” <sup>14</sup> Nau eteva karika ghe roola tani nongoamami, ami ghe ruula tani aippooaa, me ami ghe uela va, “Masina, aloannaane Vau ngepona ateva aue eghelei.”

<sup>15</sup> Kasina nau ghe lange sio me ami ghe aimonomosiaala ghinnaniimami me ami ghe saela eJerusalem. <sup>16</sup> Katoa disaepolo eSiisaria laghe usiemamila laghe laoiniemami sio tanguena Nason, me ami ghe tokala o. Ia atala nge Saeprasi ia, me ia kateva disaepolo ghe tiuaa ngakasinala tani aikaiaa.

### Pol ghe rekatala eJerusalem

<sup>17</sup> Nau eteva ami ghe rekatala eJerusalem tau ngaiesoa ngatoa laghe masimasieiliila tani souemami. <sup>18</sup> Ghe pai saela, ami me Pol ami ghe lao sio tani tara Jeimis, me elda ngakapa atoa laghe mae tee sio. <sup>19</sup> Pol ghe soulala tale nimasimasi me ghe aulia ngakapaailiila voto God ghe gheleila elome tale taumattu ngeleka atoa tale uunguaane.

<sup>20</sup> Nau eteva laghe nongola kiukiu, laghe tau saela ararina atea God. Vara me laghe uela etana va, “Kapumami, angu tarala ghaisa airari taumattu nge Jiu ngila ghe aiesoala me ila akapa la sarasarakana tale inangari nipaopao.

<sup>21</sup> Ngila ghe nongola va io Pol ughe uela ta aJiu etoa la tokatoka tee taumattu ngeleka atoa va la liu viliira ta inangarina Moses me ughe ue teela etaira va la rau mene iso natuira taita atoa me la rau mene aimuli tee gheeleiaaira tuvuita atoa. <sup>22</sup> Aue la kila va angu ghe mae sio. Me sa ateva ami gheleia? <sup>23</sup> Ughelei sa ateva ami aulieinia etam. Taumattu ghaata laata tokatoka teeiemami laata ghe gheleila inangari nialokoi ta God. <sup>24</sup> Ughaa isaa o taumattu me am lao tale ale manga ateva me ughusila tani ghelei uunguaa niraarangisana, me upoli voto la ghelei pei nipoli me aue la ggali uruira tani ghelei rooroaa inangari nialokoi, me ila akapa aue la kila va kiukiu la aauliaa teeio kamena ta io uaimuli tee inangari nipaopao. <sup>25</sup> Me ta tau ngeleka atoa la ghaikaaiia, ngami ghe pitipitila etaira tani auliaa nannaaimami va la rau mene nama inana la ghelei aiaavusuvusuea etana tale kamena goto, me tale rae, me malatau tale asease ghaata kkena atoa la kiikii pule aloira, me la rau mene lai rorrou see.”

<sup>26</sup> Ghe pai saela me Pol ghe ghaala isaa o taumattu me laghe lao sio tani ghelei eraarangisanaila me ghe ssola tale ale manga ateva tani auliaa ta pristi etoa va saa nau eteva uunguaa tani ghelei eraarangisanaila eruu me kateva kateva etaira etaula opring.

### Laghe kunela Pol

<sup>27</sup> Ghaitu (7) nau ang ghe ruuruu me katoa aJiu tale provinsi eteva eEisia laghe tarala Pol tale ale manga ateva me laghe sulungila taumattu ngatoa me laghe poso atokala Pol. <sup>28</sup> Laghe aaore tani ue va, “Taumattu nge Israeli etoa, am sausiemami, poli ia oia taumattu ngateva eaapasunga ngakapa see tani akupi kapuita taumattu me uneita inan-

gari nipaopao me ia oia ale manga ateva. Me ange kupiaa tee sso mae taumattu nge Grik atoa tale ale manga ateva tani avuluti voto ateva manga ia.” <sup>29</sup> Kasina nau ang ghe lange sio laghe tarala Tropimus alpises ia tale masaliki taatara atea tee Pol me laghe annaa va Pol ghe kupieinie ssola tale ale manga ateva.

<sup>30</sup> Taumattu ngatoa laghe nongola isaa o inangari me ila akapa eJerusalem ghe sessailala me laghe aisokosokoila me laghe posola Pol, me laghe ae velue ghoala eleka me laghe kavatila atamana atoa tale ale manga ateva. <sup>31</sup> Nau laghe tootoka tani uvi emate Pol, inangari ghe ghaala namu ngateva ghe aaitoia tau ngai uvi nge Rom akapa atoa eJerusalem va ila akapa eJerusalem laghe aikalului. <sup>32</sup> Gherangia nonga ta ghe ghaala tau ngai uvi etoa me namu ngatoa laghe aaitoia kateva ai (100) tau ngai uvi me laghe ilou siola kona taumattu ngatoa laghe tokatoka. Me nau taumattu ngatoa laghe tarala tau ngai uvi etoa, laghe ruula tani uvi Pol.

<sup>33</sup> Namuu tale tau ngai uvi etoa ghe lao sio me ghe kunela Pol me ghe uela va la iri etokaia tale sene alua me ghe kolomilala va, “Saa taumattu ia me sa ateva ghe ghelelela?” <sup>34</sup> Ila akapa taumattu ngatoa laghe aisamaai me namu ngateva ghe tam rooro tani nongo, ta laghe aisavalaii poli kateva kateva etaira ghe auliaa nannaane. Me ghe uela ta kapuna atoa va, “Am ghaaiela me elao kona tau ngai uvi etoa la tokatoka.” <sup>35</sup> Nau Pol ghe rekata lao sio tale aisaesae ateva me tau ngai uvi etoa laghe tarala va taumattu ngatoa laghe annaaili tani uvi ematea, liuna avalua o me laghe sauela. <sup>36</sup> Taumattu ngatoa laghe aaimuli me laghe aippooa ngasarasarakanaaili va emate.

### Pol ghe aippooaa teela taumattu ngatoa

<sup>37</sup> Tau ngai uvi etoa laghe aainasia tani ghaa Pol me ghe lao kona tau ngai uvi etoa laghe tokatoka me Pol ghe ue lao sio ta namu ngateva va, “Erooroo va aghaip-pooaa teeio?”

Me namu ngateva ghe uela va, “Uki-lakila inangari nge Grik? <sup>38</sup> Aghannaa va io kateva aJip kasina nau ang ghe lange sio ughe tiuaala niaiuvu eteae me ughe muemuaala ghaata airari (4,000) tau ni-aiuvi tale iema me laghe ssola tale voto ateva karika righe taumattu etana.”

<sup>39</sup> Pol ghe liula me ghe uela va, “Aghi aJiu ieghi me tanguueghi eTases tale provinsi eteva eSilisia, me karika va nim taumattu ieghi tale teae ghauna masaliki taatara. Utau velueghi me aghaippooaa tee taumattu ngatoa.”

<sup>40</sup> Nau namu ngateva ghe tau veluela tani aippooaa me Pol ghe tingina saela tale aisaesae ateva me ghe paolala ta ni-mane va la rau mene sama. Laghe matua ngatinginala me ghe aippooaa teelala tale inangari nge Ibru.

**22** “Tamaghi etoa, tueghi me nen-gaghi etoa, am nongo! Isaa oia nga ghaloanna tani aulia ngamasalika etaimim va aghi karika aghe ghelei saasakiaala teva voto.”

<sup>2</sup> Nau laghe nongola Pol ghe samasamaa nge Ibru teelala laghe matua ngatinginala.

Me Pol ghe uela va, <sup>3</sup> “Aghi aJiu ieghi, aghe lutula eTases, tale provinsi eteva eSilisia, me aghe namuula oia eJerusalem. Aghi kapuna tau ngai ghaa alomasaanga ieghi Gamaliel. Ia ghe apasunga ngamasinaailiila inangari ni-paopao ghe ghaala ta tuvura atoa, me aghe taueghi lao sio tani ghelei uun-guaane God, nongina am akapa am uun-guaa ghaine. <sup>4</sup> Aghe ghelei saasakia ta lo atoa laghe usila salane atikirighi

Iesu tani atokaila tale nimate. Aghe kunekune taita me vause atoa tani atokaila sso tale ale mata voovoo. <sup>5</sup> Namu ngateva ta pristi etoa me Kan-solo akapa atoa aue la auliaa etaimim va koronna llo oia aghaauliaa. Laghe pitila uru ngai ta namu ngatoa ta aJiu etoa eDamaskas va asio kune katoa kapuita okae tani sae atara matanaila eJerusalem.”

### Pol ghe kiukiuuuala vaalua ghe aikolikoliaala

<sup>6</sup> Pol ghe mene uela va, “Aghe kasukasu elaa siosio eDamaskas, elo sinaka, ngaghe akalakalalaa me arovaeeaa ta kinatama mallanga ateva ghe sio mae epona liu, mallangina ateva ghe ghaaiegghila. <sup>7</sup> Me aghe katuula tapaa kosa, me aghe nongola lingi ngalo ateva ghe uela va, ‘Sol, Sol, vaalua me ughelei saasakieinaghi?’

<sup>8</sup> “Me aghe liula me aghe uela va, ‘Io see, vau eteva?’

“Me ghe uela etaghi va, ‘Aghi Iesu nge Nasareti ughelei saasakieinaghi.’ <sup>9</sup> Tau-mattu ngatoa ami me ila laghe tarala mallanga ateva, me karika laghe non-gola lingi ngalo ateva ghe aippooaa teeieghi.

<sup>10</sup> “Aghe kolomila va, ‘Sa ateva agheleia, Vau eteva?’

“Me ghe uela etaghi va, ‘Totula me usio eDamaskas, me kateva tau-mattu aue eaulia niuungu ngaghe ai-monomonosiaala va ughelei.’ <sup>11</sup> Aghe mata salusalula poli mallanga ateva namungaili ia. Lo atoa ami me ila laghe katulainagghila tani sso eDamaskas.

<sup>12</sup> “Kateva taumattu ghe tokatoka eDamaskas, ararina atea ta Ananaeas, ghe aaimuli tee inangari nipaopao, me laghe aanamunamunganeia aJiu etoa laghe tokatoka okae eDamaskas. <sup>13</sup> Ananaeas ghe mae sio tani tingina teeieghi, me ghe uela va, ‘Kapughu Sol,

taatarala!' Me arovaeaata ta mataghi ghe otila me aghe taraiela.

<sup>14</sup>“Me ghe uela va, ‘Kapuirā Goto ateva tuvura atoa ghe suitoongainiola va ukila aloannaane me utara taumattu ngateva ghulughuluena ia me unongo llo eaauliaa ta paane. <sup>15</sup>Io aue uaulia ngaotua ta taumattu ngakapa atoa tale llo voto ughe tarala me ughe nongola. <sup>16</sup>Sa ateva umene toia? Tingina saela! Ulaa ghaa niaasuu me ukolo tau ararina atea, me aue epora velu kalum ssavoto.”

### Vau eteva ghe suula Pol tani laa ppooaa ta mene katoa

<sup>17</sup>Pol ghe mene uela va, “Nau aghe oghe saela eJerusalem aghe ssola tani looloo sae tale aleira atiulu aJiu etoa tale ale manga ateva, me aghe tarala kateva nitaatara. <sup>18</sup>Aghe tarala Vau eteva ghe uela etaghi va, ‘Gherangia, ta ukasu vuli eJerusalem, poli karika aue la nongo usilainio nau uppooaa inangarighi.’

<sup>19</sup>“Aghe liula va, ‘Vau eteva, la kilakilaailieghi va aghe laolao tale oroi ale nivelu eitauaa, aghe kunekune me aghe paruparu lo atoa laghe aiesooa etam. <sup>20</sup>Nau laghe uvi ematela Stipeni aghi aghe tiitingina me aghe tarala uviuvi-aane me aghe asokoila, me aghe aaitaraa ghinnaniira tau ngai uvina atoa.’

<sup>21</sup>“Vau eteva ghe uela etaghi va, ‘Kasula; ta aue asungio ulao amasaueili ta tau ngeleka atoa.”

<sup>22</sup>Taumattu ngatoa laghe nongonongo Pol ghe samala lomosi ta ghe uela va elao ta taumattu ngeleka atoa, vara me laghe tiuaala tani aore anamungaili. Laghe ue va, “Uvi emateala! Karika masina va etoka!”

<sup>23</sup>Laghe aaore me laghe leelea uneira aiaasae ngeleka me laghe veluvelu sae au eteva epona. <sup>24</sup>Liuna avalua o me namuu ta tau ngai uvi etoa ghe auliaala va la ghaa Pol me esso elome tale ale ateva

tau ngai uvi etoa la tokatoka etana, me ghe uela va la uetaia me la kolomia va vaalua me taumattu nge Jiu etoa la aaore atingina. <sup>25</sup>Nau laghe iriiria tani uetaia, Pol ghe uela ta kateva namuu eaaitoia kateva ai (100) tau ngai uvi ghe tiitingina akalakalangina va, “Emaamasina va am ueta teva sitisen nge Rom karika ghe aisakei?”

<sup>26</sup>Nau ghe nongola isaa o inangari, ghe lao sio tani auliaa ta lo ateva namuu ia etaira akapa. Namu ngateva eaaitaraa kateva ai tau ngai uvi ghe uela va, “Sa ateva ugheleia? Ta taumattu ngateva oia sitisen nge Rom ia.”

<sup>27</sup>Namu ngateva eaaitara ngakapa ghe mae sio ta Pol tani kolomia va, “Io sitisen nge Rom io?”

Pol ghe liula va, “Ue.”

<sup>28</sup>Namu ngateva eaaitara ngakapa ghe uela ta Pol va, “Aghi aghe vella oroieili viliki veu tani sitisen nge Rom.”

Me Pol ghe uela va, “Aghi sitisen nge Rom ieghi poli tamaghi sitisen nge Rom ia.”

<sup>29</sup>Nau lo atoa tau ngai uvi laghe anna tani kolomi righi nikokkolomi ta Pol laghe nongola va Pol sitisen nge Rom ia laghe matautula me arovaeaata ta laghe tapaila, me kapuirā namu ngateva eaaitara ngakapa ie tee ghe matautula, ta ia ghe sungilala tani iri Pol.

<sup>30</sup>Namu ngateva etaira ngakapa ghe aaloanna tani kila amasina va Pol ghe tani gheleila saa voto sesa. Me ghe pai saela ghe ghaa vella sene laghe iriela etana. Namu ngateva ghe suula inangari ghe lao sio ta namu ngatoa ta pristi etoa me Kansolo atoa tani velu eitauaa. Me eghaa Pol me esio atinginaia ta mataira.

### Pol ghe aulia ngaotula inangari ta Kansolo atoa

**23** Pol ghe pasiaala matane ta Kansolo atoa me ghe uela etaira va, “Tueghi me nengaghi etoa, aghe uungu

eitauaa teela God, nannaaghi masinaaili, me gheeleiaaghi masina ange ghaala ghaine.” <sup>2</sup>Ghe aulia ngavaluela o me namu ngateva ta pristi etoa, Ananaeas etana, ghe uela ta taumattu ngatooa laghe tiitingina akalakalagina ta Pol va, “Am posalala paane ateva.” <sup>3</sup>Pol ghe uela etana va, “God aue euvio, poli io nongina aivativati eteva sesa ia, laghe usingiela tale usosoana.” <sup>\*\*</sup>Unannaa va uaaimuli tee inangari nipaopao? O umae sio tani toka tani ghelei niaisakei etaghi me io ugheelei saasakia inangari nipaopao, me uue va la posalaieghi.”

<sup>4</sup>Lo atoa laghe tiitingina akalakalagina laghe uela va, “Vaalua me uppooaa saasakia ta namuu ta pristi etoa kapuna ia God?”

<sup>5</sup>Me Pol ghe uela va, “Tueghi me nengaghi etoa, karika akilakila va namuu ia ta pristi etoa. Arova aghe kilakila, karika aue aghele ppooaa teeia, poli tale Uru ngai Manga ateva laghe pitila va, ‘Karika umene ppooaa saasakia tee lo ateva eaaitoia kapum taumattu ngatooa.’”<sup>††</sup>

<sup>6</sup>Nau Pol ghe kilala va katoa etaira Sadiusi ila, me katoa Paresi ila, ghe sama anamuula tani ue va, “Tueghi me nengaghi etoa, aghi Paresi ieghi, natuira aghi Paresi etoa. Aghaiesoa va lo atoa laghe matela aue la totu. Liuna avalua o me nga ghaaisakei.” <sup>7</sup>Nau Pol ghe aulia ngavaluela o me Paresi etoa me Sadiusi etoa laghe tiuaala tani aisamaaii. Me laghe tiu reerekataala. <sup>8</sup>Ta Sadiusi etoa la ghaiesoaa va lo atoa la matemate karika la rooroo tani mene totu, me karika righi ensolo me spiriti. Me aParesi etoa la ghaiesoaa isaa akapa o voto.

<sup>9</sup>Laghe tiuaala tani aisamaaii enamuu, me katoa tana tau ngai apasunga tale inangari nipaopao Paresi ila, laghe tiuaala tani aikiso. Laghe ue va, “Tau-

mattu ngateva ona karika righi kanna sesa. Ta koti koronna lo eaaulia koti spiriti o teva ensolo ghe auliaala etana.”

<sup>10</sup>Me namu ngateva ta tau ngai uvi etoa ghe tarala me ghe nongola niaikkalui eteae, me ghe matautula. Ghe maa-matautu va pai eluevilau lalu rau aisariaa pakapakasi Pol va emate. Mausina avalua o me ghe suula tau ngai uvi etoa tani ghaa velu Pol ta aJiu etoa, me laghe laa ghatokaia tanganueira tau ngai uvi etoa.

<sup>11</sup>Eleivoo me Vau ngepona ateva ghe tingina valaala ta Pol me ghe uela etana va, “Utingina asarasarakana me urau mene matautu. Nongina ughe aulia ngaotueghila eJerusalem, umene laa ghaulia ngaotueghi eRom.”

#### **AJiu etoa laghe aippooa ngaitauaala tani uvi emate Pol**

<sup>12</sup>Elue taluaa me aJiu etoa laghe toka aippooa ngaitauaala va la tani uvi emate Pol. Laghe gheleila inangari nialokoi va karika la mene namanama me la mene ropi ta la tani uvi emate mua Pol. <sup>13</sup>Ila akapa lo atoa laghe gheleila inangari nialokoi, elaulau ghaatingaulu (40+) taumattu. <sup>14</sup>Laghe lao sio ta namu ngatooa ta pristi etoa me namu ngatooa tani auliaa kieira va, “Ngami auliaala inangari nialokoi va ami rau mene namanama me ropi ta ami tani uvi emate mua Pol. <sup>15</sup>Liuna avalua o me am me Kansolo atoa, am suu sae inangari ta namu ngateva ta tau ngai uvi etoa va eghaaie sio me am kame va am mene anna tani ghaa amasina righi inangarina. Auena emae rekataa etaimim, aue ami uvi ematea.”

<sup>16</sup>Me nau aloana ateva Pol ghe nongola inangari ta laghe aaloanna tani

<sup>\*\*</sup>23:3 Malloeana inangarina Pol va Ananaeas usimaghalue ia.

<sup>††</sup>23:5 Eksodas 22:28

ghelei tee Pol, ghe saela tanganue tau ngai uvi etoa tani auliaa kie Pol.

<sup>17</sup> Pol ghe kolola kateva namuu ghe aaitoia kateva ai (100) tau ngai uvi me ghe uela va, “Ghaala aliki eteva toko me ulaoainia ta kapum namu ngateva me aue elaa ghauliaa inangari etana.” <sup>18</sup> Liuna avalua o me ghe ghaala aliki eteva me ghe laoainie sio ta namu ngateva ta tau ngai uvi ekapa atoa.

Me ghe uela va, “Pol, tau karavusu eteva, ueela va amaeaa aliki eteva etam tani auliaa inangarina etam.”

<sup>19</sup> Liuna avalua o me namu ngateva ta tau ngai uvi ekapa atoa ghe kuneiela, me lalu ghe laa tingina ppae sio, me ghe kolomiela va, “Sa ateva inangari uaalonna tani aulieinia etaghi?”

<sup>20</sup> Me aliki taita ateva ghe uela va, “AJiu etoa la ghaippooa ngaitauaala va la kolomio me utau sio Pol ta Kansolo atoa nimana. Aue la kameo va la ghaaloanna tani pae amasina liue inangarina Pol. <sup>21</sup> Me urau mene usilaa inangariira. Katoa etaira elaulau ghaatingaulu (40 +), aue la lloso atoka tani uvi ematea. Laghe alokoila inangari nialokoi va la tani uvi emate Pol me la vira namanama me la ropi. O isaa oia la sio toitoi va sa ateva aue uliua tale inangariira.”

<sup>22</sup> Me namu ngateva ghe uela etana va, “Karika umene auliaa ta teva va angughe mae auliaa sio etaghi.” Me ghe sungi veluela.

### Laghe sungiela tani sio ta Peliks

<sup>23</sup> Liuna avalua o me namu ngateva ta tau ngai uvi etoa ghe kolola ghalua tana namuu me ghe uela va, “Amalu ghaa ghalua ai (200) tau ngai uvi me ghaitungaulu (70) llo aue eilou tale ooso me ghalua ai (200) aisau vaalau me am aimonomosiaa tani lao eSiisaria

ghaine eleivo ta 9 kilok.<sup>‡‡</sup> <sup>24</sup> Am aimonomosiaa unna tani ooso Pol me am kasueinia tani sioaa ngamasinaia ta Gavana Peliks.”

<sup>25</sup> Me namu ngateva ta tau ngai uvi etoa ghe pitila uru ngai etikirighi ghe uela va,

<sup>26</sup> Aghi Klaodias Lisias,  
Apitipiti sio uru ngai etikirighi  
etam, Gavana Peliks,  
Masi ngelo sinaka etam.

<sup>27</sup> AJiu etoa laghe poso atokala ia o taumattu ngateva me la aloanna tani uvi ematea. Me aghe nongola va ia aRom ia. Liuna avalua o me aghi me tau ngai uvi etoa ami ghe lao sio tani ghaa oghia tale nimaira.

<sup>28</sup> Aghe aloanna tani kila va vaalua liuene inangari me aghe laoainie sio ta kapuira Kansolo atoa. <sup>29</sup> Me aghe kolomilala, me aghe kilala va laghe nim ghaaiela ta poli uneira inangari nipaopao, me karika ghe gheleila righi voto va emate o esso tale ale mata voovoo. <sup>30</sup> Me ghaine nga nongola va ila aaloanna tani uvi ematea. Liuna avalua o me nga sungi parasie sio mae etam. Me nga ghauliaala ta taumattu ngatoa la ghauliaa teeia inangari va la sio tingina ta matam me unongo inangariira.

<sup>31</sup> Me tau ngai uvi etoa laghe nongo usilaala namu ngateva me laghe ghaala Pol eleivoo me laghe sioainiela eAntipatris. <sup>32</sup> Ghe paila ta mene kateva nau, tau ngai uvi etoa laghe iloula tale ooso me laghe laooa sio Pol eSiisaria. Me lo atoa tau ngai uvi laghe nim kaakasuaa ta kkeira laghe oghi saela kona tau ngai uvi etoa la tokatoka eJerusalem. <sup>33</sup> Me tau ngai uvi etoa la ghe iilou tale ooso laghe laa sio rekataa eSiisaria me laghe taula uru ngai etikirighi ta gavana ngateva me laghe tau tee lao sio Pol etana. <sup>34</sup> Gavana

<sup>‡‡</sup>23:23 9 kilok Tale inangari nge Grik, aiaakotonna ateva aoa eleivoo.



ngateva ghe ritila uru ngai etikirighi, me ghe kolomila Pol va, “Aliaa io?”

Me Pol ghe uela va, “Aghi aSilisia ieghi.”

<sup>35</sup>Vara me Peliks ghe uela va, “Nau lo atoa la auliaa teeo inangari la rekata, aue avira nongo inangarim.” Me ghe uela va, “Am ghaa Pol me esso tale ale mata voovoo ateva tanganuena King Herot.”

### Pol ghe tinginala emua ta Peliks

**24** Ghalima (5) nau ghe lange sio me Ananaeas, namuu ia ta pristi etoa, me mene katoa namuu me loea ngateva ararina atea ta Tetalas, laghe siola eSiisaria tani ghelei niaisakei ta Pol emua ta gavana ngateva. <sup>2</sup>Nau Pol ghe tinginala emua, me Tetalas ghe tiuaala tani auliaa teeia inangarina kamena. Eghe ue va, “Namu ngateva Peliks, ami ghe tokatoka tale luei tale oroi nau, poli io ughe aaitarainiemami tale alomasaan-ganiaam, me ughe ghelei emasinala oroi voto karika laghe ghelei emasinala tale lo ateva oia provins. <sup>3</sup>Tale isaa aka-paaili voto ughe ghelei seela, ami maa-masieinio me ami ue va masinaaili etam. <sup>4</sup>Karika aghaaloanna tani nim rungiaa naum, liuna avalua o aghaloanna va umasimasi me unongo tuku inangari-mami erighi.

<sup>5</sup>“Ami ghe tarala va ia oia taumattu ngateva eghelei saasakia tokatokaaimami. Etiitiuaa nisessai elome ta aJiu etoa tale kosa akapa ateva oia, me emuemua lo atoa la aimuli tee tau ngai apasunga ngateva aNasareti ia. <sup>6-7</sup>Ghe aloanna tani ghelei saasakia ale manga ateva. Liuna avalua o me ami ghe poso atokaiela.”<sup>8</sup> Arova ukolomia, aue io un-

ongo kila isaa oia voto ami auliaa teeia, koronna.”

<sup>9</sup>Ila akapa aJiu etoa laghe tingina aitauea teela lo atoa laghe auliaa teela Pol, me laghe akoronnala va isaa akapa inangari Tetalas ghe auliaala koronna.

### Pol ghe auliaala nannaane ta Peliks

<sup>10</sup>Gavana ghe nakonakoala Pol tani aippooaa me Pol ghe uela va, “Aki-lakila va io ughe aitarala anua ateva oia oroieili ninamanama, liuna avalua o aghaiesoaa va urooro tani nongo tee inangarighi. <sup>11</sup>Urooro tani kila amasina va karika ghe laa ghaa kasan-gaulu ghalua (12) nau me aghe saela eJerusalem tani kkaua. <sup>12</sup>Ila o taumattu ngatoa karika laghe tarala righi voto ami ghe aissakeana teela tale ale manga ateva, o aghe ghelei taumattu va ghe sessaila tale ale nivelu eitauea me tale masaliki taatara. <sup>13</sup>Me isaa oia inangari la auliaa teieghi etana, karika la rooro tani apasunga etam va koronna. <sup>14</sup>Aghaaloanna tani auliaa koronna etam va akakkaua Goto ateva kapuira ia tuvuumami etoa me aghaimulusi tee salane Vau eteva Iesu, la ue va kamena ia. Me aghaiesoaa ngakapa inangari nipaopao me inangari propete atoa laghe pitila. <sup>15</sup>Aghi tee aghaiesoaa God nongina isaa oia taumattu, va aue emene totu isaa akapa ghulughuluena me sesa taumattu tale nimate. <sup>16</sup>Liuna avalua o atootoonga tani ghelei sa ateva akilakila va ghulughuluena ia nau ekapa atoa ta matane God me taumattu.

<sup>17</sup>“Aghe mene kiri mae sio tani sausi kapughu taumattu ngatoa karika righi peiira tale viliki veu, me tani ghelei aiaavususueua, poli ngaghe kasu vella me ang ghe oroila ninamanama me

<sup>¶</sup>24:6-7 Kasina uru ngai laghe pitila, laghe ue va, me ami ghe aloanna tani ghelei niaisakei etana tale kaluimami inangari nipaopao. <sup>7</sup> Me namu ngateva ta tau ngai uvi etoa, Lisias, ghe mae sio me namungaili ta ghe kune veluela me ghe ghaa veluela ta nimaimami. <sup>8</sup> Me ghe auliaala va ami mae etam.

ngaghe vira mene mae sio tani rekataa. <sup>18</sup>Laghe tarala va raarangisana ieghi nau eteva aghe ghelei isaa oia niu-ungu elome tale ale manga ateva. Karika oroi taumattu ghe toka teeieghila, me tee karika rigi niaisamaaii. <sup>19</sup>Me kasina aJiu tale provinsi eteva eEisia, arova la nannaa teeieghi rigi voto, la ghele mae tingina emua etam me la ghele auliaa nannaaira. <sup>20</sup>Me isaa o tau-mattu etokatoka oia la ghele mae auliaa ngaotu rigi voto sesa laghe tarala aghe gheleila nau ateva aghe tinginala emua ta Kansolo atoa. <sup>21</sup>Akilakila nonga kat-eva voto aghe sama anamuula nau eteva aghe tinginala ta mataira: Aghe ue va, ‘Aghaiesoaa ta God va aue emene totu taumattu matena. Me mausi isaa oia ni-nannaa me ghaine angila atinginaieghila tale niaisakei.”

<sup>22</sup>Vara me Peliks, ia o ang ghe kila muela salane Iesu, ghe alokoi taula niaisakei eteae, me ghe uela va, “Ita toi Lisias, me nau emae, amene ghelei niaisakei.” <sup>23</sup>Ghe uela ta namu ngateva ghe aaitoia kateva ai tau ngai uvi va, “Am atoka sso Pol tale ale mata voovoo, me am tau velua me etingina kasu see. Me am rau mene ghelei rungarunga kapuna atoa tani mae taraia.”

<sup>24</sup>Kasina nau ang ghe lange sio, Peliks me vausenna ateva ta Drusila, aJiu ia, ghe suula inangari va Pol emae. Ghe nongola inangari niaikaaiia ta Karisto Iesu. <sup>25</sup>Nau eteva Pol ghe tiuaala tani auliaa inangari tale voto ghulughuluna me tani aitaraa tokatokaaira me niaisakei eteae aue emae, Peliks ghe matautula me ghe uela va, “Ange roola me kasula mua. Auena marova mene rigi nau, aue amene koloo.” <sup>26</sup>Ia oia nau eteva tee, Peliks ghe nanna va Pol aue ghe tau lao rigi viliki veu etana. Liuna avalua o oroieili nau ghe kolokoloa me ghe aippooaa teeia.

<sup>27</sup>Airuuruu tale ninamanama aluae lalu ghe lange sio me Pokias Pestas ghe koliaala Peliks. Peliks ghe aloanna tani aipoopolia ta aJiu etoa, liuna avalua o me karika ghe uela va Pol ekupi ghoa tale ale mata voovoo.

### Pol ghe kolomila va Siisa enongo unna niaisakei eteae

**25** Pestas ghe rekatala tale provins ateva eJudia tale masaliki taatara atea eSiisaria. Kotolu nau ghe lange sio me ghe saela eJerusalem. <sup>2</sup>Me namuu ta pristi etoa, me kapuira tau ngai toitoi etoa aJiu etoa laghe lao sio tani auliaa tee Pol ta Pestas, me laghe kolomila Pestas <sup>3</sup>va eghelei aloannaaira tani saeaa Pol eJerusalem ta ngila ghe nnaala va la uvi ematea sae etapaa salana. <sup>4</sup>Pestas ghe liula va, “Pol tale ale mata voovoo eSiisaria, me karika masau me amene oghi sio eSiisaria. <sup>5</sup>Am tau velu rigi kapuimim tau ngai toitoi me la usieghi sio eSiisaria, me la sio auliaa arova Pol ghe gheleila rigi sesa voto.”

<sup>6</sup>Pestas ghe mene tokala ghaoalu (8) va kasangaulu (10) nau me ghe oghi siola eSiisaria. Ghe paila tale mene kateva nau me ghe laa sso toka tale ale niaisakei eteva, me ghe auliaala va Pol emae tale niaisakei. <sup>7</sup>Nau Pol ghe rekatala, lo atoa aJiu laghe kasula eJerusalem laghe tingina taliaala Pol, me laghe tiuaala tani aikamea tani auliaa oroieili voto sesa Pol ghe gheleila, me karika laghe rooroo tani apasunga tale niaisakei va koronna.

<sup>8</sup>Pol ghe liula inangariira me ghe uela va, “Karika aghe gheleila rigi sesa voto tani ghelei saasakia uneira inangari nipaopao aJiu etoa, me tale ale manga ateva me ta Siisa.”

<sup>9</sup>Pestas ghe anna va aJiu etoa la masieinia, liuna avalua o me ghe kolomila Pol va, “Umasimasi tani sae

eJerusalem, me aghi aue arooro tani sae nongo unem niaisakei eteae eJerusalem?”

<sup>10</sup>Pol ghe liula me ghe uela va, “Ati-itingina oia tale alena ale niaisakei eteva Siisa, me atani aisakei oia. Karika righi gheeleiaaghi sesa ta aJiu etoa, me io tee ukilakilaaili. <sup>11</sup>Arova aghe tam aimuli teela inangari nipaopao, me righi gheeleiaaghi sesa me erooroo va amate, karika aratirati tani mate. Me arova inangariira kamena, karika teva erooroo tani taueghi lao etaira. Aghaaloanna va Siisa enongo uneghi niaisakei eteae!”

<sup>12</sup>Nau Pestas me kapuna tau ngalomasaanga atoa laghe aippooa ngaitauaala me Pestas ghe uela va, “Ualoannala Siisa va enongo unem niaisakei eteae, liuna avalua o me ulao ta Siisa.”

### **Pestas ghe auliaa tootoongaala Pol ta King Agripa**

<sup>13</sup>Kasina nau ghe lange sio King Agripa me nengane vause ateva ta Beniis lalu ghe siola eSiisaria tani tara me tani tau masimasiaairuua ta Pestas. <sup>14</sup>Nau lalu ghe tokala oroi nau eSiisaria, Pestas ghe auliaala unna niaisakei eteae Pol ta king. Ghe uela va, “Ia oia taumattu ngateva Peliks ghe tam aaloanna tani tau velua tale ale mata voovoo. <sup>15</sup>Nau aghe saela eJerusalem, namuu ta pristi etoa me namuu ta aJiu etoa laghe uela va ghe gheleila voto sesaaili, me laghe aaloanna va aghi aghaulia va emate.

<sup>16</sup>“Agha auliaala etaira va gheegheleiaa nge Rom, karika ami rooro tani nim uvi emate teva taumattu karika ghe aisakei tee tau ngai ssateena atoa, me erooroo tani liu inangariira tale uneira nikokkolomi. <sup>17</sup>Nau laghe usieghi sio mae, karika aghe aitoila, ta ghe pai saela tale mene kateva nau, aghe auliaala va Pol emae tale niaisakei. <sup>18</sup>Nau tau ngai ssateena

atoa laghe tiuaala tani sama, karika laghe ppoaala righi gheegheleiaane sesa aghe annaa va laghe rooro tani auliaa. <sup>19</sup>Laghe nim sessa teeia tale uneira inangari nipaopao la ghaiesoaa etana, me taumattu ngateva ararina atea ta Iesu, ang ghe matela me Pol ghe poppooa va maulue ia. <sup>20</sup>Karika aloghu ghe masaangaala vaalua aue apae aitiutiu tale inangari, liuna avalua o me aghe kolomila marova ghe masimasi tani sae eJerusalem tani sae aisakei. <sup>21</sup>Vara me Pol ghe aloannala me ghe kolomila va namu nge Rom ateva enongo unna niaisakei eteae, liuna avalua o me aghe uela va Pol etoka lomosina ta aghi aue asungi taue lao ta Siisa.”

<sup>22</sup>Vara me Agripa ghe uela ta Pestas va, “Aghaloanna tani nongo ia ona taumattu ngateva.”

Pestas ghe liula me ghe uela va, “Ni-mana unongoa.”

### **Pol ghe tinginala emua ta King Agripa**

<sup>23</sup>Ghe pai saela Agripa me Beniis lalu ghe ssola tale ale atiulu la mae velu-velu eitauaa etana, me laghe gheleila voto tani oneoneainilalua. Lalu ghe sso teela namu ngatoa la aitoia namuu tale tau ngai uvi etoa, me namu ngatoa tale masaliki taatara atea, me Pestas ghe uela va, “Am ssoaa mae Pol elome.”

<sup>24</sup>Pestas ghe uela va, “King Agripa me lo atoa ngam mae aitauea teiemami sio, ngam tarala taumattu ngateva oia! Ila akapaaili aJiu etoa eJerusalem me isaa oia eSiisaria laghe aulia ngakorokorongan etaghi me laghe aaore tani ue va karika erooroo tani mene toka tee lao ta ia erooroo tani mate. <sup>25</sup>Aghe tarala va karika righi voto ghe gheleila va erooroo tani mate. Me poli ghe loola va namu nge Rom ateva enongo unna niaisakei eteae, liuna avalua o aghe annala va asungie lao eRom. <sup>26</sup>Karika aloghu

ghe masaangaala va tani sa ateva apitie lao ta kapuita vau eteva, liuna avalua o aghe ghaaie mae sio etaimim akapa, me tani io, King Agripa, va ita nongo kilakila inangarina me aue akila sa ateva apitia. <sup>27</sup>Poli aghannaa va karika masina tani sungi karavusu eteva me karika righi inangari koronna tani aulia ngaotu gheeleeiaane sesa.”

**26** King Agripa ghe uela ta Pol va, “Urooro tani auliaa inangarim.”

Pol ghe takala nimane me ghe tiuaala tani ppoaa inangarina tani sausia. <sup>2</sup>Ghe uela va, “King Agripa! Amasimasi tani tingina emua etam ghaine tani liu inangari niaisakei aJiu etoa la gheeleei etaghi. <sup>3</sup>Io ukilakilaaili aJiu etoa me gheeleeiaaira me voto la ghaissa tee, liuna avalua o aghanna va uatae atoka me unongoaghi.

<sup>4</sup>“AJiu etoa la kilakila tokatokaaghi nau aliki ieghi, me aitiutiu tale maamauluaaghi nau aghe tokatoka tanganeughi me tee eJerusalem. <sup>5</sup>Laghe kilakilaailieghi me, arova la masimasi, la rooro tani auliaa va, tale aitiutiu, aghi kateva tana Paresi, lo atoa la tani uusila inangari nipaopao. <sup>6</sup>Ghaine nga tinginala tale niaisakei poli uneghi niaikaaiata tale inangari nialokoi God ghe auliaa ta tuvuita atoa. <sup>7</sup>Isaa oia inangari nialokoi, kasangaulu ghalua (12) ararimangaliita la aloanna tani tara va etani lutu ekoronna, nau la kakkaua God llaa me voo. King Agripa, mausi ia o niaikaaiata gateva me aJiu etoa la ghaauliaa teieghi. <sup>8</sup>Vaalua me katoa etaimim karika am rooro tani aiesoaa va God aue etotu matena atoa?

<sup>9</sup>“Aghi tee aghe anna tani gheleei oroieili voto tani rati ararina atea Iesu aNasreti ia. <sup>10</sup>Aghe gheeleei llo oia voto eJerusalem. Aghe ghaaghaa sarasarakana ta namu ngatoa ta pristi etoa me aghe aatoka sso kapuna taumattu ngatoa God tale ale mata voovoo,

me nau laghe aaisakei, aghi tee aghe auliaa va la mate. <sup>11</sup>Oroiaata nau aghe laolao tale ale nivelu eitauaa tani laa kuneila me tani atokaila sso tale ale mata voovoo, me aghe tootoonga tani gheleila va la rati aikiaaiaaira. Tale sessaiaaghi sarasarakanaaili, aghe laolao tee tale masau etoa masaliki taatara tani gheleei saasakieinila.

### Pol ghe auliaala vaalua ghe aikaaiaala

<sup>12</sup>“Tale kateae nikasu aghe laa sio-sio eDamaskas ta namuu ta pristi etoa laghe sungieghila me laghe tau mae sio matuutulienea etaghi. <sup>13</sup>King Agripa, elo sinaka nau aghe laa siosio etapaa salana, aghe tarala mallanga ateva ghe kasula epona liu, maamallangiaane elaulau sinaka ateva, ghe mallangieghila me kapughu etoa. <sup>14</sup>Ami ekapa ami ghe katuula tapaa kosa me aghe nongola lingi ngalo ateva ghe samasama nge Ibrula, ghe uela va, ‘Sol, Sol! Vaalua me ugheleei saasakieinaghi? Aue ughaa vakovako nau uaaiuvi tee aaloannaaghi.’

<sup>15</sup>“Me aghe kolomila va, ‘Io see, vau eteva?’

“Vau eteva ghe liula me ghe uela va, ‘Aghi Iesu ugheleei saasakieinaghi. <sup>16</sup>Totula me utingina sae. Ngarekataala etam tani suitoongainio va ughuungu etaghi; uppooaa voto angu tarala etaghi me voto auena aghapasunga. <sup>17</sup>Aue aghasaangio ta kapum atoa me taumattu ngeleka atoa nongina ngasungisungi tauo lao etaira. <sup>18</sup>Uoti mataira tale saurrom me la ghaa mallanga ateva, me la kasu vuli sarasarakaniaane ateva Satana me la lao ta God, me God aue ekalua kaluira ssavoto me la toka teieghi me lo atoa God ghe amangaila tale uneira niaikaaiata etaghi.’

<sup>19</sup>“Liuna avalua o, King Agripa, karika aghe nongo vulula lo ateva o nitaatara ghe mae sio epona liu etaghi. <sup>20</sup>Aghe

tiuuala eDamaskas vara me eJerusalem me eJudia ngakapa me ta taumattu ngeleka atoa aghe poppooaa va la kiri tale gheeleiaaira sesa me la mae ta God me la ghasungata tale masi uunguaaira va ngila ghe aikolikoliaala. <sup>21</sup> Poli aghe poppooa ngavalua o me aJiu etoa laghe posoaghila tale ale ngeleka atiulu tale ale manga ateva me laghe anna tani uvi emateaghi. <sup>22</sup> God ghe sausieghila lomositi ta ghaine nga tinginala tani ppoaaa ta ila akapa aliki me namuu. Karika aghaauliaa righi ouna inangari. Inangari oia propete atoa me Moses laghe ppoaa ngalakoila arau va aue elutu: <sup>23</sup> Mesaea aue eghaa nimmarihana me etotu ekasina tale nimate me ia aue ppoaa ngaotu mallangina ateva ta aJiu etoa me auena ta lo atoa taumattu ngeleka ila.”

<sup>24</sup> Pol ghe aippooaa me Pestas ghe savalainiela, ghe uela va, “Pol! Veeveena io? Kinatama alomasaanganiaam atoa ngila ghelei eveveenaio.”

<sup>25</sup> Pol ghe liula me ghe uela va, “Namu ngateva Pestas! Karika veeveena ieghi. Voto aghaauliaa koronna me malloeana masina. <sup>26</sup> King Agripa ekilakilaaili isaa oia voto, me karika amaa matautu tani ppoaaa ta ngetana. Akilakilaaili va ia ekilakila isaa oia voto, poli karika aisulianna.” <sup>27</sup> Pol ghe kolomila va, “King Agripa, uaiesoaa inangariira propete atoa? Akilakila va uaiesoaa.”

<sup>28</sup> Me King Agripa ghe uela ta Pol va, “Uanna va ia oia tuku nau erighi ugheleieghe va ausila Karisto?”

<sup>29</sup> Pol ghe liula me ghe uela va, “Arova tukuna me aluse nau, alooloo sae ta God va karika io nonga ta am akapa lo atoa am nongonongoaghi ghaine, am ghele tau ngaiesoaa nongina aghi, me karika va tale sene.”

<sup>30</sup> King, me gavana, me Beniis, me lo atoa laghe tokatoka teeila, laghe tingina saela. <sup>31</sup> Me laghe kupi vulu ghoala ale atiulu me nau laghe aippooaa elome ta ngetaira laghe uela va, “Taumattu ngateva oia karika ghe gheleila righi sesa va esso tale ale mata voovoo me emate.”

<sup>32</sup> King Agripa ghe uela ta Pestas va, “Ughe rooroo tani tau velu taumattu ngateva oia arova karika ghe aloannala va Siisa ghe tani nongo unna niaisakei eteae.”

### Pol ghe laolao eRom tale anua ateva

**27** Nau laghe uela va ami lao eItali, laghe taula Pol me katoa tani karavusu ta nimane kateva namuu ta tau ngai uvi etoa ghe aitoia kateva ai (100) tau ngai uvi, ararina atea ta Jiulies, ia kateva ta Kohot<sup>§§</sup> ateva ta Siisa. <sup>2</sup> Ami ghe aikaaila tale anua ateva anueira ia taumattu ngatoa tale masaliki taatara atea eAdramitium ghe anna tani ilou lao tale kasina sao tale provinsi eteva eEisia. Ami ghe tiu ghoala, me Aristakus aTesalonika ia tale provinsi eteva eMese-donia ghe usiemamila.

<sup>3</sup> Vara mene kateva nau me ami ghe rekatala eSaedon. Me poli Jiulies masinaaili ia ta Pol, ghe tau veluela tani laa tara kapuna atoa me laghe tau lao righi llo ghe aloanna. <sup>4</sup> Me ami ghe tiu ghoala eSaedon me ami ghe ilou vaavalaala tale patunganua ateva eSaepresi poli ami ghe soula kuukuu eteva. <sup>5</sup> Ami ghe selela tale tuku mara ateva eSilisia me Pampilia me ami ghe rekatala eMaera tale provinsi eteva eLisia. <sup>6</sup> Tale ia voto ateva, tau ngai uvi eteva ghe aitoia kateva ai (100) tau ngai uvi ghe tarala anua ateva ghe kasula tale masaliki taatara atea eAleksandria ghe laolao eItali me ghe kaaiemami ghoala etana. <sup>7</sup> Ghe oroila nau me karika ami ghe ilou enamuu

§§27:1 Kohot Utara Malloeana inangari.

poli ami ghe soula kuukuu eteva, me aanasaaili tani lao me ami ghe nim sele akalakalaala tale masaliki taatara atea eNidus. Me anua ateva karika ghe rooro tani usila nongina ami ghe anna tani lao, poli kuukuu eteva sarasarakanaaili ia, liuna avalua o me ami ghe sele vaavalaala tale patunganua ateva eKrit kalakalaa tale ngusunguna ateva eSalmone, poli pallungeia. <sup>8</sup>Ghe tattasiemami nau ami ghe ilou vaavala me ami ghe rekatala tale saoa atea la kolokoloa va Masi Sao ia, kalakalaa tale masaliki taatara atea eLasea.

<sup>9</sup>Oroi masi nau ang ghe lao sio me ang ghe ghaala nau nittasi poli Nau Ninae ang ghe ruula, me Pol ghe aulia ngakorokorongana la etaira va, <sup>10</sup>“Taita atoa! Aataara va, arova ita kasu karika aue ita masina me aue ita velu anua ateva me ghinna me maamauluaaita tee.” <sup>11</sup>Namu ngateva ta tau ngai uvi etoa ghe nongo vulula inangarina Pol me ghe nongo usilaala nannaairarua kapteni me tau nganuena. <sup>12</sup>Poli sao atikirighi karika masina ia tani vukala nau ttasi, oroi ila lo atoa laghe aloannala tani kasu vuli ia o sao atikirighi me la laa vukala ppae. Arova masina laghe aaloanna tani lao tee ePiniks poli sao atikirighi okae masina ia nau ttasi eteva. Piniks kateae sao eKrit epaapallu tale kuukuu eteva tale nau ttasi.

### Ttasi eteva

<sup>13</sup>Nau masi kuukuu erighi ta pai saot ghe tiuaala tani kuukuu, laghe annaala va ngila tani ghaaghaa voto la ghaaloanna, liuna avalua o me laghe ae kaaila angga ngateva me laghe tiuaala tani sele vaavala eKrit. <sup>14</sup>Karika masau me salamisana ateva laghe aseasea va “notista” ghe sio aloi mae tale patunganua ateva eKrit. <sup>15</sup>Ttasi eteva ghe tiuaala tani uvi anua ateva me karika ghe rooro tani mene ilou poli ghe

sousou kuukuu eteva. Liuna avalua o me ami ghe nim tiuaala tani usi kuukuu eteva. <sup>16</sup>Nau ami ghe sele vaavalaala tani pallu tale patunganua arighi eKauda, ghaisa ngarighi karika ami ghe roo tani ae kaai paanaka ngateva, me karika ta ami ghe aee kaaiela. <sup>17</sup>Liuna avalua o me nau kuruu etoa laghe aee kaaiela me laghe keoaa siola kasina uasa tale vusu nganua ateva me laghe iriela tani posoa akorokorongana anua ateva. Laghe maamatautu va ami ghe rau toka sae tale muerra elamana eLibia, liuna avalua o me laghe velu siola voto ateva tani aoghi anua ateva tale kuukuu eteva, nau ami ghe usiusi kuukuu eteva. <sup>18</sup>Ttasi eteva ghe kaarasila tani uvi saasakia anua ateva, liuna avalua o me vara mene kateva nau me kuruu etoa laghe tiuaala tani sau veluvelu sio kasina ghinna elamana. <sup>19</sup>Vara aiaakotonna ateva nau, me laghe tiuaala tani sau veluvelu sio kasina voto peina anua ateva. <sup>20</sup>Oroi nau ghe lange sio karika ami ghe tara poila sinaka ateva me katto atoa, me ttasi eteva ghe tam kapakapa poi, me ami ghe kilala va karika aue ami saanga.

<sup>21</sup>Oroi nau ghe lange sio me taumattu ngatoa karika laghe namanama me Pol ghe tinginala elome etaira me ghe uela va, “Taita atoa! Arova am ghe nongo usilaala llo aghe auliaala va ita rau mene tiu ghoa mua nau ita eKrit, karika aue ita ghele sou isaa oia voto ange lutu teetala, me karika aue ita ghele sau velu sio righi ghinna avalua o. <sup>22</sup>Me ia oia aghaaulia etaimim va am mene masimasi poli karika teva etaita aue eraua. Anua ateva nonga aue evulla ia. <sup>23</sup>Eleivoo kapuna ensolo ateva Goto ateva kapuna ieghi me auungu etana etingina valaala etaghi <sup>24</sup>me euela va, ‘Pol, urau mene matautu, poli aue utingina emua ta Sisa me uaisakei, me God ange alousiusi teela lo atoa am aikaai eitauaa, me poli

mausim me aue easaangi maamaulu-aaira.’<sup>25</sup> Liuna avalua o me, taita atoa, am rau mene annangaili poli aghaika-iaa ta God va voto eauliaala aue ekoronna.<sup>26</sup> Me ita tani laa toka sae tale teva patunganua.”

### Anua ateva ghe toka saela me ghe tapolapolakala

<sup>27</sup> Aiaakasangaulu ghaatanina ateva (14) voo me kuukuu eteva ghe kuukuueinamami elaelao tale kinatama paamanu eteva eAdriatik. Elomatua voo, me kuruu etoa laghe ateateaala va ngami ghe reerekata elae.<sup>28</sup> Laghe velu siola uasa ateva me laghe toongila va ghaatingaulu (40) mita maamasauaane sio. Vara karika masau me laghe mene toongila me laghe tarala va kotolungaulu (30) mita maamasauaane sio.<sup>29</sup> Poli laghe maamatautu va ami rau sso toka sae tale teva voto atu, liuna avalua o me laghe vella ghaata angga emuli me laghe tiuaala tani looloo sae va epai parasi.<sup>30</sup> Kuruu etoa ngila ghe paepae salana tani ilou vuli anua ateva, liuna avalua o me laghe avukala siola paanaka ngateva ta paamanu me laghe kamekame va vara laghe mene anna tani velu llo angga emua.<sup>31</sup> Vara me Pol ghe uela ta namu ngateva ta tau ngai uvi etoa va, “Arova kuruu etoa la tam toka tee anua ateva, karika aue ita saanga.”<sup>32</sup> Liuna avalua o me tau ngai uvi etoa laghe toa patela uasa atikirighi laghe naue lao sio tale paanaka ngateva me uasa me paanaka ngateva ghe kasuaala.

<sup>33</sup> Auena ghe pai eraarangisana me Pol ang ghe ue etaira akapa va la namanama. Ghe ue va, “Ang ghele roola kasangaulu ghaata (14) nau am ghe vukalala me karika poi am ghe namanama.<sup>34</sup> Aghanna va am ghaa righi inana me am nama me aue am toka. Karika poi teva aue tikirighi uu ngu-

runa aue ekao ta uruna.”<sup>35</sup> Nau eteva ghe ruula tani aippooaa, ghe ghaala kasina verete me ghe kkaili emasina saela ta God emua etaira me ghe pirila me ghe tiuaala tani nama.<sup>36</sup> Ila akapaaili nannaaira ghe mene masinala me laghe ghaala inana me laghe tiuaala tani nama.<sup>37</sup> Ami ekapaaili tale anua ateva erooroo ghalua ai ghaitungaulu ghaonomo iemami (276).<sup>38</sup> Nau laghe namanamala va ghe ssoilala, me laghe tiuaala tani sau veluvelu sio beke uit tani ghelei oakana anua ateva.

<sup>39</sup> Vara ghe paila me laghe tarala vilikoule ateva samarra ia me karika laghe kilakila va elae tale sa ateva voto, me laghe annaala va laghe sso atoka sae anua ateva tale ia o voto ateva arova la rooroo.<sup>40</sup> Laghe toa patela angga ghe tokala o elamana, me laghe pulakala uasa ghe naghinaghi etoka paka ose alulu ghe aloaloo anua ateva, me laghe avukala saela sele ngemua ateva va ghe kuueinila me laghe sso elae.<sup>41</sup> Karika laghe sso rekata elae me anua ateva ghe ilou sauuaala tale muerra me ghe toka saela. Emua ghe kaarasila tani sae toka karikaaili ghe aaisiisia, me kinatama koto atoa laghe tiuaala tani ghelei polapolaki emuli.

<sup>42</sup> Me tau ngai uvi etoa ngila ghe loeloe katikirighi salana va la uvi emate karavusu etoa poli laghe rau sso saoko va laghe ilou.<sup>43</sup> Me poli kapuira namu ngateva tau ngai uvi etoa ghe anna tani asaangi maamauluaane Pol, ghe paolala va la rau mene ghelei voto laghe aailoea va la ghelei. Ghe uela va lo atoa la rooroo tani asa la love velu sio elamana me la suu sso elae.<sup>44</sup> Mene katoa aue la ghasa sso tale palanga me righi tapiri voto ghe taruurutila tale anua ateva me la sso elae. Tale isaa o salana ila akapa laghe laa sso rekata amasina elae.

### Pol ghe tokala tale patunganua ateva eMolta

**28** Nau eteva ami ghe ssola elae, ami ghe kilala va patunganua ateva laghe asease Molta etana. <sup>2</sup>Taumattu ngatoa tale lo atea o masaliki laghe masimasila tani taraiemami. Laghe kula kura atea me ami ghe tiuaala tani maruu, ta poli ghe vaavaoo me kkailli eteva. <sup>3</sup>Nau Pol ghe lao sio tani ghaa see kasina tana laa kura, ghe sau teela sesa katu ngateva, vara ghe alokoi sae laa kura tale kura atea, me kura atea ghe llangi vella katu ngateva, me ghe kata avukalala nimana atelange. <sup>4</sup>Nau taumattu ngatoa laghe tarala sesa katu ngateva ghe vuuvukala ta nimana Pol, laghe auliaala elome etaira va ia tau niuvi emate taumattu ia, liuna avalua o arongona ta ang ghe saangala elamana, me kapuira god ateva ararina atea ta Niaisakei Ghulughuluena aue eliu me euvi ematea. <sup>5</sup>Pol ghe repataa velu saela sesa katu ngateva tale kura atea, me karika righi voto ghe lutula etana. <sup>6</sup>Nau taumattu ngatoa laghe toitoi poi vaara nimane atelange ghe rrongo, me ghe mate me ghe katu, me laghe aikolikoli-aala nannaaira va Pol goto ia.

<sup>7</sup>Karika masau tale lo atea o masaliki, kasina kosa, kosane namu ngateva tale patunganua ateva, ararina atea ta Publius. Ghe koloamamila me ami ghe lao sio tanganuena, me ghe aitarainamamila tale kotolu nau. <sup>8</sup>Tale ia o nau eteva, tamana ghe isiki elokoila, vilikina ghe aanasa me kovane ateva ghe iloueinia. Pol ghe ssola tani tarai, me ghe looloo saela me ghe soaala nimane, me ghe masinala. <sup>9</sup>Nau isaa o voto Pol

ghe gheleila, mene katoa tana tau sessa tale lo ateva o patunganua laghe mae sio, me laghe masinala. <sup>10</sup>Laghe gheleila oroieili voto masina etaimami, me laghe tau mae sio kasina voto karika etaimami, nau ami ghe kasukasu.

### Pol ghe rekataala eRom

<sup>11</sup>Emuli tale ulana kotolu, ami ghe aikaaila tale anua ateva ghe vuuvukala okae, poli nau ttasi. Anue nge Aleksandria ia, emua tale anua ateva, tootoo god alua palue ilalua, Kastor me Pol-luks.\* <sup>12</sup>Ami ghe laa rekataa sio tale masaliki taatara atea eSirakius, me ami ghe tokala kotolu nau. <sup>13</sup>Ami ghe tiu ghoala, ami ghe selela ami ghe rekatala tale masaliki taatara atea eRegium. Me emulina kuukuu eteva ghe mae aloi sio ta pai saot, me anua ateva ghe ilou parasila, me mene kateva nau ami ghe lao sio tale masaliki taatara atea ePuteoli. <sup>14</sup>Tale lo atea o masaliki taatara, ami ghe saopila katoa taumattu tau ngaiesoa ila. Laghe koloamamila tani toka teeila tale ghaitu (7) nau, me ami ghe kasu vulilala tani lao eRom. <sup>15</sup>Nau tau ngaiesoa ngatoa laghe non-goamamila, laghe kasu emasaula tani mae souemami, katoa tale maket eApus, me katoa tale masaliki etea la ghe asease va Kotolu Ale Aiasoaso. Nau Pol ghe tarailala, Pol ghe kaili emasinala ta God, me laghe asarasakanaiela. <sup>16</sup>Nau ami ghe rekatala eRom,<sup>†</sup> laghe tau vella Pol va etoka ie nonga ta kateva ale me tau ngai uvi eteva tani toia.

### Pol ghe poppooaa eRom

<sup>17</sup>Pol ghe tokala kotolu nau, me ghe kolo aitauaala namuu ta aJiu etoa, me

\***28:11** Uru tootoo taumattu ngalua laghe atokala emua, me laghe kakkaua etairarua.

<sup>†</sup>**28:16** Kasina uru ngai laghe pitila, laghe mene pitila va *namuu ta tau ngai uvi etoa ghe aaitoia kateva ai (100) tau ngai uvi ghe tau lao sio karavusu etoa ta lo ateva emuemua tau ngai uvi etoa tale ia o voto ateva,*



ghe uela va, “Tueghi me nengaghi etoa, karika aghe gheleila righi sesa voto ta taumattu ngatoa, ta gheeieiaaira tuvuita atoa, me laghe kuneieghila eJerusalem me laghe taueghi lao sio ta nimaira aRom atoa. <sup>18</sup>Nau laghe kolomieghila me ngila ghe aloanna tani tau velueghi, poli karika righi voto sesa aghe gheleila va la uvi emateaghi. <sup>19</sup>Nau aJiu etoa karika laghe aaloannala va la tau velueghi, liuna avalua o aghe aloanna va Siisa ghe tani nongoaghi, karika aghan-naa va aghelei me kapughu etoa la ghaisakei. <sup>20</sup>Liuna avalua o aghaloan-naiemla va am mae me ataraiem, me atani sama teeiem. Ta poli apoppooaa Mesaea, ita aIsraeli etoa ita aaiesoaa va aue easaangita, liuna avalua o me laghe iri etokaieghila tale isaa oia sene.”

<sup>21</sup> Me laghe liula va, “Karika righi aJi-udia ghe piti mae righi uru ngai tani aulieinio, me karika teva aJiudia ghe mae auliaa righi kiukiu etaimami, me tani auliaa righi sesa kiukium. <sup>22</sup> Me ami aaloanna tani nongo righi nannaam, ta poli ami kilakila va taumattu tale kosa akapa ateva la auliaa saasakia ta ia o niakaايا ngateva.”

<sup>23</sup> Laghe asela nau eteva, me oroi tau-mattu laghe mae sio tale voto ateva Pol ghe tokatoka etana. Elue talua me ghe laa ghaa sio elo alai, Pol ghe au-lia ngamasalikaala ararimangalina at-eva God. Ghe aulia ngaotu Iesu tale inangari nipaopao ta Moses me propete

atoa, poli ghe aloanna tani kiri nan-naaira me laghe aikaiaa ta Iesu. <sup>24</sup> Ka-toa laghe aikaiaaala tale inangari ghe auliaala, me katoa karika laghe aikaiaaala. <sup>25</sup> Laghe tiuaala tani aisavalaa see me laghe tiuaala tani kasu. Pol ghe uela va, “Spirit Manga ateva ghe aulia ngako-ronnala ta tuvuumim atoa<sup>‡</sup> ta propete Aisaea va,

<sup>26</sup> “Kasula me ulaa ue etaira va, “Aue am nongo me karika aue am kila; me aue am tara me karika aue am alo-masaanga tee.”

<sup>27</sup> Urunguitaniira aue ekorokorongana, me talingaira aue evolovolongina tani nongo, me laghe aakoula mataira va karika la taatara.

Ta la rau tara nonga ta mataira, me la nongo ta talingaira, va la kila ta urunguitaniira, me la kiri mae va aghelei emasinaila.<sup>¶</sup>

<sup>28-29</sup> “Me aue am kila va niasaangi kanna God ang ghe lao sio ta taumattu ngeleka atoa, me aue ila la nongo!”<sup>§</sup>

<sup>30</sup> Pol ghe tokala ghaluae ninamanama tale ale ateva ghe polipolia, me ghe masimasi tani tara taumattu ngakapa atoa laghe mae taatarai. <sup>31</sup> Nau ghe poppooaa inangari ararimangalina at-eva God me ghe aapasungaa Vau nge-pona ateva Iesu Karisto, karika ghe maa-matautu, ta poli karika teva tani ghelei rungainia.

<sup>‡</sup>28:25 *tuvuumim atoa* Kasina uru ngai laghe pitila, laghe uela va *tuvuita atoa*

<sup>¶</sup>28:27 Aisaea 6:9-10

<sup>§</sup>28:28-29 Kasina uru ngai laghe pitila, laghe mene pitila va, <sup>29</sup> *Me nau eteva ghe auliaala isaa o voto, aJiu etoa laghe kasu vuliela, me emuli ta ngetana laghe aisakeanaala.*

*Aitiuti etikirighi uru  
ngai Pol ghe pituela ta*

### **aKorint atoa**

**1** Aghi Pol, God ghe koloaghila tale aloanaane va ekapuna apostolo ieghi Iesu Karisto, tee me Sostenes, eaiesoa ngaitauaa teeita.

<sup>2</sup> Angalu pitipiti mae tale alena ale manga ateva God eKorint, ta lo atoa God ghe amangaiemla ta Karisto Iesu, me ang ghe koloamla va am manga am, tee me lo akapa atoa la tokatoka akapa see tale mene kasina masaliki la looloo sae tale ararina atea Vau eteva Iesu Karisto, kapuira Vau ia, me ita tee.

<sup>3</sup> Alooole sae va maamasinaane me luei ekasukasua ta God Tamaita ia me Vau ngepona ateva Iesu Karisto aue etoka teeiem.

#### **Pol ghe kaili emasina saela ta God**

<sup>4</sup> Anim toka kaakaili emasina sae ta God nau ekapa atoa mausiimim, poli ta Karisto Iesu God ghe tau aatu sio maamasinaane ateva. <sup>5</sup> Poli ta Karisto, ngam ghe pasula tale voto akapaaili, nongina tale aippooaimim, me tale alomasaanganiaaimim. <sup>6</sup> Tale isaa o salana, God ang ghe apasungala va nau ami ghe aulia ngaotu Karisto, ami ghe aulia ngakoronna. <sup>7</sup> Liuna avalua o, karika am tuutukuna tale voto God etautau mae tani ghelei uunguaane, nau earieriem tani toi kapuira Vau ngepona ateva Iesu Karisto nau ekauerekati. <sup>8</sup> Aue eaitara ngakororonganiem lomosina ta airuuruu eteva nau, me karika aue la ue va sesa am tale nau eteva kapuira Vau eteva Iesu Karisto emene mae. <sup>9</sup> God aue eghelei

isaa o voto etaimim poli eghelei voto eue va aue eghelei, me ghe suitoon-gainamla tani aighui eitaua tee Natuna, ia kapuira Vau ngepona ia, Iesu Karisto etana.

#### **Niaipolapolaaii tale ale manga ateva**

<sup>10</sup> Kapughu etoa, tale ararina atea kapuira Vau eteva Iesu Karisto, akookolomiem va am kateva nonga, me aue karika righi niaipolapolaaii elutu elome etaimim, me aue am toka aitaua tale kateva nonga ninanna me aloanaaimim. <sup>11</sup> Kapughu etoa, katoa laghe tokatoka tanganue vause ateva Kloui, laghe auliaala kieghi va niaisakeana elutulutu elome etaimim.

<sup>12</sup> Malloeane inangari aghaaulia isaa avalua toko, va katoa etaimim la ue va “Aghi kapuna disaepolo ieghi Pol,” me katoa la ue va, “Aghi kapuna disaepolo ieghi Apolos,” me katoa la ue va, “Aghi kapuna disaepolo ieghi Pita\*\*,” me katoa la ue va, “Aghi kapuna disaepolo ieghi Karisto.” <sup>13</sup> Am annaa va Karisto aipolaane ia? Va Pol ghe matela etaimim tale aikotoo? Me am ghe ghaala niaasuu tale ararina atea Pol?

<sup>14</sup> Akaakaili emasina, poli karika aghe asuula toa etaimim ta Krispas nonga me Gaeas, <sup>15</sup> liuna avalua o me karika teva urooro tani ue va ughe ghaala niaasuu tale ararighi eteae. <sup>16</sup> (Aghe asuu teela Stepanas me kapuna atoa tanganuena, me karika aghannaa va aghe asuula mene righi taumattu.) <sup>17</sup> Poli Karisto karika ghe sungieghila tani asuu, ta ghe sungieghila tani ppooa masi kiukiu, me nau appooa inangarina ateva, arau mene aulieinia tani apasunga va alomasaanga ieghi, ta unna aikotoo ateva Karisto erau nim peisaane.

---

\*\* **1:12 Pita** Pol ghe pitula va *Kepas*. Tale inangari nge Aramaik, *Kepas* malloeana va atu. Tale inangari nge Grik, Pita tee malloeana va atu.

### Karisto alomasanganiaane ia me sarasarakaniaane ia God

<sup>18</sup> Poli kiukiuna aikotoo ateva alokapakapa ia ta lo atoa ngila raaraua, me ta lo atoa etaita God easaangita, aikotoo ateva sarasarakaniaane ia God. <sup>19</sup> Ta Uru ngai Manga ateva eue va,

“Aue aghaa velu aalomasangania lo atoa taumattu la annaa va alomasaanga ila, me aue aghapasunga va alokapakapa nannaaira lo atoa taumattu la annaa va la kilakila oroi voto.”<sup>††</sup>

<sup>20</sup> Tau ngalomasaanga ateva karika erooroo tani kila God tale alomasaanganiaane. Tau ngalomasaanga ateva tale inangari nipaopao karika erooroo tani kila God tale saa ateva ekilakilaia. Tau nisama ateva karika erooroo tani kila God tale samasamaane. God ghe apasungaala va aalomasangania taumattu tale kosa ateva oia alokapakapana. <sup>21</sup> God alomasaanga ia, me ghe annaala va alomasaanganiaaira taumattu tale kosa ateva oia karika erooroo tani sausila tani kila God. Liuna avalua o me God ghe annala tani asaangi lo atoa la aiesoa tale inangari ami aulia ngaotu, me taumattu tale kosa ateva la annaa va isaa o inangari alokapakapana. <sup>22</sup> Poli aJiu etoa karika la aiesoa poli la kookolomi aimatootoongana ngepona liu, me lo atoa aGriki ila karika la aiesoa poli la paepae alomasaanga ateva. <sup>23</sup> Me karika, ta ami, ami poppooa matemateane ateva Karisto, aJiu etoa karika poi la aloanna tani nongoa, me ta lo atoa karika va aJiu ila, alokapakapa ia etaira. <sup>24</sup> Me ta lo atoa God ghe kololala, lo atoa aJiu ila me lo atoa karika va aJiu ila, Karisto sarasarakaniaane ia me alomasaanganiaane ia God. <sup>25</sup> Ta poli inan-

garina ateva aikotoo ateva, aGrik atoa la annaa va alokapakapa ia, eaapasunga va alomasaanganiaane God elaulau alomasaangania taumattu. Me aikotoo ateva, aJiu etoa la annaa va saghuighuina ia, eaapasunga va sarasarakaniaane God elaulau sarasarakania taumattu.

<sup>26</sup> Kapughu etoa, am mene nnaa lao vaalue iem nau God ghe koloamla. Katoa nonga etaimim alomasaanga iem tale taatara taumattu ngatoo tale kosa ateva oia. Me katoa nonga etaimim sarasarakana am, me katoa nonga etaimim am ghe lutula tale llo pamili tue ngararina mane. <sup>27</sup> Poli God ghe suitoongaala voto alokapakapana tale kosa ateva oia tani apalata lo atoa la annaa va alomasaanga ila, me ghe suitoongaala lo atoa karika sarasarakana ila tani apalata lo atoa la annaa va sarasarakana ila. <sup>28</sup> God ghe suitoongaala voto tale kosa ateva pisikeili, me voto taumattu tale kosa ateva la ratirati, me voto taumattu tale kosa ateva karika la taatara kkai, God euungu etana tani ghaa velu isaa o voto kosa ateva eannaa va masina me eanamunamungane. <sup>29</sup> Liuna avalua o me karika teva erooroo tani asake ta matane God. <sup>30</sup> Poli mausi God am ghe kateva nonga iemla ta Iesu Karisto. Ghe maeaa sio alomasaanga etaita, me ita ghe ghulughuluenala me ita ghe mangala, me ghe ghaa oghitala tale gheeleeiaa ssavoto atoa. <sup>31</sup> Liuna avalua o, nongina laghe pitila tale Uru ngai Manga ateva va, “Arova teva eanna tani asakea righi voto, easakea voto Vau ngepona ateva ang ghe gheleila.”<sup>‡‡</sup>

**2** Kapughu etoa, nau aghe mae sio tani aulia ngaotu inangarina ateva God etaimim, karika aghe poppooa righi asease kinatama inangari tani apasunga

<sup>††</sup>1:19 Aisaea 29:14

<sup>‡‡</sup>1:31 Jeremaea 9:24

va alomasaanga ieghi. <sup>2</sup>Poli aghe nnaala va arau mene kila righi voto, nau aghe tokatoka teeiem, ta aghanna nonga Iesu Karisto, ghe matela tale aikotoo. <sup>3</sup>Nau aghe mae sio etaimim, karika aghe sarasarakana, me aghe reterete tale nimatautu. <sup>4</sup>Inangarighi me uneghi nipooa karika aghe poppooa tale aalomasaangania taumattu tani ghaaiem, ta aghe apasunga ngaotu sarasarakaniaane Spiriti eteva. <sup>5</sup>Isaa avalua o me uneimim niaikaaia erau mene toka tale alomasaangania taumattu, ta etoka tale sarasarakaniaane ateva God.

### **Alomasaanga ateva emaemae tale Spiriti eteva**

<sup>6</sup>Ami aulia inangari alomasaanga ta lo atoa nonga ngila ghe korokoron-ganala tale uneira niaikaaia, karika va aalomasaangania taumattu tale kosa ateva oia, o tale tau ngai toitoi tale kosa ateva oia, poli ghaisa ngarighi aue uunguairairi enim kapa. <sup>7</sup>Me karika! Ta ami aulia aalomasaanganiaane God aisuliane emua arau, me ghaine ngami aoutu. God ghe nnaala emua arau va aue eghelei, me aue ita ghaa voto masinaaaili etana. <sup>8</sup>Karika toa tau ngai toitoi tale kosa ateva oia aloira ghe masaangainiela, poli marova laghe kilakilaia, karika aue laghe uvi emate Vau eteva sarasarakana ia tale aikotoo. <sup>9</sup>Nongina laghe pitila tale Uru ngai Manga ateva, va “Saa ateva karika righi mata ghe taraia, me karika righi talinga ghe nongoa, me karika ghe lutu tale nannaaira taumattu, isaa o voto, God ghe aimanomanosiaala ta lo atoa la aielousieinia.”<sup>¶¶</sup> <sup>10</sup>Ta God ang ghe apasungaala isaa o voto etaimami tale kapuna Spiriti eteva.

Ta Spiriti eteva etaatara me ekilakila voto akapaaili, tee ninanna me voto aisuliannaaili kanna God. <sup>11</sup>Poli karika teva taumattu ekilakila nannaane kat-eva taumattu, ta kapuna nonga ateva spiriti etokatoka elome etana, ekilakila. Me tale ia o salana atikirighi me karika teva erooro tani kila nannaane God, ta kapuna nonga ateva Spiriti God ekilakila. <sup>12</sup>Ia o lo ateva Spirit Manga ami ghe ghaaiela, kanna ia God. Karika ami ghe kilala God tale nannaaira taumattu tale kosa ateva oia. Liuna avalua o me aloimami ghe masaangaala masi voto God ghe nim tau mae sio. <sup>13</sup>Nau ami aulia isaa o inangari, karika ami aulia tale aalomasaangania taumattu, ta Spirit Manga ateva etautau mae inangari ami poppooa. Ami aulia inangari oia tale llo taumattu Spirit Manga ateva etokatoka etaira. <sup>14</sup>Me lo atoa taumattu Spiriti eteva karika ia etaira, karika la rooro tani ghaa ia oia inangari eteva emaemae ta Spiriti eteva. Inangari eteva oia alokapakapa ia etaira. Karika la rooro tani kilaia, ta poli Spiriti eteva karika ia elome etaira tani ghelei emasaliika nannaaira. <sup>15</sup>Llo taumattu Spirit Manga ateva etokatoka tale maamauluaaira, aue la kila tani aitalutalua voto akapaaili sesa me masina elutulutu tale maamauluaaira. Mene kasina taumattu, karika la rooro tani kila nannaaira lo atoa Spiriti eteva etokatoka etaira. <sup>16</sup>Ta Uru ngai Manga ateva eue va, “Karika teva erooro tani kila nannaane Vau ngepona ateva, me karika teva erooro tani loea.”<sup>§§</sup> Me ta ngetaita, ngita ghe kilala nannaane Karisto.

<sup>¶¶</sup>2:9 Aisaea 64:4

<sup>§§</sup>2:16 Aisaea 40:13

### Pol me Apolos kapuna tau ngai uungu ilalua God

**3** Koronnaaili, kapughu etoa, karika aghe roo tani sama teiem nongina aghe samasama tee lo atoa Spirit Manga ateva etokatoka elome etaira, ta aghe sama teiemla nongina aghe samasama tee taumattu ngatoa la uusila aaloannaaira, poli aikaiaaimim ta Karisto nongina raaraina ateva. <sup>2</sup> Aghe anginainamla tale rarumi ssu, me karika va tale inana korokorongana, ta karika am ghe aimonomosia tani ghaa. Me isaa tee oia nau, karika am ghe roo poi tani ghaa, <sup>3</sup> ta poli am tokatoka nongina taumattu ngatoa la uusila aaloannaaira. Am aaituretureainam, me am aissakeana elome etaimim. Isaa o voto eaapasunga va am taumattu tapaa kosa am, me am nongina taumattu ngatoa karika la kilakila God. <sup>4</sup> Nau kateva etaimim eue va, “Aghi kapuna disaepolo ieghi Pol,” me mene kateva eue va, “Aghi kapuna disaepolo ieghi Apolos,” eaapasunga va am nim taumattu tale kosa ateva am.

<sup>5</sup> See ia Apolos, me see ia Pol? Angalua nim kapuna tau ngai uungu iengalua God. Angalu ghe gheelei niuungu God ghe tau mae sio etaingalua, me am ghe aiesoaala. Kateva etaingalua egheelei niuungu God ghe tau mae sio tani ghelei. <sup>6</sup> Aghi aghe pasala katu ue ngai eteva, me Apolos ghe aitarainiela, me God ghe apinosaiela ia o katu ue ngai eteva. <sup>7</sup> Liuna avalua o me lo ateva epasapasa me lo ateva eaaitara katu ue ngai eteva, karika righi arariirarua, ta God nonga ararina atea, ta ia eaapinosa ue ngai eteva. <sup>8</sup> Lo ateva epasapasa me lo ateva eaaitara katu ue ngai eteva, kateva nonga nannaairarua, me aue God etau lao aipolipoli etairarua erooaa niuungu lalua ghelei. <sup>9</sup> Angalu uungu eitaua ta God, me am nongina umana utana

atingiu God, me tee am nongina ale ateva God eatuutulu.

<sup>10</sup> Tale maamasinaane God, ghe tau mae sio etaghi va aghelei uunguaane lo ateva muennaaili ia tani atuutulu. Aghe kaiaala suena tani tiuaa ale ateva, me auena mene kateva eatulu saoa tani rungia. Me kateva kateva etani aitoka vaalua eatulu saoa tale isaa o suena. <sup>11</sup> Ta poli God ang ghe atoka amuemuela Iesu Karisto va ie nonga suena ia, me karika mene teva erooro tani tingina va esuena. <sup>12</sup> Arova teva ealoanna tani atulu saoa sae tale suena, esaoaa sae golo me silva me masi atu, me katoa aue la saoa sae voto erooro tani marokase, nongina ai, valaena me uru makere. <sup>13</sup> Me maamasina uunguaa kateva kateva aue la tara tale nau eteva Karisto ekaurekati. Tale ie nonga o nau eteva ni-aisakei nongina kura atea aue etoongi me eaapasunga uunguaa va masina o sesa. <sup>14</sup> Me marova saa voto laghe atulu etoka saela tale isaa o suena etam ata, ia o tau ngai atulu eteva aue eghaa aipolipoli. <sup>15</sup> Me marova see uunguaane eata akapa, karika aue eghaa aipolipoli, me ia karika aue eraua, ta aue etoka nongina taumattu ngateva ghe saangala tale kura atea.

<sup>16</sup> Karika am kilakila va am alena ale manga am God, me kapuna Spiriti eteva etokatoka elome etaimim? <sup>17</sup> Liuna avalua o me arova lo ateva taumattu etuuturungi alena ale manga ateva God, God aue eturungia, poli alena ateva manga ia, me am alena ale manga am God.

<sup>18</sup> Marova teva elome etaimim uanna va io alomasaanga io tale nanna taumattu tale kosa ateva oia, urau mene kameo, poli karika alomasaanga io tale voto kanna God. Tani toka va God etaraio va alomasaanga io, aue emasina va taumattu tale kosa ateva la tara va io alokapakapa io. <sup>19</sup> Ta alomasaangania

taumattu tale kosa ateva oia nim alokapakapanna ta taataraane God, nongina Uru ngai Manga ateva eue va, “Katoa taumattu la nannaa va alomasaanga ila, me God eaareainila tale alomasaangani-aira tani taula sio euu.”\* <sup>20</sup> Uru ngai Manga ateva emene ue va, “Vau ngepona ateva ekilakila va nannaaira taumattu ngatoa la nannaa va alomasaanga ila nim lao ila.”† <sup>21</sup> Liuna avalua o me karika toa la mene saea nanaaira tale saa taumattu la ghaimuli tee, poli God ghe tau aatu sio voto akapaaili tani sausiem: <sup>22</sup> ta arova Pol, Apolos me Pita‡, o kosa ateva oia, o maulue ateva me mate ateva, me voto etokatoka ghaine me voto auena emae, isaa akapaaili o voto uneimim. <sup>23</sup> Ta am, kapuna am Karisto, me Karisto kapuna ia God.

#### Kapuna apostolo atoa Karisto

**4** Liuna avalua o me am tani nnaa va, ami kapuna tau ngai uungu iemami Karisto. God ghe atokaiemamila tani aulia ngaotu voto aisuliane kanna God. <sup>2</sup> Kateva voto tau ngai uungu eteva etani gheeleia, va etani ghelei emasina uunguaane vauna ateva. <sup>3</sup> Karika anannaa marova am poppooa teeieghi tale uunguaaghi, me saa llo taumattu epoppooa teeieghi, ta aghi tee karika aghaulia teeieghi. <sup>4</sup> Karika anannaa va righi voto sesa aghe gheelei, me karika eaapasunga va karika aghe gheleila righi sesa voto, ta Vau ngepona ateva egheelei niaisakei etaghi. <sup>5</sup> Liuna avalua o me am rau mene ppoa tee katoa, ta nau eteva aue emae Vau ngepona ateva aue emae me ia aue eghelei niaisakei. Ia aue eaotu voto taumattu ngatoa laghe aaisuliaa tale urunguitaniira me karika la ghaulia ta mene

toa. Ia o nau eteva kateva aue eghaa niarua kanna God.

<sup>6</sup> Kapughu etoa, aghe pitila llo oia tani aulieiniengalua me Apolos me tani apa-sunga voto etaimim. Tani annaainien-galua, aue am roo tani kila amasina va am tani aimuli tee llo inangari laghe pitila tale Uru ngai Manga ateva, me am rau mene ghelei mene righi asease voto. Tale ia o salana atikirighi, am rau mene aturru kateva tau ngai apasunga. <sup>7</sup> See ghe atokaiemla va am namuu iem ta mene katoa? Voto akapa am ghe ghaala, God ghe tau aatu. Me marova am ghaaghaa voto ta God, vaalua me am aasaesae nannaaimim nongina va am, am gheelei isaa o voto?

<sup>8</sup> Am gheelei nongina va ngam ghe ghaala voto akapaaili, me ngam ghe ghaala niuungu ekapa Spiriti eteva enim tautau mae, me am annaa va am sarasarakana am ta Spiriti eteva nongina va ngam ghe kingila, me ami karika! Aghanna va am ghele toka nongina kingi etoa, me ami tee ami ghele nongina am. <sup>9</sup> Poli ta ngetaghi aghannaa va God ghe atokaiemamila apostolo atoa tani airuuru. Ami nongina taumattu ngatoa ngila aisakeila me ngila uela va aue la mate tale tummatavanga, ta mataira ensolo atoa, me taumattu ngatoa, me tale kosa akapaaili eteva. <sup>10</sup> Ami, ami tokatoka va alokapakapa iemami poli ami uungu ta Karisto, me am, am annaa va alomasaangaaili iem ta Karisto. Ami tokatoka va karika sarasarakana amami, me am, am annaa va sarasarakana am, me am la oneoneainam, me am annaa va taumattu ngatoa la rau mene oneoneainamami. <sup>11</sup> Tale isaa too nau me isaa oia nau ami maamalo, me ami kaakangngata,

\*3:19 Job 5:13

†3:20 Sams 94:11

‡3:22 Pita Pol ghe pitila va Kepas. Tale inangari nge Aramaik, Kepas malloeana va atu. Tale inangari nge Grik, Pita tee malloeana va atu.

me ami aasae ghinna marane, me la tuutumariemami, me ami kasukasu see me karika righi aleimami tani toka. <sup>12</sup>Ami uungu aanasa tale nimaimami. Nau la aulia saasakia teeiemami, ami aarangi-seila. Nau la gheeleei voto sesa etaimami ami aapala isaa o voto. <sup>13</sup>Nau la poppooa saasakia teeiemami, ami liuliu inangariira tale masi inangari. Me karika taumattu ngatoa la oneoneainiemami, me la taataraiemami nongina va kinanguluti eteva la laa kaokao velua.

<sup>14</sup>Karika apitipiti llo oia tani apalataiem, ta aghanna tani apasunga llo voto am tani kila, nongina va masi natughu tuungi iem. <sup>15</sup>Arongona ta marova oroieili kapuimim tau ngai toitoi tani aitarainam tale uunguaane Karisto, me kateva nonga ia tamaimim ateva, poli ta Karisto aghi tamaimmi ieghi, poli aghe mae sio tani aulia masi kiukiu etaimim. <sup>16</sup>Liuna avalua o aghaulia etaimim va, am usila gheeieiaaghi. <sup>17</sup>Me ngasungisungi tau aatu Timoti, ia natughu ia ta Karisto, me aghaailousieinia me aghaatoka tuutulighi etana tani ghelei uungua Vau ngepona ateva, me ia aue eghelei nannaaimim tani mene annaa gheeieiaaghi tani usila Karisto Iesu. Ia aue eapasunga ngakapa voto aghaapasunga ngakapa see tale ale manga akapaaili etoa. <sup>18</sup>Katoa etaimim la nannaa va karika aue amae taraiem, me la aasake. <sup>19</sup>Me ghaisa ngarighi amae taraiem, marova Vau ngepona ateva eaaloanna. Me aue akila saa ateva lo atoa la tautau sae nannaaira la gheeieia. Me aue akila va la gheeleei tale sarasarakaniaane God, o la nim samasama. <sup>20</sup>Poli God eapasunga va eaaitoia taumattu tale voto la gheeleei, me karika va voto la aulia. <sup>21</sup>Saa ateva am aloanna va agheleia? Arova am tam ruu tani ghelei evalua o, aue amae paruem tale inangari, o arova am

nna ngaioghioghiaa, aue aghapasunga va aghaieulousieinam tale inangari saghuighuina.

### Voto sesaaili tale ale manga ateva

**5** Karika aghe roola tani aiesoa kiukiu aghe nongola tale uungua niailai see atea elome etaimim, voto sesaaili taumattu ngatoa karika la aiesoa tee karika la gheeleei. Laghe auliaala etaghi va taumattu ngateva ona tale aleimim ale manga ateva ghe aso teela kinna talae ateva, vausenna ia tamana. <sup>2</sup>Me arongona va kateva etaimim egheleei isaa o voto, me am tautau sae nannaaimim! Vaalua me karika am ngangngala tani alousiusi me am palata? Me vaalua me karika am ghe ghaa vella ia o taumattu ngateva tale uneimim nivelu eitaua? <sup>3-4</sup>Arongona ta karika atokatoka aitaua teeiem, me tale ninannaa atokatoka aitaua teeiem. Me ta lo ateva taumattu ghe gheleila ia o ssavoto ateva ngaghe gheleila niaisakei etana tale ararina atea Vau palepale Iesu. Am kolo teva nivelu eitaua tale ale manga, me aue atoka aitaua teeiem ona tale ninannaa, me aue sarasarakaniaane namu ngateva Iesu etoka aitaua teeiem nau am velu eitaua. <sup>5</sup>Me am ghaa velu ia o taumattu ngateva tale ale manga, nonginaaili va am mene tautau laeo ta Satana. Aue eghaa nimmarikana me aue enna ngaioghioghiaa, me aue eroo tani saanga nau Iesu esio.

<sup>6</sup>Karika masina va am aasake. Karika am kilakila kateva inangari eue va, "Ghaunaaili tuku isti erighi egheleei erranga ia akapa palaoa ngateva"? Marova ia o taumattu ngateva etokatoka elome etaimim, aue egheleiem am usi gheeieiaana. <sup>7</sup>Am ghaa velu ia o ssavoto ateva elome etaimim nongina aJiu etoa la ghaaghaa velu isti auena ta nau Pasova, me aue am raarangisana, poli God ghe kkaluaala kaluimim ssavoto. Ta poli Karisto ghe matela etaita nongina

ia o sipsipi eteva laghe uviuvi ematea ta Pasova. <sup>8</sup>Liuna avalua o me ita nnaa ia o ninamanama atea ta Pasova, karika ita namanama verete pokane laghe ghelei isti etana, malloeana va karika ita aimuli usi tee gheleeiaa ngemua arau, ta ita namanama verete karika righi isti etana, malloeana va ita aimuli tee llo God ghe auliaala etaita. Ita rau mene kamekame, ta ita aulia llo koronna.

<sup>9</sup>Tale nau ang ghe lao sio, aghe pitipitila etaimim va am rau mene aighui tee taumattu ngatoa la ghelei uungua niailai see atea. <sup>10</sup>Karika aghe aulia taumattu ngeleka atoa, la anna niailai see atea, me la aloanna nonga tani toka ghaaghaa oroi voto, me tau niainao ila, me la kakkaua voto tale kosa ateva oia. Arova am aloanna tani kasu vuli isaa o ase sesa taumattu, am tani kasu vuli kosa ateva oia. <sup>11</sup>Malloeana voto aghe aulia isaa avalua toko va, am rau mene aighui tee toa taumattu la ue va kapuna ila Iesu me la anna tani ailai see, me tau nisaii ila, me la kakkaua voto tale kosa ateva, me la poppooa sesa inangari tee mene kateva, me la ropiropi sesa manu eteva, me la aainao. Am rau mene nim namanama poi tee ila o ase taumattu ngatoa.

<sup>12</sup>Karika uunguaaita tani ghelei niaisakei tale taumattu ngeleka atoa, ta uunguaaimim tani ghelei niaisakei ta lo atoa elome tale ale manga la ghelei ssavoto tale isaa o salana. <sup>13</sup>Nongina Uru ngai Manga ateva eue va, "Am ghaa velu sesa ateva taumattu elome etaimim."<sup>f</sup> God eghelei niaisakei tale taumattu ngeleka atoa.

### Uunguaa tani ghelei niaisakei

**6** Nau eteva kateva etaimim ange ghelei teela mene kateva taumattu ekakkaua, vaalua me elaolaoa inanga-

rina tale taumattu karika ekilakila God va ila la ghelei niaisakei etairarua, me karika elaolaoa ta kapuna taumattu ngatoa God va la nongo? <sup>2</sup>Karika am kilakila va kapuna atoa God aue la ghelei niaisakei tale taumattu tale kosa ateva oia? Poli aue am ghelei evalua o, vaalua me karika am roo tani ghelei niaisakei tale voto pisike elutulutu elome etaimim? <sup>3</sup>Karika am kilakila va aue ita ghelei niaisakei ta ensolo atoa? Isaa avalua o me ita roo tani ghelei pisike niaisakei tale kosa ateva oia. <sup>4</sup>Liuna avalua o, me marova righi uneimim niaissa, vaalua me am tuutuli taumattu ngeleka atoa va la nongo uneimim niaisakei nau ale manga karika eoneoneainila? <sup>5</sup>Aghaaulia ngavalua o tani apalataiem. Va karika teva taumattu etaimim elome tale ale manga alomasaanga ia va erooro tani ghelei luei tale isaa o niaissa? <sup>6</sup>Vaalua me kateva tau ngaiesoa umene laolaoa mene kateva tau ngaiesoa tale niaisakei va taumattu ngateva karika eaiyesoa elaa ruu uneimalua niaisakei eteae?

<sup>7</sup>Nau kateva etaimim elaolaoa kateva tale niaisakei, eaapasunga va karika am aimuli tee salane God. Arova tau ngaiesoa ngateva ekamekameo me eainao peim, urau mene laoinia tale niaisakei. <sup>8</sup>Me karika, ta am tee, am ghelei voto sesa me am kamekame me am aino peiira katoa, me isaa o voto sesa am ghelei elome etaimim.

<sup>9</sup>Karika am kilakila va lo ateva eghelei sesa voto karika aue eghaa niarangise tale ararimangalina ateva God? Am rau mene aikameainam: Lo atoa la ghelei uungua niailai see atea, me la kakkaua voto tale kosa ateva oia, me lo atoa la lailai sari maneira katoa, me lo atoa taita la asoaso tee mene katoa taita, <sup>10</sup>me lo atoa tau niainao ila, me lo atoa tau nisaii ila, me lo atoa

<sup>f</sup>5:13 Diuteronomi 17:7; 19:19; 21:21; 22:21, 24; 24:7



la ropiropi sesa manu eteva me la pop-pooa sesa inangari tee mene katoa, me lo atoa la ghaiuvi tani ghaa ghinna, karika teva etaira aue eghaa ararimangalina ateva God. <sup>11</sup>Tale nau ang ghe lao sio, katoa etaimim am avalua o, me isaa oia ngam ghe raarangisanala tale uungua ssavoto ateva, me God ghe aman-gaiemla, me Spiriti eteva kanna ia kapuita God ateva ghe ghelei eghulughuluenaieimla tale ararina atea Vau ngepona ateva Iesu Karisto.

### Tani ailai rorrou see

<sup>12</sup>Katoa etaimim am ue va, “Ami rooroo tani ghelei aloanaaimami tale asease voto atoa.” Koronna, me karika va tani koronna akapa. Karika va voto akapaaili va masina etaimim. “Ami rooroo tani ghelei aloanaaimami tale asease voto atoa,” me karika aghaloanna tani tau velu teva voto va emue-mueinaghi. <sup>13</sup>Me am ue va, “Inana pei tale kova ateva me kova ateva aighaa inana ia.” Ia o inangari eteva koronna ia, me am tani nnaa va God aue eturungi ekapailalua. Ta vilikiita ateva karika God ghe gheleielia va ita uungueinia tale niailai sesa, ta peina ia Vau ngepona ateva me ia eaitara ia o vilikiita ateva. <sup>14</sup>Ta tale sarasarakaniaane ateva God aue etotuta tale nimate nongina ghe totula Vau eteva tale nimate. <sup>15</sup>Karika am kilakila va vilikiimim peina Karisto? Erooroo va taumattu ngateva eghaa vilikina ateva peina ia Karisto me eatoka aitaua tee vilikina vause ngetapaa salana ateva? Karika poi! <sup>16</sup>Karika am kilakila va marova lo ateva elao aitaua tee ia o ase vause ngetapaa salana ateva, ngeilalu kateva nongala tale vilikiirarua? Ta Uru ngai Manga ateva eue va, “Taumattu ngalua aue kateva nonga vilikiirarua.”<sup>§</sup> <sup>17</sup>Me lo ateva tau-

mattu eaipatola tee Vau ngepona ateva, ekaakateva nonga ilalua tale spirit.

<sup>18</sup>Am ilou vuli uungua niailai rorrou see atea. Mene kasina ssavoto taumattu ngateva egheelei isaa eleka tale vilikina, me tale uungua niailai rorrou see atea ugheelei saasakia vilikim tuunga ateva. <sup>19</sup>Karika am kilakila va vilikiimim ateva alena ale manga ia Spirit Manga ateva, am ghe ghaaiela ta God? Me karika am kilakila va karika va io uaaitarainio, ta io peina io God? <sup>20</sup>Ghe poliemia tale aipolipoli eteva, liuna avalua o me am oneonea God tale vilikiimim.

### Nikokkolomi tale nilai

**7** Ghaine aghaloanna tani aulia voto am ghe piti mae sio etaghi. Kateva ta isaa o inangari, am ghe pitila va, “Taita ateva erau mene lai, me arova elai, erau mene aso tee vausenna ateva.” <sup>2</sup>Poli oroieili niailai rorrou, liuna avalua o me tani ghelei runga, emasina arova kateva taita eghaa vausenna ateva, me emasina arova kateva vause eghaa taitanna ateva. <sup>3</sup>Taita ateva erau mene raunga vilikina ta vausenna ateva me vause ateva erau mene raunga vilikina ta taitanna ateva. Ilalua akapa lalo roo tani ghelei erooaa aloannaairarua. <sup>4</sup>Vause ateva karika va ia nonga eaaitaraa vilikina, ta taitanna tee ateva. Tale ia o salana atikirighi, taita ateva tee karika ia nonga eaaitaraa vilikina, ta vausenna tee ateva. <sup>5</sup>Kateva urau mene raunga vilikim ta kateva. Marova amalu mae tale kateva ninannaa va amalu ainoana amua tani aso aitaua, me amalu ghelei mua uunguaa nilooloo sae, me nau nilooloo sae erau mene aluse. Arovaeaata ta amalu mene mae aitaua, ta Satana erau ghelei nitootoonga etaimalua, poli karika amalu rooroo tani ghelei runga aloaloanna niaso aitaua ngateae. <sup>6</sup>Isaa

oia inangari aghaaulia karika va inangari sarasarakana tani aimuli tee, ta anim aulia me aloanaaimim. <sup>7</sup> Aloannaaghi va marova am akapaaili am ghele rau mene lai nongina aghi, me karika, ta kateva kateva taumattu eghaaghaa voto God ghe nim tautau lao sio; katoa la lai, me mene katoa karika.

<sup>8</sup> Ta ngetaimim lo atoa tam lai iem, me ta lo atoa vause raue vulu em, emaa-masina va am ghele nim toka nongina aghi. <sup>9</sup> Me arova karika urooro tani aitaraa aaloanaam tani aso aitaua, uroo tani lai me urau mene toka annaa aaloanaam tani aso aitaua.

<sup>10</sup> Me ta lo atoa lailai iem, aghaaulia ngasarakana etaimim inangari, karika va inangarighi ta inangarina Vau ngepona ateva: Vause ateva erau mene kasu vuli taitanna ateva. <sup>11</sup> Ta marova ekasu vulia me karika eoghi lao ta taitanna ateva, erau mene lai. Me taita ateva erau mene rati vausenna ateva.

<sup>12</sup> Me ta mene lo atoa am lailai ta lo atoa karika tau ngaiesoa ila, aghanna tani mene ppooa nim inangarighi, karika va inangarina Vau ngepona ateva. Marova taita ateva, vausenna ateva karika eaiesoa, me ealoanna tani toka tee taita ateva, taita ateva erau mene ratia. <sup>13</sup> Me marova vause ateva ekakkaua me taitanna ateva karika, marova taita ateva ealoanna tani toka tee vause ateva, vause ateva erau mene tiu velua. <sup>14</sup> Poli taita ateva karika eaikaia, God ghe arangiseiela poli vausenna ateva eaikaia. Me vause ateva karika eaikaia, God ghe arangiseiela poli taitanna ateva eaikaia. Marova isaa o voto karika koronna, aue natuirarua atoa karika aue la raarangisana. Me karika, ta isaa oia nau manga ila.

<sup>15</sup> Marova lo ateva karika eaiesoa eanna tani kasu, tau veluela. Tau ngaiesoa ngateva, uroo tani mene lai,

karika teva egheelei rungainio. Poli God ghe kolotala tani toka tale luei. <sup>16</sup> Am vause atoa, vaalua am rooro tani kila va taitannim atoa la rooro tani aikolikolia me la saanga, me am tee taita atoa, vaalua am rooro tani kila va vausennim atoa la rooro tani aikolikolia me la saanga?

<sup>17</sup> Emaamasina arova kateva kateva etaimim eroo tani toka nongina vaalua Vau eteva ang ghe atokaiela, me nongina God ghe tani kolo akasinaiela. Ia oia inangari nipaopao ateva aghaulieinia tale ale manga akapaaili etoa. <sup>18</sup> Marova lo ateva ngila ghe isoieia, erau mene tootoonga tani aikolikolieinia va arova karika laghe isoieia. Me marova lo ateva karika laghe isoia, karika emene tau velua va la isoia. <sup>19</sup> Ni-isoiso atea nim peisaane ia, me nitam isoiso atea tee nim peisaane ia. Ta tani aimuli tee kanna inangari sarasarakana God namuu ia. <sup>20</sup> Am rau mene tootoonga tani aikolikolia saa ateva am ghe tokatoka etana nau God ghe koloamla. <sup>21</sup> Marova lo ateva tau ngai uungu io karika utokatoka tale aloannaam nau God ghe koloola, urau mene nannangaili. Ta marova tikirighi salana eoti tani mene toka tale aloannaam, uaimuli tee. <sup>22</sup> Poli lo ateva euungu me karika etokatoka tale aloannaane, me Vau palepale ghe koloala, God ang ghe gheleieia nongina va taumattu ngateva etokatoka tale aloannaane. Me mene isaa aitaua nongina lo ateva taumattu ghe tokatoka tale aloannaane nau God ghe koloola, ia nim tau ngai uungu ia etokatoka ta aloannaane Karisto. <sup>23</sup> God ghe poliemia tale aipolipoli eteva. Liuna avalua o me am rau mene aimuli tee katoa la aulia saa ateva am tani gheleia tani amasimasi God. <sup>24</sup> Kapughu etoa, kateva kateva etaimim etani toka nongina God ghe kolo akasinaiela, poli God etokatoka teeiem me aue esausiem.

<sup>25</sup> Me tale lo atoa taumattu tam lai iem, karika aghe ghaala righi inangari sarasarakana ta Vau ngepona tani aulia etaimim. Tale maamasinaane, God ghe tau mae sio alomasaanga etaghi me am rooro tani atoka tuutuliimim etaghi, me aue aghaulia saa ateva anannainia. <sup>26</sup> Poli tale isaa oia nau, ange aanasaaili me aghannaa va masina etaimim tani nim toka va karika lailai iem. <sup>27</sup> Marova lailai iem, am rau mene airatii, me arova karika lailai iem, am rau mene tootoonga tani ghaa righi vauseniimim. <sup>28</sup> Me arova taita ateva ulai, karika ugheelei ssavoto, me marova vause ateva ulai, karika ugheelei ssavoto. Me ta lo atoa lailai ila aue la sau voto aanasa tale maamaulueaaaira. Karika aghanna va isaa o voto aanasa elutu etaimim.

<sup>29</sup> Kapughu etoa, malloeana inangarighi isaa avalua toko, va nau ange tuutukunaaili, me tale nau too emaemae, lo atoa vauseniira atoa nannaaira ta vauseniira atoa erau mene lau uunguaane God. <sup>30</sup> Nimasimasi, nialousiusi me peira erau mene ghelei erungainila tani ghelei uunguaane God. <sup>31</sup> Tau ngaiesoa ngatoa am ghinnaghinna voto tale kosa ateva oia, am rau mene atoka nannaaimim tale isaa o voto. Poli kosa ateva oia am taataraiia ghaine aue ekapa.

<sup>32</sup> Aghaloanna va am rau mene nannagaili vaalua tani toka. Lo ateva taita tam lai ia eanannangaili uunguaane Vau ngepona ateva, nongina vaalua erooro tani ghelei emasimasia. <sup>33</sup> Me lo ateva lailai

ia enannangaili voto tale kosa ateva oia nongina vaalua erooro tani ghelei emasimasi vausenna ateva, <sup>34</sup> me nannaane eghaaghalua. Me lo ateva vause tam lai ia enannangaili uunguaane Vau ngepona ateva. Aloanaane tani taula maamaulueaane ta Vau ngepona ateva tale vilikina me tale spirit. Me tale vause ateva lailai ia, enannangaili voto tale kosa ateva nongina vaalua aue eghelei emasimasi taitanna ateva. <sup>35</sup> Aghaulia isaa oia voto tani sausiem me karika va tani ghelei rungainam. Ta aghaloanna tani sausiem va am toka tale masi salana, me erau mene ghalua nannaaimim nau am uungu ta Vau ngepona ateva.

<sup>36</sup> Arova unannaa va karika angu gheelei emasina ta vause ateva la ue va ulai etana, me angu nannangaili tani lai, amalu lai, karika sesa voto amalu nannaa tani ghelei. <sup>37</sup> Me marova angu nnaala va karika amalu mene lai, karika umene usila katoa nannaaira, ughusila saa ninannaa angu nnaala, masina. <sup>38</sup> Isaa avalua o me lo ateva elai ta vause ateva, egheelei masina voto, me lo ateva etam lai ta vause ateva, egheelei voto masinaaili.\*\*

<sup>39</sup> Vause ateva etani toka tee taitanna ateva lomosina ta taitanna ateva emate, me evira roo tani mene lai ta mene teva taita eanna. Me ia o taita ateva eghaala etani tau ngaiesoa ta Vau ngepona ateva. <sup>40</sup> Tale nannaaghi, arova vause ateva enim toka, me etam lai, aue emasimasi, me aghannaa va kapuna Spiriti eteva God elaolao aitaua tee nannaaghi.

---

\*\*7:38 Katoa tau ngalomasaanga la annaa va malloeana isaa avalua toko va: <sup>36</sup> Arova unannaa va karika angu gheelei emasina ta natum aliki vause ateva nau ange roo poila tani lai, me evira anna va elai, utau velua me elai, karika sesa voto ugheelei. <sup>37</sup> Me marova angu nnaala va natum aliki vause ateva erau mene lai, karika umene usila katoa nannaaira, ughusila saa ninannaa angu nnaala, isaa o voto angu nnaala, masina. <sup>38</sup> Isaa avalua o me lo ateva etau velu natuna aliki vause ateva va elai, egheelei masina voto, me lo ateva etam tautau velu natuna aliki vause ateva va elai, egheelei voto masinaaili.

**Malatau laghe gheeleei sae  
aiaavusuvusuena tale tootoo atoa**

**8** Me tale malatau la gheeleei sae aiaavusuvusuena tale tootoo atoa: Ita kilakila va, nongina am ghe pitila va, “Ita akapaaili ita kilakila oroi voto,” me ia o nikila voto atea eroroo tani gheleita va ita tau sae nannaaita. Me niailousi eteva egheleita tani mene sausi kateva. <sup>2</sup>Lo ateva taumattu eannaa va ekilakila akapa voto, karika ekilakila nongina God ealoanna va ekila. <sup>3</sup>Ta lo ateva taumattu eailousia God, God etaatara kilaia.

<sup>4</sup>Tani nama malatau la gheeleei sae aiaavusuvusuena tale tootoo atoa,†† “Ita kilakila va tootoo atoa karika va koronna ila tale kosa ateva oia,” ta ita kilakila va, “Kateva nonga ia God ateva.” <sup>5</sup>Me arongona ta oroi voto epona liu me tale kosa ateva la kolokolola va goto ila me vau ila, <sup>6</sup>me etaita kateva nonga ia God ateva Tamaita ia, ia ghe gheleila voto akapaaili, me ita maamaulue tani oneoneainia. Me kateva nonga ia Vau ngepona ateva Iesu Karisto, ta ngetana God ghe gheleila kosa ateva, me ia etautau mae maulue etaita.

<sup>7</sup>Me karika va tau ngaiesoa ngakapa atoa la kilakila isaa o voto koronna, ta katoa laghe namuu teela niaiesoa va tootoo atoa maulue ila. Liuna avalua o me nau la namanama malatau taumattu ngatoa laghe gheleei saela aiaavusuvusuena etana tale tootoo atoa, karika aloira ghe maamasaangala, la aateatea va voto la gheeleei karika masina. <sup>8</sup>Karika va inana aue laoa ngakalakanginaita ta God, me God karika aue tarairo va masina io arova unamanama, me karika aue tarairo va sesa io arova utam namanama.

<sup>9</sup>Am paniem, am kila va voto am aloanna tani gheleei tale alomasaangaaimim erau gheleei lo atoa saghuighuinaa ila tale niaiesoa va la katu. <sup>10</sup>Poli marova lo ateva ukilakila isaa oia voto me unamanama elome tale teva ale nikkaua alena ateva tootoo goto, me teva karika korokorongana ia tale niaiesoa etarairo, isaa o voto ugheleei aue easarasakanaiia tani nama malatau la gheeleei sae aiaavusuvusuena tale tootoo atoa. <sup>11</sup>Liuna avalua o me ia o kapum ateva karika korokorongana ia tale ninannaa, Karisto ghe matela etana, angu turungila unna niaikaaiia tale voto ugheleei tale alomasaanganiam. <sup>12</sup>Io angu gheleila sesa voto ta Karisto nau angu gheleila voto sesa ta kapum ateva, tale ia o salana atikirighi, me ugheleei saasakia nannaane. <sup>13</sup>Liuna avalua o me marova malatau anamanama egheleei kapughu eteva ekaakatuu, karika poi aue amene nama malatau, poli arau mene gheleia va ekatuu.

**Pol nongina mene katoa apostolo**

**9** Arooroo tani gheleei voto God eaaulia va masina tani gheleei. Am nannaa va aghi karika apostolo ieghi? Me karika am kilakila va aghi tee aghe tarala Iesu Vauita ia? Poli uunguaaghi am, ang ghe kapuna iem Vau ngepona ateva. <sup>2</sup>Arongona ta marova katoa la annaa va aghi karika apostolo ieghi, me poli am ghe aiesoa tale uunguaaghi, eaapasunga va aghi apostolo ieghi elome ta Vau ngepona ateva.

<sup>3</sup>Nau taumattu ngatoa la aaulia teeieghi va karika apostolo ieghi, aliuliu evalua etaira toko va: <sup>4</sup>Emaamasina va angalua me Banabas angalu ghaa inana me ateo etaimim. <sup>5</sup>Mene katoa

††8:4 Katoa aGrik laghe gheeleei sae mua ghaata kkena aiaavusuvusuena tale tootoo atoa tale aleira ale nikkaua, me laghe vira laolaoa malatau tale maketi va la poli.

apostolo, me kapuna atoa Vau ngepona ateva, me Pita,<sup>‡‡</sup> la kasukasu tee vauseniira atoa, me am angiinginila, me am annaa va angalua karika am mene anginingalu? <sup>6</sup>Ta am annaa va angalua nonga me Banabas ngalu tani uungu tani aisiausia tokatokaalingalua?

<sup>7</sup>Saa ateva soldia euungu me ia emene paepae voto eghelei tani sausi tokatokaane? Saa ateva taumattu epasapasa eutana me etam namanama inaninna? Me saa ateva taumattu eaitoia kiena sip-sipi me etam ropiropi rarumi ssuira?

<sup>8</sup>Karika aghaaulia voto oia tale aalomasangania taumattu, ta inangari nipaopao tee eaaulia. <sup>9</sup>Poli Moses ghe pitila tale inangari nipaopao va, "Nau vulumakao ateva euungu tani ghaa velu viliki raisi, am rau mene ghelei runga paane ateva va karika emene nama isaa o raisi."<sup>¶¶</sup> Koti am annaa va God ghe nannaa vulumakao atoa me ghe auliaala isaa o voto, no? <sup>10</sup>Am anna va ghe aulia etaita nau ghe aulia ngavalua o? Ue! Poli ghe pitila ta aloita emasaanga. Lo ateva esaisai utana ateva me lo ateva epasapasaia, lalu uungu poli lalu annaa va auena lalu ghaa inana tale niuungu o lalu gheelei. <sup>11</sup>Poli ami ghe pasala masi ue ngai elome etaimim kanna Spirit Manga, ami annaa tani mene ghaa ghinna etaimim tani sausiemami.

<sup>12</sup>Marova emasina va katoa la ghaaghaa voto etaimim, aue emasinaaili marova ami tee ami ghaa voto etaimim.

Me karika ami ghe ghaaghaa llo voto erooroo va am tau mae tani sausiemami, me ami ghe maamatua maate ghe mae-mae tale maamaulueaimami poli ami ghe rau ghelei runga masi kiukiuna Karisto. <sup>13</sup>Am kilakilaaili va lo atoa la uungu tale ale manga, la ghaaghaa

aneira inana tale ale manga. Me lo atoa la gheelei sae aiaavusuvusuena la namanama kasina malatau la gheelei aiaavusuvusuena etana. <sup>14</sup>Tale ia o salana atikirighi Vau ngepona ateva ghe aulia ngasarasarakanala va lo atoa la poppooa masi kiukiu, la ghaa aipolipoli tani sausi tokatokaaira ta lo atoa la non-gonongo isaa o masi kiukiu.

<sup>15</sup>Me karika aghe kolomi poila righi voto erooroo va am tau mae tani sausieghi, me karika apitipiti isaa oia inangari poli aghanna va am tau mae righi voto etaghi. Karika aue aghannaa arova amate tee nimaloo me tani velu gheleiaaghi va apoppooa masi kiukiu me karika teva etautau mae aipolipoli. <sup>16</sup>Nau eteva apoppooa masi kiukiu,

karika arooroo tani asaesae nannaaghi, poli niuungu eteva tani ppooa, God ghe taue mae sio etaghi tani gheleia. Aue sesaaili etaghi marova atam gheleia! <sup>17</sup>Marova anim ppooa tale aloanaaghi,

aue aghaa aipolipoli, me marova karika va tale aloanaaghi, aghi nim gheelei niuungu eteva God ghe taue mae sio etaghi, <sup>18</sup>me saa aipolipoli aue aghaa? Uneghi aipolipoli eteva, ia avalua toko va: amasimasi tani ppooa masi kiukiu me karika amene nnaa tani ghaa viliki veu, me karika amene kolomi voto erooroo va aghaa tale uunguaaghi eteva tani ppooa masi kiukiu.

<sup>19</sup>Arongo ta anim tokatoka tale aloanaaghi, me karika teva eaitoieinaghi, ngaghe nim nonginala tau ngai non-gonongo anna ateva tani ghaa oroieili taumattu va la mae ta Karisto. <sup>20</sup>Nau auungu tee aJiu etoa, atokatoka nongina ila, tani ghaaila. Arongona ta aghi atam uusila inangari nipaopao kanna Moses, atokatoka nongina lo ateva euusila inan-

<sup>‡‡</sup>9:5 *Pita* Pol ghe pitila va *Kepas*. Tale inangari nge Aramaik, *Kepas* malloeana va atu. Tale inangari nge Grik, *Pita* tee malloeana va atu.

<sup>¶¶</sup>9:9 Diuteronomi 25:4

gari nipaopao, tani ghaaila. <sup>21</sup> Tale ia o salana atikirighi, nau auungu tee taumattu ngeleka atoa, karika la uunusi inangari nipaopao kanna Moses, atokatoka nongina taumattu ngateva karika euunusi inangari nipaopao. Agheelei evalua o tani ghaa oroi taumattu ngeleka atoa. Karika malloeane va atam nongonongo usila salane God, karika, ta anongonongo usila salane Karisto. <sup>22</sup> Nau atokatoka tee lo atoa karika korokorongana uneira niaikaaia, asease voto la nannaa va karika masina ta tau ngaiesoa ngatoa, karika agheelei isaa o voto, poli arau turungi uneira niaikaaia. Atokatoka nongina tokatokaaira taumattu ngatoa tani pae ase salana kona vaalua aroo tani asaangi righi taumattu. <sup>23</sup> Agheelei isaa o voto masi kiukiu, me ila me aghi aue ami ghaa niarangise kanna God etautaula ta lo atoa la aikaaia tale masi kiukiu.

<sup>24</sup> Am kilakila va lo atoa la aakarati, kateva nonga ia lo ateva aue eghaa aipolipoli. Am ilou esarasarakana tani ghaa aipolipoli. <sup>25</sup> Lo atoa la aakarati tale niaikarati eteae, la aimonomosia tale niaikarati eteae tani ghelei vilikiira esarasarakana tani ilou. La gheelei isaa o llo tani ghaa aipolipoli karika aue toka liu, me ita, ita uungu tani ghaa lo ateva aipolipoli tokatoka liu ia. <sup>26</sup> Liuna avalua o me karika va anim iilou rorrou, me karika va aghaitumari nongina taumattu ngateva ekekkeli tau ngai ssateena ateva me enim tuutumari kuukuu. <sup>27</sup> Karika! Ta agheelei vilikighi tani ghelei va eaimuli tee aloanaaghi, ta God erau ue va atam rooroo tani ghaa aipolipoli, arongona ta aghe poppooa masi kiukiu ta katoa.

### Nipaopao tani rau mene kkaua tootoo goto

**10** Me tee, kapughu etoa, karika aghanna va am kkalua va tuvuita akapa atoa laghe aimuli tee kookoo ngateva<sup>§§</sup> me laghe kasu longotila eRetsi.\* <sup>2</sup> Tale kookoo ngateva me tale paa manu eteva, ila akapaaili laghe ghaala niaasuu me laghe kapuna disaepolola Moses. <sup>3</sup> Ila akapa laghe namanama kateva nonga ia inana God ghe taue lao sio, <sup>4</sup> me laghe ropiropi kateva nonga ia manu eteva God ghe taue lao sio. Me laghe ropiropi tale atu eteva God ghe taue lao sio, ghe kasukasu teeila. Ia o atu eteva Karisto etana. <sup>5</sup> Me oroi lo atoa God karika ghe masimasieinilala, liuna avalua o me laghe matela tale voto ateva karika righi taumattu etokatoka etana, me vilikiira ghe rooa ngakapa seela ia o voto ateva.

<sup>6</sup> Isaa o voto ghe lutula va eaima-tootoongana tani ghelei rungainita tani rau mene tau velu urunguitaniita va elao tale ssavoto nongina ila laghe gheelei. <sup>7</sup> Am rau mene toka kakkaua tootoo atoa nongina katoa etaira. Uru ngai Manga ateva eue va, “Taumattu ngatoa laghe tokatoka sio tani namanama me tani ropi, me laghe tiitingina sae tani loku me laghe gheelei ssavoto.”† <sup>8</sup> Ita rau mene ghelei niailai see atea nongina katoa etaira, me tale kateva nau, ghaluengaulu kotolu airari (23,000) etaira laghe matela. <sup>9</sup> Ita rau mene tootoonga Karisto nongina katoa etaira laghe gheelei, me katu ngatoa laghe katakata amatela. <sup>10</sup> Me am rau mene auliulia nongina katoa etaira laghe gheelei, me ensolo ateva tau ngai tturuu ia ghe uvi ematelala.

§§10:1 Utara Eksodas 13:21

\*10:1 Utara Eksodas 14

†10:7 Eksodas 32:6

<sup>11</sup> Isaa o voto ghe lutula etaira va uneita aimatootoongana, me laghe piti elokoi siola tani aulia kieita lo atoa ita tokatoka tale airuuruu tale kosa ateva. <sup>12</sup> Liuna avalua o me marova am annaa va am tiitingina akorokorongana, am aikinikinita tokatokaaimim ta am rau katu. <sup>13</sup> Karika righi nitootoonga am ghaaghaa va isaa ppae, ta nim isaa aिताu tale mene kasina nitootoonga elutulutu ta taumattu ngakapa atoa. Me God eaaimuli tee inangarina, karika eroroo tani tau velu va am ghaa nampungaili nitootoonga karika am rooroo tani apala. Ta nau am sou nitootoonga, aue eapasunga salana esausiem tani tingina akorokorongana.

**Ninamanama tale tootoo me  
unna ateva ninamanama  
Vau ngepona ateva**

<sup>14</sup> Liuna avalua o, masi kapughu etoa, am kasu vuli uungua nikkaua tale tootoo goto atoa. <sup>15</sup> Asamasama tee taumattu alomasaanga va am tani nna ngamasina va llo aghaaulia koronna o kamena. <sup>16</sup> Nau ita ropiropi tale kapa ateva nau niLosapa, ita kaakaili emasina etana, ita aighui tale raena ateva Karisto. Me nau ita namanama verete isaa o ita aipiria, ita aighui tale vilikina Karisto. <sup>17</sup> Poli ita oroieili ita me kateva nonga ia verete ateva, kateva nonga ia viliki ita, poli ita akapaaili ita namanama tale ie nonga o verete ateva.

<sup>18</sup> Am annaa taumattu tale Israeli etoa: Lo atoa laghe namanama aiaavususuena laghe kaakateva nonga tale ia o nikkaua atea. <sup>19</sup> Malloeane inangarighi isaa avalua toko va aiaavususuena taumattu ngatoo la ghelei lao tale tootoo atoa nim malatau ila, me tootoo goto atoa nim tootoo ila. <sup>20</sup> Ta uneira aiaavususuena lo atoa la tam

aiesoa, la ghelei lao ta raroai etoa, me karika va ta God, me karika aghalona va am aighui tee raroai etoa. <sup>21</sup> Karika am rooroo tani ropi tale unna kapa ateva Vau ngepona ateva me unna tee ateva Satana. Karika am rooroo tani namanama tale tevo alua, unna ateva Vau ngepona ateva me unna ateva Satana. <sup>22</sup> Vaalua? Ita tootoonga tani ghelei Vau ngepona ateva va esessaia? Ita nannaa va ita sarasarakana ita etana?

<sup>23</sup> Katoa etaimim am ue va, “Ami rooroo tani ghelei aloanaimami,” me aghaaulia etaimim va karika va isaa akapaaili voto aue eroroo tani sausiem. Am ue va, “Ami rooroo tani ghelei aloanaimami,” me karika va isaa akapaaili voto eghelei ekorokonganaita. <sup>24</sup> Karika teva emene nnaainia nonga, ta ennaa maamasinaaira mene katoa.

<sup>25</sup> Am nim nama malatau am polipoli tale maketi, me am rau mene kolomi righi nikokkolomi eghelei nannaaimim eghaaghalua va malatau o eaa ekasula. <sup>26</sup> Poli, “Kosa ateva kanna ia Vau palepale me voto akapaaili etokatoka etana.”<sup>‡</sup>

<sup>27</sup> Marova toa taumattu la tam aiesoa la koloam tani laa namanama, me am anna tani usila, am nama saa ateva ngila atokaiela emua etaimim. Am rau mene nnaa va am kolomi righi nikokkolomi eghelei nannaaimim eghaaghalua va malatau o eaa ekasula. <sup>28</sup> Me marova teva eue etaimim va, “Isaa oia malatau laghe gheleila aiaavususuena etana tale tootoo,” am rau mene nama isaa o malatau, mausi ia o taumattu ngateva eaaulia, me poli enannaa va karika masina tani nama. <sup>29</sup> Karika aue va am nnaa va karika masina tani nama, ta ia o taumattu ngateva enannaa va karika masina tani nama. Poli vaalua me vara aghelei aloaloanaaghi, me am

<sup>‡</sup>10:26 Sams 24:1

gheeleei rungainaghi me am muemuea aloaloanaaghi? <sup>30</sup>Marova ausi tani namanama tale ia o ninamanama atea, me akaili emasina sae ta God, vaalua me mene kateva taumattu eaaulia teeieghi inangari sesa tale isaa o voto ngakaili emasinala ta God va anama?

<sup>31</sup>Liuna avalua o me nau am namanama, o am ropi, o saa ateva am gheleia, am ghelei tani tau sae ararina atea God. <sup>32</sup>Am rau mene ghelei taumattu va la katuu: aJiu etoa, aGrik atoa o taumattu ngatoa tale alena ale manga ateva God. <sup>33</sup>Nongina aghi atootoonga tani ghelei voto emasina tale mataira taumattu ngakapaaili tale isaa akapa salana, poli karika anannaainieghi nonga, ta aghanna tani sausi oroi taumattu va la roo tani saanga.

**11** Am usila gheeleiaaghi nongina auusila gheeleia Karisto.

### Salana nikkaua ta taita atoa me vause atoa

<sup>2</sup>Amasimasieinam ta am annainaghi tale voto akapa, me am posoposo parasi voto aghe apasungaala etaimim.

<sup>3</sup>Me aghanna va am tara kila va Karisto uruira ia taita akapaaili etoa, me taita ateva uruna ia vause ateva, me God uruna ia Karisto. <sup>4</sup>Isaa akapaaili taita elooloo sae me eaaulia inangari God ghe tau lao sio, me la akou uruira, karika la oneoneaa uruira. <sup>5</sup>Me vause atoa la looloo sae me la aulia inangari God ghe tau lao sio, me karika la akou uruira, karika la oneoneaa uruira; nonginaaili va la ghaagali uruira. <sup>6</sup>Marova vause ateva etam akou uruna ateva, emaamasina arova ghele ggali uruna ateva, me poli epaapalata tani sunapi etukuna o tani ggali velu uu nguruna, eakou uruna ateva. <sup>7</sup>Me taita ateva erau mene akou uruna ateva, poli ia eaa-

pasunga taataraane me maamasinaane God. Me vause ateva eaapasunga maamasina taitanna ateva. <sup>8</sup>Poli karika va God ghe gheleila taita ateva tale vause ateva, ta God ghe gheleila vause ateva tale taita ateva, <sup>9</sup>me karika God ghe gheleila taita ateva mausi vause ateva, ta God ghe gheleila vause ateva mausi taita ateva. <sup>10</sup>Liuna avalua o me mausi ensolo atoa<sup>†</sup> me vause ateva eakou uruna ateva tani apasunga va ia matuutuliena ia.

<sup>11</sup>Ta Vau ngepona ateva, vause ateva karika ie nonga etokatoka, me taita tee ateva karika ie nonga etokatoka. <sup>12</sup>Poli nongina vause ateva, God ghe gheleila ta taita ateva, taita ateva ghe lutula ta vause ateva, me voto akapa ghe mae sio ta God. <sup>13</sup>Am annaa va masina ta vause ateva elooloo sae ta God, me karika eakou uruna ateva? <sup>14</sup>Tale gheeleiaaita, ita kilakila va marova taita ateva aluse uu nguruna aue palata, <sup>15</sup>me vause ateva uu nguruna aluse, aimoluluna ia tani ghelei emasimasia, poli uu nguruna aluse God ghe tau lao sio etana tani akou uruna ateva. <sup>16</sup>Marova teva eanna tani aissakeana teeieghi tale isaa oia inangari, eroo tani kila va ami, ami tam aimuli tee mene kasina asease salana tani kkaua, tee me mene kasina alena ale manga God.

### Unna ninamanama atea Vau ngepona ateva

<sup>17</sup>Tale isaa o inangari karika aghanna tani asaesae gheleiaaimim, poli nau am veluvelu eitaua, am gheleei oroieili voto sesa me karika am gheleei voto masina. <sup>18</sup>Aitiutiueteva voto, aghe nongola va nau am maemae aitauaa tani kkaua, karika am kaakateva nonga, me aghaiesoa va isaa oia inangari anongonongo mala koronna. <sup>19</sup>Koti ghele masina arova am ghelei aipolaii, me aue

<sup>†</sup>11:10 Tale nannaaira aJiu etoa, nau nikkaua, ensolo atoa tee la tokatoka.



ita tara va see etani uusila gheeleiaane God. <sup>20</sup>Nau am maemae aitaau tani namanama tale Losapa ateva, karika va ia o ninamanama atea am gheeleia va unna ia Vau ngepona ateva, <sup>21</sup>poli nau am namanama, karika am roo tani toi mene katoa, ta kateva kateva etaimim avuemue tani ghaa anna inana. Liuna avalua o me katoa la maamalo me lo atoa la tuvutuvu tani namanama me ropi, nannaaira eaaisavisavila. <sup>22</sup>Vaalu? Karika righi aleimim va am toka etana me am namanama me am ropi? Vaalu me karika am oneonea kapuna taumattu God, me am mae aapalata lo atoa karika righi peiira? Saa ateva aue aghaulieinia etaimim? Am anna va agharueinam tale isaa oia voto? Karika poi!

<sup>23</sup>Polii saa llo voto aghe ghaala ta Vau ngepona ateva ngaghe apasungaala ta ngetaimim. Isaa avalua toko va: Vau eteva Iesu, tale ia o vo ngateva laghe tauela ta tau ngai ssateena atoa, ghe ghaala verete, <sup>24</sup>me ghe kaili emasina saela ta God, me ghe pirila, me ghe uela va, "Isaa oia verete malataughu ngatautau aatu mausiimim. Am ghelei isaa o voto tani nnainaghi." <sup>25</sup>Tale ie nonga o salana atikirighi, vara laghe ruula tani namanama me ghe ghaala kapa ateva, me ghe uela va, "Ia oia kapa ateva eaaimatoonga raeghi eteva, egheelei lo ateva inangari niaippooa ngaitaua oia. Nau ekapa atoa nau am ropia, am ghelei isaa o voto tani nnainaghi." <sup>26</sup>Tale nau ekapaaili, nau am nama ia oia verete ateva me am ropi ia oia kapa ateva, am aaulia ngaotu matemateaane Vau eteva lomosina ta esio.

<sup>27</sup>Liuna avalua o me see unama verete me uropi tale unna kapa ateva Vau ngepona ateva tale salana atikirighi etam oneonea Karisto, ugheelei voto sesa tale vilikina me raena ateva Vau ngepona ateva. <sup>28</sup>Taumattu ngateva etani tara mua maamauluaane, me auena

enama verete me eropi tale kapa ateva. <sup>29</sup>Polii lo ateva enamanama me eropi tale kapa ateva, me karika eoneonea vilikina Vau ngepona ateva, enim tutturungi maamauluaane. <sup>30</sup>Isaa avalua o me oroi lo atoa elome etaimim karika la sarasarakana me la iisiki, me katoa ngila ghe asekanuela. <sup>31</sup>Marova ita tara akasina mua maamauluaaita, God karika aue eturungita. <sup>32</sup>Nau Vau ngepona ateva egheelei niaisakei etaita, eparuparuta nongina aliki etoa. Liuna avalua o me karika aue ita ghaa sesa aipolipoli eitaua tee taumattu tale kosa ateva oia.

<sup>33</sup>Liuna avalua o, kapughu etoa, me nau am mae aitaau tani namanama, am toi mene katoa. <sup>34</sup>Me see emaaloo enamanama tanguena, erau alutu righi niaisakei etaimim nau am veluvelu eitaua poli karika eoneonea vilikina ateva Karisto. Me tale mene kasina voto, aue aghaulia ngamasina etaimim nau amae.

### Asease niuungu Spiriti eteva enim tautau mae

**12** Kapughu etoa, tale kanna asease niuungu Spiriti eteva enim tautau mae, karika aghalona va aloimim etam masaanga. <sup>2</sup>Am kilakila va nau am ghe tokatoka va taumattu ngeleka am, am ghe tau vella maamauluaaimim tani usila oroi salana tani kkaua tootoo atoa karika la samasama. <sup>3</sup>Isaa avalua o me aghaulia etaimim va karika teva eaippooa tale aisausia kapuna Spiriti eteva God erooro tani ue va, "Nikkasikiena esae ta Iesu," me karika teva eroo tani ue va, "Iesu Vau ngepona ia," arova Spirit Manga ateva karika emuemueinia.

<sup>4</sup>Oroi asease niuungu Spirit Manga ateva etautau mae etaita, me kateva nonga ia Spiriti eteva. <sup>5</sup>Me oroi asease niaisausi, me kateva nonga ia Vau ngepona ateva. <sup>6</sup>Me oroi asease salana tani ghelei

niuungu, me kateva nonga ia God ateva etautau sarasarakana tani ghelei isaa o niuungu.

<sup>7</sup> God eaapasunga kapuna Spiriti eteva ta kateva kateva tani sausi tau ngaiesoa ngakapa atoa tale ale manga ateva. <sup>8</sup> Ta kateva taumattu, Spiriti eteva etautau rooroaala tani aulia ngamasalika alomasaangania God. Ta mene kateva, ia nonga o Spiriti eteva emene tautau inangari pasu tale alomasaanga. <sup>9</sup> Ia o Spiriti eteva etautau niaiesoa ta kateva, me ta mene kateva, etautau sarasarakana tani ghaa velu isiki. <sup>10</sup> Ta mene kateva, etautau sarasarakana tani ghelei mirikolo atoa, ta mene kateva uungua tani aulia inangarina God, ta mene kateva etautau alomasaanga tani kila va voto kanna kapuna Spiriti eteva God o karika, me ta mene kateva etautau alomasaanga tani aippooa tale mene kasina ase niaippooa kanna Spiriti eteva, me ta mene kateva etautau lao alomasaanga tani aulia ngamasalika malloeane isaa o ase niaippooa kanna Spiriti eteva. <sup>11</sup> Kateva nonga ia Spiriti eteva, ia eghelei ekapaaili isaa o niuungu, me tale aloanaane etautaula ta kateva kateva taumattu.

### **Kateva nonga ia vaulanina ateva Karisto me oroi voto etana**

<sup>12</sup> Vaulaniita ateva kateva nonga ia, me oroi voto etana. Arongona ta oroi voto etana, me isaa akapaaili o voto, eghelei va kateva nonga ia vaulaniita ateva. Vaulanina ateva Karisto ia avalue ia o: oroi taumattu la tokatoka etana. <sup>13</sup> Poli ita akapaaili ita ghe ghaala niaasuu ta kateva nonga ia Spiriti eteva, me ghe gheleitalla va kateva nonga ita. Arongona ta katoa aJiu ila me katoa karika aJiu ila, me tau ngai uungu etoa karika la tokatoka tale aloanaaira, me lo atoa la tokatoka tale aaloanaaira, ita akapaaili God ghe tau mae sio kateva nonga ia Spiriti eteva etaita.

<sup>14</sup> Vaulaniita ateva karika God ghe gheleiela va kateva nonga ia, ta oroi voto eaipatola etana. <sup>15</sup> Marova kekem eue va, “Karika va aghi tee tale ia o vaulani eteva, poli karika va nima ieghi,” nau eaulia ngavalua o, karika eghelei rungainia va karika va ie tee tale ia o vaulani eteva. <sup>16</sup> Me marova talinga atelange eue va, “Karika va aghi tee tale ia o vaulani eteva, poli karika va mata ieghi,” nau eaulia ngavalua o, karika eghelei rungainia va karika va ie tee tale ia o vaulani eteva. <sup>17</sup> Marova ia akapa vaulaniita ateva mata ia, karika aue roo tani nongonongo, me marova ia akapa vaulaniita ateva talinga ia, karika aue roo tani ngusungusu. <sup>18</sup> Me karika, ta koronnaaili va God ghe atoka aitauala isaa akapaaili voto tale vaulaniita ateva tale salana ghe annala va masina. <sup>19</sup> Me marova vaulaniita ateva nim nima ia nonga, karika aue ghele teva vaulaniita. <sup>20</sup> Me isaa o voto oroi eaipatola etana, me ekaakateva nonga ia vaulaniita ateva.

<sup>21</sup> Mata ateva karika erooro tani ue ta nima atelange va, “Karika rigi uunguaghi etam,” me uruita ateva karika eroo tani ue ta kekeita atelange va, “Karika rigi uunguaghi etam.” <sup>22</sup> Kasina voto tale vaulaniita ateva saghuighuina. Me karika ita rooro tani maulue arova isaa o voto karika. <sup>23</sup> Me llo voto tale vaulaniita ateva ita anna va karika masina taataraane, ita aitara ngamasinaaili, me lo ateva voto tale vaulaniita ateva aisuliaane ia, ita kaarasi tani aisuliainia, <sup>24</sup> me mene kasina voto tale vaulaniita ateva, karika ita mene nngaili tani aisulia. Ta God ghe atoka aitauala vaulaniita ateva, me ghe taula namuu nioneoneea ta llo voto karika eroo tani ghaa nioneoneea. <sup>25</sup> Isaa avalua o me ita rau mene ghelei rigi niaipolaa tale vaulaniita ateva, ta isaa akapaaili asease voto tale vaulani-

ita ateva la aaitaraa mene kateva. <sup>26</sup>Marova kateva voto tale vaulaniita ateva emammarikana, isaa akapaaili voto tale vaulaniita ateva aue mmarikana aitaue teeia. Me marova kateva voto tale vaulaniita ateva eghaa nioneoneaa, isaa akapaaili voto tale vaulaniita ateva aue emasimasi.

<sup>27</sup> Am akapaaili vaulanina am Karisto, kateva kateva etaimim eaiapatola tale vaulanina ateva Karisto. <sup>28</sup> Elome tale ale manga, God ghe atokala taumattu ngatoa tani ghelei niuungu. Ghe atoka akasinala apostolo atoa, aiaaghalua atoa propete atoa, me aiaakotonna atoa tau ngai apasunga ngatoa, vara me lo atoa la gheelei mirikol, me lo atoa la sarasarakana tani ghaa velu isiki, me tani sausi mene katoa, o tani mue-mueainila, me tani aippooa tale mene kasina ase niaippooa kanna Spiriti eteva. <sup>29</sup> Am annaa va ila akapaaili apostolo ila me propete ila me tau ngai apasunga ila? Me am annaa tee va ila akapaaili la roo tani ghelei mirikol? <sup>30</sup> Vaalua ila akapaaili la rooro tani ghaa velu isiki? Me ila akapaaili la roo tani aippooa tale mene kasina ase niaippooa kanna Spiriti eteva? Me ila akapaaili la roo tani aulia ngamasalika malloeane isaa o ase niaippooa kanna Spiriti eteva? <sup>31</sup> Aghaloannaaili va am tani alona lo ateva niuungu Spirit Manga etautau emae esaasausi tau ngaiesoa ngakapa atoa. Me aghaapasunga etaimim masi salana elaulau mene kasina salana.

### Niaielousi eteva

**13** Marova Spirit eteva etautau mae sarasarakana me aghaippooa tale samasamaaira taumattu ngatoa me ensolo atoa, me karika aghaielousi, aghi nongina veloo ateva o karoiroi etoa la

nim aangari. <sup>2</sup> Marova muenna ieghi tani aulia inangarina God, me aroo tani kila isaa akapaaili voto me voto aisuliaane kanna God, me marova kalughu niaiesoa eroro tani ghaa velu motouru etoa, me karika aghaielousi, aghi nim lao ieghi. <sup>3</sup> Marova atoa ekapa lao peighi ta lo atoa karika tue peipeina ila, me vilikighi eghaa maate me aghele tau sae nannaaghi<sup>§</sup>, me karika aghaielousi, karika aue aghaa rigghi voto.

<sup>4</sup> Taumattu ngateva eaielousi etam sessai parasia, me taumattu ngateva eaielousi egheelei masi voto, me karika etaatara ssaii, me karika eaiissakeanna, me karika etautau sae nannaane. <sup>5</sup> Karika eamakatakata, me karika enannainia nonga, karika eaiiuvu, me ekakkalua voto ang ghe lao sio. <sup>6</sup> Taumattu ngateva eaielousi karika emasimasia ssavoto, ta emaamasia voto ghulughuluena. <sup>7</sup> Taumattu ngateva eaielousi karika esio asoasooa, me karika eruuruu tani aiesoa, ta eaatoka tuutulina ta God, me etokatoka akorokorongana tale sesa nau.

<sup>8</sup> Niaielousi eteva karika ekaakatuu. Ungua tani aulia inangarina God aue ekapa, me uungua tani aippooa tale mene kasina ase niaippooa kanna Spiriti eteva aue ekapa, me uungua alo-masaanga ateva tee aue ekapa. <sup>9</sup> Malloeane isaa avalua toko va aalomasanganiaaita karika ekilakila akapa voto, me muumuennaanita tani aulia inangarina God tukuna. <sup>10</sup> Me nau ghulughuluena emae, voto tukuna aue ekapa. <sup>11</sup> Nau aliki ieghi, aghe aippooa nongina aliki eteva, me nannaaghi nongina aliki eteva, me aalomasanganiaaghi nongina aliki eteva. Nau aghe namuula, aghe tau lange siola gheeleiaaira aliki etoa emuli etaghi. <sup>12</sup> Ghaine karika ita kilak-

<sup>§</sup>13:3 *vilikighi eghaa maate me aghele tau sae nannaaghi* Katoa uru ngai laghe pitila, laghe uela va arova atoa velu vilikighi eata tani ghelei aiaavusuvusua

ila amasina voto kanna God, nongina karika ita taatara amasina voto tale ghalaasi eteva karika masalike taataraane, me auena ita kila amasina, nongina va ita taatara matane God. Ghaine akilakila kasina nonga voto kanna God, me auena akila akapaaili, nongina God ghe kilaieghila.

<sup>13</sup> Me ghaine kotolu voto etokatoka: Niaiesoa, nitaatara lao emua, me niaielousi. Me lo ateva namuu ia etairotolu, niaielousi eteva.

### **Tani aulia inangarina God me asease niaippooa ngatoa kanna Spiriti eteva**

**14** Am usila salana tani aielousi, me am aloannaaili niuungu kanna Spirit Manga enim tautau mae. Me mata ngemua ateva tale isaa o niuungu, niaulia inangarina God. <sup>2</sup> Ta lo ateva epoppooa tale mene kasina ase niaippooa kanna Spiriti eteva, poli karika teva taumattu alona emaamasaanga llo eaulia, karika esamasama tee taumattu, ta ie nonga me God, ta Spirit Manga ateva eaasaoki etana tani aulia voto aisulianaane. <sup>3</sup> Ta lo ateva epoppooa inangarina God eaasararakana taumattu, me eaippooa ngaisausia tani aulia inangari nimasimasi etaira. <sup>4</sup> Me lo atoa la aippooa tale mene kasina ppae ase niaippooa kanna Spirit eteva, la saasausila nonga, me ta lo atoa la poppooa inangarina God, la saasausi ekapa taumattu ngatoa tale ale manga. <sup>5</sup> Aghalonaaili va arova am akapaaili am ghele aippooa tale kasina ppae ase niaippooa kanna Spiriti eteva. Me atani annaaili va am ppooa inangarina God. Marova karika teva tani aulia ngamasalika saa ateva la aulieinia, lo atoa la nim poppooa tale mene kasina ase niaippooa kanna Spiriti eteva karika la saasausi ale manga ateva. Liuna avalua o me lo atoa la poppooa inangarina God, ila epona ta lo atoa la

poppooa tale mene kasina ase niaippooa kanna Spiriti eteva.

<sup>6</sup> Kapughu etoa, marova amae taraiem me appooa tale mene kasina ase niaippooa kanna Spiriti eteva, me karika aghaaulia ngamasalika saa malloeana, vaalua aue asausiem? Ta atani aulia etaimim saa ateva God ghe apasungainiela etaghi, me atuu aatu rigi alomasaanga me appooa inangarina God tani loeam. <sup>7</sup> Nim nongina voto ateva karika rigi maulue etana me eghelei niaangari, nongina flut ateva me gita ateva, marova uneirarua niaangari karika masalike, karika aue ukila va saa kkinari eteae la kaukua. <sup>8</sup> Me marova taue ateva karika masalike aangariaane, see aue aimonomosia tale niaiuvu eteae?

<sup>9</sup> Am tee am avalua o. Marova am aippooa tale mene kasina ase niaippooa taumattu ngatoa karika la kilakila, vaalua taumattu aloira aue masaanga saa ateva am aulieinia? Ta inangari aue nim peisaane. <sup>10</sup> Oroieili ase nisama tale kosa ateva oia karika isaa aitaau. Isaa o ase nisama, isaa akapaaili tue malloeana. <sup>11</sup> Marova teva taumattu ghele sama teeieghi me karika akila malloeane inangari eaaulia, aghi ativuu ieghi tale ia o taumattu ngateva eaippooa, me ie tee ativuu ia etaghi. <sup>12</sup> Liuna avalua o, poli am aloannaaili niuungu Spirit Manga ateva enim tautau mae, am tani kolomi tani ghaa llo niuungu erooro tani asarasarakana ale manga ateva.

<sup>13</sup> Liuna avalua o me lo ateva eaippooa tale mene kasina ase niaippooa kanna Spiriti eteva etani looloo sae tani ghaa alomasaanga tani aulia ngamasalika isaa o inangari. <sup>14</sup> Marova alooloo sae tale kateva ase niaippooa kanna ia Spiriti eteva, kapughu spiriti eteva elooloo sae, me nannaaghi karika ekilakila saa ateva aghaaulieinia. <sup>15</sup> Saa ateva aue agheleia? Aue alooloo sae tale kapughu spiriti eteva, me aue alooloo sae tee ta nan-

naaghi, me aue akkinari tee kapughu spiriti eteva, me aue akkinari tee ta nannaaghi. <sup>16</sup>Marova utau sae God tale kapum spiriti eteva, lo atoa aloira karika emaamasaanga, karika la roo tani ue va, “Koronna,” tale unem nilooloo sae tani kaili emasina, poli karika la kilakila saa ateva uaaulienia. <sup>17</sup>Aue uroo tani kaili emasina sae ta God tale masi salana, me ta mene kateva taumattu karika ange ghaala niaissausi.

<sup>18</sup>Akaakaili emasina ta God ta alaulau ekapaailiem tani aippooa tale asease niaippooa kanna Spiriti eteva. <sup>19</sup>Me tale ale manga, aghaaloanna tani aulia ghalima tuku mata nginangari aloghu emamasaanga tani apasunga ta katoa, me vulla tani aulia oroieili airari mata nginangari etoa tale mene kasina ppae ase niaippooa kanna Spiriti eteva.

<sup>20</sup>Kapughu etoa, nannaaimim erau mene nongina aliki etoa. Tale uunguaa ssavoto, am tani nongina raaraina arighi aliki karika eannaa ssavoto. Me isaa o voto aghe auliaala etaimim, va nannaaimim etani nongina namu ngatoa taumattu. <sup>21</sup>Laghe pitila tale Uru ngai Manga ateva va,

“Tale lo atoa la poppooa tale asease nisama,

me ta ativuu etoa,  
aue appooa ta kapughu etoa,  
me karika poi aue la nongoaghi,”\*\*  
ghe uela Vau ngepona ateva.

<sup>22</sup>Ase niaippooa kanna Spiriti eteva, aimatootoongana ia ta lo atoa karika la aiesoa, me karika ta lo atoa la aimulitee Vau ngepona ateva. Me tani aulia inangarina God, aimatootoongana ia ta lo atoa la aiesoa, me karika ta lo

atoa karika la aiesoa.<sup>††</sup> <sup>23</sup>Liuna avalua o me marova taumattu ngakapaaili etoa la velu eitaua tale ale manga me la aippooa tale ase niaippooa kanna Spiriti eteva, me marova toa tau ngaiesoa karika laghe ghaala niasuu o taumattu karika la aiesoa la kupi sso, aue la nongo me aloira karika aue masaanga, aue la ue va ngam veeveela. <sup>24</sup>Me marova teva tau ngaiesoa karika ghe ghaala niasuu o teva taumattu karika eaiesoa ekupi sso, me enongo va am akapaaili am poppooa inangarina God, aue etara kila va ia tau ssavoto ia, me voto am aulia egheelei niaisakei tale maamauluaane, <sup>25</sup>me aue etara kila voto aisuliaane elome tale urunguitanina. Liuna avalua o me aue eturru sio euu me ekkaua God, me aue eue va, “Koronnaaili God etokatoka aitaua teeiem!”

### Salana tale masi nikkaua

<sup>26</sup>Saa ateva ita mene aulieinia, kapughu etoa? Nau am mae aitaua, kateva kateva etaimim eaimonomosia voto aue esausi ekapaailiem, kateva emaeaa unna kkinari eteae, me kateva eaimonomosia tani apasunga, me kateva eaulia ngaotu inangari aisuliaane kanna God, me kateva eaippooa tale mene kasina ppae ase niaippooaa kanna Spiriti eteva, me ia, o mene kateva ekiri malloeana isaa o ase niaippooaa. Isaa akapaaili o voto am tani ghelei tani akorokorongana ale manga ateva. <sup>27</sup>Marova toa la anna tani aippooa tale mene kasina ase niaippooaa kanna Spiriti eteva, enim ghalua o kotolu nonga. Me kateva mua eaippooaa me auena mene kateva, vara me mene kateva ekiri

\*\* 14:21 Aisaea 28:11-12

†† 14:22 Pol ghe annaa nau ta Aisaea, samasamaira Asiria ngatoa, aIsraeli etoa karika laghe kilakila, me ghe aimatoonga niaisakei kanna God. Liuna avalua o me ghe aulia va ase niaippooa kanna Spiriti eteva eaimatoonga niasakei ta lo atoa karika la aiesoa. Tani nongo inangarina God eaimatoonga va tau ngaiesoa ngatoa karika la tokatoka tale niasakei kanna God.

malleeana tani ghelei emasalika isaa o ase niaippooaa. <sup>28</sup>Marova karika teva tani kiri malleeana isaa o ase niaippooaa, lo ateva eaippooaa tale ase niaippooaa kanna Spiriti eteva enim matua atoka me eaippooaa nonga ta ngetana me ta God.

<sup>29</sup>Ghalua o kotolu propete la aulia inangarina God, me katoa la tani nongo amasina tani nnaa va inangari emae-mae ta God o karika. <sup>30</sup>Me marova inangari eteva kanna ia God ngemae sio ta teva propete etokatoka, aitiutiueteva propete eaippooa eruu tani sama. <sup>31</sup>Poli am akapaaili am roo tani aulia inangarina God, kateva mua, vara me mene kateva. Tale ia o salana atikirighi, am akapaaili aue am ghaa alomasaanga me am aisausieinam. <sup>32</sup>Poli propete atoa la roo tani ruu tani aippooa me la tau velu mene katoa tani propete la sama. <sup>33</sup>Poli God karika va ia aisavisavilana ia ta Goto ia tale luei.

Nongina katoa ale manga, <sup>34</sup>vause atoa la rau mene toka samasama tale ale manga. Karika am mene tau vella va la toka aisamaai, ta la matua atoka, nongina inangari nipaopao eaulia. <sup>35</sup>Marova la anna tani kila voto, la rooroo tani kolomi taitanniira atoa tanganueira, poli karika masina ta vause ateva tani toka samasama tale ale manga.

<sup>36</sup>Vaalua, inangarina ateva God ghe tiuaala etaimim? Me ang ghe tokala nonga etaimim? <sup>37</sup>Marova teva eannaa va ia propete ia, me Spiriti eteva etokatoka etana, aue ekila va saa ateva apitipiti emae etaimim, Vau palepale ghe sungieghila tani gheleia. <sup>38</sup>Marova teva etam aloanna isaa o voto, tau veluela me enim toka.

<sup>39</sup>Isaa avalua o, kapughu etoa, me am tani alonaaili tani aulia inangarina God,

me am rau mene ghelei runga kateva tani aippooa tale mene kasina ase niaippooa kanna Spiriti eteva. <sup>40</sup>Ta voto akapaaili am tani ghelei emasina me tale salana ghlughuluena.

### Tottotuaane Karisto

**15** Kapughu etoa, aghanna tani mene aulia etaimim masi kiukiu aghe ppooaala etaimim. Ngam ghe aiesoaala me ngam ghe atokala tuutuliimim etana. <sup>2</sup>Poli ngam ghe aiesoaala isaa o masi kiukiu, ngam ghe saangala, marova am poso parasi inangari aghe ppooaala etaimim. Arova karika, aue aikaaiaaimim aue enim peisaane.

<sup>3</sup>Saa ateva aghe ghaaiela, aghe tau aatu sio etaimim va mata ngemue ia, va Karisto ghe matela tale kaluita ssavoto, nongina Uru ngai Manga ateva eaaulia; <sup>4</sup>va laghe kaieiniela me ghe mene totula tale aiaakotonna ateva nau, nongina Uru ngai Manga ateva eaaulia. <sup>5</sup>Ghe aotuotula ta Pita<sup>‡‡</sup>, vara me apostolo kasangaulu ghalua (12) laghe taraiela. <sup>6</sup>Emulina ghe aotuotula ta lo atoa oroiaaira elaulau ghalima ai (500), oroi lo atoa etaira ila tokatoka maulue ila, me katoa ngila ghe asekanuela. <sup>7</sup>Ghe aotuotula ta Jeimis, vara me ta ila akapa apostolo atoa. <sup>8</sup>Airuuruu etaira akapa ghe aotuotula etaghi, nongina va lo ateva ghe tam ghaa nauna tani lutu.

<sup>9</sup>Aghi airuuruueili ieghi ta apostolo atoa, karika masina tani koloaghi va apostolo ieghi, poli aghe gheelei saasakia alena ale manga ateva God. <sup>10</sup>Me tale maamasinaane ateva God, ngaghe aghi evalua oia. Maamasinaane ateva etaghi karika ghe nim peisaanela, poli auungu aanasaaili ta ila akapa disaepolo atoa, me karika va aghi,

<sup>‡‡</sup>15:5 *Pita* Pol ghe pitila va *Kepas*. Tale inangari nge Aramaik, *Kepas* malleeana va atu. Tale inangari nge Grik, *Pita* tee malleeana va atu.

ta maamasinaane ateva God etokatoka aिताua teieghi. <sup>11</sup>Liuna avalua o me, marova aghi o mene katoa apostolo laghe ppooala etaimim, ami ekapaaili ami ghe poppooa isaa o masi kiukiu, me am ghe aikaaiaala etana.

### Aue ita totu tale nimate

<sup>12</sup>Me marova ami ppooa va Karisto ghe totula tale nimate, vaalua me katoa etaimim la ue va taumattu matena karika aue la totu? <sup>13</sup>Marova taumattu ngatoa matena ila la tam totu, Karisto ghe tam totula. <sup>14</sup>Marova Karisto ghe tam totula, unemami nippooa nim peisaane, tee me uneimim niaikaaia. <sup>15</sup>Marova koronna va matena atoa la tam totu, God karika ghe totula Karisto. Me ami apostolo atoa ngami aikamea tee God, poli ami ue va God ghe totula Karisto tale nimate. <sup>16</sup>Poli marova matena atoa la tam totu, Karisto karika ghe totula. <sup>17</sup>Me marova Karisto ghe tam totula, uneimim niaikaaia nim peisaane, me tee kaluimim ssavoto karika ghe kapa. <sup>18</sup>Me lo atoa la ghe aikaaia ta Karisto me laghe matela, ang ghe rau laalaa liulala. <sup>19</sup>Marova ita aatoka tuutuliita ta Karisto tale ie nonga oia maulue ateva, aalousiusiaaita namungaili ta mene katoa taumattu.

<sup>20</sup>Me koronna va Karisto ghe totula tale nimate, mata ngemue ia tale lo atoa laghe matela. <sup>21</sup>Poli kateva taumattu ghe gheleila me nimate ateva ghe mae sio, nitotu eteae tale nimate tee ghe mae sio tale kateva taumattu. <sup>22</sup>Poli mausi Adam ita akapaaili aue ita mate, me mausi Karisto aue ita maulue. <sup>23</sup>Tale nauria taumattu ngatoa tani totu, ila akapaaili aue la totu me la maulue. Karisto ghe aitiutiula, me nau emene mae, lo atoa kapuna ila aue la mene totu.

<sup>24</sup>Vara me eturungi ekapaaili tau ngai toitoi etoa me lo atoa matuutuliena ila me sarasarakana atoa, me airuuruu aue emae, me aue etau lao ararimangalina ateva ta Tamane ta God. <sup>25</sup>Poli God ghe nnaala va Karisto aue aitoia voto akapa nongina kingi eteva, lomosina ta nau God etau sio ila akapaaili tau ngai ssateena atoa euu. <sup>26</sup>Me airuuruu eteva tau ngai ssateita aue turungia, nimate ateva. <sup>27</sup>Poli Uru ngai Manga ateva eue va, God “ghe tau lao sio sarasarakana tale Natuna ateva Taumattu ngateva tani aitaraa voto akapaaili.”<sup>f</sup> Nau eue va “isaa akapaaili voto,” karika va God tee epona liu, ia o ghe taula voto akapaaili ta Karisto tani aitoia. <sup>28</sup>Nau isaa akapaaili o voto ange tokala tale sarasarakaniaane Natuna God, ia aue emene toka euu tale sarasarakaniaane Tamane, poli ia ghe taula isaa akapaaili voto etana tani aitoia. Me God aue eaitara ngakapaaili isaa akapa voto.

<sup>29</sup>Marova karika teva nitotu tale nimate, taumattu ngatoa laghe ghaala niasuu poli la taatara lao emua ta nau eteva matena atoa aue la totu, saa ateva aue la gheleia? Vaalua me la ghe ghaala niasuu marova matena atoa karika aue la totu? <sup>30</sup>Me ta ngetaimami, vaalua me ami aatokaiemami tale nivakovako nau ekapaaili? <sup>31</sup>Kapughu etoa, asousou nimate nau ekapaaili! Am rooro tani kila va isaa o inangari koronna, nongina koronna va atautau sae nannaaghi tale saa ateva Iesu Karisto ghe gheleila etaimim. <sup>32</sup>Marova aghe aiuvi teela sesa taumattu ngatoa ila nongina ueli ghaata kkena atoa ePises me karika aghe taatara lao tale nitotu tale nimate, saa ateva aue aghaaia? Marova taumattu etam totu, “Ita roo tani namanama me ita ropi,

<sup>f</sup>15:27 Sams 8:6

poli nimana aue ita mate.”§§

<sup>33</sup> Am rau mene aikameainam: “Am rau mene aipatola tee sesa taumattu ngatoa, poli aue la ghelei saasakia masi gheleiaaimim.” <sup>34</sup> Am mene mae tale masi ninannaa, me am ruu tani ghelei ssavoto. Aghaaulia ngavalua o poli katoa etaimim karika am kilakila God. Aghaaulia ngavalua o tani apalataiem.

### Nau ita totu vaulaniita aue isaa ppae

<sup>35</sup> Me katoa aue la kolomi va, “Vaalua aue taumattu ngatoa matena ila la totu? Me vaulaniira aue vaalua?” <sup>36</sup> Am rau mene alokapakapa. Saa ateva am pasapasaia karika erooro tani mauhue, ta etani mate me auena epinosa. <sup>37</sup> Me nau upasapasaia, karika upasapasa namu ngateae ai, ta upasapasa katu ue ngai nongina katu kone me mene kasina voto. <sup>38</sup> Me God etautaula vaulanina ange annala va etauela etana, me kateva kateva tana katu ue ngai epiipinosa tale katuna ateva. <sup>39</sup> Isaa akapaaili vaulani karika va isaa aitaua. Taumattu ngatoa uneira kateva ase vaulani, me kko atoa uneira kateva, me ghaata kkena atoa uneira kateva, me ghila atoa uneira ateva ppae. <sup>40</sup> Vaulani ngelo marase kasina, me kasina, vaulani tale kosa ateva oia. Vaulani ngelo marase ateva, masi aimolumoluna isaa ppae tale masi aimolumoluna vaulani tale kosa ateva. <sup>41</sup> Sinaka ateva unna kateva ase aimolumolu, me ulana ateva unna kateva, me katto atoa uneira ppae tani aimolumolu, me elome tale kateva kateva katto, aimolumoluiira isaa ppae tale mene kasina katto.

<sup>42</sup> Aue nim nongina avalua o nongina matena atoa nau la totu. Vaulani eteva laghe kaieiniela tale kosa nongina la pasapasa katu ue ngai eteva, aue mauu, me

nau etotu tale nimate, karika aue mene mate. <sup>43</sup> Ia o vaulaniita ateva karika masina ia, me karika sarasarakana ia, aue emasina me esarasarakana nau etotu. <sup>44</sup> Ia o vaulaniita ateva laghe kaieiniela, vaulani tale kosa ateva oia, me nau ita totu aue ita totu eitaua tee vaulani ngepona liu eteva. Vaulaniita ateva masina ia ita tokatoka teeia ghaine tale kosa ateva oia aue ekapa, me lo ateva vaulaniita aue ita totu teeia, aue masina tani toka epona liu.

<sup>45</sup> Laghe pitila tale Uru ngai Manga va, “Aitiutiu eteva taumattu ta Adam God ghe gheleielia me ghe mauhue,”\* me Karisto, la kolokola va airuuruu eteva Adam, ia spiriti ia etautau mauhue. <sup>46</sup> Lo ateva ghe mae akasina sio, vaulani tale kosa ateva ia, vara me mina vaulani ngepona liu eteva, Karisto etana, mauhue ia. <sup>47</sup> Ta aitiutiu eteva taumattu ghe mae sio tale au tale kosa ateva oia, me aiaaghalua ateva taumattu, Karisto etana, taumattu ngepona liu ia. <sup>48</sup> Taumattu tale kosa ateva oia, vaulaniita ateva nongina taumattu ngateva God ghe gheleielia tale au tale kosa ateva oia, me taumattu ngepona liu etoa, vaulaniira nongina taumattu ngepona liu eteva. <sup>49</sup> Nongina ghaine ita nongina taumattu tale kosa ateva, liuna avalua o me auena aue ita nongina taumattu ngepona liu eteva.

<sup>50</sup> Kapughu etoa, aghaaulia etaimim va malatauita ateva me raeita ateva karika lulu rooro tani kupi sso epona liu. Karika ita rooro tani toka epona liu tee vaulaniita ateva erooro tani mate, poli karika righi nimate epona liu. <sup>51</sup> Am nongo, aghaaulia etaimim voto aisuliaane: Karika va ita akapa aue ita asekanua, ta ita akapaaili aue ita aikolikoliaa nau Karisto emae. <sup>52</sup> Aue

§§15:32 Aisaea 22:13

\*15:45 Aitiutiu 2:7



lutu arovaeangaili nonga, nonginaailli va mata ateva eapeepere, nau airuuruu eteva taue eaangari. Poli taue ateva aue eaangari, me matena atoa aue la totu, karika aue la mene mate, me aue ita aikolikolia. <sup>53</sup>Poli vaulaniita ateva matena ia me mauuna ia, aue aikolikolia me ita ghaa lo ateva vaulani karika aue eroo tani mate me emauu. <sup>54</sup>Nau isaa o voto elutu, me inangari laghe pitila tale Uru ngai Manga ateva aue koronna va, “God ghe epalala me ghe turungila nimate ateva.”†

<sup>55</sup>“Nimate ateva, eaa loi sarasarakaniaam, me eaa loi mammarikana utautau lao ta taumattu ngatoa?”‡

<sup>56</sup>Mammarikanaane nimate ateva ssavoto ia, me sarasarakania ssavoto ateva inangari nipaopao. <sup>57</sup>Liuna avalua o me masinaailli ta God ta ghe tau mae sio etaita niapala ateva tale nimate me ssavoto, ta kapuita namu ngateva ta Iesu Karisto.

<sup>58</sup>Liuna avalua o, kapughu etoa, am tingina akorokorongana. Am rau mene tau velu righe voto va eakatungiem. Am tau lao maamauluaaimim tale uunguaane Vau ngepona ateva, poli am kilakila va isaa o niuungu karika nim peisaane.

### Tani ghaa viliki veu uneira kapuna atoa God eJerusalem

**16** Me tale viliki veu am ghaaghaa aitaua uneira kapuna taumattu ngatoa God eJerusalem, am aimuli tee saa ateva aghe aulieinie lao sio tale ale manga atoa tale provinsi eteva

eGalaisia va la gheleia. <sup>2</sup>Tale aitiutiu eteva nau, tale uiki ekapaaili, kateva kateva etaimim ealokoi ppae righe viliki veu tale saa ateva eghaaghaaia, me ealokoi eitaua. Me nau amae, karika aue am mene toka paepae viliki veu. <sup>3</sup>Me nau arekata, am suitoonga righe taumattu la sau kaluimim viliki veu me la saea eJerusalem. Me aue asungi taula la tee me uru ngai etikirighi tani apasunga va am, am ghe sungilala. <sup>4</sup>Marova emaa-masina va aghi tee alao eJerusalem, aue la kasu eitaua teieighi.

### Nannaane Pol tani kasu

<sup>5</sup>Aue alao mua tale provinsi eteva eMesedonia, me auena amae taraiem, poli aghanna tani lao mua eMesedonia. <sup>6</sup>Nau akasu eMesedonia me amae taraiem, koti aue atoka teieiem mua lomosi ta eghaa nau kuukuu eteva<sup>f</sup> ekapa, ta aue eaa aghanna tani lao aue am roo tani sausieghi tale viliki veu me ghinna. <sup>7</sup>Arova amae taraiem me auena alao eMesedonia, aue nau tani toka teieiem etukunaaili, me karika aghanna tani toka teieiem tale tukuna nau. Aghanna tani mae toka teieiem tale oroi nau, marova Vau ngepona ateva ealoanna. <sup>8</sup>Me aue atoka oia eIpesis lomosina ta nau Pentikos<sup>§</sup> eruu, <sup>9</sup>poli salana tani uunguaa masi niuungu ang ghe otila etaghi, arongona ta oroieilli taumattu ngatoa la tootoonga tani ghelei rungainieghi.

<sup>10</sup>Me marova Timoti emae, am aitarainia me erau mene matauta righe voto nau etokatoka teieiem, poli egheelei uunguaane Vau ngepona

†15:54 Aisaea 28:5

‡15:55 Hosea 13:14

<sup>f</sup>16:6 *nau kuukuu eteva* Nau kuukuu eteva eghaaghaa kotolu ulana, taumattu ngatoa karika laghe aikasuaa tale paamanu eteva, poli ttasi kuukuu eteva ghe naanamuu.

<sup>§</sup>16:8 *Pentikos* Pentikos kateae nivelu eitaua uneira ia aJiu etoa. Utara Diuteronomi 16:10

ateva, nongina aghi. <sup>11</sup>Liuna avalua o me karika toa la mene ratia. Am sausia va ekasu tale luei me emene mae taraieghi. Atoitoia va emae tee mene katoa tau ngaiesoa.

<sup>12</sup>Me kapuita ta Apolos, aghe aip-pooa teeia tani asarasarakanaia va emae taraiem me mene katoa kapuita la mae aitaia teeia. Me ghe tam aloannala tani mae tale isaa oia nau. Aue emae tale nau eannaa va masi nau tani mae.

<sup>13</sup>Am paniem me am tingina akorokorongana tale niaiesoa. Am rau mene matautu me am korokorongana. <sup>14</sup>Am ghelei voto akapaaili tale niaielousi.

<sup>15</sup>Am kilakila va Stepanas me kapuna atoa tanguena, ila akasina laghe aitiutiula tani aiesoa tale provinsi eteva eAkaia me laghe taula maamauluaaira tani sausi kapuna taumattu ngatoa God. Aghaaulia ngakorokorongana etaimim, kapughu etoa, <sup>16</sup>tani nongo usila isaa o ase taumattu nongina ila me am ghelei evalua o ta mene katoa la uungu aanasa teela. <sup>17</sup>Aghe masimasila nau Stepanas me Potunatus me Akaiakus laghe kasula ona eKorint me laghe rekatala oia eIpises, poli

karika iem me ila laghe ghaala liuimim tani sausieghi. <sup>18</sup>Poli laghe akorokorongana maamauluaaghi nongina laghe gheleila etaimim. Ia o ase taumattu ngat-eva am rooroo tani oneoneainia.

<sup>19</sup>Ale manga atoa elome tale provinsi eteva eEisia, laghe suula masimasiaaira etaimim. Akuila me vausenna ta Prisila tee me taumattu ngatoa tale ale manga atoa la veluvelu eitaua tanguenarua, laghe suula masimasiaaira tale ararina atea Vau ngepona ateva. <sup>20</sup>Ila akapaaili kapuita atoa oia, laghe suula masimasiaaira etaimim. Am sou kateva kateva etaimim tale niaielousi. <sup>\*\*</sup>

<sup>21</sup>Airuuruu tale uru ngai etikirighi oia, aghi Pol, tale nimaghi tuunga atelange aghe pitila isaa oia masimasiaaghi.

<sup>22</sup>Marova teva etam ailousia Vau ngepona ateva, nikkasikiena aue etoka etana. Mae sio o, Vau ngepona ateva! <sup>††</sup>

<sup>23</sup>Alooloo sae va maamasinaane Vau ngepona ateva ta Iesu aue toka aitaia teiem.

<sup>24</sup>Asuusuu aatu aielousiaaghi ta lo atoa etaimim am elome ta Iesu Karisto. Koronna.

<sup>\*\*</sup>16:20 Tale inangari nge Grik, *tale niaingusu eteva manga ia*

<sup>††</sup>16:22 Pol ghe pitila tale inangari nge Aramaik, *Marana tha*, malloeana va “Mae sio o, Vau ngepona ateva.”

*Uru ngai etikirighi Pol ghe pitiela ta*

## **aGalaisia ngatoa**

**1** Aghi Pol, apostolo ieghi karika toa taumattu laghe sungieghila, me karika tee nim teva taumattu ghe suima-toongainaghila, ta Iesu Karisto me God Tamaita ia, ia ghe totuela tale nimate. <sup>2</sup>Aghi me kapughu tau ngai kkaua ngakapa atoa la tokatoka teegieghi ami pitipiti aatu etaimim tale ale manga atoa tale provinsi eteva eGalaisia.

<sup>3</sup>Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem. <sup>4</sup>Ghe tau mae sio maa-mauluaane tale kaluita ssavoto tani ghaa oghita tale nau etiulu oia sesaaili ia, nongina aloaloanaane Tamaita ateva ta God. <sup>5</sup>Ta ngetana nikkaua aue toka nau ekapa atoa, koronnaaaili.

### **Karika mene teva masi kiukiu**

<sup>6</sup>Aghe soghieinamla va arovaea ta am ghe kasu vulila God ghe koloamla tale maamasinaane Karisto me ngam aimuli tee kasina ppae masi kiukiu, <sup>7</sup>llo karikaaili va masi kiukiu. Taatarane va katoa taumattu la ghe gheelei nannaaimim ange aisavisavila me la tootoonga tani aikolikolia masi kiukiuna Karisto. <sup>8</sup>Me arova ami o teva ensolo ngepona liu ghele ppooa masi kiukiu me karika elaolao aitaue tee llo ami ghe ppooaala etaimim, nikasikiena kanna God aue etoka etana. <sup>9</sup>Nongina ngami auliaala me ngamene aulia va, arova teva epoppooa masi kiukiu me karika elaolao aitaue tee llo ngam ghe ghaala, nikasikiena kanna God aue etoka etana.

<sup>10</sup>Ia oia see aue eue va masi taumattu ieghi, taumattu ngatoa o God? Arova anim anna tani amasiasi taumattu ngatoa, karika arooroo tani kapuna tau ngai nongonongo anna Karisto.

### **Kiukiu vaalua God ghe kolola Pol**

<sup>11</sup>Aghanna, kapughu etoa, va am kila va masi kiukiu apoppooa karika va nim kiukiu taumattu ngatoa laghe gheleila, <sup>12</sup>me karika aghe ghaala ta nim teva taumattu, me karika toa laghe apasungaala etaghi, ta Iesu Karisto ghe apasungaala isaa o voto etaghi. <sup>13</sup>Ngam ghe nongola eleiaaghi tale nau too ang ghe lao sio tani usila eleiaaira aJiu etoa. Aghe uviuvi saasakia alena ale manga ateva God me aghe anna tani turungia. <sup>14</sup>Ngaghe muumuennaaili me kilakilaaili vaalua tani aimuli tee kakkauaaimami aJiu etoa. Eleiaaghi ghe laulau lo atoa aneimami ninamanama isaa aitaue me aghe sarasarakanaaili tani aimuli tee eleiaaira tuvuimami etoa. <sup>15</sup>Me nau Goto ateva, ghe suitoongainaghila nau aghe lutula me ghe koloaghila poli maamasinaane, ghe masimasila <sup>16</sup>tani apasunga Natuna etaghi me aue appooainia ta lo atoa karika aJiu ila. Isaa o voto karika aghe kolomila teva taumattu, <sup>17</sup>me karika aghe sae teela eJerusalem tani kolomi lo atoa tee taumattu laghe apostolo akasinala etaghi. Karika, ta aghe sso parasila eArabia vara me aghe mene lao sio eDamaskas.

<sup>18</sup>Vara kotoluae ninamanama ghe ruula me aghe saela eJerusalem tani kila amasina Pita<sup>‡</sup> me aghe toka teieli kasangaulu ghalima (15) nau. <sup>19</sup>Karika aghe mene tarala teva apostolo nim Jeimis nonga, tue me nenga ilalua me Vau eteva. <sup>20</sup>Aghaulia ngakoronna etaimim tale taatarane God va voto api-

<sup>‡</sup>**1:18 Pita** Tale inangari nge Grik, Pol ghe pitila *Kepas*, ararina ateae Pita ta inangari nge Ibru.

tipiti aatu etaimim karika va kamena. <sup>21</sup>Emulina aghe lao sio tale provinsi elua eSiria me eSilisia. <sup>22</sup>Oroieili ale manga eJiudia laghe aimuli tee Karisto karika laghe tara poila mataghi. <sup>23</sup>Laghe nim nongonongo kiukiu va, “Taumattu ngat-eva ghe tuuturungita, nau ghaine ange poppooa niaikaai ngateva emua arau ghe anna tani turungia.” <sup>24</sup>Me laghe kkauaala God poli mausighi.

### Mene katoa apostolo laghe masimasiaala Pol

**2** Kasangaulu ghaatie (14) ninamanama ghe ruula me angalua me Banabas angalu ghe mene saela eJerusalem, me aghe kolo teela Taetas tani kasu teeingalua. <sup>2</sup>Aghe saela poli aghe aimuli tee voto aghe tarala. Aghe sou eisulia lo atoa marova namuu ila, me aghe auliaala etaira masi kiukiu aghe poppooa ta taumattu ngeleka atoa. Aghe ghelei llo va voto aghe gheleila me voto ghaine aghelei oia ghe rau nim peisaane. <sup>3</sup>Arongo ta Taetas aGriki ia ghe usieghila, me karika poi laghe asarasakanala tani ue va la isoia. <sup>4</sup>Voto ateva o ghe lutula poli katoa taumattu tau nikamekame ila laghe sosso ainao tani tara rungainamami tale masi nitoka ngami ghe ghaala ta Karisto Iesu. Me laghe anna tani gheleiemami va ami, ami nongina tau ngai uungu eteva euungu me karika etokatoka tale aloaloanaane. <sup>5</sup>Karika poi ami ghe annaala tani nongo usilainila, poli ami anna va koronna voto tale masi kiukiu etani toka etaimim.

<sup>6</sup>Me lo atoa namuu ila me matarane ila, karika laghe auliaa saoaala righi inangariira tale voto aghe auliaala. (Saa taumattu ila, karika aghannaainila; God karika eghelei niaisakei tale voto eleka

tale taumattu.) <sup>7</sup>Tale isaa o voto, laghe tara kilala va aghi God ghe tau mae sio ia o niuungu eteva tani ppooa tale taumattu ngeleka atoa nongina Pita ta aJiu etoa. <sup>8</sup>Nongina God euungu ta Pita tale uunguaane va apostolo ia ta aJiu etoa, God tee euungu etaghi tale uunguaaghi va apostolo ieghi ta taumattu ngeleka atoa. <sup>9</sup>Jeimis, Pita<sup>¶</sup> me Jon, nau laghe tara kilala maamasinaane God ghe tau mae sio etaghi, la taatara sae etaira va namuu ila, laghe suaala nimaira muenna tani sigha etaingalua me Banabas. Laghe mae sio nonga tale kateva nonga ninnanna va ami lao ta taumattu ngeleka atoa me ila ta aJiu etoa. <sup>10</sup>Kateva nonga voto laghe kolomiamamila etana, va ami rau mene ruu tani sausi lo atoa karika tue peipeina ila. Lo ateva o voto aghe annaaili tani gheleia, poli emua arau aghe gheleia.

### Pol ghe tam masimasiaala Pita

<sup>11</sup>Nau Pita ghe sio mae eAntiok aghe sama anamuu teieli ta mataira taumattu ngatoa poli llo ghe eelei karika masina. <sup>12</sup>Auena Jeimis ghe suu katoa taumattu tani sio, Pita ghe namanama akasina tee taumattu ngeleka atoa me nau laghe rekatala, ghe kasu vulilala me ghe ruula tani usi taumattu ngeleka atoa poli ghe maamatauta lo atoa taumattu ila elome tale lo atoa isoiso ila. <sup>13</sup>AJiu ekapa atoa laghe usila nannaane kamena, liuna avalua o me Banabas tee ghe usila voto kamena laghe eelei.

<sup>14</sup>Nau eteva aghe tarala va karika laghe kasukasu eghulughuluena nongina koronna voto tale masi kiukiu, aghe uela ta Pita emua ta mataira akapa va, “Io aJiu io me utokatoka nongina taumattu ngeleka ateva, karika va nongina aJiu

<sup>¶</sup>2:9 Pita Tale inangari nge Grik, Pol ghe pitila *Kepas*, ararina atea Pita ta inangari nge Ibru. Me tee tale vesi 11 me 14.

eteva. Vaalua me uasarasarakana va tau-  
mattu ngeleka atoa la aJiu?

<sup>15</sup>“Italua italu ghe lutula va aJiu  
italua karika nongina lo atoa la ue va  
taumattu ngeleka atoa tau ssavoto ila.

<sup>16</sup>Ita kilakila va taumattu karika eghu-  
lughuluena nau eaimuli tee inangari ni-  
paopao ta tale niaikaaia nonga ateva  
ta Iesu Karisto. Liuna avalua o me ita  
tee ita atoka aikaiaaita ta Karisto ateva  
Iesu, tani ghulughuluena tale niaiesoa ta  
Karisto, karika va tani aimuli tee inan-  
gari nipaopao. Poli tani aimuli tee inan-  
gari nipaopao, karika teva eroroo tani  
ghulughuluena.

<sup>17</sup>“Arova ita paepae salana tani  
ghulughuluena ta God tale niaikaaiiane  
Karisto, me aue ita pae aotu va  
sesa ghegheleiaaita, ia o Karisto  
eghegheleita va ita ghelei ssavoto?  
Karika poi! <sup>18</sup>Arova amene atulu voto  
aghe rrutila, voto o eapasunga va  
karika aghaimuli tee inangari nipaopao.

<sup>19</sup>Me mausi inangari nipaopao me  
aghe matela tale inangari nipaopao  
me aue amaulue ta God. <sup>20</sup>Aghi aghe  
mate teela Karisto tale aikotoo, karika  
va aghi va atokatoka nau ghaine ta  
Karisto etokatoka etaghi. Maulue ateva  
ghaine atokatoka etana, atokatoka  
tale niaikaaiia tale Natuna ateva God,  
ghe ailousieinaghila me ghe tau mae  
sio maamauluaane etaghi. <sup>21</sup>Karika  
aghanna tani velu maamasinaane  
God me arova ita rooroo tani ghaa  
nighulughuluena mausi inangari  
nipaopao, karika righi malloeane  
matemateane Karisto.”

### Niaikaaiia o tani aimuli tee inangari nipaopao

**3** Alokapakapa am aGalaisia ngatoa!  
See ghe ghelei esavisavilaala

nannaaimim? Tale nongonongoaaimim  
nonginaaili am ghe tara amasinaailiila  
matemateane Iesu Karisto tale aikotoo.

<sup>2</sup>Aghanna tani kolomiem tale kateva  
nonga voto: Vaalua am ghe ghaala  
Spiriti eteva, nau am ghe aimuli tee  
inangari nipaopao, o poli am ghe  
aiesoala tale voto am ghe nongola?

<sup>3</sup>Ngam alokapakapaaili va? Am ghe  
tiuaala tani kasu tale Spiriti eteva me  
ngam anna tani ruu tale aloaloana  
taumattu ngatoa tale kosa ateva,  
va? <sup>4</sup>Voto maateaili am ghe ghaala  
tale maamauluaaimim, ang ghe nim  
peisaanela? Karika aghanna va ghe nim  
peisaane. <sup>5</sup>Am anna va God ghe tau  
aatu sio Spiriti eteva me ghe gheleila  
mirikol elome etaimim nau am ghe  
aimuli tee inangari nipaopao o poli am  
ghe aiesoala voto am ghe nongola?

<sup>6</sup>Am anna Abraham: “Ghe atokala tu-  
utulina ta God, liuna avalua o me ghe  
aseala va ia ghulughuluena ia.”<sup>§§</sup> <sup>7</sup>Am  
tani kila amasina va lo atoa la ghaiesoa,  
natuna ila Abraham. <sup>8</sup>Uru ngai Manga  
ateva ghe tara amuemua alokoila va  
God aue eghelei eghulughuluena tau-  
mattu ngeleka atoa tale uneira niaikaaiia.  
Me ghe aulia ngakasinala masi kiukiu  
ta Abraham va, “Aue ararimangali eka-  
paaili etoa aue la ghaa niarangise ta nge-  
tam.”\* <sup>9</sup>Liuna avalua o me lo atoa la  
ghaiesoa, la ghaaghaa niarangise ateva  
tee Abraham, ia tau niaikaaiia ia.

<sup>10</sup>Lo atoa la ghanna va la ghaimuli  
tee inangari nipaopao tani ghulughu-  
luena tale matane God, la tokatoka  
tale nikasikiena, poli laghe pitila va,  
“Nikasikiena ta lo akapa atoa karika la  
ghelei voto akapa pitipiti tale buku ni-

§§3:6 Aitiutiu 15:6

\*3:8 Aitiutiu 12:3; 18:18; 22:18

paopao ateva.”†<sup>11</sup> Masalikeaili tani tara va karika teva erooro tani ghulughuluena ta taataraane God mausi inangari nipaopao, poli, “Ghulughuluena ateva unna niaikaaia aue etoka.”‡<sup>12</sup> Tani aimuli tee inangari nipaopao karika elaolao aitaua tee uungua niaikaaia. Tale mene kasina salana, “Lo ateva taumattu eghelei isaa o voto, aue etoka tale llo eghelei.”¶<sup>13</sup> Karisto ghe ghaa oghitala tale nikasikiena tale inangari nipaopao nau ia ghe ghaala liuita tale nikasikiena, poli laghe pitila tale Uru ngai Manga va, “Nikasikiena ta lo ateva esae vukala tale ai eteae.”§<sup>14</sup> Ghe ghaa oghitala liuna avalua o me tale uunguaane Karisto ateva Iesu, niarandise ateva ta Abraham aue lao tee ta taumattu ngeleka atoa. Mausina avalua o me tale niaikaaia aue ita ghaa Spirit Manga ateva God ghe aulieiniela tale inangari nialokoi.

### Inangari nipaopao me inangari nialokoi

<sup>15</sup> Kapughu etoa, aghaimatoonga kat-eva inangari niaimatoonga tale ma-auluaaita. Karika teva erooro tani ue va vulla o emene saoa sae righi nanaane tale voto taumattu ngatoa laghe mae aitauaa sio tale kateva nonga ninana etana. Mausina avalua o me, <sup>16</sup> inangari nialokoi God ghe auliaala ta Abraham me tuvuna, Uru ngai Manga ateva etam ue va “ta tuvuna atoa” (malloeana va oroi taumattu) ta eue va, “ta tuvuna ateva.”\*\* Malloeana va kat-eva nonga taumattu, Karisto ta ngetana. <sup>17</sup> Malloeana voto aghanna tani aulia isaa avalua toko, va God ghe gheleila

inangari niaippooa ngaitaua tee Abraham, me isaa o inangari nipaopao, vara ghaata ai me kotolungauluae (430) nimanama ghe lange sio me God ghe tau lao sio, karika eghaaghaa velu isaa o inangari niaippooa ngaitaua, me inangari nialokoi. <sup>18</sup> Poli arova ita ghaaghaa niarandise kanna God, poli ita aimuli tee inangari nipaopao, tale isaa o salana karika ita ghaaghaa isaa o voto mausi inangari nialokoi. Poli nim maamasinaane God me ghe tau lao sio ta Abraham tale inangari nialokoi.

<sup>19</sup> Oo saa uunguaane inangari nipaopao? God ghe nim alokoi saoaala mausi ssavoto, me laghe toitoi tuvuna ateva elutu inangari nialokoi ghe auliaala va aue emae. Inangari nipaopao ghe tiuaala nau ensolo atoa laghe tau lao sio ta taumattu ngateva etiitingina elome etaita me God. <sup>20</sup> Taumattu ngateva elome karika eaimatoonga nonga kativilau pai, me God nim ie nonga kateva nonga ia.

<sup>21</sup> Vaalua? Inangari nipaopao karika elaolao aitaua tee inangari nialokoi kanna God? Karika me karika! Poli arova isaa o inangari nipaopao ita ghe ghaala erooro tani tau mae maulue, tani ghulughuluena tee aue ghele mae tale inangari nipaopao. <sup>22</sup> Me poli Uru ngai Manga ateva eue va kosa akapa ateva etokatoka tale voto sesa nonginaaili ale mata voovoo ateva, liuna avalua o me voto God ghe auliaala tale inangari nialokoi, God etautau mae ta lo atoa la ghaiesoa ta Iesu Karisto.

<sup>23</sup> Auena niaikaaia ghe mae, ami ghe tokatoka tale ale mata voovoo tale uungua inangari nipaopao ghe kavati run-

†3:10 Diuteronomi 27:26

‡3:11 Habakuk 2:4

¶3:12 Levitikas 18:5

§3:13 Diuteronomi 21:23

\*\*3:16 Aitiutiu 12:7; 13:15; 17:7; 24:7

gainamamila lomosina ta niaikaia ghe kauerekatila. <sup>24</sup> Mausina avalua o me inangari nipaopao God ghe atokala tani aitarainamami lomosina ta Karisto emae tani ghelei eghulughuluenaitemami poli niaikaia. <sup>25</sup> Niaikaia ang ghe mae sio isaa oia nau karika inangari nipaopao emene aitaranamami.

### Natuna atoa God

<sup>26</sup> Am akapaaili natuna iem God poli aikaiaaimim ta Karisto Iesu. <sup>27</sup> Poli am akapaaili am ghe ghaala niasuu ta Karisto, ngam ghe asae atokaiela etaimim nongina ita aasae ghinna. <sup>28</sup> Am akapaaili ang ghe kateva nonga iemla ta Iesu Karisto: karika teva aJiu o aGrik, me karika toa tau ngai uungu me lo atoa la tokatoka tale aloannaaira, me karika toa vause me taita. <sup>29</sup> Poli am ta Karisto, am natuna am Abraham, me voto inangari nialokoi eaulia kaluimim.

**4** Llo aghaaulia isaa avalua toko va, aliki eteva aue ghaa peina tamane me nau aliki taita ia, enim tokatoka nongina tau ngai uungu etoa kapuna ila tamane, arongona ta voto akapa peina. <sup>2</sup> Nau aliki ia etokatoka ta nimaira lo atoa la ghaitarainia me lo atoa la loeloea lomosina ta elaa ghaa nau tamane esu-suitoonga. <sup>3</sup> Ita tee ita avalua o nau aliki ita, raroai etoa la aitara kosa ateva oia la gheegheleita va ita ghe nim tau ngai uungu. <sup>4</sup> Me vara nau God ghe suila ghe rekatala, me ghe suula Natuna ateva, ghe lutula tale vause ateva, me ghe usilaala inangari nipaopao, <sup>5</sup> tani ghaa oghi lo atoa inangari nipaopao ghe aitoieinilala me aue natuna ita God. <sup>6</sup> Poli natuna am God, ia esuusuu kapuna Spiriti eteva Natuna, tani mae tale urunguitaniita me Spiriti eteva ekolokolo tani ue va, “Abba, Tamaghi.” <sup>7</sup> Liuna avalua o me io karika va nim tau ngai uungu io ta natuna io. Me poli natuna io, ghe gheleiola va aue

ughaa niarangise God ghe auliaala tale inangari nialokoi.

### Pol ghe nannangaili aGalaisia ngatoa

<sup>8</sup> Emua arau nau am ghe tam kilakila God, am ghe tau ngai uungu tale goto atoa karika koronna ila. <sup>9</sup> Me ia oia ngam ghe kilala God, o God ang ghe kilaiemla. Vaalua me ngam mene oghioghi tani lao ta raroai etoa karika sarasarakana me karika masina, me am aloanna tani mene nim tau ngai uungu? <sup>10</sup> Am aimuli tee asease nau etoa me ulana atoa me mene kasina ase nivelu eitaua me ninamanama. <sup>11</sup> Amaa-matautu tani nnaainam va niuungu aghe gheleila etaimim, erau nim peisaane nonga.

<sup>12</sup> Akolokolo tauem, kapughu etoa, va am ghelei nongina aghi, poli aghi aghe nonginala am. Karika am ghe gheleila righe voto sesa ta ngetaghi. <sup>13</sup> Am kilakila va poli mausi isiki eteva me aghe ppooa ngakasinala masi kiukiu etaimim. <sup>14</sup> Arongo ta isikinna aghi, me aneghi isiki ghe ghelei nitootoonga me maate etaimim me karika am ghe maamango me uessainaghi, am ghe ghaaieghila nongina va kapuna ensolo ieghi God, me nonginaaili va aghi va Karisto Iesu ta ngetaghi. <sup>15</sup> Aghaiesoa va arova nongina va am ghe rooroo tani valiki velu mataimim me am ghe tau mae aue am ghe rooroo tani ghelei. Isaa o nimasimasi eaa ang ghe lao sio? <sup>16</sup> Vaalua me isaa oia poli ngaghaaulia voto koronna etaimim me ngam sessa teieghi?

<sup>17</sup> Ila o taumattu ngatoa la ghannaaili tani ghaaiem va am lao aitaua teeila me karika righe masi voto aue lutu. Llo la nim anna va am masau etaimami me aue am aloanaailiila. <sup>18</sup> Masina tani nannangaili tani ghelei masi voto ta mene katoa. Am elei evalua o nau ekapa atoa, karika va nau atokatoka teiem nonga. <sup>19</sup> Masi natughu etoa, poli am me amene mam-

marikana nonginaaili vause ateva ange moomolena aliki eteva lomosina ta am nongina Karisto. <sup>20</sup> Aghannaaili va arova ghaine nonga aghele toka teeiem me aghele aikolikolia samasamaaghi poli aghannangailiim.

### Eiga me Seraa

<sup>21</sup> Am aulia etaghi, lo atoa am anna tani usila inangari nipaopao, va vaalua me karika am kilakila voto inangari nipaopao eaulia. <sup>22</sup> Laghe piti elokoila va Abraham natuna taita alua. Kateva natuna ia vause ateva tau ngai uungu ia, me kateva ta vausenna tunga ateva. <sup>23</sup> Lo ateva taita ghe lutula tale vause ateva tau ngai uungu ia, karika etokatoka tale aloanaane, ghe lutula poli nannaaira taumattu, me vausenna tunga ateva, natuna taita ateva ghe lutula poli inangari nialokoi.

<sup>24</sup> Isaa o voto eaapasunga etaita va vause alua lalu aimatoonga ghalua nimae aitaua. Tale inangari niaippooa ngaitauaa kateva tale motouru eteva eSaenae, me ghe alutula aliki aue la nim tau ngai uungu, Eiga etana. <sup>25</sup> Eiga eaimatoonga motouru eteva eSaenae isaa eArabia me eaimatoonga tee eJerusalem nau ghaine, poli ia me natuna atoa nim tau ngai uungu ila. <sup>26</sup> Me lo ateva eJerusalem ia epona liu etokatoka tale aloaloanaane, me ia kinaita ia. <sup>27</sup> Poli laghe piti elokoila va, “Umasimasi, vause ateva kinangere io, me utam kakkaai aliki; uaore tale nimasimasi, io lo ateva ughe tam aateatea mamarikanaane nimolena atea; poli ase vause ateva o kinangere ia aue oroi natuna elau lo ateva vause taitanna ateva.”<sup>††</sup>

<sup>28</sup> Am, kapughu etoa, am nongina Aisiki, aliki tale inangari nialokoi iem. <sup>29</sup> Tale isaa o nau, lo ateva aliki taita ghe lutula poli nannaaira taumattu ghe gheeiei voto sesa tale lo ateva aliki ghe lutula tale sarasarakaniaane Spiriti eteva. Nim nongina ghaine. <sup>30</sup> Me saa ateva Uru ngai Manga ateva eaulieinia? Eue va, “Suu vella lo ateva vause tau ngai uungu ia karika tokatoka tale aloanaane me natuna ateva. Poli natuna ateva karika poi aue eghaa peina aliki eteva natuna ia lo ateva vausenna tuungi ia.”<sup>‡‡</sup> <sup>31</sup> Liuna avalua o me, kapughu etoa, ita karika va natuna ita vause ateva tau ngai uungu ia karika etokatoka tale aloanaane, ta natuna ita lo ateva vausenna tuungia.

### Tani toka tale aloanaane Karisto

**5** Mausi ita rau mene tau ngai uungu, poli Karisto ghe gheleitata va ita toka tale aloaloanaaita. Am tingina akorokorongana me am rau mene tau veluem va am mene nim tau ngai uungu.

<sup>2</sup> Am nongo inangarighi! Aghi Pol aghaaulia etaimim va arova am tau veluem me la isoiem, karika aue righi uunguaane Karisto etaimim. <sup>3</sup> Amene aulia ngamasalika ta lo atoa am anna tani tau veluem la isoiem, va am tani aimuli tee isaa akapaaili inangari nipaopao. <sup>4</sup> Am lo atoa am anna tani aimuli tee inangari nipaopao me am ghulughuluena, tale isaa o salana eaapasunga va Karisto karika ia etaimim me ngam ghe kasu vulila maamasinaane. <sup>5</sup> Me tale Spiriti eteva, tale niaikaai ita toitoi rerrekana nighulughuluena ita atoka tuutuliita etana. <sup>6</sup> Ta Karisto Iesu ni-isoiso atea me nitam isoiso atea karika righi uunguaairua, ta niaikaai

<sup>††</sup>4:27 Aisaea 54:1

<sup>‡‡</sup>4:30 Aitiutiu 21:10



nonga ateva eaapasungainia tale uungua niaielousi.

<sup>7</sup> Am ghe iilou emasina tale niaikarati eteae, me see ghe ilou rungainamla me ghe gheleiema va am rau mene nongo usila llo koronna? <sup>8</sup> Ia o ase ninanna ngateva etam kasukasu ta lo ateva ekolokoloam. <sup>9</sup> Pisike ia tuku isti erighi erooroo tani ghelei verete akapa ateva erranga. <sup>10</sup> Aghaatoka tuutulighi ta Vau ngepona ateva va karika aue am mene tiu ppae. See ia lo ateva egheelei esavisavila nannaaimim aue eghee aipolipoli sesa. <sup>11</sup> Kapughu etoa, arova ngamene poppooa uungua ni-isoiso, vaalua me la mene gheelei teeioghi voto karika masina? Tale ia o salana atikirighi, inangari aikotoo ateva karika aue emene sesa nongonongoane. <sup>12</sup> Me ila o lo atoa la ghelei saasakia nannaaimim, aghanna va karika va laghele mene isoila nonga ta la ghele kaati teeila.

### Maulue ateva tale Spirit

<sup>13</sup> Am, kapughu etoa, God ghe koloamla va am toka tale aloanaaimim. Am rau mene nnaa va poli am tokatoka tale aloanaaimim va am ghelei voto tale nannaaira taumattu tale kosa ateva oia. Am aisausia kateva kateva tale niaielousi. <sup>14</sup> Isaa akapaaili inangari nipaopao eghelei rooroa nonga tale kateva ninanna eue va, "Uaielousia taumattu ngateva kalakalangina ia etam, nongina uaielousieinio."<sup>¶</sup> <sup>15</sup> Am paniam! Arova am toka aikiso me am aiuvieinam, aue am aiturungia ngakapaiem.

<sup>16</sup> Liuna avalua o me aue va, am toka tale uungua Spiriti me karika aue am usila nannaaimim tani ghelei sesa niuungu. <sup>17</sup> Poli nannaaita ateva, eanna voto Spiriti eteva etam aloana, me Spiriti eteva, eanna voto nannaaita ateva

etam aloana. Karika lalu rooro tani mae aitaau, liuna avalua o me karika am rooro tani ghelei voto am anna tani ghelei. <sup>18</sup> Arova Spiriti eteva ekaakatulainiem, karika am usila inangari nipaopao.

<sup>19</sup> Uungua sesa ninannaa masalike avalua toko va: llo niailai see, me voto karika raarangisana, me tani nimanna tani ghelei sesa voto, <sup>20</sup> me tani kkaua tootoo goto, me uungua nialaala, me tani sessai, me nitam niaighui, nilavalava, me tau nitoka sessai, me tani nnaainio nonga, me niaitiuii poli ase ninannaa, <sup>21</sup> me nippai, me tani toka nanna saasakia tee kateva, me tani ropi sesa manu, me nivelu eitaau tani ropi me ghelei ssavoto, me mene katoa asease voto sesa. Aghaaulia kieimim nongina aghe aulia ngakasinala etaimim, va lo atoa la tokatoka avalua o, karika aue la kupi sso tale ararimangalina ateva God.

<sup>22</sup> Me uene Spiriti eteva ta niaielousi, nimasimasi, me luei, me karika nisessai parasi, me nighelei masi voto ta mene kateva, me nipparru, me tani kaarasi tani ghelei emasina niuungu, <sup>23</sup> me uungua tani siuaa ninannaa, me tani ghelei nannaam ennaa ngamasina. Karika righi inangari nipaopao eghelei runga isaa o ase voto. <sup>24</sup> Lo atoa kapuna ila Iesu Karisto, ngeila ghe uvi ematela ninannaa sesa me eleiaaira me aloaloanaaira tale aikotoo. <sup>25</sup> Poli ita tokatoka tale Spiriti, ita kasu tee Spiriti eteva. <sup>26</sup> Ita rau mene saea nannaaita me tani ghelei essai kateva me tani nanna saasakia tee mene kateva.

### Tani sausi mene kateva

**6** Kapughu etoa, arova lo ateva ange kupi ssola tale voto sesa, lo atoa am aimuli tee Spiriti eteva am sama amasinaaili teeia tani ghaa oghia me

<sup>¶</sup>5:14 Levitikas 19:18

emene oghi mae. Me utani taatara ta io tee urau sso tale nitootoonga va ukatuu. <sup>2</sup>Am sausi tani sau voto maateaili tale mene kateva maamauluaane me tale isaa o voto, am rooroo tani ghelei ekapa voto tale inangari ni-mae aitaua kanna Karisto. <sup>3</sup>Poli arova teva eannaa va ia iaaili, nau eteva ia nim laoiu, ia enim kamekamea. <sup>4</sup>Kateva kateva etoongi voto eghelei me emasimasieinia. Erau mene tootoonga tani toongi eleiaane ta mene kateva taumattu. <sup>5</sup>Poli kateva kateva esau voto maate tale gheegheleiaane.

<sup>6</sup>Lo ateva eghaaghaa masi voto tale inangarina ateva God, eparru lo ateva epasunga voto etana tale righi masi peina.

<sup>7</sup>Am rau mene aikameainam poli karika am rooroo tani kame tee God. Taumattu emukemuke voto epasapasa.

<sup>8</sup>Lo ateva epasapasa voto sesa tale maamauluaane tani amasimasi nannaane sesa, tale isaa o voto sesa aue muke voto sesaaili. Lo ateva epasapasa voto masina tani amasimasi Spiriti eteva, aue muke maulue ateva tokatoka liu ia tale Spiriti eteva. <sup>9</sup>Karika ita mene sio asoaso tani ghelei voto masina, poli aue kateva masi nau aue ita muke masi voto, arova ita tam mango. <sup>10</sup>Liuna avalua o me nau ita roo tani ghelei voto masina tale taumattu ngakapa atoa, ita ghelei tee lao ta lo atoa ila elome ta llo taumattu eaiesoa.

### Airuuruu tale inangarina Pol

<sup>11</sup>Am tara mata ngingangari aghe piti enamuula!

<sup>12</sup>Lo atoa la nim annaa va taumattu ngatoa la tara eleiaaira la tani aakorokoronganiem va la isoieim. La ghelei voto o poli karika la aloana va taumattu ngatoa la ghelei saasakia etaira mausi aikotoo ateva ta Karisto. <sup>13</sup>Lo tee atoa isoiso ila, karika la aimuli tee inangari nipaopao, me la nim anna va la isoieim me la ghasake tani ghelei arariira mausi voto la ghelei tale vilikiimim. <sup>14</sup>Me ta ngetaghi, karika poi arooroo tani asakeainaghi, aghaasakea nonga aikotoo ateva ta Vau eteva Iesu Karisto. Poli ta ngetana me kosa ateva ang ghe matela tale maamauluaaghi me aghi tale kosa ateva. <sup>15</sup>Karika righi uungua ni-isoiso atea me nitam iso atea. Tani lutu aouna nonga koronna ia. <sup>16</sup>Lo akapa atoa la aimuli tee llo aghe auliaala aue la ghaa luei me masi niaielousi, tee me lo atoa Israeli kapuna ila God.

<sup>17</sup>Karika teva emene tau mae maate etaghi, poli asausau tauramoramo eapasunga va aghi tau ngai uungu ieghi ta Iesu. <sup>18</sup>Maamasinaane ateva Vau eteva Iesu Karisto aue toka tee lo ateva spiriti etaimim, kapughu etoa. Koronnaaili.

*Uru ngai etikirighi Pol ghe pitiela ta*

### **alpises atoa**

**1** Aghi, Pol, kapuna apostolo ieghi Iesu Karisto, tale aloanaane God.

Apitipiti etaimim kapuna taumattu ngatoa God, am tokatoka elpises<sup>§§</sup>, am aiesoa ta Iesu Karisto.

<sup>2</sup>Alooloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teiem.

### **Niarangise manga, isaa ta Karisto**

<sup>3</sup>Ita tau sae God, kapuna Goto ia kapuita Vau eteva Iesu Karisto, me tee Tamane ia, ghe arangiseitala tale masi voto akapa tani sausi kapuita spirit. Isaa o masi voto ghe mae sio epona liu ta Karisto. <sup>4</sup>God ghe suimatoongainitala ta Karisto me auena aitiutiu tale kosa ateva va ita manga me ita raarangisana ta matane elome tale ni-aielousi. <sup>5</sup>Emua arau ghe suimatoongainitala va aue eghaaita me enatuna ita mausi Iesu Karisto, poli ghe masimasielniela me ghe aloannala tani ghelei evalua o. <sup>6</sup>Liuna avalua o me ita tau sae God tale kinatama maamasinaane, ghe nim tau mae sio etaita ta Natuna eaielousieinia. <sup>7</sup>God ghe poli aoghitala tale matemateane Iesu, me ghe kkaluaala kaluita voto sesa, poli God pasu ia tale maamasinaane etaita, <sup>8</sup>me ghe tau mae sio oroieili maamasinaa me ghe gheleitala va ita alomasaanga, me ita rooroo tani kila voto koronna kanna God. <sup>9</sup>God ghe apasungaala etaita voto aisulianna eanna tani ghelei, poli ghe masimasielniela, me ghe aloannala tani ghelei isaa o voto ta Karisto. <sup>10</sup>Ghe aloannala va nau eteva ghe suimatoon-

gainiela, aue eatoka aitaua isaa aka-paaili voto epona liu me tale kosa ateva oia, va Iesu aue emuemueaa.

<sup>11</sup>Ta ngetana God ghe suimatoongainiemamila va ami kapuna taumattu iemami, poli ang ghe nnaa vella emua arau tani ghelei isaa o voto, me God egheelei isaa akapa voto nongina aloanaane. <sup>12</sup>Ghe suimatoongainiemamila poli ghe aloannala va ami lo atoa ami ghe aitiutiula tani aiesoa ta Karisto, ami tau sae inasanina God. <sup>13</sup>Me am tee ange kapuna iemla God, nau ngam ghe aiesoala kiukiu koronna, ia o masi kiukiu eteae eaaulia vaalua God ghe asaangiemia. Nau am ghe aikaaiala ta Karisto, God ghe aimatoongainiemia va kapuna am: ghe tau aatu sio Spirit Manga ateva tale inangari nialokoi. <sup>14</sup>Spirit Manga ateva ia aitiutiu eteva aipolipoli, tani apasunga va aue ita ghaa saa ateva God ghe aulia ngalokoiela tale inangari nialokoi, va aue etauela ta kapuna taumattu ngatoa. Isaa avalua o me God aue eghaa oghi lo atoa kapuna ila, me aue ita tau sae inasanina God.

### **Nikaili emasina tale nilooloo sae**

<sup>15</sup>Mausina avalua o me nau aghe nongola uneimim niaikaia ta Vau eteva Iesu me ailousiaaimim ta kapuna taumattu ngakapa atoa God, <sup>16</sup>karika aghe kakkalueinam tale nilooloo sae, tani kaili emasina ta God mausiimim. <sup>17</sup>Me alooloo sae ta kapuna God ateva Vauita ateva ta Iesu Karisto, ia Tamaita ia etokatoka tale mallanga ateva. Akookolomi va etau aatu Spiriti eteva tani gheleiem me am alomasaanga me Spiriti eteva aue eapasunga ngaotu God etaimim me aue am roo tani kila amasinaia. <sup>18</sup>Me akookolomi tee va eoti nannaaimim me aue am atoka amuemue

<sup>§§</sup>1:1 Kasina uru ngai laghe pitila, karika laghe pitila va *am tokatoka elpises*

nannaimim tale voto ghe koloamla etana me vaalua ooro ia kanna niarangise ghe auliaala tale inangari nialokoi va aue etaula ta kapuna taumattu manga. <sup>19</sup>Me akookolomi va am kila vaalua kinatama sarasarakaniaane ateva euungu elome etaita lo atoa ita aikaai. Ia o sarasarakana ateva euungu elome etaita korokoronganaaili ia, <sup>20</sup>ghe uungula etana nau ghe tottula Karisto tale nimate, me ghe atokaiela tale pai muenna atelange epona liu. <sup>21</sup>Karisto ia namuu ia ta ensolo akapa atoa me spiriti ekapa atoa, me ia emuemuea ngakapa tau ngaitoitoi etoa nau ghaine me auena. <sup>22</sup>God ghe tau ekapa lao sio ninamu ngateae ta Karisto me ghe suitoongainiela va emuemuea ngakapa voto tale ale manga. <sup>23</sup>Ale manga ateva vaulanina ia Karisto, me ia ghe apasula ale manga ateva tale sarasarakaniaane, me ghe tau lao sio maulue ateva tale isaa akapaaili voto tale isaa akapaaili salana.

### Ita ghe mene mauluela ta Karisto

**2** Emua arau am ghe tokatoka tale nimate tale kaluimim nitam nongo usila me ssavoto. <sup>2</sup>Tale isaa o nau am ghe aaimuli tee uungua kosa ateva oia karika masina. Am ghe aaimuli tee uunguaane lo ateva emuemueaa uunguaaira sesa spiriti etoa epona elomarase. Isaa o sesa spiriti ghaine ekaakatula isaa o taumattu karika enongongo usila God. <sup>3</sup>Nau ang ghe lao sio ita ghe tokatoka nongina ila. Ita ghe aaloanna tani amasi-masi sesa aaloanna vilikiita me nannaaita. Me ita ghe roola tani ghaa sessaiaane God. <sup>4</sup>Me karika, ta God aielou-siangailiita, me pasueili ia tale alousiuisaane. Liuna avalua o <sup>5</sup>me nau ita ghe tokatoka tale nimate tale kaluita nitam nongo usila, ghe ghelei emaulueitala ta Karisto. Tale maamasinaane God am ghe saangala. <sup>6</sup>Ghe totutala tani maulue tee Karisto, me ghe atoka aitaueinitala me

Karisto Iesu epona liu. <sup>7</sup>Ghe apasungala etaita maamasinaane tale isaa o salana ta Karisto Iesu, me tale isaa to nau emae-mae, taumattu ngatoa aue la tara maamasinaane namungaili, elaulau ekapa voto atoa. <sup>8</sup>Poli tale maamasinaane, am ghe saangala tale niaikaai, me karika va tale sarasarakaniaaimim, ta God ghe nim tau mae sio. <sup>9</sup>Karika va am ghe uunguaala va am roo tani asake. <sup>10</sup>Poli ita, God ghe gheleitala. Ghe tau mae sio maulue etaita ta Iesu Karisto tani ghelei masi niuungu God ghe aimonomosia ngalokoila etaita tani ghelei.

### Kateva nonga ita ta Karisto

<sup>11</sup>Liuna avalua o, am annaa parasi va nau ang ghe lao sio, nau am ghe lutula, karika va aJiu iem, am tau ngeleka am, me lo atoa la aseasela va “isoiso ila” laghe kolokoloam va “karika isoiso iem”. (Isaa o voto la ghelei ta vilikiira, nim taumattu ngatoa la ghelei me karika va God.) <sup>12</sup>Isaa akasina am ghe maamasau ta Karisto. Am karika taumattu nge Israeli em, ta ativuu iem tale kanna inangari niaippooa ngaitaua tale inangari nialokoi God, ta am ghe tokatoka tale kosa ateva oia me karika am ghe kilakila God, me karika righi masi voto am ghe toitoi. <sup>13</sup>Me ghaine ta Karisto Iesu am lo atoa am ghe maamasau ta God, ngam ghe mae akalakalaa sio poli raena ateva Karisto.

<sup>14</sup>Poli ia luei ia etaita, ghe gheleila aJiu etoa me taumattu ngeleka atoa laghe kateva nongala. Niaissa ghe tokatoka arova aivativati eteva, me Karisto ghe ghaa veluela, <sup>15</sup>tale matemateane, ghe atoka lange sio mua kaluira inangari nipaopao aJiu etoa, poli nannaane tani ghelei eouna taumattu ngalua, aJiu etoa me taumattu ngeleka atoa, tani kateva nonga, me tale ia o salana atikirighi aue eghelei luei. <sup>16</sup>Ghe matela tale aikotoo tani atoka aitauei paita eluevilau va lalu

kateva nonga me ekapuna ilalua God, me tale aikotoo ghe ghelei ematela uungua niaissessaii ghe tokala emua arau. <sup>17</sup>Ghe mae sio tani aulia ngaotu luei etaimim lo atoa masaeili em ta God, me luei ta lo atoa kalakalangina ila. <sup>18</sup>Poli tale matemateane ita akapa ita rooroo tani mae ta Tamaita ateva God tale kateva nonga Spiriti.

<sup>19</sup>Liuna avalua o me lo atoa karika aJiu iem, ghaine karika ativuu iem, ta ita tokatoka tale kateva nonga ararimangali, ararimangalina ia God. Am elome tale natuna atoa God. <sup>20</sup>Am nongina ale ateva, God ghe atuluela epona ta apostolo atoa me propete atoa nongina suena atoa, me Iesu Karisto ia aitiutiu eteva suena la aipatola lao etana. <sup>21</sup>Ta Iesu ia akapa ale ateva eaiapatola me esaesae aitauaa me manga ia ta Vau ngepona ateva. <sup>22</sup>Me ta ngetana am tee am aipatola tee aJiu etoa, me am tokatoka aitaua tee Iesu, me God aue etoka aitauaa teiem tale kanna Spirit Manga ateva.

### Pol ghe uungu ta taumattu ngeleka atoa

**3** Liuna avalua o aghi, Pol, tau karavusu ieghi mausi Iesu Karisto, me poli mausiimim taumattu ngeleka atoa, alooloo sae ta God.

<sup>2</sup>Aghaiesoa va ngam ghe nongola va tale maamasinaane God ghe tau mae sio etaghi uunguaa nippooa mausiimim. <sup>3</sup>Nongina ngapiti ekasinala tale ia oio uru ngai etikirighi, karika apiti aoroila vaalua voto aisulianna God ghe apasungaala etaghi. <sup>4</sup>Nau am riti isaa o voto aghe pitila, aue am kila vaalua kilakilaaghi tale voto aisuliaane eauliaa Karisto. <sup>5</sup>God karika ghe apasungaala ta llo akasina atoa vituu emua arau, me ghaine tale kapuna Spirit Manga ateva ange aapasungaa ta kapuna apostolo atoa manga ila me tee propete atoa. <sup>6</sup>Voto ateva aisuliaana ia, ia avalua

toko: va poli taumattu ngeleka atoa la aikaaiaa tale masi kiukiu eteae, la rooroo tani ghaa aitaua masi voto kanna God tee Israeli etoa, me tee ekateva nonga ita tale vaulaniita me ita akapa aue ita ghaa llo voto ghe auliaala tale inangari nialokoi ta Iesu Karisto.

<sup>7</sup>Tale maamasinaane, God ghe tau mae sio ia oia niuungu eteva tani ppooa masi kiukiu eteae. Ghe ghelei evalua o tale uunguaane sarasarakanaaili. <sup>8</sup>Arongona ta aghieili euu ta kapuna taumattu ngakapa atoa God, ia oia maamasinaane ateva God ghe nim taue mae sio etaghi: tani aulia ngaotu ta taumattu ngeleka atoa isaa o masi voto ta Karisto karika ita rooroo tani kila akapa. <sup>9</sup>God, ia o ghe ghelei ekapaailiila voto, ghe suimatoongainaghila tani aulia ngamasalikangaili ta ila akapa taumattu ngatoa ia oia voto ateva aisuliaane ia. God karika ghe apasungaala voto aisuliaane lomosina ta ghaine. <sup>10</sup>God ghe nnaala va tale isaa oia nau ensolo akapa atoa me spiriti etoa elomarase aue la tara kinatama aalomasaanganiaane God tale kapuna taumattu ngatoa. <sup>11</sup>God ghe nnaala va aue eghelei evalua o ta Karisto Iesu kapuita Vau ia me avirina ghe vira gheleila kosa ateva. <sup>12</sup>Ita rooroo tani lao ta God me ita rau mene matautu tani lao etana, poli ita aiesoa ta Karisto me ita tokatoka aitaua teeia. <sup>13</sup>Liuna avalua o, akookolomiem va am rau mene sio asoasooa tale voto maate aghaaghaa mausiimim, poli isaa o nonga voto me aue am roo tani asake.

<sup>14</sup>Mausina avalua o me asuusuiiaa sio ta Tamaita ateva, <sup>15</sup>ia ghe gheleila pamili ekapa atoa epona liu me tale kosa ateva. Liuna avalua o me la ghaaghaa mauhue ta God. <sup>16</sup>Alooloo sae va tale arangiseane namungaili, ia aue eakorokorongana urunguitaniimim tale

sarasarakaniaane kapuna Spiriti eteva. <sup>17</sup>Me aloolo sae va aue Karisto erooro tani toka tale urunguitaniimim tale niaikaia. Me aue am tingina akorokorongana tale niaielousi nongina ai eteae oane eakorokoronganaia, <sup>18</sup>me am me kapuna taumattu ngakapa atoa God aue am ghaa sarasarakana tani kila nongina vaalua naanamungaane, aaluseaane, maamasauaane sae me siosio liuaane, aielousiaane ateva Karisto. <sup>19</sup>Me aloolo sae va aue am kila ia o niaielousi eteva elaulau isaa akapa alomasaanga, me gheeleiaimim aue elao aitaua tee gheeleiaane God.

<sup>20</sup>Ita tau sae God tale sarasarakaniaane, erooro tani ghelei oroieili asease voto elaulau voto ita rooro tani kolomi me nnaa. Ia o sarasarakana ateva euungu elome etaita. <sup>21</sup>Liuna avalua o me ita tau sae God elome tale ale manga me tee Karisto Iesu tale ila akapaaili vituu etoa tale nau ekapaaili etoa. Koronna.

#### Ita uungu eitaua tee Karisto

**4** Me aghi Pol, tau karavusu ieghi mausi Iesu Karisto, aghaulia ngakorokorongana etaimim va am toka amasina tani apasunga va God ghe koloamla. <sup>2</sup>Am kaarasi tani sioaa nannaimim, aippooaimim esaghuighuiena, me erau mene sessai parasiem, me arova kateva eghelei saasakia etaimim, am kkalua gheeleiaane me am nim aielousieinia. <sup>3</sup>Am tootoonga tani poso parasi uungua nitoka aitaua kanna Spirit Manga ateva eghelei tale luei. <sup>4</sup>Ita kateva nonga ita nongina vaulaniita ateva, me kateva nonga ia Spiriti eteva. Tale ie nonga o salana atikirighi God ghe koloamla tale kateva nonga ia nitaatara lao emua. <sup>5</sup>Kateva nonga ia Vau eteva, me kateva

nonga ia niaikaia ngateva, me kateva nonga ia niasuu eteva. <sup>6</sup>Kateva nonga ia God ateva Tamaita akapa ia, me ia emuemuaa taumattu ngakapa atoa, me euungu etaita akapa, me etokatoka elome etaita akapa.

<sup>7</sup>Me Karisto ghe tau mae sio ta kateva kateva etaita maamasinaane me tale aloalooanaane etautau mae voto ealona tani tau mae. <sup>8</sup>Liuna avalua o me Uru ngai Manga ateva eue va, “Nau eteva ghe laa saesae ghe muamuaala tau karavusu etoa me ghe tau lao sio masi voto atoa ta taumattu ngatoa.”\*

<sup>9</sup>Vaalua malloeana va ghe saela epona liu? Malloeana va ghe sio mae akasina mua tale kosa ateva. <sup>10</sup>Ia ghe sio mae epona liu, ia ghe laa sae kasula elomarase, me erooro tani toka tale voto akapaaili. <sup>11</sup>Ia ghe taula sarasarakana va katoa la roo tani apostolo, me katoa la propete, me katoa la tau ngai ppoa, me katoa la pasta me la tau ngai apasunga. <sup>12</sup>Ghe gheleila llo tani aipanipania kapuna taumattu God, tani uungua uunguaane, liuna avalua o me vaulanina Karisto<sup>†</sup> ekorokorongana me etoka amasina, <sup>13</sup>lomosi ta ita akapa ita mae aitaua tale kateva nonga niaikaia, me tale alomasaanganiaane Natuna ateva God, me ita matuenna me ita nongina Karisto.

<sup>14</sup>Me karika ita mene nongina natu ngaliki etoa, va ila o lo atoa muenna ila tani aikamea la toka kamekameta see nongina koto ateva me kuukuu eteva ebebeita see, me la ghelei asease inangari etoa tani apasunga me tani kame mene katoa taumattu. <sup>15</sup>Liuna avalua o me ami aulia ngakoronna tale niaielousi, va tale isaa akapa voto ita ghelei, ita ghelei etana, ta ia Karisto

\*4:8 Sams 68:18

†4:12 *vaulanina Karisto* Utara Ipises 1:23

uruita ia. <sup>16</sup>Eposoposo aitaua vaulanina ateva Karisto me epiipinosa amasina, arova kateva kateva etaita egheelei uunguane. God eaaloanna isaa akapaaili voto tale vaulanina ateva Karisto va la aipatola aitaua tale niaielousi.

**Am toka nongina taumattu  
tale mallanga atoa**

<sup>17</sup>Liuna avalua o me aghaloannaaili va tale ararina atea Vau palepale am rau mene kasu nongina taumattu ngatoka karika la aiesoa, me nannaaira nim lao. <sup>18</sup>Nannaaira saurromiena, la maamasaeili ta maamauluaane God, poli urunguitaniira korokoronganaaili, liuna avalua o me karika la kilakila God. <sup>19</sup>Karika la paapalata, liuna avalua o la nim anna tani ghelei sesa voto, me la ghannaaili tani toka ghelei asease voto karika raarangisana.

<sup>20</sup>Am karika va am ghe kilala Karisto tale isaa o ase salana. <sup>21</sup>Koronnaaili, am ghe nongola etana, me laghe aulieinia etaimim va voto koronna isaa ta Iesu. <sup>22</sup>Laghe apasungaala ta ngetaimim va am ghaa velu poka gheleiaaimim ang ghe lao sio, me am ghaa velu pokane ateva taumattu ang ghe sesala tale aloannaane kamena. <sup>23</sup>Me am tau velu God eghelei eouna ghegheleiaimim me nannaaimim. <sup>24</sup>Me am mene atoka ouna ateva taumattu God ghe gheleielia va enongina God. Me gheleiaaimim aue ghulughuluena me emanga poli am tokatoka tale llo koronna.

<sup>25</sup>Liuna avalua o me kateva kateva etaimim eghaa velu nikamekame, me eaippoa ngakoronna tee lo atoa ita aiesoa ngaitaua ta Karisto, poli ita akapaaili kateva nonga ita. <sup>26</sup>“Nau ange sessaiola, urau mene tau velu sessaiam va egheleio me ukupi sso tale ssavoto,”<sup>‡</sup> me erau mene toka sessaio ta kateva nau

lomose ta sinaka ateva esuu, <sup>27</sup>ta Satana erau tingina akorokorongana tani akatungio. <sup>28</sup>Lo ateva eainao nonga eruu tani ainao, me etiuua tani uungu tani ghelei masi voto esausi lo atoa la ghaloanna niaisausi.

<sup>29</sup>Am rau mene aulia righi voto tani ghelei saasakia kateva taumattu, ta am aulia nonga masi voto aue esausi lo atoa la anna nisausi, me am akorokoronganaaili. <sup>30</sup>Karika am mene ghelei emamaatana kapuna Spirit Manga ateva God, poli ia eaaimatoonga va am kapuna am God me aue eghaa oghiem. <sup>31</sup>Am ghaa velu sesa niateatea, me nisessaia etiituaa elome me eghoa eleka, me ni-aiuvi, me niaikamea, me tee isaa akapaaili sesa gheleiaimim. <sup>32</sup>Am ghelei masi voto ta mene katoa, me am apasunga niaielousi, me am kkalua sesa gheleiaaira katoa, nongina ta Karisto, God ghe kkaluaala kaluimim sesa voto.

**5** Liuna avalua o, me am usila gheleiaane God, poli am natuna am God, me eaielousiangailiem. <sup>2</sup>Me am tokatoka tale maulue ateva pasu ia tale niaielousi, nongina Karisto ghe aielouseinitala me ghe tau mae sio maamauluaane ta ngetaita nongina lo ateva o aiaavusuvusuaena eghelei emasiasi God.

<sup>3</sup>Me elome ta ngetaimim karika am mene toka tale uungua niailai rorrou, va taumattu ngatoka la toka aulieinam, o righi ase niuungu karika raarangisana, o nikuruetu, poli isaa oia voto karika masina ta kapuna taumattu God manga. <sup>4</sup>Karika mene righi niamakatakata, o ni-aiippoa alokapakapa, o ase inangari ni-aikusi. Karika, ta am kaili emasina tale voto masina. <sup>5</sup>Me tale isaa oia voto am rooroo tani kila amasina va: lo ateva eailai rorrou, me lo ateva etam raarangisana, me lo ateva esaasii voto

<sup>‡</sup>4:26 Sams 4:4

(nim aikkaua tootoo goto ia), isaa o taumattu karika aue la ghaa righi masi voto tale ararimangalina ateva Karisto me God. <sup>6</sup>Karika am mene tau veluem va la kameam tale inangari karika koronna, poli sessaiaane God ange maemae ta lo atoa karika la nongonongo usila. <sup>7</sup>Liuna avalua o me karika am mene aighui teela tale sesa gheeleiaaira.

<sup>8</sup>Poli isaa akasina am ghe tokatoka tale saurrom, me ghaine am, mallanga iem ta Vau ngepona. Am toka nongina aliki tale mallanga iem. <sup>9</sup>(Poli mallanga ateva eaalutu voto masinaaili, ghulughuluena me koronna.) <sup>10</sup>Me am tani ghaa alomasaanga va saa ateva eghelei emasimasi Vau ngepona ateva.

<sup>11</sup>Karika am mene kupi sso tale uunguaa saurrom ateva karika righi uenenna, ta am mae aotuotu isaa o ase niuungu tale tummatavanga. <sup>12</sup>Poli pei palata tani aulia voto la ghelei eisulia tale tummatavanga. <sup>13</sup>Ta voto akapa tale saurrom, mallanga ateva aue eghelei eotu, <sup>14</sup>poli mallanga ateva eghelei isaa akapaaili voto eotuotu. Liuna avalua o me laghe uela ta lo atoa taumattu karika la ghaiesoa va,

“Am anguu taatarala, tau niasekanue atoa,

am totula tale nimate,  
me Karisto aue emallanga ta nge-  
taimim.”<sup>f</sup>

<sup>15</sup>Am tani aitaraa vaalua am tokatoka — karika va nongina lo atoa karika alomasaanga ila, ta nongina alomasaanga atoa. <sup>16</sup>Nau urooro tani ghelei voto masina, ugelei voto masina urooro tani ghelei, poli nau oia sesa nau. <sup>17</sup>Liuna avalua o, me karika am mene alokapakapa, ta aloimim emasaanga aloaloanaane Vau ngepona ateva. <sup>18</sup>Karika am mene ropi oroeieli uaeni va eghelei esavisavilaa

nannaaimim, me aue ekatulainiem lao tale voto sesaaili. Karika, ta am pasu tale Spirit Manga ateva. <sup>19</sup>Am aippooa tee kateva kateva tale nikkinari, me masi kkinari tani kkinari tau sae, am kkinari me am ghelei musik tale urunguitaniimim esae ta Vau ngepona ateva. <sup>20</sup>Nau ekapa am kaili emasina sae ta God Tamaita ia tale isaa akapaaili voto, tale ararina ateaie Iesu Karisto Vauita ia.

<sup>21</sup>Am tau veluem tani ghelei voto ka-  
toa la ghaaloanna me karika va aloan-  
naaimim, tani oneoneaa Karisto.

### Vause atoa me taita atoa lailai ila

<sup>22</sup>Vause atoa lailai iem, am tau veluem tani ghelei voto taitaniimim atoa la ghaloanna me karika va aloannaaimim, nongina am ghelei ta Vau ngepona ateva. <sup>23</sup>Poli taita ateva uruna ia vause ateva nongina Karisto uruna ia ale manga ateva, me ale manga ateva vaulanina ia. Ta Karisto ghe asaangitala. <sup>24</sup>Nongina ale manga ateva eaatoka nannaane ta Karisto, vause atoa lailai iem tee am aatoka nannaaimim ta taitaniimim atoa tale isaa akapaaili voto.

<sup>25</sup>Taita atoa lailai iem, am aielousia vause niim atoa, nongina Karisto eaaielousia ale manga ateva me mausina me ghe tau lao sio maamaulueane <sup>26</sup>tani ghelei manga ia me raarangsana ia, eghe poraie la tale inangari eteva me tale manu eteva. <sup>27</sup>Ghe ghelei evaluela o tani ghaa lo ateva o ale manga masinaaili taataraane, me karika righi tungitungiena o kolukoluena o righi voto eghelei saasakia taataraane, ta manga ia me karika righi voto sesa etana. <sup>28</sup>Tale ia o ase salana atikirighi, taita atoa am tani aielousia vause niim atoa, nonginaaili va am aielousia vilikiimim. See eaaielousia vause niim at-

<sup>f</sup>5:14 Aisaea 26:19; 60:1



eva, eaielousieinia. <sup>29</sup>Karika teva esessaia tale vilikina ateva, ta eangiinginia me eaaitara vilikina, nongina Karisto eghelei tale ale manga ateva. <sup>30</sup>Ta ita, vilikina ita Karisto. <sup>31</sup>“Liuna avalua o me taita ateva ekasukasu vuli tamane me kinna me ekaakateva nonga ilalua me vausenna ateva, me ilalua aue lalu kateva nonga tale vilikiirarua.”<sup>§</sup> <sup>32</sup>Isaa oia llo karika ita rooroo tani kila akapa malloeanina, me aghi aghaaulia Karisto me ale manga ateva. <sup>33</sup>Liuna avalua o, kateva kateva ta ngetaimim etani aielousiaa vausenna ateva, nongina etani aielousieinia, me vausenna ateva etani oneoneaa taitanna ateva.

### **Aliki etoa me tamaira me kinaira atoa**

**6** Aliki etoa, am nongo usila tamaim me kinaim atoa, poli am kapuna iem Vau ngepona ateva, me isaa o voto ghulughuluena. <sup>2</sup>“Uoneoneaa tamam me kinam,” — ia oia inangari nipaopao ateva, aitiutiu ia tale llo inangari nipaopao elaolao aitaua tee inangari nialokoi — <sup>3</sup>“me isaa akapaaili voto aue emasina etam, me tee tokatokaam aue aluse tale kosa ateva oia.”\*\*

<sup>4</sup>Lo atoa taita natuena am, am rau mene ghelei natuim atoa va esessaila, ta am apinosaila tale masi salana, me tale alomasaanga me tale niapasunga Vau ngepona ateva eaaloanna.

### **Tau ngai uungu etoa karika la tokatoka tale aloannaira me vauira atoa**

<sup>5</sup>Tau ngai uungu etoa karika am tokatoka tale aloannaimim, am nongo usila lo atoa la aitoieiniem tale kosa ateva oia, me am oneoneainila tale urunguitaniimim akapa ateva nongina va am nongonongo usila Karisto. <sup>6</sup>Me karika

am mene nnaa va nau la taataraiem nonga, karika. Poli am tau ngai uungu iem ta Karisto me karika am tokatoka tale aloannaaimim. Liuna avalua o, tale urunguitaniimim akapaaili, am uungu aanasa tani ghelei saa voto God ealoanna va am ghelei. <sup>7</sup>Am annaaili tani uungu tee nimasimasi, nongina va am uungu ta Vau ngepona ateva me karika va taumattu ngatoo. <sup>8</sup>Arova tau ngai uungu io utokatoka tale aloannaam o karika, ukilakilaaili va Vau ngepona aue etau aatu aipolipolim tale masi niuungu ugheelei.

<sup>9</sup>Me vau etoa, karika emene aloimim nonga ta katoa tana kapuimim tau ngai uungu karika la tokatoka tale aloannaaira, am rau mene amatautula, poli am kilakila va lo ateva Vauira ia me Vauim ia tee, ia epona liu. Ia karika eghelei tani anna katoa me katoa karika.

### **Ghinna niaiuvi kanna God**

<sup>10</sup>Airuuruu tale inangarighi, isaa avalua toko va, am toka akorokorongana ta Vau eteva me tale kinatama sarasarakaniaane. <sup>11</sup>Am asae akapaaili ghinna niaiuvi kanna God, me aue am roo tani tingina akorokorongana tale sesa uunguaane namu ngateva ta raroai etoa. <sup>12</sup>Karika va ita aaiuvi tee taumattu, ita aaiuvi tee asease spiriti etoa epona me euu, me asease sarasarakana ita tam taatara, me asease voto atoa sarasarakanaaili ila tale saurrom, ghaine la aitoiaa kosa ateva oia. <sup>13</sup>Liuna avalua o me am asae akapaaili ghinna niaiuvi kanna God me tale nau sesa, aue am roo tani tingina akorokorongana. Me nau ta ngam aipanipania ngakapaailila am roo tani tingina. <sup>14</sup>Liuna avalua me o am

<sup>§</sup>5:31 Aitiutiu 2:24

\*\*6:3 Eksodas 20:12; Diuteronomi 5:16

tingina akorokorongana me am iriem tale ai-iri eteae tale voto koronna nonga etalia usueimim, me am asae tee tuku kapa ateva eaakou runga kassauimim, eaimatoonga niuungu ghulughuluena. <sup>15</sup>Me tale kkeimim, am asae aikasukasu tani aimonomosieinam tani ppooa masi inangari luei. <sup>16</sup>Me tee am ghaa aiapallu vaalau eteva eaimatoonga niaikaia, poli ta ngetana aue am roo tani apala isaa akapa unna vaalau sesa taumattu ngateva ataatana esoasoa mae etaimim. <sup>17</sup>Am ghaa kou nguru eteva egheelei runga uruimim ateva, eaimatoonga niasaangi, me am ghaa baenata ateva unna ia Spiriti, ia o inangarina ia God. <sup>18</sup>Am rau mene ainoana tani looloo sae mausi mene kasina taumattu. Nau ekapaaili am looloo sae tale asease nilooloo sae akapa, nongina Spirit Manga ekatulainiem. Am atae nau ekapaaili me am looloo sae mausi kapuna taumattu ngatoa God.

<sup>19</sup>Me am kookolomi tee ta God mausighi tani tau mae inangari etaghi nau aue appooa, me arau mene matautu

tani ppooa ngaotu voto aisulianna tale masi kiukiu. <sup>20</sup>Aghi aghaaghaa liuna ateva God tani ppooa, me aghi tale ale mata voovoo, liuna avalua o am kokkolomi sae va arau mene matautu tani ppooa, nongina God eaaloanna.

### **Airuuruu tale inangarina Pol**

<sup>21</sup>Tikikus aue eaulia ngakapa voto ghe ailutuala etaghi me voto agheelei. Ia nengaghi tuungia ta Karisto, me aghailousieinia. Ia kapuna tau ngai uungu ia Vau ngepona ateva, me egheelei masinaaili uunguaane. <sup>22</sup>Aghe sungiela tani mae taraiem poli aghanna va am kila etana va saa ateva elutulu etamami, me aue eakorokorongana urunguitaniimim.

<sup>23</sup>Alooloo sae va God Tamaita me Vauita ateva Iesu Karisto, aue etau lao luei, niaielousi, me niaiesoa tale tau ngaiesoa ngakapa atoa. <sup>24</sup>Me alooloo sae tee va maamasinaane ateva God aue etoka tale lo atoa la aaielousia Vauita ateva Iesu Karisto, tale lo ateva o niaielousi karika ekapakapa.

*Uru ngai etikirighi Pol ghe pitiela ta*

## **aPilipae atoa**

**1** Angalua Pol me Timoti, kapuna tau ngai uungu iengalua Iesu Karisto, angalu pitipiti atu etaimim akapa lo atoa taumattu manga am ta Iesu Karisto ePilipae tee elda me rikina atoa.

<sup>2</sup> Angalu looloo sae va maamasinaane me luei ekasukasu ta God Tamaita ia me Vau ngepona ateva Iesu Karisto aue etoka teeiem.

### **Nikaili emasinaaili me nilooloo sae**

<sup>3</sup> Akaakaili emasina ta kapughu Goto ateva nau ekapa atoa nau aghannainam.

<sup>4</sup> Tale isaa akapa uneghi nilooloo sae mausiimim akapa, alooloo sae tee nimasimasi <sup>5</sup> poli niaighui me niuungu am ghelei tale masi kiukiu ghe tiuaala tale aitiutiueveva nau me ange mae ghaa sio nau oia. <sup>6</sup> Aghaatoka tuutulighi va, lo ateva ghe tiuaala masi niuungu etaimim aue ghelei isaa o niuungu lomosina ta elaa ruu ta nauna ateva Iesu Karisto.

<sup>7</sup> Karika sesa etaghi tani ateatea ia o salana atikirighi mausiim akapa, poli aghaielousieinam tale urunguitanighi. Arova la iriiri etokaieghi tale sene o aghelei kotokoto me aghaulia va koronna masi kiukiu, am akapaaili me aghi, ita ghaaghaa niparruu tale maamasinaane God. <sup>8</sup> God eroroo tani aulia ngaotu vaalua aghannaaili ekapiem tee ailousiaane ateva Iesu Karisto.

<sup>9</sup> Me uneghi nilooloo sae mausiimim isaa avalua toko, va aielousiaaimim aue epinosa me eoroi tale nialomasaanga, me tale ninanna masalike tale niaielousi etaimim, <sup>10</sup> va am tara kila saa llo voto masina me raarangisana me karika righi

voto sesa etaimim lomosina ta nauna ateva Karisto, <sup>11</sup> me aue am pasu tale uene voto ghulughuluena ekasukasu ta Iesu Karisto, tale niasaesae me nikkaua ta God.

### **Unna sene Pol ghe akasukasula masi kiukiu**

<sup>12</sup> Isaa oia aghanna, kapughu etoa, va am kila va saa llo ghe lutula etaghi ghe aisausiaala tani akasukasu masi kiukiu. <sup>13</sup> Tale isaa o voto me soldia ngakapa atoa la aitoia tanganue Siisa me mene katoa taumattu la kilakila va atokatoka tee sene mausi Karisto. <sup>14</sup> Me poli isaa o sene etaghi, me oroi ila lo atoa kapuita laghe asarasarakanaaila ta Vau ngepona ateva laghe tam matautula tani ppooa inangari.

<sup>15</sup> Koronna va katoa la poppoa Karisto tale nisessaia tani tau sio ararighi eteae me uungua niaittaraaii. Mene katoa la ghelei tale masi ninanna. <sup>16</sup> Kateva uta taumattu laghe ghelei tale niaielousi poli la kilakila va atokatoka oia mausi tani aippooa kotokoto tee masi kiukiu.

<sup>17</sup> Mene kateva uta taumattu la poppoa Karisto ta la nnainila nonga, karika va tale masi ninanna. La nim anna tani ghelei teeioghi voto sesa nau atokatoka tale sene.†† <sup>18</sup> Me isaa o voto vaalua malloeane? Tani voto ateva masinaaili ia, ia avalua toko: va tale saa ase salana arova kamena o koronna me la poppoa Karisto. Tale isaa o voto me amasimasi.

Ue, anim toka masimasi <sup>19</sup> poli akilakila va tale kaluimim nilooloo sae, me tale nisausi kanna kapuna Spiriti eteva Iesu Karisto, saa llo voto ghe lutula etaghi, aue gheleieghi me asaanga. <sup>20</sup> Tale nan-naaghi aghaloanaaili va tale saa ase salana, erau mene ghelei epalataieghi,

††**1:17** Katoa uru ngai laghe pitila, laghe piti emuemuela ves 17, me emulina ves 16.

me anim sarasarakana tani apasunga Karisto tale vilikighi, arova amaulue o amate. <sup>21</sup>Ta ngetaghi, tani toka aue atoka ta Karisto, me tani mate aue aghaa masi voto. <sup>22</sup>Arova maamauluaaghi emene toka tee lao, malloeana va aue uunguaaghi etue uene mane, me ta ngetaghi tani ue va ea alao karika akilakila. <sup>23</sup>Aghainanga teeilalua ilalua o salana aluekiri. Aghanna tani kasu, me alaa toka tee Karisto, poli emaamasinaaaili evalua o. <sup>24</sup>Me mausiimim me emaamasina va atoka. <sup>25</sup>Liuna avalua o me aghaiesoa ngasarasarakanaaaili va aue amene toka aitaua ngakapa teeiem me aikaaiimim me masimasiaaaimim aue namuu. <sup>26</sup>Liuna avalua o me nau amene toka teeiem, masimasiaaaimim ta Iesu Karisto aue epasu esassanga mausighi.

<sup>27</sup>Marova saa ateva elutu, am toka me am kasu nonga tale masi kiukiu kanna Karisto. Arova amae taraiem o anim nongoam, aue akila va am tiitingina akorokorongana tale kateva nonga spiriti, me ekaakateva iem tale ninanna me niuungu va mene katoa la aikaia tale masi kiukiu. <sup>28</sup>Me karika aue am matauta lo atoa la sessa teeiem tale voto la ghelei. Eaimatootongana etaira va, aue la turungila me am aue am saanga. Isaa o voto God aue ghelei. <sup>29</sup>Poli God ghe nim tau aatu sio etaimim mausi Karisto, karika va tani aiesoa nonga etana, ta tani sau maate aitaua teeia. <sup>30</sup>Am tee ngam laolao tale isaa o ase maamaatana me am ghe taraieghila ta aghe ghaala, me isaa oia am nongonongo va aghaaghaa.

**Tani usila vaalua Karisto  
esio siua nannaane**

**2** Arova righi niasarasarakana poli am tokatoka tee Karisto, me arova righi inangari nisausi tale ailousiaane ateva, me arova righi nimae aitaua tale Spiriti eteva, me arova righi niamaramara

me nialousiusi, <sup>2</sup>am ghelei eroorooa masimasiaaghi nau ekateva nonga nannaaimim, me eisaa aitaua niaielousi kateva nonga iem tale spiriti me tani uungu eitaua. <sup>3</sup>Am rau mene ghelei righi voto tale nikuruetu me tani saeaa nannaaimim. Me karika, ta tale nisiua ninannaa am tara katoa va masinaaili ila etaimim. <sup>4</sup>Kateva kateva etaimim erau mene atoka nonga nannaam tale llo nonga voto ia eaalona ta etara tee saa llo mene katoa la ghaloana.

<sup>5</sup>Nannaaimim enonginaaaili tee nannaane Iesu Karisto.

<sup>6</sup>Koronnaaaili Karisto ia Goto ia me karika ghe nnaala va easarasarakana ia tani toka nongina God me tani poso parasi va Goto ia.

<sup>7</sup>Ghe ghaa vella mallangina ateva me ghe ghaala uunguaaira tau ngai uungu etoa,

me ghe gheleiela va arova nim taumattu ia nongina ita.

<sup>8</sup>Me laghe tarala taataraane va taumattu ia

ghe sio siua nannaane

me ghe nongo usilaala tani lao tale nimate

me tani mate tee tale aikotoo.

<sup>9</sup>Liuna avalua o me God ghe taue liue saela epona

me ghe taula arari eteae elaulau isaa akapa arari,

<sup>10</sup>va tale ararina ateae Iesu ila akapa la suuia sio patu kkeira etana,

epona liu me kosa ateva me lo atoa euu tale kosa ateva,

<sup>11</sup>me ila akapa aue la ghaulia ngaotu va Iesu Karisto Vau ngepona ia tale nitau sae ta God Tamaita ia.

**Ita mallanga nongina katto atoa**

<sup>12-13</sup>Mausina avalua o, masi kapughu etoa, me nongina am ghe nongonongo usila, karika va nau atokatoka teeiem nonga, ta nau karika aghi, am ghelei

isaa o voto nau ekapa atoa, poli God euungu etaimim tani asarasarakanaiem tale aloannaaimim me uunguaaimim. Am uungu tee nioneoneea tani apa-sunga va God ghe asaangiemla, tale masi aloaloanaane.

<sup>14</sup> Me nau am ghelei voto am rau mene ghelei tale niauliulia me naitamamarasii, <sup>15</sup> va karika aue righi kaluimim ssavoto me aue am raarangisana, me enatuna am God, karika gheeleiaaimim sesa tale uunguaa karika ghulughuluena me sesa voto tale lo ateva oia vituu. Me am mallanga nongina katto atoa tale kosa ateva, <sup>16</sup> nau am posoposo atingina sae inangari mauue ateva. Me tale nauna ateva Karisto, aue aghasake va karika aghe iloula tale niaikarati eteae o aghe uungula tale nim lao. <sup>17</sup> Me arongona ta laghele kaoaghi sae tale liu nighelei aiaavusuvusuena nongina manu opring, me am ghele ghelei llo tale uneimim niaikaaiia, amasimasi me amasimasi eitauangaili teeiem. <sup>18</sup> Liuna avalua o me am tee am masimasi, me am masimasi eitaua teeioghi.

### Timoti me Epaproditus

<sup>19</sup> Aghaiesoa ta Vau ngepona ateva Iesu va ghaisa ngarighi asungi aatu Timoti etaimim me aghi tee aue amasimasi nau emae aulia kiukiuumim etaghi. <sup>20</sup> Karika amene annaa teva nongina ia, eannangailiim tani aitarainam. <sup>21</sup> Mene katoa la annainila nonga me karika va llo voto isaa ta Iesu Karisto. <sup>22</sup> Me am kilakila va Timoti ang ghe gheleila voto eaapasunga va eroroo, poli nongina kateva me tamane, ang ghe uungu eitaua teeioghila tale masi kiukiu. <sup>23</sup> Liuna avalua o me aghaiesoa va aue asungia tani mae taraiem ghaisa ngarighiieili me atara mua va saa ateva aue la gheleila mua etaghi. <sup>24</sup> Me aghaatoka tuutulighi ta Vau ngepona ateva va gharighi tau amae taraiem.

<sup>25</sup> Me aghanna va emaamasina tani sungi aatu kapughu ta Epaproditus euungu eitaua teeioghi me tee tau ngai uvi ia, me kapuimim tau ngai kasuaa inangari teeia me am ghe sungiela tani mae sausieghi. <sup>26</sup> Ta poli eannangailiim me ghe alousiusieilila poli ghe kilala va am ghe nongola va ghe isikila. <sup>27</sup> Koronna va ghe isikila me ghaisa ngarighi ghe mate, me God ghe alousiusi teieila, me karika va ie nonga ta aghi tee, tani akekkelieghi tale mene kasina nialousiusi. <sup>28</sup> Liuna avalua o me asungi parasia atu etaimim me nau am taraia aue am masimasi me karika aue atani alousiusi. <sup>29</sup> Am ghaaia va nongina kapuna ia Vau ngepona ateva tee kinatama nimasimasi, me am oneoneea ase taumattu nongina ia. <sup>30</sup> Poli ghaisa ngarighi ghe mate tee uunguaane Karisto, me karika ghe anna maamauluaane tani ghelei erorooa nisausi am karika am ghe rooroo tani ghelei etaghi poli masaeuili iem.

### Am rau mene atoka tuutuliimim tale uungua vilikiimim

**3** Liuna avalua o, kapughu etoa, me am masimasi ta Vau ngepona ateva. Karika eghelei righi sesa etaghi tani mene piti aatu etaimim llo ngaghe aulia amuela etaimim, ta isaa o voto eroroo tani sausiem.

<sup>2</sup> Am paniem tale ila o paua atoa isaa o taumattu la ghelei voto karika masina, tau ngai ghelei saasakia viliki etoa. <sup>3</sup> Poli ita isoiso ita. Ita lo atoa ita kakkaua tale Spiriti eteva kanna ia God, ita asaesae Iesu Karisto me karika ita atoka tuutuliita tale uungua vilikiita. <sup>4</sup> Arongona ta aghi arooroo va aghatoka tuutulighi tale isaa o voto.

Arova teva eannaa va eatoka tuutulina tale uungua vilikina, aghi alaulaula. <sup>5</sup> Tale aiaaghaoaluna ateva nau, laghe isoieghila. Aghi atala nge Israeli ieghi,

tale ararimangali eteva ta Benjamin, albru ieghi me asamasama nge Ibru.<sup>‡‡</sup> Me tale uungua inangari nipaopao, aghi Paresi ieghi. <sup>6</sup>Aghe annaaili isaa o voto, liuna avalua o me aghe uviuvi kapuna atoa Iesu, me karika teva erooro tani aulia teeieghi, poli aghe nongo usila ngakapa inangari nipaopao.

<sup>7</sup>Me tale isaa akapa o salana tani ghelei va aghe ghaa oroi voto, nau ghaine ataataraila va peisaane ila mausi Karisto. <sup>8</sup>Liuna avalua o me ataataraila isaa akapa voto peisaane nau aghe toongi teela kinatama voto atoa tani kila Iesu Karisto Vaughu ia. Mausina me aghe velu ekapala voto o, ataataraila va nim lao me aue aghaa nonga Iesu. <sup>9</sup>Me aue atoka ta ngetana, karika aue aghulughuluena tale uungua inangari nipaopao, ta aghulughuluena tale ni-akaaia kanna Karisto, me isaa o nighulughuluena ghe kasula ta God tale ni-aikaaia. <sup>10</sup>Aghanna tani kila Karisto, me sarasarakaniaane tale unna nitottu tale nimate, me tani lao nongina vaalua ghe mmarikanala me tani nongina ia tale matemateane. <sup>11</sup>Me tale isaa o ase salana, aue arooro tani totu tale nimate.

### Ni-iilou esarasarakana tani laa rekata

<sup>12</sup>Karika va ngaghe ghaala isaa o voto va ngaghe ghulughuluena. Iesu Karisto eposoposoghi, me akasukasu kkai tani laa ghaa isaa o voto. <sup>13</sup>Kapughu etoa, karika ataataraila va ngaghe ghaala isaa o voto. Me kateva nonga voto agheeleia, akakkalua llo emuli etaghi me aghameemeti nonga llo emua etaghi. <sup>14</sup>Aghaimuli usi nonga tani laa rekata tale airuruu me tani ghaa aipolipoli nongina God ghe koloaghila tani sae epona liu ta Iesu Karisto.

<sup>15</sup>Ita akapa lo atoa ngita ghe matuennala ita nna ngamasina isaa o voto. Me arova karika am maemae aitaua tale kasina ninannaa, isaa tee o llo God aue ghelei emasalika etaimim. <sup>16</sup>Me arova vaalua, ita toka nonga tale llo voto ngita ghe kilala.

<sup>17</sup>Kapughu etoa, am mae aitaua me am usilaa gheeleiaaghi, me am tani tara amasina lo atoa la kasukasu nongina vaalua ami, ami ghe kasukasu. <sup>18</sup>Poli nongina aghe aulia nonga etaimim oroaata, me ngamene aulia tee nialousiusi, va oroi lo atoa la tokatoka tani ssatee aikotoo ateva ta Karisto. <sup>19</sup>Airuruu tale kasukasuaaira nitturuu eteae. Kovaira ateva kapuira goto ia me llo tani palata, la aasakea. Me nannaaira etokatoka nonga tale voto tale kosa ateva. <sup>20</sup>Me ita tanganueita epona liu, me earieri ita tani toi teva tau ngai asaangi ekasu okae, Vau ngepona ateva Iesu Karisto etana. <sup>21</sup>Aue eaikolikolia ia oia vilikiita ateva sesa ia ghele nongina vilikina masinaaili, tale sarasarakaniaane erooro tani ghaa aitaua ngakapa voto me eghelei tale aloaloanaane.

**4** Liuna avalua o, kapughu etoa, me aghailousieinam me aghanna nanggailiem, am arova aipolipolighi iem tale uunguaaghi me tale masimasiaaghi, liuna avalua o me am tingina akorokorongana ta Vau ngepona ateva, masi kapughu etoa.

### Inangari niloeloe me niakorokorongana

<sup>2</sup>Alooloo luei ta Iuodia me Sintike tani mae aitaua tale ninanna ta Vau ngepona ateva. <sup>3</sup>Me tee akookolomio, lo ateva ughe uungu teeieghi, tani sausi ilalua o vause alua laghe uungu aanasa teeieghi mausi masi kiukiu, tee me Klemen me

‡‡3:5 o albru ieghi me tuvughu ekapa atoa albru ila

ila akapa lo atoa la uungu teeieghi, me arariira isaa tale buku maulue ateva.

<sup>4</sup>Nau ekapa atoa am masimasi ta Vau ngepona ateva, me amene ue va am masimasi. <sup>5</sup>Am tau velu va tau-mattu ngakapa atoa la tara va karika am saasavala inangari, poli Vau ngepona ateva ange aakalakalaa. <sup>6</sup>Am rau mene annangaili asease voto atoa. Tale voto akapa, am kokkolomi sae ta God tani aulia sae aloaloanaaimim tee nikaili emasina. <sup>7</sup>Me luei eteva kanna ia God elaulau ekapaaili ninannaa, aue aitara urunguitaniimim me nannaaimim ta Iesu Karisto.

<sup>8</sup>Liuna avalua o, kapughu etoa, me saa voto koronna, me llo voto pei nio-neoneaa, me llo ghulughuluena, me saa llo raarangisana, me saa llo eaalutu nimasimasi, me saa llo voto taataraane masikkanaaili, me arova righi voto masinaaili o am arua etana, am annaa isaa o voto. <sup>9</sup>Saa llo voto am ghe kilala o ngam ghe ghaala, o am ghe nongola o tarala etaghi, am tootoonga tani ghelei me God, etautau luei, aue toka aitaua teiem.

### **Nikaili emasina tale uneira nitaula**

<sup>10</sup>Namungaili masimasiaaghi ta Vau ngepona ateva poli ngam ghe mene nnainaghila. Akilakila va am ghe nannainaghi erau me poli karika righi salana va am ghe apasunga. <sup>11</sup>Karika aghaulia llo poli aghanna righi niaisausi, poli ngaghe kilala tani toka tale nimasimasi tale asease nitoka. <sup>12</sup>Ngaghe kilala vaalua tani toka arova karika righi voto etaghi o arova oroi voto etaghi. Ngaghe kilala vaalua tani toka tale isaa o ase nau, arova pasu kovaghi o malloona aghi o oroi peighi o karika oroi.

<sup>13</sup>Arooroo tani ghelei voto akapa ta lo ateva eaasarasarakanaieghi.

<sup>14</sup>Me masinaaili etaimim ta am ghe sausieghila tani sau maate tale maamauluaaghi. <sup>15</sup>Am aPilipae atoa am kilakila va nau masi kiukiu ghe tiuaala etaimim, me ngaghe anna tani kasu eMesedonia, am nonga am ghe tau mae sio, me ita ghe ailuaala voto. Karika mene teva ale manga ghe gheleila isaa o voto. <sup>16</sup>Me nau aghe tokatoka eTesalonika am ghe aasaoki mae voto tani sausieghi, karika va katengaata nonga. <sup>17</sup>Karika va poli aghe annaa va am ghe tau mae voto, ta aghe annaa va am ghe ghaa aipolipoli ta poli masi gheeleiaaimim. <sup>18</sup>Ngaghe ghaala voto aghannaa me oroieili. Aghe pasueilila poli am ghe tau lao sio ta Epaproditus va emaea voto am ghe asaoki mae sio, nonginaaili nitau lao tale aiaavusuvusuea masi ngusungusuaane, me God eghaaghaa me emasimasia. <sup>19</sup>Me aue kapughu Goto ateva aue tau aatu isaa akapaaili aloaloanaaimim tale oroi ngepona liu ta Iesu Karisto.

<sup>20</sup>Ta God Tamaita ia aue ita taue sae tale nau oia, me nau ekapa atoa. Koronna.

### **Airuuruu tale inangarina Pol**

<sup>21</sup>Am aulia masimasiaaghi ta isaa akapa taumattu manga ta Iesu Karisto. Kapughu tee atoa la tokatoka teeieghi laghe suula masimasiaaira etaimim. <sup>22</sup>Ila akapa taumattu ngatoa manga ila, la suu teela masimasiaaira ta lo atoa la uungu ta Siisa.

<sup>23</sup>Maamasinaane Vau ngepona ateva Iesu Karisto aue toka tee lo ateva spiriti etaimim. Koronna.

*Uru ngai etikirighi Pol ghe pitiela ta*

## **aKolosa 1:22**

### **Pol ghe amasimasila tau ngaiesoa ngatoa eKolosa 1:22**

**1** Aghi Pol, kapuna apostolo ieghi Karisto Iesu me tale aloaloane God, me Timoti kapuita ia.

<sup>2</sup>Tale taumattu ngatoa manga iem me am aimuli emasinaaili ta Karisto eKolosa 1:22, maamasinaane me luei etaimim emae sio ta God.

### **Nikaili emasina me nilooloo sae**

<sup>3</sup>Angalu kaakaili emasina ta God Tamana ia Vau eteva Iesu Karisto tale kalumami nilooloo sae, <sup>4</sup>poli angalu ghe nongola uneimim niaikaaia ta Karisto Iesu me aielousiaimim ta kapuna tau manga akapa atoa God. <sup>5</sup>Am aikaaia poli God eaitara aipolipoli eteva epona liu am kilakila va aue tau atu. Ngam ghe nongo vella arau tale inangari koronna, tale masi kiukiu, <sup>6</sup>ange mae sio etaimim. Me tale kosa akapa ateva inangarina ateva God ekuukunea uena me epiipinosa nongina ghe gheleila etaimim nau am ghe kilala inangari koronna tale maamasinaane God. <sup>7</sup>Am ghe nongoala ta masi kapumami eteva ta Epapras, masi tau ngai uungu eteva kapuna ia Karisto, eghaaghaa liumami. <sup>8</sup>Me ange aulia tau mae sio etamami kaluimim niaielousi kanna Spirit Manga.

<sup>9</sup>Liuna avalua o me nau eteva ami ghe nongola karika ami ghe ruula tani looloo sae tani kolomi God tani tau aatu alomasaanga tale Spirit Manga ateva me aue am kila aloanaane God. <sup>10</sup>Me aue am kasu tale masi salana eoneonea God, me aue am amasimasia nau am ghelei masi niuungu me aue am tani kila amasinaaili God. <sup>11</sup>God

aue easarasarakanaiem tale kinatama sarasarakaniaane tani gheleiem va am rau mene sio asoaso tale nau sesa arova emae ta aue am nim matua ngatoka, me am masimasi <sup>12</sup>tani kaili emasina sae ta Tamaita ateva, ia ghe gheleiemla va am rooro tani aitaau saa llo eghe aimonomosiaala epona liu tale kapuna tau manga atoa tale mallanga ateva.

<sup>13</sup>God ghe ghaa oghitala tale sarasarakania saurrom ateva, me ghe atokaita lao sio tale ararimangalina ateva Natuna ateva eaielousieinia. <sup>14</sup>Ie nonga aighaa oghita ia, me ekakkaluaa kaluita ssavoto.

### **Iesu Karisto ia nonga tale voto akapa**

<sup>15</sup>Karisto tootoona ia God ateva, karika ita rooro tani taraia, ghe tokala arau me ia mue ia tale voto akapa ghe gheleila. <sup>16</sup>Poli ta ngetana voto akapa God ghe gheleila, voto epona liu me tale kosa ateva, voto ita taatara me voto karika ita rooro tani tara, me ila akapaaili ensolo atoa, kuturu etoa, raroai etoa me asease tau ngai toitoi etoa. God ghe gheleila isaa akapaaili voto ta Karisto, me kanna Karisto. <sup>17</sup>Ghe tokala emua arau, me ta ngetana isaa akapaaili voto etokatoka amasina. <sup>18</sup>Me ia emuemua ale manga ateva nongina uruita ateva emuemua vaulaniita ateva. Ia ghe toka akasinala me aitiutiui ia tani totu tale nimate. Ia avalua o me ie nonga eaitara akapanaaili voto atoa. <sup>19</sup>Poli God emasimasi va isaa akapaaili voto kanna God etoka ta Karisto. <sup>20</sup>Ta ngetana God ghe mene atoka aitauala isaa akapa voto teeia, voto tale kosa ateva me epona liu, me ghe gheleila luei tale raena ateva Natuna ateva tale aikotoo ateva.

<sup>21</sup>Me am, isaa to nau am ghe masaeilila me tale nannaaimim am ghe sessa tee God, me ghegheleiaaimim sesa, <sup>22</sup>me isaa oia ia ghe atoka aitaueiniemla teeia tale matemateane



tale aikotoo ateva, tani maeainiem nongina etokatoka, manga, me raarangisana, me karika righi sesa gheegheleiaaimim, <sup>23</sup>arova am aloanna tani mene lao tee tale kaluimim niaikaaia, me am toka parasi me am tingina akorokorongana tale masi kiukiu am ghe nongola, laghe ppooala tale isaa akapaaili taumattu tale kosa ateva, me aghi tee, Pol, tau ngai uungu ieghi tani ppooa ia o masi kiukiu.

### Uunguane Pol tale ale manga

<sup>24</sup>Ghaine amasimasi tani ghaa maamaatana tani aisausieinam, me aghelei ekapa llo maate Karisto ghe suitoon-gainaghila va aghaaghaa tale vilikighi, tani sausi ale manga ateva. <sup>25</sup>God ghe tau mae sio niuungu etaghi tani uungu mausi ale manga ateva, ghe sungieghila tani ppooa akapa masi kiukiu etaimim. <sup>26</sup>Ia o inangari eteva ang ghe aisulia vella arau, me tale isaa oia nau ang ghele kaurekatila ta taumattu manga. <sup>27</sup>God ghe suitoongainilala tani apasungaala voto aisuliana etaira, va tau ngeleka atoa aue la ghaa kinatama niarangise ateva, me Karisto aue toka teeiem tau ngeleka atoa, me am atoka tuutuliimim tale voto emae epona liu. <sup>28</sup>Ami aulia ngaotu Karisto, ami aulia kieira taumattu ngakapa atoa me ami apasungala ta taumattu ngakapa atoa tale alo-masaanganiaane Karisto, tani ghelei taumattu ngakapa atoa va la matuena ta Karisto nau la tingina emua ta God. <sup>29</sup>Lina avalua o me auungu ekorokorongana tale isaa akapaaili sarasarakaniaane etautau mae etaghi.

**2** Aghaloana tani aulia kieimim vaalua aghe saula maamaatana mausiimim me tau ngai kua ngatoa eLaodasia, me tee lo atoa la aikaia karika ami ghe aitarala me ila. <sup>2</sup>Aghanna tani aisausieinila me tani gheleila va la toka aitaua tani korokorongana tale niaielousi. Aue

la kaarasi tani ghaa niarangise me alomasaanga, aue la kila voto aisuliana kanna God, isaa ta Karisto. <sup>3</sup>Karisto nonga erooro tani ghelei taumattu ngatoa la alomasaanga me tani apasunga llo voto God eaipanipania ta taumattu ngatoa. <sup>4</sup>Aghaulia etaimim llo oia voto, ta toa taumattu la rau kameam nonga tale kamena niapasunga am nongonongo arova masinaaili. <sup>5</sup>Arongona ta masaeili eghe etaimim, me urunguitanighi eteva etokatoka teeiem, me amasimasi tani tara va tokatokaimim masina me uneimim niaikaaia ta Karisto korokoronganaaili.

### Ouna ateva mauue ta Karisto me karika tale inangari niloeloe

<sup>6</sup>Me isaa oia, nongina am ghe ghaala Karisto Iesu Vauimim ia, am kasu teeia nau etoa. <sup>7</sup>Am atoka maamauluaaimim epona etana nongina ai eteae oane eposoposo asarasarakana ia, me am tingina akorokorongana tale niaikaaia am ghe ghaala, me aue am kaili emasina etana nau etoa.

<sup>8</sup>Am aipanipania! Toa taumattu la rau kameam nonga tale nim nannaaira pei tale kosa ateva oia korokoronganaaili me kamena, emaemae ta raroai etoa me karika emaemae ta Karisto. <sup>9</sup>Poli isaa akapaaili voto kanna God etoka ta Karisto, <sup>10</sup>me ngam ghe pasula nau am tokatoka ta Karisto, ia emuemue ngakapa tau ngai toitoi etoa me namu ngatoa tee. <sup>11</sup>Nau eteva am ghe mae sio ta Karisto am ghe ghaala ni-isoiso, karika tale ni-isoiso tuunga ateva, ta am ghe ghaala ni-isoiso ateva kanna ia Karisto, ghe iso vella vilikina tale matemateane, <sup>12</sup>poli am ghe mate teela Karisto nau eteva laghe asuuemla tale manu me am ghe totu teeiela tale ouna ateva mauue, poli am atoka tuutuliimim tale kaluimim niaikaaia elome tale sarasarakaniaana

God, ghe totula Karisto tale nimate. <sup>13</sup>Am nongina matena am poli kaluimim ssavoto me poli sesa gheegheleiaimim karika ghe kapa, vara me God ghe ghelei esakesakeamla ta Karisto, ta ghe kaluaala isaa akapaaili kaluimim ssavoto. <sup>14</sup>Ghe sei vella kaluita ssavoto tale uru ngai laghe pitila me kaluimim dinao nau ghe matela tale aikotoo. <sup>15</sup>Tale ia o salana ateva ghe apalala sarasarakania sesa spiriti etoa me tau ngai toitoi me ghe apalatailala ta mataira taumattu ngatoa nau eteva ghe apalailala tale aikotoo.

<sup>16</sup>Ia avalua o me am rau mene tau veluem va la aulia teeiem tale inana am namanama me manu am ropiropi me karika am laolao tale kasina tana uneira nivelu eitaua tale nau manga tale kateva kateva ninamanama me kateva kateva ulana me tale nau sambati. <sup>17</sup>Isaa o inangari niloeloe me kastam nim tootoo voto auena emae, me ia o Karisto, ia koronna ia, ang ghe mae sio. <sup>18</sup>Am rau mene tau velu taumattu ngatoa va la ghelei kaluimim nikkaua tani ue va am siua nannaaimim me am kkaua ensolo atoa me la anna va muennaaili ila poli laghe tarala nitaatara, sesa nannaaira egheegheleila me la tau-tau sae nannaaira. <sup>19</sup>Karika la tokatoka tee Karisto, ia nongina uruita eposoposo aitaua vaulaniita me riuita me ita pipinosa nau eteva God eapinosaita.

<sup>20</sup>Am ghe mate teela Karisto, me ghe akekeliemla tale raroai etoa, me vaalua am mene ususi inangari niloeloe tale kosa ateva oia: <sup>21</sup>Am rau mene poso, am rau mene namunamua, am rau mene tuli! <sup>22</sup>Isaa o ase inangari niloeloe pei tale kosa ateva oia aue ekapa, nim kaluira taumattu ngatoa la apasunga. <sup>23</sup>Isaa o inangari niloeloe

enim gheegheleila va la kkaua me la ghelei voto tale vilikiira va enim usila nannaaira. Isaa o inangari niloeloe arova tani alomsaanga, karika, me karika etau-tau mae righi niaisausi tani apala sesa gheegheleia kateva kateva taumattu.

### Am toka tale ouna ateva mauhue

**3** Nau am ghe totula tale ouna ateva mauhue, am ghe totu eitaua teela Karisto, me am tani pae voto ngepona liu, nongina Karisto etokatoka tale pai muenna atelange ta God <sup>2</sup>me am atoka nannaaimim tale voto ngepona liu me karika tale kosa ateva. <sup>3</sup>Tale lo ateva oia mauhue angam ghe matela etana, me maamauluuaaimim tuunga ateva eaisulia ta Karisto elome ta God. <sup>4</sup>Karisto etau-tau aatu mauhue ateva. Me nau eteva ekaurekati tale ia akapa kosa ateva, aue eapasunga sarasarakaniaane me mallangina, am tee aue am lao aitaua teeia me aue la tara akapaiem me maamauluuaaimim aue toka tee Iesu, karika aue eaisulia me aue am toka tale mallangina ateva.

<sup>5</sup>Liuna avalua o me am ghelei emate sesa ninanna me sesa voto tale kosa ateva oia: uungua niaso tee vause me taita karika lailai, karika am mene kune taita me vause, me am rau mene ghelei llo voto sesa taumattu ngatoa la paapalata, me aloalooaimim korokoronganaaili tani kune vause me taita tani ghelei ssavoto, me nikuruetu, nim nongina va am kakkaua tootoo. <sup>6</sup>Poli isaa o ase voto, sessaiaane God ange mae sio.<sup>¶</sup> <sup>7</sup>Me am, am ghe kasukasu tale llo akasina maamauluuaaimim am ghe tokatoka etana. <sup>8</sup>Me isaa oia, am ghau velu etaimim isaa o asease voto nongina nisessai, me nianna saasakia ta kateva, me nitam aloana kateva, me niasake, me

<sup>¶</sup>3:6 *ange mae sio* Kasina uru ngai laghe pitila, laghe pitila *ange mae sio ta lo atoa la saasakeainia*.

inangari nilakolako ta paaimim. <sup>9</sup>Karika am mene aikamea, nau eteva am ghe ghaa vella uunguaimim pei ngarau am ghe gheeghelei <sup>10</sup>me am ghe mene tiuaa ngaounala nau God ghe mene ghelei eounaiemla tale tootoona ateva lo ateva ghe gheleitata, tani ghelei va am tani kila alomasaanganiaane. <sup>11</sup>Tale ouna ateva mauue karika toa aJiu me karika toa aGrik, me karika toa isoiso me lo atoa karika isoiso ila, me lo atoa karika va aJiu ila me aGrik ila, me lo atoa karika alomasaanga ila, me lo atoa karika la rooro tani ghelei voto tale nim nannaaira, me lo atoa la rooro tani ghelei nongina la aloana tani ghelei, ta Karisto ie nonga akapa etaira.

<sup>12</sup>Nongina God ange suitoongainamla va am manga am, me eailousiangailiem, am amolumoluem tale isaa o niuungu: am aisausia lo atoa karika righi peira, me niaisausi etani mae tale urunguitaniimim, me am sioa nannaaimim ta katoa, me am nnaa mene kateva, me karika emene sessai parasiem ta mene kateva. <sup>13</sup>Arova ange gheleila voto ateva masina ia me karika ange mae sio ta nannaam, unim sioaa nannaam me lao aitauea teeia, me arova kateva eghelei saasakia, am kkalueinia, nongina Vau eteva ghe kaluaala kaluimim maamatana. <sup>14</sup>Me tale llo voto matuutulienua, am ailousia ngakoronna me aue am toka amasina tee mene kateva. <sup>15</sup>Am tau velu kannu luei eteva Karisto emuemua tale urunguitaniimim, nongina ghe koloamla tani kateva nonga, me am kaili emasina. <sup>16</sup>Am tau velu inangarina ateva Karisto etoka elome etaimim me eapasunga ta kateva kateva alomasaanga tani kinari tau sae emaemae ta Spiriti eteva, me kinari tee nimasimasi tani tau sae God tale urunguitaniimim. <sup>17</sup>Me saa llo am ghelei tale inangari me niuungu, am ghelei llo voto tale ararina atea Vau

eteva Iesu, tani kaili emasina ta God Tamaita ia.

### Inangari niloeloe tale kateva kateva tau ngaiesoa

<sup>18</sup>Vause atoa lailai iem, am atoka nannaaimim ta taitaniimim atoa ta isaa o voto ghulughuluena ta Vau eteva. <sup>19</sup>Taita atoa lailai iem am aielousia vausenimm atoa karika am mene sorriena teeila. <sup>20</sup>Aliki etoa am nongo usila tamaimim me kinaimim atoa tale isaa akapa voto, poli isaa o voto eamasi-masi Vau eteva. <sup>21</sup>Tamatama atoa am rau mene savalaa natuimim atoa va esesaila, erau ghelei nannaaira va esioaaili euu. <sup>22</sup>Lo atoa am uungu me karika am tokatoka tale aloaloanaaimim, am nongo usila vauimim atoa tale kosa ateva oia tale voto akapa. Karika am uungu nonga ta nau eteva la taataraiem va am ghelei emasimasila, ta am uungu tale masi ninanna emaemae tale urunguitaniimim, me tani oneoneaa God. <sup>23</sup>Saa niuungu am gheeghelei, am ghelei tale masi ninanna emaemae tale urunguitaniimim ateva, nongina va am uungu ta Vau ngepona ateva, me karika va ta taumattu ngatoa. <sup>24</sup>Am uungu emasina poli am kilakila va ta Vau eteva aue am ghaa voto masina ghe aulia ngalokoila, nongina aipolipoli. Am uungu ta Vau eteva Karisto. <sup>25</sup>Tau ngai ghelei ssavoto atoa aue la ghaa aipolipoli tale llo voto sesa laghe gheleila. Karika aue righi niaimassia.

**4** Vau etoa am aitoia tau ngai uungu etoa karika la tokatoka tale aloaloanaaira, am ghelei emasina me ghulughuluena lao ta kapuimim tau ngai uungu etoa, ta am kilakila va am tee kapuimim Vau eteva ia epona liu.

### Niailoe tale nikokkolomi sae

<sup>2</sup>Am rau mene amaomao tani kokkolomi sae, me nau am kokkolomi

sae, nannaaimim eoti, me am kaili emasina sae ta God. <sup>3</sup>Me am kokkolomi sae mausimami tee ta God aue tau mae salana tani laa ppooa masi kiukiu, me aue ami aulia ngaotu voto aisuliana ta Karisto, poli aghe poppooa masi kiukiu eteva, laghe atokaieghi ssola tale ale mata voovoo. <sup>4</sup>Atani mene ppooa ngaotu masi kiukiu ta taumattu ngatoa. Ia avalua o me am kokkolomi sae ta God me aue esausieghi tani kila tani ppooa ngamasinaaili.

<sup>5</sup>Nau am tokatoka tee taumattu karika la aikaaia ta Iesu, am tani aitoka tee llo voto am gheeghelei me am rau mene tau velu kasina voto va enim peisaane. <sup>6</sup>Nau etoa am sama amasina etaira, nongina uela ateva eaamasikana anem inana, ia avalua o me aue am kila tani asokoi kaluira nikokkolomi.

### **Airuuruu tale inangari niloeloe me nimasimasi**

<sup>7</sup>Tikikus aue eaulia ngakapa voto ghe ailutuala etaghi. Ia nengaghi tungia aghailousieinia. Ekaakarrasi tani uungu me kapuna tau ngai uungu ia Vau ngepona ateva nongina aghi. <sup>8</sup>Aghe sungiela tani mae taraiem tale masi voto am kila etana va saa ateva elutulututu etamami, me ia aue akorokorongana urunguitaniimim. <sup>9</sup>Aue emae aitaua tee Onesimas, am kilakilaia ghe kasula oiena tale masalikiimim atea, ekaakarrasi tani uungu me ami aielousiangailia. Ilalua aue lalu aulia etaimim isaa akapaaili voto elutulututu oia.

<sup>10</sup>Aristakus esuula masimasiaane etaimim. Etokatoka teeieghi tale ale mata voovoo. Me Mak, aloana ta Banabas ia tee esuula masimaisaane

etaimim. Angam ghe nongola saa ateva ta Mak; arova emae etaimim, am aikoloainia. <sup>11</sup>Me Iesu, la kolokoloa va Jastas, ie tee esuula masimasiaane tee etaimim. Ilotolu o taita kotolu ilotolu nonga aJiu ilotolu. Ilotolu lotolu kakkaua, me lotolu uungu teeieghi tale ararimangalina ateva God. Lotolu kaakarrasi tani aisausieinaghi. <sup>12</sup>Epparas tee ghe kasula ona ta tanganueimim ie tee etautau aatu masimasiaane etaimim. Ia kapuna tau ngai uungu ia Karisto Iesu. Karika eaitoka ta ekokkolomi sae nau ekapa atoa poli am, va am tingina akorokorongana me am matuena me aue am kilaaili saa voto God ealona va am ghelei. <sup>13</sup>Aghaloana tani aulia ngakorokorona etaimim va ia euungu ekorokoronganaaili tani sausiem, me lo atoa tee eLaodasia me Hierapolis. <sup>14</sup>Luk dokta ia ami ailousiangailia etautau aatu masimasiaane etaimim me tee Diimas.

<sup>15</sup>Me am aulia tee masimasiaaghi ta tuemami me nengamami etoa eLaodasia, me ta vause ateva la kolokoloa va Nimpa me tee ta lo atoa la kakkaua tale alena ateva. <sup>16</sup>Nau eteva lo atoa am tokatoka eKolosa am ruu tani nongoa uru ngai etikirighi am mene laoinia me la ritia tale ale manga ateva eLaodasia. Me am tani ritia uru ngai etikirighi aghe pitila ta aLaodasia ngatoa. <sup>17</sup>Me am aulia ta Akippus va, “Utani ghelei ekapa llo voto Vau eteva ghe tau aatu sio va ughelei.”

<sup>18</sup>Aghi Pol, aghe pitila isaa o masimasiaaghi. Am annaa tokatokaghi tale ale mata voovoo. Maamasinaane God aue toka teeiem.

*Aitiutiu etikirighi uru  
ngai Pol ghe pitiela ta*

## **aTesalonika ngatoo**

**1** Aghi Pol, Saelas me Timoti,  
Ami pitipiti aatu etaimim tau-  
mattu ngatoo tale ale manga ateva ona  
eTesalonika ta God Tamaita ia, me Vau  
ngepona ateva Iesu Karisto.

Ami looloo sae va maamasinaane God  
me luei aue etoka etaimim.

### **Nikaili emasina tale uneira niaikaiaa aTesalonika ngatoo**

<sup>2</sup>Nau ekapa atoa, ami kaakaili  
emasina ta God ta poli mausiimim,  
me ami aaseainam tale kaluimami  
nilooloo sae. <sup>3</sup>Nau ekapa atoa ami  
looloo sae ta matane God Tamaita ia,  
ami nannaa uunguaaimim elutulutu  
tale aikaiaaimim, me niuungu am  
gheeleei tale niaielousi, me karika am  
maamangoo nau am toitoi voto ita  
aatoka tuutuliita etana ta kapuita Vau  
ngepona ateva Iesu Karisto.

<sup>4</sup>Poli ami kilakila va God ghe  
suitoongainamla va natuna am, masi  
kapuimami etoa, God eaielouseinam,  
<sup>5</sup>ta poli, nau eteva ami ghe poppooa  
etaimim, kaluimami masi kiukiu  
karika ghe mae sio etaimim tale  
mata nginangari nonga, ta tee  
sarasarakana me Spirit Manga ateva, me  
nannaaimami sarasarakanaaili tale masi  
kiukiu, nongina am ghe tarala vaalua  
ami ghe toka teeiemla mausiimim. <sup>6</sup>Am  
ghe uusila gheeleeiaaimami me Vau  
ngepona ateva. Arongona ta am ghe  
ghaala oroieili asease voto sesa laghe  
gheeleei teeiem, Spirit Manga ateva  
ghe tau aatu nimasimasi nau eteva  
am ghe ghaala inangari eteva. <sup>7</sup>Liuna  
avalua o me tau ngaiesoa ngakapa atoa  
eMesedonia me Akaia la taatarata aatu

etaimim va uneira niaimatoongana iem.  
<sup>8</sup>Kurruna ateva inangarina ateva Vau  
ngepona ghe kasula etaimim. Karika  
laghe nongoala nonga eMesedonia me  
Akaia. Aikaiaaimim ta God ngila ghe  
kila akapa seela. Liuna avalua o me  
karika ami rooroo tani mene aulia righi  
voto. <sup>9</sup>Poli ila la kiukiuua vaalua am  
ghe ghaaiemamila, me la ghaulia vaalua  
am ghe liula viliimim tale tootoo goto,  
me am ghe lao sio ta God tani uungu  
ta God ateva sakesake ia me koronna  
ia, <sup>10</sup>me tani toi Natuna ekasu epona  
liu, ia God ghe totuela tale nimate, me  
ia Iesu eaasaangita tale sessaiaane God  
auena emae.

### **Uunguaane Pol eTesalonika**

**2** Am kilakila, kapuimami etoa, va  
maemaeaimami etaimim karika  
ghe nim peisaanela. <sup>2</sup>Me auena ami ghe  
mae etaimim ami ghe ghaa akasinala  
maate tale maamauluaaimami, me  
laghe gheeleei epalataiemamila ePilipae,  
nongina ngam ghe kilala. Me poli  
va aisausiaane God, ami ghe ghaala  
sarasarakana tani aulia etaimim masi  
kiukiu kanna God, arongona ta tau ngai  
ssateeiemami etoa la gheeleei teeiemami  
voto sarasarakanaaili. <sup>3</sup>Poli inangari  
nissausi ami aulia, karika ekasukasu  
tale voto kamena me kulukulutana,  
me karika va ami anna tani kameam.  
<sup>4</sup>Me karika, ta ami aippooa nongina  
taumattu God ang ghe atokala tuutulina  
ta ngetaira, me ghe tarala va ami  
rooroo, me ghe tau mae sio niuungu  
tani aulia masi kiukiu. Karika ami anna  
tani amasimasi taumattu, ta ami anna  
tani amasimasi God poli ia etootoonga  
urunguitaniimami. <sup>5</sup>Am kilakila va  
karika ami ghe gheeleei inangari tani  
nim ghaaiem, me karika ami ghe  
tara ssaila righi peiimim me ami ghe  
aaisulia va am rau kila. God etaatarata  
me ekilakila isaa oia voto. <sup>6</sup>Karika ami

ghe paepae niarua ta ngetaimim o ta mene katoa.

Poli kapuna apostolo iemami Karisto, ami ghe roola va ami ghe tau aatu maate etaimim tale uunguaa viliki veu. <sup>7</sup>Me karika, ta ami ghe kaarasila tani toka teeiem nonginaaili va ami kinaim iemami. <sup>8</sup>Ami ailousiangailiim, liuna avalua o me ami masiasieili, karika va tani aulia nonga masi kiukiuna God, ta ami tautau aatu tee maamaulu-aimami, poli ami maasiangailiim. <sup>9</sup>Koronnaaili, kapuimami etoa, am roo tani nnaa niuungu me aanasa ami ghe ghaaghaa. Ami ghe uungu eleivo me el-laa tani ghaa aneimami inana ta poli ami ghe anna va ami rau mene taula maate ta teva taumattu nau ami ghe poppooa masi kiukiuna God etaimim.

<sup>10</sup>Am, am kilakila, me God tee, vaalua ami ghe mangala me ghulughuluenala, me karika am ghe aliu teeiemami tale righi voto, nau ami ghe tokatoka teeiem lo atoa am ghe aiesoa. <sup>11</sup>Nongina am kilakila va ami ghe ghelei kateva kateva etaimim nongina va ami tamaim iemami. <sup>12</sup>Ami ghe aasararakanaiem me poppooa inangari nissausi, me ami ghe aulia ngasararakana etaimim va, tani kasu tale masi salane God, ia ghe koloamla tani toka tale ararimangalina ateva me tale mallangina ateva.

<sup>13</sup>Me nau ekapa atoa ami kaakaili emasina ta God poli nau am ghe ghaala inangarina ateva God, am ghe non-goala etaimami, karika am ghe ghaaiela va arova inangariira taumattu ngatoa, ta am ghe ghaaiela va inangarina ia God, me koronnaaili va inangarina ia God. Nau ghaine euungu ta lo atoa etaimim am aiesoa. <sup>14</sup>Poli am, kapuimami etoa, ngam uusila nongina vaalua taumattu ngatoa tale alena ale manga God eJiudia ta Karisto Iesu: ngam ghe ghaala mmarikana ta kapuimim atoa tanganueimim eitaua, nim nongina

isaa o ale manga eJiudia laghe ghaala mmarikana ta aJiu etoa, <sup>15</sup>laghe uvi ematela Vau ngepona ateva ta Iesu me propete atoa, me laghe ameti velue-mamila, me laghe ssatee akapa teela taumattu. Laghe gheleila God ghe tam masimasila. <sup>16</sup>Ami aloanna tani aippooa tee lo atoa karika va aJiu ila va la saanga, me laghe tootoonga tani ghelei rungainamami. Tale isaa o salana, laghe apasulala tale ssavoto me ghe laula aioghioghi, me tale airuuruu sessaiaane God ghe tokala etaira.

### Pol ghe annaaili tani laa tara aTesalonika ngatoa

<sup>17</sup>Me, kapuimami etoa, ami ghe masaula etaimim tale nau karika aluse (karika va tale ninanna, ta tale vilikiimami ekapa), liuna avalua o me ami ghe paepaeaili salana poli kinatama nannaaimami tani mae taraiem. <sup>18</sup>Ami annaaili tani mae taraiem, me koronnaaili aghi Pol aghe tootoongaala oroiata, me Satana eghelei rungainamami. <sup>19</sup>Poli isaa o voto ami nannangaili va ami ghaa auena, me isaa o uneita nimasimasi me kou nguru aue ami ghaa nau ami tingina ta matane Vau ngepona ateva Iesu nau emae. Karika am kilakila va mausiimim ami masimasi? <sup>20</sup>Mausiimim me aue ami ghaa nioneoneaa me nimasimasi.

**3** Poli karika ami ghe roola tani ghaa velu ia o ninanna ngateva tale nannaaimami, ami ghe nnaala va masina aghi nonga atoka eAten. <sup>2</sup>Ami ghe suu aatu sio Timoti, ia kapuimami ia, me kapuna tau ngai uungu ia God tani kasuaa masi kiukiuna Karisto, tani akorokoronganaiem, me tani aulia inangari nissausi tale aikaaiaaimim <sup>3</sup>va karika teva etaimim emene katu tale isaa o nitotoonga. Am kilakila amasina va ita aue ita lao tale isaa o ase nitotoonga. <sup>4</sup>Nau ami ghe tokatoka teeiem, ami ghe

aaulia etaimim nau ekapa atoa va aue ita ghaa mmarikana, me am kilakilaaili va isaa o voto ange lutulutu ekoronna. <sup>5</sup>Mausina avalua o me poli anannangaili isaa o voto, me ngasuusu aatu Timoti tani mae kila va vaalua aikiaaiaaimim. Amaamatautu va tale righi ase salana, ssaikame ateva erau tootoongainiem, me uunguaaimami etaimim erau nim peisaane.

### Masi kiukiu Timoti ghe oghiaa mae sio

<sup>6</sup>Me ghaine, Timoti ang ghele mae rekata asio etaimami, ghe kasula etaimim me ghe rekataala masi kiukiu tale aikaaiaaimim me niaielousi. Ghe auliaala vaalua am nannainamami tee nimasimasi me am annaaili tani taraiemami, nongina ami tee ami annaaili tani taraiem. <sup>7</sup>Liuna avalua o, kapuimami etoa, me tale isaa akapa uneimami maate me niuviuvi, ami ghe sarasarakana nau ami ghe nongola aikaaiaaimim. <sup>8</sup>Ia oia ami rooro tani toka, poli am tiitingina akorokorongana ta Vau ngepona ateva. <sup>9</sup>Ami kaakaili emasina ta God poli am, mausiimim ami ghaaghaa kinatama nimasimasi eteva ta God. <sup>10</sup>Eleivo me ellaa ami looloo sae asarasakanaaili va ami ghele mene taraiem, me tani mene aulia tau aatu llo karika tale aikaaiaaimim.

<sup>11</sup>Ami looloo sae va aue kapuita God ateva, Tamaita ia, me Vau ngepona ateva Iesu aue ghelei emasalika salana me ami mene mae taraiem. <sup>12</sup>Aue Vau ngepona ateva eghelei ailousiaaimim enamu, me epasu esassanga, me ekao vellao ta kateva kateva etaimim me ta mene katoa taumattu ngeleka nongina ami, ami ghe gheleila etaimim. <sup>13</sup>Ia aue asarasakana urunguitaniimim, me karika aue righi kaluimim ssavoto me aue am manga ta matane kapuita God ateva Tamaita ia, nau kapuita Vau nge-

pona ateva Iesu emae tee ila akapa kapuna atoa manga ila.

### Ita toka tani amasimasi God

**4** Liuna avalua o, kapuimami etoa, me ami ghe loeamla vaalua tani toka tani amasimasi God, me tokatokaaimim nau ghaine am usila. Me isaa oia ami kookolomiem me ami aulia ngasarasakana etaimim ta Vau ngepona ateva Iesu tani gheleiem va am toka tale ia o ase nitoka ateva nau ekapa atoa. <sup>2</sup>Poli am kilakila saa inangari niloeloe ami ghe tau aatu sio etaimim, me isaa o inangari, matuutuliena ghe mae sio ta Vau ngepona ateva Iesu.

<sup>3</sup>Aloaloanaane God etaimim va am manga, me am akekkeliem tale ase niailai etoa karika elaolao tale uungua nilai emasina. <sup>4</sup>Kateva kateva etaimim etani kila vaalua tani ainanganangaa vilikina tale salana manga me nioneonea, <sup>5</sup>karika va tale sesa ninannaa emuemueiniem am ghelei, nongina taumattu ngeleka atoa karika la kilakila God. <sup>6</sup>Me tale isaa o voto karika teva emene ghelei saasakia ta teva kapuna, o ekamea me eghaa peina. Vau ngepona ateva aue liu aipolipoli sesa tale ia o ase taumattu ngateva, poli isaa o ase ssavoto, nongina ngami ghe aulia amuela, me ngami mene aulia ngasarasakana. <sup>7</sup>Poli God karika va ghe kolotala tani tam raarangisana ta ita toka va manga maamauluaaita. <sup>8</sup>Liuna avalua o me lo ateva erati isaa o inangari niloeloe, karika va eratirati taumattu, ta eratirati God, ia etautau aatu kapuna Spirit Manga ateva.

<sup>9</sup>Me tani ailousia mene katoa tau ngaiesoa, karika righi uunguaaimami tani mene pitipiti me aulia etaimim, poli God ang ghe apasungaala etaimim vaalua tani ailousia mene kateva. <sup>10</sup>Me koronnaaili, am, am ailousia kapuita akapa atoa eMesedonia, me, kapuimami etoa, ami mene aulia ngasarasakana

tani gheleiem va am toka tale ia o ase nitoka ateva nau ekapa atoa.

<sup>11</sup> Am gheleia va ekateva voto namuu ia tale maamauluaaimim tani toka tale luei, me am annaa nonga uunguaaimim, me am uungu aanasa nongina ami ghe auliaala etaimim. <sup>12</sup> Me aue tokatokaaimim tale nau ekapa aue lo atoa eleka la oneoneainam, me am rau mene nim toka, me am anna va katoa la ghelei tau aatu voto am aaloanna.

### Maemaeane Vau ngepona ateva

<sup>13</sup> Kapuimami etoa, ami anna va am kila saa ateva aue lutu ta lo atoa la nim aseasekanua tale nimate, me aue am tam alousiusi nongina taumattu ngakapa atoa poli karika la kilakila va mene teva maulue auena. <sup>14</sup> Ita aiesoa va Iesu ghe matela me ghe mene totula, me ita aiesoa tee va God aue maeaa Iesu tee lo atoa laghe asekanuela tale aikaaiaaira ta Iesu. <sup>15</sup> Nongina inangarina Vau ngepona ateva, ami aulia etaimim va lo atoa ita tokatoka, karika ita ghe mate me Vau ngepona ateva aue emae, karika aue ita kasu ekasina ta lo atoa la aseasekanua. <sup>16</sup> Ta ia Vau ngepona ateva Iesu aue ekasu epona liu me aue ekolokolo atingina, me tee lingi ngalona ateva kapuira namu ngateva ensolo atoa, me nikolokolo ateva tale unna taue ateva God, me lo atoa laghe aikaaiaala ta Iesu me laghe matela aue la totu ekasina. <sup>17</sup> Vara me lo atoa ita tokatoka, karika ita ghe mate, aue ita sae aitaua teeila tale uru kookoo tani sou Vau ngepona ateva elomarase, me aue ita toka tee Vau ngepona ateva nau ekapa atoa. <sup>18</sup> Liuna avalua o me am aippooa tale inangari niaisausi tale kateva kateva etaimim tale isaa oia inangari tale maemaeane Vau ngepona ateva.

**5** Me, kapuimami etoa, tale nau eteva isaa o voto aue lutu, karika rigi uunguaaimami tani mene pitipiti. <sup>2</sup> Poli

am kilakilaaili va nauna ateva Vau ngepona ateva aue mae nongina tau niainao ateva eleivo. <sup>3</sup> Nau eteva taumattu ngatoka la ue va, “Ami tokatoka tale luei me aue ami saanga,” me aue la nim soghi, ta nitturu sesa aue lutu etaira, nongina vause ateva emoomolena eghaaghaa nimmarikana, me karika poi aue la saanga.

<sup>4</sup> Me am, kapuimami etoa, karika va am tokatoka tale saurrom, va ia o nau eteva aue ghelei esoghisoghiem nongina tau niainao ateva. <sup>5</sup> Am akapaaili natuirarua am mallanga ateva me lla ngateva, karika va ita tale voo ngateva me saurrom ateva. <sup>6</sup> Liuna avalua o me karika ita mene ghelei nongina katoa la aseasekanua. Ita, ita angu taatara, me nannaaita emasalike. <sup>7</sup> Lo atoa la aseasekanua, la aseasekanua eleivo. Me lo atoa la ropiropi sesa manu, la ropiropi me la veevee eleivo. <sup>8</sup> Me poli ita tau ngellaa ita, nannaaita emasalike. Ita atoka niaikaia me niaielousi nongina sioto ateva, gheleia tale kapa aisou vaalau ia, eaakou kassauita ateva, me nitaatara lao emua tale nisaanga enongina kou nguru eteva, gheleia tale kapa. <sup>9</sup> Ta karika God ghe suitoongainitala va ita ghaa sessaiaane, ta nisaanga ta kapuira Vau ngepona ateva Iesu Karisto, <sup>10</sup> ghe matela etaita, liuna avalua o me arova maulue ita o matena ita, aue ita toka aitaua teeia. <sup>11</sup> Liuna avalua o me am asarasarakana kateva kateva etaimim, me am aisueieinam, nongina am gheleli.

### Airuuruu tale inangari niloeloe

<sup>12</sup> Me ami loeloeam, kapuimami etoa, tani oneoneaa lo atoa la uungu aanasa elome etaimim, me la ghaitoieinam ta Vau ngepona ateva, me la ghaaulia kieimim tale voto. <sup>13</sup> Am oneoneainila me am aielousieinila poli uunguaaira. Am toka tee kateva kateva tale luei. <sup>14</sup> Ami aasarasarakanaiem, kapuimami



etoe, tani aulia kieira lo atoa ngila tokatoka me karika la uungu emasina, me am ppoa inangari nissausi ta lo atoa ngila la siosio euu tale ninanna, me am sausi lo atoa ngila saasaghuighuina, me erau mene sessai parasiem tale taumattu ngakapa atoa. <sup>15</sup> Am tara va karika teva emene liu sesa tale sesa. Nau ekapa atoa am tootoonga tani masina tee mene kat-eva etaimim, me ta ila akapaaili taumattu ngatoa.

<sup>16</sup> Nau ekapa atoa am masimasi, <sup>17</sup> am looloo sae nau ekapa atoa, <sup>18</sup> am kaili emasina tale isaa akapa ase voto, ta aloaloanaane God etaimim isaa avalua o ta Karisto Iesu.

<sup>19</sup> Am rau mene ghelei epala Spiriti eteva. <sup>20</sup> Am rau mene rati inangarina ateva God eaulieinia ta propete atoa. <sup>21</sup> Am tootoonga isaa akapa inangari o, me am poso parasi llo masina. <sup>22</sup> Am

akekkeliem tale isaa akapaaili asease voto sesa.

<sup>23</sup> Aue ia God, God ia tale luei, eamanga akapa maamauluaaimim. Me aue spiriti eteva etaimim, me maamauluaaimim, me vilikiimim, lotolu ekapa lotolu ghulughuluena, nau Vau ngepona ateva Iesu Karisto emae. <sup>24</sup> Lo ateva ekolokoloam, am rooroo tani atoka tutuliimim etana, me ia aue ghelei isaa o voto.

<sup>25</sup> Kapuimami etoa, am looloo sae mausiimami. <sup>26</sup> Am sou kapuita akapa atoa tale niaielousi eteva manga ia.<sup>§§</sup> <sup>27</sup> Aghaulia ngasarasarakana etaimim ta matane Vau ngepona ateva tani riti ia oia uru ngai etikirighi ta kapuita akapa atoa.

<sup>28</sup> Ami looloo sae va aue maamasi-naane Vau ngepona ateva Iesu Karisto etoka teeiem.

---

§§5:26 Tale inangari nge Grik, *tale niaingusu manga ia*

*Aiaaghaluene atikirighi uru  
ngai Pol ghe pitiela ta*

### **aTesalonika ngatoa**

**1** Aghi Pol, Saelas me Timoti,  
Ami pitipiti aatu ta taumattu nga-  
toa tale ale manga ateva ona eTesalonika  
tale ararina atea God Tamaita ia me  
Vau ngepona ateva Iesu Karisto.

<sup>2</sup>Ami looloo sae va maamasinaane me  
luei ekasukasu ta God Tamaita ia me Vau  
ngepona ateva Iesu Karisto aue etoka  
teiem.

#### **Iesu aue sio me etaula aipolipoli ta kapuna atoa**

<sup>3</sup>Uunguaaimami tani kaili emasina  
ta God nau ekapa atoa mausiimim,  
kapuimami etoa, me emaamasina tani  
ghelei llo, poli aikaiaaimim epiipinosa  
anamuu nau ekapa atoa, me niaielousi  
eteva ta kateva kateva etaimim eghelei  
elao ta mene kateva ange ooro. <sup>4</sup>Liuna  
avalua o me elome tale alena ale  
manga akapa God, ami aasakea vaalua  
karika am maamango tani ghelei voto  
masina, me aikaiaaimim tale isaa  
akapa nitootoonga me nimmarikana  
am ghaaghaa me am tiitingina  
akorokorongana.

<sup>5</sup>Isaa o voto eaapasunga va unna ni-  
aisakei God ghulughuluena tale isaa o  
voto, me God aue iraiem va masina  
am tale ararimangalina ateva, am mam-  
marikana teeia. <sup>6</sup>Nongina nighulughu-  
luena ta matane God va eliu voto sesa ta  
lo atoa la ghelei voto sesa etaimim, <sup>7</sup>me  
aue tau aatu niainoana etaimim lo atoa  
am ghaaghaa voto sesa, me etaimami  
tee. Isaa o voto aue lutu nau Vau nge-  
pona ateva Iesu ekauerekati epona liu,  
tale kura atea eramerame, tee kapuna  
ensolo atoa sarasarakanaaili ila. <sup>8</sup>Aue  
eliu voto sesa ta lo atoa karika la ki-

lakila God me karika la nongonongo  
usila masi kiukiuna kapuita Vau nge-  
pona ateva Iesu. <sup>9</sup>Aue la ghaa aipolipoli  
tale voto sesa etaira, tale nitturu etea  
tokatoka liu ia, me Vau ngepona ateva  
aue tiu vella tale taataraane me tale ki-  
natama mallangina ateva <sup>10</sup>tale ia o nau  
eteva aue mae, ita kapuna taumattu nga-  
toa manga ila la asaesae ararina atea,  
me lo atoa la aiesoa etana la gharueinia.  
Am tee aue am toka tee lo atoa la aiesoa  
ta Iesu, poli am aiesoa inangariimami  
etaimim.

<sup>11</sup>Poli isaa o voto etokatoka tale  
nannaaimami, me nau ekapa atoa ami  
looloo sae mausiimim, va aue God  
esausiem tani ghelei voto ghe koloamla  
tani ghelei, me tale sarasarakaniaane  
aue am ghelei ekapa isaa o masi voto  
am aloanna tani ghelei, me isaa akapa  
gheleiaaimim am ghelei mausi tale  
aikaiaaimim. <sup>12</sup>Ami looloo sae va isaa  
o voto elutu me aue ararina atea ka-  
puita Vau ngepona ateva Iesu am amue-  
mueia etaimim, me am etana, tale maa-  
masinaane kapuita God ateva me Vau  
ngepona ateva Iesu Karisto.

#### **Tau ngai ghelei saasakia inangari nipaopao ateva**

**2** Me tale maemaeane kapuita Vau  
ngepona ateva Iesu Karisto, me  
nivelu eitaua ita ghelei etana, ami  
kookolomiem, kapuimami etoa, <sup>2</sup>tani  
rau mene nngaili me emoim tale tau-  
mattu la ue va nauna ateva Vau nge-  
pona ateva ang ghe mae sio. La ghele ue  
va laghe nongoala tale inangari niaulia  
ngamuemua, o inangari laghe nongola,  
o inangari tale uru ngai taataraane va  
ghe kasula etaimami. <sup>3</sup>Am rau mene tau  
velu teva taumattu va ekameam tale teva  
ase salana, poli ia o nau eteva karika  
aue mae lomose ta nioghi vulu masi voto  
emae emua, me tau ngai ghelei saasakia

inangari nipaopao ateva\* aue otua, lo ateva elaelao tale salana nitutturuu. <sup>4</sup>Aue ghelei runga salane God, me aue easaesaea tale voto akapaaili manga, me aue etoka tale alena ale manga ateva God, me aue eue va ia Goto ia.

<sup>5</sup>Koti am ghe kaluaala va nau aghe tokatoka teeiem aghe aulia isaa o voto etaimim. <sup>6</sup>Me ia oia am rooroo tani kila va saa ateva egheelei rungania, me aue vira otua tale nau eteva ang ghe suuiela. <sup>7</sup>Ta ia o tau ngai ghelei saasakia inangari nipaopao ateva ange tiuaala tani apasunga uungua sarasarakaniaane ghe aaisulia, me lo ateva egheelei rungania aue toka gheelei rungania, lomose ta God aue ghaa velua. <sup>8</sup>Vara me aue eotu tau ngai ghelei saasakia inangari nipaopao ateva, Vau ngepona ateva Iesu aue uvi ematea tale aulao paane ateva, me eturungia tale mallangi mae-maeane ateva. <sup>9</sup>Maemaeaa ia o tau ngai ghelei saasakia inangari nipaopao ateva aue lao aitaua tee sarasarakaniaane Satana, me aue apasunga tale asease sarasarakana, niaimatoonga me mirikolo kamena, <sup>10</sup>me isaa akapa ase voto sesa tani kame lo atoa aue eraula. Aue eraula, poli laghe ratila tani aielousia koronna kiukiu kanna God me aue laghele saanga. <sup>11</sup>Liuna avalua o me God aue ghelei savisavila nannaaira, me aue la aikaaiia tale llo kamena. <sup>12</sup>Liuna avalua o me God aue ghelei niaisakei etaira, poli karika laghe aiesoa tale llo koronna, ta laghe masimasia llo sesa.

### **Inangari niaisausia tani tingina akorokorongana**

<sup>13</sup>Uunguaaimami tani kaili emasina ta God nau ekapa atoa poli mausiimim, kapuimami etoa, Vau ngepona ateva eailousieinam. Ami kaili emasina

ta God ta poli aitiutiu God ghe suit-oongainamla va am saanga tale uunguaane Spiriti eteva, tani manga poli am ghe aiesoaala tale koronna kiukiu kanna God. <sup>14</sup>Ghe koloamla tale isaa o voto tale masi kiukiu ami ghe poppooa, liuna avalua o me am tee aue am ghaa mal-langina ateva kapuita Vau ngepona ateva Iesu Karisto. <sup>15</sup>Liuna avalua o, kapuimami etoa, me am tingina akorokorongana, me am poso parasi voto ami ghe apasungaala etaimim, tale inangari am ghe nongola ta paaimami me tale uru ngai ami ghe pitila.

<sup>16</sup>Aue ia kapuita Vau ngepona ateva Iesu Karisto, me God Tamaita ia, ghe aielousieinitala, me tale maamasinaane ghe tau mae sio inangari ni-asarasarakana tokatoka liu me masi voto emua etaita, <sup>17</sup>easarasarakana urunguitaniimim, me eaisausieinam tani ghelei isaa akapa masi niuungu me inangari.

### **Pol ghe kolomila tau ngaiesoa ngatoo tani looloo sae mausiira**

**3** Liuna avalua o, kapuimami etoa, me am looloo sae mausiimami, me aue inangarina Vau ngepona ateva ekasu parasi ekapa see, me la oneoneainia nongina am, am ghe oneoneainia. <sup>2</sup>Me am looloo sae va God eghaa oghiemami tale sesa taumattu ngatoo la gheelei voto karika masina, ta poli karika va taumattu ngakapa atoa la ghaikaaiia ta God. <sup>3</sup>Me Vau ngepona ateva egheelei voto ghe uela va eghelei, me aue asarasarakanaiem, me eghelei rungainam ta sesa taumattu ngateva. <sup>4</sup>Ami aatoka tuutuliimami ta Vau ngepona ateva va am toka gheelei voto ami ghe aulia ngasarasarakanaala etaimim, me aue am toka gheelei isaa o voto. <sup>5</sup>Aue Vau ngepona ateva ekatula

\*2:3 tau ngai ghelei saasakia inangari nipaopao ateva Katoa uru ngai laghe pitila, la ghe pitila va tau ssavoto ateva

ngaghulughuluena urunguitaniimim tani lao tale ailousiaane ateva God me nitingina asarasarakana ta Karisto.

**Niaulia ngaotu tale  
uunguaa tani nim toka**

<sup>6</sup>Tale ararina atea Vau ngepona Iesu Karisto, ami aaulia ngasarasarakana etaimim, kapuimami etoa, va am kasu emasalika ta lo atoa kapuita la nim tokatoka me karika la uusila inangari am ghe ghaala etaimami. <sup>7</sup>Poli am kilakila vaalua tani usila gheeleiaaimami, karika ami ghe nim tokatoka nau ami ghe tokatoka teeiem. <sup>8</sup>Karika ami ghe nim namanama inana ta teva taumattu, ta ami ghe polipoli, me ami ghe uungu aanasa eleivo me ellaa tani ghelei va ami rau mene taula maate ta teva etaimim. <sup>9</sup>Ami ghe gheelei llo, karika va poli karika masina etaimami tani ghelei, ta ami ghe anna va ami ghe apasunga voto am aimuli tee. <sup>10</sup>Nau ami ghe tokatoka teeiem, ami ghe aulia ngasarasarakanala etaimim va, “Lo ateva taumattu etam aloanna tani uungu, erau mene namanama.”

<sup>11</sup>Ami nongonongo va katoa elome etaimim la nim tokatoka, karika la uungu me la nim toka aaulia uunguair

katoa. <sup>12</sup>Isaa o ase taumattu ami aulia ngasarasarakana, me aloanaaimami tani aulia etaira tale ararina atea Vau ngepona ateva Iesu Karisto, va la toka rarieinila me la nama inana la uungua. <sup>13</sup>Me ta ngetaimim, kapuimami etoa, am rau mene mangoo vulu tani ghelei voto masina.

<sup>14</sup>Arova teva etam nongo usila inangari niloeloe ami aulia tale uru ngai etikirighi oia, am tani tara tootoongainia me am rau mene ghuia, tani atara mataneia me epalata. <sup>15</sup>Me am rau mene taraia va tau ngai ssateemi ia, ta poli kapuita ia, am aulia kiena.

**Pol ghe arangiseilala**

<sup>16</sup>Isaa oia, aue Vau ngepona ateva luei ia, ia aue tau aatu luei nau ekapa atoa me tale isaa akapa salana. Vau ngepona ateva aue toka akapa teeiem.

<sup>17</sup>Aghi Pol apitipiti isaa oia inangari niarangise tale nimaghi etelange, me ia oia niaimatootoongana ateva etokatoka tale isaa akapa uneghi uru ngai apitipiti, tani apasunga va aghi aghe pitila.

<sup>18</sup>Alooloo sae va aue maamasinaane kapuita Vau ngepona ateva Iesu Karisto etoka teeiem akapaaili.

*Aitiutiu etikirighi uru  
ngai Pol ghe pitiela ta*

## Timoti

**1** Aghi Pol, kapuna apostolo ieghi Karisto Iesu ta niaulia ngasarasarakana ta God tau ngai asaangiita ia me Karisto Iesu ita aatoka tuutuliita etana.

<sup>2</sup>Ta Timoti natughu koronna io, ta poli unem niaikaai.

Aloolo sae va God Tamaita ia me Karisto Iesu kapuita Vau ngepona ia lalu tau aatu maamasinaane God me ailousiaane me luei.

### Upanio tale lo atoa la apasunga kamena inangari

<sup>3</sup>Nongina aghe auliaala etam nau aghe anna tani lao eMesedonia, va utoka eIspes me uaulia ngasarasarakana ta kasina taumattu va la rau mene apasunga kamena inangari, karika va inangarina God. <sup>4</sup>La rau mene tau vella va la lao tale uungua kiukiu marripa me tani kila lao tuvuir a atoa emua arau. Isaa o voto eaalakuti uungua niaikiso me karika eghelei uunguaane God tale niaikaai. <sup>5</sup>Malloeana isaa o niaulia ngasarasarakana va niaielousi ekasukasu tale lo ateva urunguita raarangsana ia, me ninannaa masalike me niaikaai koronna. <sup>6</sup>Katoa taumattu ngila ghe kasu vulila isaa o voto me ngila ghe kirila tani laa usila inangari karika righi malloeane. <sup>7</sup>La ghanna tani tau ngai apasunga tale inangari nipaopao, me karikaaili la kilakila saa ateva la ghaulieinia.

<sup>8</sup>Ita kilakila va inangari nipaopao masina arova teva taumattu epasunga ngamasina voto etana. <sup>9</sup>Ita kilakila tee va, karika God ghe tau mae sio inangari nipaopao mausi ghulughuluena atoa

taumattu. Ghe tau mae sio mausi lo atoa la ghelei saasakia inangari niapaopao me lo atoa la ghaa makatakata, me lo atoa karika la oneonea God me tau ssavoto ila, me karika manga ila, me karika la kakkaua, me uneira lo atoa la uviuvi emate tamaira me kinaira atoa, me lo atoa la ghaiuuvi emate, <sup>10</sup>me lo atoa la ailai rorrou, me lo atoa taita la asoaso tee mene katoa taita, me lo atoa la ainao taumattu, me tau nikamekame atoa me lo atoa la kamekame tale niaisakei, me mene saa righi llo etam laolao aitaua tee inangari koronna. <sup>11</sup>Isaa o voto eaasokoi tale masi kiukiuna God ghe tau mae sio etaghi. Ia o masi kiukiu ghe mae sio ta masi God ateva taumattu ngatoa la tautae sae.

### Maamasinaane Vau ngepona ateva ta Pol

<sup>12</sup>Akaakaili emasina ta Karisto ateva Iesu, kapuita Vau ngepona ia, ghe tau mae sio sarasarakana me ghe taraieghila va arooroo tani ghelei eghulughuluena uunguaane, me ghe suitoongainaghila va aghelei. <sup>13</sup>Arongona ta emua arau aghi aghe poppoo saasakia tee God, me aghe uviuvi tau ngaiesoa ngatoa, me ssa taumattu ngaghi, Karisto ghe apasungala aloususiaane etaghi poli aghe ghelei voto karika aghe kilakila va sesa, me karika aghe aiesoa. <sup>14</sup>Maamasinaane kapuita Vau ngepona ateva ghe arangise amasinaailieghila, oroieili tee niaikaai me niaielousi isaa ta Karisto Iesu.

<sup>15</sup>Kateva inangari koronnaaili ia, erooroo va ita ghaaia, eue va, Karisto Iesu ghe mae sio tale kosa ateva oia tani asaangi tau ssavoto atoa, me ta ila o sesa taumattu ngatoa aghi tani sesaaili ieghi etaira akapa. <sup>16</sup>Poli aghi sesaaili ieghi, liuna avalua o me God ghe apasungaala ailousiaane etaghi, me ta ngetaghi ssa taumattu ngaghi, Karisto Iesu ghe apasungaala vaalua

toitoiaane aluse karika airuuruu etana, tani aimatoonga ta lo atoa aue la ghaiesoa etana, me la ghaa mauue ateva tokatoka liu ia. <sup>17</sup>Tale kingi eteva tokatoka liu ia, karika ematemate me karika ita taatarai, ie nongaaili Goto ia, ita oneoneainia me ita taue sae nau ekapa atoa. Koronna.

<sup>18</sup>Timoti, natughu, aloeloeo tale isaa oia inangari elaolao aitaua tee niau- lia ngamuemue laghe gheleila etam. Me nau uaimuli tee aue uaiuvi emasina tale unna niaiuvi eteae Vau ngepona ateva. <sup>19</sup>Uposo parasi tale niaikaaia me tale masalike ninannaa. Katoa laghe ratila isaa o voto me aikaiaaira ang ghe sesala. <sup>20</sup>Tale ia o ase taumattu ngat- eva, Aemenaes me Aleksanda elome etaira. Ngaghe taulalue lao sio ta Satana tani apasunga etairarua va lalu rau mene ppoa saasakia ta Vau ngepona ateva.

### Uungua nikkaua

**2** Aghaaulia ngasarakana va aitiu- tiu tale isaa akapa voto, isaa akapa nilooloo sae me nikaili emasina ita ghelei ta taumattu ngakapa, <sup>2</sup>ta kingi etoa me ta lo atoa la uungu tale niuungu matuutuliena, va aue ita toka tale luei me karika nimatautu, tale salane God me tale nimanga. <sup>3</sup>Isaa o voto masina me eaamasiasi God tau ngai asaangiita ia. <sup>4</sup>Eaanna va taumattu ngakapa esaanga me la ghaa alomasaanga tale voto ko- ronna. <sup>5</sup>Poli kateva nonga ia God at- eva, me kateva nonga ia tau ngai sausia ngateva elome ta God me taumattu. Ia o taumattu ngateva Karisto ia, Iesu etana. <sup>6</sup>Ghe tau lao sio maamauluaane tani poli aoghi isaa akapa taumattu. Isaa o inan- gari koronna ghe tau mae sio tale nauna tuunga ateva. <sup>7</sup>Tale mausi llo me God ghe suitoongainaghila va tau ngaippooa ieghi me aghapostolo me tau ngai aapa- sunga ieghi tale koronna niaikaaia ta lo

atoa karika aJiu ila. Aghaaulia ngako- ronna, karika akamekame.

<sup>8</sup>Liuna avalua o me aghanna va taita akapa atoa tale isaa akapa voto la ssua sae nimaira manga tale nikokkolomi me karika emene sessaila o la ghaikiso.

<sup>9</sup>Tale isaa o salana, aghanna va vause atoa la molu tale ase nimolu emasina tale tummatavanga me taatara tau- mattu. Karika va tani rungiaa viliki veu tani poli asease voto tani ghelei emasina taatara uu nguruira o tani asae gol o pels o ghinna aipolina isaa arau epona. <sup>10</sup>Me tani molu tale niuungu masina, isaa o voto masinaaili ta lo atoa vause la ue va la kakkaua God.

<sup>11</sup>Vause ateva ekila voto tale uungua nimatua ngatoka me tani nongo inan- gari me tani oneoneaa lo ateva eaa- pasunga. <sup>12</sup>Karika aghanna va vause atoa la ghasapunga o la ghelei niuungu sarasarakana tani lau taita atoa. Ila la nim matua atoka. <sup>13</sup>Poli God ghe ghelei ekasinala Adam me avirina Ivi. <sup>14</sup>Me karika va Satana ghe kamela Adam ta ghe kamela vause ateva me ghe tau ssavotola. <sup>15</sup>Me vause atoa aue la saanga poli la kaakaai aliki, arova la tam man- goo vulu niaikaaia, niaielousi me ni- manga tee tale taatara taumattu.

**3** Inangari koronnaaili isaa avalua toko va, lo ateva ange annaala tale urunguitanna ateva va e-elda, ange nnaala niuungu eteva nioneoneaa etana. <sup>2</sup>Ia o elda ngateva karika mene sesa gheleiaane, me ekateva nonga vausenna ateva, me aue apasunga va eaitaraa tokatokaane, taumattu ngatoo la oneoneainia, me eaaitaraa taumattu nau la laolao tanganuena, me tau ngai apasungaa ia, <sup>3</sup>karika tau niropi ia, me karika tau nisessai ia, ta ennaa mene kateva, me karika eaikiso me karika eaielousia viliki veu. <sup>4</sup>Etani aaitara ngamasina vausenna ateva me natuna atoa, me etara va natuna atoa

la nongonongo usilainia me la gheelee masi nioneoneaa etana. <sup>5</sup>Arova teva taumattu karika ekilakila vaalua tani aitaraa vausenna ateva me natuna atoa, vaalua aue eaitara alena ale manga ateva God? <sup>6</sup>Karika va evira mene aikolikoliaa, ta erau tau sae nannaane, va ekatuu va eghaa niaisakei nongina raroai eteva. <sup>7</sup>Tau ngeleka atoa la tani oneoneainia me erau mene katuu lao tale voto karika masina me tale unna airekati eteae raroai eteva.

<sup>8</sup>Rikina atoa ila tee taumattu ngatua la oneoneainila, me karika tau nikamekame ila, me karika la ropiropi sesa manu, me la rau mene kuruetu tale viliki veu. <sup>9</sup>La poso parasi voto eaaisulia tale niaikaai, tee tale ninanaa masalike. <sup>10</sup>La toongila mua me arova karika righi voto sesa la pae etaira, eroroo va la rikina. <sup>11</sup>Tale isaa o salana, vauseniira<sup>†</sup> tee atoa, taumattu ngatua la oneoneainila. Karika va tau nighelei saasakia taumattu ila tale inangariira, ta la aitaraa tokatokaaira me tale isaa akapa voto ita rooroo tani atoka tuutuliita etaira. <sup>12</sup>Rikina ateva evausenna nonga kateva me etani aitara ngamasina natuna atoa me lo atoa la tokatoka tanguenua. <sup>13</sup>Lo atoa la uungu emasina, la ghaaghaa nioneoneaa me la sarasarakanaaili tani aulia aikaaiaira ta Karisto ateva Iesu.

<sup>14</sup>Arongona ta aghanna va ghaisa ngarighi amae taraiem, apitipiti isaa oia inangari niloeloe <sup>15</sup>me arova atam mae parasi, aue ukila vaalua taumattu ekasu me euungu tale tau ngaiesoa ngatua, kapuna ila Goto ateva etokatoka liu. Ale manga ateva suena ia me voto koronna etokatoka saoa etana. <sup>16</sup>Koronnaaaili, voto aisuliaane emua arau tale salane God namungaili:  
Ghe rekataala taumattu ia

me Spiriti eteva ghe apasunga ngamasalikala va ia Natuna ia God.

Ensolo atoa laghe taraiela me apostolo atoa laghe ppoainiela tale anue namu ngatua.

Taumattu tale kosa ateva laghe aikaaiaala etana,  
me God ghe ghaaie saela epona liu.

### Inangari niloeloe Pol ghe auliaala ta Timoti

**4** Spiriti eteva ghe aulia ngamasalikangailila va tale isaa oia nau me nau to emaemae, katoa aue la kasu vuli niaikaai me la usi raroai etoa tau nikamekame ila me voto raroai etoa la ghaapasunga. <sup>2</sup>Isaa o ase niapasunga emaemae ta usimaghualua atoa tau nikamekame ila. Nannaaira karika eroo tani kila voto masina me sesa. <sup>3</sup>La gheelee runga taumattu ngatua va la rau mene lai, la ue va la rau mene nama kasina ase ngingana, God ghe gheleila me pei ninama tee nikaili emasina ta lo atoa la ghaiesoa me la kilakila llo koronna. <sup>4</sup>Isaa akapa voto God ghe gheleila, masina, me karika ita mene rati righi ase ngingana arova ita ghaa tee nikaili emasina. <sup>5</sup>Poli God eaamanga tale inangarina ateva me tale uneita nilooloo sae.

<sup>6</sup>Nau uaulia isaa o voto ta kapuita atoa, io aue umasi tau ngai uungu ta Karisto Iesu, nau uangingio tale voto kanna God tale inangari niaikaai me tale niapasunga koronna uaimuli tee. <sup>7</sup>Urau mene aimuli tee kiukiu marripa me kiukiu kaluira vause namu ngatua, karika la oneoneaa God. Ta ugheleio nonga tani ghaa gheleiaane God. <sup>8</sup>Poli niaimatoonga tale nianamisi masina, ta egheelee emasina vilikiita, me gheleiaane God esausio tale isaa akapa voto me egheelee inangari nialokoi tale maulue ateva ghaine me auena.

<sup>†</sup>3:11 *vauseniira* o rikinesi etoa

<sup>9</sup>Kateva inangari koronnaaili ia, erooroo va ita ghaaia. <sup>10</sup>Mausi isaa o voto me ita uungu tale niaanasa me niasaraka me ngita ghe atokala tuutuliita ta Goto ateva etokatoka liu. Ia tau ngai asaangi ia ta taumattu ngakapa atoa, me tani lo atoa la ghaiesoa.

<sup>11</sup>Uapasunga isaa o voto me uaulia ngasararakana etaira va la nongo usila. <sup>12</sup>Utingina asarasarakana tale voto koronna. Urau mene ghelei va taumattu ngatoa la taraa loio sio euu poli aliki taita io. Utau ngaimatoonga ta tau ngaiesoa ngatoa tale inangari, tale gheeleiam, tale niaielousi, tale niaikaia me tale niraangisana. <sup>13</sup>Uatoka maamauluaam tani riti Uru ngai Manga ateva tale tummatavanga, tani ppoaa me tani apasunga, me auena amae. <sup>14</sup>Urau mene rati voto God ghe nim tau aatu sio, ughe ghaala tale inangari kanna God nau elda ngatoa laghe soaala nimaira etam.

<sup>15</sup>Utani uungu esarasarakana tale isaa o voto. Utauo lao akapa tale isaa o voto me ila akapa aue la tara uunguaam ughelei. <sup>16</sup>Utani aitoka tee maamauluaam me tale voto uapasunga. Arova utam oghi vulu isaa o voto, aue easaangio me lo atoa tee la nongonongo.

### Uunguaane Timoti tale tau ngaiesoa ngatoa

**5** Urau mene sama anamuu tee taita namu ngateva me esessaio etana, ta uloea tani asarasarakanaia nongina va tamam ia. Ughelei aliki taita atoa va tue me nenga iem, <sup>2</sup>vause namu ngatoa va kinam ila, me aliki vause atoa va kapum vause ila. Ughelei isaa o llo voto tale niraangisana.

<sup>3</sup>Utani aitara ngamasina lo atoa vause rau evulu ila karika poi righi aisausiira. <sup>4</sup>Me arova vause raue vulu eteva righi natuna o tuvuna, ila la kila akasina tani apasunga aikaiaaira tale uunguaa nikkaua tani aitara lo atoa kalakalang-

ina ila etaira, tani liu aaitara kinaira me tamaira me tuvuiria atoa etaira, poli isaa o voto God emasimasia. <sup>5</sup>Lo ateva vause raue vulu ia etuutukuna tale voto ealoanaaili me karika toa tani aitarainia, eaatoka tuutulina ta God me elooloo sae voo me llaa tani kolomi niaisauti ta God. <sup>6</sup>Me lo ateva vause raue vulu etokatoka tani amasimasia, ang ghe matela arongona ta sakesake ia. <sup>7</sup>Utaula ta taumattu ngatoa isaa oia inangari niloeloe me karika teva taumattu aue roo tani auliaa saasakia teeila. <sup>8</sup>Arova teva taumattu karika eaitara mangalina atoa me tee tamane me kinna me tuena me nengane atoa, ang ghe ratila niaikaia me sesaane elaulau lo atoa karika la ghaiesoa.

<sup>9</sup>La piti sio arariira lo atoa vause raue vulu ila aneira ninamanama ang ghe laula ghaonomongauluae (60), me laghe tokatoka amasina tee taitaniira atoa, <sup>10</sup>me laghe kilakila akapaila tale masi gheeleiaaira, nongina aitaraira tale aliki, me masinaaili ila tani aitaraa taumattu ghe laolao tanguueira, me laghe porapora kkeira kapuna taumattu ngatoa God, me laghe saasausi lo atoa laghe tokatoka tale sesa nau, me laghe tautau lao maamauluaaira tani ghelei isaa akapa asease masi niuungu.

<sup>11</sup>Lo atoa raue vulu aliki vause ila, urau mene piti sio arariira va raue vulu ila, poli aaloanaaira tani lai namungaili me elaulau inangari nialokoi laghe gheleila ta Karisto. <sup>12</sup>Isaa avalua o me aue la aisakei poli karika la ghelei llo laghe auliaala tale inangari nialokoi va la ghelei. <sup>13</sup>Me tee la nim toka ghelei kateva ase voto tani nim toka me la paapaangale me karika nonga va la nim tokatoka ta la ghaikusia me la nim toka aulia uunguaaira katoa. La ghaaulia voto karika masina va la ghaulia. <sup>14</sup>Liuna avalua o me atautaula masi ninannaa ta aliki vause atoa raue vulu ila va la mene lai, me la ssu aliki, me la ghaitaraa tan-



ganueira, me karika aue la taula righi nauna tau ngai ssateeita atoa tani aulia saasakia teeila. <sup>15</sup>Katoa ngila ghe kirila tani aimuli tee Satana.

<sup>16</sup>Arova teva vause tau ngaiesoaa ia, me teva raue vulu etokatoka teeila, eaitarainia me esausia tani ghelei me ale manga ateva erau mene maate. Me ale manga ateva aue sausi nonga lo atoa vause raue vulu la tani tuutukuna tani ghaa aaloanaira.

<sup>17</sup>Lo atoa elda la ghelei emasina uungua ale manga ateva, la taula namuu nio-neoneaa, tani lo atoa uunguaaira tani ppooaa me apasunga. <sup>18</sup>Poli Uru ngai Manga ateva eue va, “Nau vulumakao ateva euungu tani ghaa velu viliki raisi, am rau mene ghelei runga paane ateva va karika emene nama isaa o raisi,”<sup>‡</sup> me, “Emaamasina va tau ngai uungu eteva eghaa aipolipoli tale uunguaane eghelei.”<sup>¶</sup> <sup>19</sup>Urau mene nongo teva taumattu eauliaa tee teva elda. Arova evira ghalua o kotolu taumattu la vira aulia teeia ta ie nonga o voto ateva. <sup>20</sup>Lo atoa la ghelei sesa voto, usama anamuu teeila tale tummatavanga, me mene katoa elda aue la matautu tani ghelei sesa voto.

<sup>21</sup>Ngatautau aatu isaa o voto tani aitaria isaa oia inangari niloeloe, ta matana God me Karisto Iesu me en-solo atoa suisuitoongainila. Urau mene aimassia.

<sup>22</sup>Urau mene ailuilui tani soaa niamam me urau mene usi katoa tani ghelei ssavoto. Uaitarainio tani raarangisana.

<sup>23</sup>Urau mene ropi nonga manu ta ukaai tee uaeni enim pisikeaili tani sausi kovam ateva poli unim toka iisiki.

<sup>24</sup>Katoa taumattu eotuotu kaluira ssavoto tale ia arau o nau eteva, me auena eghaa nau niaisakei. Me mene

katoa kaluira ssavoto karika eotuotu, ta auena etani otu tale nau niaisakei. <sup>25</sup>Tale isaa o nonga ase salana masi niuungu eotuotu, arongana ta llo karika eotuotu, isaa o voto karika aue eaisulia.

**6** Lo atoa la uungu me karika la tokatoka tale aloanaaira, la nnaa va vauira atoa la rooroa va la ghaa nio-neoneaa namuu, me karika aue la ghaulia saasakia tee ararina atea God me voto ita aapasunga. <sup>2</sup>Lo atoa vauira atoa la ghaiesoa, la rau mene ghelei va oneoneaaira etaira episike poli la kakkaua ngaitaua. La tani uungu emasinaaili etaira, poli lo atoa la ghaaghaa voto etaira nau la uungu, tau ngaiesoaa ila me masinaaili ila etaira.

Uapasunga isaa o voto etaira me uaulia ngasarasarakana va la ghelei.

### Niaielousia viliki veu

<sup>3</sup>Arova teva eapasunga kamena niaiesoa, me karika elao aitaue tee masi inangari niloeloe kanna kapuita Vau eteva Iesu Karisto, me tale niapasunga eoneoneaa God, <sup>4</sup>ia etautae sae nonga me karika ekilakila righi voto. Eanna nonga tani toka aikiso me aisakeana tee inangari, ealutu nisessaia ta katoa peiira me ia karika, me niaiakiso elome ta ghalua taumattu, ninannaa tani ghelei saasakia mene kateva tale nisama, me sesa voto la nim nannaa tee mene kateva, <sup>5</sup>karika niruu tale naitamammarasii elome tale taumattu nannaaira karika masina. Karika la roo tani alomasaanga tee voto koronna, me la ghanna va salane God la ghaaghaa viliki veu etana.

<sup>6</sup>Emaamasina etaita tani ghelei isaa voto eamasimasi God me ita masimasiasaa llo etautau mae. <sup>7</sup>Poli karika ita ghe mae aitaue tee sio righi voto tale kosa

<sup>‡</sup>5:18 Diuteronomi 25:4

<sup>¶</sup>5:18 Luk 10:7

ateva oia me karika aue ita kasu eitaua tee righi voto tale kosa ateva oia. <sup>8</sup> Arova righi inana me aiseo etaita, ita masimasiaa isaa o voto. <sup>9</sup> Lo atoa taumattu la ghanna tani tue peipeiena la kaakatuu lao tale nitootoonga me airekati eteae, me tale ase voto alokapakapanna me sesa nialoanna, me ekaakatulainila lao tale voto sesa me aue la ghaa nitturuu. <sup>10</sup> Poli uungua niaielousia viliki veu liuena ia tale isaa akapa ase voto sesa. Kasina taumattu eannaaili tani ghaa viliki veu me ngila ghe kasu vulila niaikaia, me ngila ghe ghaala nimirikana tale asease nialousi.

### **Airuuruu tale inangarina niloeloe Pol**

<sup>11</sup> Me io, kapuna taumattu ngateva God, uilou vulu isaa o voto, me uaimuli parasi tani ghaa voto ghulughuluena, aloanaane God, niaikaia, niaielousi, nitoka akorokorongana ta God, me uungua tani siua ninanna. <sup>12</sup> Uaiuui tale masi niaiuuvi tale niaikaia, me uposo parasi mauue ateva tokatoka liu ia nongina God ghe koloola nau ughe gheleila masi niaulia ngaotu ta mata ngoroi etoa. <sup>13</sup> Tale taataraane God, ia etautaula mauue tale isaa akapa voto, me ta Karisto Iesu, ghe auli-aala inangari koronna nau Pontius Paelat ghe kolomila nikokkolomi, aghaaulia ngasararakana etam va <sup>14</sup> utani aitaraa niaulia ngasararakana akapa me karika teva aue etara righi sesa gheleiam me karika aue la aliu teeio righi voto, lomosina ta kapuita Vau

eteva Iesu Karisto esio, <sup>15</sup> me God aue maeaa tale nauna ia ghe suitoongala. God ateva taumattu ngatoa la tautauae sae me ie nonga tau ngaitoitoi ia, kingi ia ta kingi ekapa atoa me vau ia ta vau ekapa atoa, <sup>16</sup> ia nonga karika aue emate, me etokatoka tale mallanga karika ita rooroo tani lao etana, ia karika teva ghe taraia o erooroo tani taraia. Ta ngetana nioneoneaa me sarasarakana taumattu ngatoa la tau lao nau ekapa atoa. Koronna.

<sup>17</sup> Uaulia ngasararakana ta lo atoa tue peipeiena ila tale kosa ateva oia tale isaa oia nau tani rau mene asake me la rau mene atoka tuutuliira tale peiira, poli isaa o voto eroo tani kapa parasi. Me la atoka tuutuliira ta God poli ia etautau mae oroieili voto etaita me isaa akapa voto tani amasimasita. <sup>18</sup> Uaulia ngasararakana etaira tani ghelei oroieili masi niuungu, me la aitaua peiira me la masimasi tani aiparrui. <sup>19</sup> Tale ia o salana atikirighi, aue la atoka oroieili masi voto atoa tani sueila nau ngemuli epona liu, me aue la ghaa mauue ateva koronnaaili ia.

<sup>20</sup> Timoti! Uaitara ngamasina saa llo voto laghe tau aatu sio etam va uaitaraa. Uliu vilim tale nisama kamena me karika eaulia God, me ukekkelio tale lo atoa la apasunga inangari kamena la ue va alomsaanga. <sup>21</sup> Katoa taumattu laghe usilaala ia o salana atikirighi, me laghe tiu ppaela tale uungua niaikaia.

Alooloo sae va maamasinaane ateva God aue toka teeio.

*Aiaaghaluene atikirighi uru  
ngai Pol ghe pitiela ta*

## Timoti

**1** Aghi Pol, kapuna apostolo ieghi Karisto Iesu me tale aloannaane God, ghe sungieghila tani ppooaa inangari nialokoi maulue tokatoka liu, isaa ta Karisto Iesu.

<sup>2</sup>Ta Timoti, masi natughu eteva:

Alooloo sae va God Tamaita ia me Karisto Iesu kapuita Vau ngepona ia lalu tau aatu maamasinaane God me ailousiaane me luei.

### Niasarasarakana tani tingina akorokorongana

<sup>3</sup>Akaakaili emasinaaili ta Goto ateva ia o akaakaueinia, tale nannaaghi masalikeaili, nongina tuvughu etoa laghe ghelei. Nau ekapaaili, tale llaa me voo, akaakaili emasina ta God me anannainio tale kalughu nilooloo sae. <sup>4</sup>Aghaloannaaili tani mene taraio, poli aghannaa rarum matam nau italu ghe aitiuaala, me aue amasimasi marova italu mene aitaria. <sup>5</sup>Akilakila va kalum niaikaaiiaa koronna ghe tokatoka ta kinam ta Iunis me tuvum ta Lois, me aghaiesoa va ia o niakiaaia ngateva ia tee etam. <sup>6</sup>Liuna avalua o me aghanna tani mene arava etam va, nongina ita palepale va kura ateae erame, ughelei evalua o uunguaam tale sarasarakana God ghe nim tau aatu sio nau aghe saoaala nimaghi etam. <sup>7</sup>Poli God karika eaaloannaita va ita matautu, ta ghe tau mae sio spiriti eteva va ita pasu tale sarasarakana, niailousi, me masi ninannaa.

<sup>8</sup>Liuna avalua o, urau mene palata tani aulia ngaotu masi kiukiuna kapuita Vau eteva, me urau mene palataainaghi

ta karavusu ieghi poli aghe poppooaa Karisto. Me uaimonomosiaa tani ghaa maamatana nongina aghi mausi masi kiukiu, tale sarasarakaniaane God. <sup>9</sup>God ghe asaangitala me ghe kolotala va ita toka tale maulue ateva manga ia. Karika ghe kolotala poli righi masi gheegheleiaaita. Karika, ta poli tale aloannaane me maamasinaanae ateva, ia oia maamasinaane ateva ghe taue mae sio etaita ia ta Iesu Karisto me auena ghe gheleila kosa ateva. <sup>10</sup>Me isaa oia ang ghe apasunga ngaotula nau eteva Karisto Iesu ghe mae sio, tau ngai asaangiita ia, ghe apalala nimate, me tale masi kiukiu, ghe apasunga ngaotula etaita maulue ateva tokatoka liu ia. <sup>11</sup>God ghe suitoongainaghila va atau ngai ppooaa me aghapostolo, me atau ngai aapasunga tale ia oia masi inangarina ateva. <sup>12</sup>Me liuna avalua o, aghaaghaa maamatana ghaine me karika apaapalata, poli akilakila see aghe aatoka tuutulighi etana, me akilakilaaili va ia erooro tani aitaria voto aghe taula etana<sup>§</sup> lomosi ta nau eteva eoghi mae.

<sup>13</sup>Uposo parasi niapasunga tale salana koronna ughe nongola etaghi, tale niakiaaia me niailousi isaa ta Karisto Iesu. <sup>14</sup>Tale saasausiaane Spirit Manga ateva etokatoka elome etaita, utani aitaria ngamasinaaili masi kiukiu God ghe tau sio mae etam.

<sup>15</sup>Ukilakila va isaa akapaaili taumattu tale provinsi eteva eEisia angila ghe ratieghila tani aisausieinaghi, tee me kapughu elua ta Pigelus me Emogenis.

<sup>16</sup>Alooloo sae va aue Vau ngepona ateva eapasunga maamasinaane ta lo atoa la tokatoka tee Onesiporus, poli nau ekapa atoa ghe mae taataraieghe tani asarasarakanaieghe, me karika ghe paapalataainieghe nau iririna ieghi tale sene. <sup>17</sup>Karika, ta nau ghe mae sio

<sup>§</sup>1:12 *voto aghe taula etana o isaa oia niuunguaa ghe tau mae sio etaghi tani ghelei*

eRom, ghe pae akapaieghi seela lomosi ta ghe taraieghila. <sup>18</sup> Aloo lo sae va aue Vau ngepona ateva epasunga nialousiusi etana tale ia o nau niaisakei eteva. Me ukilakilaaili vaalua ghe saasausieghi elpises tale asease salana atoa.

### Masi tau ngai uvi eteva kapuna ia Karisto Iesu

**2** Masi natughu eteva Timoti, ukororongana tale maamasinaane ateva Karisto Iesu etaatau aatu sio etam. <sup>2</sup> Me voto ughe nongola aghe apasungaala tale tummataavanga, isaa o voto utau lao ta lo atoa taumattu la kaakaarasi tani uungu, me aue la roo tani mene apasunga tale mene katoa taumattu. <sup>3</sup> Ughusi tani ghaa maamatana, nonginaaili masi tau ngai uuvi eteva kapuna ia Karisto Iesu. <sup>4</sup> Karika teva taumattu tau ngai uvi ia eroroo tani ghelei mene kasina ase niuungu me etam ghelei emasina uunguaane, karika. Eghelei emasina uunguaane tani amasimasi kapuna namu ngateva. <sup>5</sup> Nonginaaili arova teva ealoanna tani aikarati tale niaikarati eteae, arova karika eusila ngakapaaili asease salana tani usilaa tale ia o niaikarati eteae, arongona ta eilou vuli ekapaila, karika aue eghaa aipolipoli. <sup>6</sup> Tau ngai pasa utana ateva karika mangoona ia, ia etani mata ngemua tani ghaa inana emaamatue akasina eutana. <sup>7</sup> Uanna parasi saa ateva aghaaulieinia, poli Vau ngepona ateva aue etau aatu alomasaanga tani kila isaa akapaaili voto.

<sup>8</sup> Utani annaa Iesu Karisto, ia tuvuna ia Deivit, God ghe totuela tale nimate. Tani iaaili o masi kiukiu apoppooa ngaotu. <sup>9</sup> Me poli apoppooaa masi kiukiu eteva oia, sesa nitoka eghaaghaaieghi, me laghe irieghila tale sene nonginaaili ssa taumattu ngateva. Me karika teva tau-

matu eroroo tani akaravusu inangarina ateva God. <sup>10</sup> Liuna avalua o me arooroo tani ghaa isaa akapa o maamatana tani sausi lo atoa God ghe suitoongainilala, arova eroroo va la saanga, me aue etau mae nioneonea tokatoka liu isaa ta Karisto Iesu.

<sup>11</sup> Koronnaaili eteva inangari ia avalua toko va,

Arova ita mate teeia,  
aue ita maulue teeia.

<sup>12</sup> Arova ita tam oghe vulu maamatana, aue ita toka teeia me aue ita aitarangakapa voto.

Arova ita ue va ita tam kilakilaia,  
ie tee aue eue va etam kilakilaia.

<sup>13</sup> Arova ita tam ghelei voto ita ue va ita ghelei,  
ia aue eghelei voto eue va aue eghelei,  
poli karika eroroo tani aikolikoliaa saa  
voto ghe uela va aue eghelei.

### Kapuna tau ngai uungu eteva Vau eteva

<sup>14</sup> Nau etoa, uauliaa va la rau mene kkalua isaa oia voto. Uaulia ngakororongana etaira, poli God\*\* etaatara saa ateva la gheeleia, va la rau mene aissakeanaa tee malloeana inangari, poli isaa o ase niaissakeanaa karika eroroo tani sausi teva taumattu. Ta enim ghelei saasakia lo atoa taumattu la nongonongo. <sup>15</sup> Ughelei emasina akapa voto, nongina taumattu ngateva karika epaapalataa masi uunguaane, tani apasunga ta God va eroroo tani masimasi teeio, me epasunga inangari koronna tale salana ghulughuluena. <sup>16</sup> Uamasalikainio tale nisama kamena me karika eaulia ngamasalikaa God, poli isaa o inangari aue ekatula taumattu ngatoa me aue la masaueili ta God. <sup>17</sup> Inangariira la ghaulaa me la ghaapasunga, karika masina, nonginaaili sesa

\*\*2:14 *God* Katoa uru ngai laghe pitila, laghe uela va *Vau ngepona ateva*

usai eteva ange uusai enamuu. Elome etaira Aemenaes me Piletus ilalua avaluaaili o,<sup>18</sup> lalu ghe kasu vulila voto koronna. Lalu ghe uela va, “Angita ghe totula tale nimate nau ita ghe ghaala niasuu, me auena karika mene teae nitotu.” Lalu gheelei saasakiaa uneira niaikaiaa kasina tana tau ngaiesoa.<sup>19</sup> Inangarina ateva God koronna ia, etiitingina nonginaaili suena atiulu karika erooro tani aisiisiaa me la gheelei ale ateva epona etana. Me laghe piti elokoila kasina mata inangari tale ia o suena atiulu laghe uela va, “Vau palepale ekilakila llo taumattu kapuna,”<sup>††</sup> me, “Lo atoa la ue va kapuna ila God, la tani kiri vulu isaa akapaaili voto karika masina.”

<sup>20</sup>Elome tale alena ateva tau peipeiena ateva, kasina tana aikaai inana laghe gheleila tale gol me silva me kasina laghe gheleila tale kosa me tale tuku ngai, kasina la namanamaa tale nau namu ngatoa la veluvelu eitauaa, me kasina la namanamaa tale nau ekapa atoa.<sup>21</sup> Lo atoa la gheelei eraarangisanaila, aue la nongina aikaai inana ateva la namanamaa nau namu ngatoa la veluvelu eitauaa. Aue la manga, me la tau ngai uungu ta Vau eteva, me aue la aimonomosiaa tani ghelei isaa akapa ase masi niuungu.

<sup>22</sup>Me uakekkelio tale sesa niunguu aliki taita me vause atoa la aloanna tani ghelei, me ukasu tee voto ghulughuluena me niaikaiaa, niaielousi, luei, tee lo atoa la ghaatoka tuutuuliira ta Vau ngepona ateva, me tee urunguitaniira raarangisana.<sup>23</sup> Uamasalikaa tee ase ni-aissakeanaa kaluira alokapakapa atoa taumattu, poli ukilakila va isaa o voto, aue ealakuti niaikiso.<sup>24</sup> Kapuna tau ngai uungu eteva Vau ngepona ateva, karika emene aikiso ta samasamaane esaghuighuina tee isaa akapaaili tau-

matu. Etani roo tani apasunga, me erau mene sessai parasi ia.<sup>25</sup> Esioaa nannaane nau eloeloe taumattu ngatoa la ghaapasunga llo voto etam lao aitauaa tee Uru ngai Manga ateva, me koti God aue ekatulainila tani nna ngaioghioghi me la kila voto koronna,<sup>26</sup> me aue nannaaira emasalike me la kasu vuli unna airrekati eteva Satana, poli ia ghe gheleilala la ghe karavusula tani ghelei ssavoto, ealoanna va la ghelei.

### Gheegheleiaaira sesa taumattu ngatoa tale airuuruu

**3** Ukila llo oia va: Airuuruu tale nau, taumattu ngatoa aue la ghaa mmarikana.<sup>2</sup> Taumattu ngatoa aue la ghailousienila nonga, me aue la ghailousia viliki veu me la ghasakeainila me aue la saeaa nannaaira, me aue la ghauliaa saasakia ta mene katoa, ta nitam nongo usila tamaira me kinaira, karika aue la kaili emasina, me karika aue la oneonea God,<sup>3</sup> karika aue la ghailousia mene katoa, karika la ghanna tani aikkaluaa tee mene katoa, aue la ghaikamea tee mene kasina taumattu tani apalataila, karika la rooro tani apala sesa aloannaaira, karika aue la nna ngaitootoonga tee mene katoa, aue la ratirati voto ghulughuluena,<sup>4</sup> aue la tau kapuira atoa ta tau ngaissaniira atoa, aue la ailuilui tani ghelei voto sesa, aue la saeaa nannaaira, aue la ghailousia gheleiaa kosa ateva me karika aue la ghailousia God.<sup>5</sup> La aapasunga vara la mene aimuli usi tee God, me karika ta la ratirati sarasarakaniaane God tani gheleila la ghulughuluena. Uakekkelio tale isaa o taumattu.

<sup>6</sup>Katoa etaira la aikamea tani sso aleira katoa, me la kamekame lo atoa vause karika marekate nannaaira me maate ila tale ninannaa tale sesa

<sup>††</sup>2:19 Nambas 16:5

gheegheleiaaira, me la kaakatulainila lao tale voto sesaaili. <sup>7</sup>Ila o vause atoa la aaloanna tani kila ouna voto, me karika la rooroo tani kila amasina voto koronna. <sup>8</sup>Emua arau Jannes me Jambres karika lalu ghe tiitingina aitaaua tee nannaane Moses<sup>‡‡</sup>, me tale ia o salana atikirighi, ila o taumattu ngatoa karika la tiitingina aitaaua tee inangari koronna. Sesaailli nannaaira me peisaane ila tale niaikaai. <sup>9</sup>Nauira karika aue aluse poli taumattu ngakapa atoa aue la tara kila alokapakapaaira, nongina taita alua o.

### Inangari niloeloe ta Timoti

<sup>10</sup>Me io, ukilakilaaili voto aghe apasungaala, tokatokaaghi, voto aghanna tani ghelei, aikaaiaghi, nongina karika esesai parasieghi, ailousiaaghi, karika aghe sio asoasooa tale uunguaaghi, <sup>11</sup>maamatana me nimmarikana, voto laghe ghelei teieghi tale masaliki taatara eAntiok, eKoniam me eListra. Ukilakila va aghe ghaala oroi nimmarikana oia, me Vau ngepona ateva ghe asaangieghila tale isaa o nimmarikana aghe ghaaghaa. <sup>12</sup>Koronna, lo akapa atoa la aikaai ta Karisto Iesu me la aloanna tani toka nongina God, aue la ghaa nimmarikana, <sup>13</sup>me sesa taumattu ngatoa me tau nikamekame atoa karika aue la ruu poi tani ghelei ssavoto me kaluira ssavoto aue oroieili. Aue la kame taumattu ngatoa, me ila tee. <sup>14</sup>Me io, unnaa parasi voto koronna ami ghe apasungaala etam, me ukilakila va koronna, poli uatoka tuutulim ta lo atoa laghe apasungaala etam, <sup>15</sup>me ta nau aliki io, ughe kilala Uru ngai Manga ateva. Uru ngai Manga ateva eghelei alo-masaangaita tani kila va God ghe asaangitala nau ita ghe aiesoala ta Karisto

Iesu. <sup>16</sup>Ia akapa Uru ngai Manga ateva ghe mae sio ta paane ateva God, eaaisausieinita tani apasunga, tani pao voto karika masina, tani loeta tale voto karika masina, me tani apasunga salana tani ghelei voto ghulughuluena. <sup>17</sup>Tale ia o salana atikirighi, kapuna tau ngai uungu eteva God aue aimonomosiaa me erooro tani ghelei asease masi niuungu etoa.

**4** Ta matane God, me Karisto Iesu, aue eghelei niasakei ta taumattu ngakapa atoa, maulue ila me matena atoa, me poli emaemae tani aitaraa kosa akapa ateva, aghaulia ngakorokorongan etam: <sup>2</sup>Tani ppoosaa masi kiukiu; unim aimonomosia nau ekapaaili tani ppoainia tale nau la aloanna tani nongo, me nau la tam aloanna tani nongo, urau mene sio asoasooa tani loe taumattu tani gheleila va la oghi vulu kaluira ssavoto, me uapasunga tani asarasakanaila. <sup>3</sup>Poli nau too emae-mae, taumattu ngatoa karika aue la aloanna tani nongo koronna niapasunga. Ta aue la usilaa aloannaira, me aue la kolo oroieili tau ngai apasunga ngatoa tani auliaa etaira saa ateva talingaira ealoannaaili tani nongoa. <sup>4</sup>Aue la tam aloanna tani nongo inangari koronna, me aue la anna tani nongo asease kiukiu uunguaa kosa ateva. <sup>5</sup>Me io, uaitarainio tale isaa akapaaili o asease voto. Uapala voto llo mmarikana, me ughelei uunguaa tau ngai ppoa ngateva tale masi kiukiu eteva, me ughelei ekapa ia o niuungu eteva God ghe tau aatu sio tani gheleia.

<sup>6</sup>Me nau amate, raeghi eteva aue nongina uaeni opringi eteva la kaokaoa sae tale liu nighelei aiaavususuuena. Naughu oia tani kasu vuli ia oia maulue ateva. <sup>7</sup>Ngaghe kaarasila tani aiuvi tale

<sup>‡‡</sup>3:8 AJiu etoa la ghe uue va taita alua oia tau nialaala ilalua, kapuna ilalua Pero ta nau Moses. Utara Eksodas 7:11-22.

masi niaviuvi eteae, ngaghe rekatala tale airuuruu tale niaikarati eteae. Me ngaghe poso asarasarakana niaikaia. <sup>8</sup>Me ghaine aipolipoli eteva, kou nguru ia, etoitoieghi, uneira ia lo atoa ghulughuluena ila. Vau palepale ateva ia ghulughuluena ia tani ghelei niaisakei, ia aue atokaie sae ta urughu tale ia o nau eteva emae. Me karika va aghi nonga, ta lo atoa tee la toitoia me la ailousieinia tani taraia va emae.

### Airuuruu inangarina Pol

<sup>9</sup>Utootonga tani mae tara parasieghi, <sup>10</sup>poli Diimas ghe ailousiangailila gheleiaa kosa ateva, me ghe kasu vulieghila, me ia eTesalonika. Me Kreskens ghe lao sio tale provinsi eteva eGalaisia, me Taetas ia tale provinsi eteva eDalmatia. <sup>11</sup>Angalua nonga oia me Luk. Ukolo Mak me amalu mae, poli ia eroo tani sausieghi tani uungu. <sup>12</sup>Aghe sungi tau lao sio Tikikus elpises. <sup>13</sup>Nau umaemae ughaa mae tee uneghi aiaasae ngeleka ateva aghe velu elokoiela eTroas, tanganue Kapus. Ughaa tee mae uneghi vuku, llo vuku aghaloannaaili laghe gheleila tale viliki ghaata kkena. <sup>¶</sup>

<sup>14</sup>Aleksanda, ia o eghelei voto tale brasi me aeana, ghe ghelei teieghila oroieili voto karika masina. Me Vau ngepona ateva aue etaula aipolipoli tale saa ateva aghe gheleila. <sup>15</sup>Io tee uai-

monomonosia tee ia o taumattu ngateva poli etam aloanna poi inangarimami.

<sup>16</sup>Karika teva ghe tiitingina tani sausieghi, tale aitiutiu eteva nau aghe tinginala tale niaisakei. Taumattu ngakapa atoa laghe kasu vulieghila. Alooloo sae va God ekkaluaa isaa o voto. <sup>17</sup>Me Vau eteva ghe tokatoka aitauaa teieghi me ghe tautau mae sarasarakana etaghi. Liuna avalua o me aghe ppoa ngakapaailila masi kiukiu ta taumattu karika aJiu ila tani nongoa. Me aghe saangala nau laghe annaala va amate. <sup>§§</sup> <sup>18</sup>Me Vau ngepona ateva aue easaangieghi tale voto akapaaili sesa la aloanna tani ghelei etaghi. Me aue eghaa amasinaailieghi lao tale ararimangalina ateva epona liu. Ta ngetana ita tau sae ararina ateae nau ekapa atoa. Koronna.

<sup>19</sup>Utau lao masimasiaaaghi ta Prisila me Akuila me ta kapuna atoa Onesiporus. <sup>20</sup>Erastus etokatoka eKorint, me aghe kasu vulila Tropimus eMiletus poli isikinna ia. <sup>21</sup>Utootonga tani mae, me auena nau ttasi. Iubulus, Pudens, Linus me Klaudia la tau aatu sio masimasiaaira tee me ila akapa tau ngaikaia ngatoo oia.

<sup>22</sup>Alooloo sae va Vau ngepona ateva aue etoka aitauaa teio. Me masimasiaane God aue etoka aitauaa teiem akapaaili.

<sup>¶</sup>4:13 *laghe gheleila tale viliki ghaata kkena* Llo vuku laghe gheleila tale viliki ghaata kkena, aipolina namungaili, poli karika erooro tani sesa parasi.

<sup>§§</sup>4:17 Tale inangari nge Grik, *aghe saangala tale paa laeoni eteva*.

*Uru ngai etikirighi Pol ghe pitiela ta*

## Taetas

**1** Aghi, Pol, kapuna tau ngai uungu ieghi God, me kapuna apostolo ieghi Iesu Karisto:

Ghe sungieghila tani laa asarasarakana uneira niaikaai kapuna taumattu ngatoa God ghe suitoongainilala, tani apasunga salana koronna, eaapasunga vaalua tani toka tale aaloanaane God. <sup>2</sup>Ia oia inangari eteva koronna ia, egheeleita ita aatoka tuutuliita tale maulue ateva tokatoka liu ia. God ghe aulia ngalokoiela etaira tale inangari nialokoi emua arau, me auena kosa ateva ghe lutula. Ia karika eroroo tani kamekame. <sup>3</sup>God, ia tau ngai asaangita ia, ghe apasunga ngaotula ia oia inangari eteva koronna ia tale nauna tuunga ateva ghe suitoongainiela, me ghe taue mae sio etaghi me ghe aulia ngasarasarakana etaghi tani ppooainia.

<sup>4</sup>Apitipiti aatu etam Taetas, io natughu tuungi io elome tale niaikaai italu uunusi. Aloo sae va maamasinaane me luei kanna God Tamaita ia, me Karisto Iesu, tau ngai asaangita ia, aue toka etam.

## Uungua Taetas eKrit

<sup>5</sup>Aghe kasu vuliola eKrit va ughelei kasina voto karika ita ghe ruula, me usui elda ngatoa tale ale manga, tale kateva kateva masaliki taatara, nongina aghe aulia tau aatu sio. <sup>6</sup>Elda ngatoa karika mene righi sesa gheeleiaaira, me vauseniira ekateva nonga, me natuira atoa la nongo usila tamaira me kinaira atoa, la rau mene amakatakata me tau nissakeaa ila. <sup>7</sup>Ta lo ateva eaitaraa uunguaane God tale ale manga karika mene righi sesa gheeleiaane. Erau mene

ue va ia nonga namuu ia, me etau nisesai ia. Erau mene tau niropi sesa manu, me ealona tani aiuvi, erau mene kuruetu tale viliki veu. <sup>8</sup>Me ia o taumattu ngat-eva aikoloa taumattu me eaitarainila nau la lao tanguena. Me eailousia saa voto masina, me enanna ngamasina, me eghulughuluena, me eraarangisana, me eaitara nannaane me gheegheleiaane. <sup>9</sup>Eposo parasi inangari koronna, nongina ami ghe apasungaala me eroroo tani aisusia mene katoa tale koronna niapasunga, me eroroo tani kiso lo atoa la sessa tee inangari koronna.

<sup>10</sup>Poli aue eoroieili taumattu ngatoa aue la tau nissakeaa me tau ninim sama ila me tau nikamekame ila, tani ila o lo atoa la asarasarakana uungua ni-isoiso. <sup>11</sup>Uaulia etaira va karika la mene apasunga, poli ngila ghe gheleila katoa taumattu me tee natuira atoa tale kateva kateva ale, ngila ghe oghi vulula inangari koronna, laghe nim ghelei isaa o niapasunga tani ghaa uneira viliki veu. <sup>12</sup>Kateva taumattu eKrit la ghe kolokoloa va propete ia ghe uela va, "Taumattu nge Krit atoa, tau nikamekame ila. Ila nongina sesa ghaata kkena atoa, mangoona ila, me tau ninamanama ila." <sup>13</sup>Isaa o inangari koronna. Liuna avalua o me uppooa inangari sarasarakana etaira, me aue la roo tani sarasarakana tale uneira niaikaai. <sup>14</sup>Me la rau mene tau lao nannaaira tale kaluira kiukiu marrippana aJiu etoa, me inangari lo atoa la liuliu viliira tale inangari koronna la poppooa ngasarasarakana. <sup>15</sup>Lo atoa urunguitaniira raarangisana, voto akapa etaira raarangisana, me ta lo atoa urunguitaniira karika raarangisana me karika la aikaaia, karika righi voto etaira raarangisana, ta isaa akapa ninanna me karika la kilakila va eaa sesa me masina. <sup>16</sup>La ue va la kilakila God, me gheleiaaira eaapasunga va karika la ki-



lakilaila, ila mauuna ila, karika la roo tani nongo usila, me karika muenna ila tani ghelei niuungu masina.

### **Inangari tani apasunga tale asease taumattu**

**2** Me io uapasunga voto koronna elao-lao aitaua tee koronna niapasunga.

<sup>2</sup> Uaulia ta taita namu ngatoa va la aitaria tokatokaaira, me uunguauaira, me aip-pooaira, me la nanna ngamasina. La tani ghulughuluena tale uneira niaikaia, me niaielousi, me la tingina akorokoron-gana eghaa nau eruu.

<sup>3</sup> Me tale ia nonga o salana atikirighi, uapasunga ta vause namu ngatoa, tani apasunga va la oneoneaa God. La rau mene kasu see tani ppoaa sesa voto ta mene katoa, me la rau mene toka aloanna tani toka ropiropi sesa manu, ta la apasunga ta katoa saa voto masina.

<sup>4</sup> Liuna avalua o me ila o vause namu ngatoa la apasunga ta llo vause aviri laghe laila, tani ailousia taitaniira atoa me natuira atoa, <sup>5</sup> me la nanna ngamasina, me la raarangisana, me tani masi vause tani aitaria paa ngale, me tani aisausia, me tani oneoneaa taitani-ira atoa, me aue karika teva eppooa saasakiaa tale inangarina ateva God.

<sup>6</sup> Me tale ia nonga o salana atikirighi, uapasunga tee tale llo taita aviri laghe laila, tani nanna ngamasina <sup>7</sup> tale voto akapa. Me io uapasunga nonga masi voto. Urau mene usimaghalue nau uapasunga, me uapasunga tale masi ninnanaa me nioneoneaa, <sup>8</sup> me utani apasunga nonga koronna tana inangari, me karika teva aue auliulieinio. Arova ughelei evalua o, tau ngai ssateem atoa karika aue la ghaulia teeio righi voto, me aue la palata.

<sup>9</sup> Uapasunga ta tau ngai uungu etoa karika la tokatoka tale aloanaaira va la nongo usila kapuira namu ngatoa tale isaa akapa voto. Me la tau lao nannaaira

me sarasarakaniaaira tani ghelei voto eroroo tani ghelei emasimasi kapuira namu ngatoa, me la rau mene ssakea etaira. <sup>10</sup> La tani apasunga va la rooroo tani atoka tuutuliira etaira tale isaa akapaaili voto la ghelei me karika la ainao peiira, me aue la oneoneaa inangarina God tau ngai asaangita ia.

### **God eaalona akapa taumattu ngatoa tani saanga**

<sup>11</sup> Poli tale maamasinaane God esaangi taumattu ngakapa atoa, ang ghe kauerekatila. <sup>12</sup> Eaapasunga etaita tani ue va “karika” tale voto karika ita oneoneaa God etana me sesa voto kosa ateva ealoanna, me ita nanna ngamasina, ita ghulughuluena, me ita oneoneaa God tale tokatokaaita tale nau etiulu oia, <sup>13</sup> nau ita toitoi esarasarakanaaili tale masi nau eteva nau kapuita Goto ateva me tau ngai asaangi eteva Iesu Karisto emae tale sarasarakaniaane me mallangina ateva. <sup>14</sup> Ghe taue mae sio etaita tani ghaa oghita tale isaa akapa sesa voto me tani ghelei eraarangisana taumattu tani kapunaaili ila me la ghannaaili tani ghelei masi niuungu.

<sup>15</sup> Me isaa toko voto utani apasunga. Uaipooaa teeila tani asarasakanaila me ukisoila tale inangari matuutuliena. Urau mene tau velu teva va etaraa loio sio euu.

### **Tani ghelei voto masina**

**3** Umene aulia ta tau ngai esoa ngatoa va la oneoneaa lo atoa la muemueinila me matuutuliena ila tani nongo usila me la ghaimonomosia tani ghelei masi niuungu, <sup>2</sup> me tani rau mene ppoaa saasakiaa tee kateva, me tani rau mene aikiso, me tani nnaa mene kateva, me tani siua nannaaira tale isaa akapa taumattu.

<sup>3</sup>Poli ita tee tale nau to ang ghe lao sio, alokapakapa ita me karika ita ghe nongonongo usila me laghe kametala me ita ghe nim uungu tale ase niateatea sarasarakanaaaili me ase nimasmasi. Ita ghe tokatoka tale ninannaa tani ghelei saasakiaa kateva me tani sessaita ta lo atoa peiira me uunguaaira me ita karika. Laghe sessa teeita me ita, ita ghe sessa tee mene katoa. <sup>4</sup>Me nau masi aisausiaane me aielousiaane God tau ngai asaangita ia ghe kauerekatila, <sup>5</sup>ghe asaangitala. Karika va tale voto ghulughuluena ita ghe ghelei ta poli aloususiaane, ghe asaangitala tale nisuusuu tale nilutu aouna me nighelei aouna kannna Spirit Manga ateva. <sup>6</sup>Poli Iesu Karisto ghe matela etaita tani asaangita, God ghe tautau sio Spirit Manga ateva etaita, me karika ghe ghaaghaa oghia. <sup>7</sup>Me nau God ghe ghelei eghulughuluenaitala poli maamasinaane, ita, ita rooroo va ita ghaa voto ita taatara lao etana tale maulue ateva tokatoka liu ia. <sup>8</sup>Ita aatoka tuutuliita tale isaa oia inangari. Me aghanna va utani aulia ngakororongana isaa oia voto me lo atoa la ghaiesoa ta God, la ainangananga tani taula lao tani ghelei masi niuungu. Isaa o voto masinaaaili me esausi taumattu ngakapa atoa.

<sup>9</sup>Me uakekkelio tale nisama alokapakapana me kiukiuiita me tuvura atoa me niaisoa me niaikiso tale inangari tale

uungua inangari nipaopao. Poli isaa o voto karika aue sausi taumattu, me nim kamena. <sup>10</sup>Uaulia kiena lo ateva taumattu eaatoka apolapola taumattu. Uaulia katengaata etana, vara me umene aulia ghaluene etana. Nau uruu, urau mene ghelei mene righi llo etana. <sup>11</sup>Aue ukilaaili va ia o ase taumattu ngateva sesa ia me tau ssavoto ia me gheegheleiaane eaapasunga aotu va sesa taumattu ia.

### Airuuruu tale inangari

<sup>12</sup>Nau eteva asuu aatu Atemas o Tikikus etam, utootoonga ngakapa ase salana tani mae taraieghi eNikopolis, poli aghanna tani toka oia eNikopolis nau nikkaili me kuukuu eteva. <sup>13</sup>Ughelei saa llo voto urooroo tani ghelei tani sausi Senas tau ngai sausia tale niaisakei ia me Apolos tale kasukasuaairarua me karika lalu mene tukuna tale voto lalu anna. <sup>14</sup>Me tee, kapuita taumattu ngatoa la tani ghaa alomasaanga tani taula lao tani ghelei masi niuungu, me aue la rooroo tani tau lao voto ta lo atoa la aloana niaisausi, me la rau nim mene toka me karika la ghelei righi voto.

<sup>15</sup>Ila akapa lo atoa la tokatoka teeieghi la suu atu sio masimasiaaira etam. Am amasimasi lo atoa la ghailousieinamami tale niaikaiaia.

Alooloo sae va maamasinaane etoka akapa etaimim.

*Uru ngai etikirighi Pol ghe pitiela ta*

## **Pilimon**

**1** Aghi Pol, tau karavusu ieghi mausi Iesu Karisto, me Timoti kapuita ia.

Apitipiti aatu etam Pilimon, masi kapuimami eteva, me tau ngai uungu eitaua teeiemami io. <sup>2</sup>Me angalu suusuu masimasiaangalua ta kapuingalua vause ateva Apfia me ta Akippus tau ngai uvi eitaua teiengalua tale masi kiukiu eteva, me ta tau ngaiesoa ngatoa la mae velu-velu eitaua tanguem.

<sup>3</sup>Alooloo sae va maamasinaane me luei ekasukasua ta God Tamaita ia me Vau ngepona ateva Iesu Karisto aue etoka teeiem.

### **Nikailli emasina me nilooloo sae**

<sup>4</sup>Nau etoa aghannainio tale kalughu nilooloo sae, akaakaili emasina ta kapughu Goto ateva, <sup>5</sup>poli anongonongo aikaaiam ta Vau ngepona Iesu me ailousiaam ta lo atoa manga ila. <sup>6</sup>Alooloo sae va ughele livalivasanaaili tani aulia ta mene katoa aikaaiam me aue ughele kila amasinaaili isaa akapa masi voto ita ghaaghaa ta Karisto. <sup>7</sup>Aielousiaam ghe tau mae sio kinatama nimasimasi me easarasarakanaieghi poli io, masi kapughu eteva, ughelei urunguitaniira lo atoa manga ila tani mene ateatea ngamasina.

### **Pol ghe looloo luei mausi Onesimas**

<sup>8</sup>Liuna avalua o me arongona ta, ta Karisto karika amaamatautu tani ppoa ngasarasarakana saa ateva erooro tani gheleia, <sup>9</sup>me karika, ta akolokolo tauo tale uungua niaielousi eteva. Aghi Pol, tau ngaimatoonga ieghi me karavusu

ieggi ta Iesu Karisto, <sup>10</sup>akolokolo tauo mausi natughu ta Onesimas, ghe natughuiela nau atokatoka tale ale mata voovoo. <sup>11</sup>Nau to ang ghe lao sio, karika riggi uunguaane ta ngetam me isaa oia nau ang ghe uunguaanela mane etam me etaghi namungaili.\*

<sup>12</sup>Ngamene sungisungie aatu etam tee me urunguitanighi eteva. <sup>13</sup>Aghe annala va ghe toka teieghi tani ghaa lium ateva tani sausieghi nau atokatoka tale ale mata voovoo mausi masi kiukiu. <sup>14</sup>Me karika aghanna tani aulia voto va ughelei ta saa llo voto ughelei, ughelei tale aloaloanaam, me karika va la sulungio tani ghelei. <sup>15</sup>Koti aghanna ngavalua toko va Onesimas ghe kasu vuliola tale nau karika aluse, va nau ekiria mae etam, aue toka laalaa liu teeio. <sup>16</sup>Karika va nongina tau ngai uungu ia karika etokatoka tale aloanaane, ta elaulau tau ngai uungu eteva karika etokatoka tale aloanaane, masi kapum ateva. Masi-naaili ia etaghi me maamasinaane etam aue namungaili va kapum tau ngai uungu ia, me kapum ia mausi Vau ngepona ateva.

<sup>17</sup>Liuna avalua o me poli utaatareieghi va kapum ieghi, ughaia nongina va ughaaghaaieghi. <sup>18</sup>Arova ghe gheleila riggi voto sesa o ghe tam liula voto ghe ghaala, uatoka sae maate ateva etaghi. <sup>19</sup>Aghi Pol apitipiti isaa oia inangari ta nimaghi va aue aliu isaa o voto. Me karika aghanna tani aulia va io tee karika ughe liu voto aghe gheleila tale maamauluaam. <sup>20</sup>Aghannaaili, kapughu, va arova aghele ghaa riggi nimasimasi etam ta Vau ngepona tani mene ateatea ngamasina tale urunguitanighi eteva ta Karisto. <sup>21</sup>Poli aghaiesoangaili tale nongonongo usilaam, liuna avalua o me apitipiti etam. Akilakila va aue ughelei

\*1:11 Tale inangari nge Grik, Onesimas malloeana va "ghelei masi niuungu ooroi".

oroï voto epona tale llo voto aghe kolomiola va ughelei.

<sup>22</sup> Me mene kateva voto: uaimonomosia tiulu rum nau aghatu aue atoka etana, poli aghaiesoa va aue amae taraiem mausi niliu tale kaluimim nilooloo sae.

<sup>23</sup> Epapras angalu kaakaravusu eitaua ta Iesu Karisto, esuula masimasiaane

etam. <sup>24</sup> Me Mak tee me Aristakus, Diimas me Luk ila o lo atoa la uungu teeieghi, la suula masimasiaaira.

<sup>25</sup> Maamasinaane Vau ngepona ateva Iesu Karisto aue toka tee kapuimim spiriti eteva.

*Uru ngai etikirighi*

**Jeimis**

*ghe pituela*

**1** Aghi Jeimis, kapuna tau ngai non-gonongo anna ieghi God me Vau ngepona ateva Iesu Karisto.

Apitipiti aatu etaimim kasangaulu ghalua (12) ararimangali nge Israeli am tokatoka reerekata see tale mene kasina patunganua.

Masi nau eteva etaimim.

**Nitootoonga eaasarasarakanaita**

<sup>2</sup>Kapughu etoa, nimasiasi eteva namungaili ia epasu etaimim nau am ghaa ase nitootoonga, <sup>3</sup>poli am kilakila va nau ita apala nitootoonga tale aikaa-iaaita eghelei nitingina akorokorongana.

<sup>4</sup>Tani tam ruu tani tingina akorokorongana etani ruu uunguaane etaimim me aue am matuena me am ghulughuluena me karika aue am tukuna tale rigghi ase voto. <sup>5</sup>Arova teva etaimim etu-utukuna tale masi alomasaanga kanna God, ekolomi God. God emasimasieli tani tau lao me karika etautau mae tale nisessaia me tani ului eleiaaita sesa, me aue tau lao masi alomasaanga etana.

<sup>6</sup>Me nau eteva ukolomi, uaiesoa me karika umene ghalua nannaam, poli lo ateva eghaaghalua nannaane nonginaailli koto ateva elamana kuukuu eteva ekuukuueinie see. <sup>7</sup>Ia o ase taumattu ngateva karika emene anna va aue ghaa rigghi voto ta Vau ngepona ateva, <sup>8</sup>poli nannaane ase taumattu ngateva o eghaaghalua me karika eaatoka tuu nannaane tale voto eghelei.

<sup>9</sup>Lo atoa kapuna iem God me karika peimim, am masimasia poli am tokatoka epona ta mata God. <sup>10</sup>Me lo ateva tue peipeiena ia emasimasi poli etokatoka euu, poli aue kapa nong-

ina ueli palaoa ngateva emammate. <sup>11</sup>Nau sinaka ateva esaesae, mallangina ateva elallangia me palaoa ngateva ekaakatuu me masi taataraane esessa. Tue peipeiena ateva aue kapa avalua o nau eteva eghelei uunguaane.

<sup>12</sup>Niarangise tale taumattu ngateva etiitingina akorokorongana tale nitootoonga, poli nau nitootoonga eruu, aue ghaa kou nguru maule ateva tokatoka liu ia, God ghe auliaala inangari nialokoi ta lo atoa la aielousieinia.

<sup>13</sup>Arova nitootoonga eghaaem, karika teva emene ue va, "God etootoongainieghi." Ta voto sesa karika etootoonga God, me ia karika eghelei nitootoonga ta teva. <sup>14</sup>Ta ninanna sesa etaita eghelei nitootoonga me eghaaghaaita lao tale voto sesa arova ivia ateva. <sup>15</sup>Nau eteva sesa ninanna ange tokala, eaalutu sesa voto, me nau sesa voto epiipinosa anamuu, eluulutua nimate atea.

<sup>16</sup>Kapughu etoa, isaa o voto erau kameam. <sup>17</sup>Isaa akapailli masi voto me voto ghulughuluena ekasukasu epona liu. Ekasukasu me esiosio etaita ta Tamaita ngepona liu eteva ghe gheleila mallanga atoa me karika eaikolikolia nongina tootoo ateva. <sup>18</sup>Tale aaloaloanaane ghe alututala tale inangari koronna me aue ita rooroo tani taumattu niaitiutiu tale isaa akapailli voto ghe gheleila.

**Tani nongo me ghelei**

<sup>19</sup>Masi kapughu etoa, am nnaa parasi inangari toko va, am akapailli am kila tani oti parasi talingaimim tani non-gonongo me am rau mene ailuilui tani sama me tani sessai. <sup>20</sup>Ta sessaia taumattu karika aue ghelei rigghi voto va eghulughuluena ta matane God. <sup>21</sup>Liuna avalua o me am ruu tani ghelei sesa me tani annaa saasakiaa ta mene kateva, me

am siua nannaaimim me am ghaa inangari laghe auliaala etaimim erooroo tani asaangiem.

<sup>22</sup> Am rau nim mene nongo inangari me karika am ghelei voto eaaulia. Arova am ghelei evalua o, am nim kamekameam. <sup>23</sup> Lo ateva enongonongo inangari me etam gheelei, nonginaaili taumattu ngateva etaatara taataraane tale ghalasi eteva, <sup>24</sup> me nau eruuruu tani taatara, me ekasukasu, arovaea ta eaikalua taataraane. <sup>25</sup> Me lo ateva etam ghaaghaa velu matane tale isaa o inangari nipaopao ghulughuluena egheleia me karika ekaakaravusu tale ssavoto me nimate, me karika eoghioghi vulu isaa o voto, me karika eaikalua voto ghe nongola me ghe tarala, ta egheelei, niarangise aue toka tale voto egheelei.

<sup>26</sup> Arova teva eue va tau nikaua ia me karika eaitara ngamasina ramuramuti paana ateva, enim kamekamea me unna nikaua egheelei nim peisaane. <sup>27</sup> Llo nikaua God Tamaita ia ealoana me eghaaghaa va raarangisana me masina isaa avalua toko: tani sausi aliki raue vulu etoa me vause raue vulu etoa nau nialousiusi eghaaghaaila, me am rau mene tau velu gheeleiaa kosa ateva va eghelei saasakieinam.

### Karika masina tani aimassia

**2** Masi kapughu etoa, poli ita aiesoa ta Vau ngepona ateva Iesu Karisto iaaili epona, liuna avalua o me am rau mene aimassia. <sup>2</sup> Arova teva taumattu emae nongina am veluvelu eitaue me easae ringi gheelei tale gol me easae tee masi ghinna, me teva llo tee karika righi peina me ghinanina sesa ghele kupi tee sso, <sup>3</sup> me arova utara kkai nonga lo ateva emolumolu emasina me ughele ue etana

va, “Masi aitokatokam ateva toko,” me ughele ue ta lo ateva karika peina va, “Utingina lao to,” o “Utoka sio tapaa kosa,” <sup>4</sup> karika ukilakila va angu aimuli tee tani ghelei niaisakei tani pola tau-mattu tale ale manga ateva tale ninanna karika masina?

<sup>5</sup> Am nongo, masi kapughu etoa, God ghe suietoongaala lo atoa karika peiira tale kosa ateva oia va la tue peipeiena tale niaikaasia me la ghaa niarangise tale ararimangalina ateva God, ghe auliaala inangari nialokoi ta lo atoa la aielousieinia. <sup>6</sup> Me karika, am taatara lo atoa karika peiira va peisaane ila. Karika am kilakila va tue peipeiena atoa la tau-taue sio euu tani ghelei voto maate etaimim? Me karika am kilakila va la ghaaghaaiem tani laoainam tale liu niaisakei? <sup>7</sup> Karika am kilakila va ila la tani aattara tani aulia saasakia inangari ta lo atoa masi ararina ateaie Iesu, am etana?

<sup>8</sup> Arova am tani aitarara kanna inangari nipaopao Iesu kingi ia tale Uru ngai Manga ateva eue va, “Uaielousia lo ateva etokatoka akalakalangina etam nongina uaielousieinio,”<sup>†</sup> am ghelei masi voto. <sup>9</sup> Me arova am aimassia, am ghelei voto sesa, me inangari nipaopao eghelei niaisakei etaimim va karika am ghe aimuli tee. <sup>10</sup> Poli arova lo ateva eaimuli tee isaa akapaaili inangari nipaopao me kat-eva nonga ia ange tam aimuli teieli, ange ghelei saasakia ngakapaailiila inangari nipaopao. <sup>11</sup> Poli God ghe uela va, “Urau mene lai sari kateva vausenna ateva,”<sup>‡</sup> ghe ue teela va, “Urau mene aiuvi emate.”<sup>¶</sup> Me arova utam lai sari kateva vausenna ateva me uaaiuvi emate nonga, angu ghelei saasakiaala inangari nipaopao.

<sup>†</sup>2:8 Levitikas 19:18

<sup>‡</sup>2:11 Eksodas 20:14; Diuteronomi 5:18

<sup>¶</sup>2:11 Eksodas 20:13; Diuteronomi 5:17

<sup>12</sup>Am ppoa me am ghelei nongina lo atoa aue la aisakei tale inangari ni-paopao poli isaa o llo, egheleia me karika ekaakaravusu. <sup>13</sup>Poli llo niaisakei karika righi niaelousi etana, aue ghaa lo ateva taumattu karika eaielousi, me niaelousi aue apala niaisakei.

### Niaikaaia me niuungu

<sup>14</sup>Kapughu etoa, arova teva taumattu eue va eaikaaia, me karika righi masi niuungu eghelei, karika aue sausia. Am anna va ase niaikaaia ngateva o aue asaangia? <sup>15</sup>Arova teva tuem me nengam etuutukuna tale ghinna eaaloana me inana tani nama ta kateva kateva nau, <sup>16</sup>me teva etaimim ghele ue etana va, “Kasula tale luei me laa ghaititii me uanasa, me unamanama me essoio,” me karika eghelei righi voto tani sausia, am anna va saa righi masi voto aue lutu? <sup>17</sup>Tale isaa o ase salana me arova niaikaaia karika elaolao tee niuungu, isaa o niaikaaia nim matena.

<sup>18</sup>Me kateva aue eue va, “Unem niaikaaia?” Me aghi aue aue va, “Auungu. Uapasunga unem niaikaaia karika niuungu etana me aue aghapasunga aikaaiaaghi tale voto auungu etana.” <sup>19</sup>Uaaiesoa va kateva nonga ia God ateva? Masi ninanna ia! Me raroai tee atoa la ghaiesoa me la reterete.

<sup>20</sup>Alokapakapa ateva, uanna va aghapasunga va niaikaaia karika elaolao tee niuungu, nim peisaane? <sup>21</sup>Vaalua tuvuita ateva ta Abraham ghe ghulughuluenala ta matane God? Poli voto ghe gheleila nau ghe alokoi saela natuna ta Aisiki tale liu nighelai aiaavusuvusuea ateva tani taela ta God. <sup>22</sup>Uta va, unna niaikaaia me voto ghe ghelei ghe kasukasu eitaua. Me unna niaikaaia ghe masinala tale voto ghe gheleila. <sup>23</sup>Me inangari tale Uru ngai Manga ateva

ghe koronnala nau ghe uela va, “Abraham ghe atokala tuutulina ta God, liuna avalua o me ghe aseala va ia ghulughuluenala ia,”<sup>8</sup> me laghe kolokoloa va kapuna ia God. <sup>24</sup>Am tara va taumattu ngateva egulughuluenala poli voto eghelei, karika va eaikaaia nonga.

<sup>25</sup>Nim nongina Reiab aipae taita ia me God ghe aseala va ghulughuluenala ia tale voto ghe gheleila nau ghe aitarala tau lloua akilakila atoa me ghe apasunga katikirighi ppae salana me laghe usilainiela. <sup>26</sup>Nongina taumattu ngateva karika eaainoana, matena ia, liuna avalua o me arova niaikaaia nonga me karika righi niuungu, isaa tee o voto matena.

### Tani aitara ngamasina ramuramuti paa ngateva

**3** Kapughu etoa, erau mene oroi iem lo atoa am anna va am tau ngai apasunga, poli am kilakila va lo atoa ita aapasunga, aue aisakeiata aue la tani kutumi emasina. <sup>2</sup>Ita akapa ita ghelei asease voto sesa. Me arova teva taumattu etam ghelei voto sesa tale poppooane, ia ghulughuluenala ia me eghelei runga ngamasina akapa vilikina.

<sup>3</sup>Nau eteva ita aasae tau lao biti eteva tale paa ooso ateva tani alooia kona eaa ita anna va elao, ita gheleia va ia akapa ekirie see nongina ita aloanna. <sup>4</sup>Ita mene tara kateva aimatoongana tale anua ateva. Arongona ta namuu ia me kinatama kuukuu eteva ekuukueinia, kapteni eteva enim aloaloa tale aialoalo atiuu ghaunaaili ia. <sup>5</sup>Nonginaaili ramuramuti paa ateva ghauna ia tale vilikita me eaasake va erooro tani ghelei kinatama voto. Gharighi kuraa erooro tani ata teva kinatama tuvui. <sup>6</sup>Ramuramuti paa ateva tee kuraa ia, tan-

ganueira ia sesa voto atoa. Etokatoka elome tale mene kasina voto tale viliki-ita tani ghelei saasakia taumattu ngateva me eaatoka maamauluaane akapa tale kuraa atea me eGehena eaarokoti kuraa atea etana.

<sup>7</sup>Taumattu ngatōa la rooroō tani ghelei isaa akapa ase ghaata kkena me ghila me llo erarraa me voto elamana la rooroō tani gheleila la matukkale me la ghaitarainila <sup>8</sup>me karika teva taumattu erooroō tani ghelei ematukkale ramuramuti paa ngateva poli sesa ia, me karika erooroō tani matua atoka, me ia pasu ia tale voto kaale erooroō tani kaali emate taumattu.

<sup>9</sup>Tale ramuramuti paa ateva ita tau-tau sae Vau ngepona ateva Tamaita ia, me ie nonga o ramuramuti paa ateva ita kaakasikiena taumattu etana, lo atoa tootoona ila God. <sup>10</sup>Tale ie nonga o paa ateva nitau sae me nikasikiena ekupikupi ghoa. Kapughu etoa, karika emene isaa avalua o. <sup>11</sup>Am anna va manu maraange me manu uelane lalu rooroō tani akala nonga tale kateae mata ngateo? <sup>12</sup>Kapughu etoa, am anna va fig atea ai ia erooroō tani kunea olivs, o uasa uaeni erooroō tani kuneaa righi ue fig? Mata ngateo atea uele ia karika erooroō tani ghelei righi manu va emaraange.

### Alomasaanga ekasukasu epona liu

<sup>13</sup>See alomasaanga nannaane etaimim? Eapasunga tale masi niuungu eghelei tale nisua ninannaa. <sup>14</sup>Me arova nissatee kateva poli ia ange apalaiola me nikuruetuna etokatoka tale urunguitaniimim, am rau mene asakea isaa o voto ta am rau mene ghelei nikamekame tale voto koronna. <sup>15</sup>Isaa o ase ninannaa karika ekasukasu epona liu, ta pei tale kosa ateva me karika emaemae ta Spiriti eteva,

ta kanna Satana. <sup>16</sup>Nau usessa tee kateva poli ia ange apalaiola me ukuukuruetuna, aue utara va voto eaaikasakasalia me asease voto sesa.

<sup>17</sup>Me alomasaanga ekasukasu epona liu, mata ngemua ateva voto etana, raarangisana, me ealoana luei eteva, me enannaa mene kateva, me tani nongo mene katoa, me pasu ia tale niaelousi me masi uenenna, me karika niaimassia etana me karika ekamekame. <sup>18</sup>Tau ngai ghelei luei etoa la pasapasa luei, me la mukemuke voto ghulughuluena.

### Am tau ekapaiem lao ta God

**4** Saa ateva egheeghelei niatunna me niaikiso elome etaimim? Karika am kilakila va ekasukasu tale aloanaaimim eaiuvi tee masi ninannaa tale urunguitaniimim? <sup>2</sup>Am aloana voto me karika am ghaaghaa, liuna avalua o me am aiuvi emate. Am sassai me karika am rooroō tani ghaa voto am aloana tani ghaa. Am aikiso me am aiuvi. Karika am ghaaghaa poli karika am kookolomi God. <sup>3</sup>Nau am kokkolomi, karika am ghaaghaa, poli am kokkolomi tale sesa ninanna, poli nau aue am ghaa aue am uungua tale aloaloanaimim.

<sup>4</sup>Am tau ngilai sari etoa! Karika am kilakila va tani aikapukapua tee kosa ateva nitau ngai ssateena ia God? See io ualoana va kapuna io kosa ateva, io aue utau ngai ssateena io God. <sup>5</sup>Am anna va voto Uru ngai Manga ateva ghe au-liaala va karika righi malloeanina? Eue va, “God eannangaili arova ita aimulusi teeia, me enannaa saasakiaa tee spiriti eteva ghe atokaiela ta ngetaita arova eusila uungua kosa ateva.” <sup>6</sup>Me God etautau mae oroieili maamasinaane etaita. Liuna avalua o me Uru ngai Manga ateva eue va, “God karika poi ealoana lo atoa la tautau sae nannaaira



me etautau lao maamasinaane ta lo atoa la siosioaa nannaaira.”\*\*

<sup>7</sup>Liuna avalua o me am tau ekapaiem lao ta God. Am rati Satana me aue eroo tani ilou vuliem. <sup>8</sup>Am lao akalakala ta God me aue emae akalakala ta nge-taimim. Am tau ngai ghelei ssavoto atoa, am ghelei eraarangisana ma-auluaaimim, me lo atoa eghaaghalua nannaaimim, am ghelei eraarangisana urunguitaniimim. <sup>9</sup>Am alousiusi me am ngala. Me am lo atoa am kangkanga nau ghaine, nikanga elaolao tale ningala, me nimasimasi elaolao tale nialou-siusi. <sup>10</sup>Am siua nannaaimim ta matane Vau ngepona ateva, me aue asaesae arariimim.

<sup>11</sup>Kapughu etoa, am rau mene aulia saasakiaa tee mene kateva. Lo ateva eaulia saasakiaa tee teva tuena o nengane nonginaaili va egheelei niaisakei etana, me arova eghelei evalua o eaulia saasakiaa tee tale inangari nipaopao me eghelei niaisakei etana. Me arova ughelei niaisakei tee tale uungua inangari nipaopao, me karika va uaimuli tee, nonginaaili va io tau ngai ghelei niaisakei io. <sup>12</sup>Kateva nonga etautau mae inangari nipaopao me egheelei niaisakei. Ie nonga erooroo tani asaangi me tturuu. Me io see etam me vara ughelei niaisakei ta lo atoa la tokatoka akalakalangina etam?

### **Tani asakeaa nimana**

<sup>13</sup>Am nongo, lo atoa am ue va, “Ghaine o nimana ita lao tale teva masaliki taatara me ita laa toka kateae nimanama, me ita ghelei niuungu tani ghaa viliki veu.” <sup>14</sup>Me karika am kilakila saa ateva aue lutu nimana. Vaalua tale maamauluaaimim? Nim nonginaaili asu emaemae karika masau me ekapakapa. <sup>15</sup>Me masina arova am nim

ue va, “Arova aloaloanaane Vau ngepona ateva aue ita toka me ita ghelei llo voto.” <sup>16</sup>Am tautau sae nannaaimim me am aasake. Isaa akapa o ase niasake sesaaili. <sup>17</sup>Liuna avalua o, lo ateva ekilakila voto masina tani ghelei me etam gheelei, egheelei voto sesa.

### **Tue peipeiena atoa aue laghaa aipoliira sesa**

**5** Tue peipeiena atoa am nongo! Am alousiusi me am ngala, poli voto sesaaili ange maemae etaimim. <sup>2</sup>Peimim oroi ange maamarokase me ane ateva enamanama ghinnaniimim. <sup>3</sup>Unimim gol me silva ange rorroso, me rorrosoaira aue aulia ngaotuem tale nau niaisakei, me aue enama vilikiimim arova kuraa atea. Am ghe atoka aitauala peimim tale llo nau airuuru. <sup>4</sup>Am tara! Aipoliira taumattu ngatua am ghe tam polilala nau laghe uungula etaimim ange kolokolo anamuu sae ta Vau ngepona ateva, me kolokoloaaira lo atoa la mukemuke Vau ngepona ateva sarasarakanaaili ia ang ghe nongola. <sup>5</sup>Am ghe tokatoka tale kosa ateva tale masi nitoka, me am ghe kuukuruetuna tee masi tokatokaaimim, me am ghe mmoro teela ninamanama nonginaaili ghaata kkena ange ghaala nau eteva la uvi ematela. <sup>6</sup>Am ghe ue va kasina taumattu ghulughuluena va la gheelei sesa, me am ghe uvi ematela llo taumattu karika ghe gheleila isaa o voto. Me karika toa laghe liula voto am ghe ghelei teeilala.

### **Ita rau mene mangoo nau ita ghaaghaa mmarikana**

<sup>7</sup>Liuna avalua o, kapughu etoa, me am rau mene mangoo tani toitoi lomosina ta Vau ngepona aue mae. Am tara vaalua tau ngai ghelei utana ateva etoitoi va

\*\* 4:6 Masi Nitoka 3:34

kosa ateva esausi tani ghelei me umana voto ekunea masi voto me vaalua etam maamangoo tani toi vaoo ateva. <sup>8</sup>Am tee am rau mene mangoo me am tingina akorokorongana, poli maemaeane Vau ngepona ateva ange aakalakalaa. <sup>9</sup>Kapughu etoa, am rau mene ainguungua tee mene kateva ta am rau aisakei, poli tau ngai ghelei niaisakei eteva etiitingina ta paa ngatamana.

<sup>10</sup>Kapughu etoa, am anna ngamasina uunguaane nitam mangoo tale nimmarikana, am annaa propete atoa laghe aipooa tale ararina atea Vau ngepona. <sup>11</sup>Am kilakila va ita taatara va niarangise tale lo atoa la tiitingina akorokorongana tani toitoi. Ngam ghe nongola vaalua Job ghe tam oghi vulula tani aiesoa ta God, me ghe tarala saa ateva Vau ngepona ateva ghe taue lao sio tale airuuruu. Vau ngepona ateva pasu ia tale nialousi me niaielousi.

<sup>12</sup>Me tale voto akapaaili, kapughu etoa, am rau mene ue va, “Arova akamekame, lo ateva epona liu eattara mataneaghi,” o, “Arova akamekame, lo ateva eaitara kosa ateva eattara mataneaghi,” o mene righi ase voto. Llo eroroo va, am ue va “ue” etana, am ue va “ue” etana. Me llo karika, am ue va “karika” etana, God erau ghelei niaisakei etam.

### **Nilooloo sae tale niaikaia**

<sup>13</sup>Lo ateva etaimim etokatoka tale nau sesa, eroroo tani looloo sae. Me lo ateva

emasimasi euei righi kinari tani kkaua God. <sup>14</sup>Lo ateva etaimim eiisiki, ekolo elda ngatoa tale ale manga, me la looloo sae etana me la kao oeli tale ararina atea Vau ngepona ateva. <sup>15</sup>Me nilooloo sae tale niaikaia aue ghelei emasina tau ngisiki eteva, me aue Vau ngepona ateva etotua, me arova ghe gheleila righi sesa voto, God aue kalua. <sup>16</sup>Liuna avalua o me am aulia ngaotu sesa gheleiaaimim ta mene katoa me am looloo sae ta God mausi mene katoa, me aue am masina. Unna nilooloo sae ghulughuluena ateva taumattu sarasarakanaaili ia me eroroo tani ghelei voto.

<sup>17</sup>Elaija nim taumattu ia nongina ita me ghe nim looloo saela va erau mene vaoo, liuna avalua o me ghe tam vaoola ghe roola kotoluae ninamanama me ghaonomo ulana. <sup>18</sup>Ghe mene looloo saela me epona liu ghe tau lao sio vaoo ateva me kosa ateva ghe apinosala voto laghe pasapasa.

<sup>19</sup>Kapughu etoa, arova teva etaimim eoghi vulu voto koronna me lo ateva emene ghaa oghie mae, <sup>20</sup>etani kila va, see ia lo ateva emene ghaa oghi lo ateva sesa gheleiaane, me eoghi vulu salana sesa, eaasaangia tale nimate me eaakou oroianaaili sesa voto.

*Aitiutiu etikirighi uru ngai*

## **Pita**

*ghe pituela*

**1** Aghi Pita, kapuna apostolo ieghi Iesu Karisto, apitipiti uru ngai etikirighi oia etaimim kapuna taumattu ngatoa God, ghe suimatoongainamla, me ngam tokatoka see nongina va ativu etoa tale provinsi etoa ePontus, eGalaisia, eKapadosia, eEisia me eBitinia. <sup>2</sup>God Tamaita ia emua arau ghe kilaiemla me ghe suimatoongainamla, me kapuna Spiriti eteva ghe gheleiemla am ghe mangala. Liuna avalua o me am ghe nongo usilainiela me raena ateva Iesu Karisto ghe ghelei eraarangisanaiemla.

Alooloo sae va God aue etau aatu maamasinaane me luei eeroi etaimim nau ekapaaili.

### **Kinatama niasaangi eteva**

<sup>3</sup>Ita kaili emasina ta God Tamana ia kapuita Vau ngepona ateva Iesu Karisto. God ghe totula Iesu Karisto tale nimate. Tale ia o nitotu eteva, me mausi kinatama ailousiaane ateva, ghe tau mae sio nilutu ppae me ita rooroo tani taatara lao emua <sup>4</sup>tale masi voto pasu tale niarangise God ghe aimonomosiaala etaita. Isaa o voto isaa epona liu, karika erooroo tani mauu, karika erooroo tani poka, me karika erooroo tani kapa. <sup>5</sup>Poli tale kaluimim niaiesoa, God eaaitarainam tale sarasarakaniaane lomosina ta am ghaa ia o niasaangi eteva, eaaimonomosia tani apasungainia tale airuuruu tale nau. <sup>6</sup>Tale isaa oia voto masimasiaaimim enamungaili, arongona ta karika tani aluse nau am ghe soula nimmarikana tale asease nitootoonga. <sup>7</sup>Golo ateva la tootoonga tale kura tani tara va golo

nonga ia. Tale isaa o salana nitootoonga etootoonga uneimim niaikaaia, maamasinaane elaulau maamasinaane golo, ta poli golo ateva aue ekapa. Liuna avalua o me poli am aiesoa ta God, aue God etau aatu nitau sae, ninamuu me nioneonea nau Iesu Karisto aue ekauerekati. <sup>8</sup>Arongona ta karika am ghe taraiela, am aielousieinia, me arongona ta karika am taataraiia nau oia, am aiesoa ta ngetana me pasu iem tale lo ateva o kinatama nimasimasi mata nginangari karika erooroo tani aulieinia. <sup>9</sup>Poli God aue asaangiem, liuna avalua o me am ghe aiesoaala ta Karisto.

<sup>10-11</sup>Propete atoa laghe aulia ngamuemuela maamasinaane God tani asaangiem. Spiriti eteva ta Karisto elome etaira ghe poppooa ngaotu ase nimmarikana Mesaea aue eghaa, me kinatama voto evira mene lutu, me propete atoa laghe paepae aanasaaili tani kila va eauliaa see me lovisa. <sup>12</sup>God ghe apasungaala ta propete atoa va isaa o voto laghe ppooaala karika mausiira ta mausiimim. Me God ghe tau sio mae Spirit Manga ateva epona liu, me tale sarasarakaniaane Spirit Manga ateva, tau ngai ppooa ngatoa tale masi kiukiu ngila ghe auliaala etaimim isaa oia voto God ghe gheleila. Ensolo tee atoa la aloannaaili tani ghaa alomasaanga tale masi voto God ghe gheleila etaita.

### **Am manga**

<sup>13</sup>Isaa avalua o me am aipanipaniaa nannaaimim me am aikinikinita tee poppooaaimim me tokatokaimim. Am aiesoa ngasarasarakanaaili tale isaa o voto tale maamasinaane God ealoanna tani apasunga etaimim. Aue eghelei nau eteva Iesu Karisto emae. <sup>14</sup>Am tani nongo usila God. Emua arau nau ta am ghe tam kila amasina salane God, am ghe uusi laa sesa ninannaa. Karika am mene aimuli tee isaa o sesa voto. <sup>15</sup>God

ghe koloamla, ia manga ia. Liuna avalua o me am manga. Am ghulughuluena tale gheleiaaimim me tokatokaimim. <sup>16</sup>Ta Uru ngai Manga ateva eauliaa va, “Am manga, poli aghi manga aghi.”<sup>††</sup>

<sup>17</sup>Ta poli am koloa va Tamaimmi ia me eghelei niaisakei ghulughuluena ta kateva kateva taumattu tale uun-guaaira, am oneoneaa tee God tale tokatokaimim, nau am toka tale tokatokaimim va am nongina lo atoa ativu ila tale kosa ateva oia. <sup>18</sup>Am ghe kasukasu tale salana karika righi malloana ghe tiuaala ta tuvumim atoa, me God ghe asaangiemla etana. Me am kilakila va karika va ghe poliemia tale isaa o tee voto esessa nongina silva o golo, <sup>19</sup>ta ghe poliemia tale raena ateva Karisto, aipolina namungaili, nongina sipsipi erighi karika vereverena ia me karika righi kulukulutana etana. <sup>20</sup>God ghe suimatoongainiela mua, me auena aitiutiu tale kosa ateva, me tale airuuruu oia nau God ghe apasunga ngaotuela mausiimim. <sup>21</sup>Ta ngetana am ghe aiesoala ta God, ia ghe totuela tale nimate me ghe asaesaela ararina atea, liuna avalua o kaluimim niaikaia me tutuliimim am ghe atokala ta God.

<sup>22</sup>Nau am ghe nongo usilaala voto koronna, am ghe ghelei eraarangisaniemia tale kaluimim ssavoto ta matana God, me am apasunga koronna niaielousi ta mene katoa kapuimim nonginaaili va tue me nenga am. Liuna avalua o me am aielousi ekoronna tale urunguitaniimim nau ekapaaili etoa. <sup>23</sup>Poli tale inangarina ateva God maulue ia me tokatoka liu ia, am ghe lutu ppaela, karika va nongina katu ue ngai eteva emammate, ta nongina lo ateva katu ue

ngai karika emammate. <sup>24</sup>Nongina Uru ngai Manga ateva eue va, “Taumattu ngakapa atoa nim nonginaaili rarrasa ateva, masi taataraaira nongina pusi ngai eteva; rarrasa ateva emaamalle me pusi ngai eteva ekaakatuu,

<sup>25</sup>me inangarina ateva Vau ngepona ateva etokatoka nau ekapaaili etoa.”<sup>‡‡</sup> Isaa o inangari, masi kiukiu laghe auli-aala etaimim.

**2** Liuna avalua o me am sau velu ekapaaili sesa ninannaa tani ghelei saasakiaa tee mene kateva, me karika am mene kamekame me tani usimaghalua me tani annaa saasakia tale taumattu oroi peiira me tani auliulua. <sup>2</sup>Nonginaaili lutu ngaliki etoa la vira lutulutu, la aloannaaili tani ssu, am tee am aloannaaili tani ssu rarumi ssu eteva raarangisanaaili ia kanna ia God, nau am ropia aue am pinosa me aue aikaiaaimim ematuenna lomosi ta nau God asaangiem. <sup>3</sup>Isaa oia ngam ghe namunamuaala va Vau eteva masina ia.

#### Atu eteva maulue ia me taumattu God ghe suitoongaala

<sup>4</sup>Am mae ta Vau eteva, ia atu eteva etautau aatu maulue — taumattu ngatoa laghe ratiela me God ghe suimatoongainiela poli ia masinaaili gheegheleiaane ta matane God — <sup>5</sup>am tee nonginaaili va atu etoa maulue ila, God eatuutuluem va am nongina ale manga ateva, me am nongina pristi etoa manga ila, la ghelei aiaavusuvusuena tani amasimasi God, tale ararina atea Iesu Karisto. <sup>6</sup>Ta poli Uru ngai Manga ateva eue va, “Aghe atokala atu eteva eSaeon,

<sup>††</sup>1:16 Levitikas 14:44-45; 19:2; 20:7

<sup>‡‡</sup>1:25 Aisaea 40:6-8

ia aghe suimatoongainiela me masinaaili ia, me aitiutiu ia tale atu ekapa atoa tani suei ale ateva,

me lo ateva taumattu eatoka tuutulina etana karika aue etoka tale nipalata.”<sup>¶¶</sup>

<sup>7</sup>Ta lo atoa am aiesoa, ia oia atu eteva masinaaili ia, me ta lo atoa karika la aiesoa, Uru ngai Manga ateva eue va,

“Ia o atu eteva tau ngai atulu ale atoa laghe ratiela

ghe aitiutiula tale atu ekapa atoa tani suei ale ateva.”<sup>§§</sup>

<sup>8</sup>Me emene ue va,

“Ia o atu eteva egheelei taumattu etuttukainila,

me egheelei ekatungila.”\*

La kaakatuu poli la tam nongonongo usilaa inangari, poli God ghe tau vellala va la lao avalua o tale aloannaaira.

<sup>9</sup>Me am, karika va am avalua o, am taumattu ngatoa God, ghe suimatoongainamla va pristi iem tani uungu tale kingi eteva, God etana. Anue manga am, me taumattu ngatoa kapuna am God va aue am aulia ngaotu nitau sae ta lo ateva ghe kolo veluemla tale saurrom tani mae tale masi mallangina ateva. <sup>10</sup>Isaa to nau karika va kapuna taumattu iem God, me isaa oia nau ang ghe kapuna iemla. Isaa to nau karika am ghe ghaala ailousiaane God, me isaa oia nau ngam ghe ghaala ailousiaane.

### **Tau ngai uungu etoa ta God**

<sup>11</sup>Masi kapughu etoa, poli am ativu iem tale kosa ateva oia, aghaulia ngasarasarakana va am alekalekaiem tale uungua ninnaa ssavoto, isaa o voto eaaiuvi tee nannaaimim. <sup>12</sup>Nau am toka tee taumattu ngeleka atoa, am toka tale masi nitoka, me nau la ghaauliaa teiem

va am gheelei voto sesa, aue la tara masi uunguaaimim me la tau sae God, nau eteva emae taraiem.

<sup>13</sup>Mausi Vau ngepona ateva, am nongo usilaa lo akapa atoa tamattu matuutuliena ila, nongina kingi eteva poli matuutuliena isaaili epona, <sup>14</sup>me ta gavana ngatoa, poli king ghe suitoongainilala tani laa ghelei saasakia lo atoa la gheelei sesa voto, me tani oneoneaa lo atoa la gheelei voto masina. <sup>15</sup>Poli aloannaane God va, poli am gheelei voto masina, am roo tani ghelei runga sesa inangariira alokapakapa atoa. <sup>16</sup>Am toka nongina va lo atoa taumattu la tokatoka tale aloannaaira me la gheelei masi voto. Me karika am mene ghelei ia o ase nitoka ateva tani akou runga voto sesa, ta am toka ta aloannaane God. <sup>17</sup>Am apasunga masi nioneoneaa ta taumattu ngakapa atoa. Am aielousia lo atoa am aiesoa ngaitauaa me ila, am matauta God me am oneoneaa kingi eteva.

### **Niaimatoonga tale nimmarikana Iesu ghe ghaala**

<sup>18</sup>Tau ngai uungu etoa karika am tokatoka tale aloaloannaimim, am tauem lao ta vauimim atoa tale isaa akapa ase nioneoneaa, karika va lo atoa nonga masina ila me gheeleiaaira saghuighuina, ta lo atoa tee karika masina ila. <sup>19</sup>Nau katoa la gheelei voto karika masina etam arongona ta ugheelei masi voto ukilakila va God eaaloanna, God aue emasieinio. <sup>20</sup>God karika aue earangiseio arova ughaaghaa nimmarikana mausi ugheelei voto sesa. Ta aue earangiseio arova ughaaghaa nimmarikana mausi ugheelei voto masina. <sup>21</sup>Tale isaa oia voto God ghe

<sup>¶¶</sup>2:6 Aisaea 28:16

<sup>§§</sup>2:7 Sams 118:22

\*2:8 Aisaea 8:14

koloamla poli Karisto ghe ghaala voto mmarikanaaili mausiimim, ghe alokoila niaimatoonga ngateva, va am tani aimuli usi tee liu kasukasuaane.

<sup>22</sup>“Karika ghe ghelei poila righi ssavoto, me karika righi inangari nikamekame ghe kupi ghoa mae ta paane.”†

<sup>23</sup>Nau eteva laghe auliaa teeia asease inangari etoa, karika poi ghe liuliu; nau ghe ghaaghaa nimmarikana, karika poi ghe aapasunga va eliu. Ghe tau lao sio isaa o voto ta God, poli God eghelei niaisakei ghulughuluena. <sup>24</sup>Nim ia nonga ghe saula gheheleiaaita sesa tale vilikina tale ai eteae; mausina avalua o ita rooro tani kasu vuli sesa voto me ita lao tale niuungu ghulughuluena; poli tale usai ghe ghaala, am ghe masinala. <sup>25</sup>Poli am ghe nonginala sipsipi etoa karika la kilakila va eaa la laolao, me isaa oia angam ghe oghi mae sio ta kapuimim Tau ngai toitoi eteva ia eaitarainiem.

### Lailai etoa

**3** Tale ia o salana atikirighi, am vause atoa lailai iem, am tani nongo usila taitanimim atoa. Me arova katoa tale ila o taita atoa karika la aikaaia tee inangarina God, karika va tale inangariimim, ta tale masi gheegheleiaaimim aue egheleila me la aikaaia, <sup>2</sup>poli aue la tara vaalua masi uunguaaimim raarangisana me nioneoneaa tale tokatokaaimim. <sup>3</sup>Am rau mene nnangaili tani amolumolu vilikiimim va emasi-naaili taatarane, nongina am gheelei tale uu nguruimim, me nongina asease vurma atoa am aamolumolu vilikiimim, me tale masi ghinna atoa am aasaela, <sup>4</sup>ta am annaa tani amolumoluem, ghele masina arova am ghele amolumolu elome etaimim uunguaa niaimasia me nisioa nannaa, poli isaa o ase niuungu masinaaili ta matane God me karika

aue ekapa. <sup>5</sup>Ta isaa o salana, emua arau vause atoa manga ila laghe gheelei emasinaaili taataraira. Laghe aatoka tutuliira ta God, me laghe aimuli usi tee saa voto taitaniira atoa laghe aauliaa. <sup>6</sup>Nim nongina Sera ghe nongo usilaala taitanna ateva ta Abraham, me ghe kolokolao va vauna ia. Am tee aue natuna vause iem arova am gheelei voto masina, me karika aue am matauta saa voto pei nimatauta.

<sup>7</sup>Tale ia o salana atikirighi, am taita atoa lailai iem, am tani oneoneaa vauseniim atoa. Am ghelei emasina ta ngetaira nau am tokatoka aitauaa, poli sarasarakaniaaimim elaulau sarasarakaniaaira, me poli amalua aitauaa, amalu ghaaghaa maulue ta God, arova ughelei emasina etana, karika teva voto aue eghelei runga kalum nilooloo sae.

### Nimmarikana mausi masi niuungu

<sup>8</sup>Tani ruu, am akapaaili gheegheleiaimim me ateateaimim ekateva nonga ia. Am aielousi nongina va tue me nenga atoa, me am annaa mene katoa me am sioa nannaaimim tee kateva kateva etaimim. <sup>9</sup>Am rau mene liu sesa tale sesa voto o inangari nilakolako tale inangari nilakolako; ta am liu tale niarangise, poli God ghe koloamla tani ghelei isaa o voto, me aue am ghaa niarangise. <sup>10</sup>Poli Uru ngai Manga ateva eue va, “Marova lo ateva taumattu ealoanna va maamaulaane emasina me etoka liu, etani aitaraa ramuramutipaana ateva tale sesa voto me tee musikipaane tale inangari kamena.

<sup>11</sup>Me etani oghi vulu sesa voto me eghelei masina;

†2:22 Aisaea 53:9

euungu aanasa tani atoka luei me esarasarakana tani toka tale luei.

<sup>12</sup>Poli matane Vau eteva eaatoka ta ghulughuluena atoa taumattu me talingane enongonongola nau la looloo sae, me eliuliu vilina ta lo atoa la gheeleei sesa voto.”<sup>‡</sup>

<sup>13</sup>See aue eaaloanna tani avakovakoam marova am annaaili tani gheeleei masi voto? <sup>14</sup>Me marova am ghaaghaa nimmarikana tale voto masina, aue am ghaa niarangise. Nongina Uru ngai Manga ateve eue va, “Am rau mene matauta saa llo la maamatauta; am rau mene matautu.”<sup>¶</sup> <sup>15</sup>Ta elome tale urunguitaniimim am atoka Karisto va ia Vau palepale ia. Arova teva taumattu ekookolomio tani tau lao saa malloeane unem niaikaaiia uaatoka tuutulim etana, uaimonomonosiaa tani liu etana nau ekapa atoa. <sup>16</sup>Ta am gheeleei tale nisama saghuighuiena me nioneoneaa. Nau ekapa atoa, am gheeleei voto am kilakila va masina, va lo atoa la poppooaa saasakia tale masi uunguaaimim ta Karisto aue la palata mausi inangariira la poppooaa teiem. <sup>17</sup>Emaamasina, marova aloannaane God, va ita ghaa nimmarikana tale voto ita gheeleei masina me karika va ita ghaa nimmarikana tale voto ita gheeleei sesa. <sup>18</sup>Poli Karisto ghe matela tale isaa akaapaaili ssavoto katengaata nonga, Iesu ghulughuluena ia ghe matela ta lo atoa karika ghulughuluena ila, tani taula lao ta God. Ghe matela, me Spiriti eteva ghe mene taula mauue etana. <sup>19</sup>Ta Spirit eteva ghe lao tee sio tale ale mata voovoo me ghe ppoaala tale spiriti etoa <sup>20</sup>laghe tam nongo usilaala emua arau nau God ghe kaarasila tani toitoi me karika ghe turungilala lomosina ta Noa

ghe atulula aka ateva, me manu ghagga ghe ghaailala. Tale aka ateva karika oroi taumattu ghe saangala tale manu ghagga ateva, nim ghaoalu (8) nonga. <sup>21</sup>Me ia oia manu eteva eaimatoonga niasuu eteva, ghaine am tee am ghaaghaa niasaangi etana — karika va tale nighaa velu kulukulutana tale vilikiita, ta niasuu eaimatoonga inangari nialokoi ita gheeleei ta God ekasukasu tale urunguitaniita. Ghe asaangitala tale nitotu eteae ta Iesu Karisto, <sup>22</sup>ang ghe saela epona liu me etokatoka tale pai muenna ativilau ta God, ia ghe gheeleei Karisto va eaitoiaa ensolo atoa me spiriti etoa elomarase.

### Tani toka ta God

**4** Liuna avalua o, poli Karisto ghe ghaala nimmarikana tale vilikina, am tee am tani poso parasi ia o ase niananna ngateva nongina ia ghe gheeleei, poli lo ateva ghe ghaala nimmarikana tale vilikina, karika emene tokatoka tale uunguaa ssavoto ateva. <sup>2</sup>Nau ekapa atoa, am tau ekapa lao tokatokaaimim tale aloaloanaane God me karika va tale sesa aloaloannaaimim. <sup>3</sup>Isaa to nau ang ghe lao sio ang ghe ssoiemla tani uunguaa asease voto atoa taumattu ngeleka atoa la aaloannaaili tani gheeleei. Maa-mauluaaimim am ghe nim anna tani gheeleei sesa voto, me tani nannaa nonga uunguaa nilai rorrou, me tani ropi sesa manu, me tani gheeleei kinatama nina-manama atoa la ghaa lutu ssavoto, me kinatama nivelu eitauaa tani ropi sesa manu, me tani kkaua goto atoa kamena ila me karika poi masina ila. <sup>4</sup>Me ghaine taumattu ngeleka atoa angila ghe soghi-aala tani tara nau karika am mene lao-lao aitauaa teeila tale isaa o ase voto karika masina, liuna avalua o me la auliaa saasakia teiem. <sup>5</sup>Me am tani nnaa

<sup>‡</sup>3:12 Sams 34:12-16

<sup>¶</sup>3:14 Aisaea 8:12

parasi va aue la tingina emua ta matane God, me ia aue eghelei niaisakei ta tau-mattu ngakapaaili etoa, maulue atoa me matena tee atoa. <sup>6</sup>Liuna avalua o me lo atoa ngila ghe matela ila tee ngila ghe nongola masi kiukiuna, arongona ta vilikiira ang ghe matela, nongina taumattu ngakapa atoa la tani mate, me kapuira spiriti etokatoka tee God.

<sup>7</sup>Airuuruu tale voto akapa ange kalakalangina. Liuna avalua o me nannaaimim emasalike, am aaitarainam tani ghelei ghulughuluena voto me aue am roo tani looloo sae.

<sup>8</sup>Tale isaa akapaaili voto am kaarasi tani aielousia kateva kateva etaimim, poli niaielousi eteva eaakou oroieili ssavoto. <sup>9</sup>Am aikoloa taumattu tani mae tanganueimim, me am rau mene uessaa. <sup>10</sup>God ghe tau aatu sio ta kateva kateva etaimim voto kanna Spiriti eteva, tani uungu ta mene katoa taumattu tani aisausia tale asease salana, tani apasunga ngaotu maamasinaane God ta mene katoa.

<sup>11</sup>Arova teva taumattu uunguaam tani ppooaa, uppooaa nongina va lo ateva eaauliaa inangarina ateva God. Me arova see ughuungu ta katoa, ughuungu tale sarasarakana God etautau aatu. Ta poli isaa akapaaili voto aue la tau sae God mausi Iesu Karisto. Ita rooro tani oneoneaa Iesu poli sarasarakaniaane etokatoka liu, koronna.

### Nimmarikana tale tau niaiesoa

<sup>12</sup>Masi kapughu etoa, karika am mene soghiaa isaa o nitootoonga mmarikanaaili am mammarikana tee, nonginaaili va isaa o voto ouna.

<sup>13</sup>Karika, ta am masimasi ta am tee am ususi tani ghaa nimmarikana ta Karisto, liuna avalua o me aue am pasu tale nimasimasi nau eteva emae

tale sarasarakaniaane. <sup>14</sup>Arova la avakovakoam mausi ararina atea Karisto, niarangise etaimim, poli kapuna Spiriti eteva God sarasarakana ia etokatoka ta ngetaimim. <sup>15</sup>Arova ummarikana, karika ughaaghaa mmarikana poli uaiuvi emate, o tau niainao io, o mene rigi ase talo nissangaliki, o nongina ase niaikkisiaa.

<sup>16</sup>Isaa avalua toko va, marova ughaa nimmarikana poli uaiesoa, urau mene palata, ta utau sae God poli la kilakila va io kapuna io Karisto. <sup>17</sup>Poli nau niaisakei ang ghe tuiuala, aue etiuua ta natuna atoa God; me marova etiuua etaita, aue sesaaili ta lo atoa la tam nongonongo usilaa masi kiukiuna God.

<sup>18</sup>Me, nongina Uru ngai Manga ateve eue va,

“Marova aanasa ta tau ghulughuluena atoa tani saanga,

aue vaalua ta lo atoa la tam oneoneaa poi God, me tee ta tau ngai gheelei ssavoto atoa, ila tee, vaalua aue la saanga?”<sup>§</sup>

<sup>19</sup>Lo atoa la ghaaghaa nimmarikana poli la aaimuli tee aaloannaane God, la toka gheelei nonga masina, la tani tau vella lao ta lo ateva ghe gheleilala, poli egheelei rooroaa inangari nialokoi ghe auliaala.

### Tani aitaraa kiena sipsipi etoa God

**5** Me isaa oia, inangari niaisausi eatuetu etaimim namu ngatoa am muemueaa ale manga atoa, aghi tee namu ngaghi. Aghe tarala ta mataghi vaalua Karisto ghe ghaala mmarikana, me am me aghi aue ita ghaaitauaa sarasarakana me nioneoneaa tee Karisto nau ekauerekati. <sup>2</sup>Am aitaraa ngamasina sipsipi etoa God ghe tau aatu sio etaimim tani aitaraa. Am aitarainila poli aloaloannaaimim tani aitarainila

<sup>§</sup>4:18 Masi Nitoka 11:31



me tale nimasimasi, nongina aloannaane God, me karika va la suusulungiem. Me karika va mausi viliki veu, ta poli am aloannaaili tani sausi. <sup>3</sup>Am rau mene ghelei nongina va lo atoa arariira, ta am tau ngaimatootoonga etaira. <sup>4</sup>Me nau namuu tale tau ngaitoi sipsipi etoa ekauerekati, aue am ghaa kou nguru eteva mallangina karika aue ekapa.

<sup>5</sup>Aliki taita atoa, tale ia nonga o salana atikirighi, am nongo usilaa kapuimim taita namu ngatoa. Me am akapanaaili am ghaa uunguaa nisioaa ninnanaa tee mene kateva kateva, poli Uru ngai Manga ateva eue va, “God karika poi ealoanna lo atoa la tau-tau sae nannaaira, me eaapasunga maamasinaane ta lo atoa la siosioaa nannaaira.”\*\*

<sup>6</sup>Liuna avalua o me am sioaa nannaaimim ta God sarasarakanaaili ia tani sausiem, me God aue esaesaeam tale ia o nau eteva ealoannaia. <sup>7</sup>Isaa akapaaili uneimim nimoia me maate am taula ta ngetana poli ia eaitarainam.

<sup>8</sup>Am nanna ngamasina me am taatara amasina poli Satana aissateimim ia ekasukasu ekapa see arova laeoni eteva engoongoo atingina me epaepae teva tani nama. <sup>9</sup>Am tiu velua me am tingina akorokorongana tale uneimim niaikaia, poli am kilakila va lo akapa atoa tale kosa ateva la ghaiesoa ta Iesu

la ghaaghaa ie nonga o ase nimmarikana ateva.

<sup>10</sup>Tale kinatama maamasinaane God, ghe koloamla va am ghaa aitauaa nioneonea ngateva tokatoka liu ia ta Karisto. Me nau am ghaa nimmarikana tale nau karika aluse, aue emene ghelei rooroaa me aue eghelei emasinaaili uunguaane etaimim tani atingina akorokoronganaiem, me easarasarakanaiem. <sup>11</sup>Ta ngetana sarasarakana tale isaa akapaaili nau. Koronna.

### Airuruu tale inangarina Pita

<sup>12</sup>Tale saausiaane Saelas<sup>††</sup>, akolokoloa va kapuita ia, me arooro tani atoka tuutulighi etana, aghi aghe piti aatu sio etaimim ia oia uru ngai erighi, tani asarasarakanaiem me tani aulia ngaotu va ia oia maamasinaane ateva God koronna ia. Am tani tingina akorokorongana etana.

<sup>13</sup>Tau ngaiesoa ngatoa tale ale manga atoa eBabilon<sup>‡‡</sup>, God ghe suimatoon-gainilala teeiem, laghe suula masimasiaaira etaimim, me tee natughu ateva ta Mak ghe suula masimasiaane etaimim. <sup>14</sup>Am sou kateva kateva tale niaielousi.<sup>¶¶</sup>

Alooloo sae va luei aue etoka ta ngetaimim akapa, lo atoa am ta Karisto.

\*\*5:5 Masi Nitoka 3:34

††5:12 Tale inangari nge Grik, *Silvanus*.

‡‡5:13 *eBabilon* Malloeaana va Rom, ta Rom ghe aitoiaa kosa ateva tale isaa o nau.

¶¶5:14 Tale inangari nge Grik, *tale niaingusu eteva tale niaielousi*

*Aiaaghaluene atikirighi uru ngai*

## **Pita**

*ghe pituela*

**1** Aghi Saemon<sup>§§</sup> Pita, tau ngai uungu me apostolo ieghi ta Iesu Karisto, Apitipiti aatu etaimim lo atoa aikaai-iaaimim nonginaailliila aikaaiiaaimami. Am ghe ghaala ia o niaikaiaia ngateva tale ghulughuluenaane Iesu Karisto, kapuita Goto ia me tau ngai asaangita ateva.

<sup>2</sup> Aloo lo sae va God aue etau aatu maamasinaane me luei epasu etaimim poli ngam ghe kila amasinaailliila God me Iesu kapuita Vau eteva.

### **Tani pinosa tale aalomasaanganiaane God**

<sup>3</sup> God ghe kolotala tale kinatama sarasarakaniaane ateva me maamasi-naane, me ita kilakilaia. Tale sarasarakaniaane ghe tau mae sio isaa aka-paaili voto ita tuutukuna etana tani asarasarakana maamauluaaita me ita rooro tani usila salane ateva God. <sup>4</sup> Tale ia o salana atikirighi ghe tau mae sio kinatama inangari nialokoi etoa tani nim tau mae masi voto etaita. Isaa oia inangari nialokoi erooro tani gheleiem me am toka tale gheleiaane God me am apala sesa voto emaemae tale nannaa taumattu tale kosa ateva oia me egheelei saasakia urunguitaniira.

<sup>5</sup> Mausina avalua o aghaaulia etaimim va, poli ngam ghe aiesoaala ta Karisto, am uungu esarasarakana tani masi taumattu, me tee am uungu esarasarakana tani kila God me sa ateva ealoanna va am gheleia, <sup>6</sup> me tani apala sesa aloannaaimim, me am toka akorokorongana tale sesa nau, me tani usila salane God,

<sup>7</sup> me am aielousi nongina tue me nenga atoa, me tani aielousia tee taumattu ngakapa atoa. <sup>8</sup> Me arova am ghaa isaa o masi voto me la pinosaa oroi etaimim, aue la gheleiem va aalomasaangani-aaimim ta Vauita ateva Iesu Karisto karika aue nim peisaane, ta aue ealutu masi uene. <sup>9</sup> Me arova isaa o voto karika ta teva taumattu, ia o taumattu ngateva nongina llo taumattu taataraane tukuna, o nongina mata salusalu eteva ang ghe aikkaluuala va God ang ghe ghelei erarangisanaie la tale kanna ssavoto. <sup>10</sup> Li-una avalua o me, kapughu etoa, am tani aitokaa tani kilaa ili va God ghe koloamla me ghe suimatoongainamla. Poli arova am ghelei isaa o voto, karika aue am katuu. <sup>11</sup> Me aue la masimasi tani souem tani kupi sso tale ararimangalina ateva Iesu Karisto, Vauita ia me tau ngai asaangiita ia, ia aue king tokatoka liu ia.

### **Inangari niaulia ngamuemue tale Uru ngai Manga ateva**

<sup>12</sup> Mausina avalua o me, arongona ta am kilakila isaa o voto me am tiitingina akorokorongana tale voto koronna ghaine isaa etaimim, aue amene toka auliaa kieimim tale isaa o voto. <sup>13</sup> Aghanaa va masina tani mene aravaiem nau maulue ieghi, <sup>14</sup> poli akilakila va ghaisa ngarighi aue amate, nongina Vauita ateva Iesu Karisto ghe aulia ngamasa-likala etaghi. <sup>15</sup> Me aue atootoonga tani uungu esarasarakana tani tara va nau eteva karika ieghi, aue am roo tani nnaa isaa oia voto.

<sup>16</sup> Nau ami ghe auliaala etaimim sarasarakaniaane me maemaeane Vauita ateva ta Iesu Karisto, karika ami ghe aimulisi teela isaa o kiukiu laghe nim gheleila, ta ami, ami ghe tarala ta mataimami isaa o naanamungaane Karisto. <sup>17</sup> Ta ia ghe ghaala nioneonea

§§1:1 Tale inangari nge Grik, *Simeon*

me nianamunamungaane ta God Tamane nau eteva lingi ngalo ateva ghe mae sio tale maamallangiaane urukookoo ateva, me ghe uela va, "Ia o natughu ateva, aghaielousiangailia, ta ngetana amasimasiangailia."\* <sup>18</sup>Ami, ami ghe nongoala ia o lingi ngalo ateva ghe mae sio epona liu, nau ami ghe tokatoka aitaava tee Karisto tale motouru eteva manga ia.

<sup>19</sup>Me ita kilakila va inangariira propete atoa koronnaaili, me am tani aimuli teeila, poli nongina mallanga ateva emaamallanga tale voto saurrom, isaa o inangariira aue eapasunga voto koronna ta Karisto, lomosina ta Iesu ekiri sio, nongina ange paipai me katto pai eteva<sup>†</sup> esaesae tale urungitaniimim. <sup>20</sup>Tale voto akapaaili, am rou mene kaluaa va karika righi inangari niaulia ngamuemue tale Uru ngai Manga ateva ghe nim mae sio tale nim nannaaira propete atoa. <sup>21</sup>Ta inangari niaulia ngamuemue karika ghe nim tiuaala tale nim aloaloanna taumattu, ta taumattu ghe aippooa tale inangari ghe maemae ta God nau eteva Spirit Manga ateva ghe kaakatulainila.

### Tau ngai apasunga ngatoa kamena ila

**2** Emua arau propete kamekame atoa laghe tingina saela elome ta kapuna taumattu ngatoa God, me tale ia o salana atikirighi tau ngai apasunga ngatoa kamena ila aue la tingina sae elome etaimim me la auliaa llo kamena me la ue va koronna, me isaa o voto kamena aue eghelei saasakia taumattu ngatoa. Ila tau ngai apasunga ngatoa aue la liu viliira ta Vau eteva, lo ateva ghe ghaa oghilala, aue la ghelei evalua o me gharovaea nonga ta God aue eturungila. <sup>2</sup>Oroieili taumattu aue

la usila asease uunguaaira atoa sesa ila; me isaa o voto aue eghelei taumattu ngatoa la auliaa saasakia tale salana koronna. <sup>3</sup>Ila o tau ngai apasunga ngatoa la kamekameam tale oroi kiukiu kamena tani ghaa uneimim viliki veu. God ang ghe aimonomosiaala uneira niaisakei eteae, me aue eturungila.

<sup>4</sup>Am kilakila va emua arau, God karika ghe tau vella ensolo atoa nau la ghe gheleila sesa voto, ta ghe sau vella siola tale voto ateva sionsaaili ia me saurrominaaili tee ia, la toitoi nau niasakei eteva. <sup>5</sup>God karika ghe tau velu teela taumattu tale kosa ateva oia nau laghe liula viliira etana, karika, ta ghe tau sio mae manu ghagga ateva etaira me laghe matela; ghe asaangi nongala Noa, poli ia nongaaili ghe auliaa me ghe aapasunga voto ghulughuluena, tee mene ghaitu (7) taumattu. <sup>6</sup>God ghe auliaa teela masaliki taatara aluae eSodom me eGomorra va aue lalu ghaa sesa aipolipoli. God ghe turungilalueta tale kura atea me au nonga ghe tokala. Ghe ghelei evaluela o me eapasunga etaita saa voto aue elutu tale llo taumattu la liuliu viliira ta God. <sup>7</sup>Ghe asaangila Lot, ghulughuluena ia, poli karika ghe masimasiaa sesa gheegheleiaaira tau ngai ghelei ssavoto nge Sodom atoa. <sup>8</sup>Koronna, ia o ghulughuluena ateva taumattu ghe tokatoka elome etaira, me isaa akapa nau ghe ghaaghaa nimmerikana me nialousiisi tale nannaane nau ghe taatara me nongonongo sesa gheegheleiaaira. <sup>9</sup>Arova isaa avalua o, Vau ngepona ateva ekilakila vaalua tani asaangi tale nitootoonga lo atoa la nongonongo usilainia, me ekilakila vaalua tani akaravusu lo atoa karika ghulughuluena ila me aue la ghaa kinatama sesaiaane ateva God tale maamauluaaira

\*1:17 Matiu 17:5; Mak 9:7; Luk 9:35

†1:19 *katto pai eteva* Utara Nambas 24:17; Revelation 22:16

me la toitoi nau niaisakei eteva. <sup>10</sup>Isaa o voto tani koronnaa ili ta ila o tau ngai apasunga ngatoa kamena ila la ghaimuli tee aaloanaaira sesa emaemae tale vilikiira, me tee llo matuutuliena la tam aloanna.

La sararakana tani nnaainila nonga me karika la maamatautu tani auliaa saasakia tee kapuna ensolo atoa la ghaaghaa nioneonea. <sup>11</sup>Arongona ta ensolo atoa sararakanaa ili me ila karika la ghaauliaa saasakia tee isaa o taumattu la maeaa niaisakei ta Vau eteva. <sup>12</sup>Me ila o taumattu ngatoa, la poppooaa saasakia tale voto ila la tam kilakila amasina. Ila nongina ghaata kkena atoa, me la ghaimuli tee aloanna vilikiira, laghe nim lutula va la ghaaila, me la turungila. Me nongina ghaata kkena atoa, ila tee aue la raua. <sup>13</sup>Aue la ghaa aipoliira sesa tale voto sesa laghe gheleila. Ila masimasieili tani ghelei kinatama ninamanama me niropi tale tummatavanga. Me nau la namanama teiem tale ale manga ateva, la nanaainila nonga, me la ghelei saasakia arariira ale manga atoa. <sup>14</sup>Mataira epasupu tani lai lo atoa vause karika va maneira ila. Karika la ruuruu poi tani ghelei ssavoto. La kamekame lo atoa karika la aikaia ngasarakana ta Karisto me la kaakatulainila lao tale ssavoto. Me muenna ili tani raungaa me kuruetu. Ang ghe ssuaa vellala. <sup>15</sup>Ngila ghe laula salana ghulughuluena me ngila ghe kasula tani laa ghaimuli tee salane Baelam natuna ia Beo, ia ghe aielousia aipolipoli tale uunguaa sesa salana. <sup>16</sup>Donki eteva ghe auliaala etana va voto eghelei karika masina, ia o donki eteva karika esamasama, ghe samala nongina taumattu ngateva, ghe

ghelei rungaala propete ateva tani ghelei voto alokapakapanna.<sup>‡</sup>

<sup>17</sup>Isaa oia taumattu nongina mata bubbu karika righi manu ta ngetana, me urukookoo ateva, ttasi eteva ekuukuueinia see. Saurrom ateva aavoona ili ia etoitoila. <sup>18</sup>La auliaa inangari karika righi malloeana tani tau sae nannaaira, me la auliaa ta taumattu ngatoa va la rooro tani usila sesa nannaaira, me la katulainila lao tale llo salana avirina laghe oghi vulula. <sup>19</sup>La ghaauliaa inangari nialokoi ta taumattu ngatoa va karika aue la toka tale aloannaane mene kateva; me karika ta ila tee, karika la tokatoka tale aloannaaira, karika righi sararakaniaaira tani ghelei rungainila tale voto sesa — poli arova teva etau velu teva voto emuemueinia, ia nongina taumattu ngateva karika etokatoka tale aloannaane. <sup>20</sup>Nau laghe kilala kapuita Vau eteva me tau ngai asaangita ngateva Iesu Karisto, la ghe kasu vulila voto sesa ili tale kosa ateva. Me nau oia ngila ghe mene oghi lao sio tani mene ghelei isaa o voto sesa ili, me isaa oia nau esesa ili ta ngetaira. <sup>21</sup>Aue ghele masina marova karika la ghele mene kila salana tani ghulughuluena, ta nau eteva la ghe kilala, me la mene oghioghi vulu, aue esesa ili ta matane God. <sup>22</sup>Tale isaa o voto, kateva tuku inangari koronna ia, eue va: “Paua ateva eoghioghi lao tale luekina ateva,”<sup>¶</sup> me, “Mosu eteva nau ange raaranganala, emene oghioghi lao tale suesuna ateva.”

### Nauna ateva Vau eteva

**3** Masi kapughu etoa, aiaaghalua atikirighi oia uneghi uru ngai apitipiti aatu etaimim, tale ilalua o uru ngai eluekirighi aghelei nannaaimim va emasalike tani mene nnaa isaa o

<sup>‡</sup>2:16 Utara Nambas 22:21-35

<sup>¶</sup>2:22 Masi Nitoka 26:11

masi voto. <sup>2</sup>Aghaaloniaiem tani nnaa parasi isaa o inangari propete atoa manga ila laghe auliaala emua arau, me tee saa voto kapuita Vau ngepona ateva me tau ngai asaangita ia ghe aulieiniela ta apostolo atoa, me apostolo atoa laghe auliaala etaimim.

<sup>3</sup>Aitiutiu eteva voto aghanna tani aulieinia etaimim ia avalua toko, va tale airuuruu tale nau kasina taumattu aue la mae tale sesa nannaaira me la auliaa saasakia me la kaili ekamena voto koronna me aue la pilosiem <sup>4</sup>tani ue va, “Ghe uela tale inangari nialokoi va aue emene sio, va? Eaa ange reerekata? Tamaita me tuvuta etoa angila ghe matela, me ila akapaaili voto atoa ila tokatoka nongina arau aitiutiu tale kosa ateva me nau ghaine tee.” <sup>5</sup>Laghe ghaa vella tale nannaaira va God ghe nim aippooaala me epona liu ghe lutula, me kosa ateva oia ghe kaurekatila tale manu, me tale manu ghe gheleila kosa ateva. <sup>6</sup>Me tale manu eteva, ghe tturruula kosa ateva oia tale kinatama manu ghagga ateva. <sup>7</sup>Tale ie nonga o inangarina ateva God eunakookoo me elomarase me kosa ateva oia ghaine am taataraiia, God ghe aimonomosiaalala tani ghaa kura atea, tale nau niaisakei etea, ia o nau eteva taumattu ngatooa karika la uusila masi salana kanna God, God aue eturungila.

<sup>8</sup>Me am rau mene kkalua ie toko voto ateva, masi kapughu etoa, va, ta Vau ngepona ateva, kateva nau nim nongina va kateva airari (1,000) nina-manama, me kateva airari (1,000) nina-manama nim nongina va kateva nau. <sup>9</sup>God karika eaimaomaoaa tale kanna inangari nialokoi ghe gheleila, nongina kasina taumattu la annaa va God eaimaomaoaa. Karika, ta ekaakarasi tani toitoi mausiimim, me karika ealoanna va teva etaimim eraua, ta ealoanna akapaaiem va am nna ngaioghioghia.

<sup>10</sup>Me nauna ateva Vau ngepona ateva aue emae nongina tau niainao ateva, karika ita kilakila maemaeaaane. Eunakookoo aue ekapa tale kinatama mangalia ateva, me ila akapaaili voto atoa God ghe gheleilala aue kura atea eata akapaaili, me tale ia o nau eteva, voto akapaaili tale kosa ateva aue eotu.

<sup>11</sup>Am nim nnaa marova voto atoa aue God eturungi evaluateila o, me am aue vaalua etaimim? Am tani toka tale ase nitoka manga me tale aloaloannaane God. <sup>12</sup>Nau am toitoi nauna ateva God va emae am tee am ailuiliueinia. Ia o nau eteva aue eata eunakookoo me elomarase tale kura atea, me ila akapaaili voto atoa aue la nim manu tale lallangina ateva. <sup>13</sup>Me tani nnaa inangarina inangari nialokoi ita taatara lao emua tale ouna ateva epona liu me ouna ateva kosa, tanguueira ia ghulughuluena atoa.

<sup>14</sup>Liuna avalua o masi kapughu etoa, poli am taatara lao emua tale isaa o voto, am tani toka va God aue etaraiem va raarangisana iem me aue erau mene aliu teeiem tale voto sesa, me am toka ta ngetana tee luei. <sup>15</sup>Am tani nnaa va Vauita ateva karika emaamango tani toitoi, poli eaaloanna va mene katoa la mene saanga, nongina masi kapuita ateva ta Pol ia tee ghe pitipitila ta ngetaimim tale nialomasaanga God ghe tau lao sio etana. <sup>16</sup>Tale unna uru ngai ekapa ghe pitipiti tale ia nonga o salana atikirighi, ghe auliaa ta ngetaira isaa oia voto. Tale unna uru ngai ghe auliaa kasina tana voto aanasa tani alomasaanga tee, liuna avalua o me llo taumattu karika masi gheeleiaaira me aikaiaaira karika korokorongana, la kirikiri saasakia inangarina Pol, me la ghelei tee tale mene kasina Uru ngai Manga ateva. Liuna avalua o me la ghelei va God aue eturungila.

<sup>17</sup>Mausina avalua o, masi kapughu etoa, nongina ngam ghe kilala isaa o voto, am tani taatara amasina me inangariira kamena sesa taumattu ngatoa la rau mene mae ghelei saasakia nannaaimim tani tiuaa kalipiem va am katuu vulu aikkaiaaimim ngam ghe ko-

rokoronganala etana. <sup>18</sup>Me, tale maa-masinaane, am pinosa tale alomasaan-ganiaaimim ta Vauita ateva me tau ngai asaangiita ateva Iesu Karisto. Ta ngetana ita taue sae ghaine me nau ekapa atoa! Koronna!

*Aitiutiu etikirighi uru ngai*

## Jon

*ghe pituela*

### Inangari maulue

**1** Inangari eteva maulue ia ghe toka-toka tale aitiutiu, me ami ghe nongoala, me ami ghe taraiela ta mataimami, me ami ghe posoala ta nimaimami, ia o inangari eteva ami aulia ngaotua. <sup>2</sup>Lo ateva etautau maulue ateva ghe kaurekatila, ami ghe taraiela me ami aulieinia me ami poppooainia etaimim. Ia o maulue ateva tokatoka liu ia me ghe tokatoka tee Tamana, me ang ghe kaurekatila etaimami. <sup>3</sup>Ami poppooa ngaotu saa ateva ami ghe taraiela me ami ghe nongoala, mausina avalua o me am rooroo tani mae aitaua teiemami me ita aighui eitaua, me kaluita niaighui eitaua ta Tamaita me Natuna ta Iesu Karisto. <sup>4</sup>Ami pitipiti voto tani ghelei va masimasiaaita enamungaili.

### Tani kasu tale mallanga

<sup>5</sup>Inangari eteva oia ami ghe nongoala etana me ami aulia ngaotua etaimim va God mallanga ia, me ta ngetana karika poi righi saurrom. <sup>6</sup>Arova ita ue va ita aighui eitaua teeia me karika, ta ita kasukasu tale gheeleia saurrom, ita nim kamekame me karika ita uusila voto koronna. <sup>7</sup>Me arova ita kasukasu tale mallanga nongina ia elome tale mallanga, aue ita aighui eitaua tee mene kateva kateva etaita, me raena ateva Iesu Natuna ia egheeghelei eraarangisanaita tale kaluita ssavoto akapa.

<sup>8</sup>Arova ita ue va ita karika righi kaluita ssavoto, ita nim kamekameta, me voto koronna karika isaa elome etaita. <sup>9</sup>Arova ita aulia ngaotu kaluita

ssavoto, ia eghelei voto ghe uela va eghelei, me ia aue etani kalua ngakapaaili sesa gheeleiaaita me eghelei eraarangisanaita tale isaa akapaaili gheegheleiaaita karika ghulughuluena. <sup>10</sup>Arova ita ue va ami karika ami ghe gheleila righi ssavoto, ita gheleia va ia tau nikamekame ia, me inangarina ateva karika ia tale urunguitaniita.

### Iesu aisausiita ia

**2** Masi natughu etoa, apitipiti etaimim va karika am mene ghelei ssavoto. Me arova teva eghelei ssavoto, kateva taumattu aisausiita ia eaiippooa tee Tamane ta poli ita, Iesu Karisto etana ghulughuluena ia. <sup>2</sup>Ia ghe matela tani ghaa aipolipoli tale kaluita ssavoto, karika va kaluita ssavoto nonga, ta kaluira tee taumattu ngatoa tale kosa akapaaili eteva oia.

<sup>3</sup>Ita kilakila va, arova ita nongo usila llo eaaulia, angita ghe kilaiela. <sup>4</sup>Lo ateva taumattu eue va, "Aghi akilakilaia," me karika enongonongo usila tee llo eaullia, tau nikamekame ia, me voto koronna karika isaa etana. <sup>5</sup>Me arova kateva etaita enongo usila inangarina, ailousiaane ateva God etokatoka akoronna etana me ghulughuluena ia. Tale isaa o salana, aue ita kila va ita etana: <sup>6</sup>lo ateva eue va etokatoka tee Iesu, etani kasu nongina Iesu ekasukasu.

<sup>7</sup>Masi kapughu etoa, karika amene pitipiti righi ouna voto tani ghelei, ta pokane, llo oia ngam ghe ghaala tale aitiutiu. Isaa oia voto pokane ngam ghe nongola. <sup>8</sup>Arongona ta pokane, amene pitipiti tani aulia ouna voto tani ghelei, me am roo tani tara kannu voto koronna ta Iesu me ta ngetaimim, poli saurrom ateva ange kapakapa, me koronna ateva mallanga ang ghe llaala.

<sup>9</sup>Arova teva eue va ia tale mallanga ateva, me esessa tee tuena o nengane ateva, ia karika ghe kasu vuli saurrom at-

eva. <sup>10</sup>Lo ateva eaielousia tuena o nengane ateva, etokatoka tale mallanga, me karika righi voto eroroo tani gheleia va ekatuu. <sup>11</sup>Me lo ateva esessa tee tuena o nengane ateva, ia tale saurrom, me ekasukasu elome tale saurrom, me karika ekilakila va eaa elaolao, poli saurrom ateva eaakou runga matana me karika etaatara.

<sup>12</sup>Apitipiti etaimim masi aliki etoa, poli God ang ghe kkaluaala kaluimim ssavoto poli uunguaane ateva Iesu.

<sup>13</sup>Apitipiti etaimim tamatama atoa, poli ngam ghe kilala lo ateva ghe tokatoka tale aitiutiu.

Apitipiti etaimim aliki taita atoa, poli ngam ghe apalala sesa taumattu ngateva.

Apitipiti etaimim masi aliki etoa, poli ngam ghe kilala Tamaita ateva.

<sup>14</sup>Apitipiti etaimim tamatama atoa, poli ngam ghe kilala lo ateva ghe tokatoka tale aitiutiu.

Apitipiti etaimim aliki taita atoa, poli am sarasarakana iem, me inangarina ateva God, ia etaimim, me ngam ghe apalala sesa taumattu ngateva.

### **Am rau mene aielousia kosa ateva**

<sup>15</sup>Am rau mene aielousia kosa ateva oia me voto etokatoka etana. Arova teva eaielousia kosa ateva, karika eroroo tani aielousia Tamaita. <sup>16</sup>Ta isaa akapaaili voto tale kosa ateva oia: aaloanna vilikiira taumattu ngatoa, sesa voto mataira etaatara la aloannaaili, me nitau sae nannaaira tale peiira; isaa o voto karika emaemae ta Tamaita, ta emaemae tale kosa ateva oia. <sup>17</sup>Kosa ateva me aaloanaane aue kapa, me lo ateva taumattu eaimuli tee aaloanaane God, aue etoka liu.

### **Tau ngai ssateena atoa Karisto aue la mae**

<sup>18</sup>Masi aliki etoa, airuuruu oia nau, me ngam ghe nongola va tau ngai ssateena ateva Karisto aue emae, me tale isaa oia nau oroi tau ngai ssateena atoa Karisto angila ghe mae sio. Liuna avalua o me ita kilakila va airuuruu oia tale nau. <sup>19</sup>Kasina taumattu oia ghe tokatoka teeita, me isaa oia angila ghele kasu vulitala. Karika va koronna va kapuita ila, ta arova kapuita ila aue laghele toka teeita. Kasukasuaaira eaapasunga va ila karika va ita aitaau.

<sup>20</sup>Me am, lo ateva manga ia ghe amangaiemla me am akapaaili ngam ghe kilala llo koronna. <sup>21</sup>Karika va apitipiti etaimim poli karika am kilakila inangari koronna. Karika, ta am kilakila. Me poli am kilakila va nikamekame karika emaemae tale voto koronna. <sup>22</sup>See tau nikamekame ia? Lo ateva taumattu eue va Iesu karika va Mesaea ia. Ia o ase taumattu ngateva, tau ngai ssateena ia Karisto, me eliuliu vilina ta Tamaita me Natuna. <sup>23</sup>Lo ateva eliuliu vilina ta Natuna ateva God, Tamana karika ia etana. Me lo ateva eaulia ngaotu Natuna ateva God, Tamana ia etana.

<sup>24</sup>Llo inangari am ghe nongola tale aitiutiu, am poso parasi. Arova am poso parasi, Natuna ateva God me Tamane aue lalu toka teeiem tale nau ekapa atoa. <sup>25</sup>Inangari nialokoi ia ghe auliaala, va maulue ateva tokatoka liu ia.

<sup>26</sup>Apitipiti atu inangari toko tani aulia ngaotu kieimim tale taumattu ekamekame. <sup>27</sup>Karisto ghe amangaiemla, liuna avalua o me karika am tuutukuna tale alomasaanga, ta poli Spirit Manga ateva, ia etaimim, eaapasunga ngakapaaili voto etaimim me inangarina akapaaili koronna, karika righi kamena. Liuna avalua o me am tokatoka aitaau tee Karisto, nongina



Spirit Manga ateva ghe apasungaala etaimim.

### Natuna atoa God

<sup>28</sup> Me liuna avalua o, masi natughu etoa, am toka aitaua teeia, ta nau eteva ekaurekati, aue ita tingina akorokoron-gana me karika aue ita palata nau eteva emae. <sup>29</sup> Arova am kilakilaia va ia ghulughuluena ia, ngam nim kilala va lo atoa la gheeghelei voto ghulughuluena laghe lutula etana.

**3** Karika pisike ia niaielousi eteva God Tamaita ghe ghelelela etaita, ta ghe kolotala va ita natuna ita, me koronna ia. Taumattu tale kosa ateva karika la kilakila God, liuna avalua o me karika la kilakilaia. <sup>2</sup> Kapughu etoa, ang ghe natuna itala God me auena vaalua ita toka, karika ghe auliaala etaita. Me ita kilakila va nau eteva ekaurekati, aue ita nongina ia, poli aue ita taraia va ia vaalue ia. <sup>3</sup> Lo atoa la aatoka tuutuli-ira etana, la gheeghelei eraarangisanaila nongina ia raarangisana ia.

<sup>4</sup> Lo atoa la gheeghelei ssavoto, la gheeghelei saasakia inangari nipaopao, poli ssavoto egheeghelei saasakia inangari nipaopao kanna God. <sup>5</sup> Am kilakila va ia ghe kaurekatila tani ghaa velu ssavoto, me ia karika righi ssavoto etana. <sup>6</sup> Lo ateva etokatoka etana, karika egheelei ssavoto, me lo ateva egheelei ssavoto, karika ghe taraia me karika ghe kilaia.

<sup>7</sup> Natughu etoa, am rau mene tau veluem va katoa ppae la tiuaakalipiem. Ta lo ateva egheeghelei voto ghulughuluena, ghulughuluena ia nongina Karisto ghulughuluena ia. <sup>8</sup> Lo ateva egheeghelei ssavoto kapuna ia Satana, poli Satana ghe tiuaa ngakasinala tani ghelei ssavoto emua arau. Liuna avalua o me Natuna ateva God ghe sio mae tani tturu uunguaane Satana. <sup>9</sup> Lo ateva taumattu ghe lutula ta God karika erooroo

tani ghelei ssavoto, poli inangarina ateva God etokatoka etana. Ia avalua o me karika erooroo tani ghelei ssavoto, poli ang ghe lutula ta God. <sup>10</sup> Ia avalua o me aue ita tara kila va see ila natuna atoa God me see ila natuna atoa Satana: lo atoa gheegheleiaaira karika masina karika va natuna ila God, tee me lo ateva karika eailousia tuena o nengane.

### Tani aielousia kateva kateva

<sup>11</sup> Inangari eteva ngam ghe nongoala tale aitiutiu va ita aielousia kateva kateva. <sup>12</sup> Ita rau mene nongina Kein kapuna ia sesa taumattu ngateva me ghe uvi ematela nengane. Mausi saa me ghe uvi emateala? Poli gheegheleiaane sesa me gheegheleiaane nengane ghulughuluena. <sup>13</sup> Liuna avalua o me am rau mene soghi, kapughu etoa, arova taumattu ngatoa tale kosa ateva oia la ssa teeiem. <sup>14</sup> Ita kilakila va angita ghe kasu vulila nimate me ita tale pai maulue ativilau, poli ita, ita aielousia tueita me nengaita atoa. Lo atoa la tam aielousia, ila la tokatoka tale nimate. <sup>15</sup> Lo atoa la sessa tee tueira o nengaira atoa ila nongina tau ni-aiuvi emate atoa, me am kilakila va tau ni-aiuvi emate atoa, maulue ateva tokatoka liu ia, karika ia etaira.

<sup>16</sup> Ia avalua o me ita kilakila va vaalue ia niaielousi eteva: Iesu ghe tau vella maamauluaane etaita, me ita, ita mene tau velu maamauluaaita tale tueita me nengaita atoa. <sup>17</sup> Arova see righi peina, me etam kila tuena o nengane ateva karika righi peina va aue esausia, vaalue ailousiaane ateva God aue etoka etana? <sup>18</sup> Masi natughu etoa, karika ita mene aielousia tale paaita, ta tale niuungu me tale voto koronna. <sup>19</sup> Ia o eaapasunga va ita kilakila va ita elome tale inangari koronna, me urunguitaniita ateva tee etokatoka amasina ta matane God <sup>20</sup> nau urunguitaniita ateva eue va angita sesala, poli God enaanamuu tale

urunguitaniita ateva, me ekilakila akapa voto.

<sup>21</sup> Kapughu etoa, arova urunguitaniita ateva karika eue va angita sesala, ita atoka tuutuliita ta God, <sup>22</sup> me aue ita ghaa voto ita kookolomi etana, poli ita nongonongo usila voto eaulia me ita gheeghelei voto eaamasimasia. <sup>23</sup> Me inangarina ghe auliaala toko, va tani aikkaia tale ararina atea Natuna ateva ta Iesu Karisto, me tani aielousia kateva kateva, nongina ghe auliaala etaita. <sup>24</sup> Lo atoa la nongonongo usila llo eaulia, la tokatoka etana me ia etaira. Ghe tau mae Spiriti eteva etaita, mausina avalua o me ita kilakila va ia etokatoka etaita.

#### Am tootoonga ase spiriti etoa

**4** Kapughu etoa, am rau mene aikaai ngakapa tale ase spiriti etoa. Poli oroi ila propete kamekame atoa angila ghe kasu ekapa seela tale kosa ateva oia, am tootoonga spiriti ekapa atoa tani tara va laghe kasula ta God o karika. <sup>2</sup> Aue utara kila kapuna ateva spiriti God ia avalua toko: va lo ateva spiriti eaaulia ngaotu va Iesu Karisto ghe taumatuula. <sup>3</sup> Me lo ateva spiriti karika eaaulia ngaotu Iesu, karika ghe kasula ta God. Ia o ase spiriti eteva, tau ngai ssateena ia Karisto, am ghe nongoala va aue mae, me ia oia ang ghele rekatala.

<sup>4</sup> Am, aliki etoa, am kapuna iem God, me ngam ghe apalala propete kamekame atoa, poli lo ateva etokatoka etaimim sarasarakanaaili ia me elaulau lo ateva tale kosa ateva. <sup>5</sup> Ila tale kosa ateva oia, me la aaulia voto tale kosa ateva oia, me taumattu ngatoa tale kosa ateva la nongonongo usilainila. <sup>6</sup> Ita kapuna ita God, me lo atoa la kilakila God, la nongonongo usilainita. See karika ia ta God karika enongonongo usilainita. Tale isaa o salana, ita rooroo tani kila koronna ateva spiriti me kamena ateva spiriti.

#### Kanna God niaielousi me kaluuta

<sup>7</sup> Masi kapughu etoa, ita aielousia kateva kateva, poli niaielousi eteva ghe mae sio ta God. Lo ateva eaelousia ghe lutula ta God, me ekilakila God. <sup>8</sup> Lo ateva etam aielousia karika ekilakila God, poli God tau ngaielousi ia. <sup>9</sup> God ghe apasungaala aielousiaane ateva etaita avalua toko: va ghe suula kateva nonga ia Natuna ateva ghe mae sio tale kosa ateva, me mausina avalua o me ita maamaulue. <sup>10</sup> Ia o niaielousi eteva: karika va ita, va ita ghe aielousiaala God, ta God ghe aielousieinitala, me ghe suula Natuna tani ghaa aipolipoli tale kaluuta ssavoto. <sup>11</sup> Kapughu etoa, poli God eaelousieinita, ita tee ita mene aielousia kateva kateva. <sup>12</sup> Karika teva ghe tara God, me arova ita aielousia kateva kateva, God etokatoka etaita, me ia o niaielousi eteva eghelei niuungu ghe uela va ita ghelei.

<sup>13</sup> Ita kilakila va ita, ita tokatoka etana, me ia etaita, poli ghe tau mae sio kapuna Spirit Manga ateva etaita. <sup>14</sup> Me angita ghe tarala me angita ghe aulia ngaotula va Tamane ghe suula Natuna tani sio asaangi taumattu tale kosa ateva. <sup>15</sup> Lo ateva eaulia ngaotu va Iesu Natuna ia God, God etokatoka etana, me ia ta God. <sup>16</sup> Me mausina avalua o me ita kilakila me ita aatoka tuutuliita tale aielousiaane ateva God etaita.

God tau ngaielousi ia, me lo ateva etokatoka tale niaielousi, etokatoka ta God, me God etokatoka etana. <sup>17</sup> Tale isaa o salana, niaielousi eteva eghelei niuungu ghe uela va ita ghelei, me aue ita rooroo tani tingina akorokorongana tale nau niaisakei eteva, poli ita nongina Iesu tale kosa ateva oia. <sup>18</sup> Karika righi nimatautu tale niaielousi eteva, ta ghulughuluena ateva niaielousi eghaaghaa velu nimatautu eteva, poli matautu eteva aipolina sesa. Lo ateva

emaamatautu, ghulughuluena ateva ni-aielousi karika ia etana.

<sup>19</sup> Ita aielousia God poli ia ghe aielousia ngakasinaitala. <sup>20</sup> Arova teva eue va, “Aghi aghaielousia God,” me esessa tee nengane o tuena ateva, tau nikamekame ia, ta lo ateva karika eaielousia nengane o tuena ateva etaataraila, karika erooroo tani aielousia God karika etaataraila. <sup>21</sup> God ghe tau mae sio niuungu tani ghelei, va lo ateva eaielousia God etani aielousia tee nengane o tuena ateva.

### Niaikaia ta Natuna ateva God

**5** Lo atoa la ghaikaia va Iesu Mesaea ia, natuna ila God, me lo atoa la ghaielousia Tamana, la ghaielousia tee natuna atoa. <sup>2</sup> Arova ita aielousia me nongonongo usila God, ita kilakila va aue ita aielousia natuna atoa. <sup>3</sup> Tani aielousia God, malloeana va ita aimuli tee voto eaaulia va ita ghelei me inangarina God karika aue aanasa tani ghelei. <sup>4</sup> Ta lo akapa atoa ita ghe lutula ta God, ita ghaapala sesa tale kosa ateva. Ia o lo ateva niapala: ita aikaia ta God. <sup>5</sup> See ia lo ateva eaapala kosa ateva? Lo ateva nonga eaikaia va Iesu Natuna ia God.

<sup>6</sup> Ia o lo ateva ghe mae sio tale manu ghe ghaala niasuu me tale rae ghe akalala tale aikotoo, Iesu Karisto etana, karika ghe mae sio nonga tale manu, ta ghe mae sio tale manu me rae. Isaa o voto Spirit Manga ateva ghe auli-aala, ita kilakila va koronna ia, poli Spirit Manga ateva koronna ia. <sup>7</sup> Kotolu voto lotolu aulia ngaotua: <sup>8</sup> Spiriti eteva, manu eteva me rae ateva. <sup>8</sup> Lotolu ghe asokoi eitauaala. <sup>9</sup> Taumattu ngatua la aakoronna llo voto taumattu ghe tarala me eaulia. Tale ia o salana atikirighi tau-

mattu etani akoronna llo voto God eaulia ngaotu Natuna, ta poli God koronna ia. <sup>10</sup> Lo ateva eaiesoa tale Natuna ateva God, ia ghe aiesoaala inangarina ateva God ghe aulia ngaotuela, me lo ateva etam aiesoa ta God eghelei va God tau nikamekame ia, poli karika eaikaia llo voto God eaaulia ngaotu Natuna. <sup>11</sup> Me inangari koronna isaa avalua toko, va God ang ghe tau mae sio etaita mauue ateva tokatoka liu ia, me ia o mauue ateva, ie ta Natuna. <sup>12</sup> Lo ateva eaighui tee Natuna, eghaaghaa mauue ateva. Me lo ateva karika eaighui tee Natuna ateva God, karika aue ghaa mauue ateva.

### Airuuruu tale inangari

<sup>13</sup> Apitipiti voto toko etaimim lo atoa am aikaia tale ararina atea Natuna ateva God tani gheleiem va am rooroo tani kila va mauue ateva tokatoka liu ia, ia etaimim. <sup>14</sup> Ita atoka tuutuuliita ta God va arova ita kolomi righi voto tale aloaloanaane, aue enongota. <sup>15</sup> Me arova ita kila va enongonongota, saa llo ita kolomi, angita kilala va angita ghaala.

<sup>16</sup> Arova teva etaimim etara teva nengana o tuena va eghelei ssavoto ateva karika aue katulainia lao tale nimate, elooloo sae mausina, me God aue tau lao mauue etana. Amene aulia lo atoa kaluira ssavoto karika ekaakatulainila lao tale nimate. Ta kateva ssavoto ekaakatulainila lao tale nimate. Karika aue va am looloo sae tale ia o ase ssavoto ateva. <sup>17</sup> Isaa akapaaili sesa gheegheleiaaita, ssavoto, me kasina ssavoto karika ekaakatulainita lao tale nimate.

<sup>18</sup> Ita kilakila va lo akapa atoa laghe lutula ta God karika la gheeghelei

§5:8 Kasina uru ngai laghe pitila tale inangari nge Latin me mene ghaata tale inangari nge Grik laghe pitila auena ta ninamanama 1300, la ghe pitila <sup>7</sup> *Kotolu voto lotolu aulia ngaotu epona liu: Tamana, Inangari eteva me Spirit Manga ateva, me lotolu ghe asokoi eitauaala.* <sup>8</sup> *Me kotolu voto lotolu aulia ngaotua tale kosa ateva: Spiriti eteva, manu eteva me rae eteva.*

ssavoto. Natuna ateva God, Iesu etana, eaitarainila, me sesa taumattu ngateva karika erooro tani ghelei saasakieinila. <sup>19</sup>Ita kilakila va ita kapuna ita God, me taumattu ngakapaaili tale kosa ateva etokatoka tale sarasarakania sesa taumattu ngateva. <sup>20</sup>Me ita kilakila va Natuna ateva God ghe mae sio me ghe

tau mae sio alomasaanga etaita va aue ita kila God koronna ia, me ita etana, me Natuna ta Iesu Karisto. Ia koronna ateva God me etautau mauue ateva tokatoka liu ia.

<sup>21</sup>Masi natughu etoa, am alekalekaiem tale tootoo goto atoa.

*Aiaaghaluene atikirighi uru ngai*

## Jon

*ghe pitiela*

**1** Aghi Jon, namu ngateva, Apitipiti uru ngai etikirighi eatuetu etam, masi kapughu vause ateva, God ghe suiematoongainiola, me natum atoa. Aghaielousieinam tale voto akapa koronna, me karika va aghi nonga ta lo atoa tee la kilakila voto koronna. <sup>2</sup>Aghaielousieinam poli voto koronna etokatoka etaita me aue etoka etaita nau ekapa atoa.

<sup>3</sup>Alooloo sae va maamasinaane, nikkaluaa, me luei kanna God Tamaita ia me Iesu Karisto Natuna ia God, aue toka aitaua teeita poli am ghe aiesoala me am aielousia voto koronna ghe auliaala.

<sup>4</sup>Etautau mae kinatama nimasimasi etaghi tani kila va katoa natum la kasukasu tale salana koronna nongina Tamaita ateva ghe auliaala va ita ghelei. <sup>5</sup>Me ia oia, masi kapughu vause ateva, karika apitipiti etam tani aulia righi ouna voto tani ghelei, ta anim aulia voto ita ghe ghaala tale aitiutiu, va God ekookolomi va ita aielousia kateva kateva. <sup>6</sup>Me niaielousi eteva ia avalua toko va ita kasu tale ninongo usila tale voto

ghe auliaala va ita ghelei, nongina am ghe nongola tale aitiutiu. Voto ghe auliaala isaa avalua toko va am kasu tale niaielousi.

<sup>7</sup>Oroieili tau nikamekame atoa, karika la aulia ngaotu va Iesu Karisto ghe tau-mattula. Ngila ghe kasu ekapa seela tale kosa ateva, me isaa o ase tau-mattu, tau nikamekame ila, me tau ngai ssateena ila Karisto. <sup>8</sup>Am paniem ta tau nikamekame atoa ta am rau velu voto ita ghe uunguaala ta aue am ghaa akapaaili aipolipoli. <sup>9</sup>Lo ateva eilou emuemue me eruu tani kasu tale niapasunga kanna Karisto, God karika ia etana, me lo ateva ekorokorongana tani kasu tale isaa o niapasunga, Iesu me Tamane lulu tokatoka etana. <sup>10</sup>Arova teva emae etaimim me karika eatua isaa oia niapasunga, am rau mene ghaaia va esso tanganueimim me am rau mene aikoloainia. <sup>11</sup>Lo ateva eaikoloainia, ie tee eghelei isaa o uunguaane sesa.

<sup>12</sup>Oroieili voto aghanna tani piti tau aatu etaimim, me karika aghalona tani piti tale uru ngai me aipitipiti etiulu, poli aghaiesoa tale ninanna va aue amae taraiem, me ita aippooa. Nau ita aitara, aue masimasiaaita enamungaili.

<sup>13</sup>Natuna atoa nengam vause ateva God ghe suimatoongainiela la suula masimasiaaira etam.

*Aiaakotonna atikirighi uru ngai*

## Jon

*ghe pitiela*

**1** Aghi Jon, namu ngateva, Apitipiti etam, masi kapughu eteva Gaeas, aghailousieinio tale voto koronna.

<sup>2</sup>Masi kapughu eteva, alooloo sae va umasimasi tale masi nitoka me isaa akapa voto aue emasina etam, nongina akilakila va maamauluaam ta Vau ngepona masina. <sup>3</sup>Nimasimasi eteva namungaili ia ghe ghaaieghila nau katoa kapuita ita aikaiaia ngaitauaa laghe mae sio me laghe auliaala vaalua karika ughe kasu vulila voto koronna. <sup>4</sup>Nau eteva anongonongo va natughu etoa la kasukasu tale salana koronna, masimasi-aaghi namungaili.

<sup>5</sup>Masi kapughu eteva, ughelei emasina uunguaam ta tau ngai kasuaa inangari etoa arongona ta utam kilakila katoa etaira. <sup>6</sup>Ailousiaam laghe auliaala tale ale manga. Urau mene ruu tani sausila tale aloannaira, poli ia o ase salana atikirighi eaamasimasi God. <sup>7</sup>Ta poli ararina ateae Iesu me laghe kasula, karika laghe annala tani ghaa righi niaisausi ta lo atoa karika la kilakila God. <sup>8</sup>Liuna avalua o me ita tani sausi isaa o ase taumattu tani uungu eitauaa teeila tale voto koronna.

<sup>9</sup>Aghe pitipiti lao sio ta taumattu ngatoa tale ale manga ateva, me Diotrepes, eaanna nonga tani muemueinila, karika aue eanna tani nongo usila voto aghaauliaa. <sup>10</sup>Liuna avalua o me marova amae, aue aghapasunga ngamasina voto egheelei me voto eauliaa teeieghi karika masina. Me karika va egheelei nongallo, ta etam aikoloaa tee lo atoa la ghaaikaiaa me epaopao lo atoa vara la ghelei isaa o voto, me etiutiu vella tale ale manga.

<sup>11</sup>Masi kapughu eteva, urau mene aimuli tee taumattu sesa, ta uaimuli tee taumattu masina. Lo ateva egheelei voto masina kapuna ia God, me lo ateva egheelei voto sesa, karika ghe kila God. <sup>12</sup>Ila akapa taumattu ngatoa la ghaauliaa masi gheeleiaane Demetrius, me gheeleiaane elaolao aitaaua tee inangarina God koronna. Aghi tee aghauliaa masi gheeleiaane me am kilakila va kiukiu aghauliaa koronna.

<sup>13</sup>Oroi voto aghanna tani auliaa etam, me karika aghanna tani piti tale uru ngai, <sup>14</sup>poli aghaiesoa tale ninanna va ghaisa ngarighi amae me italu aitara me italu aippoaa.

Alooloo sae va luei aue etoka etam, me kapum atoa oia la suula masimasiaaira ta ngetam, me uauliaa masimasiaaghi ta kateva kateva ta kapuitalua atoa ona.

*Uru ngai etikirighi*

**Jiud**

*ghe pituela*

**1** Aghi Jiud, kapuna tau ngai uungu ieghi Iesu Karisto, me nengane ieghi Jeimis

apitipiti ta am lo atoa God ghe koloamla, me God Tamaita ia eailousieniem me eaitarainiem mausi Iesu Karisto.

<sup>2</sup> Aloo lo sae va God aue arangiseiem tale oroieili alousiusiaane, luei, me niailousi eteva.

**Niaisakei tale kamena  
atoa tau ngai apasunga**

<sup>3</sup> Masi kapughu etoa, aghe annaailila va aghe pitipiti aatu etaimim tani aulia uungua nisaanga God eghelei etaita, ta aghe ateateaala va apitipiti me aghaulia ngakorokorongana etaimim tani ppoa kotokoto tale voto koronna God ghe taula katengaata ta kapuna atoa manga ila. <sup>4</sup> Poli katoa ase taumattu ngila ghe kupi einao ssola elome etaimim, emua arau laghe pitila va aue sesa voto elutu etaira. Karika la oneoneaa God. La aikolikolia maamasinaane kapuita God ateva elaolao tale aloannaaira sesaaili, me la ratirati Iesu Karisto, ie nonga kapuita namuu ia me Vauita ia.

<sup>5</sup> Ngam ghe kilala kiukiu, me aghanna tani mene aulia etaimim va Vau ngepona ateva ghe ghaa oghila kapuna taumattu ngatoa eIjip, me emulina ghe tturuula lo atoa karika la aiesoa etana. <sup>6</sup> Ngam ghe kila teela ensolo atoa karika laghe ghelei emasinala uunguaaira nongina laghe tokatoka me laghe kasu vuli tanganeira, God ghe irilala tale sene atoa karika la rooro tani tapate me la toitoi tale saurrom ateva tani aisakei tale kinatama nau niaisakei eteae. <sup>7</sup> Tale isaa

nonga o ase salana, eSodom me eGomorra me llo masaliki taatara kalakala etairarua laghe ghaala sesa aipolipoli ta laghe tau vella vilikiira tani ghelei sesa niailai me laghe laula salana ghulughuluena tale uungua nilai. Liuna avalua o me la aimatoonga va am akekkeliem tale kura ateaerooro tani pala.

<sup>8</sup> Tale isaa o nonga ase salana, isaa o taumattu ila elome etaimim, tau niasosopoi ila, la ghelei ekulukulutana vilikiira tale uungua niailai sesa, me la ratirati voto matuutuliena, me la aulia saasakia tee kapuna ensolo atoa God mallanga ila. <sup>9</sup> Me kapuira namu ngateva ensolo atoa ta Maekol karika ghe aimuli tee isaa o salana. Nau ghe aisakeana tee Satana, va see kaiaa Moses, karika ghe aulia saasakiaala ta God tani ghelei niaisakei ta Satana, ta ghe nim uela etana va, "Aue Vau ngepona ateva eghelei niasakei etam tale voto sesa ughelei."

<sup>10</sup> Me ila o taumattu ngatoa la poppooa voto karika masina tee llo voto aloira karika emaamasaanga, me llo la ghalomasaanga tani ghelei la ghelei nonginaaili ghaata kkena atoa karika righi nannaaira, me isaa o voto etani tuuturungila.

<sup>11</sup> Alousiusi etaira, ta ngila aimuli tee salane Kein, me la ghe ailuilui nonginaaili sesa gheleiaane Baelam laghe ghelei tani ghaa viliki veu. Aue la turungila nongina laghe turungila Kora poli ghe aamakatakata.

<sup>12</sup> Isaa o taumattu nongina atu eteva etokatoka rungaa sao atikirighi tale uneimim niaighui me kinatama nimanama atoa. La namanama teeiem me karikaaili emoimoila. Tau ngai toi sipipi ila la angiinginila nonga; ila uru kookoo ila karika la ghalakuti vao me enim kuukuueinila see. Me ila arova ai eteae nauna tani kune me karika ekunekunea uene ta matena ia me la mene mukemukeia. <sup>13</sup> Paapalataaira tale

gheeieiaaira eotuotu arova viiso koto ngelo malionge atoa la ghaasuu, me ila nongina katto atoa la nim ilou ekapa see, me saurrom ateva avoonaaili ia God ghe aimonomosieiniela etaira tokatoka liu ia.

<sup>14</sup>Inok, aiaaghaituna ia ta Adam, ghe ppoa ngamuemua alokoila inangari tale isaa oia ase taumattu, ghe uela va, “Tarala, Vau ngepona ateva ange maemae tee airari me airari kapuna en-solo atoa manga ila <sup>15</sup>tani ghelei nisakei ta taumattu ngakapa atoa me tani apasunga sesa gheeieiaaira lo akapa atoa taumattu karika la oneoneaa God, me tale isaa akapaaili sesa voto laghe gheleila tale sesa salana, me tale sesa inangariira ila o tau ssavoto atoa laghe aulia teeiela.” <sup>16</sup>Ila o taumattu ngatoo tau niauliulua ila me la sessa tee mene katoa. La aimuli tee sesa aloalanaaira me la tautau sae nannaaira me la ghaarua mene katoa tani nim asaesae arariira.

**Nikolokolo tani poso parasi**

<sup>17</sup>Me masi kapughu etoa, am nnaa saa ateva kapuna apostolo atoa Vauita ateva Iesu Karisto laghe aulia ngamuemua alokoiela. <sup>18</sup>Laghe uela etaimim va, “Aue airuuruu tale nau, lo atoa la aanamisaa God aue la aimuli tee aloanaaira karika masina.” <sup>19</sup>Isaa o taumattu aue eatoka apolopoliem, la

aimuli tee nannaaira, me Spiriti eteva karika ia etaira.

<sup>20</sup>Me am, masi kapughu etoa, am asarasarakanaiem tale uneimim niaikaaili mangaaili, me am looloo sae tee Spirit Manga ateva me esausiem.

<sup>21</sup>Me am toka tale aielousiaane ateva God nau am toitoi Vauita ateva Iesu Karisto tani tau aatu mauue ateva tokatoka liu ia, poli ghe apasungala alousiusiaane etaimim.

<sup>22</sup>Am aisausiaa lo atoa nannaaira eghaaghalua. <sup>23</sup>Am asaangi lo atoa la ghanna tani saanga nongina va am ghe asaangilala tale kura atea. Am apasunga alousiusiaaimim ta mene katoa tee nimoia, am akekkeliem tale kaluira ssavoto, egheleila la kulukulutana.

<sup>24</sup>God sarasarakana ia me eroo tani sausiem me karika am rooro tani katuu. Erooro tani ghaaiem me elaoainam tale voto ateva mallangina ateva etokatoke etana, nau etaraiem, karika aue etara righi sesa gheeieiaaimim. Me aue eroo tani tau aatu kinatama nimasimasi etaimim. <sup>25</sup>Ia nongaaili kapuuta Goto ia, tau ngai asaangita ia, ta ngetana mallanga, namuu ia tale voto akapaaili, sarasarakana, me matuutulienu tale uunguaane Iesu Karisto, kapuuta Vau palepale ateva, tale isaa akapa nau emua arau, ghaine me nau ngemuli. Koronna.